

**IRINEANE TASORENTSI
oquenquetsatacotaqueri
Avincatsarite Jesoquirishito**

El Nuevo Testamento en el idioma asháninca
de los ríos Ene, Tambo y bajo Perené
Perú



Sociedad Bíblica Peruana, A. C.

El Nuevo Testamento en el idioma asháninca
de los ríos Ene, Tambo y bajo Perené
Perú

Primera edición, 1972
Segunda edición, 2008

Publicado por
© Sociedad Bíblica Peruana, A. C. 2008

Usted es libre de copiar, distribuir y comunicar públicamente
la obra bajo las condiciones siguientes:

- Reconocimiento. Debe reconocer los créditos de la Sociedad Bíblica Peruana (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

ÍNDICE

Yora Mateo Isanquenatacotaqueri Jesoquirishito, Jaoca Icanta Iriori Yoavisacotanti	5
Yora Maricoshi Isanquenatacotaqueri Jesoquirishito, Jaoca Icanta Iriori Yoavisacotanti	68
Yora Irocashi Isanquenatacotaqueri Jesoquirishito, Jaoca Icanta Iriori Yoavisacotanti	105
Yora Joa Isanquenatacotaqueri Jesoquirishito, Jaoca Icanta Iriori Yoavisacotanti	170
Yantayetiniri Itiancaneni Jesoshi	215
Yora Pavoro Isanquenatiniri Oromasati	271
Ijivataque Pavoro Isanquenajeitaqueneri Corintosati	296
Yora Pavoro Yapiitajiniri Aisati Isanquenatajiniri Corintosati	320
Yora Pavoro Isanquenatiniri Carashiasati	336
Yora Pavoro Isanquenajeitiniri Ejesosati	346
Yora Pavoro Isanquenatiniri Jiriposhisati	356
Yora Pavoro Isanquenatiniri Corosashisati	363
Ijivataque Pavoro Isanquenajeitiniri Yora Tesaronicasati	370
Yapiitajiro Pavoro Isanquenajeitiniri Tesaronicasati	376
Ijivataque Pavoro Isanquenatiniri Timoteo	379
Yapiitajiniri Pavoro Isanquenatajiniri Aisati Timoteo	387
Yora Pavoro Isanquenatiniri Tito	392
Yora Pavoro Isanquenatiniri Iriori Jiremona	395
Isanquenayeetiniri Ijorioririnte	397
Isanquenatiri Santiaco	419
Ijivataque Petero Isanquenatiniri Iyemisantaririnte	427
Yapiitajiro Petero Isanquenatiniri Iyemisantaririnte	435
Ijivataque Joa Isanquenatiniri Iroamere	440
Yapiitajiro Joa Isanquenatiniri Iroamere	446
Mavatapaaque Isanquenatiniri Joa Iroamere	448
Yora Jorashi Isanquenatiniri Iyemisantaririnte	450
Icamantiri Tasorentsi Joa Paitarica Irantayeteri Jesoquirishito	453

YORA MATEO ISANQUENATACOTAQUERI JESOQUIRISHITO, JAOC A ICANTA IRIORI YOAVISACOTANTI

**Isanquenataquero ivajiropee
ishanincapeeni Jesoshi.**

(Ir. 3.23-38)

1 ¹Meeca nosanquenajeitempiro ivajiropee icharinepeeni Jesoquirishito. Tempa irio ishanincani Iravirini aisati Avaramani.
²Ari itimini Avarama. Iri itomi iriori: Isaca. Iri itomi iriori Isaca: Jacovo. Iri itomipee iriori Jacovo: Jora aisati irirentipee. ³Iri itomipee Jora: Jareshi aisati Sara. Iro irinironi Jareshi opajitani Tamara. Iri itomi Jareshi: Eshromo. Iri itomi Eshromo: Arama. ⁴Iri itomi Arama: Aminarava. Iri itomi Aminarava: Naso. Iri itomi Naso: Saramo. ⁵Iri itomi Saramo: Voso. Iro irinironi Voso opajitani Arava. Iri itomi Voso: Overe. Iro irinironi Overe opajitani Orito. Iri itomi Overe: Jese. ^{6,17a}Iri itomi Jese: Iraviri, yora pincatsattiri. Ari icarajeitaque iriori 14 shirampari.

Impoiji itimi itomi Iraviri: Saromo. Iro iriniro Saromo ora yaaveitaniri Oriashi. ⁷Iri itomi Saromo: Orovoama. Iri itomi Orovoama: Aviashi. Iri itomi Aviashi: Asa. ⁸Iri itomi Asa: Josavata. Iri itomi Josavata: Jorama. Iri itomi Jorama: Oshiashi. ⁹Iri itomi Oshiashi: Joatama. Iri itomi Joatama: Acasa. Iri itomi Acasa: Eshequashi. ¹⁰Iri itomi Eshequashi:

Manasheshi. Iri itomi Manasheshi: Amo. Iri itomi Amo: Joshiashi. ^{11,17b}Iri itomi Joshiashi: Jeconiashi, aisati irirentipee. Ari icarajeiti iriori aisati 14 shirampari. Itimantari Jeconiashi, yora soraropee poneachari Vavironiaqui yaajeitanaqueri maaroni jorioopee anta inampiqui.

¹²Impoiji itimi itomi Jeconiashi: Saratiyeri. Iri itomi Saratiyeri: Sorovaveri. ¹³Iri itomi Sorovaveri: Aviori. Iri itomi Aviori: Eriaquimi. Iri itomi Eriaquimi: Asoro. ¹⁴Iri itomi Asoro: Saroco. Iri itomi Saroco: Aquimi. Iri itomi Aquimi: Erioro. ¹⁵Iri itomi Erioro: Erisara. Iri itomi Erisara: Mata. Iri itomi Mata: Jacovo. ^{16,17c}Iri itomi Jacovo: Jose. Iri Jose ojimetsori Maria, ora iriniro Jesoshi. Ipajitiri aisati Quirishito. Ari icarajeiti maaroni iriori shirampari 14.

Itimapaaque Jesoshi.

(Ir. 2.1-7)

¹⁸Meeca noncamantempi jaoca ocantari itimantacari peerani Jesoshi. Ainiro yora Jose ijinatsori, opajita Maria. Isareacaro irayero, iro cantaincha tequera irineero. Iro cantaincha otsomontetaque: iro otsomontetantacari otasoncaquero Ishire Tasorentsi. ¹⁹Iro iotantacari Jose otsomontetaque, iquenqueshireaca iriori: “Te oncameetsateji tsinane. Timatsiata oneayetiri. Eiro nairotsi”. Iro cantaincha

icameetsataque, icoaque incavintsayero Maria, te irimintej iroashiventayero; iquenqueshiretanaca: “Eiro nocamantajei-tiritsi oshanincaphee, ishirontimentarocari. Apaniro noncantero irointi: ‘Eiro meeca naimpitsi’”.²⁰Irootaque iquenqueshireta-naqueri, irosati imapocantacari inampire Tasorentsi, ineamainetaqueri. Icantapaa-queri:

—Jose, tempa aviro ishanincani Iravirini, eiro piquenqueshireatsi. Tecatsi onee shirampari pijinatsori. Iro otsomon-tetantacari otasoncaquero Ishire Tasoren-tsi.²¹Coajica ontimeri otomi, pimpajiteri iriori Jesoshi. Iro pimpajitanteeariri Jesoshi iroavisacojeiteri antayetirori caari cameetsatatsi.

²²Iro intimanteari iriori omoncaratan-teari isanquenatiniri peerani camantanta-tsiniiri Isayashini. Irio Avincatsarite sanquenatacaaquerir. Jero oca icantiniri:²³“Coajica ontsomontetashitanaquea caari neiri shirampari, ontimeri otomi. Impajiyeteri Emanoere”. Iro Emanoere ocanti aneanequi arori: “Itsipajeitaquee Tasorentsi”.

²⁴Ari itinaanaca Jose, iquemisanta-queri icantaquerir. Ijatashitaquero Maria, icantaqueri:

—Ari coajica naasanotempi.

²⁵Iro cantaincha tequera irineeroji: iro caariquera ineantaro, tequera intimeji otomi. Itimantacari, ipajitaqueri Jesoshi. Impoijiquea yaasanotaquero.

Ipoqui ioyevetariri impoquiero irineeri Jesoshi.

2 ¹Ari itimapaaque Jesoshi anta Verequi. Otimi Vere anta Joreaqui. Itimantacari Jesoshi, irio pincatsariven-tantatsiri Eroreshi. Ari yareetapaaca Jerosarequi poneajeitachari pashiniqui quipatsi, anta arejiqui. Iquenapaaque anta iquenapainta catsirinaiteri. Ishiave-tari saserotepee, ioyevetari impoquiero-

pee, paitaricapee. ²Isampitapaaqueri jerosaresati:

—Jaoca yora ivincatsarite joriopee, yora iroqueria timaintsiri? Noneaqueri anta nonampiqui impoquiero iotacaanari itimaque. Meeca nopoqui nompincatsa-teri.

³Iquemantacariri yora pincatsari Eroreshi, iquenqueshireanaca, aisati iquempejeitaca maaroni jerosaresati.

⁴Impoiji yora Eroreshi icajemacantajeita-queri maaroni jivatacajeitaquerir saserotepee aisati maaroni yora oametan-tajeitirori sanquenarentsi. Isampijeita-queri:

—Paita ocantiri Sanquenarentsi?
Jaoca intimapeeri yora Quirishitotsiri?

⁵Yacajeitaqueri:

—Ocanti Sanquenarentsi intimapaaque Verequi, aca Joreaqui. Irootaque isanque-natacotitacariniri peerani yora quenque-tsatacantantsiniri pajitachaniri Miqueash: ⁶“Otimi Vere anta Joreaqui. Eiro itseenajeitirotsi ora nampitsi. Tempa imponeaquea anta Pincatsarisanori. Impincatsariventajeiteri maaroni joriopee”.

⁷Impoiji imanaquero Eroreshi icajema-cantaqueri yora coatsiri irineeri Jesoshi. Isampijeitaqueri:

—Jaoca ocaratiri pineantacariri impoquiero piotantacari itimapaaque pincatsari? Pincamantasanotena niotas-notantearori itimantacari.

⁸Ari icamantaqueri. Impoiji icantaqueri aisati:

—Cameetsa pijajeite meeca Verequi, pamenaiteri jaocarica isavicasanotaqueri yora jananequi. Ariorica pineapaaqueri, pimpocaje aisati aca, pincamantapeena. Nocoaque noneeri narori, nompincatsa-tanteariri.

⁹Ari ijajetaque. Nianqui ineajiri aisati impoquiero ineiquer chapinqui anta iponeacanta. Ijivatanaqueri

impoquiro anta itimaquenta jananequi, impoiji yaratincapaaque anta, iojeitan-tapaacarori ivanco.¹⁰ Iquimoshireimen-tasanotacari impoquiro iotacaajeita-queriri.¹¹ Impoiji ijatanaque pancotsi-quinta, iqueapaaque. Ineapaaqueri Jesoshi, aisati iriniro. Itiyeroashitapaa-cari Jesoshi, ipincatsatapaaqueri. Impoiji itatareapaajiro itsivoote, yaajiro ashirotsatsiri pajitachari oro. Opinatasanotaca. Aisati yaajiro casancayetatsiri, ipajeitapaaqueri.¹² Impoiji imaajeitanaque irioripee. Ineamainetaqueri Tasorentsi, icantaqueri:

—Eiro pipianajatsi anta Eroreshiqui; ariorica pimpianaje piipatsitequi, pinquenanaje pashiniqui avotsi.

Ishiajeitanaca Ejipitoqui Jose, jero Maria; yaanaqueri Jesoshi.

¹³ Ari ipiajeitanaja yora iovetariri impoquiropee. Impoiji aisati yora Jose ineamainetaqueri inampire Avincatsarite. Icantapaaqueri:

—Meeca pijajeite: avirori, yora jananequi, aisati iriniro. Pishiajeitanaque Ejipitoqui. Pisavicajeitapaaque anta irosati noncantantempi. Irotaintsi incoayeteri Eroreshi yora jananequi. Icoaque iroyeri.

¹⁴ Irosati ijajeitantanaca, nianquitteni tsiteniri. Yaanaqueri jananequi anta Ejipitoqui, itsipatanacaro iriniro.¹⁵ Ari osamanitanaque isavicajeitapaaque anta. Impoiji icamaque Eroreshi. Iquemacotaqueri icamaque, irosati ipiajeitantaja anta iipatsitequi. Irootaque peerani isanquenatacotaque-niri oca yora quenquetsatacantatsiniri pajitachari Oseashi. Irootaque Avinca-tsarite sanquenatacairyiri. Isanquenatti: “Icani Tasorentsi: ‘Intimavetea notomi anta Ejipitoqui, noncajemajeri impiaje aisati’”.

Yora Eroreshi yoacantaqueri jananequipee.

¹⁶ Impoiji ionirotanaque Eroreshi yamatavitaqueri yora iovetariri impoquiropee: te impiajeji aisati. Ari iquisasano-tanaca, itiancaqueri soraropee, icantiri:

—Pijajeite anta Verequi, poajeiteri maaroni jananequipee, pintsoncajeiteri maaroni shirampari: iroaquera timayeta-tsiri, maaroni; aisati poajeiteri moncaratainchari apite irosarintsite, maaroni.

Ja, icantaqueri chapinqui yoranqui tequera irimoncaraterozi Jesoshi apite irosarintsite.¹⁷ Aisati isanquenatacotaque-roni oca yora quenquetsatacantatsiniri pajitachaniri Jeremiashi:¹⁸ “Oncajema-co-tasanoteri aramasato otomipee, oshequi iraacojeiteri. Ompajitea Araquere iraacoterineri otomipee. Iro oashiretan-teari iroiteetero otomipee, maaroni”.

Ipianaja Jose Nasaretequi, yaanajiri Jesoshi aisati iriniro.

¹⁹ Ari impoiji icamaque Eroreshi, ainiroquera isaviqui Jose iriori anta Ejipitoqui. Impoiji ineamainetajiri aisati inampire Avincatsarite, icantaqueri:

²⁰ —Tsame pimpianaje anta piipatsite-qui, paanajeri jananequica aisati iriniro. Camaque meeca coavetachari iroyerime.

Ari ipajjeitirori iipatsite Jose iipatsiteni Ishiraerini.²¹ Ari ijatanaji, yaajeitanajiri anta iipatsitequi.²² Iro cantaincha yareetantajari Jose, icaman-teetiri:

—Irio pincatsariventajeitiriri meeca joreasati yora Arequerao. Ipoyeetajari iririni: yora Eroreshini.

Ari aisati itsaroacaapaacari Jose yora pincatsaritajantsiri, aisati ineamainetaqueri Tasorentsi, icantiri:

—Paamayeariyea yora Arequerao.

Irosati yovaantanaja Jose anta Carirea-qui.²³ Yareetapaaca, isavicapaaque nampitsiqui pajitachari Nasarete.

Irootaque omoncaratantacari isanquenatacoteetacariniri Jesoshi: "Imponeaquea Quirishito Nasaretequi".

**Yora Joa vaotisatantatsiri
iquenquetsatacantapiniti anta
caaraiteriqui.**

(Mr. 1.1-8; Ir. 3.1-18; Joa 1.19-28)

3 ¹Ari impoiji ijataque Joa, yora vaotisatantatsiri ora caaraiteriqui: ora carirequiniri. Iquenquetsatacaapinitiri ishaninca, ²icantapinitiri:

—Pinquenqueshirejeitanaquea, eiro piquempejeitajatsi peerani: paventajeiteari meeca Tasorentsi, irotaintsi impincatsariventajeitee.

³Ari peerani iquenquetsatacotaquerini Joa yora quenquetsatacantatsiniri pajiveitachaniri Isayashi. Jero oca isanquenatacotaqueriniri Joa: "Coajica inquenquetsatacajeiteri ishaninca anta caaraiteriqui, incanteri: 'Paamayeariyea Avincatsarite, pincameetsatanaque paacameetsatavacaajeitanteari'".

⁴Irio iquitsaatari Joa tijachari iviti cameyo. Irio ishiticatsaquitari meshinantsitsa. Yoapinitari quentori aisati irapinitiri ija pitsi. ⁵Ijatashijeitaqueri maaroni jerosaresati iquemisantajeitavaqueri, aisati maaroni joreasati aisati maaroni savicajeitatsiri Joriraniqui.

⁶Icantajeitapaquaqueri:

—Ainiro nantayetiri caari cameetsatsi. Nocoaque incavintsayena Tasorentsi, iroavisacotajena.

Impoiji ivaotisajeitavaqueri Joa Joriraniqui.

⁷Aisati ipocajeiveta variseopee aisati saroseopee, icoajeiveta irivaotisajeiteame, iro cantaincha quisatsatavaqueri Joa. Icantavaqueri:

—Te pincameetsajeitejive, quempejeitaquempi maranque. ⁸Pijitashijeivetampa eiro yoasanquejeitimpitsi Tasorentsi?

⁸Picoajeitaquerica novaotisajeitempi, ari

cameetsa pisavicajeite niotanteari pojocasanotaquero caari cameetsatatsi pantapinjeitiri. ⁹Picantajeivetaca: "Narojeitaque ishanincani Avaramani, aitaque irineacameetsataquena Tasorentsi". Pamatavitaja avisati. Incoaqueri-came Tasorentsi, impeajerome oca mapi ishanincani Avaramani, iro cantaincha eiro ojatitsi inquitequi. Aisati piquempejeitaca avirori: patsipetashijeitacaro pishanincavetacari Avaramani. ¹⁰Tempa achaquitapinitiro inchatopee caari timatsi oitsoqui, impoiji ataajeitajiro. Aisati inquempetea Tasorentsi, irotaintsi iroasanquejeiteri maaroni caari antiniri icoacaajeivtariri. ¹¹Ariorica niotaque yojocajeitiro atiripee caari cameetsatatsi yantajeitaqueri, novaotisajeitaqueri nijaqui. Iro cantaincha timatsi imposta-steenneri: intianajeiteneri iriori quemisantajeiterineri Ishire Tasorentsi, irinti tseencantatsiri iroasanquejeiteri. Oshequi ipincatsaritaque irinti imposta-eneri. Oshequi nopincatsataqueri; notseen-caja narori catsini. ¹²Ariorica avitero aroso, impoiji antincaiquero. Otaqui antayero, irointi oitsoqui anquempoyejero onantariqui. Aisati inquempetea Avincatsarite, irinashitacaajeitajeari atiripee: incavintsayeri quemisantajeiterineri, irintiquea caari cameetsatatsine irojocajeri paamariqui, ora caari tsivacanetatsi.

Ivaotisataca Jesoshi.

(Mr. 1.9-11; Ir. 3.21-22; Joa 1.31-34)

¹³Impoiji ijataque Jesoshi Joriraniqui, iponeanaca Carireaqui. Ijatashitaqueri Joa, irivaotisatavaqueariri. ¹⁴Te incoaveteoji Joa irivaotisateri, icantavaqueri:

—Eiro novaotisatimpitsi avinti.

Aviroquea vaotisatapeenane avinti.

¹⁵Paita picoantari novaotisatavaquempi avirori? Oshequi pipincatsaritaque.

¹⁵Yacanaqueri Jesoshi:

—Nocoasanotaque pivaotisatavaquena. Irootaque icoacaquenari Tasorentsi.

Icantiqueri:

—Ari, novaotisataquempi.

¹⁶Ari ivaotisataqueri, impoiji yaatanajji. Impoiji iriori Jesoshi, ineavaquero Ishire Tasorentsi, oponeaca inquitequi, anuireashitapaaqueri, oshiavetapaacari sampaquiti. Aatapaaqueri. ¹⁷Impoiji iquemajeitaqueri Tasorentsi anta inquitequi, icanti:

—Iriotaque yoca notomi nonintasanotaqueri. Oshequi noveshireimentacari.

**Yora camaari icoavetaca irantacayerime
Jesoshi caari cameetsatsati.**

(Mr. 1.12-13; Ir. 4.1-13)

4 ¹Impoiji Ishire Tasorentsi aanaqueri Jesoshi anta ocaraitapai. Aitaque ocoaqueri irineantaveteari camaari. Icoavetaca camaari irantacayerime Jesoshi caari cameetsatsati. ²Ari itimaque Jesoshi anta ocarataque 40 quitaiteri, te iroyeaji catsini. Aasanotaqueri itashe. ³Impoiji yora camaari ijatashitaqueri Jesoshi, irineantapeempariri. Icantavetapaacari:

—Avirosanotaquerica Itomi Tasorentsi, jentsite, pimpeero mapica pitantane, poantearori.

⁴Yacanaqueri Jesoshi:

—Te apaniro oncoiteimotee atantane, irointi acoaque anquemisantero maaroni icantaqueeri Tasorentsi.

⁵Impoiji yaanaqueri camaari anta Jerosarequi: anta ochoviinaquuitapaaque ivanco Tasorentsi. ⁶Icantavetacari:

—Avirorica Itomi Tasorentsi, pisapocanaque oshaavijinta quipatsiqui. Pinquenqueshireero ocantiri Sanquenarentsi: “Intianquemperi Tasorentsi inampire inquempoyempi. Irancatsatavajempi eiro pipariantatsi mapiqui”.

⁷Yacanaqueri:

—Aisati ocanti Sanquenarentsi: “Eiro pineantartitsi Pivincatsarite, tempa irio Tasorentsi”.

⁸Aisati yapiivetajari camaari, yaanajiri antearoqui toncaari. Ijicotapainiri maaroni quipatsi, icantavetari:

—Pineajeitaqueri maaroni savicajeita-tsiri, aisati tempa ocameetsajeitaque maaroni imajeitaqueri. ⁹Ariorica pimpin-catsatena narori, noncamantajeiteri maaroni impincatsajeitempi avirori.

¹⁰Yacanaqueri aisati:

—Pijanirotaje. Avironiro Satanashi. Tempa ocanti Sanquenarentsi: “Pimpin-catsatasanoteri Avincatsarite, tempa iriotaque Tasorentsi. Apaniro irinti catsini pinquemisanteri”.

¹¹Irosati ijatantanaja camaari. Impoiji ipocaque inampireepe Tasorentsi, intacojeitacari.

Ijataque Jesoshi Carireaqui.

(Mr. 1.14-15; Ir. 4.14-15)

¹²Impoiji iquemaque Jesoshi yoyeetaqueri Joa caravosoqui, irosati ipiantanaja Carireaqui. ¹³Iro cantaincha te irisavicaapeji Nasaretequi, ainti ijataque Caperenaoqui, isavicapaaque anta. Otimi Caperenao anta otsapijaqui antearoja incajare. Otimi quempeji Savorono aisati Nejatari. ¹⁴Aisati isanquenatacotaqueroni oca yora Isayashini peerani: ¹⁵“Otimi Savorono aisati Nejatari otsapijaqui incajare, anta Joriraniqui intatiquero, anta Carireaqui. Anta itiminta oshequi itsipapee atiri, caari inajeiti jorio.

¹⁶Oquempetimojeivetacari itimini tsiteniriqui, te irijoiveitearini Tasorentsi. Irijajeiteme Sharincaveniqui, iro cantaincha meeca oquempetaca itimi quitaitetacojeitiriri, iotacaajeitiriri”.

¹⁷Ari intanacarori Jesoshi iquenquetsatacajeitaqueri atiri anta, icantajetaqueri:

—Pinquenqueshirejeitanaquea, eiro piquempetajatsi peerani. Irotaintsi impincatsariventajeitempi Tasorentsi.

Icoyeaqueri Jesoshi aparopee iroamere.

(*Mr. 1.16-20; Ir. 5.1-11*)

¹⁸Ari ishiteatanaca Jesoshi anta otsapijaqui incajare: ora timatsiri Carireaqui. Ineapaquaqueri apite shirampari, yora Shimo Petero, jeri aisati irirenti, yora Antirishi. Irio quitsatapinitiriri shima. Ineapaquaqueri Jesoshi, iquitsajeiti,
¹⁹icantapaaqueri:

—Tsame pojatanaquena. Nocoaque pinquemisantacaapiniteri atiri.

²⁰Irosati yojocajeitantanacaro iitsarite, yojajeteitanaaqueri. ²¹Ari yavishimatanaque irosati ineantapaa-cari Santiago aisati Joa. Iriojeitaque itomipee Severeo. Isavicajeiti ivitoqui, ishiticajeitiro iitsarite. Icajempaa-queri Jesoshi, ²²irosati yojajeteitanaa-cari. Yojocajeitanaqueri iriri apaniro anta ivitoqui.

**Iquenquetsatacantayeti
Jesoshi anta Carireaqui.**

(*Mr. 1.39; 3.7-8; Ir. 4.40; 6.17-19*)

²³Iquenaquenayetanaque Jesoshi anta Carireaqui. Maaroni nampitsiqui iquenquetsatacaajeitaqueri atiri anta pancotsiqui yapatotapinijeitantar. Icantiri atiri jaoca icanta Tasorentsi ipincatsariventajeitaquee. Yoavisaacojeitaqueri oshequi mantsiaripee: onashiye-taca aayetiriri imantsiare. ²⁴Iquemacojeitaqueri Jesoshi yora savicajeitatsiri anta arejiqui: iota-cotaqueri maaroni shiriasati. Yaajeitanaqueneri Jesoshi oshequi ishaninca mantsiyatatsiri iroavisacojei-teri. Yojoquiyetaca, icatsiyetaque, icamanatapiniyetaque, iquisoporoquiyetaque. Aisati yaanaqueneri neayetiriri camaari. Ari yoavisaacojeitavaqueri Jesoshi. ²⁵Yojajeteitaqueri oshequi cariresati, tecaporishisati, jerosaresati, joresati, poneayetachari Joriraniqui intatiquero.

Iquenquetsataque Jesoshi anta toncaariqui: iquenquetsatacotaqueri quimoshirejeitatsineri.

(*Ir. 6.20-26*)

5 ¹Ineajeitaqueri Jesoshi icarajeitaque oshequi apatotimentajeitariri, ari ijataque toncaariqui, isavicaque anta. Yora iroamerepee yapatojeitaqueri atiri, maaroni. Icantajeitaqueri ishoncajeitapaacari. ²Impoji yoamejeitaqueri, icantajeitaqueri:

³—Inquimoshiretacaajeiteri Tasorentsi maaroni caari shemetatsi, impincatsariven-tajeiteri. ⁴Inquimoshiretacaajeiteri Tasorentsi maaroni oashirejeivetainchari, iroimoshirencajeiteri. ⁵Inquimoshiretacaajeiteri Tasorentsi maaroni ashinoncaincari, incavintsaajeiteri. ⁶Inquimoshiretacaajeiteri Tasorentsi maaroni coasanotatsiri intime cameetsa, iramatacojeiteri. ⁷Inquimoshireta-caajeiteri Tasorentsi maaroni cavintsaajeiti-riri ishaninca, incavintsaasanojeiteri iriori.

⁸Inquimoshiretacaajeiteri Tasorentsi maaroni cameetsashirejeitatsiri, irineajeita-jeri. ⁹Inquimoshiretacaajeiteri Tasorentsi maaroni oimajerentajeitaqueriri quisachari, intomintajeiteari. ¹⁰Ariorica pincameetsata-naque, irootaque inquisantempiri, ari pinquimoshiretanaque: aviro savicasanotsineri anta ipincatsarintia Tasorentsi.

¹¹Iriotempirica atiri piquemisantajeitaquena, incantimatempri, inquisaquempi, intseyeac-taquempi. Ari pinquimoshirejtanaque.

¹²Pinquimoshirejtanaque, piveshireajeita-naquea: impinatasanojeitempi Tasorentsi anta inquitequi. Eiro pipeacotarotsi: tempa peerani iquisheetirini iriori yora camant-tatsiniri.

**Yora quemisantatsiri ishiaquero
tivi aisati tsiomentotsi.**

(*Mr. 9.50; Ir. 14.34-35*)

¹³Aisati icantajeitaqueri Jesoshi:

—Tempa atativatapinitiri ivatsa eiro ishititantatsi. Irompa terica ompoteate,

ontimaite: tempa ari ajocajero, tecatsi coyeroneri. Piquempejeivetacaro tivi: avirojeitaque oameetsajeiterineri atiri. ¹⁴Ariorica otimi nampitsi anta toncaariqui, otsiota maaroni pancotsipee tsiteniriqui. Tecatsi ancantero nampitsi amanero, tempa oconijatasanoti. Aisati piquempejeitacaro, aviro oamejeiterineri maaroni atiri: eiro pimanirotsi piojeitiri. ¹⁵Aisati, ariorica pintsiotero pitsiomento, te pimanapiniteroj otapinaqui cantiri. Tempa poapinitiro anta onantariqui yamenajeitantzari maaroni savicajeitatsiri pancotsiqui. ¹⁶Aisati aviroripee, cameetsa pisavicajeitanaque irineajeitantzempiri maaroni pishanincapee ocameetsataque maaroni pantajeitaqueri. Impoiji irineacameetsajeitantzeariri Apa savicatsiri inuitequi.

**Iquenquetsatacotaquero Jesoshi
isanquenareni Moishishi aisati yora
quenquetsatacantatsiniri.**

¹⁷Aisati icantajeitaqueri:

—Eiro pijitashiteitatsi nocoaque nojocacaajempiro piquemisantiro isanquenare Moishishi aisati icantajeitiniri yora quenquetsatacantatsiniri. Iro cantaincha nocoaque noamejeitempo icantasanajeitaqueri. ¹⁸Queariotaque oca noncamantempiri: ontsoncajearica quipatsi aisati inuite, iro cantaincha eiro otsonquimatsati catsimi isanquenajeitaqueri. Omoncarataquea maaroni icantakeri. ¹⁹Eivorica piquemisantasoñotiro isanquenatiniri, aisati ariorica poameteri pishaninca eiro iquemisantasano-tiro, eiro ineacameetsatasanotimpitsi Tasorentsi anta ipincatsaritinta. Iro cantaincha ariorica pinquemisantasonata-quero maaroni isanquenajeitiniri, aisati ariorica poamejeiteri pishaninca inquemisantasanojeitero, ari pimpincatsariventas-notantapaaje anta ipincatsaritinta Tasorentsi. ²⁰¿Pijitashiteitacarimpa icameetsajeitaque yora oametantirori sanquenarentsi aisati yora variseopee? Meeca noncamantempi: te

irimoncarajeiteroji icoacaajeivtariri Tasorentsi. Eivorica panaacojeitiritsi pincameetsatasanote, eiro pijatitsi anta ipincatsaritinta Tasorentsi.

**Icantajeitaqueri Jesoshi:
“Piquisavacaacariya”.**
(Ir. 12.57-59)

²¹Aisati icantajeitaqueri:

—Piojeitaquero icantiniri yora intacarorniri: “Eiro poanti. Ariorica poante, iroasanquetayempi Tasorentsi”. ²²Iro cantaincha noncamantempi: eiro piquishirtsi pishaninca: yoasanquetaimpicari Tasorentsi. Eiro picantiritsi: “Te pioteji”: iquishimpicari yora oametavacainchari. Eiro picantimatiiritsi pishaninca: pitaacari anta Sharincaveniqui. ²³Pamene, ariorica pijate anta ivancoqui Tasorentsi poaquieri pivira pimplanteariri; iro cantaincha otimirica iquishimentaqueempiri pishaninca, ²⁴aritsita icantavacatsita pivira, pijatashiteri yora quisquemppiri. Pincamanteri: “Eiro napiitajirotsi caari cameetsatatsi. Pincavintsayena aacameetsatavacaajeitantzeari”. Ariorica cameetsa paacameetsatavacaajea, ari pimpianaje ivancoqui Tasorentsi, irosati pimplantapeempariri pivira. ²⁵Ariorica intime quishempineri aanaquempineri anta joeshiqui. Ari pishintsite pincantajeri: “Eiro piquisajanatsi, tsame aacameetsatavacaajea aisati”. Ariorica irareetacaapaaquempi joeshiqui, incanteri variria: “Paanaqueri yoca”, impoiji iroiminqueaqueMPI anta caravosoquii. ²⁶Impoiji eivorica pipinatasanotiro maaroni pirevitiriri, eiro yoimisoquija-cantajimpitsi aisati.

**Icantajeitiri Jesoshi: “Paimentarocari
pijina; paimentaricari pijime”.**
(Mt. 19.9; Mr. 10.2-12; Ir. 16.18)

²⁷Aisati icantajeitaqueri:

—Piojeitaquero icantakeri intacaroniri: “Eiro paimentarotsi pijina, eiro paimentaritsi pijime”. ²⁸Noncamantempi nainti: ariorica

pinevetearo tsinane aisati pinquenqueshiretero pantero, ainiro pantane; aitaque pinquenqueshiretaquea paimentearo pijina. ²⁹Noshiacantempiro: ariorica antacayempi poquisanori caari cameetsatatsi, pinquitsoreero, pojocajero. Te pinintejji catsini ojatacayempi Sharincaveniqui. Tempa ocameetsati pijanaroquitashitea anta inquitequi. ³⁰Ariorica antacayempiro pacosanori caari cameetsatatsi, pimesajero, pojocajero. Te pinintejji catsini ojatacayempi Sharincaveniqui. Tempa ocameetsati pijacaraquitanafe anta inquitequi. Pineaquero, te oncameetsateji catsini pampiitapinitero caari cameetsatatsi. ³¹Aisati icantaqueni yora intacarori: “Ariorica pincoaque pojocajero pijina, pisanquenatenero paperi pojocantaje- rori, ari moncarataca”. ³²Iro cantaincha noncantempi nainti: eiro catsini pojocajirotsi pijina. Ariorica pojocajero pijina, aisati paaje pashini, aitaque paimentaquearo pijinasanori: paavioncaque pijina. Aajerica aisati pijina ontine antane: aimenteari ojimesanori. Aisati yora aajeroneri, ontine irantane. Irointiquea apatiro ocameetsaveta pojocajero ariorica aimentaqueimpi, tecatsi pashini.

Icanti Jesoshi: “Eiro pamatavitiritsi pishaninca catsini”.

³³Aisati icantaqueri Jesoshi: —Piojeitaque ocantini Sanquenarentsi. Oametaquerini ashanincani: ‘Pintseeyarica, eiro picantashitatsi: ‘Ioti Avincatsarite nomoncaratempiro maaroni nocantaquempi. Ariorica namatavitimpi, iroyenata’. Ariorica pincante: ‘Ioti Avincatsarite nomoncaratero maaroni nocantaqueri’, ari pimoncaratero, maaroni”. ³⁴Irotaque isanquenatiniri peerani. Iro cantaincha nocantimpi nainti: ‘paita pincoanteari pincante: “Ioti Avincatsarite queario oca nocantaqueri”? Ocamenteetsataque pimoncaratasanotaquero maaroni picantaqueri. Eiro aisati picantitsi: “Tempa ocantani otimi inquite, aisati noquempeta narori, nocantani tampatica noneanati”. Noncantempi nainti: iro inquite isavanticari

Tasorentsi; iotimpi, ioti queariorica picantaqueri. ³⁵Aisati eiro picantitsi: “Tempa ocantani otimi quipatsi, aisati narori nocantani tampatica noneanati”. Noncantempi narori: itsoteiro Tasorentsi quipatsi, iotimpi; ioti queariorica picantaqueri. Eiro picantitsi: “Tempa ocantani otimi Jerosare, aisati narori nocantani tampatica noneanati”.

Noncantempi: ipincatsariventajeitiri Tasorentsi jerosaresati, iriotaque pincatsarisanori. Ioti queariorica picantaqueri. ³⁶Eiro picantitsi: “Eiro notseyatysi, irosati noncamantaquea, noncanteani tampatica noneanate”. Tempa irio Tasorentsi cantatsine jaocarica oncarate ancame. Pimpincatsateri irinti, irio iotimpi pitseeyanirica. ³⁷Eiro pitseeyatysi, eiro pamatavitantsi. Queariorica pantero paitapeerica, pincante: “Je, nantero”. Eirorica pantirotsi, pincante: “Eiro nantirotsi”. Moncarataca. Te oncameetsateji pishequiyero pineane pamatavitanteeari itsipapee.

Icantiri Jesoshi: “Eiro pipiataritsi quisheppineri”.
(Ir. 6.29-30)

³⁸Jero aisati icantajeitaqueriri Jesoshi: —Aisati icantaqueniri iriori yora intacaroniri: “Ariorica pinquitsoreero iroqui itsipa, ocameetsati impiatacoventa- jeari inquitsoreitempiro poqui avirori. Ariorica pijireiteri pishaninca iraji, ocameetsati impiatacoventajeari, irijireitempiro paji avirori”. ³⁹Iro cantaincha noncantempi nainti: eiro pipiataritsi quisajeitaquempi, irointi ariorica impasavorotempi acaqueroca, pishineteri aisati otsipa pivoro impasatero aisati. ⁴⁰Ariorica incoaque atiri iraitempiro piitsaare, pimpavaqueri aisati poicoro. ⁴¹Ariorica imperanatempi paanajeneri irovaararo aparoni quirometero, poavisyeneri apite quirometero. ⁴²Ariorica incantapeempi pishaninca: “Pimpenero”, ari pimpavaqueri. Aisati, ariorica incantempi: “Pimpashitavaquenarota

oca”, ari pimpashitavaqueari, eiro pitsaneapitsataritsi.

Icantiri Jesoshi: “Pinintajeiteri quisajeitaquempi, pincavintsaaajeiteri”.

(Ir. 6.27-36)

⁴³Aisati icantajeitaqueri:

—Aisati icantaqueni yora intacaroniri: “Pininteri pishanincasanori, pincavintsayeri. Irintuea quisaqueempire, pinquisavaqueri iriori”. ⁴⁴Iro cantaincha noncantajeitempi nainti: pinintajeiteri maaroni quisajeitaquempi, pincavintsayeri, pincanteri Tasorentsi incavintsayeri, maaroni. ⁴⁵Irootaque icoacaajeitaqueri Tasorentsi maaroni quemisantajeitiriri itomintajeitacari. Tempa iriotaque vetsquiriri catsirincaiteri: yovoreacojeitaqueri maaroni atiri, cameetsajeitatsiri aisati caari cameetsajeitatsiri. Aisati incani, yoariajeitaqueneri maaroni atiri: yora quemisantatsiri aisati caari quemisantatsiri. ⁴⁶Ariorica pincavintsayeri apaniro yora cavintsaimpi, ɿpjitimpa irineacameetsatempni Tasorentsi? Tempa ioti tseencantatsiri icavintsaavacaajeita iriori. ⁴⁷Ariorica pincavintsayeri apaniro yora shanincatasanojeitimpire, ɿpaita pishemanteari? Aitaque iojeiti maaroni caari ioterine Tasorentsi icavintsaavacaajeita iriori. ⁴⁸Pincameetsatasanotanaque catsini, pinquempejeitanaqueari Apa Tasorentsi: tempa icameetsatasanotanaque irinti catsini.

Yoamejeitaquee Jesoshi jaoca ancanteari ancavintaante.

6 ¹Aisati icantajeitaqueri Jesoshi: —Eiro pishiacantanirotatsi piquemisanti, eiro piquemisantamempeatsi pamatavitanteearirime atiripee. Ariorica irineaquempi Apa Tasorentsi pishiacantaca, eiro ineacameetsatimpitsi iriori.

²Ariorica pimpashiteari ashinoncaincarci coiteimojeitacariri, eiro picamantajeitir-

tsi itsipapee. Irootaque yamenirojeitari yora shiacantavetachari iquemisanti.

Ariorica ipiri ashinoncaincarci paitarica, icamantajeitaqueri quemisantajeitatsiri, aisati savicajeitatsiri anta nampitsiqui. Icoanirojeitaque iriori irineacameetsajeiteri ishaninca. Ariorica irineacameetsaveteari ishaninca, iro cantaincha moncarataca: eiro ineacameetsatiritsi iriori Tasorentsi, tecatsi impinateri. ³Ariorica pincavintsayeri ashinoncaincarci, pimanagero: eiro piotacaajeitiritsi itsipapee. ⁴Ari iriotaque Tasorentsi irinti, impinatempni irinti.

Yoamejeitaquee Jesoshi jaoca ancanteari anquenquetsatacayeri Tasorentsi.

(Ir. 11.2-4)

⁵Aisati icantajeitaqueri:

—Ariorica pinquenquetsatacayeri Tasorentsi, eiro piquempetaritsi shiactavetachari: icoaque iriori incatiye anta yapatojeitanta atiripee, aisati anta nampitsiqui nianqui, irineantanirojeitavaqueariri ishanincapee. Queario oca noncamantempire: moncarataca. Ariorica irineacameetsajeiteri ishaninca, iro cantaincha eiro ineacameetsatiritsi Tasorentsi. ⁶Ariorica pinquenquetsatacayeri, pijate apaniro pivancoqui, pashitacotanaquea tsompoina, impoji pinquenquetsatacayeri Apa. IrineaqueMPI apaniro irinti, irineacameetsatempni, impinatempni.

⁷Ariorica pinquenquetsatacayeri, eiro pineanatashiveeta, vero, vero, vero. Aitaque yametaro caari iotiri Tasorentsi, ineaveetashita. Ijitashijeiveta ariorica irineanatashiveetea, ari inquemisantaqueri. ⁸Queariyea, piquempejeitaricari avirori. Iotasanoliro Tasorentsi maaroni coiteimojeitaquempi. Tequerata pincanteri, iotitacaro coiteimotaquempi.

⁹Ariorica pinquenquetsatacayeri Tasorentsi, ari pinquempetaquerori avirori oca: Apa, savicatsiri inquitequi,

- oshequi nopincatsatasanojeitaquempi.
¹⁰ Pimpincatsariventajeitena narori.
 Nocoajeitaque aca quipatsiqui nomajei-
 tempiro maaroni pincoacaajeitenari,
 nonquempeteari pinampirepee anta
 jenoqui:
 tempa imajeitaquempiro iriori
 maaroni picoacaajeitaqueriri.
¹¹ Pimpapinijeitena noyeari coiteimota-
 quenari.
¹² Ainiro nantajeitiri caari cameetsayetatsi,
 iro cantaincha eiro poasanquetimen-
 tanarotsi,
 irointi nocoajeitaque pincavintsaajei-
 tena.
 Aisati narori noncavintsaajeiteri
 noshaninca
 antanajeitenaneri paitapeerica, eiro
 noquishiritsi iriori.
¹³ Eiro pishinetiritsi yora camaari
 irineantajeitena,
 eiro pishinetiritsi irantacaaajeitena
 caari cameetsatatsi.
 Pincantaitiyempani pimpincatsari-
 ventajeitena.
 Pincantaitiyempani pintasoncaven-
 tajeitena.
 Aisati narori, noncanteani nompinca-
 tsajeittempi, maaroni.
 Irootaque nocantaquempiri, ari.

Icantiri Jesoshi:**"Pincavintsaajeiteri itsipapee".**

- ¹⁴ Aisati icantajeitiri:
 —Ariorica pincavintsayeri quisajeita-
 quempiri, incavintsaajeitempi avirori Apa
 savicatsiri inquitequi. ¹⁵ Iro cantaincha
 eiorica picavintsairtsi pishanincapee,
 eiro icavintsaajeitimpitsi Apa.

Yoamejeitaqueri Jesoshi jaoca incanteari,
ariorica intitimenteari Tasorentsi.

- ¹⁶ Aisati icantajeitiri:
 —Aisati, ariorica pintitea pinquenqueshi-
 retanteariri Tasorentsi, eiro piotacaajeitirts

itsipapee. Eiro piquempetaritsi yora
 shiacantachari iquemisanti: ariorica
 ititapinita, yoashirevorotashitaca iriojeitan-
 teari ishaninca itita. Yatsipetashitacaro, te
 inquenqueshireteriji Tasorentsi, irointiquea
 icoaque incavintsaajeiteri ishaninca. Eiro
 ipinatiritsi Tasorentsi. ¹⁷ Ariorica pintitim-
 teari Tasorentsi pinquenqueshiretanteeariri,
 cameetsa pinquishitea, pinquivavorotea
 aisati, ¹⁸ oncanteata eiro iotanta pishaninca
 pitita. Apaniro iriotempi irinti Piri
 jenoquiniri, impinatempi irinti.

Icantiri Jesoshi:

"Pimpiotero pivaararo anta inquitequi,
pinquenqueshireteri Tasorentsi".
(Ir. 11.34-36; 12.33-34)

- ¹⁹ Aisati icantajeitiri Jesoshi:

—Eiro pipiotirotsi pivaararo aca quipatsi-
 quica: opatsaaranticari, aisati icoshiyeetim-
 picari. ²⁰ Aintiquea pimpiotero pivaararo
 anta inquitequi: eiro ainti opatsaitsi, aisati
 eiro ainti icoshiyeetajimpitsi. ²¹ Ariorica
 ontime pivaararo aca quipatsiqui, pinquen-
 queshiretapinitero timajeitatsiri aca
 quipatsiqui; iro cantaincha ontimerica
 pivaararo inquitequi, pinquenqueshiretapi-
 niteri Tasorentsi. ²² Otimi poqui pamenan-
 tari, otimantari piotantari. Oshiaquero
 tsionmentotsi pitsiotapinitantari tsiteniriqui
 pineantari. Ariorica ocameetsataque,
 piojeitanaque, ²³ iro cantaincha eiorica
 ocameetsati, eiro pamenitsi, eiro piotitsi,
 pintime tsiteniriqui. Aisati oquempetaca,
 ariorica pinquenqueshiretapinitero caari
 cameetsatatsi, eiro piotirtsitsi Tasorentsi, ainti
 pintime tsiteniriqui.

Icantiri Jesoshi: "Ariorica pantaveetanontea
avisati, tecatsi pincantea panteneri
Tasorentsi icoacaakuempiri".
(Ir. 16.13)

- ²⁴ Pashini aisati icantiriri Jesoshi:

—Tecatsi pincantea pintsameeteneri
 apite pivatorote, aisati oquempetaca:

ariorica panteneri Tasorentsi icoaca-aquempiri, irrompa ariorica pantaveetanonta avisati paantearori pivaararo. Tecatsi pincantero apite. Pinequero, ariorica pinintasanoteri Tasorentsi, eiro picoitsi pivionquero pivaararo. Aisati, ariorica pincoaque pivionquero pivaararo, eiro picoitsi pinquemisanteri Tasorentsi.

Icantiri: “Eiro piquenqueshiretatsi, irinti pinquenqueshireteri Tasorentsi”.
(Ir. 12.22-31)

²⁵Aisati icantajeitiri Jesoshi:

—Meeca noncamantajeitimi: eiro piquenqueshiretapiinitiroti paitapeerica poayeteari, pirayeteri, pinquitsaatapini-teari, paitapeerica. ¿Irrompa pitimantari poapinitearo poari? Te iro pintimantea, tempa iro pitimantari pinquenqueshireteri vetsicanaquempiri. ¿Irrompa otimantari pivatsa pinquitsaatero, poaneenquero? Te iro ontimantea. Irointi pitimajeitanta piojeiteri Tasorentsi, aisati panteneri icoacaajeitaquempiri. ²⁶Pame-najeiteri yora tsimeripee: te impanquitanonteaji, aisati te irantanonteaji ivanco irivioncantearori ivanquire. Iro cantaincha ipapinitiri Apa Tasorentsi yoari maaroni quitaiteiri. Ari icavintsairi maaroni quitaiteiri; tempa avinti icavintsaasanotaquempi, eiro yoashinon-caimpitsi. ²⁷Ariorica pinquenqueshirete, ¿arimpa pimatero pishequiajero pisarintsite? Eiro. Patsipetashita piquenqueshiretashita. ²⁸¿Paita piquenqueshiretarori piitsaare, pitarica pinquitsaateari? Pamenejeitero oteapee tojari, te onquenqueshireteaji irointi: “¿Paita nonquitsaateari?” Te onquiriqueji, aisati te ontijeji, ²⁹iro cantaincha, oshequi oaneencaca. Pamene, peerani oshequi yoaneencaveitani yora pincatsariveitachaniri Saromoni, iro cantaincha te inquempetasanotearoji oteaquepee: oshequi oaneencasanota

irointi. ³⁰Tempa irio Tasorentsi oaneen- quirori oteaquepee tojari, iro cantaincha eiro osamanititsi ontine, impoiji tempa itaapiniyeitiro, pomei. Irrompa avinti, pintimajeiteni peerani: tempa iroaneenca-sanotempi avinti. Pishireteari, eiro pitseenquiritsi. ³¹Eiro picantashiretitsi, eiro picantitsi: “¿Paita ayeari? ¿Paita ireri? ¿Paita anquitsaateari?” ³²Icoajeitiro ocappee yora tseencajejitantsiri. Iro cantaincha iojeitimpi Piri jenoquiniri, iojeitiro coiteimojeitaquempiri.

³³Irrioquea pijivate pimpincatsateri, aisati pincanteri iroameetsashiretempi, impoiji- quea impapinijeitimpido coiteimojeitaquempiri. ³⁴Ari eiro piquenqueshiretirotsi osaitequera, pitarica panteri. Irintac- tempi osaitequera, aisati maaroni quitaiteiri. Timatsi aquenqueshireta- queri meeca quitaiteiri, te oncameetsa- teji anquenqueshiretero aisati osaitequera.

Icantajeitiri Jesoshi:
“Eiro picantimatiritsi itsipapee”.
(Ir. 6.37-42)

7 ¹Aisati icantajeitiri Jesoshi:
—Eiro picantimatiritsi pishaninca. Ariorica pincantimateri itsipapee, icantimpi- cari Tasorentsi: “Ainiro pantane avirori”. ²Ariorica anquisaqueri itsipapee, ari inquisavaquee arori; aisati oquempetaca, ariorica ancavintsayeri itsipapee, incavintsa- yee arori. ³Otimirica pantayetiri avirori, te oncameetsateji pincanteri pishaninca avirori: “Ainiro pantane”. Jero oca noshiacaventem- piri: ariorica pitijaquitaca quimota avinti, ¿arimpa pinequero itijaquiro pishaninca ovane quipatsi capichaji? ⁴¿Ocameetsatimpa pincanteri: “Jentsite, naajempiro pitijaquiro”? Eiro pineirotsi. ⁵Oshequi picantashitaca. Pijivate pojoquero inchatora jocaaquempirira avirori, impoiji pameneje paantajeinariri itijaquiro pishaninca. Aisati pincoaquerica pincanteri pishaninca

irojocajero yantayetiri, pijivate pojocajero caari cameetsatsati pantayetiri avirori.⁶ Te pimpapimiteriji otsiti cameetsatasanotatsiri ivatsa. Aisati te pimpapimiteriji chancho marereatsiri mapi iroyearo, eiro icoitsi iroyearo. Tempa ari iraticavaquerome, irovitsintavaquerome, impoiji inquisacotaquearo iroyeari, irantsiquimentaqueimpiro. Aisati oquempetaca, ocameetsati irineane Tasorentsi. Ocameetsati pinquenquetsatacayeri itsipapee asháninca, iro cantaincha ariorica inquishimentempiro, incanteata.

Icantiri Jesoshi: “Te pantsipetashiteaji piquenquetsatacairy Tasorentsi”.

(Ir. 11.9-13)

⁷Aisati icantiri Jesoshi:

—Ariorica pincanteri Tasorentsi, irimatempiro paitarica pincanteriri. Pincoayetajero paitarica, impoiji pineajero. Ariorica pareetae pancotsiqui, pincantapaaqueri savcatsiri: “Pashitareenaro”, ari irashitareaquempiro.⁸ Aitaque ipapinijeitiri Tasorentsi maaroni coacotiriri. Aisati ariorica pincoayetanaque, iramenacayempiro. Ariorica pincanteri: “Pashitareenaro”, ari irashitareaquempiro.⁹ Ariorica incantempi pitomi: “Apa, pimpena noyeari”, ɿarimpa pimpaqueri mapi?¹⁰ Ariorica incantempi: “Pimpema shima noyea”, ɿarimpa pimperi maranke iroyeari?¹¹ Pinequero, te pincameetsatasanojeiteji, iro cantaincha piojeiti picavintaapinitiri pitomipee. Irinti Apa savcatsiri inquitequi icameetsatasanotaque, ioti irinti catsini icavintaajaitequeri maaroni quenquetsataajeitiriri.

Icantajeitiri Jesoshi:

“Pincavintaavacaajeitea”.

(Ir. 6.31; 6.43-46)

¹²Aisati icantajeitiri:

—Ariorica pincoaque incavintaajaitempi pishanincapee, ari pincavintaajaitempi avirori. Pincoaquericame iroashinon-

caajeitempime, ari poashinoncaajeiterime avirori. Irootaque isanquenatiniri yora Moishishini aisati maaroni camantantatsiri.

Iquenquetsatacotiro Jesoshi apite avotsi.

(Ir. 13.24)

¹³Jero aisati ishiacantiniri Jesoshi:

—Pincoaquerica pinqueapaqaquero ivanco Tasorentsi, pinqueapaqaquero orijani omoro. Ainiro pashini avotsi, antearo irointi, te ompomerentsiteaji anquenantearo, aisati anta ocaratapainta otimi omoro antearo. Iro cantaincha maaroni quenayetanaintsine anta irashinoncajeitea anta Sharincaveniqui. Icarajeiti iriori oshequi.¹⁴ Iro cantaincha timatsi ora orijani avotsi, aisati orijani omoro. Oshequi opomerentsitaca irointi, itimi aparopee quenantarori. Iro cantaincha irareetea irinti Tasorentsi, incantaitiyempani intime irioriqui.

Iquenquetsatacotiri Jesoshi amatavitantatsiri.

(Ir. 6.43-44)

¹⁵Aisati icantajeitiri Jesoshi:

—Queariompia, yamatavijeitimpicari shiavtariri quenquetsatacotiriri Tasorentsi. Pishiacanticarici ovisha, pijiticari tecatsi incantempi; iro cantaincha noquempetacaqueri nainti maniti: oshequi icovencati.¹⁶ Pamenasanoteri yantayetiri, piotanteariri icameetsatirica. ɿOtimantarompa tojari ova? Teve, te ontimantearoji. ɿOtimantarompa iyera? Aisati te omateroji. Aisati iquempejeita yora amatavitantatsiri: tecatsi incantero irimatero cameetsayetatsiri.¹⁷ Inchato cameetsari otimi oitsoqui cameetsari, ari avaquearo. Iro cantaincha terica oncameetsateji inchato, te ontimiji oitsoqui cameetsari.¹⁸ Ora inchato cameetsari, tecatsi oncantero ontimero oitsoqui caari cameetsatatsi. Aisati caari

cameetsatatsi inchato, tecatsi oncantero ontimero cameetsatatsiri oitsoqui. ¹⁹Tempa achaquitapinitiro inchato caari oitsoquitatsi, ataapinitiro. ²⁰Aisati piojeiteri maaroni coatsiri iroamejei-tempi. Piotaque ocameetsatirica yantayetiri, ari cameetsa aisati yoametantiro irineane Tasorentsi. Irompa terica oncameetsateji yantayetiri, te oncameetsateji aisati yoametanti.

Jaoca icantari iotasanoliriri Jesoshi.

(Ir. 6.47-49; 13.25-27)

²¹Pashini aisati icantiriri Jesoshi: —Ainiro inaveta oshequi cantashitanari: “Aviro novincatsarite, oshequi nopincatsatimpi”. Iro cantaincha eiro ijajeititsi iriori anta nompincatsaritenta. Iranti jatasanotatsineri anta inquitequi maaroni yora antasanotiniriri Apa icoacaajeitaqueriri. ²²Ariorica nompincatsaritasanotanaque nampatojeiteri maaroni atiri noncantacoventajeteitante-ri. Intime oshequi cantashitenaneri: “Novincatsarite, oshequi noquenquetsatacotaquempi. Nocantaqueri neiriri camaari: ‘Paventeari Jesoshi pavisacotantajeari’. Aisati nocantaqueri noshaninca: ‘Irio Jesoshi matacaanarori notasoncanta-yeti’”. ²³Iro cantaincha noncanteri narori: “Te niotempiji, te noshanincatempiji. Tsame pijate arejiqui, oshequi pantayetiro caari cameetsatatsi”. ²⁴Pamene, ariorica pinquenqueshiretero maaroni nocantaquempi, aisati ariorica pantenaro maaroni nocoacaquempi, ocameetsati. Ontime piotanteari, pinquempeteari vetsquirori ivanco mapiqui. ²⁵Opariaque incani, ooncanaca. Aisati otimi antearo tampea otatsincavetanacaro, iro cantaincha te aaveeroji. Iro caari aaveantaro, yovetsiquiro mapiqui, oquisotasanotaque. ²⁶Aisati oquempetaca avirori, eirorica piquenqueshiretiro maaroni nocantaquempi, aisati eirorica

pantanaro maaroni nocoacaavetimpiri, te oncameetsateji. Eiro otimitsi piotanteari. Pinquempeteari vetsquirori ivanco anta impanequivi. ²⁷Opariaque incani, ooncanaca. Aisati otimi antearo tampea, otatsincanaquero. Ojaraaquero, jaran; otsoncanaquero, aanaquero, poyere. Tempa yatsipetashitacaro yora vetcavetarori. Eiro patsipetashitarotsi avirorije piquemajeitaquena, irointi pantasanotero nocoacaajeitaquempi.

Yovecarataquero Jesoshi

**iquenquetsatacacjeitiri
apatotimentajeitariri.**

(Mr. 1.22)

²⁸Irootaque icantajeitaqueriri apatotimentajeitariri anta toncaariqui, ari yoajeitanaquei cavaco maaroni. Icantajeiti:

²⁹—Oshequi ioti iranti, oshequi ipincatsariti, cameetsa yoamejeitaquee; te inquempeteariji yora oametantavetarori Sanquenarentsi.

Yoavisacotiri Jesoshi patsaatsiri.

(Mr. 1.40-45; Ir. 5.12-16)

8 ¹Ari iquenquetsatacanti Jesoshi anta toncaariqui, impoiji yoirincapaaja, yoijajeitaqueri oshequi atiri. ²Ari ijatashitaqueri aparoni shirampari patsaatsiri, itonquiotavacari, icantavaqueri:

—Novincatsarite, pincoaquerica poavisacotajena, niotaque aitaque pimatajenaro.

³Ari yacotanaque, ipamitaqueri, icantiri:

—Aitaque nocoaque. Aitaque pavisacotanaje meeca.

Irosati yavisacotantanaja. ⁴Ari icantavaqueri Jesoshi:

—Eiroya picamantitsi, irointuea pantero icantiniri peerani Moishishi: pijatashiteri saserote, pincamanteri irinti: “Nopatsaaeitani, iro cantaincha pamena-

jenate, avisacotajana: te aneajeroji meeca novatsaaro". Ari iramenavaquempi, impoiji iroyeri pivira, intayeneri Tasorentsi, iriojeitanteari ashanincaphee paviscotataji.

Ari ijatanaque.

**Yora Jesoshi yoavisacotiri
inampire capitano.**

(*Ir. 7.1-10*)

⁵Ari yovaanaja Jesoshi, aisati yora oijajeitiriri, impoiji yareejeitapaaca Caperenaoqui. Itonquitavacari aparoni capitano, yora ivincatsarite oshequi soraro. Caari ini jorio yora capitano.
⁶Icantavaqueri:

—Novincatsarite, ainiro nonampire anta novancoqui, te irimatajeoji irishetatajea, aisati oshequi icatsitaque.

Catsiqueti oanaqueri. Nocoaque poaviscoteri.

⁷Ari yacanaqueri:

—Aitaque nojataque noavisacotajeri.

⁸Iro cantaincha icantiri:

—Oshequi nopincatsataquempi: te noncameetsateji, eiro pintsipatapaanatsi anta novancoqui. Ariorica pincante iravisacotanaje, niotaque ari iravisacotanaje: patsipetarocari pijate novancoqui. Oshequi pipincatsariti. ⁹Timatsi peranatarri, aisati itimi soraro noperanajeitacari narori. Ariorica noncanteri soraro: "Pijate", ari irijataque. Ariorica noncanteri itsipa: "Pimpoque", ari impoque. Ariorica noncanteri nonampire: "Jeroca panteri", ari irimataquero. Aisati onquempetaquea avirori, aitaque omorcarataquea paitarica pincanteri.

¹⁰Ari yoanaqueri Jesoshi cavaco, icantajeitiri oijajeitiriri:

—Queario oca noncamantempi: oshequi catsini iquemisantsasanotaque yoca, yanaacojeitaqueri maaroni jorio iquemisanti. ¹¹Coajica anta ipincatsarinta Tasorentsi intime oshequi itsipapee

atiri poneayetachaneri otsipapeequi quipatsi. Incarajeiteri Avarama, Isaca, Jacovo, maaroni. ¹²Iro cantaincha eiro itimitsi oshequi jorio anta. Icoacaavetacari Tasorentsi intsipajitearime anta ipincatsaritinta, iro cantaincha oshequi itseenajeitaqueri, irootaque intiancajeitanteeariri anta otsitenitasanotinta. Oshequi anta iroashinoncaajeitea, oshequi inquematsicatearo.

¹³Ari icantiri yora capitano:

—Meeca pijataje pivancoqui. Piquemisanti, irootaque iravisacotantajeari pinampire.

Irosati yavisacotantanaja inampire.

Yoavisacotiro Jesoshi irairo Petero.

(*Mr. 1.29-31; Ir. 4.38-39*)

¹⁴Ari ijatanaque Jesoshi ivancoqui Petero. Ineapaaquero irairo, ojoquitaca, aaquero catsuirentsi. ¹⁵Ipamitapairo acoqui, irosati avisacotantaja. Otinaanaja, irosati opantavacariri iroapeempari.

**Yoavisacojeitiri Jesoshi oshequi
pashinipee atiri.**

(*Mr. 1.32-34; Ir. 4.40-41*)

¹⁶Ari ishaaviijtanaque catsirincaiteri, irosati yamantajeitapaacari oshequi neiriri camaari. Ari iquenquetsatacaavaqueri, irosati yavisacojeitantaquera. Aisati yoavisacojeitaqueri oshequi joquijeitachari. ¹⁷Aitaque itsataaquero Jesoshi maaroni iquenquetsatacotiniri peerani Isayashini: "Coajica iroavisacojeiteri Quirishito oshequi mantsiayetatsiri, oshequi incavintsaajeiteri".

Icantajeitiri Jesoshi atiripee:

"Poiijkeitanaquena".

(*Ir. 9.57-62*)

¹⁸Ari ineajeitavaqueri Jesoshi oshequi catsini apatotimentajeitariri, irosati icantantariri iroamerepee:

—Tsame ajajeite intatiquero incajare.

¹⁹Ari icantiri oametantirori Sanquenarentsi:
—Oametanari, jaocarica pijateri,
nocoaque noijatanaquempi.

²⁰Yacanaqueri:
—Yorari parari ainiro imoro imaantari,
aisati yora tsimeripee ainiro yaatantari
imaantari. Noponeaca narori anta inuitequi,
natiritapaaque, iro cantaincha te aneroji
novanco nainti nomaateari. Patsipetashita-
cari pojatanaquena, pashinoncaacari.

²¹Icantiri pashimi iroamere:
—Novincatsarite, nocoavetaca noijatem-
pime, iro cantaincha incamaquetsita apa:
impojiquea quiso noanaquempi.

²²Iro cantaincha icantaqueri:
—Pojatenata, impoiji ariorica incame
piri, ainiro tijerineri itseencaririnte: yora
caari iotiri Tasorentsi.

Yora Jesoshi ipeaquero antearo tampea.
(Mr. 4.35-41; Ir. 8.22-25)

²³Ari itetanaca Jesoshi pitotsiqui, icarajeita-
queri iroamerepee. ²⁴Ari imaanaque Jesoshi.
Nianquijaqui omapocashijeitacari iroamerepee
antearo tampea, otejatapaaca omotoncane.

²⁵Ari ijatashitaqueri, yoisaquireaque-
icantaqueri:

—Novincatsarite, jentsinocanti ampiin-
quenive: poavisacojeitenia, aisati poavis-
cotajea avirori.

²⁶Ari itinaanaca, yacanaqueri:

—¿Paita pitsaroantacari? ¿Paita caari
piquenqueshiretasanotantana?

Impoiji ipeajiro tampea, aisati ipeajiro
omotoncane. Opeasanotanaja tampea,
opeasanotaja omotoncane. ²⁷Ari yoajeita-
naqueri cavaco, icantavaaanaca:

—¿Jaoca icantari yoca? Pineaquero ipeajiro
tampea, aisati ipeajiro omotoncane, maa.

**Yoavisacojeitiri Jesoshi
pashinipee neiriri camaari.**

(Mr. 5.1-20; Ir. 8.26-39)

²⁸Ari yareejitanaca intatiquero,
yaatacotapaaque. Opajita nampitsi

Carara. Ari iponeaca tijaariqui apite
neiriri camaari, itonquitavacari Jesoshi.
Yora camaari, oshequi iquisacaacari
neiriri, irootaque itsaroacaajeitancariri
ishaninca, te inquenantajearo tijaariqui.

²⁹Icantavaqueri camaari:

—¿Aviro? Niotaquempi, aviro Itomi
Tasorentsi. ¿Paita pipocashitantanari?
¿Irompa pipocashitantanari meeca
poashinoncayena? Tequera omoncar-
teaji nonquematsicatantearori anta
ishaaviji.

³⁰Ari itimi anta oshequi chancho,
yoajeitanta. ³¹Icantiri camaari:

—Ariorica poavisacoteri neanarica,
pintianquena anta chanchoqui,
nonijapeempari iriori.

³²Ari icantiri:

—Pijate, pinijapeempari iriori.

Ari ijatanaque, ineavaqueri iriori
chancho, irosati ishiaeitantanaca
imperitaqui, ipiincaeitanaque incajare-
qui, tsapo, tsapo, tsapo, tsapo. Itsitajeita-
naque, pomiririri, poyere. ³³Ari
ineavaqueri shentajeivetariri, ishiaeita-
naca. Ijatanaque nampitsiqui, icamanta-
paqueri ishaninca maaroni oca
ineakeri. ³⁴Ari ijatashijeitaqueri
maaroni savicajeitatsiri, icantapaqueri
Jesoshi:

—Tsame pijataje: eiro pipocajitsi aca
nonampiqui.

Yoavisacotiri Jesoshi caari shevatacha.

(Mr. 2.1-12; Ir. 5.17-26)

9 ¹Ari itetanaja aisati Jesoshi
pitotsiqui, icarajeitiri iroamerepee.
Ipiajeitanaja inampisanoriqui. ²Ari
yameetaqueneri caari shevatacha,
yamacotaqueri shitashintsiqui. Iotaque
Jesoshi oshequi iquemisantaque,
irootaque icantantavaracariri:

—Piveshireanaquea, noshaninca, meeca
noavisacotempi; eiro noquishimentimprotsi
caari cameetsatsati pantayetiri.

³Ari iquemajeitaqueri oametantirori Sanquenarentsi, icantavacaajeitanaca:
—Ijitasorentsitacateemi Jesoshi.
⁴Ari iotaque iriori iquenqueshirejeitiri, icantajeitiri:
—¿Paita piquisashirejeitantanari?
¿Paita pitseencajeitantanari? ⁵Ariorica noncantiqueru yoca: “Meeca noavisacotempi, paniitanaje”, tempa ari pamenaejitavaqueri, sorerere. Eirorica nomatirotsi, ari pishirontimentena. Iro cantaincha pjitashijeitaca nocantashitari: “Noaviscotempi, eiro noquishimentimpirotsi caari cameetsatatsi pantayetaqueri”.
⁶Nocoaque piojeite te noncantashiteaji. Noponeaca narori inquitequi, natiritatapaque. Icantaquena Apa: “Poavisacotenari antirori caari cameetsatatsi, impoiji eiro aquishimentajiritsi aisati yantayetiri”. Nocoaque piojeite ainiro notasorenca.

Ari icantiri caari shevatacha:

—Pincatianaje, paanajero pishitashi, pijataje pivancoqui.

⁷Ari icatianaja, cati; ijatanaji ivancoqui.
⁸Ineajeitavaqueri maaroni apatojeitainchari, yamenajeitavaqueri sorerere. Itsaroajeitanaque, aisati icantajeiti:

—Tempa icameetsati Tasorentsi, imatacaaqueri yoca yoavisacotajiri mantsiaripee.

Icantaqueri Jesoshi Mateo:

“Pojatanaquena”.

(Mr. 2.13-17; Ir. 5.27-32)

⁹Ari yovaanaja Jesoshi anta nosaviquinta narori. Ineapaaquena naitayetiri noshaninca iirequite nompan-teariri oromasati. Icantapaaquena:

—Tsame, pojatanaquena avirori.

Ari nocatianaca, noijatanaqueri.

¹⁰Impoiji naanaqueri anta novancoqui, noacaapaacari. Ari nocajemiri Jesoshi, itsipa iroamerepee, yora notspipajeitari napatojeitiniri oromasati iirequite, itsipapee caari quemisantatsi, maaroni.

Ari noajeitaca. ¹¹Ari ipocashitaquena yora variseopee, icajemiri itsipapee iroamere Jesoshi, isampijieitiri:
—¿Paita yantiri yora oamejeitimpiri?
Jeri yoacaaejitacari apatotiniriri oromasati quirequi, aisati icarajeitiri caari cameetsajeitatsi. Te oncameetsateji.

¹²Ari iquemaque iroamere, impoiji ijatashtitaqueri Jesoshi, icamantapaaqueri; impoiji icantanaque iriori:

—Yora caari mantsiatatsi te incoyeji iravintea, irintiquea mantsiyatatsiri coatsiri iravintea. ¹³Tsame pijajeite pinquenqueshirejeitero icantiri Tasorentsi: “Te noncoyeji poapinitenari pivira, pintaapinitenari; iroitiquea nocoasanoataque pincavintsaajeiteri pishaninca”. Te iro nompocantea nonquemisantacaajeri teri cameetsayetatsiri, irintiquea caari cameetsajeitatsi.

Irootaque icantiriri Jesoshi variseopee.

Icamantiri Jesoshi paita caari titanta iroamerepee.

(Mr. 2.18-22; Ir. 5.33-39)

¹⁴Impoiji ipocaarantaque iroamerepee Joa, isampitapaaqueri Jesoshi:

—Pamene, notitapinita noquenqueshi-retantariri Tasorentsi, aisati iquempetaca yora variseopee; irintiquea poamerepee avirori, te intitimateaji. ¿Pataquea?

¹⁵Ari yacanaqueri:

—Piojeitake yamejeitarí yora iroaqera aatsi ijina: icajemajeitaqueri ishaninca, yoacaaejitacari, iveshireimentajeitacari iriori. ¿Paita iroashiretacanteariri icajemacantiri? Iro cantaincha, ariorica irijatanaque arejiqui, impoijiquea iroashirejeitanaquea, intjeitanaquea. Aisati narori, coajica nojataje, impoijiquea iroashirejeitanaquea, intjeitanaquea noamerepee. ¹⁶Aisati, otimirica piitsaare iroquerari, te pintsereroji pimpataquero peesatotaintsiri pimaatsara. Ariorica poavitajero, eiro moncaratavacaatsi. Aisati ariorica

pinquivajero oshirincamaotanaque iroquerari, antsivianaquea peesataintsiri, ontsereanaque. ¹⁷Tempa apeantantaro iroquerajari pearentsi imeshinaqui iroquerari, impoiji antsitacotaquero eiro aparajatanta. Ariorica oshimoretanaque, aravoncanaque, ontapiaqueri imeshina. Iroquerarica ini, eiro ipesacotitsi, aisati eiro aparajatatsi: tempa iroquera ini. Irooricame ampeantantajearome pearentsi iroquerajari peesatitatsiri imeshina, tempa ari iraravoncanaqueme, intoncanaqueme, ton. Aitaque intseranaqueme, aisati amparajatanaqueame iroquerajari, chararara. Iroquera oni oca noamejeitimpiri, te oncamestsateji onconoyearo peeraniniri poamejeitiriri avirori.

Irootaque icantaqueriri Jesoshi.

**Yoavisacotiro Jesoshi irajatatsiri
aisati yoitinaajiro camaintsiri.**

(Mr. 5.21-43; Ir. 8.40-56)

¹⁸Irosati ipocashitantacari pincatsarita-siri, itiyeroashitapaacari Jesoshi, ipincatsatapaaqueri; icantapaaqueri:

—Camaque nishintio, iro cantaincha nocoaque pijate novancoqui pimpamita-peero aneantajeari.

¹⁹Ari yojatanaqueri Jesoshi, nocaraje-tanaqueri narori, maaroni iroamerepee.

^{20,21}Ari anta nianqui avotsi oneavaquena tsinane, ocarataque 12 osarintsi ashinon-caaca: ocantani irajataquenive.

Oquenqueshiretaca: “Ariorica nantita-queri iitsaare Jesoshi, ari navisacotanaje”. Ari oquenapaaque itapiiqui, antitaqueri ovarashiqui iitsaare. ²²Ari ipitsocanaca, ineaquero, icantaquero:

—Piveshireanaquea, noshaninca, piquemisantaque, irootaque paviscotan-tajari.

Ari avisacotaji.

²³Ari novaajeitanaja, nareejeitapaaca ivancoqui pincatsari, noneapaaqueri shiovitacoventirori camaintsiri, aisati

oshequi ashaninca, icajemajeitanaque.

²⁴Ari icantajeitiri Jesoshi:

—Pijajeitanaque. Te oncameji oca piraacojeitiri, irointi omai.

Ari ishirontimentajeitacari, iji, iji, iji.

²⁵Ari isoquijajeitanaque, irosati iqueanta-paaca Jesoshi. Yajiricavacotapaquero, irosati otinaantanaja. ²⁶Irosati iquenque-tsatacojeitantacari maaroni savicajeita-tsiri.

**Yamenacaajiri Jesoshi
apite caari amenatsi.**

²⁷Ari novaajeitanaja aisati, itimi anta apite caari amenatsi. Yojatanaqueri Jesoshi, icantajeitiri:

—Tempa aviro ishanincani Iravirini.

Pincavintsaajena.

²⁸Ari noqueajeitapaaque pancotsiqui, aisati iriori yora caari amenatsi. Ipocashi-jeitaqueri Jesoshi, impoiji icantavaqueri:

—¿Paamaacampa ari nomatero namenacaajeitajempi?

Icantiri:

—Je, novincatsarite; nioti ari pimata-jena.

²⁹Irosati ipamijaquitantacari, icantaquero:

—Pishiretaquena, irootaque noavisaco-tantempiri.

³⁰Irosati yamenajeitantanaja, iro cantaincha icantsanotaqueri:

—Eiroyea picamantiritsi itsipapee: “Yamenacaajana Jesoshi”.

³¹Iro cantaincha ijajeitanaque, icaman-tajeitaqueri maaroni ineajeitaqueri:

—Yamenacaajana Avincatsarite.

Ineanatacaajiri Jesoshi caari neanatatsi.

³²Ari impoiji, jeri ipocapaaque neiriri camaari, te irimateroji irineanate. ³³Ari itianquiri Jesoshi yora masontitacaaveita-riniri, ineanatacaajiri. Ari yoajeitanaqueri cavaco maaroni amenajeitaqueriri, icantajeiti:

—Peerani, te aneapiniteriji quempetea-rine yoca.

³⁴Iro cantaincha icantanirojeiti yora variseo:

—Yamitacotiri ivincatsarite camaari, irootaque imatantacariri iamaaririnte itianquiri.

Oshequi icavintsaajeitaqueri Jesoshi atiripee, icoaque inquemisantajeite.

³⁵Ari oshequi iquenaquenayetanaque Jesoshi maaroni nampitsipeequi, yoametapiniyejtiri noshaninca anta yapatotapiniyejtanta. Iquenquetsatacota-pinitiri Tasorentsi, jaoca icanta ipincatsa-reventanti. Yoavisacojeitiri maaroni: tecatsi ompomerentsitimoteari, imataquero maaroni mantsiarentsipee.

³⁶Ari ineakeri oshequi catsini atiri yapatotimentajeitacari, oshequi icavintsaajeitaqueri. Icanti:

—Oshequi yashinoncaajeitaca, tecatsi intacotearine. Iquempejeivetacari ovisha yora caari ishenteeti.

³⁷Impoiji icantajeitana:

—Oquempetaca otimi oshequi oitsoqui panqurientsi, iro cantaincha te intimeji oshequi aviiteroneri. ³⁸Pincantajeiteri Pivincatsarite intiancajeitanteeariri oshequi quenquetsatacacaajeiterineri ashaninca, quemisantacaajeiterineri.

Imatacaaajeitaqueri Jesoshi iroamere yoavisacojeitaqueri neiriri camaari aisati mantsiyetatsiri.

(Mr. 3.13-19; Ir. 6.12-16)

10 ¹Ari icajemajeitaquena Jesoshi, maaroni itsipapee iroamerepee, nocarajeiti 12. Imatacaaajeitaquena noavisacojeitaqueri neiriri camaari, nojocacoventajeitaqueri iamaarite. Aisati imatacaaquinca noavisacojeitaqueri maaroni mantsiyetatsiri.

²Ari itiancajeitaquena nomayetero imatacaaajeitaquenari. Ari nocarajeiti

Shimo, irosati ivajiro aisati Petero; jeri Antirishi, irirenti Petero; Santiacos, yora itomi Severo; Joa, yora irirenti Santiacos; ³Jeripi; Varitorome; Tomashi; aisati narori: narotaque apatoveitanariniri oromasati iirequite; Santiacos itomi Arejeo; Tareo; ⁴Shimo, icantiri aisati Sheraroro; jeri aisati yora Jorashi Ishicariote, yora aacaanterineri coajicani Jesoshi.

Itiancajeitaqueri Jesoshi iroamerepee inquenquetsajeite.

(Mr. 6.7-13; Ir. 9.1-6; 10.3-11)

⁵Ari itiancajeitaquena Jesoshi, icantavaquena:

—Eiro pijatashitiritsi yora itsipapee atiri, aisati eiro pijatitsi anta itiminta samariasati. ⁶Irintiquea pijatashijete maaroni ajorioririnte. Noshicantajeitaqueri ovisha yora caari ishenteeti.

⁷Jaocarica pinquenayetanaqueri, pinquenquetsatacacaajeiteri atiripee. Pincamantajeiteri: “Irotaintsi impincatsa-reventajeitee Tasorentsi”. ⁸Poavisacojeiteri mantsiaripee, pointinaajeitajeri camayetatsiri, poavisacojeiteri patsaaye-tatsiri aisati neayetiriri camaari. Oshequi nocavintsaajeitaquempi, iro cantaincha tecatsi noncoacojeitempi. Meeca pincavintsaajeiteri itsipapee, iro cantaincha tecatsi pincoacojeiteri avirori. ⁹Eiro paanaqueritsi piirequite, ¹⁰pitsarate, otsipa piitsaare, pisapatote, pioquiro, tecatsi catsini. Tempa ocameetsati incavintsaajeitempi maaroni yora

pincavintsaajeiteri avirori: ocameetsati impashijeitempi maaroni coiteimojeita-quempi. ¹¹Ariorica pareetae nampitsi-qui, pincoapeeri quemisantasanotsatsiri; pisaviquimoteri iriori irosati povaantana-jeari otsipapeequi nampitsi. ¹²Ariorica pareetapaaquea, pineacameetsajeitapeeri savicajeitatsiri. ¹³Ariorica irineacameetsa-jeitavaquempi iriori, pincanteri Tasoren-

tsi incavintaasanofteri. Iro cantaincha terica irineacameetsatemp, eiro picantiritsi incavintsayeri.¹⁴ Eirorica ineacameetsatavaquempi, aisati eirorica iquemisantavaquempi, ari povaanajea. Pincantanaqueri: “Te pinquemisantavaquena, ari coajica iroasanquejeitempi Tasorentsi”.¹⁵ Queariotaque oca noncantempi: coajica, ariorica incantacoventajeiteri Tasorentsi maaroni atiri, iroasanquetaajeiteri maaroni soromasatini aisati maaroni comorasatini. Iro cantaincha iroasanquetaasanojeiteri catsini maaroni caari neacameetsajeitimpine, oshequi irashinoncaajeitanaquea.¹⁶ Meeca nontiancajeitempi, iro cantaincha oquempetaca notianquiri ovisha anta itiminta covencari: oshequi iroashinoncaajeitempi tseencantatsiri. Pinquenqueshirejeitanaquea, eiro catsini poashinoncairitsi pishaninca.

Irootaque icantajeitavaquenari Jesoshi.

Icamantajeitiri Jesoshi iroamerepee:
“Coajica oshequi inquisajeitempi itsipapee”.

(Mr. 13.9-13; Jr. 21.12-19)

¹⁷Aisati icantajeitanaquea Jesoshi: —Queariompia, yoashinoncaimpicari ashaninca. Iraajeitanaquempi anta yoametavacaajeitanta pincatsaripee iroasanquetaacantantempi. Aisati iraajeitanaquempi ashanincapee anta yapatojeitancari, impasanatapinitempi.
¹⁸Iriojeitempirica piquemisantajeitaquena, iraanajempi anta itiminta ivincatsaritepec itsipapee ashaninca, impoiji pinquenquetsatacaa jeiteri iriojeitanenari itsipapee ashaninca.
¹⁹Ariorica iraajeitanaquempi, eiro piquenqueshireatsi, eiro picantis: “¿Paitampa noncanteriri?” Narotsitaquea nainti oamejeitimpineri paitarica pincanteriri.²⁰Eiro piotashitatsi avirori pinquenquetsatacayeri, irointi Ishire

Tasorentsi oametasanotempineri pinquenquetsatacayeri.²¹ Coajica oshequi inquisavacaimentajeitaquena atiripee. Aparo iroacanteri irirenti, pashini iroacanteri itomi, aisati itsipapee iroacantayeteri ashiyetariri.²² Piquemisantajeitaquena, irootaque inquisajeitatempi pishanincabee, iro cantaincha eiro poipacairotsi piquemisanti. Ariorica pincanteani pinquemisantena, noavisacojeitempi, cameetsa pisaviquimojeitena anta inquitequi.

²³Ariorica inquisajeitempi savicajeita-tsiri aparoni nampitsiqui, ari pishianaque, povaanajea otsipaqi nampsitsi. Queario oca noncamantempi: eirotsitarica pitsoteiro maaroni nampsitsi isavicanteri ajoriorinteppee, aisati nompiapaaje narori. Tempa noponeaca narori inquitequi, natiritapaaque.^{24,25} Ariorica irimoncaraveteari iroamere oametiriri iriote, iro cantaincha eiro yanaacotiritsi. Aisati ariorica irimoncaraveteari nampirentsi yora nampitariri ipincatsariti, iro cantaincha eiro yanaacotiritsi. Ari meeca oshequi inquisajeitaquena ashaninca, ijitashijeitaquena naro ivincatsarite camaari. Piquemisantajeitaquena, tempa irootaque inquisajeitatempi avirori,²⁶ iro cantaincha, eiro pitsaroacaajeitaritsi. Meeca te iriojeiteji maaroni nopolincatsaritaque, iro cantaincha coajica iriotasanojeitanaque maaroni; irineajeitaquena nopolincatsaritasanonaque, aisati pincarajeitena avirori.
²⁷Meeca apaniro nocamantajeitaquempi, te iriojeiteji yora tseencantatsiri, iro cantaincha coajica niotacaajeiteri. Meeca nonmanavetacaro, iro cantaincha coajica noncamantasanojeiteri maaroni.²⁸ Irima-jeivetearo iriori iroajeitaquempi, iro cantaincha eiro pitsaroacaaritsi: tecatsi incantempi intianquempi Sharincaveni-qui. Irinti pimpincatsatasanoteri Tasorentsi: incoaquerica iriori irimatajero

iroajempi aisati intianquempi Sharincavenniqui.²⁹ Pamene, te impinateaji tsimeripee, iro cantaincha terica incoacyeri Apa incame, eiro icamitsi aparoni, catsini.³⁰ Iotiro jaoca ocaratiri piishi, iotasanolimpi catsini.³¹ Pineaquero, oshequi panaacojeitiri tsimeripee, oshequi iquenqueshiretaquempi. Meeca eiro pitsaroitsi.³² Ariorica pincanteri ashaninca: "Nopincatsataqueri Jesoshi", aitaque anta inquitequi noncanteri Apa: "Ipincatsataquena iriori, noshanincatacari".³³ Iro cantaincha pincanteririca ashaninca: "Te nompincatsateriji Jesoshi", ari anta inquitequi noncanteri Apa: "Te impincatsatenaji yora, te nioteriji narori".

³⁴Aisati icantana Jesoshi:

—Eiro pijitashitanatsi nopoqui iraacameetsatavacaajeitanteari maaroni savicajeitatsiri. Te iro nompocantea iraacameetsatavacaajeitanteari, irointi inquisavacaajeitanteari.³⁵ Irointi nopolanta inquisanteariri shirampari iriri, onquisantearori tsinane iniro, onquisantearori tsinane airo,³⁶ inquisanteariri shirampari ishanincasanori.³⁷ Tempa ocameetsati pinintajeiteri piri aisati piniro, iro cantaincha ocameetsatasanoti pinintasanojeitenia narori. Eirorica pinintasanotanatsi narori, eiro noneacameetsatimpitsi avirori. Aisati, ocameetsati pinintajeiteri pitomi aisati pishinto, iro cantaincha ocameetsatasanoti pinintasanotena narori. Eirorica pinintasanotanatsi narori, eiro noneacameetsatimpitsi avirori.³⁸ Nocoaque pinquearioventenaro maaroni nocooacaquempiri. Ariorica inquishimenteetempiro, iro cantaincha nocoaque pimpomerentsiventenaro. Eirorica pipomerentsiventanarotsi, eiro noneacameetsatimpitsi narori.³⁹ Ariorica pincavintsaasanotajea avisati meeca, pashinoncaasanotanaquea coajica. Iro cantaincha pinquemisantsasanotenarica

meeca, ariorica iroashinoncaajeivetempi pishaninca, iro cantaincha eiro patsipetrotsi: coajica paneajeitanaje anta ocameetsaitetasanotinta catsini.⁴⁰ Maaroni aacameetsajeitelpineri, yaacameetsajeitaquena narori. Aisati maaroni aacameetsajeitanari, yaacameetsajeitaqueri Apa iriori: yora tiancaquenari.⁴¹ Ariorica irioyeetempi aviro quenquetsatacotiriri Tasorentsi, irootaque iraacameetsatantempiri, ari pimoncaratavacaajeitea impinajeitelpi Tasorentsi: avirori, aisati yora aacameetsajeitelpineri. Aisati oquempetaca, irioyeetempirica picameetsati avirori, irootaque iraacameetsatantempiri, ari pimoncaratavacaajeitea impinajeitelpi Tasorentsi.⁴² Ariorica irioyeetempi piquemisantana, irootaque impacantantempirori pirer, iriotero Tasorentsi, impinatasanoteri yora cavintsaimpiri.

Irootaque icantajeitanari Jesoshi.

Itianquiri Joa iroamere irineeri Jesoshi.
(Ir. 7.18-23)

11 ¹Ari ivecaraquero yoamejeitacuena Jesoshi, yovaanaja anta otsipapeequi nampitsipee, yoamejeitaqueri savicajeitatsiri, iquenquetsatacaaajeitaqueri. Noijatanajiri narori, aisati nocarajeitaqueri itsipapee iroamerepee, nocarajeiti 12.² Chapinqui yoiminqueetaqueri Joa, yora vaotisatantatsiri. Meeca ari inaqueri caravosoqui, iro cantaincha iquemacotaqueri yantayetaqueri Quirishito, irosati itiancantacariri iroamerepee iriori:

³—Pijatashijeiteri Jesoshi, pisampitateri: "¿Avirompa Quirishito naamaajeitari? Terica aviro, ari naamaya pashini".

⁴Ari yareejitapaacari Jesoshi, isampitapairi. Ari yacavaqueri:

—Pimpajeanaje, pincamantapeeri Joa maaroni piquemaquenari aisati maaroni pineacotaquenari.⁵ Namenacaaejitajiri caari amenajeivetacha, naniita-

caajeitajiri caari shevajeivetacha, noavisacojeitaqueri maaroni patsaaeive-tachari, noquemacaajeitajiri caari quemaveitachani, noitinaajiri aisati camavetainchari, niotacaajeitaqueri ashinoncaajeivetachari jaoca incanteari iraviscacotantajeari.⁶ Inquimoshirejeitanque maaroni caari tseencana. Irootaque pincamantapaaquerirri Joa.

Yora Jesoshi ineacameetsataqueri Joa.
(Ir. 7.24-30)

⁷Ari ipiajeitanaja iroamerepee Joa, impoiji iquenquetsatacaa jeitaqueri Jesoshi yora apatotimentajeitariri:

—Ari peerani pijatapinijeiti anta caaraite-riqui, piquemisantapinijeitiri Joa. ¿Paita pijatashijetantariri? Tempa piojeitiri irotiri iriori Tasorentsi, irootaque pijatashitantariri.⁸ ¿Pinequerimpa iquitsaata cameetsa? Teve. Yora quitsaatarori iitsaare cameetsari isavicajeiti anta ivancoqui pincatsari.⁹ Tempa piojeitaqueri irootaque quenquetsatirori irineane Tasorentsi. Queariotaque, iro cantaincha yanaacotasanoliri itsipapee quenquetsatacotiriri Tasorentsi.¹⁰ Iquenquetsatacotaquerini peerani Tasorentsi, icantanani: “Notiom, nontianqueri coajica jivatempineri, inquenquetsatacaa paqueri ishaninca, incanteri: ‘Pinquenqueshirejeitea, paamaajeiteari Avincatsarite’”.¹¹ Meeca noncamantempi, queariotaque: tempa itimi oshequi catsini atiri, iro cantaincha yanaacojeitaqueri Joa, yora vaotisatantatsiri. Yanaacotasanojeitaqueri itsipapee, iotasantaqueri Tasorentsi. Iro cantaincha maaroni neajeitaquerineri Tasorentsi impincatsarita-paaje, iranaacotasanoteri Joa, iriotasanojeitaque irinti.¹² Peerani iquenquetsatacita-quempini Joa, meeca noquenquetsatacaa jeitaquempi narori, piojeitancariri Tasorentsi. Ari impincatsariventajeiteri maaroni coasanojeitatsiri iriojeiteri.¹³ Peerani maaroni yora camantantatsiniri iquenquetsatacotirri Quirishito, aisati iquempetani

Moishishini. Aisati icantajeiti: “Irotaintsirica impoque Quirishito, irijivatapaaqueri Iriashi”. Impoiniji meeca ipoqueque iriori Joa,¹⁴ arioric a noncantempi: irootaque Joa iquenquetsatacotiri, ¿arimpa pijitaque namatavitaquempi?¹⁵ Otimirica piyempita piquemantari, pinquemaquena.

Irootaque icantajeitiriri maaroni apatotimentajeitariri.

Icantiri Jesoshi: “Te piotacotasanojeitenaji”.
(Ir. 7.31-35)

¹⁶Jero oca aisati icantajeitaqueriri Jesoshi:

—Piquempejeitacari jananequipee, savicajeitatsiri saiteriqui, cantiriri itsipapee:¹⁷ “Notamporovetaca, iro cantaincha te pojatanaquenaji; nosoncavetaca, iro cantaincha aisati te pojatanaquenaji. Nomaninquevetaca, te pojatanaquenaji”.¹⁸ Pineauerero, picoajeiveta irantajeiterome pishaninca paitarica picoacaajeivetacariri. Pineavetari Joa, itivetaca aisati te irireroji cachojari, ari picantashijetari: “Oo, ineaqueri Joa camaari, ititantacari”.¹⁹ Ari noponeaca narori inquitequi, natiritapaaque; te nontiveteaji nainti, aisati niriro cachojari nainti. Ari picantimajeitaquena: “Jeri yonta oashenti, shinquinarinti. Ishaninca-tacari aitaqueeriri airequite aisati itsipapee caari cameetsayetatsi”. Iro cantaincha ioti Tasorentsi, ocameetsataque maaroni icoacaquenari; aisati maaroni quemisantanari, iojeitaque ocameetsataque icoacaquenari Apa.

Irootaque icantajeitaqueriri.

Irashinoncaajeitanaquea maaroni tseenuiriri Jesoshi.
(Ir. 10.13-15)

²⁰Impoiji iquenquetsatacojeitaqueri Jesoshi yora neajeivetacariri itasoncanti, iro cantaincha itseencajeitaqueri. Icanti:

²¹—Irashinoncaajeitanaquea maaroni coraseisati, aisati vetsairasati. Oshequi ineajeivetaquena notasontcantayeti, iro cantaincha te inquenqueshireteaji, te inquemisanteji. Irineaquerename notasontcantayeti yora tirosatini peerani, aisati yora shirosatini, inquenqueshirejeitanaqueame irinti, irojocajeitaquerome caari cameetsatatsi yantajeitiniri, inquemisantajeiteme. ²²Coajica, ariorica incantacoventajeiteri Apa, iroashinoncaajeiteri yora tirosatini aisati yora shirosatini: oshequi te incameetsajeiteni. Iro cantaincha iroashinoncaasanojeitaqueri catsini yora coraseisati aisati vetsairasati: tempa ineacojeivetaquena notasontcantayeti, iro cantaincha te inquemisantenaji. ²³Aisati iriori caperenaosati, ijitashijeiveta irijate inquitequi, iro cantaincha itseencanta-jeiti: irootaque irijajeitanteari iriori ishaaviji. Irineaquerome yora soromasatini maaroni ineajeitaqueri caperenaosati, inquenqueshirejeitanaqueame, eiro itsoncajeitirime peerani Tasorentsi, ontimeme meeca inampi. ²⁴Coajica iroashinoncaajeitajeri aisati Tasorentsi soromasatini, iro cantaincha iroashinoncaasanojeiteri catsini yora caperenaosati. Irootaque icantiqueriri Jesoshi.

Yora Jesoshi iquenquetsatacairy Iriri.
(Ir. 10.21-22)

²⁵Impoiji iquenquetsatacairy Jesoshi Tasorentsi, icantiri:
—Apa, aviro pincatsariventajeitiriri maaroni inquitesati aisati maaroni quipatsisati, oshequi nopasonquitimpi. Ainiro cantashitachari: “Niotasanoti nainti”, iro cantaincha pimanapitsajeitaqueri piotiri. Irintiquea piotacaajeitiri itsipapee, yora itseenqueetiri. ²⁶Pineshinoncajeitaqueri irinti, picoacaajeitaqueri irote.

²⁷Irootaque icantiqueriri iriri, impoiji icantajeitaqueri ashaninca:

—Irio Apa iotacaanari maaroni. Apaniro iotasanoquea irinti naro itomi, te iriotacotenaji itsipapee. Apaniro niotiri narori, tempa narotaque itomi; yorari itsipapee, te iriotasanojeiteriji Apa. Irintiquea iotasanojeitaqueri yora noamejeitaqueri. ²⁸Ariorica pashinoncyea, ariorica ompomerentsitimotempi paitapeerica, pimpocashitena pincamantena; ari noncavintsayempi, nintacotempi eiro opomerentsitimontajimpitsi aisati. ²⁹Pinquemisantena narori, pincoajeite noamejeitempi; oshequi nocavintsanti, oshequi noneshinoncatanti. Ariorica pinquemisantena, noveshireacaajeitempi. ³⁰Pamene, eiro noperanatimpitsi, eiro noashinoncaimpitsi, irointi namitacotapi-nijeitempi.

Yora Jesoshi irio cantatsiri paitapeerica antayeteri saavarroqui.
(Mr. 2.23-28; Ir. 6.1-5)

12 ¹Ari pashini saavarro noijajeitanqueri Jesoshi, ijivajeitanaquea anta oantsipeequi. Narotaque iroamerepee. Ari aaajeitaquena notashe, irootaque naviitantanacarori oitsoqui tirico, noajeitacaro. ²Ari ineajeitaquena variseopee, irosati icantantacari Jesoshi:

—Pamenerite poamerepee. Meeca saavarro, te oncameetsateji meeca iraviitantearo.

³Ari yacanaqueri:
—Tempa pineanatapinivetaro Sanquenarentsi quenquetsatacotiriri Iravirini. Aajeivetacarini peerani itashe, aisati aajeivetacarini maaroni oijajeitiriri. ⁴Ari iqueapaaque ivancoqui Tasorentsi, icantapaaqueri yora saserote: “Aajeitaquena notashe”. Ari otimaveta anta tanta yoashiyeetanariri Tasorentsi. Te oshinetanteaji iroajeitearo ashanincabee, apaniro irinti yoaro saserote. Iro cantaincha icavintsaajeitavaqueri, te incoyeji iroashinoncayeri, irootaque ipajeitantaca-

riri Iravirini, aisati itsipajeitari. Yoajeitaca. Meeca te pincanteji: “Te oncameetsateji yantiniri Iravirini”, ari ɬpaita picantantari meeca: “Te oncameetsateji yantiri yoca”? ⁵Aisati isanquenatini Moishishi: “Eiro pantaveetantarotsi saavaro”. Iro cantaincha maaroni saavaro ijatapiniti saserote ivancoqui Tasorentsi, yantaveetapiniti. Te pinquishimenterini, tempa pineacameetsataquero yantayetiri. ⁶Tempa atiri yanaacojeitaquero ivanco Tasorentsi, ocameetsati ancavintsaajeiteri irinti, eiro avashinoncairitsi. ⁷Pineaquero, isanquenatini peerani: “Icanti Tasorentsi: “Te noncoyeji poapinitenari ovisha, pintaapinitenari; irointiquea nocoasanoataque pincavintsaajeiteri pishaninca””. Pinquemasanoterome oca icantiri Tasorentsi, eiro picantimentirime yoca aviitirori tirico, te aneeroji irantane. ⁸Noponeaca narori inquitequi, natiratapaaque. Narotaque nainti cantatsine paitarica antayeteri saavaroqui.

**Yoavisacotiri saavaroqui
Jesoshi tsiricoipacori.**
(Mr. 3.1-6; Ir. 6.6-11)

⁹Ari novajaiteanaja, noqueajeitapaaquero pancotsi yapatojeitantar. ¹⁰Itimi anta tsiricoipacori. Ari yora variseopee isampijeitavaqueri Jesoshi:

—¿Ocameetsatimpa poavisacoteri saavaroqui tsiricoipacori?

Icoajeitaque iroavisacoteri saavaroqui, irootaque incantajeitanteari: “Yantaveeniroti Jesoshi saavaroqui, te incameetsateji”. ¹¹Ari yacanaqueri:

—Pamene, ariorica saavaroqui impariaque omoroqui povishate, tempa paajeri, poisoquijajeri. Ocameetsati picavintsairi. ¹²Tempa atiri yanaacotiri ovisha icameetsatasanotaque. Ocameetsataque ancavintsayeri saavaroqui.

¹³Impoiji icantiri yora tsiricoipacori:

—Pancotaje.

Ari yacotanaji, cameetsatanaji iraco, omoncarajaro otsipa iraco. ¹⁴Iro cantaincha iquisajeitanaca variseopee. Ijajeitajaji, yoametavacaajeitanaca, icantajeiti: —¿Jaoca ancanteriri Jesoshi, avacantanteariri?

**Oquenquetsatacotaquerini Jesoshi
sanquenarentsi peerani.**
(Mr. 3.7-12; Ir. 6.17-19)

¹⁵Iotaque Jesoshi icoajeitaque iroyeri, irootaque yovaantanajari. Ari noijajeitanaqueri, nocarajeitiri oshequi itsipapee atiri. Itimi oshequi mantsiyatatsiri, iro cantaincha yoavisacojeitaqueri maaroni, ¹⁶impoiji icantajeitaqueri:

—Eiroyea picamantsi: “Yoavisacojetaquena Jesoshi”.

¹⁷Ari itsoteajiro Jesoshi maaroni iquenquetsatacotaqueriniri peerani Isayashi. Jero oca irineane Apa Tasorentsi isanquenatiniri: ¹⁸“Jeri yoca Quirishito noocoacaquaqueri irantenaro maaroni noocoacaquaqueri. Oshequi nonintaqueri, oshequi noneacameetsataqueri. Nontianqueneri noshire, quiso oanaqueri, amitacotapiniteri. Incamanta-jeiteri itsipapee atiri jaoca noncanteari noameetsatanteariri maaroni. ¹⁹Eiro icantavacaimentarotsi paitapeerica, eiro iquenquejairitsi itsipapee. Eiro icajemacotapinitiritsi itsipapee. ²⁰Eiro yoashinoncairitsi oashiretachari. Eiro yamatavitirtscoatsiri iriontena. Aitaque, incanteani incavintsante, aisati impincatsariventanasanote. ²¹Iriotaque oavisacojeiterineri itsipapee atiri, te intimeji pashini oavisacojeiterine”. Irootaque icantiri Tasorentsi peerani.

**Yora variseopee icantimajetaquero
Ishire Tasorentsi.**
(Mr. 3.20-30; Ir. 11.14-23)

²²Impoiji yameetaqueneri Jesoshi neiriri camaari: te irameneji, aisati te

irineanateji. Ari yoavisacotajiri: yamena-caajiri aisati ineanatacaaajiri. ²³Ari yoajeitanaqueri cavaco maaroni neacojeitaqueriri. Isampitavacaajeitaca:

—¿Iriompa yoca Quirishito aamaajeitacari?

²⁴Iro cantaincha icantajeiti variseopee:

—Irio Satanashi, yora ivincatsarite camaari, amitacotiriri itiancajiri iyamaa-ririnte.

²⁵Ari iotaque Jesoshi iquenqueshirejeitiri, icantajeitiri:

—Ariorica irimanatavacaajeiteame savicajeitatsiri quipatsiqui, tempa ari impoyereavacaajeiteame. Aisati iquempe-taca yora savicajeitatsiri nampitsiqui, ariorica inquisavacaajeiteame, tempa ari inteeentareavacaajeiteame. Aisati iquempe-jeita maaroni atiri, ariorica inquisaqueri ishanincasanori, eiro quiso yoajiritsi.

²⁶Pamene: irioricame Satanashi amitacotenaneme notianquiri noyamaaririnte, tempa nompoyereavacaajeiteame. ²⁷Aisati

irioricame amitacotenaneme notianquiri camaari, ¿irisatimpa camaari amitacojeitiriri pishanincapee iriori yojocantariri camaari? ²⁸Iro cantaincha irootaque Ishire Tasorentsi amitacotanari notiancantajariri camaari.

Tempa irootaque piotanteameri ainiro icarajeitaquempi Tasorentsi, icoaveta impincatsariventajeitimpime. ²⁹Intimerica coatsiri incoshiteri shintsitsatsiri, tempa irijivateri irayeri, shepi; iroisoteri, oiso, oiso. Impoiji incoshiteri ivaararo, eiro imatirotsi impiateari yora ashivetarori ivaararo. ³⁰Yora caari quemisantana, iriotaque quisakenari. Aisati, iquisaquina maaroni caari amitaco-tana.

Iquenquetsatacotaqueri Jesoshi yora cantimajeitirori Ishire Tasorentsi.

(Mr. 3.28-30; Ir. 12.10; 6.43-45)

³¹Aisati icantiri Jesoshi variseopee:

—Yora Tasorentsi icavintsaajeitiri maaroni caari cameetsajetatsiri aisati

maaroni cantimajeivetariri, eiro iquishimen-tajeitiritsi yantayetiri. Iro cantaincha eiro icavintsaajeitiritsi yora cantimajeitirori Ishire. ³²Noncamantempi: noponeaca nainti inquitequi, natiritapaaque, iro cantaincha incavintsaajeiteri Apa maaroni cantimajeive-tanari. Eiro icavintsaajeitiritsi irinti cantima-tirori Ishire. Eiro icavintsaairtsi meeca, aisati coajica eiro icavintsaairtsi, irointi iroasanquetaasanojeiteri. ³³Ariorica ocameetsati inchato, ocameetsati oitsoqui iroori; terica oncameetsateji inchato, aisati iroori oitsoqui, te ocameetsateji. Ariorica pineero oitsoqui, tempa piotaque ocamee-tsatarica inchato. ³⁴Pishiajeitaqueri camaari, te pincameetsajeiteji: tecatsi pincantea poametante cameetsa. Te oncameetsateji piquenqueshirejeitiri, irootaque caari ocameetsatanta picantajeitiri. ³⁵Irinti cameetsatatsiri shirampari iquenqueshireta-pinitiro cameetsayetatsiri, irootaque ocameetsatantari yantayetiri. Yora caari cameetsayetatsi iquenqueshiretapinitiro caari cameetsatatsi, irootaque caari ocamee-tsatarica yantayetiri. ³⁶Coajica incantacoven-tajeitaquempi Tasorentsi: inquenqueshireta-cajempiro maaroni picantajeitiri meeca. ³⁷Ocameetsajeitirica picantajeitiri, ari irineacameetsatempi, iro cantaincha terica oncameetsayeteji, incantempi: “Ainiro pantayetiri, oshequi pinquematsicatimen-tearo”.

Irootaque icantiriri Jesoshi variseopee.

Iquenquejaajeitaqueri Jesoshi yora tseencajeitantsatsiri.

(Mr. 8.12; Ir. 11.29-32)

³⁸Impoiji icantajeivetari variseopee aisati oametantayetirori Sanquenarentsi:

—Oametanari, nocooaque namenempi pintasonquero paitapeerica, niotantem-piri avirotquerica Quirishito.

³⁹Yacanaqueri Jesoshi:

—Te pincameetsajeiteji, oshequi pitseencaqueri Tasorentsi, irootaque

picantantanari. Eiro notasonquimojeitim-pitsi piotantenarime. Otimi yantayetiniri Jonashi: pishiretearome ishiacantaque-nari, ari pinquemisantaquenam.

⁴⁰Peerani iniaquerini anteari omani, ocarataque mava quitaiteri inaqueri isheitoqui. Aisati narori, noncamaque, oncarataque mava quitaiteri nonaque narori omoroqui tsompoina. ⁴¹Coajica incantacoventajeitempi Tasorentsi, incantajeitempi: "Ainiro pantanejei avirorije. Peerani yora ninivesati iquemisantajeitaquerini yora Jonashi, iquenqueshirejeitancatari. Avintije, pineajeivetacari Quirishito, oshequi yanaacotasanoliri Jonashi, ipincatsarita-sanoti irinti, iro cantaincha te pinquemi-santajeiteriji". ⁴²Aisati incantajeitempi: "Ainiro pantayetiri avirorije. Peerani ora ivincatsarotenri savasatini oquemaque oshequi iotaque Saromo, irootaque ojatantacari arejiqui oquemisantantacariri. Jeri isaviquimojeivetimpi avinti anaacotiriri Saromo, iro cantaincha te pimpincatsateriji". ⁴³Noshiacantempiro aisati: oquempevetaca yora camaari itimantacari ishirequi shirampari, ipeaquero ishire ivanco. Ari yojoqueetiri camaari, yavisacovetaja yora itimantari. Ijataque camaari anta caaraiteriqui, anta opirijaiteaque. Icoaveta irimaoreeme, iro cantaincha te irimateroji. ⁴⁴Impoiji icantaniroti: "Nompianajeta novancoqui noponeacanta". Ari ipianaja, ineapaa-quero opishitaca, ocareniiiteanaque, ovetsicayetaca isavimentopee, imamento, maaroni. ⁴⁵Ari ijatashitana-queri pashini iamaaririnte, icarati 7. Oshequi yanaacojeitiri icamaaritasano-jeiti. Icantiri: "Tsame pisaviceite novancoqui". Ari, peerani yashinoncaave-taca capichaji yora itimantari camaari; meeca irampiitajea irashinoncaasanota-najea catsini. Aisati pinquempejeitea avirorije. Pashinoncaajeivetaca, te

piojeiteniji. Meeca pineajeivetacuena, iro cantaincha te pimpincatsajeitenaji, irootaque pampiitajea, pashinoncaasanajeitacea.

Irootaque icantajeitaqueriri Jesoshi.

Ishanincajeitacari Jesoshi maaroni quemisantajeitiriri.

(Mr. 3.31-35; Ir. 8.19-21)

⁴⁶Ari iquenquetsatacajeitaquena Jesoshi, aisati yora apatojeitachari anta pancotsiqui. Irosati opocantapaacari iriniro Jesoshi, jeri irirentipee, ocatiapaaca saiteriqui, ocajamacanta-queri. ⁴⁷Icamanteetaqueri:

—Areetapaaca piniro, jeri parentipee, ocoapaquempi. Ocoaque onquenquetsatacayempi.

⁴⁸Yacanaqueri:

—¿Janicampa ina? ¿Janicampa iyepee?

⁴⁹Ari ijicojeitaquena, icantiri:

—Jeri yoca noamerepee, iriojeitaque iyepee, aisati irojeitaque ina. ⁵⁰Iriotaque noshanincatasanojeitacari maaroni antiniriri Apa Jenoquiniri icoacaajeita-queri: nocantajeitaqueri iye, tsio, jero ina.

Iquenquetsatacaqueri yora panquiveetatsiri.

(Mr. 4.1-9; Ir. 8.4-8)

13 ¹Irosati isoquijantanaja Jesoshi, ijatanaque otsapijaqui incajare. Noijajeitanqueri, ²aisati yapatotimenta-jeitacari oshequi atiri. Ineaquero pitotsi, otsatacota; ari itetapaacaro, isavicapaa-que. Ari nocatiaeitaca narori otsapijaqui. ³Impoiji, oshequi iquenquetsatacajeita-queruena, ishiacantiri panquiveetatsiri, icanti:

—Ijati panquiveetatsiri yojocaitiro oitsoqui tirico iroanequi. ⁴Opariaaranta-paaque aparopee oitsoqui avotsiqui, impoiji ipocapaaque contsaro, yoitapaa-carri oitsoqui. ⁵Otsipapee oitsoqui

opariaarantapaaque mapiqui. Te anta ontimasanoteji quipatsi, ari jentsipaite oshiocavetanaca, aisati jentsipaite otsoancavetapaaca. ⁶Iro cantaincha te ontimasanoteji ovaritsa. Ijenoquitapaaque catsirinaciteri, oshimpetanaque, impoiji ocamanaque. ⁷Pashini pariapaintsi quitotsequishiqui: anaanaquero irointi, oshioaque, ajaanaquero panqurientsi. ⁸Orari pashinipee oitsoqui opariaapaaque quipatsisanoriqui cameetsari. Oquimotanaque, oitsoquitanaque. Aparopee timanaintsi oitsoqui ocarataque 100, iro otsipapee ocarataque oitsoqui 60, iro otsipapee ocarataque oitsoqui 30. ⁹Otimirica piyempita piquemantari, pinquemavaquero oca nocantajeitaquempiri.

**Yoametaqueri Jesoshi iroamerepee
ishiacaaventiniriri.**

(Mr. 4.10-12; Ir. 8.9-10)

¹⁰Impoiji notsipajeitanacari pashinipee iroamere, nocantajeitaqueri Jesoshi:

—¿Paita pishiaccantantanariri yora itsipapee? Te inquemajeiteroji picantaqueriri.

¹¹Ari yacanaquena:

—Nocoacaajeitaquempi piojeitanaquero caari iojeiti itsipapee. Nocoaque piojeite jaoca icanta Tasorentsi ipincatsariventajeitimi, iro cantaincha te noncoacayeriji yora itsipapee iriojeitanaque.

¹²Itimirica iovetachari, ari niotacaasano-teri. Iro cantaincha itsipapee, te incoyeji iriote, irootaque caari iotanta irinti; eiro noametirtsii irinti, aisati nompeapitsataqueri iotantavetari. ¹³Irootaque noshiaccantantanariri irioripee, te incoyeji iriojeite. Yamenajeiveta, iro cantaincha tecatsi irinee. Iquemajeivetavacaro iro cantaincha te inquemavaqueroji, te iriotavaqueroji nocantavetacariri.

¹⁴Aitaque iquenquetsatacotitarini peerani Isayashi, icantini: “Pinquemajeivetea, iro

cantaincha eiro piojeitavaquerotsi. Pamenajeivetea, iro cantaincha eiro pineasanojeitirotsi. ¹⁵Te pincoajeiteji piojeitanaque, irootaque caari piquenque-shireajeitanta. Te pincoyeji pinquemajete, irootaque povitantarcarori piyempita. Te pincoajeiteji pamenasanojeite, irootaque pimatsiocantacari. Te pincoyeji catsini noavisacojeitempi”. Irootaque iquenquetsatacotiriniri peerani Isayashini. ¹⁶Iro cantaincha pamenajeitana-naji avinti, piquemisantajeitajana, irootaque pinquimoshiretasanajeitanteari. ¹⁷Queario oca noncamantempi: icoajeiveitani peerani yora quenquetsatacantantatsiniri aisati cameetsajeitatsiniri irineerome oca pineajeitaqueri avirori. Icoajeiveitani inquemerome oca piquemajeitaqueri meeca. Iro cantaincha te irineajeitenaji, te inquemajeitenaji. Irootaque icantauenari Jesoshi.

**Yora Jesoshi yoamejeitaqueri paita
ishiacantiniriri.**

(Mr. 4.13-20; Ir. 8.11-15)

¹⁸Ari icantajeitaquena Jesoshi:

—Meeca noamejeitempiro oca

noshiaccantajeitaqueneriri incaranqui.

¹⁹Ari nocamantapinitiri itsipapee jaoca icanta Tasorentsi ipincatsariventanti, iro cantaincha terica inquemero, iquempeta-caro oitsoqui pariaintsiri avotsiqui.

Ipoqui camaari, yojocacaquaqueri iquenqueshirevetacaro noneane.

^{20,21}Aisati itsipapee iquemavetavacaro nocantavetacariri, iveshireimentaveta-caro, irootaque quisantacariri ishaninca.

Iro cantaincha te iriotasanoteji, te inquemisantsasanoteji, irootaque yojocan-tajarori iquemisantaveta. Ari ishiaquero iriori oitsoqui pariapaintsiri mapiqui.

²²Iojeiveta itsipapee noamejeivetari, iquemavetaro noneane, iro cantaincha oshequi iquenqueshireyetiyo paitapeerica, aisati oshequi iveshireimentaro

irovaararo, irootaque caari iquenqueshi-retantaro noneane. Te inquemisanteji. Ishiaquero iriori oitsoqui pariapaintsiri quitotseequishiqui.²³Iro cantaincha aimiro itsipapee quemasantasanotirori noneane, quemasanotirori. Oshequi iquemisantaquena, iquearioventaquero maaroni noocoacaqueriri. Ishiaquero oitsoqui pariapaintsiri quipatsiqui cameetsari, ora shequianaintsiri oitsoqui: aparopee timayetanaintsiri oitsoqui 100, iro otsipapee otimaque oitsoqui 60, iro otsipapee aisati otimaque oitsoqui 30.

Irootaque icantaquenari.

Iquenquetsatacotiri Jesoshi yora quishiriri panquitirori tirico.

²⁴Pashini aisati ishiacantaquenari Jesoshi, icantaquena:

—Aitaque icanta ipincatsariventanti Tasorentsi, iquempetacari yora panquitirori oitsoqui tirico. Ocameetsataque oitsoqui ipanquitiri.²⁵Impoiji tsiteniriqui imai, aisati imaajeiti iratiritepee. Ipocaque tsiteniriqui quisaqueriri, yamaquero oitsoqui tiriconiro. Oshiate-taro tirico, iro cantaincha oquepiati. Ipanquitiro anta ivanquirequi ashitarori iroane, iconoaitiniri tirico. Impoiji ijatanaji.²⁶Ari impoiji aisati oshiocana-que tirico, oitsoquitanaque. Aisati oshiocanaque tiriconiro, oconoanacaro.²⁷Ineaquero iratiritepee, ijatashitaqueri, icantaqueri: “Tempa ocameetsati oitsoquipee apanquijeitiri anta poanequi. ¿Paita oshiocantacari tiriconiro?”²⁸Yacanaqueri: “Irioyeata quisaquenari panquitaitirori”. Ari isampijeitiri: “¿Picoaquempa nojajeite nontsocayeta-jero tiriconiro?”²⁹Icantiri: “Aitanaque. Pitsocacotirocari tiricosanori.³⁰Ocanta-vacata. Oshiacacoterota meeca. Coajica-quea amenavaquero oitsoquitanaquetsitsa tirico. Impoijiquea, noncantajeitempi: ‘Pimpesajeitero tiriconiro, paajeitero,

pintayero. Impoijiquea pavitero tiricosanori, poajero anta pancotsiqui noquem-poyeantaroriqui’”.

Irootaque ishiacantajeitaquenari Jesoshi.

Ishiacantiro Jesoshi oitsoqui moshitasa.
(Mr. 4.30-32; Ir. 13.18-19)

³¹Jero oca pashini ishiacantajeitanari Jesoshi, icanti:

—Aitaque icanta ipincatsariventanti Tasorentsi, ishiacantiro oitsoqui moshitasa ipanquiyetiri oantsiqui.

³²Orijaniqui onaveta oitsoquijaniqui, iro cantaincha oshiocanaquerica, antearo-tanaque, anayetanaquero otsipapee panquiyetachari, aitaque irimencotanta-quearo tsimeripee ojempequiqui.

Ishiacantiro Jesoshi tapiacaarori tanta.
(Mr. 4.33-34; Ir. 13.20-21)

³³Jero pashini ishiacantaquenari:

—Aitaque icanta ipincatsariventanti Tasorentsi, iquempetavero tsinane ovetsiquiro tanta. Aaquero ovane tirico oshequi, aisati oconoiro tapiacaarori capichaji. Oconoasanotiro, impoiji otapiaquero maaroni.

³⁴Aitaque icanta Jesoshi, ishiacaaventa-pinijeitiniri apatotimentajeitariri, iotaca ishiacantiniri.³⁵Imoncarataquero isanquenatiniri peerani yora quenqueta-tacantatsiniri: “Icanti Tasorentsi: ‘Oshequi noshiacanteneri atiripee; noncamanteri caari iojeitini peerani’”.

³⁶Impoiji ijatanaque Jesoshi, yojocajeitanajiri yora apatotimentajeitariri, ijatanaque pancotsiqui. Narotaque iroamerepee, noijajeitanaqueri. Nocanta-queri:

—Poametasanotenaro oca pishiacanta-jeitiniriri yora apatotimentajeitimpri. ¿Paita oshiacantiri tiriconiro ipanquiyee-tiri tiricomashiqui?

³⁷Ari yacanaquena:

—Noponeaca narori inquitequi, natiritapaaque. Naro shiaqueriri panquitorri tirico cameetsari.³⁸ Ora oantsi oshiacantaquero quipatsi asavicajeitan-tari. Ora oitsiqui cameetsari oshiacanta-queri pincatsatiriri Tasorentsi. Irointi tiriconiro oshiacantaqueri pincatsatiriri camaari.³⁹ Yora quisantatsiri, panquitorri tiriconiro, ishiacantaqueri camaari. Ora yaviitaqueri oitsiqui oshiacanta-quero ontsoncanteari quipatsi. Yora iratiritepee ishiacantaqueri inampirepee Tasorentsi.⁴⁰ Pineaquero, yapatotacanta-quero tiriconiro, itaasanotaquero, pomein. Oca oshiacantaquero nanteri coajica nontsoncantajearori quipatsi.⁴¹ Nontiancajeiteri oshequi nonampirepee, nampatotacantajeiteri maaroni caari cameetsajeitatsi; te nonintacayeriji incarajeiteri maaroni pincatsajeitanari.⁴² Nojocacantajeiteri anta paamariqui: oshequi irashinoncaajeitaquea anta, oshequi inquematsicatearo.⁴³ Impoiji irishipaquaireajeitanaque maaroni cameetsajeitatsiri, inquempejeiteari catsirincaiteri. Incarajeiteri Apa anta ipincatsarintia. Otimirica iyempita atiripee, ocameetsati inquemisantajeiten-a.

Iquenquetsatacotaqueri Jesoshi quirequi imaneetiri.

⁴⁴Aisati icantaquena Jesoshi:
—Aitaque icanta Tasorentsi ipincatsari-ventanti, ishiaqueri oshequi quirequi imaneetiri quipatsiqui. Ari ineashitacari quirequi pashini shirampari. Imanaqueri iringi, te incamanteji. Iquenqueshiretaca: “Namananterota quipatsi, nashitanteariri timatsiri quipatsiqui”. Impoiji ijataque ipimantajeitaquero maaroni yashijeitari iraanteariri quirequi. Irootaque yamanan-tantacarori quipatsi itimantari oshequi quirequi. Impoiji iquimoshireventaque-ri oshequi quirequi, yoca yamanantacota-

queri.⁴⁵ Aisati iquempetacari coatsiri iramanantero marereatatsiri mapi, cameetsatasanotatsiri.⁴⁶ Ineaquero aparoni, ocameetsatasanotaque, opinata-sanotaca. Icoasanotaquero, irootaque ipimantantarori maaroni timimojeitiriri yaantariri quirequi. Impoiji itsoncaqueri iirequite yamanantantarori aparoni mapi cameetsari.

Iquenquetsatacotiyo Jesoshi quitsari.

⁴⁷Aisati icantajeitaquena Jesoshi:
—Pashini aisati noshicantempiro jaoca icantari Tasorentsi ipincatsariventanti. Oquempetaca iquitsati shirampari incajare-qui. Yojocaquero iitsarite nijequi, impoiji inoshicacotaqueri shimayetatsiri; icaantana-cave, monquire, monquire. Inashiyetaca.⁴⁸ Ijaacaro quitsariqui, inoshicacotaqueri otsapijaqui. Impoiji isavicaque, icoyeayeta-queri cameetsayetatsiri. Irintiquea yora caari cameetsayetatsi yojocaqueri.⁴⁹ Aisati onquempetajea ariorica nompocaje. Nontianqueri nonampirepee irinashitacaajei-teari cameetsajeitatsiri aisati caari cameetsa-jeitatsi.⁵⁰ Irojocajeiteri caari cameetsajeitatsi anta paamariqui. Oshequi irashinoncaajeita-naquea, inquematsicasanojeitearo paamari.⁵¹ ¿Piquemajeitaquerompa oca nocamantajeitaquemperi?

Nacajeitanqueri:

—Je, noquemajeitaque.

⁵²Ari icantaquena:

—Arriorica inquemisantena yora oametan-tirori Sanquenarentsi, iriojeitanaqueo oshequi: tempa meeca iotiro maaroni isanquenayeetiniri peerani: aisati, inquemi-santenerica, irotiero iroaqueratatsiri noamejeitiriri meeca. Irotanaquero jaoca icantari Tasorentsi ipincatsariventanti.

Ipianaja Jesoshi Nasaretequi.

(Mr. 6.1-6; Ir. 4.16-30)

⁵³Ari ivecarataquero Jesoshi ishiacanta-jeitaquenaro, impoiji ijatanaque,

⁵⁴ipianaja anta iipatsitequi iponeacanta. Noijajeitanaqueri narori. Ari yoametantapaque anta yapatojeitanta ashanincaphee. Yoajeitanaqueri cavaco maaroni quemajeitavaquerir, icantajeiti:

—¿Janica oametiriri yoca otimantacari iotantari? ¿Paitaquea matacaquerir itasoncantayeti? ⁵⁵Tempa iringa queca itomivetsiquirori inchato. Tempa iringa queca irinri Maria. Tempa iringa queca irinrentipee yora Santiano, Jose, Shimo, jeri Jorashi.

⁵⁶Tempa aisati acarajeitaquero iritsiropee. ¿Paita ipincatsanirotantacari?

⁵⁷Ari iquisajeitaqueri, itseencajeitaqueri, iringa queca icantantariri:

—Timatsi pincatsatiriri quenquetsatrori irineane Tasorentsi, iro cantaincha itseencajeitiri ishanincasanori.

⁵⁸Ari oshequi itseencajeitaqueri ishanincasanori, iringa queca caari itasoncantayeta oshequi anta inampisanoriqui.

Yora Eroeshi yoacantaqueri Joa, impoiji ijitashitajari itinaanaja, ijitajiri irio Jesoshitajantsiri.

(Mr. 6.14-29; Ir. 9.7-9)

14 ¹Irosati yora Eroeshi iquemacotaqueri Jesoshi. Yora Eroeshi ipincatsariventajeitiri maaroni carireasati. ²Icantajeitiri ishanincaphee:

—Irioyeata Joa Jesoshitajantsiri. Noacantavetacari, iro cantaincha aamaashiteari tinaanajaitatsi ini, iringa queca imatantarori itasoncantayeti.

^{3,4}Ari chapinqui yora Eroeshi yaapitsataqueri irinrenti Jeripe ijina, opajita Eroashi. Yora Joa icantavetacari: “Te oncameetsateji paapitsateri pirenti ijina”. Irosati yaacantantacari, yoiminqueacantaqueri. Yoisoyeetaqueri carenatsaqui.

⁵Ari icoavetaca iroacantitearime, iro cantaincha oshequi ipincatsajeitaqueri atiri Joa, iojeitiri iquenquetsatacotiri Tasorentsi. Ijivetaca Eroeshi: “Ariorica

noacanteri, inquisacojeitanaqueeari atiripee”. ⁶Impoiji omoncarataca quitaiteri itimantacari peerani Eroeshi. Yapatojeitaqueri oshequi ishaninca, iquimoshireimentajeitacari. Aisati omaninquetacotimentaqueri oshinto Eroashi. Oshequi ineacameetsataquero, ⁷iringa queca icantantariri:

—Pitarica pincoacotaquenari, aitaque nompaquempiro. Ioti Tasorentsi eiro namatavitimpitsi.

⁸Ocantiro iniro:

—Pincanteri iroacanteri Joa.

Irosati ocantantariri:

—Nocoaque poacanteri Joa, impoiji pimpacotenaro matitaqui iiton, iotanteari ina queario icamasanotaque.

⁹Ari yoashiretanaca Eroeshi. Te incoaveteji, iro cantaincha iquemajeitaqueri maaroni ishaninca icantiquerori irishintotsori. ¹⁰Iringa queca ipesacantanta-cariri Joa. ¹¹Impoiji yameetaquenero matitaqui iito Joani. Aavaquero, aanaquenero iniro. ¹²Irinti iroamereni yaajeitanaqueri, itijaitiri. Impoiji iquemajitanaque, icamantapaaqueri Jesoshi:

—Yoyeetaqueriyea Joa.

Ijivataqueri itasoncaquero

Jesoshi tanta, yoshequiaquero.

(Mr. 6.30-44; Ir. 9.10-17; Joa 6.1-15)

¹³Iquemantacari Jesoshi icamaque Joa, ijtatanaque apaniro anta tenta intimeji atiri. Intentajeitanaquea, iro noquenajeitantanacari pitotsi. Iro cantaincha iquemacojeitaqueri atiripee, iponeayetanaca nampitsipeequi, ishiteajeitanaca, yojajiteitanaquea.

¹⁴Ari naatacojeitapaaque, noneajeitapaaqueri oshequi apatojeitainchari. Oshequi icavintsaajeitapaaqueri, yoavisacojeitaqueri mantsiaripee. ¹⁵Ari ishaavijitanaque catsirincaiteri. Nocarajeitaqueri pashini iroamere, nocantajeitacari:

—Pamene, caraiteitaque aca, aisati ishaavijiteanaque catsirincaiteri. Pintian-

cajeiteri yocapee irijajeite nampitsipeequi iramanantajeite iroyeari.

¹⁶Yacanaquena:

—¿Paita irantsipetashitanteari irijate?
Jentsite, pimpajeiteri avirori iroajeiteari.

¹⁷Nocantajeitaqueri:

—Te ontimiji nompajeiteriri. Jero oca
ocarataque tanta apapacoroni. Jerica
aisati apite shima.

¹⁸Icantaqueña:

—Pamaquenaro.

Ari nopaqueri. ¹⁹Impoiji icantajeita-
queri:

—Pisavicajeite saveshishiqui.

Ari isavicajeitanaque. Impoiji
yaavaquero tanta aisati shima. Ari
yamenanaque jenoqui, icantiri iriri:

—Irove, Apa, pipaquenaro oca
noyearica.

Impoiji icarajaquero, ipaquenaro.

Novaajeitaqueneri yora apatojeitainchari.

²⁰Yoajeitacaro maaroni, iquemajeitanaca.
Impoiji napatojeitajiro timaarantapaa-
jatsiri, nojaayetajiro cantiriqui, ocarataque
12. ²¹Naamaaca ari icarajeiti yora
oajeitacorori 5,000 shirampari, aisati
tsinanepee, jeri aisati jananequipee.

**Yora Jesoshi yanijatiro incajare,
te intsitiaquiteji.**

(Mr. 6.45-52; Joa 6.16-21)

²²Impoiji icantajeitaquena:

—Noamerepee, pintejeitanajea
pitotsiqui, pijivajeitanajena intatiquero.

Impoiji aisati icantajeitaqueri apatojei-
tainchari:

—Pijajeitanaje pivancopeequi.

²³Impoiji ijatanaque apaniro toncaariqui,
iquenquetsatacairy iriri. Ari otsitenitanaque,
itimi apaniro iriori anta. ²⁴Narojeiquea
nainti, noquenacojeitanaque nianquijaqui.
Antearo omotoncane, aisati oipiacotajana
tampea. ²⁵Irotajantsi onquitaitetaje
noneajeitavaqueri, yanijatapaquero
incajare, te intsitiaquiteji. Te niojeitavajeriji,

²⁶irootaque notsaroacaajeitantanacariri,
nocajemajeitanaque:

—Jeee. Coraqueve camaarira.

Oshequi notsaroacaajeitacari. ²⁷Iro
cantaincha icantajeitaquera:

—Narotaque pocajantsi, piveshireimen-
tajeitavajena, eiro pitsaroacaajeitanatsi.

²⁸Ari icantiri Petero:

—Avirorica novincatsarite, pincaje-
mena nanijatashitanajempi nijaqui.

²⁹Ari icantiri:

—Caatequeti.

Irosati imitajantanaca, yanijatanaque anta
Jesoshiqui. ³⁰Iro cantaincha impoiji iquenque-
shiretaquero tampea, aisati itsaroanaque.

Ineavaitia itsitianaque, icajemanaque:

—Novincatsarite, paavajena.

³¹Irosati yacotashitantavajari, yaavajiri.
Icantiri:

—Capichaji pishiretaquena, ¿paita
pitseencantanari?

³²Ari itetanajaro pitotsi, irosati
opeantanaja tampea. ³³Oshequi nopinca-
tsajeitaqueri, nocantajeitaqueri:

—Queariotaqueteemi, aviro Itomi
Tasorentsi.

**Yoavisacojeitiri Jesoshi mantsiyetatsiri
anta Jenesaretequi.**

(Mr. 6.53-56)

³⁴Ari nomonteajeitanaja, narejeita-
paaja Jenesaretequi. ³⁵Yora savicajeita-
tsiri iojeitavaqueri Jesoshi, itianajeita-
queri ishaninca, yamacantajeitaqueri
mantsiyetatsiri. ³⁶Ari yantitapaaqueri
itsaare ocaratapai. Yavisacojeitanaji
maaroni antitajeitaqueriri.

**Icantavacaimentajeitaro paita caari
acameetsashirejeitanta.**

(Mr. 7.1-23)

15 ¹Impoiji ipocashijeitiri Jesoshi
variseopee aisati oametantirori
Sanquenarentsi. Iponeajeitaca irioriei
Jerosarequi. Isampitapaaqueri:

²—Tempa arojeitaque jorio. Amejeive-tacaro tequeratsitarica avajeitea, ajivati aquivacotasanotha. Irootaque yoamejeita-queeri yora peeraniniri. ¿Paita caari iquempejeitanta poamerepee? Yoashini-rotaca, te inquivacoteaji.

³Yacanaqueri:

—Oshequi pimoncaratashiyetacaro icantashiyetacaniri peeraniniri, irootaque caari pimatantaro yoamejeivetimpri Tasorentsi. ⁴Tempa icanti irinti: “Pimpincatsateri piri aisati piniro”. Aisati icanti: “Incama yora cantimatinirri iriri aisati iriniro”. ⁵Iro cantaincha aviroripee, picantajeitiri pishaninca: “Pincanteri ashitimpri ‘Nompeempime quirequi, noncavintsayempime, iro cantaincha nojivataque nocantaqueri Tasorentsi nomperiri iriori’”. Poamenirojeitiri eiro icavintsaitsi ashitariri, eiro ipincatsatiritsi. ⁶Pineaquero, poametashinirojeitacari icantashiyetacari pishaninca, te poamejeiteriji irineane Tasorentsi. ⁷Pishiacantaveta ca piquemisantiri Tasorentsi, iro cantaincha te pinquemisanteriji. Queario oca iquenquetsatacotimpri peerani Isayashini: ⁸“Icanti Tasorentsi: ‘Icantashi-jeitaca ipincatsataquena, iro cantaincha te irishirejeitenaji. ⁹Yatsipetashitacaro yapatotimentashitana, te iroametanteroji noneane, irointi yoametantiro irineane iriori’”.

¹⁰Impoiji icajemajeitiri yora apatotimentajeitariri, icantajeitiri:

—Pinquemajeitena, piojeitavaquero oca noncamantempri: ¹¹ora ayeari, tecatsi oncantero ashire ompeacayearo. Irointiquea oca aneaveetashiyetari, irootaque matirori ashire ompeacayearo.

¹²Impoiji nojatashitiri Jesoshi, nocarajeitiri itsipapee iroamerepee, nocantajeitiri:

—¿Tempa piote iquishimentajeitimpri variseopee oca picantiriri?

¹³Yacanaquena:

—Coajica intsocajero Apa jenoquiniri maaroni caari ipanquiti iriori. ¹⁴Ari inaji yora variseopee: te irioteji, iquempejeitacari caari amenatsi. Oquempetaca icoaque irijate jaocarica, icoaque irancatsatanajeri itsipapee caari amenajeitatsi iriori. Aitaque impariajeitaque omoroqui maaroni, terocn.

¹⁵Icantiri Petero:

—Te nonquemempiji, poametenaro oca pishiacantiri.

¹⁶Icantiri:

—¿Tequerampa ontive piotantari?

¹⁷—Tempa piote paitarica ayeari ojataque asheitoqui, impoiji ashitajero? Tecatsi oncantero ashire. ¹⁸Iro cantaincha pineanatantaro paitarica piquenqueshiretiri: terica oncameetsateji, eiro picameetsashiretitsi. ¹⁹Tempa piojeitiro piquenqueshiretiro caari cameetsatatsi, poanti, paimentaro pijina, pantiro caari pai, picoshiti, pitseeya, picantimatiri pishaninca. ²⁰Irootaque caari picameetsajeitanta. Iro cantaincha terica pinquivacoteaji, tecatsi oncantero pishire.

Yoavisacotiro Jesoshi oshinto canasato.

(Mr. 7.24-30)

²¹Irosati ijatantanacari Jesoshi Tiroqui aisati Shiroqui. Intentajeitanquena maaroni iroamerepee. ²²Ojatashitaqueri cananasato, caari oni jorio. Ocantiri:

—Novincatsarite, tempa aviro ishanincani pincatsari Iravirini. Nocoaque pincavintsa-yena, aisati noshinto. Yataanaquero iroori camaari, catsiqueti yoanaquero.

²³Iro cantaincha imajeretanaque, te iranquiero. Nocantajeivetari narori:

—Pincantajero ojatajeta, oshequi ashareajeitaquee.

²⁴Icantiro:

—Itiancaquena Apa noncavintsayeri joropee.

²⁵Iro cantaincha opocashitiri, otiyeroashitacari, aiquero ocantatiiri:

—Novincatsarite, pincavintsayena.

²⁶Icantiro:

—Te oncameetsateji aapitsateri atomi yoari ampanteariri otsiti. Te aviro jorio, ɿpaita noncavintsaantempi?

²⁷Acanaqueri:

—Queario, novincatsarite, oca picantiri. Iro cantaincha, tempa yoaro otsiti iroaritsopequi yora ashitariri.

²⁸Yacanaquero:

—Tsinane, cameetsa pishiretaquena. Aitaque nomataquempiro oca picoacota- quenarica.

Irosati avisacotantanaja oshinto.

**Yoavisacojeitiri Jesoshi oshequi
mantsiaripee anta incajarequi.**

(Mr. 7.31-37)

²⁹Ari yovaanaja aisati Jesoshi, iquena-naque otsapijaqui incajare anta Carirea- qui. Impoiji itoncaanaque toncaariqui, isavicapaaque. Nojajeitanaqueri narori, aisati iriori maaroni iroamerepee.

³⁰Iyatashijeitaqueri oshequi atiripee, yaajeitanaqueneri oshequi mantsiyeta-tsiri: choratsiri, caari shevatacha, caari amenatsi, caari neanatatsi, maaroni. Ari yoavisacojeitiri. ³¹Ari yoajeitanaqueri cavaco maaroni neajeitaquerir. Ineajeita-jiri ineanataji caari neanaveitachani, ishevajeitanaja caari shevaveitachani, yaniiyetanaji caari aniiveitachani, yamenanaji caari amenaveitachani.

Icantajeiti:

—Tempa icameetsataque Tasorentsi, yora pincatsariventajeitiriri maaroni joriopee.

**Yapiitajiro Jesoshi itasoncajiro tanta,
yoshequiajiro aisati.**

(Mr. 8.1-10)

³²Impoiji icajemajeitaquena Jesoshi, aisati iriori maaroni iroamerepee. Icantajeita-quena:

—Oshequi nocavintsaajeitaqueri maaroni yora apatotimentajeitanari.

Ocarataque meeca mava quitaiteri icarajeitaquee: tecatsi meeca iroajeiteari. Oshequi aajeitaqueri itashe meeca. Ariorica nontiancavetajeari meeca, aitaque ajaajeitanaqueri itashe, eiro yaaveajatsi irareejeitacea ivancoqui.

³³Nocantajeitaqueri:

—Pamene, caaraiteitaque aca. ɿJaoca ayerori tanta avacaajeiteariri? Oshequi icarajeiti catsini.

³⁴Isampitaquena:

—ɿJaoca ocaratiri tanta timatsiri?

Nacanaqueri:

—Ocarataque 7, aisati timatsi shivajaniqui aparopee.

³⁵Ari icantajeitiri apatojeitainchari:

—Pisavicajeite quipatsiqui.

³⁶Irosati yaantacaro tanta aisati shivajaniqui. Icantiri iriri:

—Ariove apa, pipaquena noyeari.

Impoiji icarajaquero, ipajeitaquenaro. Naajeitavaquero, impoiji novaajeitaque-neri iriori apatojeitainchari. ³⁷Yoajeita-naca, iquemajeitanaca. Impoiji napatojei-tajiro timaarantapaaajantsiri, nojaajiro cantiriqui ocarataji 7. ³⁸Icarajeiti oajeitainchari 4,000 shirampari. Aisati oajeitainchari oshequi tsinane aisati jananequipee. ³⁹Impoiji itianajeitajiri Jesoshi:

—Meeca pijajeitanaje pivancopeequi.

Irosati notejeitantanaja pitotsiqui, nomonteanaja anta Macataraqui.

**Icoaveta saserotepee irineerime
Jesoshi intasoncanteme.**

(Mr. 8.11-13; Ir. 12.54-56)

16

¹Impoiji ipocashitaqueri variseopee: icoajeive-taca irantacayerime Jesoshi caari cameetsatatsi ontimanteameri inquisantearimeri. Icantavetapaaacari:

—Jentsite, namenempi pintasoncante, niotanteari piponeacarica inquitequi.

²Yacanaqueri Jesoshi:

—Pamene, ariorica ishaavijiiteanaji, pineaquerorica opotsonaiteanaji, tempa picantajeiti: “Eiro oparii incani”. ³Iro cantaincha, oquitaitetamani, pineamaneririca iquieriteamaniro catsirincaiteri, aisati otsiteniiteamani, ari picantajeiti: “Ompariye meeca incani”. Piojeitaque jaoca ocanta inquite, pioti ompariaquerica incani. Iro cantaincha te piojeiteroji maaroni pineaqueri meeca quipatsiqui. ⁴Te pincameetsajeiteji, oshequi pitseenajeitaqueri Tasorentsi: picoajeiveta pineena nontasoncante, iro cantaincha eiro nonijaimpirotsi. Apatiro pineaquero coajicani oca ishiacantiri Jonashi.

Irootaque icantiqueriri Jesoshi, irosati ijatantanaja.

**Ishiacantiniri Jesoshi tapiacaarori
itantane variseo aisati saroseo.**

(Mr. 8.14-21)

⁵Ari nareejeitanaca intatiquero, nocarajeitiri itsipapee iroamere. Impoiji noquenqueshirejeitaqueri tanta: tecatsi namaque. ⁶Icantajeitaquena Jesoshi:

—Paamayearoyea tapiacaarori itantane variseopee aisati saroseopee.

⁷Ari nosampitavacaaca:

—¿Paita icantanteeri: “Paamayearoyea tapiacaarori itantane”? Te ameji tanta, iroitatsi icantantaqueeri.

⁸Iotashitaca Jesoshi nocantajeitaqueri, icantajeitana:

—Te pishiretasanojeitenaji. ¿Paita picantantari: “Te ameji atantane”? ¿Paita piquenqueshiretanticari? ⁹¿Tequerampa piojeiteji? Chapinqui otimaveta tanta apapacoroni, iro cantaincha noacaajeitacari 5,000 shirampari. Paajeitajiro timaarantapaajantsiri: ¿jaoca ocaratiri cantiriqui pijaajiri timaarantapaajantsiri?

Nocantiri:

—Ocarati 12.

¹⁰Aisati impoiji ocarati tanta 7, noacaajeitacari 4,000 shirampari. ¿Jaoca

ocaratiri cantiriqui pijaajiri timaaranta-paajantsiri?

Nocantiri:

—Ocarati 7.

¹¹Icantana:

—¿Paita caari piojeitanta meeca? Te nonquenqueshireteroji tanta pipeacotanacari. Queariompa, paamayearoyea tapiacaarori itantane variseopee aisati saroseopee.

¹²Impoiji niojeitanaque te inquenqueshireteroji tapiacaasanotarori tanta, irointi ishiacaventiro maaroni yoametantayetiri variseopee aisati saroseopee. Te irininteji Jesoshi iramatavijeitee yora variseo aisati saroseo.

Icantiri Petero Jesoshi:

“Avirotaque Quirishito”.

(Mr. 8.27-30; Ir. 9.18-21)

¹³Impoiji nojajeitanaque anta Sesarea-qui: ora nampitsi yovetsicantaqueri Jiripo. Ari icantauqua Jesoshi:

—Noponeanaca narori inquiequi, natiritatapaaque, iro cantaincha ¿paita yaamaajeitaquenari atiri, janicana?

¹⁴Nacanaqueri:

—Icanti aparopee: “Irioyeata Jesoshi Joani, yora vaotisatantaveitachaniri, itinaanaja”. Icanti itsipapee: “Irioyeata Iriashini, yonijantaja”. Icanti itsipapee: “Irioyeata Jerimiashini, yonijantaja”. Irio itsipa ijijeitimpí aviro quenquetsatacantinsiri, pitinaanaja.

¹⁵Ari isampitana:

—Avirojei, ¿paita picantajeitiri avirori?

¹⁶Yacanaqueri Shimo Petero:

—Avirotaque Quirishito naamaajeitari. Aviro Itomi Tasorentsi, yora Aneasanotasiri.

¹⁷Icantiri:

—Queario picantaque, Shimo itomi Jonashi. Te irio oamejeitimpirene atiri, irinti Apa jenoquiniri oametimpipirori.

¹⁸Nopajitimpí Petero: ocanti pivajiro

“Mapi”. Nocoacaquempi poamejeiteri atiri noamejeitaquempi avirori. Eiro imatiritsi camaari iroashinoncaajeiteri quemisantajeiteroneri pincamanteriri.

¹⁹Noametempi paitarica irantajeiteri atiri irineanteariri Tasorentsi anta ipincatsaritinta. Eirorica piquemisantacairi atiri aca quipatsiqui, eiro ijatitsi inquitequi; irinti maaroni pinquemisantacajaeiteri irisavicaeite anta inquitequi.

²⁰Impoiji aisati icantajeitana:

—Eiroyea picamantiritsi atiri: “Iriotaque Jesoshi Quirishito”.

**Yora Jesoshi icamantitacari
iroamere incame.**

(Mr. 8.31-33; Ir. 9.22)

²¹Impoiji icamantaquena Jesoshi:

—Irotantsi nojate Jerosarequi. Anta oshequi iroashinoncaajeitena yora savicacantatsiri, yora jivatacaaajeitiriri saserotepee, yora oametantirori Sanquenarentsi, maaroni. Aitaque oncanteari iroyeetena, iro cantaincha oncarate mava quitaiteri, ari nontinaanaje aisati.

²²Iro cantaincha ipiatsatacari Petero:

—Novincatsarite, te oncameetsateji oca picantaqueri. Eiro pashinoncaatsi, eiro picamitsi.

²³Ari ipitsocashitanacari Jesoshi, icantiri:

—Pijate, piquempetacari Satanashi.

¿Paita pitseencantaquenari? Te pioteroji icoacaquenari Tasorentsi, irointi piotaque icoacaquenari atiri.

**Icamantiri Jesoshi paita icoacairiri
maaroni oijajeitiriri.**

(Mr. 8.34-38; 9.1; Ir. 9.23-27)

²⁴Impoiji icantajeitana:

—Picoasanotirica pinquemisantasano-tena, eiro pantanontatsi avisati, irointi pimpomerentsiventenaro paitarica noncoacaquempi narori. Ariorica iroashinoncaimenteetempiro, iro cantain-

cha pinquemisantasanoquena. ²⁵Yora coavetachari incavintsaya irisati irashinoncayea; irintiquea yora caari cavintsachane irisati irineeri Tasorentsi irinti. ²⁶Ariorica intime ashiyetarori maaroni timayetatsiri quipatsiqui, iro cantaincha eirorica ijati inquitequi, tempa yatsipetashitacaro maaroni.

Pineaquero, tecatsi pincantea pimpinateri Tasorentsi irisavicasantempiri anta inampipiqui. ²⁷Noponeaca narori inquitequi, natiritarapaque. Coajica nompiaje aisati aca, nontsipatapaaqueari nonampirepee, nompincatsaritapaaque, nonquempeteari Apa. Nompinajeiteri maaroni quearioventanarori nocoacairiri. Irinti maaroni caari quemisantana, noashinoncaajeiteri. ²⁸Queario oca noncamantempiri: eirotsitarica picamajeititsi avirori, pineajeitavajena nompocaje, nompinacsaritasanotapaaje.

Ipashinitanaque Jesoshi.

(Mr. 9.2-13; Ir. 9.28-36)

17 ¹Ari 6 nomaajeiti, impoiji yora Jesoshi yaajeitanaqueri Petero, Santiaco, jeri Joa, yora irirenti Santiaco. Yaajeitanaqueri anta antearoqui toncaari.

²Ineajeitavaqueri ipashinitimojeitanacari. Ishipaquireavorotanaque, iquempetanacari catsirincaiteri; aisati liitsaare, oquitamarotasanoquaque catsini.

³Imapocaqueri Moishishini, jeri Iriashini: iquenquetsatacapaqueri Jesoshi. ⁴Yora Petero, icantiri Jesoshi:

—Novincatsarite, aitanaqueampauea nopalocajeitaque naroripee aca, noneajeitaquempi nainti. Pincoaquerica, novetsiquempiro mava pancotsijaniqui: aparoni pashi, aparoni irashi Moishishi, iro otsipa irashi Iriashi.

⁵Irosati omapocantapaacari omaaroncapaaca mensori, oshipaquireapaaque iroori. Isavicaque Tasorentsi mensoriqui, icanti:

—Iriotaque yoca notomi nonintasano-tiri, oshequi noveshireimentasanotacari. Pinquemisantajeiteri.

⁶Iquemajeitancarori iroamerepee oca, itarecajeitanaca, oshequi yoajeitanaqueri cavaco. ⁷Iro cantaincha ipocashitaqueri Jesoshi, ipamijeitaqueri. Icantiri:

—Pincatiaeitanaje, eiro pitsaroajeititsi.

⁸Ari yamenajeitanaji: tecatsi irineaje, apaniro inaji Jesoshi. ⁹Impoiji yoirinca-jeitanaja, icantajeitiri:

—Eirota picamantitatsi oca pineaqueri. Arioricaquea noncamaque aisati nontinaanaje, irosatiquea pincamantanta-yetaqueari itsipapee atiri. Tempa noponeaca inquitequi, natiritapaaque.

¹⁰Ari nocantajeitaqueri:

—Yora oametantirori Sanquenarentsi icantajeiti: “Irotaintsirica impoque Quirishito, irijivatapaaque ironijantapaa-jea Iriashini” ¿Paita icantajeitancarori oca?

¹¹Yacanaquena:

—Queario icantaqueri: “Ironijantapaa-jea Iriashini, irovetsicajeitaqueri maaroni”. ¹²Noncamantempi: nijantaja inaji Iriashini, iro cantaincha te iriojeita-vaqueriji atiripee, oshequi yoashinonca-jeitaqueri. Aisati narori, oshequi iroashinoncajeiteina.

¹³Impoiji niojeitanaque iquenquetsata-ctaqueri Joa, yora vaotisatantatsiri.

**Yoavisacotiri Jesoshi evancari
camanatatsiri.**

(Mr. 9.14-29; Ir. 9.37-43)

¹⁴Ari nareejitapaaca anta itiminta oshequi atiri yapatojeitaca. Irosati ipocashitancarori Jesoshi shirampari. Itiyeroashitapaacari, icantapaaqueri:

¹⁵—Novincatsarite, pincavintsayeri notomi: oshequi icamanatapiniti, oshequi yashinoncaapinitaca. Ipariapiniti paamariqui, itaapinita, pomein: aisati ipiincapiniti ojaqui, pocn, pocn. ¹⁶Naave-

tanacanari poamere, nocantavetari: “Poavisacotajenari”, iro cantaincha te irimateriji.

¹⁷Ari icantajeitana Jesoshi:

—Te pinquemisantajeiteji, te pincamee-tsajeiteji. ¿Jaoca oncarate nontsipajei-tempi piotanteari? Oshequi pitseencajei-taquena.

Impoiji icantiri ashitariri itomi:

—Jentsite, pamaquenari pitomi.

¹⁸Ari iquisatsataqueri camaari, irosati ijatantanaja. Irosati yavisacotantaja yora evancari. ¹⁹Impoiji nomanacaacari nosampijeitiri:

—¿Paitaquea caari nomatantaro noavisacojeiteri narori?

²⁰Icantajeitaquena:

—Iro caari pimatantaro te pinquemisanti-mateji capichaji. Queario oca noncaman-tempiri: pinquemisanterica capichaji ari pincantero oca toncaari: “Povaanajea anta”, ari ovaanajea. Pinquemisantasanofterica, tecatsi pomerentsitimotempine. ²¹Iro cantaincha pincoaquerica pojoqueri camaari quempetariri yoca, ocameetsati pinquenque-tsatacasanoteri Tasorentsi aisati pintitea.

**Yapiitajiniri aisati Jesoshi, icantajiri
iroamere: “Irotaintsi noncame”.**

(Mr. 9.30-32; Ir. 9.43-45)

²²Ari notsipajeitacari Jesoshi anta Carireaqui: narori aisati maaroni itsipapee iroamere. Icantajeitana:

—Noponeaca narori inquitequi, natiritapaaque. Irotaintsi irayeteena, ²³iroyeetena. Oncarate mava quitaiteri nontinaanaje aisati.

Noquemajeitancariri, oshequi noashirejeitanaca.

**Ipinataquero Jesoshi yovetsicantayetarori
ivanco Tasorentsi.**

²⁴Impoiji nojajeitanaque Caperenaoqui. Ainiro anta itimi yora quempoyeiriri quirequi yoameetsatantayetarori ivanco

Tasorentsi. Ari ijatashitiri Petero, isampitiri:

—¿Ipashitapinitarimpa oametimpiri iirequite, yoameetsatantayetarori ivanco Tasorentsi?

²⁵Yacashitanacari:

—Je, ipiri.

Impoiji ipianaja Petero pancotsiqui.

Isampitavaqueri Jesoshi:

—Shimo, ¿paita piquenqueshiretiri? Yora pincatsaripee, ¿janica icoacotapinitiri iirequite? ¿Icoacotirimpa ishanincasanori? Terica, ¿irintimpa icoacotiri itsipapee atiri?

²⁶Yacanaqueri:

—Tempa icoacotiri itsipapee atiri.

Ari icantiri:

—Queario, tecatsi incoacoteri ishanincasanori. Aisati oquempetaca narori, tecatsi incoacotena Apa: tempa noshanincatacari. ²⁷Iro cantaincha te noninteji ontine inquisimentenari yora quempoyeiriri quirequi. Meeca pijate incajarequi, pimpitasate. Ariorica paaque shaori, pinquirancaqueri, pinequeri ivantequi quirequi. Paavaqueri, impoiji paanajeneri yora quempoyeiriri quirequi, pimpapaaqueri. Iriotaque avinarojei, avirori aisati narori.

Iquenquenquetsatacotaqueri Jesoshi pincatsatachaneri anta inquitequi.

(Mr. 9.33-37; Ir. 9.46-48)

18 ¹Impoiji, nocarajeitaqueri itsipapee iroamere, nojatashijeitaqueri Jesoshi, nosampijieitiri:

—Anta ipincatsaritinta Tasorentsi, ¿janica intsipateari impincatsaritasanote?

²Ari icajemaqueri jananequi, isatecaqueri nianqui, ³icantajeitana:

—Queariotaque oca noncamantempi: pinquenqueshirejeitea, paventajeiteari Tasorentsi; nocoaque pinquempejeiteari yoca jananequi, pishiretasanotena. Eiorica pishiretasanotanatsi, eiro

pineirotsi ipincatsaritinta Tasorentsi. ⁴Te irishemeteqi yoca: maaroni quempetearene impincatsaritasanotanaque anta inquitequi. ⁵Ariorica paacameetsateri quempetariri yoca jananequi, paacameetsajeitena narori. ⁶Iro cantaincha ariorica pantacayeri caari cameetsatatsi, noasanquetasanotempi. Oncameetsateme pijnivateme pincameme eiro pantacantarme caari cameetsatatsi. Tecatsi noasanquetimentempimeri. ⁷Queario intime antayeterone caari cameetsatatsi, iro cantaincha oshequi irashinoncaajeitanaquea yora antacairiri.

Icantiri Jesoshi:

“Pantirocari caari cameetsatatsi”.

(Mr. 9.42-48; Ir. 17.1-2)

⁸Aisati icanti Jesoshi:

—Meeca noshiacantempiro. Ariorica antacayempi paco caari cameetsatatsi, pimpesajero, pojocajero; aisati pinquempero piiti antacayemperica caari cameetsatatsi. Ocameetsaveta pinqueapontsoquitapajae anta inquitequi, te oncameetsateji ontine apite paco, irootaque pijatanteari Sharincaveniqui, aisati te oncameetsateji ontine apite piiti, irootaque pijatanteari Sharincaveniqui. Ainiro anta paamari caari tsivacanetatsi: quearioya piquemaatsicataro- cari. ⁹Aisati ariorica antacayempiro poqui caari cameetsatatsi, pinquitsoreero, pojoquero. Ocameetsati pinqueanaraquitaje inquitequi; te oncameetsateji ontine apite poqui, irootaque pijatanteari Sharincaveniqui pinquematsicantarorri paamari. Pinequiero, te oncameetsateji catsini pantero caari cameetsatatsi.

Icani Jesoshi: “Eiro pitseenquiritsi jananequipee”.

(Ir. 15.3-7)

¹⁰Aisati icanti Jesoshi:

—Aisati eiro catsini pitseenquiritsi jananequipee. Ainiro inampirepee Apa

quempoyeaventajeitaqueriri jananequipee, camantacoventapinitiriri.¹¹ Noponeaca narori inquitequi, natiritapaaque. Nopocashitaqueri jatatsinemeri Sharinca-veniqui, noavisacotantajeariri.

Ishiacantiri Jesoshi ovisha peainchari.
(Ir. 15.4-7)

¹²Aisati icantajeitana Jesoshi:

—Noshiacantempiro aisati. Ariorica intime ashitariri 100 irovishate. Impeaquearica aparoni, tempa irashitacotanaqueri yora 99 irovishate iramenanta-jeiariri yora peainchari. ¿Paita piquenque-shirejeitiri avirori? ¹³Irineajeririca aisati, ¿iriompa iriveshireimentea yora apatojei-tainchari caari peacha? Te, irintiquea iriveshireimentea yora peavetainchari. Tempa queario. ¹⁴Aisati iquempeta yora Apa jenoquiniri: te incoyeji irijate Sharincaveniqui aparoni jananequi.

Icantaqueri Jesoshi: “Poameteri pishaninca eiro yantaratosi caari cameetsatatsi”.

(Ir. 17.3)

¹⁵Aisati icantaquena Jesoshi:

—Ariorica irantero pishaninca caari cameetsatatsi, irootaque poashiretacotan-teariri, ocameetsati pijatashiteri, pincanteri. Apaniro pijatashiteri, eiro picamantiritsi itsipapee. Ariorica inquemisantempi cameetsa irisavicante-jeari, ari pinquempetacantajeri pirenti, paacameetsatavacaajaie aisati. ¹⁶Iro cantaincha eivorica iquemisantimpitsi, pijatashiteri ari, paanaqueri itsipa piyemisantaririnte: ariorica aparo, ariorica apite. Intsipajeittempi irotanteari paitarica pincanteri, aisati intsarojeita-peeri iriori. ¹⁷Eivorica iquemisantajei-timpi, ari pincamantajeiteri maaroni piyemisantaririnte, intsarojeiterita iriori. Eivorica iquemisantajeitiri, ari pinquempetacajeari tseencantatsiri, antirori caari cameetsatatsi; eiro picantajiritsi

quemisantatsiri. ¹⁸Paitarica pincantajeite-riri incanteri aisati iriori Tasorentsi.

Pincantajeiteririca ainiro irantane, aisati incanteri iriori Tasorentsi. Pincantajeite-ririca te aneroji irantane, aisati inquem-petea iriori Tasorentsi. ¹⁹Nampiiatjem-piro: irosatirica pincantajeiteriri avirori Apa jenoquiniri; ariorica pincarajeite apite, ari inquemisantsasanojeitempi. ²⁰Jaocarica irampatotimentenari apite quemisantanari, ariorica mava, aisati narori noncarajeitaqueri.

Yoamejeitiri Jesoshi: “Pincavintsante”.

²¹Impoiji yora Petero isampitiri Jesoshi:

—Novincatsarite, inquishenarica noshaninca, tempa ocameetsati noncavinsayeri, eiro nopiaitaritsi. Iro cantaincha irampiitapinitenarica inquisaquena, ¿jaoca oncarate noncavintaapiniteri? ¿Ariompa oncarate 7?

²²Yacanaqueri:

—Irosati pincanteani pincavintsayeri: eiro pipiataritsi catsini. ²³Noshiacantem-piro jaoca icanta Tasorentsi ipincatsari-ventanti. Itimi pincatsari coatsiri impinatajeri iratiritepee. ²⁴Icajemaqueri aparoni, irevitiriri oshequi quirequi catsini. Icantavetari: “Pimpinatajena”. ²⁵Yacanaqueri: “Tecatsi noncantea nompinatajemi”. Ari icantiri pincatsari itsipapee: “Payeri yoca. Pimpimanteri, pimpimantero ijina, itomipee, irovaararo, maaroni, naantajeari quirequi irevitanari”. ²⁶Iro cantaincha itiyeroana-aca quipatsiqui yora irevitiriri, icantiri: “Eirotsita pipimantanatsi. Coajica nompinatajemi, maaroni”. ²⁷Ari oshequi icavintsairi ivatorote, icantiri: “Aitanaji, moncarataca, eiro nocoacota-jimpitsi”. ²⁸Ari ijatanaque yora irevitatan-tavetachari. Iquenanaque avotsiqui, itonquitovacari irevitiriri iriori capichaji. Iaticavaqueri itsanoqui,

icantiri: "Pishintsite pimpinatajena ora pirevananari".²⁹ Ari itiyeroavetanaca iriori, icantavetari: "Eirotsita picoacotanatsi, coajica nompinatajempa maaroni".³⁰ Iro cantaincha te incavintsayeriji irinti. Yoiminqueacantaqueri, icantiri: "Ariorica pimpinatajena maaroni, noncanteri iroimisoquijajempi".³¹ Ari ineantacariri itsipapee, yoashirejeitanaca. Ijatashitaqueri ivatorote, icamantaqueri: "Noneaqueri yoranqui picavintsairi, te incavintsanenteji irinti. Yoiminqueacantaqueri ireviveteriri irinti capichaji".³² Ari icajemacantaqueri ivatorote, icantiri: "Picantaquena: 'Eirota pipimantanatsi', irootaque nocavintsaasanotantaquemppiri, nocantimpi: 'Aitanaji, eiro pipinatajantsi'. Iro cantaincha te pincameetsateji avinti.³³ Tempa oncameetsateme pincavintsayerime avirori yora irevivetimpri capichaji, pinquempetename narori nocavintsaaqueMPI".³⁴ Ari iquisaqueri, yoiminqueacantaqueri, icantiri: "Meecaquea aviroriniro, ariorica pimpinatasanotajena maaroni, ari noimisoquijajempi".³⁵ Ari piojeitaquero oca noshiacantimpri. Eirorica picavintanti, iroasanquetasanoltempi Apa jenoquiniri, pinquempeteari yora noquenquetsatacotiri.

Ijataque Jesoshi Joreaqui.

19¹Ari iquenquetsataacaana Jesoshi chapinqui anta Carireaqui. Impoiji yovaanaja Joreaqui, anta Joriraniqui intatiquero. Noijatanaqueri narori, aisati itsipapee iroamere.²Aisati yojajeitaqueri oshequi itsipapee atiri. Aisati oshequi yoavisacojeitaqueri mantsiyatetsatsi.

Iquenquetsatacotiri Jesoshi joquirori ijina.

(Mr. 10.1-12; Jr. 16.18)

³Aisati ijatashitaqueri Jesoshi variseopee. Icoavetaca incomitacayearime, irootaque isampitantavetariri:

—¿Ocameetsatimpap irojocajero shirampari ijina?

⁴Yacanaqueri:

—Tempa pineanatapinivetaro Sanquenarentsi. Peerani yovetsicaqueri Tasorentsi shirampari aisati tsinane,^{5,6}aisati icanti: "Ariorica irayero shirampari ijina, intentareanaqueri iriri aisati iriniro, iro cantaincha te noncoacayeriji irojocajero ijina. Nocoaque quiso iroanaquero. Peerani inashiveitani shirampari aisati ijinatsori, iro cantaincha ariorica iraaquero, onquempetaquea apaniro irinaque, eiro yojocavacaajatsi". Tempa aitaque itsipatacaacari Tasorentsi, te oncameetsateji irojocacaajeri atiri.

⁷Ari isampitiri aisati:

—¿Arimpa? ¿Paita icantantariri Moishi-shi peerani: "Pisanquenatenero pijina paperi pojocantearori, impoiji ocameetsati pojocajero"?

⁸Yacanaqueri:

—Te pincameetsashireteji, irootaque icantantimpri Moishishi ocameetsati pojocajero pijina. Iro cantaincha te incoacayempij Tasorentsi pojocajero. Icoacaquempi eiro pojocajirotsi catsini.⁹Nocantimpi narori, ariorica pojocajero pijina impoiji paaje pashini, aitaque paimentaquearo pijinasanori. Apatiroti ariorica ojivate aimentempi, ocameetsava pojocajero.

Iquenquetsatacotiri Jesoshi caari aatsi ijina.

(Mr. 10.1-12)

¹⁰Impoiji, nocarataqueri pashini iroamere, nocantaqueri Jesoshi:

—Ariompa, jaata eirota naitame nojina narori.

¹¹Icantaquena:

—Eiro pimajeitirotsi pinquemajeitero oca nocantaquemppiri. Apaniro inquemero yora yoametasanotiri Tasorentsi.¹²Timatisi caari matiro iraye ijina: irosati

itimapaaque. Timatsi itsipa yaitsoquiyee-tiri, caari yaanta ijina. Timatsi pashini caari coatsi iraye. Icoaque intimashitea inquearioventeneri Tasorentsi patapeericia iranteneriri. Pimaterorica pinquemero oca, ari pinquenqueshire-tero.

Ipamijeitiri Jesoshi jananequipee.

(*Mr. 10.13-16; Ir. 18.15-17*)

¹³Impoiji yamaqueneri Jesoshi janane-quipee, icantajeitiri:

—Pimpamiteri notomipee, pincanteri Tasorentsi incavintsaajeitenari.

Nocantajeivetari:

—Eiro pashereiritsi Avincatsarite.

¹⁴Iro cantaincha icantana:

—Eiro picantiritsi: nocoaque iramajei-tenarita jananequipee. Iajeiti iriori ipincatsajeitaquena. Maaroni quempeta-riri yoca irisavicajeite anta ipincatsar-tinta Tasorentsi.

¹⁵Irosati ipamijeitantavacari, icantiri Tasorentsi:

—Apa, nocoaque pincavintsaajeitei-ryoca jananequipeeca.

Impoiji ijatanaji.

**Jero oca icamantiriri Jesoshi
ashitaarantachari.**

(*Mr. 10.17-27; Ir. 18.18-27*)

¹⁶Impoiji ijatashitaqueri Jesoshi aparoni evancari, isampitapaaqueri:

—Oametantsiri, picameetsataque. ¿Paita cameetsatsatsiri nanteri narori nosavicanteari anta inquitequi, noncantaitatiyempani?

¹⁷Ari icantiri:

—¿Paita picantantanari: “Picameetsata-que”? Itimi aparo cameetsatsatsiri: yora Tasorentsi. Iro cantaincha pincoaquerica pijate inquitequi, pantajeitero maaroni icantiniri Moishishini.

¹⁸Icantiri:

—Otimi oshequi icantayetiniri: ¿paita picoqueri nanteri?

Yacanaqueri:

—Eiro poantitsi, eiro pantirotsi caari pai, eiro picoshititsi, eiro pitseeyacotari-tsi pishaninca,¹⁹pimpincatsateri piri aisati piniro; oquempetaca pininta avisati, aisati pinintajeiteri itsipapee iriori.

20Icantaqueri:

—Aitaque nomatitacaro nojananequita-paini, irosati meeca. ¿Paita pashini nanteri?

21Yacanaqueri:

—Picoaquerica pintsoetequero maaroni, pijate pimpimantero maaroni timimojeitimpiri, pimperi ashinoncachari maaroni ovinaro; impoiji impinatempi Tasorentsi, ontine pivaararo inquitequi. Ariorica pimpimantero maaroni, tsame pojatanaquena narori.

²²Iquemavaitiyo oca, ijatanaque, yoashiretanaca. Otimi oshequi irovaararo, te incoyeji impimantero.

²³Impoiji icantajeitana Jesoshi:

—Queario oca noncamantempi: opomerentsitimatari ashitaarantachari irijate anta inquitequi.²⁴Nampiitajem-piro: tempa opomerentsitaca inqueero cameyo omorojaniqui quitsapi. Iro cantaincha opomerentsitasanotaca catsini irijate ashitaarantachari anta ipincatsar-tinta Tasorentsi.

²⁵Noquemajeitantarori oca noajeitana-queri cavaco. Nosampitiri:

—¿Ariompá? ¿Janica meeca materone iravisacotaje?

²⁶Yamenaquena, icantaquena:

—Eiro imatirotsi atiri, iro cantaincha irinti Tasorentsi irimataquero maaroni. Tecatsi ompomerentsitimoteari irinti.

**Te irantsipetashitearoji quemisantatsiri
yoijatasanotanaqueri Quirishito.**

(*Mr. 10.28-31; Ir. 18.28-30*)

27Icantaqueri Petero:

—Pamene, nocoasanojeitaque noijata-naquempi, irootaque nojocajeitancarori

maaroni timimojeivetanari. ¿Paita naayetajeri coajicani aisati?²⁸ Icantajeitana Jesoshi:
 —Queario oca noncamantajeitempi, tempa noponeaca inquitequi, natiritatapaaque: coajica ontine quipatsi iroquerar. Narori, nosavique anta novincatsarimentotoqui, nompincatsatasanotaque. Aisati avirorije, pincarajeitena pimpincatsarjeitanaque, ontine 12 pivincatsarimentopee pisavacajeitanteari aviroripee. Pimpincatsariventajeiteri maaroni joropee.²⁹ Ariorica pojajaeitanaquena, tecatsi pantsipejeitea. Ariorica pojocanaquero pivancopee, pirentipee, pitsiropee, piripee, piniropee, pitomipee, piipatsite, paitapeerica. Iro cantaincha ariorica pojatasanotanaquena, te pantsipetashijitearoji. Ariorica pojocanaquero aparo, impajempi Tasorentsi 100. Aisati iraajeitanaquempi inampiqui pisaviquimojeitanteeariri iriori, pincantaitatiyempani.³⁰ Itimajeiti meeca oshequi pincatsarriejtatsiri aca quipatsiqui, iro cantaincha eiro ipincatsarriejtajtsi inquitequi: ariorica aparopee pincatsaritanajantsine. Aisati itimajeiti meeca oshequi ashinoncaajeitachari, iro cantaincha coajica anta inquitequi impincatsaritaarantapaaje.

**Iquenquetsatacotaqueri tsameejeitatsiri
anta ovamashiqui.**

20 ¹Pashini aisati icanti Jesoshi:
 —Noshiacantempiro aisati jaoca icanta Tasorentsi ipincatsariventanti. Itimi ashitarori irovamashite. Tsiteniqueru ijataman i nampitsiqui irameneri tsameetenerine.² Ineapaqueri coatsiri intsameeteneri, icantiri: “Ariorica pintsameeten meeca, irosati ishaaviniji, nompinajeitempi aparoni quirequi: yora pajitachari tenario”. Icantajeiti: “Ari cameetsa”. Ari icantiri: “Meeca pijajeite, pintsameejeite”. Ijajeitanaque, itsameejeiti.³ Impoiji ijenoquitapaaque catsirin-

caiteri, ijatanaji aisati nampitsiqui yora ashitarori irovamashite. Ineapaqueri itsipapee shirampari, icatiashijeitaca anta, tecatsi irantajeite. ⁴Icantiri: “Ariorica pintsameejeite anta novamashitequi, cameetsa nompinajeitaquempi”. Icantajeiti: “Ari”. Irosati ijajeitantanaca, itsameejeiti.⁵ Aisati tampatica ijati nampitsiqui, itsameetacaajeitiri itsipapee. Aisati ishaavijini itsameetacaajeitiri itsipapee aisati.⁶ Impoiji aisati antoo ishaavijiteanaji, ijatanaji nampitsiqui. Ineapaqueri caari tsameejeitatsi. Icantajeiti: “¿Paita patsipetashijiteitanti picatiashijeitaca? Te pintsameejeiteji”.⁷ Yacajeitanaqueri: “Tecatsi tsameetacaajeitenane”. Icantiri: “Pintsameejeite novamashitequi, pincarajeiteri yora jivajeitanaaintsiri incaranqui”.⁸ Ari otsimancaiteanaji, yora ashitarori icantiri quempoyeiniriri iirequite: “Pincajemejiteri maaroni tsameetacotanarori novamashite, pimpinajeiteri. Pijivateri pimpinajeiteri yora impoitatsiri itsameejeiti. Impoiji pimpinajeiteri jivajeitatsiri itsameejeiti oquitaitetamani”.⁹ Ari ipocajeiti yora impoitatsiri itsameejeiti: capichaji itsameejeiti iriori, iro cantaincha ipinajeitaqueri aparoni tenario. Aisati imoncaratavacaajeitaca ipinajeitaqueri maaroni.¹⁰ Impojiniquea ipocajeiti iriori yora intamararori itsameejeitamani. Ijitashijeivetaca iranaacojeiteri impinajeiteri. Iro cantaincha ipinajeitaqueri aisati aparoni tenario.¹¹ Ineatiri iirequite, quisatsataqueri yora tsameetacairiri,¹² icantiri: “Yora impoitatsiri itsameejeiti capichaji, iro cantaincha imoncarataquena pipinataquena. Nainti nojatitamaca oquitaitamani notsameeti, opomerentsivetaca, oshequi nomasavitaque. Oncameetsateme nanaacoterime nayeri quirequi”.¹³ Ari icantiri: “Noshaninca, te namatavijeitempiji. Tempa nocantimpi oquitaitamani: ‘Nompin-

tempi aparoni tenario'; picantajeivetana: 'Ari, cameetsa'. ¹⁴Paanajeri meeca piirequite, pijajeitaje pivancoqui. Nopinatashitacari yora impoitatsiri itsameeti aparo tenario imoncaratantaquemperi. ¹⁵Tempa ocameetsati nopashitacari noirequite. ¿Paita caari picoanta noncavintsayeri?" ¹⁶Aisati noncamantempi: anta inquitequi impincatsarjeita-naque yora caari pincatsarjeitatsi aca quipatsiqui. Yorari irinti pincatsarjeive-tachari aca, eiro ipincatsarjeitajitsi anta inquitequi. Aisati icantajeivetari Tasorentsi oshequi atiri: "Pinquemasantena", iro cantaincha te inquemasantajeiteji, irootaque caari irijajeitantea iriori inquitequi.

**Yapiitajiro aisati Jesoshi, icanti:
"Noncame, aisati nontinaanaje".
(Mr. 10.32-34; Ir. 18.31-34)**

¹⁷Ari impoiji ijatanaque Jesoshi Jerosarequi, intentajeitanaquena narori, aisati itsipapee iroamere. Apaniro icantajeitaquena:

¹⁸—Meeca ajajeite Jerosarequi. Ari noponeanaca narori inquitequi, natirita-paaque. Irotaintsi irayena jivatacaajeiti-riri saserotepee aisati yora oametantirori Sanquenarentsi, incantena: "Te pincameetsateji". ¹⁹Incanteri oromasati: "Payeri Jesoshi, poyeri". Irishiritim-en-tajeitena iriori, impasanajeitena, impajacojeitena coroshiqui, noncame. Oncarataque mava quitaiteri iroitinaa-jena aisati Apa.

**Ojatashitiri Jesoshi ijina Severeo.
(Mr. 10.35-45)**

²⁰Impoiji ojatashitiri Jesoshi ijina Severeo, otsipatari otomipee: yora Santiago aisati Joa. Otiyeroashitapaacari, ocantapaaqueri:

—Nocoaque pincavintsayena.

²¹Isampitiro:

—¿Paita picoiri?

Ocantiri:

—Coajica, ariorica pimpincatsaritas-notanaque, nocoaque irisaviquimotempi notomipee: aparo irisavique pacosanori-qui, irio itsipa irisavique pampatequi. Pincanteri incarajeitempi impincatsarije-tanaque.

²²Icantiro, aisati icantiri otomipee:

—Te pioteji paitarica picoacotanari. Oshequi nonquematsicayetearo paitapee-rica. ¿Tempa pintsaroacayearo pinquema-tsicatearo avirori?

Yacanaqueri:

—Te nontsaroacayearoji, ari nomata-quero narori.

²³Ari icantiri:

—Queario pinquematsicajeitearo. Iro cantaincha te naro cantatsine janicarica saviquimotenaneri coajica: irio cantatsine Apa, irinti.

²⁴Noquemajeitantarori oca icantajeiti-riri, noquisajeitaqueri yora Santiago aisati Joa; iro noquisantacariri, icoaveta impincatsariteme. ²⁵Iro cantaincha icajemajeitaquena Jesoshi, icantajeita-quena:

—Piojeitaque yora ivincatsaritepee itsipapee atiri yamejeitaca iperanajeitacari ishanincapée. ^{26,27}Iro cantaincha eiro piquempejitaritsi. Eiro picoajeititsi avirori pimperanajeiteari pishanincapée. Pincoaquerica pimpincatsariventante pintacajeitarei pishaninca, eiroquea piperanayetaritsi. Pantajeiteneri pishaninca paitarica incoacaajeitempi. ²⁸Noponeaca narori inquitequi, natiritatapaaque, iro cantaincha te iro nompocantea nomperana-jeitempi, irointi nopolcanta nintacajeitempi aisati noncamimentajeitempi, maaroni.

**Yoavisacotiri Jesoshi apite caari amenatsi.
(Mr. 10.46-52; Ir. 18.35-43)**

²⁹Ari noponeajeitanaca Jericoqui, noquenajeitaquena avotsiqui. Yojajeita-

naquena oshequi atiri. ³⁰Ari isaviqui otsapiqui avotsi apite caari amenatsi. Icamanteetiri:

—Coraque Jesoshi.

Ari icajemajeitanaque:

—Pincavintsaajeitapeena: tempa aviro ishanincani Iravirini.

³¹Ari iquisatsataqueri yora apatojeitainchari, icantajeitiri:

—Pimajerete.

Aiquero icajemajeitanaque:

—Novincatsarite, pincavintsayena: tempa aviro naamaajeitacari, aviro ishanincani Iravirini.

³²Icatiapaaca Jesoshi, icantiri:

—¿Paita picoiri nantempiri?

³³Icantiri:

—Novincatsarite, nocoaque namenaje.

³⁴Ari icavintsairi, ipamititaqueri iroqui. Irosati yamenantanaja, aisati yojajaeitanaqueri.

**Ijataque Jesoshi Jerosarequi,
ipincatsajeitavaqueri atiri.**

(Mr. 11.1-11; Ir. 19.28-40; Joa 12.12-19)

21 ¹Ari nareejitapaaca Vetejajequi, oquempejitaro toncaari ipajieetiro Orivomashi. Irotapajantsi Jerosare. Itianquiri Jesoshi apite iroamere, ²icantiri: —Pijivatanaque anta nampsitsiquinta. Pineapaaquero voro, otsatacotaca; otsipatacari orijani. Pintsatacoreapeero, pamaquenaro. ³Irisampitempirica ashaninca: “¿Paita pitsatacoreantarori?” Ari pincanteri: “Irio coirori Avincatsarite”. Ari incantempi: “Paanaqueneri”.

⁴Iro yantaroriori oca, imoncaratiro isanquenatacotaqueriniri peerani yora camantantatsimiri pajitachari Sacariashi: ⁵“Pincamantajeiteri jerosaresati: ‘Coraquetaqueni pivincatsarite. Icameetsataque, te irishemeteqi. Inuijacotapeempari vorojaniqui’”. ⁶Ari ijatanaque apite, ineapairo voro, yamaqueneri. ⁷Apite yamaque: tsinane, aisati orijani. Yoanquetaqueneri imititsaqui

quitsaarentsi, impoiji iquijacotacari Jesoshi.

⁸Ari itimi oshequi atiri anta avotsiqui, yoayetaqueneri iroicoropee anta avotsiqui iraaticantanaquearori voro. Aisati yoayetaqueneri ojempequijaniqui inchatoshi avotsiqui, iraaticantanaquearori. Aitaque yametaro yoayetiniri pincatsaripee iroicoropee aisati ojempequijaniqui inchatoshi. ⁹Ari ijivajetanaqueri oshequi atiri anta avotsiqui, aisati impoijeitanaqueri oshequi pashini.

Icajemajeitanaque:

—Jeriqueti ishanincani Iravirini, tsame ampincatsajeitavaqueri. Itiancaqueri Avincatsarite, tsame aneacameetsajeiteri. Tempa ineacameetsatiri iriori Tasorentsi.

¹⁰Ari yareetapaaca Jerosarequi. Isampitavacaajeitaca maaroni jerosaresati:

—¿Janicampa yoca?

¹¹Yacajeitaqueri itsipapee:

—Iriotaque Jesoshi, poneachari Nasaretequi, ora timatsiri Carireaqui. Oshequi iquenquetsatacotiri Tasorentsi.

**Yojocajeitapairi Jesoshi pimantayetatsiri
anta ivancoqui Tasorentsi.**

(Mr. 11.15-19; Ir. 19.45-48; Joa 2.13-22)

¹²Ari ijataque Jesoshi ivancoqui Tasorentsi, iquisajeitapaaqueri maaroni amanantsiri aisati pimantatsiri, yojocajeitapaaqueri. Aisati iquempejitaqueri yora pinaavacaariri irequite, aisati yora pimantiriri paroma: itatsinquitapaaqueri imesatepee aisati isavicamentopee. ¹³Icantajeitaqueri:

—Ocantí Sanquenarentsí: “Icantí Tasorentsi: ‘Ocameetsati pinquenquetsatacapinijetená aca novancoqui’”. Iro cantaincha avirojei te pinquenquetsatacaejeiteri, irointi picoshitapinijeitiri pocajeitatsiri.

¹⁴Impoiji ijatashitaqueri oshequi caari amenatsi aisati choriyetatsiri. Yoavisacojeitaqueri. ¹⁵Ari ineajeitaqueri yora jivatacaajeitiriri saserotepee aisati yora oametantirori Sanquenarentsí, iquisajeitanaaca. Ocameetsati yantayetiri, aisati icantajeiti atiripee:

—Tsame ampincatsajeiteri ishanincani Iravirini.

Irootaque iquisajeitacariri yoranqui,¹⁶aisati icantajeitaqueri Jesoshi:

—¿Piquemaquerompa oca icantajeitiri atiripee? Te oncameetsateji impincatsajeitempi.

Yacanaqueri:

—Je, noquemaqueri. Tempa pineanatiro Sanquenarentsi cantatsiri: “Impinacsajeiteri Quirishito yora jananequipee”.

¹⁷Ari ijatanaji Jesoshi, quiso noanajiri narori, aisati itsipapee iroamere. Nojajetanaque Vetaniaqui, aitaque nomaaejita-pairi.

Yoamaaquero Jesoshi iyera.

(Mr. 11.12-14, 20-26)

¹⁸Ari oquitaitamanaji nopiajeitanaja Jerosarequi. Nianqui itasheanaque Jesoshi. ¹⁹Ineapaquero avotsinampiqui iyera. Icoavetapaacaro oitsoqui, te ontameji; irointi iotaca oshi. Icanti:

—Meeca eiro otimajitsi aisati oitsoqui iroajeitantahearori atiri.

Irosati oshimpeshtantanaca, ocamaque iyera. ²⁰Noneantacarori, nosampitiri:

—¿Jaoca ocantanacari oshintsitantancari oshimpeshtanaque?

²¹Yacanaquena:

—Queario oca noncamantempi: ariorica pishiretasanoteari Tasorentsi, pimatero avirori quempetarori pineaqueri meeca. Aisati pincanteririca Apa: “Povaa-jero oca toncaari, pojoquero anta incajarequi”, aitaque irimatacaquempiro. Iro cantaincha, eiro pitseenquiritsi. ²²Ariorica pishiretasanoteari, irimataca-quempiro paitapeerica pincoacoteriri.

Icantavacaimentari Jesoshi:

“¿Janicarica tianquiriri?”

(Mr. 11.27-33; Ir. 20.1-8)

²³Ari nareejiteapaja ivancoqui Tasorentsi, yoametantapajai Jesoshi.

Irosati ijatashitantapaacari yora jivatacaajeitiriri saserotepee aisati yora jivatacantantatsiri, isampijeitiri:

—¿Janicampa tianquimpiri pantayetatarori ocappee? ¿Janica nintacaimpiri pipincatsaritantacari?

²⁴Yacanaqueri:

—Aisati narori, aparo nosampitempi: ariorica pancaquena, noncamantempi janica tiancaquenari. ²⁵¿Janicampa tianquiriri Joa ivaotisatantayetariri ashanincappee? ¿Irimpa tianquiriri Tasorentsi? ¿Irimpa tianquiriri atiri?

Ari icantavacaaajeitanaca:

—Ancanteririca: “Irio Tasorentsi tianquiriri”, icanteeeari: “¿Paita caari piquemisantantari?” ²⁶Iro cantaincha ariorica ancanteri: “Irio tianquiriri atiri”, iquisajeiteecari atiripee. Tempa ijitashijetari irio Tasorentsi tianquiriri Joa iquenquetsati.

²⁷Ari icantajeitiri:

—Te nioteji janicarica tianquiriri.

Icantiri:

—Aisati narori, eiro nocamantimpitsi janicarica tiancaquenari nantantarori ocappee.

Ishiacantiniri yora saserotepee ashitachari itomi apite.

²⁸Aisati icantajeitiri Jesoshi:

—Meeca noshiacantempiri ashitachari itomi apite: ¿paita piquenqueshiretacotiriri? Icantiri intarori itimi: “Notiom, pijate meeca pintsameete anta ovamashiqui”.

²⁹Yacanaqueri: “Eiro notsameetitsi”, iro cantaincha impoiji ijati itsameeti. ³⁰Aisati icantiri itsipa itomi: “Notiom, pijate meeca pintsameete anta ovamashiqui”. Ari icantiri: “Ari, apa, nojataque”. Iro cantaincha te irijateji. ³¹Meeca nosampitempi: ¿janica antasanotiniriri iriri icoacairiri?

Yacanaqueri:

—Yora jivatatsiri itimi, jatatsiri itsameeti.

Icantiri aisati:

—Queario oca noncamantempiri: irijivajeittempi irijajeitanaque inquitequi yora coshitantatsiri aisati ora antapiniyetiriri shirampari caari ai.³² Ipocapaaque Joa icamantavetimpi jaoca pincantajeameri pincameetsatantajeameri, iro cantaincha te pinquemisantavaqueri. Irinti iquemisantajeitaqueri yora apatotiniriri oromasati iirequite, aisati oquemisantaqueri antapiniyetiriri shirampari caari ai. Pineajeivetacari iquemisantajeiti icameetsatantajari, iro cantaincha te pinquenqueshirejeiteajaviyorije; te pinquemisantavaqueri. Iriajite irinti inquitequi: aviroriquea avinti, eiro pijajeititsi.

**Iquenquetsatacotaqueri Jesoshi
amenirori ovamashi.**

(Mr. 12.1-12; Ir. 20.9-19)

³³Jero oca pashini icantiriri Jesoshi: —Pashini aisati noshiacantempiro: pinquemajeitavaqueri. Itimi shirampari panquitirori ovamashi. Itantacotiro otsapiqui. Aisati yovetsiquiro intsinaicantearori oitsoqui, aisati onanteari oja. Yovetsiquiro pancotsi jenoquittatsiri yamenacotantarori savicatsiri ora panquiresi. Impoiji icantiri pashini ishaninca: “Meeca nocoi pamenenaro novamashite, aisati pintsameetacotonaro”. Icantiri: “Ari”. Impoiji ijatanaque yora ashitarori ovamashi pashiniqui quipatsi.³⁴ Peeranitanaque omoncarataca otimanaque oitsoqui. Itiancavetacari iratiritepee: “Pijajeite pincanteri yora amenirori novamashite impacantena nashitari naror!”. Ari ijajeivetanaca. ³⁵Ineajeitavaqueri yora amenirori ovamashi: ipasatavaqueri aparo, tac, tac; pashini yoavaqueri, shemi; irio itsipa ipichavaqueri, pitse, pitse.³⁶ Ari yora ashitarori, ari itiancavetaca pashini iratiritepee, icarajeiveta oshequi. Iro

cantaincha yoashinoncaajeitavaqueri yora amenirori ovamashi.³⁷ Impoiji iquenqueshiretaque yora ashitarori: “Meeca nontianqueri notomi. Iriitatsi impincatsatavaque irinti”. Ari itiancavetacari iriori.³⁸ Iro cantaincha ineajeitavacariri, icantanirotavacaaca: “Coraquetaqueni yora itomi ashitarori iroamashite. Ariorica incame iriri, iriotaque ashitajearoneri ovamashi. Tsame avavaqueri, impoiji ashijejatejaro arori ovamashi”.³⁹ Ari yaajeitavaqueri, shepi; yaanaqueri anta otsapiqui, yoqueri, shemi.⁴⁰ Ariorica impocaque yora ashitarori iroamashite, aamaaca, &jaoca incantapeeriri yora amenavetanirri iroamashite?

⁴¹Icantajitiri:

—Tempa iraanirojeiteri, iroashinoncaa-jeiteri, iroajeiteri. Impoiji iramenaje pashinipee cameetsatatsiri, amenajene-rine iroamashite, yora paaranterineri irinti oitsoqui irovate.

⁴²Ari icantiri Jesoshi:

—Tempa pineanatiro ocantiri Sanquenarentsi: “Itseencaquero mapi yora vetsiquirori pancotsi, iro cantaincha ipeaquero Tasorentsi otincamiaro pancotsi. Tempa icameetsataque Avincatsarite, tempa avajeitanaquero cavaco maaroni yantajeitiri”.⁴³ Irootaque nocantajeitantiempiri: eiro pineajeitirtsii Tasorentsi impincatsariventajeittempi. Irintiquea irinti impincatsariventajeiteri pashinipee: yora pincatsatasanojeiterineri, quemisantasanojeiterineri.⁴⁴ Naro shiacantachari mapi nocantaqueempiri: terica piotavaquena, pashinoncayea; terica pinquemisantena, pijate Sharinca-veniqui.

⁴⁵Ari iquemajeitavaqueri yora jivatacaajeitiriri saserotepee aisati yora variseopee. Ijojeitaque irio iquenquetsatacotaqueri Jesoshi.⁴⁶ Icoajeiveta-iraacanterime Jesoshi, iro cantaincha

itsaroacaajeitacari atiripee. Iotaqueri atiripee queario iquenquetsatacotaqueri Jesoshi Tasorentsi.

Iquenquetsatacotaqueri Jesoshi cajemacantavetariri ishaninca iroajeitea.

22 ¹Pashini aisati ishiacantiniri Jesoshi, icantajeitiri:
²—Noshiacantempiro jaoca icanta Tasorentsi ipincatsariventanti. Itimi pincatsari itomi aatsineri ijina. Impoiji icoaque pincatsari iriveshireimentajeiteari ishanincapée itomi. Icajamacantajeitavetacari iroacaajeitearime. ³Itiancavetacari inampirepee, icajemacantajeitavetacari ishaninca, iro cantaincha, te impocajeiteji. ⁴Itiancavetaja aisati, icantiri: “Pincamanteri yora nocajemacantiqueru: ‘Vetsicayetaca maaroni. Yoayetaqueri vaca aisati vacajaniqui. Caate piveshireimenteari itomi aatsineri ijina’”. ⁵Iro cantaincha te inquemisantavaqueriji, irointi ijajeitanaque jaocarica. Ijati aparo iroanequi, irio pashini ijati iomparita. ⁶Irio pashinipee yaajeitavaqueri itiancane, shepi; yoashinoncaavaqueri, impoiji yoajeitavaqueri, shemi. ⁷Ari iquisanaca yora pincatsari. Itiancaqueri soraro, yoapaqueri yora oaqueriri itiancane aisati itataqueri ivancopée. ⁸Impoiji icantiri itsipapee inampirepee: “Vetsicayetaca maaroni, iro cantaincha te incameetsateji yora nocajemacantajeitavetacari”. ⁹Pijajeite meeca anta nampitsiqui, pincantajeiteri maaroni pineajeitiqueru: “Caate avinti avincatsaritequi, piveshireimenteari itomi aatsineri ijina”. ¹⁰Ari ijajeitanaque, yapatojeitaqueri maaroni ineajeitaqueri: cameetsayetatsiri, caari cameetsayetatsi, maaroni. Ijaaejita-paacaro pancotsi. ¹¹Ari ijataque yora pincatsari ivetsajeitavacari pocajeitaintsiri. Ineaqueri aparoni shirampari caari quitsatacha cameetsa. ¹²Icantiri: “Noshaninca, nopajeivetaquempi quitsaa-

rentsi cameetsari pinquitsaatimenteari-meri notomi. ¿Paita caari piquitsaatantar?” Te iranqueji. ¹³Ari icantiri inampire: “Poisoteri iracoqui aisati iitiqui. Pojoqueri anta otsitenitaquenta, anta itiminta iraajeitachari aisati cavintsaajeitachari”. ¹⁴Pinequiero: icajemacantavetacari oshequi, iro cantaincha te irishequiteji yora icoyeasa-notaqueri.

Yoametiri Jesoshi variseopee iranteneri pincatsari icoacairiri.

(Mr. 12.13-17; Jr. 20.20-26)

¹⁵Impoiji ijajeitanaque variseopee, yoametavacaajeitaca:

—Jaoca ancanteriri Jesoshi ancomitacanteari? Ariorica incomitaquea, irosati anquisacantanteariri.

¹⁶Impoiji itiancajeitaqueri iroamerepee, itsipajeitacari oijatiriri Eroreshi. Isampijeitapaaqueri Jesoshi:

—Oametanari, niojeiti queario poamentataque. Cameetsa poametantiro irineane Tasorentsi, te pintsaroacayeariji itsipapee atiri, aisati te pimpincatsateriji.

¹⁷Meeca pincamantena pitarica piquenqueshretiri: ¿ocameetsatimpamperri Sesari airequite? ¿Tericampa oncameetsateji?

¹⁸Iro cantaincha iotaque Jesoshi icoajeitacata iramatavijeiterime. Isampitiri:

—¿Paita picoantacari pamatavitenra? Te pincameetsateji. ¹⁹Pinijayenari quirequi pipapinitiriri oromasati.

Ari yamaqueneri apamentaquiero, ipajiyeteetiri tenario. ²⁰Ari isampitiri:

—¿Janicampa ashitarori ishiacantaro oca? ¿Jaoca opajitari ivajiro oca sanquenataincharica?

²¹Yacanaqueri:

—Tempa Sesari.

Ari icantiri:

—Panteneri Sesari icoacaimpuri, aisati panteneri Tasorentsi icoacaimpuri iriori.

²²Iquemajeitavaqueri, irosati yoajeitan-tanacari cavaco. Ari ijajeitanaji.

Icantiri Jesoshi saroseo: “Queario, antinaajeitanaje”.

(Mr. 12.18-27; Ir. 20.27-40)

²³Impoiji yora saroseopee ipocashitaqueri Jesoshi, ijitashijeitaca iriori eiro atinaajeitajatsi, eiro ajajeititsi inuitequi. Ari isampitapaaqueri:

²⁴—Oametanari, icantini peerani Moishishi: “Ontimerica shirampari ijina, iro cantaincha te intimacayeroji itomipee. Impoiji incamaquerica, ocameetsati iraajero irirentini ijinani, intimacayero otomi, iro cantaincha irishiacanteri itomini irirentini”. ²⁵Ari itimi shirampari aisati irirenti, icarajeiti 6. Yaavetajaro ijina, iro cantaincha te intimacayeroji itomi. Impoiji icamaque iriori, torein. Yaavetajaro aisati irirentini, te intimacayeroji aisati, impoiji icamaque. ²⁶Aisati iquempejeitaca irirentipee, maaroni aajeivetajarori: te intimacayeroji itomipee. ²⁷Impoiji ocamaque iroori tsinane, torein. ²⁸Ariorica intinaajeitanaje, ¿janicampa aajeroneri? Pamene, ijinantajeiveitaroni maaroni.

²⁹Ari yacanaqueri:

—Oshequi picomijeitacaro. Te piojeite-roji Sanquenarentsi, aisati te pioteji itasorentsitasanoti Tasorentsi. ³⁰Ariorica antinaajeitanaje, tecatsi aajantsineri. Maaroni tinaajantsineri inquempejeita-jeari inampirepee Tasorentsi: eiro yaajeitapaaajitsi ijina. ³¹Intinaajeitanaje maaroni camajeitatsiri, tempa pineana-tiro icantimpri Tasorentsi: ³²“Narotaque Tasorentsi: ipincatsataquena Avarama, ipincatsataquena Isaca, ipincatsataquena Jacovo”. Te incanteji: “Ipincatsaveita-nani”, pineaquero, aneatsi meeca inajeiti: irootaque ipincatsajeitantanacariri. Aisati, aneatsi inajeiti, irootaque ipincatsariven-tantariri iriori Tasorentsi.

³³Noquemajeitantanacarori oca, noajeita-naqueri cavaco, nocantajeiti:

—Tempa cameetsa yoametanti Jesoshi.

Icamantiri Jesoshi paita ocoacaasanoteeri Sanquenarentsi.

(Mr. 12.28-34)

³⁴Iquemajeitaque variseopee cameetsa yacanaqueri Jesoshi saroseopee, irootaque itsaroacantajeitanacariri iriori irineanatajerai aisati. Ari ipocashitaqueri iriori variseopee Jesoshi. ³⁵Icoajeivetaca incomitacayearime. Icarajeitiri aparoni oametantirori Sanquenarentsi, isampitiri:

³⁶—Oametanari, ainiro oshequi oamejeitaquee Sanquenarentsi: ¿paita cameetsatasanotatsiri anquemisantajei-teri?

³⁷Yacanaqueri:

—Iro cameetsatasanotatsiri oca: “Pinintasanoteri catsini Tasorentsi, yora Avincatsarite: pinquearioventero pininta-sanoteri, pincantaitatiyempani”. ³⁸Iroota-que anaacotantatsiri isanquenajeitiri.

³⁹Otimi otsipa, quempetarori: “Oquem-peta picavintsaja avisati, pincavintsaa-jeiteri pishanincapee”. ⁴⁰Ariorica pimajeitaquero oca, ari pimoncarajeita-quero maaroni isanquenatiniri Moishishi, aisati maaroni isanquenatiniri yora quenquetsatacantatsiniri.

Icantavacaimentajeitacari Quirishito:

“¿Janica ishanincatacari?”

(Mr. 12.35-37; Ir. 20.41-44)

⁴¹Ari Jesoshi isampijieitiri yora variseopee apatotimentajeitariri:

—¿Paita piquenqueshiretacotiriri Quirishito? ¿Janica irishanincateari?

⁴²Yacajeitanaqueri:

—Irishanincateari Iravirini.

^{43,44}Icantiri:

—Peerani osanquenatacaaqueri Ishire Tasorentsi Iravirini, icantantariri Quirishito: “Novincatsarite”. Tempa

piotiro isanquenare: "Yora Tasorentsi icantiri Novincatsarite: 'Pisavique, notiomí, nacosanoriqui, pincaratena ampincatsariventante. Aitaque pisavique irosati nontsoncajeitanteeariri maaroni quisajeitaquempi". ¿Paita icantantariri Iravirini: "Novincatsarite"? ⁴⁵Iriorica Quirishito ivincatsarite Iravirini, ¿paita picantantariri irio ishanincani? Tempa amejeita apincatsajeitiri jivajeiteeri itimi. ⁴⁶Tecatsi incantajeitea irancanaqueri. Aisati itsaroacaajeitacari itsipapee irisampterime iriori.

Yoamejiturí Jesoshi atiri jaoca icantari oametantirori Sanquenarentsi aisati variseopee.

(Mr. 12.38-40; Jr. 11.37-54; 20.45-47)

23 ¹Impoiji icantajeitaqueri Jesoshi apatotimentajeitariri, aisati icantaquena narori, aisati icantajeitaqueri iriori itsipapee iroamere:

²—Yora oametantirori Sanquenarentsi aisati yora variseopee ijitashijeivevetaca iquempetacari Moishishi: oshequi iperanatashijeitaquempi. ³Ocameetsaveta pantayetero paitapeerica icantayetimpire, iro cantaincha eiro pantirotsi yantashiye-tari iriori. Icantajeivetimpi: "Cameetsa pintime", iro cantaincha te intimeji iriori cameetsa. Te irimateroji iriori icantajei-vetimpire. ⁴Oshequi opomerentsitimojei-taquempi pantajeitaqueri icantajeita-quempi, iro cantaincha te impomeren-tsiventeearoji iriori. ⁵Yantashiyetaro paitapeerica pineanteariri, pineacamee-tsanteariri. Imavacotacaro irineane Tasorentsi iracoqui aisati yamatseetacota-caro ivancainaqui; antearo oni, pincanta-jeitanteeariri: "Pineaqueri, quemisan-tancari ini". Aisati oshequi yoanencashita-caro iitsaare ocaratapai. ⁶Ariorica yoajeita, icoasanotaque intsipatapiniteari pincatsatatsiri. Aisati anta yapatojeitanta icoasanotaque savicamentotsi cameetsari.

⁷Icoaque cameetsa pivetsajeiteari anta nampitsiqui, icoaque pincantajeiteri: "Oametanari". ⁸Iro cantaincha avinti, eiro piquempetaritsi: eiro picoitsi incanteetempi: "Oametanari". Iriotaque Tasorentsi oamejeitimpire; avirojei, pimoncaratavacaajeitaca. ⁹Aca quipatsi-qui eiro picantashitaritsi itsipapee: "Apa". Itimi Piri apaniro anta inquitequi.

¹⁰Aisati eiro pishinetiritsi incanteetempi: "Novincatsarite". Itimi pivincatsarite apaniro, yora Quirishito. ¹¹Pincoaquerica pimpincatsaritanaque, pijivate pintacoejiteari itsipapee. ¹²Ariorica pincantajeiteri: "Nompincatsariventempi", ari pishemeta-que catsini, iro cantaincha iroashinonca-yempi Tasorentsi. Impeajeri pincatsarita-jantsine maaroni caari shemejeitatsi.

Iquenquejairi Jesoshi oametantirori Sanquenarentsi aisati variseopee.

¹³Icantiri Jesoshi yora oametantirori Sanquenarentsi aisati variseopee:

—Oshequi pamatavitantajeiti, coajica irootaque oshequi pashinoncaajeitanteeari. Eiro pijatitsi anta ipincatsaritinta Tasorentsi, aisati te pincoacayeriji itsipapee irijate iriori. ¹⁴Oshequi pamata-vitantajeiti, coajica irootaque oshequi pashinoncaajeitanteeari. Picoshitaquero camajimentaaro ovanco; pishiacantave-taca piquenquetsatacairyi Tasorentsi, pisamaninirotashitacaro, vero, vero, vero. Aitaque iroasanquetasanojeitempi Tasorentsi. ¹⁵Oshequi pamatavitantajeiti, coajica irootaque oshequi pashinoncaajei-tanteeari. Oshequi pipomerentsiventacaa-carí itsipa atiri pipeantacariri jorio. Impoiji poametiri yamatavitanti, inquem-petantempire irijatanteeari Sharincaven-i qui. ¹⁶Oshequi pamatavitanti: piquem-pe-tacari caari amenatsi yora acatsatirir iyamarajaquiririnte. Pashinoncaajeitana-quea. Picantashiniota: "Ariorica ancante: 'Tempa otimi ivanco Tasorentsi,

piotanteari eiro namatavitimpitsi', ari ocameetsati amatavitante. Iro cantaincha ariorica ancante: 'Tempa otimi oro anta ivancoqui Tasorentsi, piotanteari eiro namatavitimpitsi', ari eiro amatavitanti".¹⁷ ¿Paitasa picantantari? Te pionirojeiteji catsini. Oshequi pineaveetashita. ¿Paita cameetsatasanotatsiri? ¿Irompa oro cameetsatasanotatsiri? ¿Irompa ivanco Tasorentsi cameetsatasanotatsiri? Tempa irootaque ocameetsatantari oro otimi ivancoqui Tasorentsi.¹⁸ Aisati picantashinirojeita: "Ariorica ancante: 'Tempa otimi atantanariri Tasorentsi avira, piotanteari eiro namatavitimpitsi', ari ocameetsati amatavitante. Iro cantaincha ariorica ancante: 'Tempa itimi avira avaqueneri Tasorentsi, antaaqueneri, piotanteari eiro namatavitimpitsi', ari eiro amatavitantsi catsini".¹⁹ ¿Paitasa picantantari? Te pionirojeiteji catsini. ¿Paita cameetsatasanotatsiri? ¿Irompa pivira? ¿Irompa pitaantanariri Tasorentsi pivira? Tempa irootaque icameetsatantari pivira pitaaqueneri Tasorentsi.²⁰⁻²² Pamene, oshequi picanti: "Tempa otimi ataantanariri Tasorentsi", "Tempa otimi ivanco Tasorentsi", "Tempa otimi inquite", paitapeerica. Picantashinirotaro, impoiji pjitashiniroveta ocameetsati pamatavianti. ¿Pijitimpia te intimeji Tasorentsi? Noncamantempi: itsoteaquero itasorenca maaroni. Ijojetiro pantajeitiri, iroasan-quetimentempiro maaroni pamatavitanti.²³ Oshequi pamatavitantajeiti, coajica irootaque oshequi pashinoncaajeitanteari. Pamene, timatsi pimayevetacari. Ariorica paaque piirequite 10, pipaqueri Tasorentsi aparoni; ariorica paaque 10 oshi pipanquitiri, jero pipavetacari aparoni oshi. Iro cantaincha te pinquenqueshireteroji icoacaasanovetaquempiro Tasorentsi: icoaveta pintimeme cameetsa, icoaveta pincavintsayerime pishaninca, icoaveta pinquemisanterime. Oncamee-

tsateme pimajeiterome maaroni ocappee, impoiji ariorica paaque paitapeerica oncarate 10, aparoni pimpaqueri Tasorentsi.

Yovaajiniri, icantajiri aisati:

²⁴—Te pioteji catsini, iro cantaincha picoajeiveta poamejeiterime itsipaphee. Oshequi piquearioventavetacaro pipomrentsiventasanovetacaro caari icoacaasa-notimpi Tasorentsi; iro cantaincha te pinquenqueshiretimateroji capichaji oca icoacaasanovetimpiri.²⁵ Oshequi pamatavitantajeiti, coajica irootaque oshequi pashinoncaajeitanteari. Piquivasanovetacaro piramento otapiiqui, iro cantaincha te pinquierojo osantequi: oshequi oshititaque. Aisati piquempejeita avirori, poameetsantashita ineacameetsajeitan-timpiri ashánincaphee, iro cantaincha pishirequi te pincameetsateji catsini: oshequi picoshitapiniti aisati oshequi pinevetaro vaararontsi.²⁶ Te piojeiteji catsini. Pijivate pinquivasanotero osantequi, impoiji eiro oquipatsitajitsi aisati otapiiqui. Arioricame pincameetsashiretaqueme, irineacameetsajeitempime ashánincaphee.²⁷ Oshequi pamatavitanta-jeiti, coajica irootaque oshequi pashinoncaajeitanteari. Piquempejeitacaro yoanteetariri camatsiri, ipotsotiro quitamarori. Ocameetsavetaca saiteriquica, iro cantaincha tsompoina oshititaque, ojaacaro itonqui camatsiri.²⁸ Ineacameetsajeivetaro ashánincaphee pantayetiri, iro cantaincha te pincameetsashireteji: oshequi pamatavitanti aisati oshequi pantapinitiro caari cameetsatatsi.^{29,30} Oshequi pamatavitantajeiti, coajica irootaque oshequi pashinoncaajeitanteari. Peerani yora pishanincapeeni yoajeita-queri quenquetsajeitironiri irineane Tasorentsi, yora cameetsatatsiniri. Meeca povetsicajeitiro pancotsipee pinquenqueshirejeitanteari yora quenquetsatacantasiniri. Poanencayetaquero cameetsa.

Picantanirojeiti: "Nontimitaqueame nainti peerani, eiro noajeitirime, eiro noquempetarime nainti noshanincani oajeitaqueriniri".³¹ Picanti avirori: "Noshanincajeitacari yora peeraniniri". Queario oca picantanirojeitiri.³² Aisati piquempejeitacari, avirojeitaque oayeri. Tempa iriojeitaque intacaroniri, meeca aviro vaajeitajirori poantaji.³³ Piquempejeitacari maranque, te pincameetsajeiteji catsini. ¿Pijijeitimpa eiro pijajeititsi Sharincaveniqui?

Icantajeitaqueri Jesoshi:
"Iroasanquetaajeaquempi Tasorentsi".
(Ir. 13.34-35)

³⁴ Aisati icantajeitaqueri Jesoshi:
 —Nontianquemppiri coajica itsipapee quenquetsatacoterineri Tasorentsi, iotasanoliriri, oametanteroneri irineane. Niotaque povaaranteri, pashinipee pimpajacotaaranteri, itsipapee pimpassataaranteri anta papatojeitanta, itsipapee aisati pinquisaaranteri jaocarica irijayetanaqueri.³⁵ Ainiro pantanejei avirori, picoacaajeitaqueri incamajeitaque maaroni cameetsatatsiri: yora Averini, maaroni. Aisati yora Sacariashi, yora itomini Verequishashini: iquemisanta-caavetacari ashanincani anta ivancoqui Tasorentsi, iro cantaincha yoajeitaqueri. Pintimitaqueame avirori, pamijeitaquerime poajeitaquerime avirori. Pashi poajeitiro poantajeiti.³⁶ Aitaque iroasanquementajeitaquemppiri Tasorentsi maaroni picoacaajeitaqueri incame.³⁷ Jo, aviro jerosaresati. Oshequi poapinitiri quenquetsatacotiriri Tasorentsi, pipichaa-vaqueri maaroni itiancayevetimpire. Oquempeta teapa osaramonquitari orijanipee, ocaavintsairi, nocavaveta nonquempetearome narori, noncavintsaajeitempime. Iro cantaincha te pincoajeiteji.³⁸ Jero ivanco Tasorentsi pineaca-meetsajeitaqueri: eiro nopiashitajarotsi

aisati. Aisati Apa, eiro ipocashitajirotsi iriori.³⁹ Eiro pineapinijeitanjatasi aisati. Apanivani pineajeitavajena aisati, pincantajeite: "Icameetsataque Jesoshi, iriotaque Avincatsarite tianquiriri".

Icanti Jesoshi: "Coajica intireetajero ivanco Tasorentsi".
(Mr. 13.1-4; Ir. 21.5-7)

24 ¹Ari iponeaca Jesoshi ivancoqui Tasorentsi, irotajantsi irijataje. Ari nojatashitaqueri, nocarajeitaqueri itsipapee iroamere, namenacaajeitaqueri ivanco Tasorentsi aisati otsipapee pancotsi.² Ari icantaquena:

—Ari pineamempeajeitvetacaro meeca oca pancotsipeeca. Queario oca noncamantempiri: coajica intireetajero maaroni, irovarayeetajero maaroni mapipee.

³ Ari nojajeitanaque toncaariqui ipajiyetiro Orivomashi. Isavicapaaque Jesoshi, ari nojatashitaqueri, nosampijetaqueri:

—Pincamantajeitena: ¿jaoca oncarate intireetantajearori pancotsipee? ¿Paita iotacayenane jaoca oncarate pimpocantajeari? ¿Jaoca oncarate omoncaratantajeari maaroni picantaqueunari?

Icantakeri Jesoshi: "Coajica oshequi inquematsicayetearo atiri".
(Mr. 13.5-8; Ir. 21.8-11)

⁴ Yacanaquena:

—Queariompiya, yamataviyeeetimpicari.⁵ Intime oshequi pocatsine, cantapaatsine: "Narotaque nainti Quirishito". Iramataviyetapeeri oshequi atiri.⁶ Pinquemapiniteri incante: "Imanatavacaajeita atiripee anta". Incante itsipa: "Coajica irimanatavacaajeitea anta". Iro cantaincha eiro piquenqueshirejeitatsi. Aitaque oncanteari irimanatavacaajeitea, iro cantaincha tequeratsita omoncarateaji maaroni nocantaqueumpiri.⁷ Aitaque

oncanteari yora atiri inquisajeitanaqueri itsipapee atiri; intime pashinipee quemajeiterone itashe, iro cantaincha eiro otimanajitsi iroanajeari; aisati onicapinittea quipatsi;⁸ iro cantaincha eirotitsa iquematsicaatasanotarotsi.

Icantiri Jesoshi: “Oshequi inquisanayeeteri quemisantatsiri”.

(Mr. 13.9-13; Ir. 21.12-14)

⁹Pashini aisati icantaquena:

—Ariorica iriojeitanaque atiri piquemisantajeitaquena, iroashinoncaapinijeitempi, iroaarantempi, inquisajeitempi maaroni atiri.¹⁰ Intime oshequi jocayeteroneri iquemisanti, impoiji inquisaqueri quemisantasanotaitsiri, iraacantayeteri, paitapeerica.¹¹ Intime amatavitantatsineri, incantavetea: “Nonquemisantacayempi”, iro cantaincha iramatavijeiteri maaroni quemisantavetavaquearine.¹² Oshequi irantajeitero atiri caari cameetsatatsi, oshequi catsini, impoiji irijocajeitajero inintavacaajeitani.¹³ Iro cantaincha noavisacojeiteri maaroni quearioventanarori nocantaqueriri.¹⁴ Pijajeitanaque maaroni quipatsiqui, pincamantajeiteri maaroni atiri nocooaque nompincatsariventajeiteri; impojiquea omoncaratea maaroni nocantaquemperi.

Icani Jesoshi: “Irashinoncaajeitea coajica joreasati”.

(Mr. 13.14-18; Ir. 21.20-24)

¹⁵Aisati icamantajeitana Jesoshi:

—Peerani isanquenatini yora Iranieri, yora camantantatsiniri, icantini: “Intime coajica anta ivancoqui Tasorentsi caari cameetsatatsine, iramparajeitero maaroni”. Tempa piotiro oca noquenquetatacotiri. Ariorica pineaqueri yoca nocamantacotiri,¹⁶aisati pintimerica Joreaqui, pishiajeitanaque toncaariqui.¹⁷ Ariorica pisavique saiteriqui, iro pijatapanajantsi pivancoqui paantapa-

najantearori pivaararo, irointi pishiasanotanaque.¹⁸ Aisati pintimerica oantsiqui, eiro pipashitapaintarotsi otsipa piitsaare.¹⁹ Oshequi ashinoncaajeitanaquea tsinane tsomontetatsineri aisati antsotayerine ojananequite: eiro omatirotsi oshiasanotanaque.²⁰ Aitaque coajica pishiajeitanaque, iro cantaincha pincanteri Tasorentsi eiro pishiantatsi incaniniqui aisati quitaiteriqui pimaoreajeitantarari.

Icani Jesoshi: “Oshequi catsini irashinoncaajeitea maaroni savicajeitatsineri”.

(Mr. 13.19-23)

²¹Aisati icanti:

—Aitaque oshequi iroashinoncaajeitempi. Pashinoncaasanojeitanaquea, panaacojeiteri maaroni peeraniniri aisati maaroni timajantsineri coajica.²² Arioricame osamanitanaqueme iroashinoncaajeitempime, pintsoncajeiteame maaroni; iro cantaincha incavintsaajeiteri Tasorentsi maaroni quemisanterineri incoyeajeiteri, irootaque eiro osamanitanta iroashinoncayeitempi.²³ Ariorica incanteetempi: “Pamene, jeri yoca Quirishito”, eiro pishiretavacarotsi incantempiri. Aisati, incanteetempirica: “Nijaantapaja anta Quirishito”, eiro pishiretavacarotsi.²⁴ Intime oshequi amatavitantatsineri, incante: “Naro Quirishito”, irio itsipa: “Naro quenquetacotiriri Tasorentsi”. Oshequi intasoncantayete, iramatavijeiteri oshequi savicajeitatsineri, iro cantaincha eiro imatiritsi yora quemisantasanotatsineri.²⁵ Piquemaquena nocamantitaquempiro jaoca oncanteari coajican. ²⁶ Incantemprica: “Timatsi Quirishito anta caariteriqui”, eiro patsipetashitatsi pijatashitena. Ariorica incantempi: “Ainiro Quirishito anta pancotsiqui tsompoina”, eiro pishiretarotsi.²⁷ Arinoponeaca narori inquitequi, natiritapaaque. Tempa

imapocapinitimpi iporequi, porec, impoiji
otsoteapaintiro inquitequi: aisati
nonquempetapajea narori, ariorica
nompocaje. Nomapocajeitapajempi, iro
cantaincha pineajeitavajena, maaroni.
²⁸Jaocarica icamapinitiri camatsiri,
aitaque ipocashitapinitiri tisoni. Aisati
oquempetaca, oshequi itseencanti
joriopee, irootaque impocashitantariri
oshequi amatavijeiterineri.

Aitaque oncanteari impocantajeari Jesoshi.
(*Mr. 13.24-27; Ir. 21.25-28*)

²⁹Aisati icanti Jesoshi:

—Ari oshequi ompomerentsitimojeiteri
atiri, maaroni: irashinoncaajeitanaquea.
Impoiji intsipaite intsivacanaque catsirin-
caiteri, aisati yora cashiri; imparajeitana-
que impoquiropee, irishevajeitanaquea
maaroni inquitesati. ³⁰Impoiji nonconija-
tapaaje anta inquitequi, irosati iroashire-
jeitantaqueari maaroni tseencajeita-
nari. Irineajeitavaquena maaroni atiri
nonquenapaaqe mencoriqui: nompincatsa-
ritasanotapaaque, noshipaquireasanota-
paaque. ³¹Nontiotapaaque iriojeitantaeari
maaroni nonampire impocajeitantaapeem-
pari iramajeitantaapeempariri maaroni
quemisantajeitanari, maaroni nocoyeajei-
taqueri. Intsoncajeitanaqueri savicajeita-
tsiri pashinipeequi quipatsi, maaroni.

Ishiacantajeitiniri Jesoshi iyera.
(*Mr. 13.28-31; Ir. 21.29-33*)

³²Pashini icantajeitaquena Jesoshi:

—Meeca noshiacantempiro iyera:
pinquenqueshiretasanotero. Ariorica
oshiocajempequitanaje, aisati oshitanaje,
ari piojeitanaque irotimatajantsi
onquimojantsitaje. ³³Aisati oquempetaca:
ariorica pineajeitavaquero oca nocanta-
quemperi, piojeitanaque irotajantsi
nompocaje. ³⁴Eirotsitarica picamajeiti,
ario pineajeitavaquero maaroni oca
nocamantaquemperi. ³⁵Ompeanaquea

inquite aisati quipatsi, iro cantaincha eiro
opeatsi irointi noneane. Omoncaratajea
maaroni nocantaquemperi.

**Te ayojeiteji jaocarica oncarate
impocantajeari Jesoshi.**
(*Mr. 13.32*)

³⁶Pashini aisati icantajeitaquena
Jesoshi:

—Iro cantaincha tecatsi totatsine
jaocarica oncarate: te irioteji inampire-
pee Apa, aisati te nioteji narori. Irinti
Apa apaniro ioti. ³⁷⁻³⁹Peerani itimavei-
tani Noeni, yoapinijeita ishaninca,
ishinquitapinijeita, yaapinijeitiro ijina,
maaroni. Te inquenqueshirejeiteroji
icamantavetariri: “Coraquetaque
oonquea”. Impoiji itetacaro pitotsi,
yashitacotanaca, tarocn. Impoiji aisati
omapocajeitaqueri atiri incani,
ooncanaca, itsoncajeitanaca, itsitajeita-
naque. Aisati inquempejeitaquea maaroni
atiri, ariorica omoncaratapaaquea
nompocantajeari narori: eiro iquenque-
shirejeitatsi, nomapocajeitapaajeri.
Impoiji irashinoncaajeitanaquea maaroni
tseencajeitatsiri. ⁴⁰Intimerica apite
tsameetatsineri anta oantsiqui: naanajeri
aparoni nontsipatanaqueari, irio itsipa
eiro naanajiritsi. ⁴¹Ontime apite tsinane
tononqueroneri tirico: naanajero aparoni
nontsipatanaquearo, iro otsipa eiro
naanajirotsi.

**Icantiri Jesoshi iroamere:
“Paamaajeitajena”.**
(*Mr. 13.33-37; Ir. 12.41-48; 21.34-36*)

⁴²Aisati icantana:

—Paamaajeitena, pinquenqueshiretapi-
nijeitena: te piojeiteji jaoca oncarate
nompocantajeari. Nomapocapaimpicari.

⁴³Oquempetaca yora ashitarori ivanco
icoshiyeetiri: iroteme irotaintsi impoque
coshiterineri, irisaaquiteme, eiro ishineti-
rime incoshiteri, irointi iroimpaviavajerime.

⁴⁴Aisati narori, paamaajeitena: nomapo-quimpicari. ⁴⁵Pinquempejeiteari nampirentsí cameetsari, yora iotasanota-tsiri. Icantiri nampitariri: “Aviro vetcicapiniteroneri iroajeiteari notomi, pimpapiniteri cameetsa”. ^{46,47}Ariorica irineaueri cameetsa yovetsicapinitiro yoari, ari incanteri: “Cameetsa pantayeta-quero nococayetaquempi. Meeca aviro quempoyejenarone maaroni timimojetanari. Cameetsa nompinatempi, nioti eiro pamatavitanshi”. Tempa ari inquimoshiretanaque inampire. ⁴⁸Iro cantaincha intimerica itsipa inampire, caari quemisanterine yora nampitariri. Incante irinti: “Meeca jataque ini nampitanari, eirotsita ipiajatsi”. ⁴⁹Iquisa-queri itsipa nampirentsí, icapojapiniyeteri, ishinkuitapinitaca. ⁵⁰Impoiji imapocapaajiri yora nampitariri: te iraamaajeari. ⁵¹Ari yoasanquetapaa-queri, itiancaqueri arejiqui itsipajetanta-peempariri yora amatavitantatsiri. Ari anta yoashiretasanotanaca aisati oshequi icavintsaanaca. Eiro piquempejeitaritsi avinti, irintquea pinquempejeitea quemisantasanotiriri nampitariri.

**Iquenquetsatacotiro Jesoshi
ora 10 evancaro.**

25 ¹Pashini aisati icamantaquena Jesoshi:
—Meeca noshiacantempiro aisati jaoca icanta Tasorentsi ipincatsariventanti. Otimi 10 evancaro, coatsiri amenava-queri ojimetsori impoque. Otsitenitanaque, irosati aantayetacaro otsioro. ²Ari ocarataque evancaro iotasantainsiri apapacoroni, aisati ocarataque caari iotatsi iroori apapacoroni. ³Aavetacaro iroori otsioro, iro cantaincha te ayeji oja orivo. ⁴Irointi ora iotatsiri, aacotana-queri oja, ontsiotantearori. ⁵Ari osamanitanaque, tequera impoque. Impoiji aajeitaquero ovochoquine, omaajeitana-

que. ⁶Ari nianquiite oquematii icanteeta-querer: “Coraquetapaaque pijimetsori, pijate pamenajeitavaqueri”. ⁷Ari otinaajeitanaca, ovetsicajeivetaro otsioro. ⁸Ocantavetaro caari iotatsi: “Pimpema narori oja, irotantsi ontsivaque notsioro”. ⁹Iro cantaincha acanaquero ora quenqueshiretainchari: “Eiro nopimpirotsi, eiro onarotsi oja. Nompem-pirica, tecatsi nontsiontanaqueari narori. Pijajeite pamanantanontapaintea avirori”. ¹⁰Ari ojatanaque amanantavetapainta. Jentsipaite yareetapaaca ojimetsori, iqueanaque anta yoajeitanta, icarajeita-querer ora vetcicajeitainchari, yashitaco-jeitanaca. ¹¹Impoiji opiavetaja caari quenqueshireacha, ocantavetapaacari: “Pashitareajenaro narori, noneapaa-jempi”. ¹²Iro cantaincha yacanaquero: “Te niotempiji, janicampirica. Te noncoyeji pimpocashitena aca”. ¹³Pinquenqueshiretero oca noshiacantem-piri: paamayena, te piojeiteji jaocarica oncarate nompocantajeari.

Ishiacantiniri Jesoshi yora iomparitachari.
(Ir. 19.12-27)

¹⁴Icantaquena aisati:
—Pashini noshiacantempiro jaoca icanta Tasorentsi ipincatsariti. Oquempe-taca ijatanaque ashitaarantachari pashini-qui nampsitsi. Ijivataque icajemajetaqueri maaroni inampirepee, icantaqueri: “Nocoaque pinquempoyejeitenari noirequite”. ¹⁵Icantiri aparo: “Jeri S/.200,000, pinquempoyejenari”. Irio icantiri itsipa: “Jeri S/.80,000, pinquem-poyejenari”. Irio itsipa aisati ipaqueri S/.40,000 inquempoyeanteariri. Irio anaacotantainsiri ioti yora ipasanota-queri oshequi. Yora caari ipasanoti, irio caari iotasantatsi. Ari ipajeitaqueri, impoiji ijatanaque pashiniqui nampsitsi. ¹⁶Yora aasanotiriri quirequi oshequi ijatanaque iomparita. Yoshequiasanota-

queneri iirequite ivatorote, icaratiri S./.200,000 aisati.¹⁷ Aisati iomparita yora airiri S./.80,000. Yoshequiaqueri aisati, yaantacari aisati itsipa S./.80,000.¹⁸ Iro cantaincha irinti aavetariri S./.40,000, yaanajiri quirequi, itijiri omoroqui quipatsi.¹⁹ Impoiji ipiaja yora ivatorote, icantapairi: "Pimpajeitena meeca noirequite".²⁰ Ari ipocaque yora aaqueriri S./.200,000, yamaqueri aisati itsipapee S./.200,000. Icantiri: "Jeri quirequi pipaquetenari. Oshequi niomparitaca, noshequiasanotaqueri. Jeri itsipa quirequi, icarati aisati S./.200,000".²¹ Ari icantiri ivatorote: "Cameetsataque, pimatasanotaquero nocoacaquempi. Chapinqui piquempoyeajanari capichaji, nocoaque meeca pinquempoyeajenari oshequi aisati. Nocoaque oshequi noveshireacayempi".²² Impoiji ipocapaaque yora airiri S./.80,000. Icantiri ivatorote: "Jerica quirequi pipaquetenari. Oshequi niomparitaca, noshequiasanotaqueri. Jeri itsipa quirequi, icarati aisati S./.80,000".²³ Icantiri ivatorote: "Cameetsataque, pimataquenaro nocoacaquempi. Chapinqui piquempoyeajanari capichaji, nocoaque meeca pinquempoyeajenari aisati oshequi. Oshequi noveshireacayempi".^{24,25} Impoitapaaque yora aavetariri S./.40,000, icantapaaqueri: "Niotaquempi avirori, te pincavintante, oshequi notsaroacaimpi. Nojiti ariorica noshequiaquerime piquirequite, ari paapitsatenarime maaroni, irootaque caari niomparitanta. Notijaqueri piquirequite, maaroni. Jerica, noipiajimpipi".²⁶ Yacanaqueri: "Te pincameetsateji, oshequi piperataca. Piovetaca nocoavetaca narori irishequianaqueme noirequite.²⁷ ¿Paita caari pipantari yora itsipa quempoyeapinitiriri quirequi? Pimpajerime iriori, impinataquename, naantajeameri aisati. Aisati iroimpiajenarime maaroni nashisanori".²⁸ Ari icantiri itsipa

inampire: "Paapitsatageri noirequite, pimpajeri yora ashitasanotariri meeca S./.400,000.²⁹ Nompasanoteri yora ashitaarantachari. Irintiquea yora caari ashitaarantacha, naapitsatageri ora capichaji timimovetariri.³⁰ Meeca paanajeri yoca anta otsiteniitintina: te incameetsateji. Noccoaque incarajeiteri maaroni yora oashirejeitachari aisati ashinoncaajeitachari".

Icanti Jesoshi: "Coajica noncantacoventajeiteri atiri".

³¹Impoiji icantajeitana Jesoshi:

—Noponeaca narori inquitequi, natiritapaaque. Coajica nojatanaje, impoiji nompiaje aisati; oshequi nompincatsaritapaaque, noncarajeitapaaqueri oshequi nonampirepee. Nompincatsaritasanotapaaque, impincatsasanojeitavaquena maaroni savicajeitatsiri.

³²Nampatojeiteri maaroni atiri, jaocarica isavicajeitiri. Nonquempeteari yora ashitariri ivira inashitacaari: irovishate aisati yora iyavarate; aisati narori nonashitacayeari quemisantajeitanari aisati tseencajeitanari.

³³Noncantajeiteri maaroni quemisantajeitanari: "Pimpocajeite aca nacosanoriquica". Irinti tseencajeitanari noncantajeiteri: "Pimpocajeita avirori aca nampatequica".

³⁴Impoiji noncamantajeiteri savicajeitatsiri nacosanoriqui: "Caatanaque, maaroni, oshequi iriveshireacajeitempi Apa maaroni. Peerani, catsini yovetsicajeitaquempiro pisavicajeitanteari anta inampiqui. Meeca pijajeite pincarajeiteri. Cameetsa impincatsariventajeitempi.³⁵ Aavetaquenani notashe, pipajeitaquenaro noari. Aavetaquenani nomire, pipajeitaquenaro niraqueri. Te piojeivetenuji, iro cantaincha pineshinoncajeitaquena anta pivancopeequi.³⁶ Te ontimaveiteani noitsaare, ari pipajeitaquenaro. Nojoquiveitani, ari pijatashijeitana pineajeitana. Yoiminqueetaquenani caravosoqui, ari pijatashijeitana, picavintsaajeitaquena".³⁷ Impoiji incantajeitena yora cameetsajeitatsiri: "¿Arimpa-

novincatsarite? ¿Jaocampa ocaratiri aantavetaquempiri pitashe nopantaquempiri poari? Te nonquenqueshiretajeroji.
 ¿Jaocampa ocaratiri aantavetaquempiri pimire nopantaquempiri piraqueri?³⁸ ¿Jaocampa ocaratiri noneshinoncatantaquempiri novancoqui? ¿Jaocampa ocaratiri nopantaquempiroi piitsaare?³⁹ ¿Jaocampa ocaratiri nojatashitimpiri noquivantantimpiri?”
⁴⁰Ari nancanaqueri: “Queario oca noncamantempiri: ariorica picavintsaquaqueri aparoni quemisantanari picavintsaquaquena narori”.
⁴¹Impoiji noncanteri yora catiajeitanchari nampatequi: “Tsamempi pijajeitanaque anta Sharincaveniqui, pinquematsicajeitearo anta paamariqui yovetsicaqueri Tasorentsi peerani. Yovetsiquiniri camaari aisati maaroni oijajeitiriri. Meeca pincarajeiteri anta, oshequi pashinoncayea.⁴²Peerani aaquena notashe, iro cantaincha te pimpennaji noyeari. Aaquena nomire, iro cantaincha te pimpennaji nireri.
⁴³Nojatashivetimpni noneempime, iro cantaincha te pineshinoncatavaquenaji, te poisavacavaquenaji pivancoqui. Te nonquitsaa veiteani, iro cantaincha te pimpennaji noitsaare. Nojouittacami aisati yoiminqueetaquena caravosoqui, iro cantaincha te pijatashitenaji pineena”.⁴⁴Impoiji irancajeitena: “Novincatsarite, ¿jaocampa ocaratiri noneantavetaquempiri pashinoncaaca, iro cantaincha te noncavintsayempii?”⁴⁵Ari noncanteri: “Queario oca noncamantempiri: te pincavintsaajeiteriji yora quemisantajeitanari, irootaque caari picavintsanana narori”.⁴⁶Ari iroashinoncaajeiteri Tasorentsi anta Sharincaveniqui, incantaitatiyempani. Iranti cameetsajeitatsiri irisavacajeitaje inquitequi, incantaitatiyempani.

Icanti joriopee: “¿Jaoca ancanteriri Jesoshi avacantanteariri?”
 (Mr. 14.1-2; Ir. 22.1-2; Jea 11.45-53)

26 ¹Impoiji icamantajeitaquena Jesoshi, narori aisati itsipapee iroamere:

²—Piojeiti ocarati apitenivani quitaiteri omoncaratantajeari quitaiteri apajitiri Yavisantaniri. Noponeaca narori inquitequi, natiritapaaque, iro cantaincha coajica impajacotacanteetaquena.

³Ari yapatojeitaca yora jivatacaajeitiriri saserotepee aisati yora savicacaajeitantsiri. Yapatojeitaca anta ivancoqui yora ivincatsarite saserotepee. Ipajita iriori Cajashi. ⁴Yoametavacaajeitaca, icanti:

—¿Jaoca ancanteriri Jesoshi aanteariri aisati avacantanteariri? Iro cantaincha te ancoyeji iriojeitanaque atiripee: iquisacoventaricari.

⁵Ari icanti itsipapee:

—Irotaintsi quitaiteri Yavisantaniri: inquimoshirejeitanaque atiripee. Eiro amatiritsi ayeri meeca Jesoshi, iquisacoventajeitaricari.

Osaitiri vetaniasato Jesoshi.

(Mr. 14.3-9; Jea 12.1-8)

⁶Impoiji yovaanaja Jesoshi Vetaniaqui, nojajeitanaqueri. Nojajeitanaque maaroni, irosati ivancoqui Shimo, yora patsaaveitachaniri peerani. ⁷Noajeitapaaca, irosati opocantacari tsinane amacotaquero casancajari. Oshequi ovinaro casancajari. Ari osaitapaaqueri itoqui. ⁸Noneajeitantarori oca, noquisajeitanaquero, nocantajeiti:

—¿Paitaquea aparajatantarori?

⁹Ompimanterome casancajari, ayeme oshequi quirequi, impoiji oncavintsayempe oshequi ashinoncaajeitachari.

¹⁰Yacanaquena Jesoshi:

—¿Paita picantimentantarori oca tsinaneca? Ocameetsataque oca antaqueri. ¹¹Incantaitatiyempani incarajeitimpni ashinoncaajeitachari, pincantaitatiyempani pincavintsaapinijeteri iranti. Irompa nainti, eiro nocantani nosavique aca. ¹²Iotaque nonceme, irootaque osaitantanari. ¹³Queario oca noncamantempiri: coajica pinquenquetasa-

tacaajeiteri maaroni savicajeitatsiri quipsiqui, pintsoetequero maaroni nampsitsi, aisati pincarajeiteri oshequi itsipapee. Jaocarica pijajeiteri pincaman-tajeiteri atiripee antaquerica oca tsinane, iriojeitanteari ocavintsaquena.

**Icantiri Jorashi saserotepee:
“Namitacotempi payeri Jesoshi”.**
(Mr. 14.10-11; Ir. 22.3-6)

¹⁴Impoiji ijatanaque itsipa iroamere, yora pajitachari Jorashi Ishicariote. Ijatashijeitaqueri yora jivatacaa jeitiriri saserotepee, ¹⁵icantapaaqueri:

—Ariorica noncamantajeitempi jaoca pincanteriri Jesoshi paanteariri, ¿paita pimpinajeitenari?

Yacanaqueri:

—Nompinatempi quirequi.

Ari ipajetaqueri imentaqui quirequi, icarati 30. Iro yovetsiqueetiri imentaqui perata. ¹⁶Irosati ipiantaja Jorashi, yamenasanotiri Jesoshi iriotanteari jaoca iraacanteriri.

Ivecaratantacarori Jesoshi yoá.
(Mr. 14.12-21; Ir. 22.7-23; Joa 13.18-30)

¹⁷Ari moncarataca noajeitantarori tanta caari tapiacha. Nojatashijeitaqueri Jesoshi, nosampijetiri:

—¿Jaoca picoaqueri nojajeiteri novetsi-cantempiori poyeari pinquenqueshire-tantearori Yavisantanir?

¹⁸Icantaquena:

—Pijajeite Jerosarequinta, pincanta-paaqueri yora pineapaaqueri: “Icanti oamejeiteeri: ‘Irotainci nomoncaratero. Nocoaque noyea anta pivancoqui, noncarajeiteri noamerepeee’”.

¹⁹Ari nojajeitanaque, nocantapaaqueri. Yonijaquenaro ivanco, irosati novetsican-tacaro noajeiteari. ²⁰Ari tsitenjencaite-naque ipocapaaque Jesoshi, isaviquimo-jeitapaaquena, ²¹noajeitanaca. Impoiji icantajeitaquena:

—Queario oca noncamantajeitempi: meeca, aca picarajeitica, timatsi aacante-naneri.

²²Ari noashirejeitanaca, irosati nosampijetantariri:

—¿Narompa, novincatsarite, aacantem-pineri?

Irio itsipapee aisati icantiri:

—¿Narompa, novincatsarite, aacantem-pineri?

—Yacajeitaquena:

—Iriotaque yoca quitacotaquenarica meecca nomatitatequi. ²⁴Noponeaca inquitequi, natiritapaaque. Oquenquetsa-tacotanani Sanquenarentsi peerani, aitaque nomoncaratero maaroni oquequetsatacotanari. Iro cantaincha oshequi irashinoncaasananotanaquea yora aacantenaneri. Oncameetsateme eiro itimime iriori, impoiji eiro yashinon-caame.

²⁵Impoiji isampitiri Jorashi:

—¿Narompa, oametanari, aacantem-pineri?

Yacanaqueri:

—Je, aviروque.

**Yoamejeitee Jesoshi avajeitimenteari
aisati irajeitimeri.**

(Mr. 14.22-25; Ir. 22.19-20; I Cor. 11.23-26)

²⁶Ari tequera nontsoncajeitero noyea, ari yaquiero Jesoshi tanta, yajiricaquiero, ipasonquitiri Tasorentsi. Impoiji icarajiqueru, ipajetaquena, icantajeita-quena:

—Paajeitavaquero, poajeitearo. Tempa narotaque camimentajeitempineri.

²⁷Impoiji yaquiero aisati nirajeitantarri, ipasonquitajiri Tasorentsi. Ipacojeitaque-naro, icantajeitaquena:

—Pirajeitero, maaroni. ²⁸Tempa irootaque niraja amparajatimentajeitem-pineri, incavintsaajeitanteempiri Tasoren-tsi. Ariorica paventajeitena, eiro iquenqueshiretajirotsi Tasorentsi caari

cameetsatatsi pantajeitiri. Iroaquera oca nocantajeitaquempi piojeitanteari jaoca pincantajejari pavisacojeitantaquera: avirorijei, aisati maaroni timajeitatsiri.
²⁹Eiro meeca nirajirotsi aisati ovaja. Ariorica nirajero aisati, noncarajeitempi irajeitero anta ipincatsaritinta Tasorentsi.

Icantiri Jesoshi iroamere: “Meeca tsiteniri pojocajeitanaquena”.

(Mr. 14.26-31; Ir. 22.31-38; Joa 13.36-38)

³⁰Ari nopalmpoyeaventajeitiri Tasorentsi, impoiji nojajeitanaque anta toncaari qui pajitachari Orivomashi. ³¹Nareejeitacari, icamantajeitana Jesoshi:

—Meeca tsiteniri pojocajeitanaquena. Tempa oquenquetsatacojeitimpini Sanquenarentsi: “Incamaquerica shentajeitiriri irovishate, irishiaeitanaque irovishate, irovaraajeitanaquea”.
³²Iro cantaincha ariorica nontinaanaje aisati, nojivajeitanajempi Carireaqui.

³³Ari icantiri Petero:

—Arioricampa irojocajeitanaquempi irinti yocapee, iro cantaincha nainti, eiro nojoquimpitsi.

³⁴Yacanaqueri:

—Queario oca noncamantempiri: meeca tsiteniri, tequerarica irineaje teapa, ari oncarataque mava pincante: “Te nioteriji Jesoshi”.

³⁵Icantiri:

—Ariorica nontsipatempি ancamajeite, iro cantaincha eiro nocantitsi: “Te nioteriji Jesoshi”.

Aisati nocantajeivetacari narorijei, maaroni.

Iquenquetsatacari Jesoshi Iriri anta Jetsemaniqui.

(Mr. 14.32-42; Ir. 22.39-46)

³⁶Impoiji ijatanaque Jesoshi Jetsemaniqui, nojajeitanaqueri: narori, aisati maaroni itsipapee iroamere. Icantaqueña:

—Pisavicajeitavaquetsita aca: nojate anta nonquenquetsatacavaquerita Apa.

³⁷Ari yaanaqueri Petero, jeri itomipee Severeo apite. Oshequi yoashiretanaca, iquenqueshiretanaca. ³⁸Impoiji icantiri: —Oshequi catsini noashiretanaca.

Pisavicajeitavaqueta aca, pisaaquitelyea.

³⁹Ari yavisaque capichaji, impoiji itarecapaacaro quipatsi, iquenquetsatacquaqueri Iriri:

—Apa, te noncoaveteaji nonquemaatsictearome, iro cantaincha eiro nantirotsi nocoavetari narori, irointi nantempiro picoacaquenari avinti.

⁴⁰Impoiji ipiashitacari iroamere, ineajeitapaaqueri imaajeitaque. Icantiri Petero:

—Tempa pamavetimatero pivochoquine, te pimateroji pisaaquitimate capichaji.

⁴¹Pisaaquite, pincerteri Tasorentsi iramitacotantempiri eiro pantantarotsi caari cameetsatatsi. Picoavetaca pimatasanotero maaroni nocoacaquempi, iro cantaincha te pimateroji.

⁴²Ari ipianaja, icantajiri aisati:

—Apa, picoacaasanotaquenarorica nonquemaatsictearo, aitaque cameetsa: nomoncaratero maaroni picoacaquenari.

⁴³Ipianaja aisati, ineajeitaqueri iroamerpeee, imaajeitaque: oshequi aajeitaqueri ivochoquine. ⁴⁴Ari ipianaja aisati, iquenquetsatacayaajiri. Irosati yapiitaque icantaqueriri incaranqui. ⁴⁵Ipiashitajari aisati iroamere, icantiri:

—¿Maajimpimpa aisati? Meeca moncarataca. Noponeaca inquitequi, natiritapaaque; meeca icantacoventaquena, meeca irayena caari cameetsajesatatsi. ⁴⁶Pintinaajeitanaje, tsame ajataje. Jeri, yocatapaaque aacantenaneri.

Yayeetaqueri Jesoshi.

(Mr. 14.43-52; Ir. 22.47-53; Joa 18.2-11)

⁴⁷Irosati ipocashitantapaacari Jorashi, yora yoamevetari Jesoshi: ijivajeitapaaqueri oshequi atiri. Yamayetaque ivesamentopee, ivasamentopee, maaroni.

Ipocajeitapaaque aisati yora jivatacaajei-tiriri saserotepee aisati itsipapee savicacantajeitsiri.⁴⁸ Icamantanirotita-cari Jorashi incaranqui:

—Nonintavorotapaaqueri Jesoshi, piojeitanteeariri. Impoijiquea pajiricapeeri avirori.

⁴⁹Irosati ijatashitantacari, icantapaaqueri:

—¿Ainirompi, oametanari?

Inintavoronirotapaaqueri.⁵⁰ Icantava-queri Jesoshi:

—Noshaninca, ¿paita pipocashitiri aca?

Irosati ipocashijeitantaapacariri maaroni, yaajeitapaaqueri, tapi.⁵¹ Irosati yaantacaro itsipa iroamere ivesamento iriori, ipesaveta-cari inampire ivincatsarite saserote. Ipeshita-queri iyempita.⁵² Icantiri Jesoshi:

—Poajero pivesamento, ipiatimpicari.

Tempa impesheetajeri iriori pesantapini-tatsiri.⁵³ Tempa piote noncoaquericame, noncanterime Apa, impoiji intianquena-rime oshequi catsini inampire inquisaco-ventename.⁵⁴ Iro cantaincha inquisaco-ventenaricame, iroavisacotenaricame, eiro nomoncaratirome ocamantacotitaniri Sanquenarentsi.

⁵⁵Impoiji icantajeitiri yora pocashijeita-queriri:

—¿Paita pamashitananari pivesamento aisati pivasamento? ¿Narompa coshıntıti piquisananari? Pineapinitana maaroni quitaiteriqui anta ivancoqui Tasorentsi, noametanti; ja, payenaniqueti.⁵⁶ Iro cantaincha irootaque paajeitantaquenari omontaratantajeari oquenquetsatacotita-naniri Sanquenarentsi.

Irosati narori notsaroantanaca, noshia-naca. Aisati iquempejeitaca maaroni iroamerepee.

**Yayeetanaqueri Jesoshi anta
inauenta oametavacainchari.**

(Mr. 14.53-65; Ir. 22.54-71; Joa 18.12-24)

⁵⁷Ari yayeetanaqueri Jesoshi anta ivancoqui Caijashi: yora ivincatsarite

saserotepee. Yapatojeitanta yora oametantirori Sanquenarentsi aisati yora savicacantajeitsiri.⁵⁸ Ari impoitanaji Petero anta otsapiqui iipatsite saserote. Iqueapaaquero otantacota quipatsi, isaviquimotapaaqueri yora soraropee. Yamenapaaque iringanteari jaocarica incanteeteriri Jesoshi.⁵⁹ Ari yora oameta-vacaajeitainchari icoayetanaque tseeyacotearineri Jesoshi, ontimanteari iroacantanteeariri.⁶⁰ Ari itimi oshequi tseeyacovetacariri, iro cantaincha tecatsi incanteri iroacanteri. Impoiji ipoqui apite pashini tseeyacotapaariri,⁶¹ icantapaaque iriori:

—Icanti yoca: “Nontireajero ivanco Tasorentsi: oncarate mava quitaiteri novetsicajero aisati”.

⁶²Ari icatianaca ivincatsarite saserote, icantiri Jesoshi:

—¿Tecatsimpa pincanteri avirori?

¿Paita ojita oca icantacojeitaquemperi?

⁶³Imajeretaque Jesoshi, te iranqueriji. Yapiitajiri aisati:

—Tempa ineaquempi Tasorentsi, yora aneasanotatsiri. Pincamantasanotena: ¿avirompa Quirishito, Itomi Tasorentsi?

⁶⁴Yacanaqueri:

—Narotaque. Noponeaca inquitequi, natiritatapaque. Coajica pineajena nosavique iracosanoriqui Tasorentsisa-nori, aisati pineavajena nonquenapajae mencoriqui, nompiae aca quipatsiqui.

⁶⁵Irosati iquasantanacari saserote, irosati itsereantanacaro iitsaare. Icanti:

—Pinquemaniroteriqueti: ijitasorentsi-tacateemi. ¿Paitampa acoantacari intime pashini camantacoterineri?⁶⁶ ¿Paita piquenqueshirejeitiri avirorije? ¿Jaoca ancanteriri?

Yacajeitanaqueri:

—Cameetsa incame.

⁶⁷Impoiji iquitiojavorojeitaqueri ivoroqui. Impoiji icapojanajeitaqueri, aisati ipasanajeitaqueri, tac, tac, tac;⁶⁸ icantapaaque:

—Quirishito, pincamantena: *¿janica capojanataquempi?*

Icanti Petero: “**Te nioteriji Jesoshi**”.
(*Mr. 14.66-72; Ir. 22.55-62; Joa 18.15-27*)

⁶⁹Ainiroquera isaviqui Petero anta saiteriqui. Oneaqueri nampirentsi, ocantiri:

—Aviro oijatiriri Jesoshi, yora carireasati.

⁷⁰Icanti Petero:

—Te nioteji paitarica picantaquenari.

⁷¹Ari ijavetanaca anta iqueavetapaaca, optimi pashini nampirentsi, oneavaqueri iroori, ocanti:

—Jeri yoca oijatiriri Jesoshi, yora nasaretesati.

⁷²Icantanaqueri:

—Te nioteriji yoca picantaquenari.

Terica ontampaticate oca nocantaquempiri, nocoaque iroasanquetenata Tasorentsi.

⁷³Impoiji capichaji, jeri pashini cantapairiri:

—Queario, avirotaque oijatiriri: noquemaquero pineanataque, avirotaque carireasati.

⁷⁴Yacanaqueri:

—Teve, te nioteriji yora shirampari picantaqueri. Ioti Tasorentsi queario nocantaquempi. Terica ontampaticate nocantaquempi, nocoaque iroasanquetenata Tasorentsi.

Irosati ineantanaca teapa. ⁷⁵Ari iquenque-shiretanaquero icantaqueriri Jesoshi: “Eirotitarica ineaji teapa, oncarate mava pincante: ‘Te nioteriji Jesoshi’”. Ari isoquijanaji, iraapaaca jii, jii.

Yayeetanaqueri Jesoshi anta Piratoqui.
(*Mr. 15.1; Ir. 22.66-23.1; Joa 18.28-32*)

27 ¹Ari iroaquera oquitaitetamani, yoametavacaajeitaca yora jivatacaajeitiriri saserotepee aisati savicacaajeitantsiri:

—*¿Jaoca ancanteriri meeca Jesoshi avacantanteariri?*

²Ari yoisoyeetaqueri, yayeetanaqueri anta itiminta pincatsari, yora pajitachari Pirato.

Ishiticaja irisati Jorashi.
(*Yan. 1.18-19*)

³Yora Jorashi, yora aacantiriri Jesoshi, iotaque yoacantashitacari Jesoshi. Oshequi iquenqueshiretanaca, irosati yoipiantajantanari yora 30 imentaqui: yora peratatatsiri. Icantapaaqueri yora jivatacaajeitiriri saserote aisati yora savicacaajeitantsiri:

⁴—Jeriniro piirequite. Te oncameetsateji oca nantaqueri. Tecatsi irante Jesoshi, naacantashitacari.

Yacajeitanaqueri:

—Jm, aviroyea.

⁵Ari ipishoncanajiniri quirequi anta ivancoqui Tasorentsi, iquenaitaji, ipianaja. Impoiji ijatanaque, ishiticaja irisati. ⁶Yora jivatacaajeitiriri saserote yaajeitajiri quirequi, icantajeiti:

—Te oncameetsateji aca anquempoyejeri yoca quirequica. Tempa iriotaque apinataqueriri iroacantanteariri.

⁷Ari yoametavacaajeitaca:

—*¿Jaoca ancantajeriri quirequica?*

Icanti:

—Tsame amamantero quipatsi antijanteariri camatsiri caari aneapinijeiti.

Iro yamanantaqueri quipatsi ora yaapiniyeetiri quipatsi yovetsiqueetiri coviti. ⁸Meeca ipajyeetaqueri oca quipatsi: “Ivinaro Jesoshi yoacantantacariri”. ⁹Imoncarataquero isanquenatitacniri Jeremiashi: “Irayeri 30 imentaqui quirequi, yovetsicanteetariri perata. Iriotaque ivinaro iraacantanteariri Quirishito. Eiro ishequititsi quirequi impinatantaveteariri. ¹⁰Iriotaque iramanantantearori quipatsi anta yaapiniyeetiri quipatsi yovetsiqueetiri coviti.

Iriotaque Avincatsarite canterineri iramanantero quipatsi". Irootaque isanquenataqueniri Jeremiashini.

Ari icantacoventiri Pirato Jesoshi.
(Mr. 15.2-15; Jr. 23.2-25; Joa 18.28-19.16)

¹¹Ari icatiimotacari Jesoshi yora pincatsari pajitachari Pirato. Isampitiri iriori:

—¿Avirompa ivincatsarite joriopee?
Yacanaqueri:
—Je, narotaque.

¹²Impoiji iquishimanataqueri yora jivatacaajeitiriri saserotepee aisati yora savicacantantatsiri, iro cantaincha tecatsi incante iriori, imajeretashitaca. ¹³Isampitiri Pirato:

—¿Tempa pinquemerri icantacotaquem-piri? ¿Paita caari pineanatanta avirori?

¹⁴Tecatsi incante, te impiateariji. Ari yoanaqueri cavaco pincatsari, oshequi iquenqueshireanaca.

¹⁵Ari maaroni osarintsi, ariorica omoncarataca Yavisantaniri, yora Pirato isampitapinjeitaqueri savicajeitatsiri: "Timatsi oshequi pishaninca anta caravosoqui. ¿Picoaquempa noisoquijajempiri aparoni?" Aitaque icantapinita maaroni quitateri Yavisantaniri, yoimiso-quijapinitiri aparoni, janicarica icoiri joriopee. ¹⁶Itimi caravosoqui meeca shirampari iquemacojeitaqueri joriopee, ipajita Varavashi: oshequi yoanti irinti. ¹⁷Ari meeca yapatojeitaca oshequi atiri, irootaque icantajeitantzacariri:

—Piojeiti nametaca noimisoquijimpipi aparoni timatsiri caravosoqui. ¿Janicampa picoajeitiri noimisoquijaje-tempiri meeca? ¿Iriompa Varavashi? Terica pincoyeriji Varavashi, cirioricampa picoajeitaque noimpacajem-piri Jesoshica, yoca picantiri Quirishito?

¹⁸Iotaque Pirato oshequi iquisashitacari Jesoshi yora jivatacantantatsiri, te incoacaajeiteriji asháninapee inquemi-

santajeiteri. Ijivetaca Pirato incantajeite-rime ashaninca: "Nocoaque poimpacaje-nari Jesoshi". ¹⁹Aisati incaranqui otianquiniri ijina camantiriri: "Ocan- pijina: 'Eiro poacantiritsi Jesoshi, icamee-tsatasanotaque. Nomishitacari incaran-qui, oshequi noquenqueshiretacotaqueri' ". Irootaque caari icoantaveta iroacante-rime. ²⁰Iro cantaincha yora jivatacaajeiti-riri asháninapee icantajeitiri:

—Pincantajeiteri: "Poimisoquijajeri Varavashi, irinti Jesoshi, pimpajacotacan-teri".

Icantajeitaqueri:

—Aviroyeampa, paitarica picoaqueri avirori.

²¹Ari yapiitajiri Pirato, isampijeitiri:

—Jeri icarataque apite: ¿janicampa picoaqueri noimpacajempiri?

Icantajeitaqueri:

—Varavashi.

²²Isampijeitiri:

—¿Jaoca noncanteriri Jesoshica: yoca ipajiyetiri Quirishito?

Yacajeitanqueri:

—Pimpajacotacanteri.

²³Isampijeivetari:

—¿Paitampa yantaqueri nompajacota-cantanteariri?

Aiquero icajemajeitanaitiiri:

—Pimpajacotacanteri. Pimpajacotacan-teri.

²⁴Ari iotanaque yatsipetashitaca isampina-jeivetacari, aisati oshequi iquisajeitanaca atiripee. Icantiri inampire:

—Pamacotenaroa nija.

Yamacotaqueneri, impoiji iquivacotaca, iriotanteari atiri te incoaveteoji irocan-teri Jesoshi. Ineajeitaqueri atiripee, aisati icantajeitiri:

—Te naro coatsine noacanteri. Picoajei-taquerica avinti, aviroyeampa.

²⁵Yacajeitanqueri:

—Nocoasanojeitaque, tempa narojeita-que cantaquempi. Inquishenata nainti

Tasorentsi, aisati ocameetsati inquisheri notomipee narori.

²⁶Ari yoisoquijajiri Pirato Varavashi. Icantiri soraro:

—Paanajeri Jesoshica, pimpasateri, impoiji pimpajacoteri.

**Yora soraropee
ishirontimentajeitacari Jesoshi.**

(*Mr. 15.16-20; Joa 19.1-3*)

²⁷Ari yaanaqueri soraro Jesoshi anta ivancoqui pincatsari, icajemajeitaqueri itsipapee soraro. ²⁸Ari isapocaqueri Jesoshi iitsaare, impoiji iquitsaatiri otsipa quitsaarentsi, quiraanirori. ²⁹Yovetsicaqueneri iramatseere totsequi, yamatseetaqueri. Aisati ipaqueri chacopi, icantiri:

—Pajiriquero opirico chacopi.

Yora pincatsari peerani iquitsaatapinitaro quiraanirori, yamatseetaro iramatseere pinatasanotachari, aisati yajiricapinitiro iotiquiro cameetsari. Ari itiyeroashinirojeitacari soraropee Jesoshi, ipincatsatamempeacari, ishirontimentajeitari, icantajeitiri:

—Aviro, novincatsarite. ¿Pipincatsariventajeitrimpa maaroni joriopee? Iji, iji, iji, iji.

³⁰Iquitiojajeitaqueri, impoiji yaapitsatajiri chacopi, ipasatantajari iitoqui. ³¹Oshequi yapiinataqueri ishirontimentanatacari, iji, iji, iji. Impoiji isapocajiri quitioncanirori, iquitsaatajiri aisati iitsaaresanori. Yaajeitanaqueri impajacoteri.

Ipajacojeitaqueri Jesoshi coroshiqui.

(*Mr. 15.21-32; Ir. 23.26-43; Joa 19.17-27*)

³²Ari yaajeitanaqueri Jesoshi impajacotanteariri. Anta avotsiqui itonquiotavacari shirenesati, ipajita Shimo. Iperanatavacari soraro:

—Jero oca coroshica, paanaqueneri yoca.

Ari yaanaqueneri. ³³Yareejeitapaaca Coricotaqui. Iro apajitiro aneanequi:

iitontsini. ³⁴Ari ipeevetacari Jesoshi ovaja, oconoajata quepishijatatsiri. Ineantavetavacaro, te incoyeji irirero. ³⁵Ari ipajacojeitaqueri soraropee coroshiqui, impoiji ineatsajeitaca iriojeitanteari janica aajeroneri iitsaare. ³⁷Isanquenajeitaqueropaperiqui: “Jerica Jesoshi. Iriotaque ivincatsarite joriopee”. Impoiji ipajacotaqueror coroshiqui, ivatitotacaro Jesoshi.

³⁶Impoiji isavicatejaque, yamenajeitaqueri.

³⁸Impoiji aisati ipajacojeitaqueri apite coshinti: aparo yoatiacotaqueri iracosanoriqui Jesoshi, irio pashini yoatiacotaqueri irampatequi. ³⁹Ari ainiro avisayetasatsiri avotsiqui, ishirontimentajeitacari Jesoshi. Itecainajeitaca, ⁴⁰ishirontajeitaca, iji, iji, iji. Icantajeitiri:

—Pintireerome ivanco Tasorentsi, aisati oncarate mava quitaiteri povetsicajerome aisati. Jentsite, poavisacotajea avisati. Avirorica itomi Tasorentsi, jentsite paniireashitajea.

⁴¹Aisati iquempejeitaca yora jivatacaajeitiriri saserotepee, yora oametantirori Sanquenarentsi, jeri yora savicancatatsiri: ishirontimentajeitacari. Icantajeiti:

⁴²—Ijitasihiniroveitani yoavisacojeitirini ashanincapée, iro cantaincha meeca te irimatajeoji iriori iroavisacotajea irisati. Jentsite, amenavaqueritsita: iriorica avincatsarite, iraniireapaaaje. Ariorica iraniireapaaje, ari ampincatsatanaqueri arori. Iji, iji, iji. ⁴³Ari ipincatsarivetari Tasorentsi iriori: ariorica iroavisacoteri irinti. Aamaya ari incoaque iroavisacoteri itomi, tempa icanti meeca yoca: “Narotaque Itomi Tasorentsi”. Iji, iji, iji.

⁴⁴Aisati iquempejeitaca yora coshitattatsiri ipajacoyeetaqueri: ishirontajeitaca iriori.

Icamaque Jesoshi.

(*Mr. 15.33-37; Ir. 23.44-46; Joa 19.28-30*)

⁴⁵Ari icarataque catsirincaiteri tampatica, omapocanaca otsiteniiteana-

que, otsimoirotanaque: irosati ishaaviniji.

⁴⁶Ari ishaaviniji antearojenca icanti

Jesoshi:

—Eri, Eri, arama savacatani.

Iro acantiri aneanequi: “Apa Tasorentsi, ¿paita pojocantanari?” ⁴⁷Iquemantacariri yora savicajeitauntsiri, icanti:

—Pinquemerite, icajemaqueri Iriashi.

⁴⁸Ari ishianaca aparoni, yovincaquero pijoncashincanari ovajaqui quepishijari. Isataaquiero inchaquiiqui, ijicotacovetacanari Jesoshi, irantsimicantearorime, ⁴⁹iro cantaincha icantiri itsipapee:

—Eiro pantiritsi: tsame amenavaquerita, impocashiteririca Iriashi iroavisacateri. Iji, iji, iji.

⁵⁰Ari icajemanaji aisati Jesoshi, impoiji icamanaque, torein.

**Iquenquetsatacotiri yora
neajeitaqueriri Jesoshi icamaque.**

(Mr. 15.38-41; Ir. 23.45-49)

⁵¹Icamantacari Jesoshi, otseraneaque oticaashiro ivanco Tasorentsi: intanaca jenoqui otseraneaque, tsererere, irosati ishaaviji. Aisati onicanaca quipatsi, nica, nica, nica; ocotareaneaque antearo mapipee. ⁵²Yashitareacotanaca tijaari, itinajeitanaja oshequi quemisantatsiri, tinare. ⁵³Impoiji, itinaantajari Jesoshi, ijajeitaque yora itsipapee tinaajeitajanchari Jerosarequi. Ineajeitaqueri oshequi atiri.

⁵⁴Ari yora capitano aisati yora soraropee ineajeitaqueri onicanaca quipatsi, aisati ineajeitaqueri yora tinaajeitajanchari, ineakuero otsitenita-naque, maaroni. Impoiji yoajeitaque cavaco, aisati icantajeiti:

—Queariotaque: iriotaque Itomi Tasorentsi.

⁵⁵Otimi anta njanteaji oshequi tsinanapee, amenajeitaqueri Jesoshi. Iroojetaque oijaveitariniri, oponeajeitaca Carirea-qui. Quiso oapinitirini, opapinitirini

yoari. ⁵⁶Ocarajeitaquero Maria maquitarasato; jero otsipa Maria: ora iriniro Santiaco aisati Jose; jero aisati iriniro itsipa Santiaco aisati Joa. Ari oneajeitaqueri Jesoshi, icamanaque.

Yoiminqueetaqueri Jesoshini omoroqui.

(Mr. 15.42-47; Ir. 23.50-56; Joa 19.38-42)

⁵⁷Ari ishavijiiteanaque. Itimi aparoni iroamereni Jesoshi, ipajita Jose. Iponeaca iriori Arimateaqui; ashitaarantincari ini.

⁵⁸Ijatashitaqueri Pirato, icantapaquaqueri:
—Camaque Jesoshi. Nocoaque pishinetenari naanajeri noiminquiajeri omoroqui: onta yovetsiqueetiniriri camatsiri.

Ari icantiri iriori soraro:

—Pishineteri yoca iraanajeri.

⁵⁹Ari ijataque, yaanaqueri, yampinaica-cotaqueri tocoyaqui caari pitsitsatsi.

⁶⁰Impoiji yoakeri omoroqui mapi iroakeri imoqueetiro. Itivironquiro antearo mapi omoroqui, yashitacotanta-cariri. Impoiji ijatanaji Jose. ⁶¹Ainiro osavicaque anta Maria maquitarasato aisati otsipa Maria. Oneacotaqueri yoiminqueaqueri.

**Ijati soraro ishentajeivetaro omoro
inauenta Jesoshi.**

⁶²Iro quitaiteri ipajacotantariri Jesoshi opajita Yavisantanir. Oquitaitetamana-que ijatashijeitaqueri Pirato yora jivatacaajeitiriri saserote aisati yora variseoppe. ⁶³Icantajeitapaquaqueri:

—Novincatsarite, noquemajeitaqueri icantiqueru chapinqui yora amatavitanta-tsiri: “Noncamaque, impoiji oncarataque quitaiteri mava, ari nontinaanaje”.

⁶⁴Nocoaque pintianque soraro meeca irishentasanotero omoro anta yoiminqueaquerinta. Iramenasanotero irosati omoncaratanteari mava quitaiteri. Ijatashitircari iroamereni, yaanajircari. Impoiji icantajeitircari ashanincappee:

“Tinaanaja inaji Jesoshi”. Peerani oshequi yamatavitanini iriori, iro cantaincha ariorica iraanajeri, yamatavitasanojeitiricari iroamereni ashanincaphee, icanticari: “Tinaanaja inaji Jesoshi”.

⁶⁵Icantiri Pirato:

—Jeri yoca soraropee, pijajeite pamenašanojeitero.

⁶⁶Irosati ijajeitantanaca, yashitacotasa-notaqueri, impoiji ishentajeitiro soraro.

Itinaamanaja Jesoshi.

(Mr. 16.1-8; Ir. 24.1-12; Joa 20.1-18)

28 ¹Ari avisanaque quitaiterimaoreajeitantari, meeca otomin-cotapaaque. Tsiteniquera ojatamanaque Maria maquitarasato, aisati otsipataro omariaroronte. Ojataque amenamanajero omoro yoyeetaquerinta Jesoshini.
²Omapocanaca antearo onicanaca quipatsi aisati. Jeri aisati itimi inampire Avincatsarite: iponeanaca inquitequi, ipoaque itivironcapaquiero mapi, irootaque isavictapaacari. ³Oshequi ishipaquireapaaque, iquempetacaro iporequi. Oquitamarotasanotaque iitsaare, oquempetacaro sharaca.
⁴Oshequi catsini itsaroacaajeitavacari soraropee, te irimatajeaji irishevatajea: iquempvetanaca incamaquerica. ⁵Ari icantiro tsinane:

—Eiro pitsaroitsi avinti. Niotaque irio pipocashiveta Jesoshi. ⁶Te aneajeriji meeca, tinaanaja ini. Tempa icamantita-quempini. Caatanaque, pamenero aca yoyevetacarica. ⁷Impoiji pishintsitanaje pijatanaje pincamantajeitapeeri iroamere: “Tinaanaja Avincatsarite, irijivajeitana-quempi Carireaqui. Aitaque pineajeita-paajeriri anta”. Irootaque nocamanta-quempiri.

⁸Ari oasanotanaque cavaco, aisati oshequi oquimoshiretanaque. Ojatanaque, oshiashitanacari iroamere, oncamanteri. ⁹Nianqui imapocaquiero Jesoshi,

ivetsatacaro. Ojatashitaqueri, otiyeroashitacari, ajiricapairi iitiqui. Oshequi opincatsatapaacari. ¹⁰Impoiji icantaqueri:

—Eiro pitsaroitsi. Pijajeite meeca pincamantajeiteri noamereni irijajeiteta anta Carireaqui. Aitaque irineajeitapaajenari anta.

Ijitashijeivetaca joripee yaanajiri iroamereni Jesoshi.

¹¹Ari ojatashitaqueri iroamereni tsinane. Iranti yora soraro shentavetarori omoro ijataarantji nampitsiqui, icamantajeitapairi yora jivatacaajeitirir saserotepee. ¹²Yapatojeitiri iriori yora savicacantantatsiri. Yoametavacaajeitaca:

—¿Jaoca ancanterori meeca amanac-tanteariri?

Ari icajemajeitaqueri soraro, icantajeitaqueri:

—Jeri yoca quirequica, nocoi nompinatempa. ¹³Pincantashijeiteari atiripee: “Nomaajeitaque nianquiteni. Ipocaque iroamereni Jesoshi, yaanajiri”. ¹⁴Ariorica inquemacovetaquempi yora pincatsari, pincantaque: “Nomaaque”, noncamanteri narori: “Eiro piquishiritsi soraropee. Te irimayeki. Narotaque cantaqueriri: ‘Pintseeya’”. ¹⁵Ari yaajeitaqueri quirequi, icamantajeitaqueri atiri: “Nomaajeitaque, impoiji yaajeitajiri iroamereni Jesoshi”. Ainirotatsi meeca icantajeiti joripee meeca.

Ineajeitajiri Jesoshi anta Carireaqui.

(Mr. 16.14-18; Ir. 24.36-49; Joa 20.19-23)

¹⁶Ari nojatanaque Carireaqui, notsipajitacari itsipapee iroamere. Aparoni peaincha, yora Jorashi. Nojajeitanaque toncaariqui icantaquenari chapinqui Jesoshi. ¹⁷Noneajeitapaaajiri, nopincatsajitapaaajiri. Iro cantaincha aparopee tseencavetapaincha. ¹⁸Ari ipocashijeitana Jesoshi, icantaquena:

—Icantitaquenani Apa peerani:
“Pimpincatsaritasanote meeca aca
inquitequi aisati pimpincatsariventasano-
jeiteri maaroni quipatsisati”.¹⁹Irootaque
nocantantimpiri: pijajeite maaroni
nampitsipeequi, pinquemisantacaajeiteri
maaroni atiripee, pintsoeteaqueri maaroni.
Ariorica inquemisantajeitaque, pivaotisa-
jeiteri: irootaque icoacaaqueriri Apa,

aisati nocoacaajeitaqueriri narori, aisati
ocoacaajeitaqueriri Ishire Tasorents.

²⁰Pincamantajeiteri atiri irimajeitero
maaroni nocamantaquempi. Quiso
noajeitanaqueempi, noncanteani, irosati
nompocantajeari nompincatsaritantapaa-
jeari.

Ari ocarati. Narotaque sanquenatirori:
Mateo

YORA MARICOSHI ISANQUENATACOTAQUERI JESOQUIRISHITO, JAOC A ICANTA IRIORI YOAVISACOTANTI

Yantayetiri Joa vaotisatantatsiri.
(Mt. 3.1-12; Ir. 3.1-18; Joa 1.19-28)

1 ¹Meeca noncamantempiro cameetsatsiri. Noncamantempi yoavisacotanti Jesoquirishito. Tempa iringotaque itomi Tasorents. ²Peerani isanquenatinim camantantatsiniri pajiveitachaniri Isayashi. Jero oca isanquenatiniri: “Icantiri Tasorents itomi: ‘Pinquemena, notiom. Nontianqueri quenquetsatacempineri, irijivatanaquempi. Incantajeiteri atiri: Paamaajeiteari Quirishito, pincameetsashirejeitanaque. ³Inquenquetatsatacacjeiteri ishaninca caaraiteriqui. Incantajeiteri: Pincameetsashirejeitanaque oncanteata ariorica impoque Avincatsarite, irineacameetsajeitanta-peempiri’”. ⁴Ari moncaratapaaca icantiniri peerani Isayashini. Yareeta-paaca caaraiteriqui Joa, yora vaotisatantsiri. Icantajeitaqueri ishaninca:

—Pinquenqueshireempa, eiro piquem-petajatsi peerani. Ariorica pojocasanojetajero pantajeiveitaniri, ari novaotisajeitaquempi, impoiji iriojeitanaque atiri icavintsaajeitaquempi Tasorents, eiro iquenqueshireacotajimprotsi pantaveita-niri.

⁵Ari ijatashijeitaqueri maaroni joreasati, aisati maaroni jerosaresati, icamantajeitapairi:

—Ainiro nantayetiri caari cameetsatsi. Nocoaque navisacotaje.

Ari ivaotisajeitavaqueri Joa Joriraniqui.

⁶Irio iquitsaatari tijachari iviti cameyo. Ishiticatsaqitari meshinantsitsa. Yoapintari quentori aisati ija pitsi. ⁷Ari icaman-tapinitiri ishaninca:

—Coraque impoitapeenaneri, yanaacota-quena, ipincatsaritasanoti irinti. Nopincatsa-tasanotaqueri catsini, narori notseencaja narosati. ⁸Novaotisajeitaquempi nijaqui, iro cantaincha intianquempiro irinti Ishire, ontsipajeitantempi.

Ivaotisatapaaca Jesoshi.
(Mt. 3.13-17; Ir. 3.21-22)

⁹Ari pashini quitaiteri yareeta-paaca Jesoshi. Iponeaca Nasaretequi, timatsiri Carireaqui. Ivaotisatavaqueri Joa Joriraniqui, ¹⁰impoiji yaatanaji. Yamenanaque jenoqui, irosati ineantavacaro Ishire Tasorents. Omapocapaaca anireashita-paqueri, oshiaqueri sampaquiti.

¹¹Iquematiiri Tasorents icantiri:
—Avirotaque notomi nonintasanotiri. Oshequi noquimoshireventasanotaquempi.

Ijatanaji Jesoshi caaraiteriqui.
(Mt. 4.1-11; Ir. 4.1-13)

¹²Impoiji aanaqueri Ishire Tasorents caaraiteriqui. ¹³Itimaiti anta ocarataque 40 quitaiteri. Yora Satanashi ineantaveta-

cari, irantacayerime caari cameetsatatsi. Aisati tecatsi ishaninca intsipateari, irint timatsi covencayetatsiri, iro cantaincha intacojeitacari inampirepee Tasorentsi.

Iquenquetsataque Jesoshi.

(Mt. 4.12-17; Ir. 4.13-15)

¹⁴Ari pashini quitaiteri yashitacoyeetaqueri Joa caravosoqui. Impoiji ijatanaji Jesoshi Carireaqui. Icamantajeitaqueri ishaninca jaoca icanta Tasorentsi yoaviscotanti. ¹⁵Icantajeitaqueri:

—Irotaintsi impincatsariventajetajee Tasorentsi. Pinquenqueshireempa, eiro piquempetajatsi peerani: te pincameetsaveiteani. Pinquemisantajeite pavisacotantajeari.

Icoyeaqueri Jesoshi iroamerepee.

(Mt. 4.18-22; Ir. 5.1-11)

¹⁶Ari pashini quitaiteri ishiteatanacaro Jesoshi incajare timatsiri Carireaqui. Ineapaaqueri Shimo, aisati irirenti, Antirishi. Iquitsati incajarequi: aitaque icantapinita, iquitsatapinitiri shima.

¹⁷Icantapaaqueri Jesoshi:

—Pojatanaquena, nocoaque pinquemisantacaapiniteri atiri.

¹⁸Irosati yojocantanacaro iitsarite, yojatanaqueri. ¹⁹Capichaji yovaavetanaca aisati, ineapaaqueri Santiaco, Joa, apite: iriotaque itomipee Severeo. Isavicajeiti ivitoqui, ishiticayetiro iitsarite. ²⁰Icajempaaqueri, yojajeitanaqueri. Yojocanaqueri iriri, isavicaque irinti pitotsiqui, icarajeitaqueri amitacojeitiriri.

Iqueapaaque Jesoshi

yapatojeitantarioriopee.

(Ir. 4.31-37)

²¹Impoiji yareetapaaja Jesoshi Caperenaoqui, icarajeitiri iroamerepee. Irootaque saavararo, imaoareajeitantarioriopee, iqueajeitapaaque pancotsiqui yapatojeitantarioriopee. Yoametantapaaque. ²²Yora atiripee, yoajeitanaque cavaco, icantajeiti:

—Pineaqueri, cameetsa yoametantasa-notaque, iotasanolri irinti. Te inquempe-teariji yora oametapinijeiveteerori sanquenarentsi: te iriotaquenoteji irinti.

²³Aisati itimi anta pancotsiqui aparoni shirampari neiriri camaari. ²⁴Icajema-tavaqueri Jesoshi, icantavaqueri:

—Niotaquempi: aviro nasaretesati, aisati aviro itomi cameetsari Tasorentsi. ¿Paita pipocashitananari? ¿Arimpa pintsoncajeitapaaquena?

²⁵Icantiri Jesoshi camaari:

—Pimajereiteteve. Pinijantareanajeri noshaninca.

²⁶Ari yampsitiitacaanacari ashaninca, antearojenca icajemanaque, irosati inijantareantanajari camaari. ²⁷Aisati yoajeitanaque cavaco ishaninca, maaroni. Isampitavacaanaca:

—¿Pineaquerompa imataqueri? Iroaqueri aquemaquero oca yoametaqueeri. Aisati imataqueri camaari, itiancaqueri: itsaroacaitacariteemi.

²⁸Irosati iquenquetsatacotantajetacari maaroni carireasati.

Yoavisacotiro Jesoshi irairo Petero.

(Mt. 8.14-15; Ir. 4.38-39)

²⁹Ari iponeajeitajari pancotsiqui yapatojeitantarioriopee, ijaajeitanaque ivancoqu Shimo, jeri Antirishi. Yojajeitanaqueri Santiaco aisati Joa.

³⁰Icamantiri Jesoshi:

—Ojoquiiitaca irairo Shimo, aaquero catsiirentsi. Jero onta nariainchari.

³¹Ari ijatashitanaqueri, yacatsavacotapaaqueri, yoisavicaque iroyeari. Irosati opeantanaaja ovatsiire, irosati opajejitancacari iroyeari.

**Iro saavararo yoavisacoyetantacariri
Jesoshi mantsiyetatsiri.**

(Mt. 8.16-17; Ir. 4.40-41)

³²Iqueanajai catsirincaiteri, irotanaintsiontsitenjencaiteanaje, yamayetaqueneri Jesoshi maaroni mantsiyetatsiri, aisati

maaroni yatajeaoncayetiri camaari.
³³Maaroni nampitsiquiniri yapatojeita-paaca omoroqui pancotsi. ³⁴Isavicajeita-paaque maaroni mantsiayetatsiri, onashiyetaca imantsiarepee. Yoavisaco-jeitajiri. Aisati icantaqueri camaari:

—Pinijantareajeitanajeri yora patajeaonquiri, aisati pimajerejeite.

Yora camaari, iojeitaqueri Tasorentsi ini Jesoshi, irootaque caari icoanta Jesoshi incamanteri atiri.

Imananaja Jesoshi, ijatanaji.

(Mt. 4.23; Ir. 4.42-44)

³⁵Oquitaitetanaque, tsiteniqueru itinaamanaja Jesoshi. Ijatamanaque anta tecatsi timatsine, iquenquetsatacairy iriri. ³⁶Icoacoayetajiri Shimo aisati itsipajeitari. ³⁷Ineantapaaajariri, icantapaaqueri:

—Icoacoajeitaquempi maaroni ashinanca.

³⁸Ari icantavaqueri iriori:

—Ari inajini. Tsame avaanajea otsipapeequi nampitsi. Aitaque anta nonquenquetsatacajeiteri itsipapee atiri, irootaque nopolcantacari quipatsiquica.

³⁹Iquenaquenayetanaque, itsoteajeita-quero nampitsipee anta Carireaqui. Iquenquetsatacapinitaqueri ishaninca anta yapatotapinijeitanta, yoavisacojeitaqueri maaroni neiriri camaari.

Yoavisacotaqueri Jesoshi patsaatsiri.

(Mt. 8.1-4; Ir. 5.12-16)

⁴⁰Pashini quitaiteri ijatashitaqueri patsaatsiri, icantapaaqueri:

—Tempa aviro pincatsari, pincavintsa-yena. Ainiro pitasorencia: pinintirica poavisacotajena, ari pimataquero.

⁴¹Oshequi icavintsaasanotavaqueri. Ari yacotashitavaqueri, ipamitavaqueri. Icantavaqueri:

—Je, noninti: aitaque pavisacotaje.

⁴²Irosati opeantanaja ivatsaaro, yavisacotanaji. ⁴³Itiancrajiri, icantasano-tiri:

⁴⁴—Noncantempi: eiro picamantayetiri-tsi itsipapee, irinti pijatashiteri saserote. Pinijaapaajeri pavisacotaji. Pimoncar-tero icantiniri Moishishini: poyeneri Tasorentsi pivira iritonteari pishaninca pavisacotaji.

⁴⁵Ari ijatanaque, iro cantaincha icamantacyetaquero, yovaraaquiero. Iotacojeitaqueri Jesoshi, irootaque caari ijatanta nampitsiqui. Itimaiti anta ocaraiteti. Ijatashijeitaqueri atiri poneayetachari otsipapeequi nampitsi.

Yoavisacotaqueri Jesoshi choritatsiri.

(Mt. 9.1-8; Ir. 5.17-26)

2 ¹Pashini quitaiteri ipianaja Jesoshi Caperenaoqui. Iquemacojeitajiri areetaja ivancoqui. ²Yapatojeitaca oshequi atiri, ijaapaaca pancotsiqui. Tecatsi inquenapee pashini inquempeji-tantapeemparori omoro. Iquenquetsatacajeitaqueri Jesoshi. ³Ari icompitacota-paaqueri choritatsiri. Icarati amiriri itsipasati. ⁴Tecatsi inquempejitantapeem-pariri Jesoshi, yojocaajeitavaqueri atiripee. Ari yataitacaanaqueri otataroqui pancotsi. Itatareapaaquiero, itampaticata-quero inauenta Jesoshi. Imataquero omoro, ari yoaniitacotaqueri inareantari-qui. ⁵Iotavaqueri Jesoshi ishirejeitacari, irootaque icantantacariri:

—Noshaninca, ainiro pantayetiri, iro cantaincha eiro noasanquetimentimporsi, aitaque noavisacotajempi.

⁶Ainiro anta isavicaiti oametantirori sanquenarentsi. ⁷Icantashiretaque iriori:

—¿Paita icantashinirotantarori oca? Ijitasorentsinirotacateemi. ¿Jaoca incanteriri iroavisacotanteariri? Tempa apaniro yoavisacotanti irinti Tasorentsi.

⁸Ioshiretashitaca Jesoshi icantashiretaqueri, icantiri:

—¿Paita picantashiretari? ⁹¿Paita pomerentsitasanotachari? ¿Pomerentsi-nimpa nocantiriri yoca choritatsiri: “Eiro

noasanquetimpitsi, irointi noavisacota-jempi"? Te ompomerentsiveteaji: eiro piojeititsi nomaterorica. Irointi pomerentsivetacha noncanteri yoca: "Pincatianaje, paajero pinariantavetari, panitanaje". Tempa onconijatasanotanaque nomaterorica.¹⁰ Aca quipatsiquica nocavintsaaje-tiri caari cameetsatatsi, aisati noavisaco-jeitaqueri. Nocoaque piojeite ainiro notasorenca noavisacotanteariri.

Ari icantaqueri choritatsiri:

¹¹—Nocantimpi, pincatianaje, paanajero pinariantaniri, pijataje pivancoqui.

¹²Irosati icatiantanaja, yaanajiro inariantaniri, isoquijanaji. Ineajeitavajiri ishaninca, yoajeitanaque cavaco.

Icantajeitanaque:

—Tempa icameetsatasanoti Tasorentsi, te aneapinteroji peerani quempetarori oca.

Ari icantavacaaca.

(Mt. 9.9-17; Ir. 5.27-39)

¹³Ipianaja Jesoshi aisati otsapijaqui incajare. Yapatotashijeitapaajni aisati atiri, yoametavajiri.¹⁴Impoiji yovaanaja aisati. Ineapaquaqueri Irevi, yora itomi Arijeo, isavicaiti pancotsiqui yapatotapi-nitiri quirequi: yapatotapinijeitiniri oromasati. Icantappaqueri:

—Tsame, pojatanaquena.

—Ja, tsamequeti.

Ari icatianaca, yojatanaquaqueri.^{15,16} Ari ijajeitanaque ivancoqui Irevi. Yoacaaje-tapaacari oshequi oijajeitiriri Jesoshi, iroamere, apatotapinitiriri quirequi, maaroni. Jeri aisati yoacaacari caari cameetsayetatsi. Yareejitapaaca oametantirori sanquenarentsi, variseo ini. Ineacotapaaqueri Jesoshi yoimojeitacari caari cameetsayetatsi. Isampitapaaqueri iroamere:

—¿Paita itsipajeitantariri yocapee, yoajeita? Te incameetsajeiteji.

¹⁷Ari iquemavaqueri iriori Jesoshi, icantiri:

—Yora caari mantsiatatsine te incoyeji aavinterineri, irintiquea mantsiatatsiri. Te iro nompocantea noncajemerri cameetsatsiri, irintiquea caari cameetsatatsi.

¹⁸Ari itijeita iroamerepee Joa aisati iroamerepee variseo. Yora atiri ipocashi-tiri Jesoshi, icantappaqueri:

—Jeri meeca itijeita iroamerepee Joa, aisati iquempejeita iroamerepee variseo. ¿Paita caari ititanta poamerepee avirori?

¹⁹Ari icantavaqueri Jesoshi:

—Oquempetaca ariorica iraye shiram-pari ijina, incajemajeiteri ishaninca inquimoshireventajeteri. Ariorica irareejitapeempa, ¿arimpa intijeita-peempa iriori? Eiro. Tempa iriveshirei-mentapeempari. Pineaquero, meeca nocarajeitiri noamerepee: ¿paita nontitancanteariri?²⁰Aisati, ariorica irojocajeita-najeri ishaninca aatsiri ijina, impojini-quea intijeitanaquea. Aisati coajica, nojocanajeririca noamerepee, iroashireta-coitanaquena, irosati intijeitantanana-quea.²¹Tempa ajacapinitiro quitsaaren-tsitsara, irootaque oshiricamaontantari. Impoiji, te oncameetsateji impataquee-tero nianqui iroquerari: tequera oshiricamaoteji irointi. Impataqueete-rome, impoiji ariorica inquiveetajerome aisati, oshiricamaotanaqueme iroori iroquerari, antsiviacaquerome maatsa-rantsi. Impoiji ontseraeacaquiero iroaque-rari.²²Ariorica ampeantantajearime pearentsi iroquerajari peesatitatsiri imeshina, tempa ari intapianaqueame, intoncanaqueme. Aitaque intserena-queme, aisati amparajatanaqueame iroquerajari, chararara. Tempa apeantantapinitaro iroquerajari imeshinaqui iroquerari. Pineaquero: iroquerari oca noamejeitimpiri, te oncameetsateji onconoyearo ora yoametapinijeitimpiniri intaroniri.

Icantavacaimentacaro saavarō.
(Mt. 12.1-8; Ir. 6.1-5)

²³Ari pashini saavarō iquenanaque Jesoshi panquirentsiqui, itsipajeitari iroamerepee. Ari nianqui yaviitapairo iroamere oitsoqui tirico, itaquireiro otaqui, yoajeitaro oitsoqui.

²⁴Ari icantiri variseo:
—Paitateemī yaviitantarori oitsoqui, itaquireitancarō quitaiteri amaoreantari. Te oncameetsateji. ¿Paita yantantari?

²⁵Ari yacanaqueri Jesoshi:
—¿Tempa pinquenqueshireeroji sanquenarentsi quenquetsatacotiriri peerani Iravirini? Te ontimēji iroyeari, aaqueri itashe, aisati itsipajeitari.
²⁶Ainiro onaveitani tanta yovetsiqueetiniri Tasorentsi: te irishineyeeteriji iroajeitearo atiri, apaniro yoaro saserote, irinti. Iro cantaincha aavetacari itashe Iravirini. Ijatashitiri Aviatara, yora ivincatsarite saserote, icantiri: “Notashejeaque. Tecatsi noajeiteari”. Ari ipavaqueri tanta: “Jero oca, poyea”. Ari yoacaro, aisati yoacaajeitacari itsipajeitari. Caari inajeiti saserote, iro cantaincha te irininteji Tasorentsi iroashinoncajeiteri.

²⁷Pamene, yovetsiquiniri Tasorentsi atiri quitaiteri imaoareajeitancari. Te iro irovetsicanteanari atiri irineapincatsatearo quitaiteri. ²⁸Narotaque cantacaantaquerori quitaiteri amaoreantajeitari: tempa noponeaca narori inquitequi, natiritapaaque.

Yora Jesoshi yoavisacotiri quisoporoquitatsiri iracoqui.
(Mt. 12.9-14; Ir. 6.6-11)

3 ¹Yora Jesoshi ijatanaji aisati pancotsiqui yapatojeitancari. Aitaque isaviquiri shirampari quisoporoquitatsiri iracoqui. ²Yamenashijeitavaqueri atiri, sorererē: icoaque iriote ariorica iroavisa-

cotajeri saavaroqui. Icoajeitaque incantajeite: “Te oncameetsateji oca yantiri Jesoshi”. ³Yora Jesoshi icantiri quisoporoquitatsiri:

—Pincatiaje, caate aca nianqui.
⁴Impoiji isampijeitaqueri maaroni amenajeitaintsiri:
—¿Cameetsampa aneshinoncateri atiri quitaiteri amaoreajeitancari? ¿Ariompa avashinoncayeri? ¿Ocameetsatimpā avavisacoteri? Tericampa, ¿picoaquempa ayeri?

Iro cantaincha imajerenirojeitanaque. ⁵Iquisanaca Jesoshi, yamenajeitaqueri, aisati iquenqueshireeanaca. Iro iquenqueshireantanacari te incavintaantajeiteji atiri. Icantiri shirampari:

—Pancotaje.
Ari yacotanaji, irosati yavisacotantanaja. ⁶Isoquijajeitaque variseopee, ijatashijeitanaqueri ishaninca Eroreshi. Yoametavacaajeitaca:
—¿Jaocasa ancanterirī Jesoshi, avanteariri?

Yoavisacotanti Jesoshi anta incajarequi.
(Mt. 4.24-25; 12.15-21; Ir. 6.17-19)

⁷Yora Jesoshi aisati iroamerepee ijajeitanaji incajarequi, yojajeitaqueri oshequi cariresati, aisati joresati, ⁸jerosaresati, iromeasati, intatiquererosati Jorirani, maaroni savicajeitatsiri Tiroqui, Shiroqui, maaroni. Iquemacojeitaqueri itasoncanti, irootaque ijatashijeitancariri oshequi atiri. ⁹Icantiri iroamere:

—Pamaquenarota pitotsi, nontetearo: ishenacajeitapaanacari ashanincaepe.

¹⁰Ari iquenquetsatacaaajeitaqueri, impoiji yaniireapaaji aisati quipatsiqui. Oshequi yoavisacojeitavaqueri. Yora mantsiayetatsiri iteencareayetaqueri ishanincaepe, impamitantapeempariri Jesoshi. ¹¹Yora atiri yatajeaonquiri camaari ipincatsajeitaqueri. Antearojenca ineanatacaaaqueri icantajeitaqueri:

—Jesoshi, avirotaque itomi Tasorentsi.

¹²Icantasanotiri Jesoshi:

—¿Paita picantantanari? Pimajerete,
eiro picamantacotanatsi.

Icoyeaqueri Jesoshi iroamerepee.

(Mt. 5.1; 10.1-4; Ir. 6.12-16)

¹³Ari impoiji itoncaanaque toncaariqui. Icajemaqueri yora icoyeaqueri, ari ijatashijeitaqueri. ¹⁴Icoyeasanotaqueri 12 shirampari, intsipatasanojeitanteeariri. Impoiji intiancajeiteri inquenquetsatacaa-jeiteri ishaninca irineane Tasorentsi.

¹⁵Aisati imataacaqueri itasoncantajeita-que irojocanteariri camaari. ¹⁶Ari icoyeaqueri iroamere 12. Icoyeaqueri Shimo, ipajitajiri aisati Petero. ¹⁷Aisati icoyeaqueri Santiaco itomi Severeo. Icoyeaqueri Joa irirenti Santiaco: ipajieetajiri aisati Voaneriji, acantiro aneanequi "Shintsiri". ¹⁸Aisati icoyeaqueri Antirishi, Jeripi, Varitorome, Mateo, Tomashi, Santiaco itomi Arijeo, Tareo, Shimo. Iriotaque Shimo shintsiye-tirori paitaricapee. ¹⁹Aisati icoyeaqueri Jorashi Ishicariote: iriotaque aacanteri-neri coajica Jesoshi.

Ijiyevetari yatajeaonquiri camaari Jesoshi.

(Mt. 12.24-32)

²⁰Impoiji ipianaja Jesoshi pancotsinen-tsiqui. Yapatojeitajiri aisati oshequi atiri. Tecatsi incantea iroyea. ²¹Iquemacota-queri Jesoshi ishanincasanori, ijatashive-tajari iraanajerime ivancosanoriqui. Icantavacaanaca:

—Te irineacoteaji Jesoshi, tsame aanajeri.

²²Ario ipocashitiri aisati jerosaresati, oametantirori sanquenarentsi. Icantacota-shitapaacari:

—Iriotaque Satanashi atajeaonquiriri Jesoshi. Tempa Satanashi iriotaque ivincatsarite camaari: iriotaque amitaco-tiriri itianquiri iamaaririnte, irootaque imatantacariri.

Yacanaqueri iriori Jesoshi.

(Mt. 12.22-32; Ir. 11.14-23; 12.10)

²³Icajemavaqueri Jesoshi, icantava-queri:

—¿Queariompa yatajeaoncaquena camaari? Pamene: ¿jaoca incanteari Satanashi irojocajea irisati? ²⁴Oquempetaca ariorica inquisavacaajeitea savicatsiri nampsitsiqui, irojocavacaajeitea, ¿arimpa irisavicajeitanaje cameetsa? ²⁵Aisati oquempetaca ariorica inquisavacaajeitea savicatsiri pancotsiqui, ¿arimpa inquoava-caajeitaea? ²⁶Aisati iquempetaca, ariorica Satanashi inquierherime iamaaririnte, irojocavacyeame, eirome itimime: aitaque impoyereavacyeame. ²⁷Aisati iquempeta iriori coshitantatsiri: itsaroacaari shintsita-tsiri inqueavancoteri incoshitanteeariri irovaararo. Ariorica impocashiteri, irijivappeeri iraapeeri, iroisotapeeri shintsitsatsiri, impoijiquea incoshiteri paitaricapee yoayetiri ivancoqui. ²⁸Queariotaque oca noncamantasanotempiri: icavintsaajeitajiri Tasorentsi maaroni antirori caari cameetsatsi. Aisati, ariorica incantimajeiveteari, incavintsaajeiteri aisati. ²⁹Iro cantaincha, eiro icavintsaajeitiritsi irinti cantimatiyorori Ishire: incantaitatiyempani intime iriori Sharincaveniqui. Eiro catsini yavisacotajitsi.

³⁰Irootaque icantaqueriri Jesoshi.

Pinequero, icantashinirojeivetaca incaranqui: "Irio camaari amitacotiriri Jesoshi". Tempa irootaque Ishire Tasorentsi amitacotiriri, caari ini camaari.

**Icamantiri Jesoshi janica
ishanincatasanotacari.**

(Mt. 12.46-50; Ir. 8.19-21)

^{31,32}Ari isaviqui Jesoshi pancotsiqui, isaviquimojeitapaaqueri areejiteapaaarir. Impoiji areetapaaca iriniro, otsipajeita-pari irrentipee. Ocatiapaaca saiteriqui, ocantiri oneapaaqueri:

—Pincantenari notomi.

Ari iqueashitanaqueri, icantapaaqueri:
—Areetapaaca piniro, pirentipee, aisati
pitsiropee. Osavicapaaque saiteriqui,
ocoapaaquempi.

³³Ari yacavaqueri:

—¿Jaoca ocantari inatatsiri? ¿Jaoca
icantari iyetatsiri?

³⁴Irosati ijicotantanacari saviquimojei-
taqueriri. Icantanaque:

—Jeroca inatatsiri. Jerica iyetatsiri.

³⁵Janicarica antapinitirori icoacairi
Tasorentsi: iriojeitaque iyetatsiri,
tsiotatsiri, inatatsiri. Noshanincajeitacari
maaroni quemisantajeitanari.

Ishiacantiri panquiveetatsiri.

(Mt. 13.1-23; Ir. 8.4-15)

4 ¹Yoametantaji aisati Jesoshi anta
otsapijaqui incajare. Yapatotimenta-
paajari oshequi atiri catsini. Irosati
itetantaca pitotsiqui, itiancaquero
nianquija capichaji, isavicaque. Icatiashi-
jeitapaacari otsapijaqui maaroni
ashaninca. ²Yoameyetaqueri paitaricapee,
aisati ishiacaaventiniri, icantiri:

³—Meeca noncamantempi. Ijataque
panquiveetatsiri yojocaitiro oitsoqui
tirico. ⁴Yojocaitiro, opariaarantapaaque
avotsiqui. Ipocapaaque contsaro, yoapaa-
caro, itsonquitapaaqueri. ⁵Pashini
pariaptantsi oitsoqui mapiqui. Te ontima-
sanoteji oshequi quipatsi, jentsipaite
oshiocavetanaca. ⁶Ari ijenoquitapaaque
catsirincaiteri, irosati oshimpeshitanta-
naca. Te omparitsatasanoteji, irootaque
ocamantanacari. ⁷Opariaptaaque pashini
oitsoqui quitotseequimashiqui, oquimota-
naque quitotseequi. Irootaque ajaanaque-
rori, caari oitsoquitanta panquirentsi.
⁸Pashini pariaptantsi quipatsiqui
cameetsari. Oquimotanaque, otimayeta-
naque oitsoqui. Aparo oitsoquitainantsi
ocarati oitsoqui 30. Pashini otimanaque
aisati oitsoqui ocarati 60. Iro otsipa
ocarati oitsoqui 100. ⁹Piquemavaquero-

rica oca nocantaquempi, piotavaquero,
pinquenqueshiretavaquero.

¹⁰Impoiji ijajeitanaji atiripee, itimanaji
apaniro Jesoshi, itsipajeitari aparopee
oijatiriri, aisati iroamere caratatsiri 12.
Isampijeitiri:

—¿Jaoca ocantari oca pishiacaaventini-
riri?

¹¹Icantanaqueri:

—Meeca noncamantempi caari
piojeitini: aitaque piojeitero jaoca
icantari Tasorentsi ipincatsariventanti.
Irompa irinti yontapee, eiro nocamanta-
sanotiritsi, irointi noshiacantiniri
oncanteata ¹²iramenavetea, iro cantain-
cha eiro ineasanotitsi, inquemavetea, iro
cantaincha eiro iotasanolitsi. Eiro
iquenqueshireatsi, eiro icavintsaajiritsi
Tasorentsi.

¹³Aisati icantiqueru:

—¿Tempa pinquemavaquero oca
noshiacantimpiri? Ariorica noshiacantem-
piro aisati, ¿jaoca pincanteari piotantea-
rori? ¹⁴Yora jocaiyetirori oitsoqui
ishiaqueri ovaayetirori irineane Tasoren-
tsi. ¹⁵Aparopee jocaiyetapaincha
avotsiqui oshiaqueri quemisantavetaca-
rori irineane Tasorentsi, iro cantaincha
yora Satanashi yojocapitsatajiri
iquenqueshireantavetacari: te inquemi-
santanajeji. ¹⁶Aisati oca jocaitapainchari
mapiqui, oshiaqueri quemavetavacarori
irineane Tasorentsi. Intsipaite iquimoshi-
reventavetavacaro. ¹⁷Ishiaqueru
panquirentsi caari timatsine ovaritsa.
Intsipaite ocamaque. Iquemisantavetaca,
irootaque yoashinoncanteetacariri, aisati
iquisanentanteetacariri. Intsipaite
yojocanajiro iquemisantaveta. ¹⁸Oca
jocaitainchari quitotseequimashiqui
oshiacaaventiri quemavetavacarori
irineane Tasorentsi. ¹⁹Iro cantaincha
iquenqueshiretapinitiro timayetatsiri aca
quipatsiqui, iquimoshireventajeitiro
yashiyetari. Aiquero icoanaitii irashijei-

tearo pitaricapee, irootaque yojocantajarror iquemisantavetari. Ishiaquero caari timatsi oitsoqui. ²⁰Iroquea oca irointi jocaitapainchari quipatsiqui cameetsari, oshiacaventiri quemasanotavaquerori irineane Tasorentsi. Aitaque ishiretasanatacaro, irotaque shiacaaventainchari panqurientsipee timanaantsiri oitsoqui. Aparo oitsoquitanaantsi ocarati oitsoqui 30. Pashini otimanaque aisati oitsoqui ocarati 60. Iro otsipa ocarati oitsoqui 100. Oca oitsoqui oshiaquero amajeitaqueneriri Tasorentsi, aparo iranaacotaqueri itsipapee.

Ishiacantiniri Jesoshi tsiomentotsi.
(Ir. 8.16-18)

²¹Aisati icantaqueri:

—Ancoquerica antsiotea, ¿arimpa avajero tsiomentotsi covitiqui tsompoina? ¿Arimpa amanaquero tsiomentotsi? Tempa acoiro antsiojeitearo maaroni amenajeitanteari. ²²Coajica onconijatanaque maaroni amanavetari, iriojeitanquerero maaroni antajeitaqueri. ²³Otimirica piquemantari, pinquemavaquero oca nocamantaquempi.

²⁴Pashini icantaqueri aisati:

—Pinquenqueshiretero oca piquemqueri. Ariorica capichaji pinquemisantaquero nocamantimpire, ari capichaji piotavaquero. Ariorica pinquemisantasa-notavaquero, ari oshequi piotavaquero, noametasanotaquempiro catsini. ²⁵Yora iotavaquerori noametaqueriri, aiquero noametasanoteri catsini. Yora caari iotavaqueri nocamantavetacariri, eiro iotitsi catsini.

Ishiacantiniri Jesoshi panquitirori oitsoqui.

²⁶Aisati icanti:

—Tempa ipincatsariventajeitaquee Tasorentsi. Ishiaqueri shirampari jatatsiri ipanquitiro oitsoqui quipatsiqui.

²⁷Imaapiniti tsiteniriqui, isaaquitapiniti

quitaiteriqui. Ocontetsoaquitanaque ivanquire, oquimotanaque. Te iriotacoteroji jaoca ocantanacari oshiocantacari.

²⁸Oshioque queipatsiqui: ojivati otsoaqui, impoiji ominca, impoiji opa, impoiji antaiquitanaque oitsoqui.

²⁹Ariorica osampaquitanaque oitsoqui, intotacoyeetero, tempa omoncaratapaaca iraantearori.

Ishiaacaaventiniri moshitasa.
(Mt. 13.31-32; Ir. 13.18-19)

³⁰Aisati icanti Jesoshi:

—¿Jaoca noncantempirori noshiacaventempiro jaoca icanta Tasorentsi ipincatsariventanti? ¿Jaoca ancanterori anquenquetasatacotantearori? ³¹Oshiaquero oitsoqui moshitasa. Irointi oitsoqui, te onquempetearoji pashinipee oitsoquiyetatsiri: quiripequitaque oni catsini. Ariorica ampanquitero, ³²oshiocanaque. Onquimotanaque, anayetanaquero otsipapee panqurientsiyetatsiri. Antearoyetanaque ojempequipee, aitaque iramampeapinitatearo vanquiyetachari.

³³Aitaque icantapinita Jesoshi, ishiacaaventapinitiniri atiri iroametanteairiri irineane Tasorentsi. Ariorica capichaji iquemaquero, ari capichaji yoametaqueri: oshequirica iquemavaquero, ari oshequi yoametaqueri. ³⁴Iotaca ishiacaaventapinitiniriri. Irintiquea iroamere, itsoteajeitaqueneri yoametasanojeitiri.

Yoimajerentaquero Jesoshi tampea.
(Mt. 8.23-27; Ir. 8.22-25)

³⁵Iqueanaji catsirinaiteri. Icantajiri iroamere:

—Tsame amonteanaje intatiquero.

³⁶Itiancanajiri apatotimentajeitariri:

—Tsamajempi pijajeitanaje pivancoppeequei.

Irosati inaque iriori pitotsiqui, isavicaque. Itejeitanaja iroamere, yoimonteajiri. Aisati imonteacotanaja yora apatotimen-

tariri otsipapee pitotsi. ³⁷Omapocavaqueri nianquija antearo tampea catsini. Ora omotoncane otejatapaacaro pitotsi, irovetainch a ojaayeame. ³⁸Imaaque Jesoshi anta opataquiqui, itiinataca.

Yoisaquiraqueri iroamere, icantakeri:

—Oametanari, ¿paita caari pinquenqueshireanta? Irotanaintsi ampiincajeite.

³⁹Itinaanaja, icajemacotaquero tampea, aisati icantiro incajare:

—Pimajerete, pimajerejate.

Opeanaja tampea. Omajerejatasanotanaji incajare. ⁴⁰Icantiri:

—¿Paita pitsaroantari? ¿Paita caari pishirejeitanti Tasorentsi?

⁴¹Oshequi catsini itsaroasanojeitanaque. Icantavacaanaca:

—¿Janicampa yoca, oquemisantantacirri tampea? Aisati incajare, oquemisantakeri.

Yoavisacotiri Jesoshi neiriri camaari.

(Mt. 8.28-34; Jr. 8.26-39)

5 ^{1,2}Yareejeitanaca intatiquero, yamatsecapaaque quipatsiqui: irootaque iipatsite jerasesati. Intspaita itonquitavacari neiriri camaari, iponeanaja anta tijaarimashiqui, ³aitaque isaviquiri. Tecatsi aaveerineri iroimajerenteri. ⁴Yoisotapiniyeevetari iracoqui carenatsa, aisati iitiqui, iro cantaincha ipesayetaquero, peti, peti. Tecatsi anacoterine ishintsiti. ⁵Icantatiani: tsiteniriqui, quitaiteriqui, iquenayeti tijaariqui aisati toncaariqui. Icajemayeti, itoyetaro mapi. ⁶Yoca shirampari ineitavacari arejiquinta Jesoshi, ishiastanacari, itiyeroashitapaacari. ^{7,8}Icantavaqueri Jesoshi camaari:

—Pinijantareanajeri yoca shirampari.

Antearojenca icajemacotapaqueri:

—¿Paita pashereantanari? Aviro Jesoshi, itomi Tasorentsi inquitequiniri, tempa ineajeitaquee. Nocantasanotimpi catsini, eiro poashinoncaanatsi.

⁹Ari isampitiri Jesoshi:

—¿Jaoca pipajitari?

Yacanaqueri:

—Nopajita Oshequianti. Iro nopajitanti, oshiquanti noni catsini. ¹⁰Eiro pitiancanatsi pashiniqui nampitsi.

Aitaque icantasanotapinivetacri catsini.

¹¹Ari anta itimi oshequi chancho, yoajeitaioncaiquiji. ¹²Yora Oshequianti icantiri:

—Ari pintianquenari anta chanchoqui, irineavaquena iriori, quiso noapajjeri.

¹³Ari ishinetaqueri; inijantareanajiri camaari shirampari, yojocanajiri.

Ineavaqueri irinti chancho. Icarajeiti chancho 2,000. Ishiajeitanaca imperitaitequi, ipiincajeitanaque incajarequi, pocn, pocn, pocn; itsitajeitanaque, pomiririri.

¹⁴Itsaroajeitanaque shentajeivetari, ishiajeitanaca, icamantapairi savicajeitatsiri nampitsiqui, aisati oantsipeequi. Otsote-naca neantsi. Ipocajeitanaque atiri irameneri jaocarica icantacari chancho. ¹⁵Ijatashijeitiri Jesoshi, ineajeitapairi yora neaveitariniri camaari. Isavicaji, iquitsaataja, timanaji iquenqueshiretantari. Ari ineajeitapaaqueri, itsaroacaajeitapaacari. ¹⁶Yora neasanotaqueri incaranqui icamantajeitaqueri:

—Pinequeri, yoavisacotajiri Jesoshi yora neaveitariniri camaari. Aisati yoviincacantaqueri chancho.

¹⁷Impoiji icantasanojeitiri:

—Pijataje, eiro pipocajitsi aisati nonampiqui.

¹⁸Ari itetanaja Jesoshi pitotsiqui. Icantasanovetari yora yoavisacotiri:

—Nocoaque noijatanaquempi.

¹⁹Iro cantaincha, icantiri Jesoshi:

—Eiro pojatanatsi, ainti pijataje pinampi-qui, anta pishanincaqui. Pincamantapeeri: “Ineshinoncatajana novincatsarite”.

²⁰Ari ijatanaque neaveitariniri camaari Tecaporishiqui. Icamantajeitapairi maaroni atiri:

—Yoavisacotajana Jesoshi.

Yoajeitavaqueri atiri cavaco.

Yoavisacotiro Jesoshi irajashetatsiri.
(Mt. 9.18-26; Ir. 8.40-56)

²¹Ari imonteanaja Jesoshi intatiquero. Yapatojeitavacari oshequi atiri anta otsapijaqui. ²²Yareetaapaaca shirampari pajitachari Jairo, yora jivatacaaajeitiriri atiri anta pancotsiqui yapatotantari. Ineapaaqueri, itiyeroashitapaacari Jesoshi. ²³Icantasanotapaaqueri:

—Irotaintsi oncame noshinto.

Pimpoque pimpamitapeero avisacotanta-jeari iroori, eiro ocamantatsi.

²⁴Ari yojatanaqueri, aisati yoijajeitanaqueri oshequi catsini apatotimentariri, yovetacajeitanaqueri. ²⁵Ocarajeitaqueri tsinane irajashetatsiri. Ocaratacotaque osarintsite 12 irajashetantacari.

²⁶Oshequi yaavinteenayevetaro, aiquero yoatsiyeetaquerori. Atsipetashitacaro opinaventayevetacaro maaroni ashivevtari. Te avisacotimateji, aiquero ojatatii irajatanaque catsini. ^{27,28}Oquemaque icantacoyeetiriri Jesoshi: “Oshequi yoavisacotanti”. Osatecanacari oijajeiti-riri, oquenapaaque itapiiqui. Oquenque-shiretanaca:

—Ariorica nantiteri iitsaare, aitaque navisacotanaje.

Ari antitaqueri iitsaare, ocaratanaji irajaveitani. ²⁹Oquemavaitia maaririri, avisacotanaji. ³⁰Aisati iriori Jesoshi, iquemashitavaitiaro itasorenca. Ari ipitsocashitanacari oijajeitiriri, icantiri:

—¿Janicampa antitaquenarori noitsaare?

³¹Yacanaqueri ioramere:

—Tempa pineeriji yoshequitaque oijajeitimpi. Yovetacayetaquempi. Aiquero picanti: “¿Janicampa antitaque-narori noitsaare?”

³²Yamenamenayetanaque irineero antitaqueriri iitsaare. ³³Iroori tsinane, oshequi otsaroanaque, opcioncanaque, pio, pio. Iotanaque avisacotaji. Otiyeroashita-

paacari, opincatsataqueri. Otsoteaquero ocamantasanotaqueri maaroni. ³⁴Icantiro:

—Tsinane, pishiretaquena, irootaque paviscotantajari. Meeca pijataje, pinquimoshiretanaje. Aitaquenea paviscotajiri.

³⁵Tequerata intsonquerome ineanatiro, ipocajeitapaaque inampirepee Jairo. Icantapaquaqueri:

—Camanaque pishinto. ¿Paita pantsipetacanteariri pashereaque ri yoca oametantatsiri?

³⁶Iquemavaquero Jesoshi oca icantapaquaqueri. Icantiri Jairo:

—Eiro picantashirettsi, nainti pishiretea.

³⁷Tecatsi irishinet eojatanaquerine. Irinti ishinetaque yora Petero, Santiano, Joa. Iriotaque Joa irirenti Santiano.

³⁸Yareejeitapaaaca ivancoqui Jairo. Ineapaaqueri atiripee: icajemajeitaque, irashiretacojeitacaro, iracojeitacaro.

³⁹Iqueapaaque, icantapaquaqueri:

—¿Paita picajemacojeitantarori? ¿Paita piraacojeitantarori? Te oncamasanoteji evancaro, irointi omai.

⁴⁰Ishirontimentajeitavacari, iro cantaincha yoisoquijajeitapairi. Yaanaqueri irini, jero inironi, aisati ioramere, iqueanaque anta onauenta evancaroni. ⁴¹Yajiricavacotapaaquero acoqui. Icantiro:

—Tarita comi.

Acantiro aneanequi arori: “Evancaro, pintinaanaje”. ⁴²Otinaanaja evancaro, tancore, aniitanaji. Ocarataque osarintsite 12, irootaque omatantajari aniveetaji. Yoasanojeitanaque cavaco oshaninca.

⁴³Icantasanotiri:

—Eiroya picamantayetiritsi atiri. Meeca pimpero oyeari.

Ijataque Jesoshi Nasaretequi.

(Mt. 13.53-58; Ir. 4.16-30)

6 ¹Ari ijatanaji Jesoshi, yareetaapaaja iipatsitequi iriori. Yojajejitajiri ioramere. ^{2,3}Impoiji quitaiteri imaoreajei-

tantari, yoametantapaaji anta yapatotapi-nijeitacanta joriopee. Yoajeitavaqueri cavaco oshequi quemavaquerir. Itseenca-jeitaqueri Jesoshi, icantajeiti:

—Tempa iriotaque ashanincasanori arori. ¿Jaoca oponeimotacariri oca yoametantiri? ¿Jaoca icantacari itasoncantayetantacari? ¿Caarimpa yoca vetsicapinitirori inchato? Iriotaque otomi Maria, tempa iriotaque irirentipee Santiaco, Jose, Jorashi, aisati Shimo. Aisati iritsiropee, tempa osaviquimojeita-quee aca.

⁴Icanti Jesoshi:

—Ari ineacameetsajeivetacari atiripee camantantatsiri. Iro cantaincha iriorica camantantatsiri ishanincasanori, ari intseenqueri.

⁵Ari itseencajeitaqueri, irootaque caari itasoncantapinitanta anta inampiqui. Aparopee ipamiyetiri mantsiayetatsiri, yoavisacyetiri. ⁶Iro cantaincha te inquemisantajeiteriji ishaninca, irootaque yoantanacari cavaco:

—¿Paita caari iquemisantajeitantan?

Yantayetiri iroamerepee Jesoshi.

(Mt. 10.1-15; Ir. 9.1-6)

Iquenaquenayetanaque Jesoshi nampitsipeequi, yoametantayetanaque. ⁷Aisati icoyeaqueri iroamere 12. Imataacaqueri iroavisacotanteariri neiriri camaari. Impoiji itiancajeitaqueri; itsipatavacaayetanaca, apitepee ijayetanaque nampitsipeequi.

⁸Icantasanotavaqueri:

—Ariorica pijatanaque, tecatsiyea paanaque. Eiro paanaquetsi poyeari, eiro paanaquerotsi pitsarate. Aisati eiro paanaqueritsi piirequite. Irointiquea paanaque piotiquiro. ⁹Aisati pisapatotanaquea, iro cantaincha eiro piquitsaatarotsi poicoro.

¹⁰Aisati icantavaqueri:

—Jaocarica pisavicapaaqueri, aitaque pintimaanitapaqaqueri, irosati pijatanta-

jeari pashiniqui nampitsi. ¹¹Eiroricayaacameetsajeitavaquempi nampitsiqui-niri, aisati eiroricaiquemisantajeitavaquempi, ari povaanajea, iriotanteari pishemacari, eiro pipiashitaritsi aisati.

¹²Ari ijajeteanaque iroamere. Icamantajeitiri atiripee:

—Pinquenqueshirejeitea, eiro pantapinirotsi aisati caari cameetsatatsi.

¹³Yoavisacojeitiri oshequi yatajeaconcane camaari. Itiritantayetari quejitsi oshequi mantsiaripee, yoavisacyetiri.

Yora Eroreshi yoacantaqueri Joa.

(Mt. 14.1-12; Ir. 9.7-9)

¹⁴Oshequi quemacojeitiriri Jesoshi, irootaque iquemacotantacariri aisati pincatsari pajitachari Eroreshi. Icantayeti atiripee:

—Iriotaque Joa vaotisatantatsiri, camavetainchari: itinaanaja. Iro itinaantajari itasorentsiti.

¹⁵Timatsi pashini cantayevetachari:

—Irioyeata Iriashini: itinaanaja.

Pashini cantayetatsiri aisati:

—Iriotaque camantantatsiri. Ishiajiri camantantaveitachaniri.

¹⁶Ari iquemacotaqueri Eroreshi, icanti:

—Iriotaqueteemi Joa. Nopesacantavetacari itsanoqui iro cantaincha itinaanaja aisati.

¹⁷⁻¹⁹Ari peerani Eroreshi yaapitsataqueri irirenti ijina. Ipajita irirenti Jeripi, iro ijinantaveitaniri, Eroriashi.

Yora Joa icantapinivetacari Eroreshi:

—Te oncameetsateji paapitsateri pirenti ijina.

Oquisanaqueri Eroriashi, ocoasanoveta oacanterime, iro cantaincha te irininteji yora ojimentajari. Oshequi ashereapinitaqueri, irootaque yaacantantacariri Joa, yoiminquia-cantaqueri caravosoqui tsompoina. ²⁰Ipincatsavetacari iriori Joa, iotiri icameetsatasanoti, iquemisantasano Tirasi. Te irishineve-tearoji ijina oacanteri. Itsaroacaapinivetari Joa,

iquenquetsatacaapinitiri. Ineacameetsatiro icantiriri Joa, iro cantaincha te irioteji jaoca incanteari.²¹ Omoncarataja iitaiterite itimanta cari peerani Eroreshi. Yoacaajeitari ivincatsarinte, ivincatsarite soraro, aisati ivincatsarite carireasati. Irootaque quitaiteri oacantantacari Eroriashi Joa.²² Oqueapaaque oshinto Eroriashi anta yoajeitanta omaninquetsaveeta-paaque apaniro. Ineacameetsatavaquero Eroreshi aisati itsipajeitari. Icantiro evancaro:

—Pincoacotena paitarica picoaqueri. Aitaque nompaquempiro.²³ Inequena Tasorentsi, ioti eiro namatavitimpitsi. Paitaricapee pincoacotaquenari, aitaque nompaquempi. Picoaquerica nompaarantempi noipatsite, aitaque nompaquempi cashetani.

²⁴ Osoquijanaji iroori, osampitapaa-quero iniro:

—¿Paita noncoacoteriri?

Acavaquero iroori:

—Iro pincoacoteriri iito Joa vaotisatan-tatsiri.

²⁵ Intsipaite opianaja aisati, opiashitana jari pincatsari. Ocoacotapaqueraueri, ocantiri:

—Nocoi meeca pimpacotenaro matitaqui iito Joa.

²⁶ Oshequi yoashiretanaca. Tempa aitaque icantaquero incaranqui: “Eiro namatavitimpitsi”. Aisati iquemajeitava-queri maaroni itsipajeitacari. Te meeca incoajeji iramatavitero.²⁷ Ari itiancaqueri oantatsiri, icantavaqueri:

—Pamaquenaro iito Joa.

Ari ijataque anta yoiminqueaque-rinta, ipesapaaqueri itsanoqui.²⁸ Yamaco-taquero matitaqui iiton, ipapaquiero evancaro. Iroori, ovaquenero iniro.

²⁹ Iquemacotaqueri iroamereni Joani, ari ijatashijeitaqueri. Yaanajiri, itijajiri.

Yoacaacari Jesoshi oshequi atiri.

(Mt. 14.13-21; Jr. 9.10-17; Joa 6.1-15)

³⁰ Ipijajeitanaja itiancane Jesoshi. Icamantajeitapaaajiri maaroni yantayeta-queri. Aisati icamantacoyetapairo

maaroni yoametantayetaqueri.³¹ Irosati icantani oshequi atiri ipocashitapinitiri Jesoshi, aisati ijajeitanaji. Te irinijanta-reeriji, tecatsi incantea iroyea. Icantajei-tavaqueri itiancane:

—Tsame ajate ayojeitanaquea anta tecatsi timatsine. Amaoreajeitavaqueta capichaji.

³² Ari ijajeitanaque, iquenanaque pitotsiqui. ³³ Ari ineajeitavaqueri oshequi atiri, iojeitavaqueri. Iponeajeitanaca ivancopeequi, ishianaca, ishitejeitanaca. Ishianaca, yanaacojeitaqueri, yapatoti-mentajeitavacari. ³⁴ Imitajanaque Jesoshi, ineapaatiiri oshequi apatojeitainchari. Irosati ineshinoncajeitantzapaacariri ishiacaantapaaqueri ovisha caari timatsine amenerineri. Oshequi yoamejei-tapaaqueri paitapeerica. ³⁵ Ari ishaavijita-naji catsirincaiteri. Ipocashitiri iroamere, icantiri:

—Meeca anajeitaque aca caaraiteriqui, tecatsi avajeiteari. Aisati ishaavijitaque catsirincaiteri. ³⁶ Pintiancajeiteri atiri irijajeitajeta oantsiqui, nampitsiqui quempejiniri. Iramanantajeitapeeta iroyeari.

³⁷ Yacanaqueri, icantiri:

—Pimperita avinti iroyeari.

Ican iroamere:

—¿Picoavetampa nojate namanantaite tanta nompantajeiteariri? Oshequi ompinatea noacantajeiteariri maaroni, eiro imoncaratarotsi airequite.

³⁸ Yacanajiri:

—¿Jaoca ocaratiri pitantane timatsiri? Pijate, pamenaitero.

Ari ineaitiro, icantquaqueri:

—Apapacoroni ocarati tanta, aisati apite shima.

³⁹ Icantiri:

—Poisaviqueru atiripee ara saveshishiqui. Pampatoyereti, aisati pinashitacaayeteari.

⁴⁰ Ari yapatojeitaqueri, isavacajeitana-que. Aparoni apatojeitainchari icarati

100 atiri. Itimi oshequi itsipapee apatojeitainchari aisati. Inashiyetaca pashinipee apatojeitainchari, icarayetaque 50.⁴¹ Ari yaaquero Jesoshi tanta aisati shima, yamenanaque jenoqui.

Icantiri iriri:

—Ariove, Apa, aviro paquenarori oca noyearica.

Icarajaquero tanta. Ipaqueri iroamere irovayeteneri apatojeitainchari. Aisati shima, yovayetaqueneri maaroni atiri,⁴² ari yoajeitanaca. Iquemajeitanaca, te intsonqueroji.⁴³ Yaayetajiro timaarantapajantsiri, ijaayetajiro cantiriqui ocarati 12.⁴⁴ Icarajeiti oacarori 5,000 shirampari.

Yanijjatiro Jesoshi incajare.

(Mt. 14.22-33; Jea 6.16-21)

⁴⁵Impoiji itianquiri Jesoshi iroamere, icantiri:

—Pintetanajea pitotsiqui. Pijivajeitana quena intatiqueronta, anta Vetsairaqui: nontiancajiterjerita ivancopeequi yoca apatojeitainchari.

⁴⁶Impoiji ijatanaque Jesoshi toncaari, iquenquetsatacairy iriri. ⁴⁷Otsitenijencaiteanaji, inianquijatocanaque iroamere incajarequi. Itimaiti Jesoshi apaniro quipatsiqui.⁴⁸ Ineaqueri iroamere, icomacomajeveta, iotaqueri imaojempequitaque. Aiquero oipiacotajiriri tampea. Ari oquitaitetimataji ijatashitajiri iriori Jesoshi. Yanijjatanajiro incajare, te intsityeji. Iro iravisanaque- rime,⁴⁹ iro cantaincha ineajeitavajiri, yanijjatapajiro incajare. Ijijeivetavacari irio camaari. Ari icajemajeitanaque:

—Eeeee. Coraquenive camaari.

⁵⁰Ari ineajeitavaqueri maaroni. Itsaroa- jeitanaque. Ineanatapajiri:

—Pinquimoshirejeitaje. Narotaque pocajantsiri. Eiro pitsaroashijeitatsi.

⁵¹Itetapajajita pitotsiqui, itsipajeitapajari, opeanaja tampea. Yoajeitanaque cavaco catsini.⁵² Ineajeivetacari incaran-

qui itasonquiro tanta, iro cantaincha tequera inquenqueshireimateaji.

Yantayetiri Jesoshi anta Jenesaretequi.

(Mt. 14.34-36)

⁵³Ari imonteanacaro, yareejitapaa- Jenesaretequi. Yaatacojeitapaaque.

⁵⁴Imitajajeitapaaque, intsipaite ijoiteitavaqueri atiri.⁵⁵ Ishiashijkeitapaa- cari.

Yamacojeitaqueri mantsiyatatsiri inareantariqui. Jaocarica itimapairi.

Jesoshi, aitaque anta yaacotanaqueneriri.⁵⁶ Iquenaquenayeti nampitsijaniquiqui, nampitsiqui antearo, aisati oantsiqui.

Jaocarica iquenanaqueri Jesoshi yoayetaqueneri mantsiyatatsiri. Yoayetaqueneri nianqui nampitsiqui, icantajeitavaqueri:

—Pishinetenaro nompamititavaquem- piro ocaratapai piitsaare.

Ari yavisacojeitaji maaroni pamititajei- tavaqueriri iitsaare.

Yamejeitari joriopee.

(Mt. 15.1-20)

7 ¹Ari ipocapaaque variseopee, aisati aparopee oametantirori sanquenarentsi, iponeaca Jerosarequi. Yapatotimentapaa- cari Jesoshi. ²Ineajeitapairi iroamere, yoajeita iriori: te inquivacoteaji. Icantajeiti intacaroniri: “Ariorica ayea, ajivate anquivacotea ancameetsashiretanteeari”. ³Yora variseo yamejeitaro tequeratarica iroyeata, iquivacotasano- ta. Tempa yamejeitaro maaroni joriopee. Irompa eirorica iquivacotita, eiro yoatsi. Aitaque imoncaratajiro yoametantapinitiniri intacaroniri. ⁴Ariorica imponeajea anta nampitsiqui nianqui, eirorica iquivacotasano- tapajatsi, eiro yoapaajatsi. Aisati imoncaratashiyetaro oshequi paitarica yoameyeteriri ishanincani. Iquivajeitapinitiro pajo, onero, oya, maaroni.

⁵Ari isampijetapaaqueri Jesoshi:

—¿Paita caari imoncaratantaro poamere yoametantapinitiniri intacanta- queeniri? Jeri yoca meeca oainchari, te inquivacoteaji: ainiro irantane.

⁶Icantavaqueri Jesoshi:

—Oshequi pamatavitantayeti. Aitaque icamantacotitaquempini peerani Isayashini. Isanquenatinini: “Icantashivetana yoca atiri: ‘Picameetsati’, iro cantaincha te inquenqueshiretenaji. ⁷Yatsipetashitaro itiyeroimentavetana; ipincatsatashivetana. Pamatavitashiyeta-cari pishaninca: picantanirovetari oca poametantavetari irootaque irineane Tasorentsi”. Queario oca icantaqueniri Isayashi.

⁸Aisati icantiri Jesoshi:

—Pojocashitacaro icantavetimpri Tasorentsi, irointi piquemisantashitacaro yoametantapinitiri atiri. ⁹Aitaque pitseencaquero icantiri Tasorentsi, irointi picoaque pimoncaratajero yoametantapi-nitiri intacantaroniri. ¹⁰Icantini Moishishini: “Pimpincatsateri piri, aisati piniro”. Aisati icanti: “Aitaque iroasan-queteri Tasorentsi yora cantimatinirri iriri aisati iriniro”. ¹¹Iro cantaincha picantashirojeivetari ashinanica: “Ariorica pincashiacayeri Tasorentsi pii requisite, ari pimpasanoteri. Irashinoncayearica piri, piniro, pincerteri: ‘Eiro nomatirotsi noncavintsayempi: nocashiacaqueri Tasorentsi noirequite nomperiri’”. ¹²Aitaque meeca te pishineteriji pishaninca irintacoteari iriri, iriniro. ¹³Picoacaqueri inquemisantero poameta-pinitiriri, aisati poametaqueri intseen-quiero icantiri Tasorentsi. Aitaque picantanirotapinitari: pojocacaayetiri ashinanica iquemisanti.

**Icamantiri Jesoshi paita caari
icameetsatanta atiri.**
(Mt. 15.10-20)

¹⁴Ari icajemajiri aisati apatojeitain-chari, icantajeitiri:

—Pinquemajeitavaquena maaroni. Piojeitavaquero oca. ¹⁵Ocameetsati avajeitearo paitapeerica, eiro otimitsi

antane: tecatsi oncantero avari ashire.

Piquenqueshiretiro caari cameetsatatsi, irootaque pantapinitantarori. ¹⁶Otimirica piyempita piquemantari, pinquemava-que.

¹⁷Ari ijajeitanaji apatotimentariri, iqueapaaji Jesoshi pancotsiqui. Isampitiri iroamere:

—Jaoca ocantari pishiacaaventiniriri?

¹⁸Icantiri:

—Aisatimpa avirori, ¿tempa pinquema-vauena? Paitapeerica iroyeari ashaninca, ocameetsati, eiro otimitsi irantane. Tempa piotavaquero. ¹⁹Eiro omatirotsi ishire, ainti ojataque isheitoqui, impoiji ishitajiro.

Irootaque yoamejeitiriri ocameetsata-que paitarica yoyeyetari. ²⁰Aisati icantiri:

—Oca iquenqueshiretiri antacairiri ashaninca caari cameetsatatsi. ²¹Te iroyearoji caari cameetsatatsi, irointi iquenqueshiretiro. Irootaque yantajeitan-tarori maaroni: yantavintsatiro tsinane caari yai, antavintsatiri shirampari caari ai, icoshiti, yoanti. ²²Yaimentaro ijina, aimentari ojime. Inevetaro yashiyetari pashini atiri. Icamaaritanti, yamatavi-tanti, imayempitaptapiniti, imashitsati, icantimatanti, ishemeti. Te ontameji iojeitantari. ²³Iquenqueshiretiro atiri caari cameetsatatsi, irootaque yantanta-rori: impoiji otimi irantanepee.

**Yoavisacotajiro Jesoshi oshinto
shirojenishiasato.**
(Mt. 15.21-28)

²⁴Impoiji ijatanaji Jesoshi Tiroqui.

Isavicapaaque pancotsiqui, te incoaveteaji irioyeeterime. Iro cantaincha tecatsi incantea irimanea. ²⁵Otimi anta tsinane, yatajeonquiro oshinto camaari. Oquemaco-tavaqueri tsinane Jesoshi, ojatashitaqueri, otiyeroashitapaaaci. ²⁶Caari oni jorio, oponeaca Shirojenishiaqui. Ocantapaaqueri:

—Yatajeaoncaquero noshinto camaari, poavisacotajenaro.

²⁷Icantavaquero:

—Nojivatavaquerita noshanincasanori mintacoteari. Te oncameetsateji aapitsatajeri yoari ajananequite, amperi otsiti iroyeari.

²⁸Iroori acanaqueri:

—Je, queario. Aitaque iniri otsiti nijanteaji. Yoatsopequitayetari atomi.

²⁹Icantajiro:

—Je, cameetsa; queario picantaqueri. Cameetsa pijataje meeca, avisacotanaji pishinto.

³⁰Opianaja ovancoqui. Oneapaajiro oshinto, onariaca omaamentoqui, avisacotaji.

Yora Jesoshi yoavisacotiri mayempivetachaniri.

³¹Impoiji yovaanaja aisati Jesoshi, iquenanaji Tiroqui, Shiroqui aisati Tecaporishiqui. Ari yareetapaaja incajarequi Carirequiniri. ³²Yameetapaquaqueneri aparo shirampari imayempiti, aisati imasontiti. Icantappaqueri:

—Pimpamitavaqueri, poavisacotajeri.

³³Yora Jesoshi yojocanajiri apatotimenteriri, apaniro itsipatanacari mayempi. Yoiminquiaqueneri iracotsapaqui iyempitaqui. Iquitiojaquero iracotsapaqui, ipantaqueri inenequi. ³⁴Yamenanaque jenoqui, yaneencanaque, icantiri:

—Epeta.

Acantiri arori aneanequi: “Ovitareanaja”. ³⁵Ovitareanaja iquemantari. Opeanaja iniconeneveitani, cameetsajen-catanaji ineaveetaji. ³⁶Yapiitapinivretari:

—Eiroyea picamantacotanatsi.

Iro cantaincha te inquemisanteriji, aiquero catsini icamantacotaqueriri.

³⁷Aiquero catsini yoajeitaniqueru cavaco Jesoshi. Icantajeitiri atiripee:

—Paitaquea, ocameetsatasanoti yantayetiri. Imatasanotaquero Jesoshi

maaroni yantayetiri. Iquemacaayetajiri mayempiveitachaniri, aisati yora masontiveitachaniri, ineaveetacaayetajiri.

Yapiitajiro Jesoshi yoshequiajiro tanta.

(Mt. 15.32-38)

8 ¹Pashini quitaiteri yapatojeitacaaisati oshequi atiri, tecatsi iroajeiteari. Yora Jesoshi icajemiri iroamere, icantavaqueri:

²—Nocavintsaaajeitaqueri yocapee. Iro nocavintsaaajeitantarcariri mavataque quitaiteri itsipajeitaquena, te iroajeiteaji meeca. ³Aajeitaqueri itashe. Timatsi aparopee poneainchari paricoti: ariorica nontiancavetajeari meeca ivancoqui, ari irimaoshirejeitanaque nianqui avotsiqui, irimaotsajeitanaque.

⁴Yacanaqueri iroamere:

—¿Jaoca ancanteari anquemacaajeitanteeari tanta? Aca caaraiteriqui.

⁵Isampitiri:

—¿Jaoca ocaratiri pitantane?

Icanti:

—Ocarati 7.

⁶Icantajeitiri apatotimentajeitariri:

—Pisavicajeite quipatsiqui.

Yaaquero tanta, ipasonquitiri iriri. Icarajaquero, ipajeitaqueri iroamere, yovaajeitaqueri apatojeitainchari.

⁷Itimaque aisati shivajaniqui aparopee.

Ipasonquitacotaqueri aisati. Impoiji icantiri iroamere:

—Pimpajetei teri aisati shivajaniqui.

⁸Ari yoajeitaca, iquemajeitanaca. Yaayeta-jiro timaarantapaintsiri, yoajiro cantiriqui. Ocarati jaajanchari 7. ⁹Icarajeiti oainchari 4,000. Impoiji itiancageitajiri:

—Pijajeitaje pivancopeequi.

Icoaveta variseo irineerime Jesoshi intasoncantayete.

(Mt. 15.39; 16.1-4; Ir. 12.54-56)

¹⁰Itsipajeitanajari iroamere, itejeitanaja pitotsiqui. Ijajeitanaji anta Tarimanota-

qui.¹¹ Ari ipocapaaque variseo. Iquisatsa-tiri, icantiri:

—Jentsite, pintasoncantayete
niotantempiro avirotaque Tasorentsi,
impoijiquea ariorica nonquemisantaniro-
tempi.

¹²Oshequi catsini ocantimoneentacari
Jesoshi. Icanti:

—¿Paita icoajeitancari maaroni atiri
nonijayeri nontasoncante? Queariotaque
oca noncamantasanoempiri, eiro
ineanatsi nontasoncantayete.

¹³Ari ijatanaji Jesoshi, itetanaja aisati
pitotsiqui. Ijatanaji, imonteanaja
intatiquero.

**Icantiri Jesoshi:
“Yamatavitimpicari variseo”.**
(Mt. 16.5-12)

¹⁴Ipeacojeitanacaro iroamere
iraanaquerome tanta pitotsiqui, aparo
yaanaque. ¹⁵Icanti Jesoshi:

—Paamaventearo tapiacaarori tanta,
yashitari variseo, aisati yashitari
Eroreshi.

¹⁶Ari icantavacaanaca, icantajeiti:

—Tecatsi atantane, irootaque icant-
taqueeri: “Paamaventearo tapiacaarori
tanta”.

¹⁷Iotacotaqueri Jesoshi, icantiri:

—¿Paita picantavacaantari: “Tecatsi
atantane”? ¿Paita caari piquemanta?
¿Paita caari piotanta? ¿Paita caari
piquenqueshirentanta? ¹⁸Otimaveta poqui,
¿paita caari pineanta? Otimaveta
piquemantari, ¿paita caari piquemanta?
¿Paita caari pinquenqueshirentajaro
¹⁹noshequiantacarori tanta? Ocaraveta
apapacoroni tanta, icarati ocaror 5,000
shirampari. Ari paajiro timaarantapaajans-
tsiri. ¿Jaocampa ocarati jaajanchari
cantiriqui?

Yacajeitanajiri:

—Ari ocaratiri 12.

²⁰Icanti Jesoshi:

—Aisati pashini, ocarati tanta 7, icarati
aisati ocaror 4,000. Paajiro aisati
timaarantapaajantsiri. ¿Jaoca ocaratiri
cantiri pijaajiri?

Icantajeitiri:

—Ocarati 7.

²¹Icantiri:

—¿Tequerampa meeca piotavaquero?
Te iro nonquenquetsatacote tanta
incaranqui, irointi noquenquetsatacoti
yoametantiri variseo aisati Eroreshi.

Yoavisacotajiri Jesoshi quitapojaquiri.

²²Ari ijajeitanaji Vetsairaqui. Yameeta-
paquaqueri quitapojaquiri. Icantapaa-
queri:

—Pimpamitavaqueri iramenantajeari.

²³Ari yacatsatanaqueri quitapojaquiri,
yaanaqueri otsapitapaaca nampitsi.
Iquitiojaqueri iroquiqui, ipamijaquita-
queri. Isampitaqueri:

—¿Amenavetajimpimpa?

²⁴Yamenananaji, icanti:

—Je, namenavetaja, noneavetajari
shiramparinta, iro cantaincha te inconja-
tasanoteji, ishiavetacaro inchato,
aniitaintsiri.

²⁵Yapiitajiri aisati, ipamijaquitaquiri
iroquiqui. Impoiji yamenasanotanaji,
yavisacotasasanotanaji. Yamenananaji,
conijaitetasasanotanaji maaroni. ²⁶Icantiri
Jesoshi:

—Eiroyea piquenanajitsi nampitsiqui,
apatiroyea povaanajero pivancoqui.

Itiri Petero Quirishito ini Jesoshi.

(Mt. 16.13-20; Ir. 9.18-21)

²⁷Ari yovaanaja Jesoshi, itsipatanajiri
iroamere. Ijajeitanaque nampitsipeequi
anta Sesareajiripoqui. Inianquitanaque
avotsiqui, isampijeitaqueri iroamere:

—¿Paita yaamaajeitaquenari atripee?

²⁸Yacanaqueri:

—Aparopee aamaayetaincha aviro
Joani vaotisatantatsiniri. Irio itsipa

yaamaaqueMPI aviro Iriashini. Itsipapee aisati icanti aviro camantantsiniri, pitinaanaja.

²⁹Isampijeitaqueri:

—Avirojei, ¿paita piquenqueshirejeitiri?

Yacanaqueri Petero:

—Avirotaque naamaajeitacari peerani: aviro Quirishito.

³⁰Icantasanotiri:

—Eiroyea picamantacotanatsi.

Icantajeitiri Jesoshi:

“Noncamimentajeitempi”.

(Mt. 16.21-23; Ir. 9.22)

³¹Ari yoametajiri aisati:

—Noponeaca narori inquitequi, natirita-paaque. Coajica oshequi nonquemaatsicati-mentajeitempi. Queario, intseencaquena pincatsaripee, aisati jivatacaa jeitiriri saserotepee, aisati oametantirori sanquena-rentsi: intseencajeitaquena, irocantajeita-quena. Noncamaque, iro cantaincha oncarataque mava quitateri, irosati nontinaantanajeari.

³²Aitaque icantasonojeivetacari. Yora Petero yaanaqueri quempequetiji ara, icantaqueri:

—¿Paita picantararori oca? Te oncameetsateji poamaimatea.

³³Ari ipitsocashijeitacari Jesoshi iroamerepee, yamenajetanaqueri. Irosati ishuntsitsatantacariri Petero:

—Piquempetacari Satanashi. Pijate, te pincameetsateji. Piquempejeitacari atiri, te pinquenqueshireempa. Te pioteroji icoacaquenari Tasorentsi.

Jaoaca ancantajeiteari aijatanteariri Jesoshi.

(Mt. 16.24-28; Ir. 9.23-27)

³⁴Impoiji icajemiri Jesoshi apatojeita-chari aisati iroamere. Icantiri:

—Ariorica picoaque pojajaeiten, eiro pantirotsi caari cameetsatatsi picoashiyeveti avirori. Pojajaeitanquena, pinqueario-

ventajeitenaro maaroni noncoacaquempi: piojeite ariorica pincamimentena. ³⁵Terica pincoyeji pincamimentena, patsipetashita pitimi, ainti pijate Sharincaveniqui. Iro cantaincha ariorica pincamimentena, aisati ariorica pinquemisantacayeteri atiri, eiro patsipetashitarotsi: pincantaitiyempani panee anta inquitequi. ³⁶Ariorica pashijeitearo maaroni timayetatsiri aca quipatsiqui, aintuea pijate Sharincaveniqui, tempa pantsipetashitearo pashiyetearo. ³⁷Ariorica pijate Sharincaveniqui, ¿jaoca pincanteari pijatanteari inquitequi? ³⁸Tseencantatsiri inajeiti maaroni timajeitatsiri, aisati yantapinijeitiro caari cameetsatatsi.

Noponeaca inquitequi, natiritapaaque. Coajica nojataje inquitequi: meeca, ariorica pipashiventacaana, aisati ariorica pipashiventacaaro noneane, coajica nompiapaajerica, nompashiventacaapeempi avirori. Aisati ariorica nompiaje nompinca-tsaritasanotapaaque, nonquempetapaaqueari Apa, aisati nontsipajeitapaaqueari inampirepee.

Ipashinitimotanaqueri Jesoshi iroamere.

(Mt. 17.1-13; Ir. 9.28-36)

9 ¹Aisati icantajiri Jesoshi:

—Queariotaque oca noncamantasa-notempiri. Pamene, acarajeitaque meeca aca. Eirotarica picamajeititsi, ari pineava-queri Tasorentsi impoque, impincatsarita-paaque, intasorentsitapaaque.

²Avisanaque 6 quitateri. Yaanaqueri Jesoshi yora Petero, Santiacono, aisati Joa, ijivatanaqueri anta antearoqui toncaari. Ari itimajeitapaaque apaniro. Ipashinita-naca Jesoshi, ipashinitimotanaqueri oijajeitiriri. ³Oshipaquireanaque iitsaare. Oquitamarotanaque catsini. Aca quipatsiqui te aneeroji catsini quempetearoneri.

⁴Imapocapaaca, iconijatimotapaaqueri Iriashini aisati Moishishini, iquenqueta-tacaapaaqueri Jesoshi. ⁵Ineaveetashita-naca Petero:

—Oametanari, tempa ocameetsatasanoti pamaquena aca, noneantaquemperi. Meeca nocoaque novetsicajeittempi mava pancotsi-janiqui: aparoni pashi, aparoni irashi Moishishi, iro otsipa irashi Iriashi iriori.

⁶Itsaroasanojeitanaque catsini, irootaque caari iotaota Petero paitarica incanterimeri. ⁷Otsimancajeitapaaqueri mencori. Omapocanaca irineane Tasorentsi mencoriqui, icantajeitaqueri:

—Iriotaque notomi nonintasanotiri, pinquemisanteri.

⁸Intsipaite yamenayevetanaca iroamere, tecatsi irinee, irinti apaniro Jesoshi. ⁹Irosati ipiajeitantanaja, yoirincajeitanaja. Icantasanotiri Jesoshi:

—Eiroyea picamantacotiroti oca pineaqueri. Coajica noncame. Ariorica nontinaanaje, irosati pincamantacotante-nari oca pineaqueri meeca. Tempa noponeaca inquitequi, natiritapaaque.

¹⁰Ari iquemajeivetavacari, irosati isampitavacantanaca paita ojitaro oca icantiriri Jesoshi: “Coajica noncame. Nontinaanaje aisati”. ¹¹Isampijeitaqueri:

—¿Paita icantantari oametantirori sanquenarentsi: “Tequeratarica impoque Quirishito, irijivatapaaque Iriashini”?

¹²Iriori Jesoshi yacanaqueri:

—Queario icanteetiri: “Irjivatapaaque Iriashini, iroameetsajeitapaaque maaroni”. Noponeaca narori inquitequi, natiritapaaque, tempa naro isanquenatacotiniri peerani: “Oshequi inquemaatsicatearo, aisati oshequi intseenajeitavaqueri”. ¿Paita icantantarniri oca? ¹³Meeca noncamantempi: aitaque peerani ipocaji aisati Iriashini. Oshequi yantanayetaqueri, imoncarataquero isanque-natacotiteetacariniri.

Yoavisacotiri Jesoshi

yatajeaoncane camaari.

(Mt. 17.14-21; Ir. 9.37-43)

¹⁴Ari ipiajeitanaja anta isavicajeita-quenta iroamerepee pashini. Ineajeita-

paaqueri itsipajeitapaaaci oshequi apatotimentacariri. Itimi oametantirori sanquenarentsi, ineanjeitiri yora iroamerepee Jesoshi. ¹⁵Ari ineajeitavaqueri Jesoshi, ipocaji, yoasanotavaqueri cavaco. Ishiashijeitanacari, ivetsajeitava-carri. ¹⁶Isampitapaaqueri:

—¿Paita pineanatacojeitiri?

¹⁷Yacanaqueri aparoni shirampari, icanti:

—Oametanari, namaquemperi notomi. Yatajeaoncapinitiri camaari. Imasontia-queri notomi. ¹⁸Irajiricapaajeririca, ipishoncrajiri quipatsiqui, ishimoretacaa-nacari, yatsicanajitacaanacari, iquisopo-roquitacaanacari. Nocantavetari poamere: “Poavisacotajeri”. Teve, te irimateroji.

¹⁹Yacanaqueri Jesoshi:

—Te pinquemisantimajeiteji. ¿Jaoca oncarate piojeite? Noametapinjeiveta-quempi, iro cantaincha te pinquemisantajei-tavaque. Jentsite, pamaquenarite pitomi.

²⁰Ari yamaqueneri. Yora camaari, ineapaqueri Jesoshi. Yampitsitacaana-cari jananequi, ipariacaanaqueri quipatsi-qui, poron. Ipinaironcapinaironcatanaca, ishimoretanaque ivantequi. ²¹Yora Jesoshi isampitaqueri iriri jananequi:

—¿Jaoca ocaratiri intantanacari?

Yacanaqueri:

—Ainiroquerani ijananequitapaini.

²²Oshequi yojocacaapinitari paamariqui, aisati nijaqui. Icoaveta iroamayerime. Pitasoncantirica, pineshinoncatajena, poavisacotajenari.

²³Ianti Jesoshi:

—¿Paita picantantanari: “Pitasoncan-rica”? Pinquemisanterica, aitaque irimataquempiro Tasorentsi paitapeerica.

²⁴Antearojenca icanti iriri jananequi:

—Noquemisantaveta. Tericampa nonquemisantasano, pinquemisantaca-sanotena avinti.

²⁵Iriori Jesoshi ineavaqueri ishiashijeitapaaaci oshequi atiri. Iquisatsataqueri camaari, icantiri:

—Avironirotaque camaari. Pimasontitacanti, pimayempitacanti. Meeca nocantasantimpí, poimpacanajeriqueti, eiro patajeaconajiritsi aisati.

²⁶Icajemanaque camaari, yampitsitaacanacari jananequi, yojocanajiri. Yora jananequi iquempevetanacari camatsiri. Oshequi cantayetanaintsi:

—Camanaque inaque.

²⁷Iro cantaincha yacatsavacotajiri Jesoshi, yoitinaajiri, icatianaja iriori.

²⁸Impoiji iqueajeitapaaaji pancotsiqui. Iajeitaca iroamere, isampijeitiri:

—¿Paitaquea caari nomatantaro narori noavisacoteri?

²⁹Yacanaqueri:

—Oshequi ishuntsiti yora camaari, irootaque caari pimatantari poavisacotajeri yora yatajeaonquiri. Aisati maaroni quempejeitariri, eiro pimajeitritsi. Iro cantaincha, pincantasa-noteririca Tasorentsi, ari iramatacotempi poavisacotajeri yatajeaoncane camaari.

Yapiitajiniri Jesoshi iroamere:

“Ataque noncamaque”.

(Mt. 17.22-23; Ir. 9.44-45)

^{30,31}Ari yovaanaja Jesoshi anta, iquenajiji Carireaquici. Ari icoaque iroameteri iroamerepee apaniro, irootaque imantanajari ijajeitanajiji. Icantanaqueri:

—Noponeaca narori inquitequi, natiritapaaque: coajica iraacaanteetena. Irayena atiri, iroyena. Ari noncamasano-vetaquea, impoiji, omavatapaaque quitaiteri, ari nontinaanaje aisati.

³²Iro cantaincha te iriojeitavaqueroji iriori oca icamantavetacariri. Itsarojeitanaque irisampiterime.

Jaoca ancanteari ampincatsariventante.

(Mt. 18.1-5; Ir. 9.46-48)

³³Ari yareejeitapaaca Caperenoaqui, isaviceajeitapaaque pancotsiqui. Isampitiri Jesoshi iroamere:

—¿Paita picantavacaanacari avotsiqui?

³⁴Imajerejeitanaque iriori, ipashiventajeitanaca. Icantavacaajeitanaca anta avotsiqui, icanti:

—Meeca acarajeitica, ejjanicampa anacotantatsineri impincatsarite?

³⁵Ari isaviqui Jesoshi. Icajemiri iroamere, icantiri:

—Ariorica pincoye pimpincatsariventante, pintacojeiteari pishaninca maaroni, aisati pamitacojeiteri, pinshinoncajeiteri.

³⁶Yamaqueneri aparoni jananequi. Isatecapaaqueneri nianqui, yavitsanota-vaqueri. Icanti:

³⁷Pishirejeitená narori, impoiji pincavintsayeri jananequi. Ariorica pincavintsayeri, aisati narori, pincavintsayena. Aisati oquempetaca, ariorica pincavintsayena, te naro pincavintaasa-note, irintiquea Apa tiancaquenari.

Yoavisacotanti pashini quemisantatsiri.

(Mt. 10.42; Ir. 9.49-50)

³⁸Impoiji yora Joa icantanaqueri:

—Oametanari, noneajeitaqueri shirampari, icanti: “Noquemisantaqueri Jesoshi, irootaque nojocantacariri camaari”. Te meeca ancarajeitjeri iriori aca, irootaque notsaneacotantariri.

³⁹Icanti Jesoshi:

—Eiro pitsaneacotaritsi. Tempa nomatacaqueri itasoncanti, eiro meeca icantimatanatsi irinti. ⁴⁰Janicarica caari quisanenteene iringotaque acarajeitiri.

Icantiri Jesoshi: “Pincavintaavacaajeitea”.

(Mt. 18.6-9; Ir. 17.1-2)

⁴¹Aisati icantiri Jesoshi:

—Ariorica iringotaqueyempi atiri aviro quemisantanari, irootaque incavintsantava-quempi, aitaque impinateri Apa. Queario-taque oca nocamantasanotimpiri. ⁴²Jeri yoca jananequi, quemisantanari: eiro catsini pantacairitsi caari cameetsatatsi. Pantacaye-ririca, iroasanquetayempi Tasorentsi, pinshinoncaasananotanaquea. Oncameetsateme pincamiteame peerani, eiro pinshinoncain-

tame.⁴³Jero oca noshiacantempi meeca piotanteari te oncameetsateji catsini pantero caari cameetsatsati. Ariorica antacyempiro paco caari cameetsatsati, pimpeshero. Aitaque ocameetsatiri pijapontsoquitanaje inquitequi, oncateata anta paneantasanoata-paajeari. Te oncameetsateji catsini ontine apite paco: eiorica pipeshirotsi, irootaque pijatanteari Sharincaveniqui. Aitaque anta otimiri paamari caari tsivacanetatsi, aisati iriori yora quenitsi caari caamanetatsi.⁴⁴Eiro anta icamitsi quenitsi, aisati eiro otsivacanetitsi paamari iroori.⁴⁵Aisati ariorica antacyempiro piiti caari cameetsatsati, pimpesjero. Aitaque ocameetsatiri pijapontsoquitanaje inquitequi, oncateata anta paneantasanoata-paajeari. Te oncameetsateji ontine apite piiti: eiorica pipeshirotsi, irootaque pijatanteari Sharincaveniqui.⁴⁶Eiro anta icamitsi quenitsi. Aisati eiro otsivacanetitsi paamari iroori.⁴⁷Aisati ariorica antacyempi poqui caari cameetsatsati, pinquitsoreero. Ari ocameetsatiri pijanaroquitanafe anta ipincatsaritinta Tasorentsi. Te oncameetsate ontine apite poqui: eiorica piquitsoreirotsi, irootaque irojocanteetempri Sharincaveniqui.⁴⁸Eiro anta icamitsi quenitsi. Aisati eiro otsivacanetitsi paamari iroori.⁴⁹Avirojeitaque quemisantajeitanari, irootaque inquisajeitatempi caari quemisantajeitatsi. Ariorica pinquemisantajeitena, ompomerentsitom-tempi.⁵⁰Ocameetsati tivi. Irompa ariorica ompeanaquea ovoteare, tecutsi oncantajea mpoteataje aisati. Aisati piquempetaca avirori: ariorica paacameetsatavacaajeitea, tempa ocameetsati: pincanteani paacameetsatavacaajeitea, maaroni.

Ijataque Jesoshi Joriraniqui intatiquero.

10¹Ari yovaanaja Jesoshi, iquenanaji Joreaqui. Aisati ijataji intatiquero Joriraniqui. Yapatotimentajari aisati oshequi atiri, yoamejeitapajiri. Tempa aitaque yametaro yoametantapiniti.

Icanti Jesoshi: “Eiro pojocajirotsi pijina”.

(Mt. 19.1-12; Ir. 16.18)

2Ipocashitapaqueri variseo. Icoaveta incomitacayearime Jesoshi, irootaque isampijeitantaapacariri:

—¿Oshinetantampa irojocajero shiram-pari ijina?

3Yacavaqueri:

—¿Paitampa icantimpiniri Moishishi?

4Yacajeitanaqueri iriori:

—Icantini Moishishi: “Pisanquenatajenero pijina, pincamatjero: ‘Nojocajempi’. Impoijiquea oshinetantajea irosati pojocantajearori”.

5Icantanaqueri Jesoshi:

—Te incoaveteaji Tasorentsi pojocajero pijina, iro cantaincha te ontimeli piquenque-shireantari, irootaque isanquenatantimpironiri Moishishini oca.⁶Peerani intantacarori yovetsicantaque Tasorentsi, yovetsicaqueri shirampari. Aisati iroori tsinane yovetsicaqueri. ⁷Irootaque yojocantariri shirampari iriri, aisati iriniro, irantearori ijina.⁸Ari icarati shirampari, aisati tsinane: apite inavetaca. Iro cantaincha, ariorica irayero ijina, inquempetaquea apaniro irinaque: quiso iroavacaya.⁹Ari ineakeri Tasorentsi apaniro inaque, meeca eiro pinijantareacaajiritsi.

¹⁰Ari itimapaaaji anta pancotsiqui.

Isampitajiri aisati iroamere:

—¿Jaoca ocantari oca picantaqueriri?

11Icantiri:

—Janicarica joquerone ijina, ariorica iraaje otsipa tsinane, tempa iraimentearo ijinasanori.

12Aisati oquempeta iroori tsinane, ariorica ojocajeri ojime, aajerica pashimi shirampari, tempa aimenteari ojimesanori iroori.

Yora Jesoshi ineacameetsataqueri jananequipee.

(Mt. 19.13-15; Ir. 18.15-17)

13Ari yameetapaaqueneri jananequipee, icantapaqueri Jesoshi:

—Pincanteri Tasorentsi cameetsa
irisavacacaajeiteri yoca jananequipee.

Iro cantaincha icantavaqueri iroamere-
pee:

—Eiro pamiritsi jananequipee,
pashereircari oametanari.

¹⁴Te onimoteriji Jesoshi yantiri
iroamere. Icantiri:

—Pishineteri impocashitenata
jananequi. Eiro pitsaneanatsi. Pinequeri
yoca jananequi, ishirejeitaquena:
ipincatsariventajiteitiri Tasorentsi maaroni
quempejeitariri iriori. ¹⁵Queariotaque oca
nocamantasanotimpiri, irinti jananequi
ipincatsatiri Tasorentsi. Irompa irinti
yora caari shiiri jananequi, yora caari
pincatsatiri Tasorentsi, eiro ijatitsi irinti
anta ipincatsaritinta.

¹⁶Yavitsanojeitavaqueri jananequi,
ipamitaqueri iitoqui. Icantajeitiri:

—Cameetsa irineshinchoncatempi
Tasorentsi.

Ijaticari Sharincaveniqui ashitaarantincari.

(Mt. 19.16-26; Ir. 18.18-27)

¹⁷Ari ijataji Jesoshi, iquenanaji
avotsiqui. Ishiapaaca aparoni shirampari,
itiyeroashitapaacari. Icantiri:

—Oametantatsiri, cameetsari pini.
¿Paitampa nanteri naneantajeari, noncan-
taitatiyempani?

¹⁸Icantiri:

—¿Paita picantanaranari: “Cameetsari
pini”? Tecatsi cameetsatatsine, irinti apaniro
Tasorentsi icameetsati. ¹⁹Piovintsataquero
oca icantacantiniri Moishishini: “Eiro
poantitsi. Eiro paimentarotsi pijina. Eiro
paimentaritsi pijime. Eiro picoshititsi. Eiro
pitseeyacotaritsi atiri. Eiro pamatavitantitsi
paitanteariri yashiyetari pishaninca.
Pimpincatsateri piri, aisati piniro”.

²⁰Icantanaqueri iriori:

—Pamene, ainironi nevancaritapaini,
aitaque notsoteaquero maaroni ocapee,
irosati meeca.

²¹Yora Jesoshi, yamenanaqueri,
inintaqueri. Icantaqueri:

—Ainiro apanivani caari pimati. Pijate
meeca pimpimantayetero maaroni
pashiyetari. Pimpashijiteari caari
ashitaarantachane, pashini paapaaje
pivaararo inquitequi. Impoiji, tsame,
pojatanaquena.

²²Iquemavaitiiri icantaqueri,
yoashiretanaca. Iro yoashiretantanacari
oshequi timotiriri irovaararo. Icantavo-
rotanaca, ijatanaji. ²³Ari ipitsocashitana-
cari Jesoshi iroamere, icantiri:

—Yora ashitaarantachari opomerentsi-
timotari irijate anta ipincatsaritinta
Tasorentsi.

²⁴Iquemavaitiiri iroamere, yoajeitana-
que cavaco. Yapiitajiniri aisati Jesoshi,
icantiri:

—Evancari, aitaque opomerentsitaca
pijate anta ipincatsaritinta Tasorentsi.

²⁵Tempa opomerentsitaca inqueero cameyo
omoroqui quitsapi. Iroquea irointi pomeren-
tsitasanotachari irijate ashitaarantachari
anta ipincatsaritinta Tasorentsi.

²⁶Yoajeitanaqueri cavaco catsimi iriori.
Icantavacaanaca:

—¿Janicampa meeca avisacotajantsine?
Opomerentsitasanotaca.

²⁷Yamenanaqueri Jesoshi, icanti:

—Eiro imatashtarotsi atiri iroavisacot-
ajearia irisati, irintquea Tasorentsi mataca-
yerine iroavisacotajeri. Tecatsi pomeren-
tsitimatgearine irinti.

Yora Tasorentsi impinajeiteri maaroni oijajeitiriri Quirishito.

(Mt. 19.27-30; Ir. 18.28-30)

²⁸Impoiji Petero icantanaqueri iriori:

—Naroquea nainti, aitaque nojocayeta-
quero maaroni, paitarica nashijeiveita-
niri, noijsatanaquempi meeca avirori.

²⁹Icantiri Jesoshi:

—Queariotaque oca noncantempi.
Ariorica pincoaque pojatanaquena, eiro

patsipetashitarotsi pojocayetero pinampi, pirentipee, pitsiropee, piniro, piri, pijananequitepee, poanepee. Aisati ariorica pincoaque pinquemisantacayeri pishaninca, eiro patsipetashitarotsi.

³⁰Queario, inquisimentempiro piquemisantaquena, ompomerentsivetea, iro cantaincha eiro patsipetashitarotsi.

Ariorica pojocanaquero aparo, impajempi Tasorentsi 100: pivancopee, pirentipee, pitsiropee, piniropee, pijananequitepee, poanepee, maaroni. Aitaque coajica ontimimojeitempi oshequi anta paneasa-nojeitapaagenta, pincantaitiyempani.

³¹Ainiro pincatsarivetzachari meeca, iro cantaincha coajica eiro ipincatsaritajitsi; ainiro meeca yora caari pincatsariyetsatsi, iro cantaincha coajica impincatsarite irinti.

Yapiitajiniri aisati Jesoshi: "Noncamaque".

(Mt. 20.17-19; Ir. 18.31-34)

^{32,33}Ari iquenajeitanaque avotsiqui, irotaintsi irijajeite Jerosarequi, ijivatanaque Jesoshi. Yoajeitanaqueri cavaco oijajeitiriri, aisati itsaroajeitanaque. Ari yapatotiri aisati yora 12 iroamere, icantiri:

—Pinquemena. Tempa nopoloneaca inquitequi, natiritatapaque. Meeca ajate Jerosarequi. Coajica iraacanteetena anta, iraavaquena jivatacaajeitiriri saserotepee, aisati oametantirori sanquenarentsi, iroacantaquena. Iraacantajena aisati, iraantenari pashinisati atiri. ³⁴Irishirontimentajeitaquena, inquitiojena, impasana-tena, iroyena. Omavatapaaque quitaiteri, irosati nontinaanttanajeari.

**Icantiri Jesoshi jaoca incanteari
impincatsaritanteeari.**

(Mt. 20.20-28)

³⁵Ipoqui quempeji Santiano, jeri Joa, yora itomipee Severeo. Icantiri:

—Oametantatsiri. Nocoaque pishinete-naro paitarica noncoacotempiri.

³⁶Icantavaqueri Jesoshi:

—¿Paita picoiri noshinetempi?

³⁷Icantiri:

—Coajica pimpincatsaritasanote, pishine-tena nosaviquimotempi pacosanoriqui. Irio iyeca irisaviquimotempi pampatequi, nonquempejeitempi avirori pipincatsariti.

³⁸Icantiri Jesoshi:

—Te pioteji paitarica picantauquenari. Pamene, oshequi nonquematsicatearo narori, ɿarimpa pimatero oshequi pinquematsicatearo avirori?

³⁹Icantanaque iroamere:

—Je, ario nomataquero.

Icantiri:

—Je, aitaque ontine coajica pinquematsicateari. ⁴⁰Iro cantaincha tecatsi noncantea noshinetempi pisavique nacosanoriqui, aisati nampatequi. Irintiquea cantatsineri Tasorentsi janicarica saviquimotenaneri: iotitacarini peerani yora saviquimotenaneri.

⁴¹Iquemajeitancariri yora itsipapee iroamere, iquisanentanaqueri Santiano aisati Joa. ⁴²Icantajeitiri Jesoshi:

—Caate, pimpocajeite. Pioti itimi ivincatsaritepee pashinipee atiri. Iperanayetacari ishaninca iriori. Aisati yora savicacaajeitiriri iriori, iperanajeitacari ishaninca. ⁴³Eiro piquempejeitaritsi avirori. Aintiquea ariorica pincoaque pimpincatsariventajeiteri pishaninca, pintacojeiteari maaroni pitsipajetari. ⁴⁴Aisati ariorica pincoaque pisavicacante, ari pintacojeiteari maaroni pitsipajetari.

⁴⁵Noponeaca narori inquitequi, natiritatapaque. Te iro nompocantea nonampiteari atiri, iointiquea nopolanta nintacojeiteari itsipapee. Aisati noncamimenteri oshequi atiri, noavisacotanteariri.

Yoavisacotiri Jesoshi Timeojani.

(Mt. 20.29-34; Ir. 18.35-43)

⁴⁶Ari yareetaca Jesoshi anta nampitsi-qui pajitachari Jerico. Yovaanaja aisati, itsipajeitanacari iroamerepee aisati, oshequi apatojeitainchari. Ainiro

isavicaiti avotsinampiqui shirampari pajitachari Timeojani, iriotaque itomi Timeo. Icamarajati Timeojani, icoacotapinitiri atiri impashiteari quirequi.

⁴⁷Iquemacotavaqueri impoque Jesoshi, yora nasaretesati. Iroquaera iquemacotavaqueri, icajemavaqueri, icantiri:

—Jesoshi, tempa aviro ishanincani Iravirini, pineshinoncatapajena narori.

⁴⁸Oshequi atiri ishuntsitsajeitaqueri:
—Pimajerete.

Iro cantaincha aiquero catsini icajemasanotanaji aisati:

—Aviro quempetajariri Iravirini.
Pineshinoncatena narori.

⁴⁹Icatiapaaca Jesoshi, icanti:
—Pincajemerri.

Icajemeetiri camarajari, icanteetiri:
—Piveshireanaquea, pincatianaje.

Icajemiimpri yonta.

⁵⁰Irosati yojocantanacaro yoicotari, icatianaca, cati. Ijatashtanaqueri Jesoshi.

⁵¹Icantavaqueri Jesoshi:
—¿Paita picoacotanari? ¿Jaoca noncantajempiri?

Yacanaqueri camarajari:
—Apa, nocoaque namenaje.

⁵²Icantiri Jesoshi:
—Meeca pijataje. Pishiretaquena, irootaque paviscotantajeari.

Irosati yamenantanaja, yojatanajiri avotsiqui.

**Ijatanaque Jesoshi Jerosarequi,
ipincatsajeitavaqueri atiripee.**
(Mt. 21.11-14; 17; Jr. 19.28-40;
Joa 12.12-19)

11 ¹Iquempejijeitapaacaro Jerosarequi, Vetejajequi, aisati Vetaniaqui: onauenta toncaari pajitachari Orivomashi. Yora Jesoshi itianaqueeri iroamere apite, ²icantavaqueri:

—Pijatapainte anta nampitsiqui onta amontetacari. Pareetapaaquearica, pineapaaqueri aparoni voro, tequera

irantearitasanote, tequera inquijacoyeeteari. Ainiro itsatacota: pintasatacoreapeeri, pamaquenari. ³Ariorica incanteetavaquempi: “¿Paitaquea pitsatacoreantirivoro?” Ari pincantanaqueri: “Irio coiriri Avincatsarite. Coajica iroimpiajempiri aisati”. Ari irishinetemperi.

⁴Ari ijatanaque iroamere. Ineapaaqueri voro anta avotsiqui. Itsatacota ashitacoroqui pancotsi. Itsatacoreapaaqueri.

⁵Aimiro isaviqui atiri, isampitavaqueri:
—¿Paita pantiri? ¿Paita pitsatacoreantarivoro?

⁶Yacanaqueri, icantiri oca icantavaqueri Jesoshi. Ari ishinetavaqueri yaanaqueri voro. ⁷Ari yacatsatacanaqueneri Jesoshi. Yoanquetaqueneri imititsaqui iitsaarepee, impoiji iqujacotacari. ⁸Ari yaniitacaanaqueri avotsiqui, ipincatsajeitavaqueri maaroni ishaninca, imaaroncajeitaqueneri quitsaarentsipee avotsiqui. Yora itsipapee ipesaqueneri inchatoshi, aisati yoaqueneri avotsiqui. ⁹Yora jivajeitaqueriri aisati impojeitaqueriri, icajemajeitanaque:

—Jeritapaaque oavisacojeiteeneri, tsame aacameetsajeitavaqueri. Coraqueni, iriotaque itianaqueeneri Avincatsarite. ¹⁰Peerani Iravirini ipincatsariventirini ashanincani: meecaquea, impincatsarientaquee yoca aneavaquerica. Iriotaque ishaninca Iravirini. Tsame ampincatsajeiteri Tasorentsi inquitequiniri.

¹¹Ari yareejitapaaca Jerosarequi, iqueapaaque ivancoqui Tasorentsi. Itsoteaquero yamenayetaquero, iro cantaincha ishaavijiiteanaque catsirincaiteri. Isoquijanaji, ijatanaji Vetaniaqui. Itsipajeitanajari iroamerepee.

**Ineaquero Jesoshi iyera
caari timatsi oitsouqui.**

(Mt. 21.18-19)

¹²Ari oquitaitamanaji aisati, yojocanajiro Vetania, irijate Jerosarequi.

Nianqui aavetacari itashe.¹³Ineaquero paricoti inchato, pajitachari iyera. Otimaveta oshi. Ari ijatashitiro, icoavetapaacaro oitsoqui. Te aneeroji, irointi oshi. Tequeratsita omoncaratajea oitsoquitan-tajeari.¹⁴Icantanaqueri Jesoshi iroamere:

—Tecatsi iroajeitajeari atiri oitsoqui aisati.

Itiancajeitajiri Jesoshi pimantayevetachari anta ivancoqui Tasorentsi.

(Mt. 21.12-17; Ir. 19.45-48; Joa 2.13-22)

¹⁵Ari yareejeitaja aisati Jerosarequi. Iqueapajji ivancoqui Tasorentsi. Yojocajeitapaquaqueri maaroni pimantajei-vetachari aisati maaroni amanantajeive-tachari. Itatsinquitayetapaquaqueri imesate-peee yora pinavacaavetariri iirequite. Aisati itatsinquitayetapaquaqueri isavacementopee pimantajeiveturri sampaquiti.¹⁶Itsaneapitsajeitacari irayetanaqueme vaarontsi anta ivancoqui Tasorentsi.¹⁷Ari yoametanta-que, icantajeitiri:

—Peerani isanquenatironi irineane Tasorentsi, icantini: “Irootaque oca novanco. Aca inquenquetsatacaa jeitantenari maaroni atiri”. Tempa piojeivetaro. Iro cantaincha avirojei pipeaquero ivanco coshinti.

¹⁸Ari iquemajeitavaqueri maaroni yora apatotimentariri, irootaque yoajeitanta-nacariri cavaco. Aisati iquemacotaqueri jivatacaa jeitiriri saserote, oametantirori sanquenarentsi, maaroni. Icantajeivetaca:

—¿Jaoca ancantaniroteriri Jesoshi, avanteariri?

Iro cantaincha tecatsi incanteri, itsarao-caajeitacari. Tempa ipincatsajeitiri atiri Jesoshi.¹⁹Iqueanajji catsirincaiteri, ari yojocanajiro Jesoshi nampitsi.

Ineajeitaquero iyera, ocamanaque.

(Mt. 21.20-22)

²⁰Oquitaitetamanaji aisati, ipianaja anta onauenta iyera. Ineapaaquero,

ocamanaque, irosati anta ovaritsaqui.

²¹Iquenqueshiretaquero Petero icantana-queri Jesoshi oshaiteji. Icantiri:
—Oametanari, pamenero iyeraca poamaimatanaqueri oshaiteji. Camana-que.

²²Yacanaqueri Jesoshi:

—Pishireteari Tasorentsi.²³Queariota-que oca noncamantajeitempiri. Ariorica pincanteri Tasorentsi: “Povaajero otishinta, poviincajero anta incajarequi”. Eirorica pitseencashiretitsi, aisati ariorica pioshiretasanotaque ovaanaquea, ari irimataquempiro.²⁴Irootaque noncaman-tantempirori oca: ariorica pinquenquetsa-tacayeri Tasorentsi, paitarica pincanteriri, pinquenqueshirete: “Aitaque irimataque-naro nocantaqueriri”. Pishiretearirica, aitaque irimataquempiro.²⁵Ariorica pinquenquetsatacayeri Tasorentsi, pijivate pincavintsayeri pishaninca: eiro piquishimentirtsipaitapeerica iranteri. Impoiji aisati avirori, eiro iquishimentim-pirotsi Apa Tasorentsi pantayetiri avirori.²⁶Eirorica picavintsairsti pishaninca, eiro icavintsaimpsti avirori Tasorentsi.

Icantimentavacaacaro itasorenca Jesoshi.

(Mt. 21.23-27; Ir. 20.1-8)

²⁷Ari yareejeitanaja aisati Jerosarequi, yaniitamanaji anta ivancoqui Tasorentsi. Yora jivatacaa jeitiriri saserotepee, oametantirori sanquenarentsi, aisati savigacaantatsiri ipocashijeitaqueri.

²⁸Icantajeitapaaqueri:

—¿Janica oametimpiori pipincatsari-tantari pimayetantarori pantayetiri? ¿Janicampa meeca peaqueempiri pincatsari, pimayetantarori pantaye-tiri?

²⁹Icantavaqueri Jesoshi:

—Meeca aparo nosampijeittempi avirori. Ariorica pancaquena avirori, noncamantempiro.³⁰Yora Joa ivaotisa-tantayeti. ¿Janicampa tianquiriri

ivaotisatantayeti? ¿Iriompa Tasorentsi tianquiriri? Tericampa, ¿irintimpa atiri tianquiriri? Panquenaqueti.

³¹Ari icantavacaanaca saserotepee:

—Ariorica ancanteri: “Iriotaque Tasorentsi tianquiriri”, icanteecari: “¿Paita caari piquemisantantari Joa?”
³²Aisati eiro acantiritsi: “Iriotaque atiri tianquiriri”. Iquisheecari.

Pineaquero, yora saserote itsaroacaajeitacari atiripee; maaroni atiri ineacameetsajeitaqueri Joa, icantajeiti: “Tempa irio Tasorentsi tianquiriri Joa icamantanti”.

³³Irootaque icantarariri saserotepee:

—Te nioteji janicarica tianquiriri.

Icanti Jesoshi:

—Aisati narori, eiro nocantimpitsi janicarica tiancanari nopincatsaritantari nomatantarori oca.

**Ishiacaventiniri Jesoshi
panquitirori ovamashi.**

(Mt. 21.33-46; Jr. 20.9-19)

12¹Impoiji ishiacantiniri oca, icantiri:

—Ipanquitiro ovamashi shirampari. Itantotacotaquero otsapiqui, yovetsicashitaquero onanteari ovaja. Impoiji yovetsiquiro shitamencotsi anta jenoqui iramenacoventantearori maaroni. Impoiji aisati icantiri tsameetacantatsiri: “Pishentenaro maaroni: coajica nompinatempi cameetsa”. Impoiniji ijatanaque pashini qui quipatsi.
²Osamanitapainti iraacanaque oitsoqui ova. Ari yora ashitarori itiancavetari inampire aparo, iraaranteme ova.
³Te impavaqueriji, irointi yaanirotavaqueri, tapi; ipasatashitavacari, tac, tac. Yoipiavajiri, tecatsi iraanaque.
⁴Ari itiancavetaca aisati itsipa inampire. Iposainatavaqueri iitoqui, toc, toc, yoashinoncaavaqueri.
⁵Itiancavetaca pashini aisati. Yoavaqueri, shemi. Aisati itiancavetacari oshequi itsipapee: aparopee ipasanatavaqueri, irio itsipapee

yoavaqueri.
⁶Apanivaniquea itimanaque itomi irlori, intintasanotiri. Icantashiretanaque irlori: “Irioricampa irinti notomi irio impincatsatavaqueri”. Itiancavetacari irlori.
⁷Iro cantaincha icantavacaanaca tsameetacotirori: “Jeritapaaque itomi ashitarori, ariorica incamaque iriri, irotaque yoca ashitasanonajeearoneri. Tsame avavaqueri, impoijiquea ashijeitajearota ainti irovamashite”.
⁸Ari yaavaqueri, yoanirotavaqueri, shemi. Yojocacheri otsapitapaaca ovamashi.
⁹¿Paita piquenqueshirejeitiri? ¿Jaoca incanteriri ashitarori irovamashite?
 Tempa impoque irinti, impoyereapaaqueri iratiritepee. Pashini iramenaje shentajenerine.
¹⁰Tempa pineanatiro sanquenarentsi. Ocanti: “Yora vetsiquerenemi pancotsi itseencajiro mapi intincamitantearameri ivanco, icanti: ‘Te oncameetsateji’.”
¹¹Iro cantaincha Avincatsarite ipeajiro mapica otincami ivanco, ocameetsatasanoti. Tempa irootaque avantanacari cavaco”.

¹²Iotacojeitavaquero icantaqueri Jesoshi, irotaque ishiacaaventaqueri. Icoajeiveta iraajeitanquerime, iro cantaincha itsaroacaajeitacari yora apatotimentajeitacariri. Ari yojocajeitanjiri, ijajeitanjiri.

**Isampitiri variseopee: “¿Arimpa ampajeri
ivincatsarite oromasati airequite?”**

(Mt. 22.15-22; Jr. 20.20-26)

¹³Itianqueetiri variseopee aisati oijatiriri Eroreshi. Icoavetaca incomitacayearime irineane Jesoshi.
¹⁴Yareetapaaca, icantapaaqueri:

—Oametantsiri, niojeitaquempi aviotaque cameetsatatsiri. Te oncantimoneentanaquemppiji paitarica icantayetiri atiri, te pintsaroacayeariji. Tampatica poametantiro icoacaajeiteeri Tasorentsi. ¿Ocameetsatimpa nomperi ivincatsarite oromasati quirequi? ¿Tericampa

oncameetsateji? ¿Nomperimpa?
¿Eirompa nopersitsi?

¹⁵Iotacotaqueri Jesoshi, iramatavite-rime yoca sampitaquerir. Icantiri:
—¿Paita picoantacari pincomitacaye-name? Pamaquenari quirequi, ponijaye-nari.

¹⁶Ari aparo yamaqueneri. Isampijeitiri:
—¿Janicampa shiacantachari ivoroqui?
¿Janicampa ashitarori ivajiro?
Yacajeitanaqueri iriori, icantiri:
—Irio ashitaro Shisari, yora ivincatsa-rite oromasati.

¹⁷Icantiri:

—Panteneri pincatsari icoacaimpiri,
aisati panteneri Tasorentsi icoacaimpiri
iriori.

Yoajeitanaqueri cavaco yora sampijeti-
riri.

**Icantiri Jesoshi: “Queario,
antinaajeitanaje”.**

(Mt. 22.23-33; Ir. 20.27-40)

¹⁸Icantapiniti saroseo: “Eiro itinajatsi
camatsiri”. Ari ipocashitiri iriori Jesoshi,
isampitapaqueri:

¹⁹—Ometantatsiri, isanquenajeitanaroni
peerani Moishishi, icantini: “Ariorica incame
shirampari, irojocanaqueri ijinani. Eiorica
itimacaanaquerotsi itomi, cameetsa iraitajeri
irirentini ijinani. Ariorica intimacayero
itomitsori camaintsiri, irishiacantajeitajeri
itomisanori iriori”. ²⁰Ari. Ainiro shirampari
irirenti. Yaaveta ijina, impoiji icamaque,
toren. Tequera intimacayero itomi.

²¹Yaavetajaro irirentini apitetapaintsiri.
Icamaque iriori, aisati te intimacayero
itomi. Aisati iquempetaja iriori yora
mavatapaintsiri. ²²Aisati iriori iquempejei-
taca maaroni irirentini. Tecatsi intimacayero
itomi. Impoiji ocamaque iroori tsinane,
toren. ²³Coajica ariorica intinaajeitanaje
camajeitaintsiri, ¿janicampa aajeroneri?
Tempa aitaque ijinantajeiveitaroni maaroni.

²⁴Icantiri Jesoshi:

—Te pioteroji sanquenarentsi, aisati te
piotacoterji Tasorentsi, tempa irootaque
picomitantacarori oca. ²⁵Icamajeitaque,
toren. Coajica intinaajeitanaje aisati. Iro
cantaincha eiro yaajitsi aisati ijina. Eiro
itimajitsi aacaajerineri aisati. Aitaque
irishiapaajeari inampire Tasorentsi
savcatsiri jenoqui. ²⁶Meeca noncaman-
tempi: aitaque intinaajeitanaje camajeita-
tsiri. Tempa pineanataquero isanquenare
Moishishi. Oquenquetsatacotiro quitotse-
quishi, otaavetaca iro cantaincha te
ontsonqueaji. Anta iquemaquero peerani
Moishishi icantiriri Tasorentsi: “Narota-
que Tasorentsi, icantani ipincatsajeita-
quena Avarama, Isaca, aisati Jacovo”.

²⁷Pineaquero, aneatsi ini iriorije, irosati
icantani iquemisantiri Tasorentsi. Te
inquemisantajeji camaintsiri, irintiquea
aneatsiri. Pineaquero, te ampowereempa-
ji. Oshequi picomitasanotaca avirori.

**Iquenquetsatacotiro
icoacaasanotaqueeri Tasorentsi.**

(Mt. 22.34-40)

²⁸Iquempejitapaque aparoni oametan-
tirori sanquenarentsi. Iquemappaqueri
icantavacaanaca. Iotacotapaaqueri
Jesoshi, cameetsa yoametavaqueri
saroseo. Ari isampitapaqueri:

—¿Paita icoacaasanoteeri Tasorentsi?

²⁹Yacanaqueri Jesoshi:

—Tempa isanquenataqueeroni Moishi-
shi peerani icoacaasanoteeri Tasorentsi.
Jero oca isanquenatiniri: “Noshaninca,
pinquemisantajeitena. Yora Tasorentsi,
iriotaque Avincatsarite, apaniro
ipincatsariti irinti. ³⁰Oshequi catsini
pinintasanoteri, pincanteani. Aisati
pinquenqueshiretapiniteri”. ³¹Aisati
isanquenatiniri: “Oquempetaca avisati
nintajancha, aisati pinquempejeiteri
maaroni picarajeitiri, pinintajeiteri”.
Irootaque inintacaasanojeitaqueeri
maaroni.

³²Icantanaqueri oametantirori sanquenarentsi:

—Je, aitaque. Queariotasanoque oca picantaqueri. Apaniro ini Tasorentsi, tecatsi pashini. ³³Cameetsa oshequi catsini anintasanoteri, anquenqueshiretaineriteri. Aisati oquempeta arosati nintajancha, aisati anquempeteri maaroni acarajeitiri, anintajeiteri iriori. Irootaque icoacaasanotaqueeri Tasorentsi. Te iro incoasanote atayeneri poshiniri.

³⁴Iquemaqueri Jesoshi, cameetsa icantaqueri, icantiri:

—Irotaintsi pimpincatsateri Tasorentsi, impincatsariventantempi iriori.

Impoiji itsaroacaajeitacari atiripee irisampitajerime aisati.

Iquenquetsatacotaja irisati Quirishito.

(Mt. 22.41-46; 23.1-7; Ir. 20.41-44)

³⁵Yoametanti Jesoshi anta ivancoqui Tasorentsi:

—Icanti oametantirori sanquenarentsi: “Yora Quirishito, irishanincatasanotajeari Iravirini”. ¿Paita icantantarori? ³⁶Tempa iro Ishire Tasorentsi sanquenatacariniri Iravirini. Isanquenataqueroni oca: “Yora Tasorentsi icantiri novincatsarite: ‘Pisavique aca nacosanoriqui, pincaratena ampincatsarieite. Aitaque noasandquetaa-jeiteri maaroni quisajeivetaquemperi’”.

³⁷Tempa iquenquetsatacotitarini Iravirini Quirishito, icantiri: “Novincatsarite”. ¿Jaoca incanteari Iravirini impincatsat- jeri ishaninca impoitajantsiri itimi?

Ari iquemajeitavaqueri, iquimoshirejeitanaque oshequi apatotimentacariri. ³⁸Ari yoametantaji aisati, icanti:

—Paamayeariya oametantirori sanquenarentsi. Icoashita iroeaneencashitea, irishemetacayero iitsaare, inquenatenatsatsacaayetero. Icoaque irineacameetsatasashiteari ishaninca anta nampitsiqui. ³⁹Aisati ariorica ijatapiniti anta pancotsiqui yapatojeitanta, icoyeapi-

nitiro savicamentotsi cameetsatasanota-tsiri. Aisati ariorica irampatojeitea ishaninca iroajeitearica, icoaque iriori irisatecapeempa nianqui incarajeitantea- riri pincatsaripee. ⁴⁰Yaapitsaniotaquero maaroni timimovetarori camajimentaaro. Osamani ineanatashimempeavetacari Tasorentsi, vero, vero. Oshequi yamatavi- tantaveta, iro cantaincha coajicani iroasanquetasanotaqueri catsimi Tasoren- tsi.

Ora ashinoncaincaro opaqueri Tasorentsi maaroni timimovetarori.

(Ir. 21.1-4)

⁴¹Ari isavicaque Jesoshi, imontetacaro yoapiniyetantariri quirequi. Yamenajeita- queri oshequi pocajeitatsiri, itetapinitiri iirequite yoantaririqui. Ipoqui oshequi ashitaarantincari, itetapaaque oshequi catsini iirequite. ⁴²Opocapaaque iroori aparoni camajimentaaro ashinoncaincaro. Otetapaaque iroori apimentaquite quirequijaniqui, te impinaveteoji irinti.

^{43,44}Icajemiri iroamere, icantiri:

—Queariotaque oca noncamantempi: capichaji otevetaca oca ashinoncaincaro, iro cantaincha ineacameetsatasanota- quero Tasorentsi. Tempa opaqueri maaroni timimovetacarori: tecatsi meeca amanantantajeari oyeari. Irintiquea yora ashitaarantincari, oshequi itejivetaca, iro cantaincha te irineacameetsatasanote- riji Tasorentsi: tempa oshequitatsi iirequite iquempoyeanontari.

Icantiri Jesoshi: “Coajica ontireanaja ivanco Tasorentsi”.

(Mt. 24.1-2; Ir. 21.5-6)

13 ¹Impoiji isoquijanaji Jesoshi. Icantiri aparoni iroamere:

—Oametanari. Pamenero mapica yovetsicantarori ivanco Tasorentsi: antearo oni, aisati ocameetsati pancotsi.

²Icantiri Jesoshi:

—Pinequero jaoca ocantari oca mapipanco. Antearo onaveta, iro cantaincha coajica intireetajero, ojocayetanaquea nijanteji mapi. Ompoyereajea pancotsi.

Isampitiri iroamere:

“¿Jaoca oncarate ontireantajeari?”
(Mt. 24.3; Ir. 21.7)

³Impoiji isavicanaque Jesoshi toncaariqui, opajita Orivomashi. Imontetapaaro ivanco Tasorentsi. Imananaca Petero, Santiaco, Joa, jeri aisati Antirishi: ijatashijeitaqueri Jesoshi. ⁴Isampitapaaqueri:

—Pincamantajeitena. ¿Jaoca oncarate ontireantajeari ivanconta Tasorentsi? Ariorica coajica omoncarataapeempa ontireanteari, ¿jaoca noncanteari niotantajeari?

Icantiri Jesoshi: “Coajica irashinoncaajeitea atiri”.
(Mt. 24.4-8; Ir. 21.8-11)

⁵Icantiri Jesoshi:

—Yamataviyeteimpicari. ⁶Intime oshequi pocayetsatsineri, cantatsineri: “Narotaque nainti Quirishito”. Iramatavitapeeri oshequi atiri. ⁷Ariorica pinquemacoteri imanatava-caaca atiri, aisati pinquemerri pashini cantatsine: “Irimanatavacaajeitea atiri”. Iro cantaincha eiro pitsaroanaqueti. Aitaque oncanteari coajicani, irimanatavacaapinitaea, iro cantaincha tequerata omoncarateaji nompincatsaritantaquera. ⁸Yora atiri inquisapinitanaqueri itsipapee. Oshequi irimanatavacaajeitea itsipasatipee atiri. Onicapinietanaquea quipatsi, aisati intasheapinijeitanaque atiripee. Aiquero ojatatiye, inquematsicajeitearo paitapeerica, irashinoncaasanojeitanaquea.

Icantiri Jesoshi: “Inquisheetapinijeiteri quemisantsatsiri”.

(Mt. 24.9-14; Ir. 21.12-19)

⁹Aisati icantaqueri Jesoshi:

—Paamaventea. Icantacoventeimpicari, yaimpicari yora oametavacainchari.

Ariorica pijate anta yapatojeitantari aitaque impasanayeetavaquemperi, tac, tac. Iraanaquempi anta itiminta savicacaantatsiri, aisati anta itiminta pincatsari. Ariorica irayempi, irosati pinquemisantacayeri, iravisacotantajeari.

¹⁰Irijivajeite maaroni atiri inquemacojeten a noaviscotanti, impoiji nompocaje, nompincatsaritasanotapaaque. ¹¹Ariorica irayeetanaquempi anta, ariorica incanta-coventeetempi, eiro picantashiretitsi: “¿Jaoca noncanteriri?” Aitaque oameta-quempi Ishire Tasorentsi paitarica pincanteriri. Irootaque neanatacaaquem-pine, eiro pineanatashitatsi avirori.

¹²Coajica aparo shirampari iraacanteri irirenti, iroacantanteariri. Pashini iraacanteri itomi. Aisati pashini atiri inquisanaqueri ashitariri, iroacanteri.

¹³Piquemisantaquena, irootaque inquisanteetemperi maaroni. Queario, ompomerentsitimojeitempi, iro cantain-cha ariorica pincanteani pishiretasano-tena, aitaque noaviscotajempi.

Icantiri Jesoshi:
“Coajica ompomerentsitasanotanaquea anta Joreaqui”.
(Mt. 24.15-20; Ir. 21.20-23)

¹⁴Aisati icantiri Jesoshi:

—Ariorica pineanatero isanquenarenri Iranirini, piotavaquero icantiniri: irashinoncaajeitanaquea atiri. Icanti intime ivancoqui Tasorentsi caari cameetsatatsine. Te oncameetsateji intime anta. Ariorica pintime Joreaqui, aisati pineeririca yoranqui, pishintsite pishiajeitanaque anta toncaariqui.

¹⁵Ariorica pisavique pancotsiqui saiteriqui, eiro piqueapanajantitsi paantapanajantearori paitapeerica, irointi pishianaque. ¹⁶Aisati pisaviquerica oantsiqui, eiro pipiapanajantatsi paantapanajantearori piitsaare. ¹⁷Ariorica omoncarataapeaquea maaroni oca, joo,

oshequi ashinoncayetanaquea tsomonte-yetasine, aisati ashinoncaaquea antsotayerine ojananequite: ompomerentsitimo-jeitearo oshianaque. ¹⁸Pincanteri Tasorentsi, oncateata ariorica pishianaque, eirotarica oparii incani. Pishiasano-jeitanaque, yaimpicari quisajeitempineri.

**Yaamaventacaajeitacari Jesoshi:
“Yamatavitimpicari”.**

(Mt. 24.21-26; Ir. 17.22-24; 21.22-24)

¹⁹Jero aisati icantiri Jesoshi:

—Aitaque coajica irashinoncaasanojeitanaquea catsini oshequi atiri. Peerani te irineapiniveitaroni quempetearoneri oca, jeri yora maaroni intacaroniri, te irineeroni. Coajica aisati maaroni impoitajantsineri, eiro ineirotsi aisati quempetearoneri oca. ²⁰Irishintsite iroimajerentajeiteri Tasorentsi: eiorica, impoyereavacaajeiteame. Iro iroimajerenteariri, incavintsaajeiteri quemisanta-jeiterineri, tempa irinintajeiteri iringi. ²¹Pamene, ariorica incamanteetempi: “Pineavaqueri: jerica Quirishito”, eiro piquemisantiritsi. Aisati ariorica incanteete: “Pineaveri: jeri yonta”, eiro piquemisantiritsi catsini, itseeyani.

²²Impocapaaque amatavitantatsine, incantapaaque: “Narotaque nainti Quirishito, narotaque camantantatsiri”. Intasorentsimepmpeavetapaaquea, incoavetaquea pinquemisantavaqueri, irimayetempiro caari pineapiniti. Incoavetae iramataviterime quemisanta-jeitiriri Tasorentsi, iro cantaincha tecatsi incanteri. ²³Paamaventea. Nojivatita-quempiro nocamantasanojeititaquempiro maaroni.

Yora Jesoshi icamantacotaja impiantajeari.

(Mt. 24.29-31; Ir. 21.25-28)

²⁴Aisati icantiri:

—Ariorica irovecaraanaquero iquisava-aajeita, impoijiquea intsitenitanaque

catsirincaiteri, eiro iquempetajatsi meeca. Aisati eiro iquitasantanajitsi cashiri.

²⁵Aisati impariaarantanaque impoquiropee, imponeaquea inquitequi, imporocayetanaque itsipapee. ²⁶Noponeaca inquitequi, natiritapaaque: coajica irineajeitavajena atiri nonquenapaaaje mencoriqui. Nontasorentsitasanotapaaque, nompincatsaritapaaque. ²⁷Aisati nontiancajeiteri nonampirepee irampato-jeiteri maaroni quemisantajeitanari. Imponeanaquea maaroni quipatsipeequi.

Ishiacaaventiniri Jesoshi iyera.

(Mt. 24.32-35; Ir. 21.29-33)

²⁸Yovaajiniri aisati, icantiri:

—Jero oca piotantearori oshiacaaventiri iyera. Iroquerarica oshiocajempequiyetaje, ariorica ontimanaje oshi, piotaque irotajantsi osarintsitapaaque. ²⁹Aisati, ariorica pineajeitavaquero maaroni oca nocamantayetaquempi, piote quempejtapaajana, irotantsi nompocashitajantempi. ³⁰Queariotaque oca nocamantimpipi. Tequeratsita pincamajeite avirori, omoncaratapaaquea maaroni oca nocamantimpipi. ³¹Ompeajea inquite aisati quipatsi, irompa irointi noneane, eiro opeajatsi.

Aamaajeitajeari Jesoshi: te ayojeiteji jaocarica oncarate impocantajeari.

(Mt. 24.36-51; Ir. 21.34-36)

³²Jeroca aisati icantiri:

—Jaocarica oncarate quitaiteri, jaocarica incarate catsirincaiteri, tecatsi iotatsine. Aisati te iriojeji yora inampire Tasorentsi jenoquiniri. Pamene, narotaque itomi Tasorentsi, iro cantaincha te nioteji. Irintiquea iotatsi apaniro Apa. ³³Paamaventea, aisati paamajetenena. Te pioteji jaoca oncarate nompocantajeari. ³⁴Nonquempeteari shirampari, jatatsiri paricoti. Ariorica yojocanaquero ivanco, icantajeitanaqueri

maaroni inampirepee paitarica irantajei-teneriri. Aisati iriori yora shentiniriri ivanco icantanaqueri iriori: "Paamaajeneya".³⁵ Irootaque nocantajeitamimpri: paamaajeitajenaya avirori. Te pioteji jaoca oncarate nompocantajeari: ariorica inqueanaje catsirincaiteri, ariorica nianquite tsiteniri, ariorica irineaje teapa, ariorica onquitamaroiteamanaje quitaiteri nompocaje.³⁶ Paamaventea, paamaasanojeitena. Ariorica nompocaje, nomapocapaimpicari. Noneapaimpicari, maatsimpi catsini.³⁷ Oca nocantimpri, irootaque nocantajeitaqueriri maaroni atiri. Paamaventasanojeitea, paamaasanojeitena, maaroni.

**Icoajeitaque joriopee
iraacaantajeiteri Jesoshi.**

(Mt. 26.1-5; Ir. 22.1-2; Joa 11.45-57)

14 ¹Ari apitenivani quitaiteri omoncaratajea quitaiteri yavisan-taniri. Iro iquenqueshirentarori quitaiteri peerani yavisan-taniri inampire Tasorentsi, oajeitiriri itomipee ejipitosati. Quitaiteri yavisan-taniri te iroapinitearoji tapiachari tanta, irointi caari tapiacha. Ari icoaque jivatacaajeitiriri saserotepee aisati oametantirori sanquenarentsi jaoca incanteriri iramataviteri Jesoshi, iraантeariri. Aitaque icoaveta iroyerime Jesoshi. ²Icanti:

—Eiro aantaritsi quitaiteri yavisan-taniri: iquisacoventajeitaricari atiripee.

Osaitiri Jesoshi casancajari.

(Mt. 26.6-13; Joa 12.1-8)

³Ari isavicaque Jesoshi Vetaniaqui, anta ivancoqui Shimo patsaaveitachaniri. Oshequi oajeitachari anta. Opopapaaque tsinane, amacotapaaquero casancajari. Iojataca oja nararo, oshequi ovinaro. Ocameetsatasanoti onantari, iro yovetsi-queetiri mapi pajitachari aravashitoro. Ocarajacotapaaqueneri, osaitantapaacari

iitoqui. ⁴Itimanaque aparopee quisaneen-tateitaquerori. Icantavacaanaca iriori:

—¿Paitampa meeca aparajatantacarori oca casancajari? ⁵Arime ompimanterome, aantaquearome oshequi quirequi, impoiji-quea ompayeterime ashinoncayetachari.

Impoiji iquisatsajeivetacaro, ⁶iro cantaincha icantiri Jesoshi:

—Eiro piquishimentirotsi. ¿Paita pashereanttarori? Ocameetsatasanoti osaitaquena. ⁷Aitaque incantaitatiyempani ashinoncaincar: pincanteani pincarajeiteri, aisati pineapiniteri. Ariorica pincoaque pintacoteari, aitaque pimataquero, pimpaqueri. Irompa nainti, eiro nocantaita-tiani nontspajiteimpi aca. ⁸Te omayeteroji paitapeerica, irointi omataque osaitaquena. Tempa asaitapinitiri camatsiri, iro cantaincha te iriotacoteaji. Irointi oca tsinane ojivataquena osaitaquena, aneatsquierana noni. Iotaquena noncam-aque. ⁹Queariotaque oca noncamantempri: jaocarica incamantantajeitero atiri noneane, incamantacotero antaqueri oca tsinaneca, inquenqueshireajeitanteorori.

**Iquenqueshireti Jorashi
iraacanteri Jesoshi.**

(Mt. 26.14-16; Ir. 22.3-6)

¹⁰Ainiro iriori Jorashi Ishicariote icarajei-tiri iroamere Jesoshi. Ijatanaque apaniro anta itiminta jivatacaajeitiriri saserotepee, incantacoventanteariri Jesoshi. ¹¹Iquemajei-tavaqueri ora icantapaaqueriri, iquimoshire-jeitanaque, icantiri:

—Cameetsataque: oshequi nompinajei-tempi quirequi.

Impoiji iquenqueshireti Jorashi:

—¿Jaoca noncanteriri naacantante-ri? ¿Jaoca oncarate?

Yovetsicajeitiro iroamere iroajeiteari.

(Mt. 26.17-19; Ir. 22.7-13)

¹²Moncaratapaaca quitaiteri yoajeitan-tarori tanta, caari tapiacha. Aisati yoari

ovishajaniqui: yametapinijeitaro yoajeitari quitaiteriqui iquenqueshiretappinitiro yavasantaniri oantatsiri peerani. Isampitiri Jesoshi iroamere:

—¿Jaoca picoaqueri novetsicajeitero avajeiteari?

¹³Ari itiancaque iroamere apite, icantiri:

—Pijate nampitsiquinta. Aitaque pintonquitavaqueari aparoni shirampari, iraacote chomoqui nije. Poiyatanaqueri iriori. ¹⁴Jaocarica anta inqueapaajeri, aitaque iniri ashitarori ivanco; iriotaque pineanatapeeri. Pincantapaaqueri: “Icanti oametantsatsi: ‘¿Jaocame nosavicanta-peempari, noacantapeempariri noamere?’” ¹⁵Irosati ironijantavaquempirori anta jenoqui oshitamencotanta: antearo oni. Timatsi ovetsicajeitaca maaroni avantayetearori: apanivaniji povetsicajeitapaaquiero ayeari.

¹⁶Ari ijatanaque iroamere nampitsiqui, ineapaquiero oca icantaqueriri, impoiji yovetsicapaaquiero yoari.

Icamantacotaqueri Jesoshi aacaanterineri.

(Mt. 26.20-25; Ir. 22.21-23; Joa 13.18-30)

¹⁷Ari ishaavijiiteanaque catsirinacaiteri. Yareetapaaca iriori Jesoshi, itsipajeitapacari iroamerepee. ¹⁸Isavicateitapaaque, yoajeitapaaca, icantiri Jesoshi:

—Queariotaque oca noncamantempiri. Meeca acarajeitica, timatsi aacantenaneri, oacojeitaqueeri.

¹⁹Yoashirejeitanaca, icantiri aparo:

—¿Narompa aacantempineri?

Aisati itsipa:

—¿Narompa?

Aisati itsipapee isampijkeitanaqueri.

²⁰Icantiri Jesoshi:

—Tempa iriotaque aacantenaneri chaantacotaquenari meeca nomatitatequi.

²¹Noponeaca inquitequi, natiritapaaque. Irotanaintsi nonceme: aitaque ontstaaquea isanquenatacotitaquenari. Iro

cantaincha irashinoncaitaquea yora aacantenaneri. Eirome itimime iriori, eirome yaacantaname, aisati iriori eirome iquematsicatarome, coajica.

Ishiacaventajeitaqueero

Jesoshi incamimentajeitee.

(Mt. 26.26-29; Ir. 22.14-20; Joa 13.21-30;
1 Cor. 11.23-26)

²²Ainiro yoajeitaca, yaaquiero Jesoshi tanta. Ipasonquitiri iriri, icarajaquiero, ipajeitaqueri iroamere. Icantiri:

—Paajeitero, tempa narotaque camimentajeitempineri.

²³Impoiji yaaquiero pajoqui aisati. Ipasonquiaqueri iriri, ipacojeitaqueri, irajeitavaquiero. ²⁴Icantajeitaqueri:

—Irootaque niraja amparajatimenteri-neri oshequi atiri. Ariorica noncamimen-tempi, piojeitaqueri queario icantaquem-piri Tasorentsi, iroavisacojeitimpri.

²⁵Queariotaque oca nocamantajeitimpri. Eiro meeca napiitajirotsi aca quipatsiqui nirajero ovaja. Ariorica nosavicapaaje anta ipincatsarinti Tasorentsi, ari nirapajero pashinijari.

Icantajeitiri Jesoshi iroamere:

“Coajica pojocajeitanaquena”.

(Mt. 26.30-35; Ir. 22.31-39; Joa 13.31-38)

²⁶Ari ipampoyeaventajeitanaqueri Tasorentsi, impoiji ijajeitanajji anta toncaariqui, opajitanta Orivomashi. ²⁷Icantajeitaqueri Jesoshi:

—Coajica pojocajeitanaquena. Aitaque isanquenatacotiteetaquempini: “Noyeri yora shentiriri ovisha, impoiji inquena-shiveetanaquea irovishate”. ²⁸Iro cantaincha, coajica nontinaanaje, nojivajeitana-quempi anta Carireaqui.

²⁹Icantiri Petero:

—Ariorica irojocajeitimpri maaroni inti yoca, irompa nainti, eiro nojoquim-pitsi.

³⁰Icantiri:

—Queariotaque oca noncamantempi: meeca tsiteniriqui, tequeratsitarica irampiitajerota irineaje teapa, oshequi pintaroanaque. Oncarate mava pincante: “Te nioteriji Jesoshi”.

³¹Iro cantaincha icantasanoti Petero:

—Eiro nojoquimpitsi. Ariorica ancara-jeitavacayea ancamajeite, eiro nocantitsi: “Te nioteriji”.

Aisati omoncarataca icantajeitaqueri maaroni itsipapee.

Iquenquetsatacairy Jesoshi iriri anta Jetsemani qui.

(Mt. 26.36-46; Ir. 22.39-46)

³²Ari yareejitapaaaca anta Jetsemani qui. Icantajeitiri iroamere:

—Pisavicajeitavaqueta aca, nonquen-quetsatacavaquerita Apa.

³³Irintiquea yaanaqueri Petero, Santiaco, jeri Joa. Iquenqueshireanaca, aisati yoashiretanaca. ³⁴Icantiri:

—Oshequi catsini noashiretasanota-naca. Pisavicaavaqueta aca, pisaquityeaya.

^{35,36}Ari yovaanaca capichaji ara. Itiyeroanaca quipatsiqui, iquenquetsatacairy iriri. Icantiri:

—Apa, aviro avinti mayetirori maaroni, paitapeerica. Nocoavetaca poavisacotename oca nonquematsicatari, iro cantaincha eiro pantirotsi nocoavetari narori, pantenaro picoacaquenari avinti.

³⁷Impoiji ipianaja anta isavicauenta iroamere. Ineapaatiiri, maajeitaque. Icantapaquaqueri Petero:

—Shimo, ¿maaqueimpampa? Tempa pamavetimatero pisaaquitimate capichaji.

³⁸Pisaaquite. Pincanteri Tasorentsi oncanteataquea ariorica incoaque camaari irantacaye-tempiro caari cameetsatatsi, eiroquea pantantarotsi. Queario picoasanovetaca pantenerime Tasorentsi icoacaquempiri, iro cantaincha te pimateroji.

³⁹Ipianaja aisati, iquenquetsatacairy aisati iriri. Irosati icantajiri icantquaqueri

incaranqui. ⁴⁰Ipiapaaja aisati, ineajeita-paajiri, maajeitaji aisati. Oshequi catsini aajeitaqueri ivochoquine. Oshequi ipashiventajeitaca, te irioteji pitarica incanteriri. ⁴¹Ari ipianaja aisati mavata-paintsiri. Impoiji icantapaquaqueri:

—Meecaquea pimaajeite, pimaoreajeite. Noponeaca inquitequi, natiritapaa-que. Moncaratapaaca, aitaque meeca icantacoventaquena: irayena meeca caari quemisantatsi. ⁴²Meeca pintinaanaje, tsame ajataje. Ja, jeri yocatapaaque aacantenaneri.

Yaajeitaqueri Jesoshi.

(Mt. 26.47-56; Ir. 22.47-53; Joa 18.2-12)

⁴³Irosatiquera ineaveeti Jesoshi, ipocapaa-que yora Jorashi, iriotaque tsipaveitariniri yora iroamere Jesoshi. Itsipajeitapaaacari meeca oshequi atiri. Yamajeitapaaque isavritepee, aisati inchaquipee. Iriojeitaque itiancane jivatacaa jeitiriri saserotepee, jeri itiancane oametantirori sanquenarentsi, jeri savicacantatsiri. ⁴⁴Icantajeitacari yora Jorashi:

—Meeca noncamantasanotempi piotantapeempariri Jesoshi: pinea quena nonintavorotapaaqueri, pajiricapeeri. Paanaqueriyea, pishentasanoteriya.

⁴⁵Ari ipocapaaque, iquempejitapaaacari. Icantapaquaqueri:

—Oametanari.

Inintavoronirotapaaqueri. ⁴⁶Yajiricajeitapaaqueri, tapi, yaajeitanquaqueri. ⁴⁷Aparo iroamere yaquiero isavrite. Ipeshitaqueri iyempita inampire ivincatsarite saserote, peti. ⁴⁸Icantajeitavaquaqueri Jesoshi:

—¿Narompa coshinti? ¿Paita pamashitananari pisavritepee aisati inchaquipee? Paashitanaquena, eiro noshiapitsa-timpitsi. ⁴⁹Aitaque maaroni quitaiteri notsipajeivetaquempi anta ivancoqui Tasorentsi, noametantini. Ja, payenani-queti. Meecaquea omoncarataca ocantiri sanquenarentsi.

⁵⁰Iriori iroamere, yojocajeitanqueri, ishiajeitanaca maaroni. ⁵¹Aparoqua evancari oijavetanacariri Jesoshi. Te inquiatsaatanaqueaji, irointi yampinaica-naca ivashicaro. Yajiriqueevetavacari, ⁵²itsaneanaca iriori, yojocanaitiro ivashicaro, ishiatsempequitanaca.

Icantajeiti pincatsaripee: “Ocameetsati incame Jesoshi”.

(Mt. 26.57-68; Ir. 22.54-65;
Joa 18.12-14, 19-24)

⁵³Impoiji yaajeitanqueri Jesoshi ivincatsaritequi saserote. Yapatojeitim-tapaacari maaroni jivatacaajeitiriri saserotepee, savicacaajeitantsiri, aisati oametantirori sanquenarentsi. ⁵⁴Iriori Petero yojatacoventavetanacari Jesoshi, iro cantaincha nijanteaji, irosati yareetan-tapaaca anta ivancoqui saserote. Isaviqui-motapaaqueri yora nampirentsipee, itatapaaquiero paamari. ⁵⁵Ainiro aisati anta pancotsiqui ivincatsarite saserote aisati maaroni oametavacaajeitachari. Isampijeitiri atiri:

—¿Pineacotaquerimpa yantiro Jesoshi caari cameetsatatsi noacantanteariri?

Iro cantaincha, tecatsi irineacoteri.

⁵⁶Ipocapaaque oshequi tseeyacotacariri, te omoncarateaji icantayetaqueri. ⁵⁷Aparopee catianaincha, itseeyacotashitacari, icanti:

⁵⁸—Noquemajeitaqueri Jesoshi, icanti: “Coajica noshoveajero ivanco Tasorentsi, oca yovetsicane atiri. Ari oncarate mava quitaiteri novetsicajeneri nainti pashini ivanco, caari yovetsiqui iriori atiri”.

⁵⁹Iro cantaincha te omocaratavacayeaji icantayevetacari.

⁶⁰Icatianaca nianqui yora ivincatsarite saserote. Isampitaqueri Jesoshi:

—¿Paita caari paquimatanta? ¿Paita ojita oca icantacoyetaquemperi yoca?

⁶¹Iriori Jesoshi imajeretaque, te iranqueji. Yapiitaqueri yora ivincatsarite saserote:

—¿Avirompa Quirishitotatsiri, itomi Tasorentsi noneacameetsajeitiri?

⁶²Yacanaqueri:

—Narotaque. Aitaque noponeaca narori inquitequi, natiritapaaque. Coajica pineajena nosavique anta iracosanoriqui Apa, noncarateri nompincatsarijeite. Aisati pineavajena nonquenantapajearo onta mencerinta, nompiae aisati quipatsiqui.

⁶³Yora ivincatsarite saserote yaitana-caro iitsaare, itsereanaquero, tsererere; iquisanaca. Icantanaque:

—¿Paitampa meeca acoantari pashini camantacoterineri? ⁶⁴Piquemajeitava-queri meeca: ijitasorentsinirotacateemi. ¿Paita picoajeitiri? ¿Jaoca ancanteriri?

Icantajeitanaque:

—Ainiro irantane, cameetsa incame.

⁶⁵Ainiro aparopee quitiojayetaqueri. Impoiji ipashicavorotaqueri, aisati ipasanatiri. Icantiri:

—Pincamanente janica pasavorota-quemperi.

Aisati iriori nampirentsipee, ipasanajeitaqueri.

Icanti Petero: “Te nioteriji Jesoshi”.

(Mt. 26.69-75; Ir. 22.55-62; Joa 18.15-29)

⁶⁶Isaviqui iriori Petero anta pancotsiqui ishaaviji. Opocapaaque aparoni inampire saserote. ⁶⁷Oneapaaqueri Petero, itaataque paamari. Amenashetapaqueri, sorerer, ocantiri:

—Aviro tsipatariri yora Jesoshi nasaretesati.

⁶⁸Itsaroanaque iriori, icantanaque:

—Jm, te nioteji paitarica picantiri. Te nonquemempiji aisati.

Isoquijanaji saiteriqui, ijatanaque anta otsapiqui. Ineanaque teapa. ⁶⁹Oneajiri aisati nampirentsri. Ocantajeitiri yora ocarajeitaqueri:

—Iriotaque yoca tsipatariri Jesoshi.

⁷⁰Aisati icantaji Petero. Ari osamanita-painti capichaji. Yapiitajiri yocapee, icantiri:

—Queariosanotaque. Aitaque pitsipatari niori, avirotaque carireasati.

⁷¹Icantasanotiri:

—Te nioteriji yora shirampari picantaqueri. Ioti Tasorentsi queario nocantaque: notseeyanirica, nocoaque iroasanquetayenata Tasorentsi. ⁷²Yapiitajiro ineanaji teapa. Iquenqueshiretanajiro Petero icantiqueriri Jesoshi: “Tequeratarica irampiitanajerota irineaje teapa, oncarate mava pincante: ‘Te noneeriji Jesoshi’”. Ari yoashiretanaca Petero, irosati iraantanaca, jii, jii.

Ari yaajeitanaqueri Jesoshi Piratoqui.

(Mt. 27.1-26; Ir. 22.66-23.5; Joa 18.28-40)

15 ¹Ari oquitatetamani, yapatojeitamanaja yora jivatacaaajeitiririsaserotepee, savicacaantajeitsiri, oametantirori sanquenarentsi, maaroni. Aisati yapatojeitaca maaroni pashini oametavacainchari. Icantavacaimentajetacari Jesoshi. Ari yoisoyeetanaqueri Jesoshi, yaanaqueri anta, ipapaqueri Pirato. ²Isampitavaqueri:

—¿Avirompa ivincatsarite jorio?

Iriori Jesoshi yacanaqueri:

—Je, naro.

³Icantajeiti jivatacaaajeitiririsaserotepee:

—Oshequi yantaniroyetaqueri yoca, te incameetsateji.

⁴Yapiitajiri Pirato, isampitajiri:

—¿Paitampa caari pacanta? Piquemavaqueri oshequi icantacotashijeitaquempiri.

⁵Te iranqueji Jesoshi. Irosatiquea iriori Pirato yoantanacariri cavaco. ⁶Ari ainiro yametacari: maaroni osarintsi, ariorica omoncaratapaja yavisantaniri, yoimisoquijapinitiri aparoni yoiminqueetiri. Yoimisoquijajiri janicarica icoajiri atiripee. ⁷Ainiro meeca yashitacotaca anta atiripee coajeivetachari irojouerime pincatsari: ipajita aparoni Varava-

shi. Iro irojocantearimeri pincatsari, yoantaque. ⁸Ari ijatashijeitaqueri yora apatojeitainchari, icantajeitapaquaqueri:

—Meecaquea nocoi pantajeteitaro oca pametari: poimisoquijajenari aparoni poiminquiri.

⁹Yacavaqueri Pirato:

—¿Iriompa picoaqueri noimisoquijajempiri yora pivincatsarite?

¹⁰Iotaque Pirato oshequi ipincatsajeitiriatiri Jesoshi, irootaque iquisajeitantzacariri saserotepee, yaacantantacariri. ¹¹Ari yora saserote iquenaquenayetanaque, icantajeitaqueri atiripee:

—Picantacoventiricari Jesoshi. Pincantajeiteri: “Iranti poimpacaajeri Varavashi”.

¹²Yapiitajiri aisati Pirato, icantiri:

—¿Jaocampa meeca noncanteriri yoca pipincatsajeivetacari?

¹³Icjajemajeitanaji aisati:

—Pimpajacotacanteri coroshiqui.

¹⁴Isampitiri:

—¿Paitampa yantaqueri nompajacota-cantanteariri?

Aiquero yovaapinijeitanaquero icajemajeitanaque:

—Pimpajacotacanteri, pimpajacotacanteri.

¹⁵Icoanaque Pirato inquimoshiretacajeitajeri yora atiripee, irosati yoipacanta-jariri Varavashi. Ja irintini Jesoshi ipasanatacantajerri, ari yaacantajerri impajacotacantanteariri.

Oshequi yoashinoncaaqueri soraro Jesoshi.

(Mt. 27.27-31; Joa 19.1-3)

¹⁶Iriori soraro yaanaqueri tsompoina ivancoqui Pirato. Ipajitironta pancotsi peretorio. Yora soraro icajemajeitaqueri maaroni itsipapee. ^{17,18}Itseencajajerri, ishirontimentajetacari, icantiri:

—¿Avirotaqueempa ivincatsarite jorio? Jentsite, narori, nompincatsajeitempi. Tsame pinquitsaatearo quitioncanirori,

aisati pamatseetearo amatseerentsi pinquempetanteariri pincatsari, impoiji nompincatsajeitantempi. Iji, iji, iji.

Ari iquitsaataqueri, aisati yantaqueneri totseequi, yamatseetaqueri.¹⁹ Ipasanatiri iitoqui, iro ipasatantarcariri savoroqui. Iquitiojaqueri. Itiyeroashinirotacari, inepincatsatamempeacari.²⁰ Ari oshequi yantavintsanataqueri, impoiji isapocajiri iitsaare quitioncanirori, iquitsaatajiri iitsaaresanori iriori.

Ipajacotantacariri Jesoshi.

(Mt. 27.31-56; Ir. 23.26-44; Joa 19.16-30)

Impoiji yaanaqueri anta impajacotan-teariri.²¹ Nianqui avotsi ineakeri soraro shirampari pajitachari Shimo, iringataque shirenesati. Irio iriri Ariantero, jeri Irojo. Iponeanaja Shimo oantsiqui, iro iravisanakueme, iro cantaincha yaavaqueri soraro, iperanatavacari:

—Panatanaqueneri Jesoshi coroshi.

²²Ari yaajeitanaqueri Jesoshi anta opajitanta Coricota. Iro ipajitantarori otishi oshiaquero iitonaroqui atiri.²³ Ipavetari ovaja oconoajataca aavintarontsi pajitachari mira. Iro cantaincha te irireeroji.²⁴ Impoiji ipajacojeitaqueri, aisati ineantacaro mapijaniqui, iriojeitanteari janicarica aitajerineri iitsaareni. Ipavacaayetacaro.²⁵ Ari ijenoquitapaaque catsirinaiteri, irosati ipajacotantacariri.²⁶ Isanquenataquero sanquenarentsi, ocanti: “Iriotaque ivincatsarite jorio”. Ipatacaqueri coroshiqui jenioquiji.²⁷ Ora pashini coroshi ipajacu-queri apite coshinti. Aparo yoatiacotaqueri iracosanoriqui Jesoshi, irio itsipa yoatiacotaqueri irampatequi.²⁸ Irootaque omoncara-tantajari sanquenarentsi cantatsiniri: “Irishiacanteri caari cameetsatsatsine”.

²⁹Ainiro anta avisayetatsiri icantimatana-queri, aisati yavimacanaca, icantajeitiri:

—Joo, aviro shoveajeronemeru ivanco Tasorentsi. Oncarateme mava quitaiteri povetsicajerome aisati.³⁰ ¿Arimpa-

pitasoncantashiyeta? Jentsite, pintason-cacoventajeja avisati: poavisacotajea avisati, paniireanaje coroshiqui.

³¹Irosati icantaqueriri iriori yora jivatacaajeitiriri saserotepee, aisati oametantirori sanquenarentsi. Ishironti-mentajeitacari, icantavacaajeitanaca:

—Irintquea itsipa yoavisacoti. Jaaquea iriori te iroavisacotajeaji.³² Jeri Quirishi-tovetachari, pincatsariventerinemeri ijorioririnte. Jentsite, amenavaquerita ariorica iraniireanaje ara coroshiqui. Noneaqueririca, ari nonquemisantana-queri.

Aisati iriori tsipatacariri Jesoshi ipajacojeitaca, itseencaqueri.

³³Ari icaravetapaaca catsirinaiteri tampatica, otsitenitanaque maaroni quipatsiqui. Ari ishavijitanaji, iporeanaji aisati.³⁴ Irosati icajemantanaca anteoro-jenca Jesoshi, icanti:

—Eroi, Eroi, irama savatani.

Irootaque acantiri aneanequi: “Notaso-rentsire. Notasorentsire. ¿Paita pojocanta-quenari?”

³⁵Iquemavetavacari aparopee shiram-pari, icanti:

—Pinquemeru, icajemiri Iriashi.

³⁶Ari ishianaca aparo atiri, yoviinca-paaqueneri quepishijariqui aajatirori. Yoisotacotaqueneri savoroquiiqui.

Ipavetari irantsimicavaquerome. Icanti:

—Ari icantavacata: amenavaquerita ariorica impocashitapaaqueri Iriashi iroaniitapajjeri.

Icamanaque Jesoshi.

(Mt. 27.50-56; Ir. 23.45-49; Joa 19.30-37)

³⁷Antearojenca icajemanaque Jesoshi, icamanaque, toren.³⁸ Ainiro anta

ivancoqui Tasorentsi antearo tocoya, tontari, opaincaca omoroqui. Intanaca jenoqui otsereamaotanaque, tsererere, irosati ishaaviji. Apitemaotanaji.³⁹ Ainiro imontetacari iyapitanote soraro.

Ineavaqueri jaoca icantanacari Jesoshi, icamantanacari. Irootaque icantantacari:

—Quearioteemi: iriotaque yoca shirampari itomi Tasorentsi.

⁴⁰Otimaiti paricoti aparopee tsinane, amenajeitiri. Ocarajeitaiti Maria Maquitarasato, jero aisati pashini Maria, irootaque iriniro Santiano, jeri aisati Jose. Yora Santiano impoitatsiri itimi. Aisati ocarajeitiri Sarome. ⁴¹Ainiro itimaveitani Jesoshi anta Carireaqui, oijajeitirini maaroni oca tsinanepee. Intacojeitarini aisati. Otimaque meeca aca oshequi otsipapee tsinane. Itoncaantanacari Jesoshi anta Jerosarequi, irootaque oijajeitiriniri.

Jaoca icantaqueriri Jesoshini.

(Mt. 27.57-61; Ir. 23.50-56; Joa 19.38-42)

⁴²Ishavijiiteanaji catsirinaiteri. Iro quitaiteri meeca yovetsicajeitiro iroajeiteari osaitequera, tempa osaitequera quitaiteri imaoresentajeitari. ⁴³Ainiro Jose, yora poneachari Arimateaqui. Aitaque icarajeitiri yora oametava-cajeitainchari. Ineacameetsajeitiri atiripee. Yaamaari Tasorentsi, icoaque impincatsariventeri. Ipanacari iriori Pirato, ijatashitaqueri yamanantapaaajiri yora Jesoshini. ⁴⁴Yoanaque cavaco Pirato. Iquenqueshiretanaque: “¿Icatimai-tacampa icamanaque Jesoshi?” Ari icajemacantaqueri iyapitanote soraro. Isampitavaqueri:

—¿Queariompa? ¿Camasanotana-quempa Jesoshi?

⁴⁵Icantiri:

—Je, camasanotaque ini.

Irosati itiancantacariri Jose intijeri Jesoshini. ⁴⁶Yamanantaque Jose tocoya. Yoaniitaqueri Jesoshi, yapinaicacotaqueri tocoyaqui. Yoiponaqueri omoroqui, anta imoqueetironta imperita. Itivironcashita-naqueri antearo mapi omoroqui. ⁴⁷Onea-cotaqueri jaoca yoquieri Maria

ISANQUENARE MARICOSHI 15, 16

Maquitarasato. Otsipataro Maria, ora iriniro Jose.

Itinaanaja Jesoshi.

(Mt. 28.1-10; Ir. 24.1-11; Joa 20.1-10)

16 ¹Avisanaque quitaiteri imaoresentajeitari. Amanantanaque tsinane casancajari, ontiritantajearimeri Jesoshini. Ari opajitari iroori tiriterineri Maria Maquitarasato. Aisati iroori ocaratiro pashini Maria iriniro Santiano, jero aisati iroori Sarome. ²Ari capichaji quitaiteri ojatamani anta omoroqui yoyeevetacarinta. Iro tominco ojatantacari. Ari ijenoquitapaaque catsirinaiteri, irosati areetantapaaca. ³Ocantavacaanca:

—¿Janicampa tivironqueerone ora mapi omoroquinta? Antearo oni, eiro aaveirotsi.

⁴Amenapaaque, oneapaaquero mapi, tivironcanaca. Antearo catsini onaveta.

⁵Oqueapaaquero omoroqui anta yoaveta-carinta. Te oneapaajeriji ocoavetapaaajari, irinti oneapaaque evancari, isavicaqueacosanoriqui. Iquitsaataro quitsaarentsiquitamarori catsini. Oapaaque cavaco.

⁶Icantavaquero:

—Eiro poitsi cavaco. Irio picoaveta yora Jesoshi nasaretesati, yora ipajacyeetaqueri. Itinaanaja, te aneajeriji aca. Pamenerote aca yoyeevetacarica.

⁷Pijataje meeca, pincamantapeeri iroamere. Aisati pincamanteri Petero. Pincantapaaqueri: “Irijivatanaquempi anta Carireaqui, aitaque pineapaajeriri anta. Tempa aitaque icamantitimpini”.

⁸Ari osoquijanaji, oshianaca. Opioncanaque, oanaque cavaco catsini. Otsaroanaque, irootaque caari ocamantacotantari.

Oneajiri Maria Jesoshi.

(Joa 20.11-18)

⁹Irootaque itinaantajari Jesoshi tominco. Iro intasanotajari yonijaajaro

Maria Maquitarasato. Irootaque peerani yatajeaoncaveitaniri 7 camaari, iro cantaincha yoavisacotaqueroni.¹⁰ Irosati quea ojatantanaca iroori ocamantapaaqueri yora itsipajeiveitaniri Jesoshi. Irosatiquera yoashiretacojeivetari, iraacojeivetari aisati.¹¹ Ari ocamantaveta-paacari:

—Tinaanaja Jesoshi, noneajiri.

Te inquemisantavaqueroji.

Ineajiri apite iroamere Jesoshi.

(Ir. 24.12-35)

¹²Impoiji ipashinivorotanaca Jesoshi, inijapaajari apite iroamereni, yanijeitajaji anta oantsiqui.¹³ Ari ipianaja yoca neaqueriri, icamantapaaqueri itsipapee. Aisati iquempetavaqueri, te inquemisantavaqueriji.

Iquenquetsatacaaajeitiri Jesoshi

maaroni iroamerepee.

(Mt. 28.16-20; Ir. 24.36-49; Joa 20.19-23)

¹⁴Impoiji yoajeitaja iroamerepee, icarajeitaji 11. Irosati inijajeitantapaaajariri Jesoshi. Icantajeitaqueri:

—Tempa nocamantitimpini nontinana-
naje: ¿paita caari piquemisantantana?
Tempa ontine piquenqueshireantari.
¿Paita caari piquemisantantari neajanari
incaranqui? ¹⁵Pijajeite pintso-teanaquero
maaroni quipatsiqui. Pincamantajeiteri
maaroni atiri jaoca incantajeiri iroavisa-

cotantajeiri iriori.¹⁶ Janicarica quemisan-tavaquerone ora pincamanteriri, aisati ariorica irivaotisatajea, aitaque iroavisa-cotajea. Irompa yora caari quemisantavaquerone, iroasanquetasanoteri Tasorentsi irinti.¹⁷ Jaocarica pijajeiteri, intasoncaco-ventempi Tasorentsi, iriojeitanteeari atiri queariotaque oca picantaqueriri. Nomata-cayempiro poavisacotanteeariri yatajeaon-cane camaari. Poyetero otsipapee neantsi pinquenquetsatacotantenari.¹⁸ Ariorica pajiricaveteari maranke, ariorica irantsicavetempi, iro cantaincha eiro yoamaimpitsi. Aisati, ariorica pirero piantatsiri, eiro oamaimpitsi. Aisati ariorica pimpamiteri mantsiatatsiri aisati pincantacoventeri, ari iravisacojeitaje.

Ivecarataquero Maricoshi isanquenare.

(Ir. 24.50-53)

¹⁹Irootaque icantajeitaqueriri Avinca-tsarite Jesoshi, irosati yoancantanaja inquitequi, isavicapaaji anta iracosanori-qui Tasorentsi, icaratapaajiri ipincatsari-tapaaji iriori.²⁰ Ari ijajeitanaque iroamerepeeni. Iquenaquenayetanaque, icamantantayetanaque jaocarica iquenanaqueri. Quiso yoiri Avincatsarite, yamitacojeitiri. Aisati itasoncantayeta-que, iojeitantacari atiripee queariosanota-que icamantajeitapairiri. Aitaque ocanta. Ari ocarati. Narotaque sanquenatirori:
Maricoshi

YORA IROCASHI ISANQUENATACOTAQUERI JESOQUIRISHITO, JAOC A ICANTA IRIORI YOAVISACOTANTI

Ivetsatari Tiojiro.

1 ¹⁻⁴¿Ainirompi Tiojiro? ¿Tecatsimpa oyempine? Meeca noninti nonquen- quetsatacoteri Jesoquirishito. Icarajeita- que oshequi sanquenatacojeitaqueri, icamantacoyetaqueri yantayetaqueri. Ineajeitaqueri, aisati iquemacojeitaqueri, irootaque isanquenatacotantariri. Noneanataquero narori isanquenare, aisati nosampitacoyetaqueri yantayeta- queri niotasanolantacarori, notsoteaquero maaroni. Meeca novaajempiro narori, nockoaque tampatica piotasanotero yantayetaqueri Jesoshi, piojeite te iramatavijeitempiji yora sanquenatirori.

**Yora Cavigriyieri icamantiri
Sacariashi intime itomi.**

⁵Peerani, ipincatsaritanci Eroreshi anta Joreaqui, itimini saserote pajitachari Sacariashi. Iriotaque ishanincani Aviashi: ariorica yantaveetiniri Tasorentsi anta ivancoqui, icarajeitiri ishanincasanori iriori. Opajita ijina Sacariashi Isavere, irootaque ishanincani Aaro. ⁶Quemisan- tincari ini iriori Sacariashi, aisati ijina. Icantani imayetaqueri icantiriri Tasoren- tsi, iojeitiri atiri icameetsataque. ⁷Te intimeji itomipee: shiravarro oni ijina, aisati imoncaratavacaajeitaca yanteashi- pajeitaque.

⁸Ari omoncarataca quitaiteri yantavee- jeiti ishaninca. Yamejeitaro itiancapinitiri aparoni saserote itainiri Avincatsarite casancapatsari. ⁹Icantajeitiri Sacariashi ishaninca:

—Meeca aviro queasanotatsine anta, pintayeneri Avincatsarite casancapatsari.

¹⁰Ari iqueanaque, irinti yora apatojei- tainchari isavacajeiti saiteriqui, iquenque- tsatacaajeitiri Tasorentsi. Aitaque ariorica itaaqueri casancapatsari, iquenquetsata- caajeitiri Tasorentsi. ¹¹Anta tsompoina, imapocaqueri inampire Avincatsarite, icatiapaaca quempeji onantariqui casancapatsari, icatiapaaca irampatequi. ¹²Ineantavacariri yoanaque cavaco, aisati oshequi itsaroanaque. ¹³Iro cantaincha icantakeri:

—Sacariashi, eiro pitsaroitsi. Timatsi picantakeri Tasorentsi; tempa iquemaqueMPI, irootaque ontimanteariri coajica pijina pitomi. Pimpajiteri Joa.

¹⁴Oshequi pinquimoshireventeari, aisati inquimoshireventajeitari oshequi pishanin- capee. ¹⁵Aisati irineacameetsatasanoteri Tasorentsi iriori. Eiro irirotsi cachojar. Quiso oasanoteri Ishire Tasorentsi, tequera- tsita intime, quiso oyeri: oncanteani oameteri. ¹⁶Oshequi inquemisantacaajeiteri pijoriorintre, impincatsajeitanteeariri Tasorentsi, tempa irio Avincatsarite maaroni. ¹⁷Inquempeteari Iriashini, oshequi

oametiri Ishire Tasorentsi, aisati otasoncaaqueri. Irijivatanaqueri Avincatsarite, incamantajeiteri ishanincapée iraamaajeiteari, aisati incamanteri inquemisantajeiteri. Iroamejeiteri ishaninca inquemisantanteari, inquempeteari yora peeraniniri iquemisantini intacaroniri. Iroamejeiteri tseencantatsiri cameetsa inquemisanteri Tasorentsi.

¹⁸Icantakeri Sacariashi:

—¿Arimpa? ¿Jaoca noncanteari niotasnotanteari queariotaque oca picantaquenari? Anteashipataquena, aisati nojina, anteashipataque iroori.

¹⁹Yacanaqueri:

—Naro Caviriyeri, quiso noiri Tasorentsi. Iriotaque tiancaquenari nocamantan-timpiori oca cameetsatatsiri. ²⁰Aitaque omoncarataquea oca nocamantaquempi, iro cantaincha te pishiretearoji, irointi pitseencaquena. Meeca pimasontite, eiro pineanajatitsi irosati intimanteari pitomi.

²¹Ainiro anta saiteriqui apatojeitainchari yamenaajeivetacari Sacariashi, icantajeitaque:

—Osamanitanaqueeteemi ipeaca. ¿Paita caari isoquijantaja?

²²Impoiji isoquijanaji, te irimatajeoji irineanataje, irointi ijcojicotashitaca. Impoiji iojeitanaque, icantajeiti:

—Timatsi inequeri anta tsomponiaqui.

Te irineanatasanoteji catsini. ²³Irosati icanta, oshequi quitaiteri yantaveetaji aisati ivancoqui Tasorentsi. Impoiji ipianaja ivancoqui riори.

²⁴Impoiji oaque ijina, irosati oquempoyean-taca ovancoqui. Icarati 5 cashiri te osoquijajeji.

²⁵Ocanti:

—Peerani te intimeji notomi, irootaque nopashiventantacari, iro cantaincha eiro nopashiventajatsi aisati. Icavintsaquena Avincatsarite, tempa icameetsatasanoti.

**Yora Caviriyeri icamantiro Maria:
“Intime pitomi”.**

²⁶Impoiji icarataque 6 cashiri otsomotetantacari Isavere. Ari itiancajiri aisati Tasorentsi Caviriyeri:

—Pijate Nasaretequi: ora carireaquniri.

²⁷Pincoapaquaquero Maria, ijinatsori Jose. Iriotaque ishanincani Iravirini. Ocashia-cari ayeri, iro cantaincha te oneayeteriji shirampari.

²⁸Ari ijatashitaquero. Imapocappa-quero, icantapaaquero:

—¿Ainirompi, Maria? Noncamantempi: oshequi inintasanotaquempi Tasorentsi, quiso yoaqueMPI. Oshequi icavintsaasa-notaqueMPI, panaacotaquero maaroni pitsinaneroronte.

²⁹Iro cantaincha otsaroanaque iroori, oquenqueshiretanaca: “¿Paita ojita oca icantaqueñari?”

³⁰Icantakero:

—Eiro pitsaroitsi. Queario, icavintsa-sanotaquempi Tasorentsi. ³¹Irotaintsi poye. Coajica pintimeri pitomi, pimpajiteri Jesoshi. ^{32,33}Impincatsaritasanote. Iriojeitanaque atiri irio Itomi Tasorentsi, savicatsiri inquitequi. Tempa iriotaque Avincatsarite. Peerani yora Iravirini ipincatsariventaveitarini pijorioririnte. Iro cantaincha incanteri Tasorentsi: “Notiomni, aviro pincatsariventajeiterineri maaroni, pincantaitiyempani”. Aitaque incanteari impincatsaritanaque, eiro yoipacaajirotsi.

³⁴Ari ocantiri:

—¿Jaoca incanteari intimanteari notomi? Te intimeji nojime.

³⁵Yacanaquero:

—Iro timacayempine Ishire Tasorentsi. Aisati intasoncaventaqueMPI Tasorentsi, savicatsiri inquitequi jenoqui. Coajica incantacojeiteri pitomi: “Icameetsatasanoti, te aneeroji irantane. Iriotaque Itomi Tasorentsi”. ³⁶Aisati noncamantempi: anteashipatasanovetaca iroori pishaminca Isavere, aisati icanteetiro shiravarō oni, iro cantaincha icarataque meeca 6 cashiri otsomontantacari. Coajica ontimeri otomi.

³⁷Pineaquero, tecatsi pomerentsitimotearine Tasorentsi, imajeitaquero paitarica icoiri.

³⁸Ocantiri iroori:

—Irioyeampa Avincatsarite. Onimotaquena paitarica icoacaaquenari: icoacaaquenarica intimashitea notomi, ari cameetsataque.

Irosati ipiantanaja inampire Tasorentsí.

Ojataque Maria oquivantiro Isavere.

³⁹Pashini quitaiteri ojatanaque Maria Joreaqui. Oshintsiti ojatanaque toncaarqui. ⁴⁰Areetapaaca anta ivancoqui Sacariashi. Oneapaaquero Isavere, ocantapaqaquero:

—¿Ainirompi?

⁴¹Oquemantavacarori Maria ocajema-paaque, oquematiiri ishevatanaca orijani, moyec. Aisati oametasanotaquero Ishire Tasorentsí, ⁴²irosati ocajemantavacaro. Ocantiro:

—Tempa ineshinoncajeitaquee Tasorentsí, aisati iquemapejiteiro maaroni tsinane; iro cantaincha avinti, panaacojetaquea: ineshinoncatasanotaquempi catsini. Tempa aisati ineacameetsatiri pirijani. ⁴³Aviro ashitearine Avincatsarite. ¿Paita piquenqueshirentantanari pineana? ⁴⁴Pamene, noquemantavaquempi pivetsatapaaquena, iquimoshiretanaque norijani, ishevatanaca, moyec. ⁴⁵Pishire-tasanotavacaro maaroni icamantaquempi Avincatsarite, irootaque ineshinoncataquempi.

⁴⁶Ocantiro Maria:

—Tempa icameetsatasanotaque Avincatsarite, ⁴⁷iriotaire Atasorentsíte aisati oavisacojeiteeneri coajica. Oshequi noquimoshireventaqueri. ⁴⁸¿Paita icavintsantanari narori? Nashinoncaavetaca, tecatsi niote narori. Iro cantaincha iriojeitanaque maaroni atiri noquimoshireventaqueri. ⁴⁹Oshequi itasoncacoventanena, tempa itasoncitasanotaque, icameetsatasanotaque. ⁵⁰Icantatiani icavintsaajeitaqueri maaroni pincatsajeitiriri. ⁵¹Oshequi itasoncantayetaque.

Intsoncajeitajeri maaroni shemejeitatsiri.

⁵²Imajeitaqueri pincatsarivetachari yojocacaquaqueri ipincatsariventanti.

Irintiquea ashinoncaincari ipeajiri pincatsari. ⁵³Iquemacaacari tasheavetachari, aisati yaapitsatajiri ashitaaranticari maaroni timimojeivetariri. ⁵⁴Icantani Tasorentsí yamitacojeitaqueri ajorioriente, te impeacoteiji arori icavintsaajeitaquee. ⁵⁵Aitaque imataquero maaroni icantiqueriri intacaroniri peerani: Avarama aisati maaroni ishanincani, catsini.

Irootaque ocantirori Maria. ⁵⁶Ari osavacaiti mava cashiri, impoiji opianaja onampiqui.

Itimaque Joa vaotisantatatsiri.

⁵⁷Ari moncarataca otimiri Isavere otomi. ⁵⁸Iquemacojeitaqueri oshaninca-pe, iquimoshireventaqueri. Icantajeitaque:

—Tempa ineshinoncatasanotaquero Avincatsarite.

⁵⁹Ari ocarataque imaacotaque 7, moncarataca intoyeantanteariri. Yamejetaro jorio ipajitavaca iriori, icantajeiti ishaninca:

—Tempa impajitea Sacariashi, inquem-petajeari iriri.

⁶⁰Iro cantaincha ocanti iriniro:

—Eiro ipajitatsi Sacariashi, ainti impajitea Joa.

⁶¹Icantajeivetaro:

—¿Paitaquea? Te intimeji pishaninca pajitachaneri Joa.

⁶²Ari isampijeitiri Sacariashi:

—¿Paita picoiri avinti?

⁶³Ari ijicotiro paperi, isanquenajeita-queneriri: “Aitaque, impajitea Joa”. Irosati yoajeitantanaca cavaco. ⁶⁴Impo-canaja Sacariashi ineanataji aisati, icanti:

—Tempa icameetsati Tasorentsí.

⁶⁵Impoiji yoajeitanaqueri cavaco maaroni ishaninca. Iquemacojeitaqueri

maaroni savicajeitatsiri toncaaripeequi: ora timatsiri Joreaqui.⁶⁶ Iquenqueshire-jeitanaca maaroni quemacojeitaqueriri: “¿Jaoca icantari yora jananequi? ¿Paita iranteri coajicani? Tempa ineshinoncata-sanotaqueri Avincatsarite”.

⁶⁷Impoiji Ishire Tasorentsi oametaqueri Sacariashi, icantantarori oca:

⁶⁸—Tempa icameetsatasanoti Avincatsarite, irioque tasoncaventajeitaqueeri. Ipocashijeitaquee iroavisacojeitjee.

⁶⁹Peerani Iravirini yantiniri Tasorentsi icoacairiri. Meeca itiancaqueri Tasorentsi ishanincani Iravirini, itasorentsitaque, yoavisacotantaque.⁷⁰Tempa peerani icantirini Tasorentsi quenquetsatacotiriniri: ⁷¹“Nontianquemperi oavisacojeitempineri, intimerica quisajeitelpineri, irojocacoventajeitaquempi. ⁷²Noncavintsaajeitaqueri ishanincani Avarama, maaroni. Eiro nopeacotajarotsi nocanta-jeitaqueriri. ⁷³Peerani nocantasanotaqueri Avarama: ⁷⁴“Coajica noavisacojeiteri pishanincaphee, nompiajeiteari quisajeiveteinarineri, impoiji eiro itsaroajeititsi inquemisantajeitena.

⁷⁵Noameetsajeiteri, noncanteani noneac-meetsajeiteri”. Irootaque icantiqueriri Tasorentsi peeraniniri. ⁷⁶Meeca notiom, noncamantempi: iriojeitempi atiri aviro quenquetsatacoterine Tasorentsi jenoquiniri. Pincamantajeiteri incameetsatanaque, iraamaajeiteari Avincatsarite.

^{77,78}Poamejeiteri ashanincaphee iriojeitan-teari jaoca incanteari iravisacotantajeari. Pincamantajeiteri icavintsaasanojeitaqueri Tasorentsi, eiro iquenqueshiretajrotsi yantayetiri caari cameetsatatsi. Ariorica icontetapaaque catsirincaiteri, te ontsitenitanajeji, irointi oquitaitetanaji.

Aisati oquempetaca, ariorica imponea-quea Avincatsarite jenoqui, ayotasanojetanaque cameetsa asavicajeite. ⁷⁹Iroavisacojeiteri maaroni caari iovetari Tasorentsi, maaroni tsaroayevetachari incame.

Iriotacaajeitapaaqueri jaoca incanteari iraacameetsatanteariri Tasorentsi.

Irootaque icantiquerri Sacariashi.

⁸⁰Ari avisananji oshequi osarintsi, yantearitanaque Joa, oshequi iquemisan-taqueri Tasorentsi. Ari itimaqueri apaniro caaraiteriqui, irosati iquenquetsatacantacariri ishanincaphee.

Itimaque Jesoshi.

(Mt. 1.18-25)

2 ¹Ari ipincatsariventanti Jerosarequi oromasati, ipajita Shisari Acoshito. Ari iroquaera itimapaaque Joa, icanti Shisari:

—Nocoaque irisanquenatacojeitea maaroni atiripee, niotanteari jaoca icarajeitiri.

²Iro isanquenajeitantarori ivajiropee, irio Shirino pincatsariventajeitiriri shiriasati. ³Ari ijajeiti atiri anta nampsisi-qui itimajeitini ishanincani peerani, isanquenatacojeitaca. ⁴Itimi meeca Jose anta Nasaretequi, ora timatsiri Carirea-qui. Iro cantaincha ishanincatacari Iravirini: yora pincatsariveitachaniri. Iro inampini Iravirini Verequi, timatsiri anta Joreaqui. Irootaque ijatantacari Jose Verequi, irisanquenatacotantajeari irisati.

⁵Itsipatanacaro iroori ijinatsori, irotimataintsı ontimacote. ⁶Ari yareetantapaa-carí Verequi, irosati oquemantacaro atsicaneentaquero, niii. ⁷Icoayevetapaaca pancotsi irimaanteari, iro cantaincha ijaaejitacaro pancotsipee irisavican-peempameri: irointi timatsi ivanco virantsi. Aitaque otimaqueriri otomi, jivatatsiri itimi. Oponataqueri, oaqueri ora iquempoyeanteetanariri virantsi yoari.

⁸Ari otsitenitanaji, ainiro anta queshii-qui isavicajeiti shentajeitiriri irovishate.

⁹Imapocaqueri Avincatsarite, ishipaqui-reacojeitaqueri, oquempetaca quitaiteri, aisati ineajitavaqueri inampire

Avincatsarite. Itsaroajeitanaque; icantaita, shiquere.¹⁰Iro cantaincha icantapaaqueri:

—Eiro pitsaroajeititsi, timatsi noncamantempi: ocameetsatasanotaque. Pinquimoshireventajeitearo, aisati inquimoshireventeearo maaroni atiri.¹¹Iroaqera itimaque Verequi oavisacojetempineri: irioaque Avincatsarite Quirishito.¹²Jeroca noncamantempi piotanteeariri. Pijate ivancoquinta virantsi, pamenaiteri yora iroaqera timaintsiri; pineapaaqueri iponaaca anta ivancoqui virantsi, iponataca.

¹³Irosati imapocajeitancariri oshequi jenoquisati, icantajeiti:

—Tempa icameetsatasanoti Tasorentsi,¹⁴nopincatsatasanojeitiri anta inquitequi. Aca quipatsiqui irisavicaaajeiteri cameetsa maaroni ineacameetsajeitiri.

¹⁵Ari ipiajeitanaja inquitequi, impoiji icantajeiti shentajeitiriri irovishate:

—Icamantaquee Avincatsarite timaque Verequi oavisacojeiteeneri. Tsamete amenaiteri.

¹⁶Ari ishiajeitanaca, ineajeitapaaqueri Jose, jero Maria, jeri iriori otomi, iponaaca ara.¹⁷Ari icamantajeitapaaqueri maaroni icamantaqueriri inampire Tasorentsi.¹⁸Ari yoajeitanaque cavaco maaroni quemajeitaqueriri.¹⁹Iroori Maria oshequi oquenqueshi-retaquero oca icantajeitaqueriri, oquenqueshi-retapinitaquero.²⁰Ari ipiajeitanaja ashitariri irovishate anta queshiiqui.

Icantajeitanaque:

—Tempa icameetsataque Tasorentsi. Ocameetsataque maaroni inijaaqueeri aisati maaroni icamantaqueeri. Cameetsa ini Tasorentsi.

Itoyeantajaniquitaqueri Jesoshi.

²¹Ari ocarati 7 imamacotaque Jesoshi, irosati itoyeantanteetacari. Aisati ipajitiri Jesoshi: imoncarataquero icantiquerori Maria chapinqui inampire Tasorentsi.

Icanti Jose aisati Maria: “Nocoacaaqueri Jesoshi irantasanoteneri Tasorentsi paitarica icoacaaqueriri iriori”.

²²⁻²⁴Ari peerani isanquenatacaaqueri Avincatsarite Moishishini: “Ariorica ontimeri tsinane otomi, onquempoyeem-paya ovancoqui oncarate 40 quitaiteri: eiro ojatitsi ampatojeiteari quemisanta-tsiri. Ariorica omoncarataquea 40 quitaiteri, ocameetsati ojate ivancoqui Tasorentsi onquemisantajaeari aisati. Aanajeneri Tasorentsi apite sampaquiti, ariorica apite paroma. Ompapaqueri saserote, iroyeri, impoiji intayeneri Tasorentsi. Impoiji onquempetajea aisati peerani, cameetsa ojatapinitaje aisati, onquemisantapinitaje”. Timatsi pashini isanquenatiniri aisati: “Iriorica shirampari yora jivatatsiri otimiri tsinane, icoaque Avincatsarite inquemisantasano-teri, iranaacoteri impoiterineri intime. Ocameetsati iraanajeri ashitariri ivancoqui Tasorentsi, incanteri Tasorentsi: ‘Jerica notomi, jivatatsiri itimi. Paitarica pincoacaaqueriri, nocoaque irantasanotempiro’”.

Ari ocarataque 40 quitaiteri itimanta-cari Jesoshi, irosati ijajeitantanaja Jerosarequi: Jose, Maria, jeri Jesoshi. Imoncarajeitaquero maaroni isanquenati-niri Moishishi ojatapinitantajaeari Maria onquemisante. Aisati ocamantaqueri Tasorentsi:

—Jerica notomi, nocoaque irantasano-tempiro paitarica picoacaaqueriri.

²⁵Ari itimi anta Jerosarequi shirampari pajitachari Shimeo. Quemisantasano-tatsiri ini, cameetsa isaviqui, iquemisanta-sanotaquero Ishire Tasorentsi. Aisati yaamaari Quirishito: yora veshireacaajei-tearineri maaroni joriopee.²⁶Ocamantaqueri Ishire Tasorentsi: “Eirotsitarica picami, pineavaqueri Quirishito: yora intianqueri Avincatsarite”.²⁷Irosati

otiancantacari Shimeo anta ivancoqui Tasorentsi; impoitapaaqueri Jose, Maria, jeri Jesoshi.²⁸ Ineavaaqueri Jesoshi, ijatashitaqueri, yatsomaavaaqueri; icantiri Tasorentsi:

—Novincatsarite, tempa picameetsati,^{29,30} noneaqueri oavisacotenaneri, yora picantaquenari. Meeca moncarataca, tecatsi noncoyeri aisati. Noquimoshiretaque, vetsicaquena noncame.³¹ Queario, pitiancaqueri iroavisacojeiteri maaroni atiri:³² irio iotacaajeiterine pashinipee atiri, iriveshireimentajiteeari maaroni joriopee quemisantajeitimpri.

³³Irosati yamenantanaca Jose, jero Maria, yoanaqueri cavaco; iquenqueshire-tasanotiro icantaqueri Shimeo.^{34,35} Aisati icantajeitaqueri:

—Nocoaque irineshilononcajeitempi Tasorentsi.

Aisati icantiro iriniro:

—Pamene, coajica oshequi piraacoteari pitomi: ipoquaque ayojeitanteari avavisa-cojeitaja, iro cantaincha incarate oshequi asháninca tseencajeiterineri: iroashinoncaajeitea iriori. Irintquea pashini ashánincapee, iroveshireimenta-sanojeiteari pitomi. Aparo intseencajei-teri, pashini iroveshireimenteari, onconijatanteari iquenqueshirejeitiri.

Irootaque icantaquerori Shimeo.

^{36,37} Ari otimi aisati ivancoqui Tasorentsi tsinane pajitachari Aana: oshequi ocamanta-pinitiri asháninca irineane Tasorentsi. Ipajitani irini Janoeri: irootaque ishanincani Asere. Anteashipatasanotaque Aana: ocarataque osarintsite 84. Camajimentaaro oni, ocarataque 7 osarintsi irosati icamanta-cari ojimeni. Meeca osavicaque ivancoqui Tasorentsi. Ocantani: quitaiteriqui, tsiteniri-qui oquenquetsatacapinitiri Tasorentsi; oshequi opincatsataqueri. Te onquenqueshi-retasanoteroji oyayetari.³⁸ Ari ojatashitaqueri Jesoshi iroori. Ocantaqueri Tasorentsi:

—Ariove, noneaqueri narori.

Aisati ocantajeitiri oshaninca:

—Jerica yoca, iriotaque oavisacojeiteri-neri ashánincapee: maaroni aamaajeita-riri.

³⁹Ari imataquero Jose aisati Maria maaroni isanquenataqueri Moishishi: tempa isanquenatacairy Avincatsarite. Impoiji ipiajeitanaja Nasaretequi: timatsiri Carireaqui.

Evancariquera Jesoshi, ipianaja ivancoqui Tasorentsi.

⁴⁰Ari iqueveanaque Jesoshi, aisati ishindsightanaque, aiquero ijatanaque iotasanotanaque, yanaacotiri ijananequi-ririnte. Oshequi ineshinoncataqueri Tasorentsi.⁴¹ Ari ijatapiniti anta Jerosare-qui, itsipajeitari Jose aisati Maria.

Aitaque ijatapinitiri maaroni osarintsi ariorica omoncaratapaaca quitaiteri Yavisantaniri.⁴² Ari ocarataque irosarin-

tsite Jesoshi 12, ijajeitanaji aisati,⁴³ iquimoshireventaquei Tasorentsi. Pashini quitaiteri ipiajeivetanaja maaroni ishaninca, iro cantaincha isavicanaque Jesoshi Jerosarequi apaniro. Te irivoteari ishaninca,⁴⁴ yaamaashiveta-cari itsipajeitanajari ishanincapee pashini. Ari ishaaviniji icoacoayevetacari ishanincaqui,⁴⁵ iro cantaincha te irineaje-riji. Irosati ipiantanaja Jerosarequi, icoacoayevetajari,⁴⁶ ocarataque mava quitaiteri. Impoiji ineapaajiri ivancoqui Tasorentsi: icarajeitiri oametantayetatsiri. Iquemisantayetiri yoametantayetiri, aisati isampijeitiri paitapeerica.⁴⁷ Yoajeitan-aqueri cavaco atiripee, icanti:

—Pamenerite evancarica: oshequi iotantari, cameetsa yacanaqueri yora oametantatsiri, te incomitearoji.

⁴⁸Aisati yoapaaqueri cavaco Jose, jero Maria. Ocantiri iriniro:

—Notiom, ¿paitaquea pimanapitsatanta-nari? Pamene, nocaratiri piritorsi nocoaco-ayevetaqueempi. Oshequi nocoiteaqueempi.

⁴⁹Yacanaquero:

—¿Paita picoacoayetantanari? Tempa piote nocoasanotaque nosavique ivancoqui Apa.

⁵⁰Iro cantaincha te inquemajeitavaqueri i cantavetacariri. ⁵¹Impoiji yojajeitanajiri, ipiajeitanaja Nasaretequi. Icantani iquemisantaqueri, tecatsi incantea impiatsateari. Irointi Maria oshequi oquenqueshiretaquero maaroni oca oneayetaqueri. ⁵²Aiquero ijatati iotasanoataque Jesoshi, yantearitanaque. Yora Tasorentsi inintaqueri itomi; aisati ishanincapee iriori, inintajeitaqueri Jesoshi.

Intantacarori Joa iquenquetsati.

(Mt. 3.1-6; Mr. 1.1-6; Joa 1.19-28)

3 ¹Ocarati meeca 15 osarintsi ipincatsariventajeitiri maaroni oromasati yora Tiverio Shisari. Ipincatsariventiri joreasati Pontsio Pirato. Yora Eroreshi ipincatsariventiri cariresatis; irinti irirenti, Jiripo, ipincatsariventiri itoreasati aisati taraconitiresati. Aisati yora Irisania ipincatsariventiri avirenesati. ²Aisati meeca ipincatsariventajeitiri saserotepée Anashi aisati Caijashi. Ari itimaqueri Joa, itomi Sacariashi, anta caaraiteriqui. Icantiri Tasorentsi:

—Nocoaque meeca pinquenquetsatacayeri pishaninca, timatsi nocoaque pincamantajeiteriri.

³Ari iquenaquenayetanaque Joa Joriraniqui, icantajeitiri ishaninca:

—Pinquenqueshirejeitea, eiro piquempetajatsi peerani, impoiji incavintsaajeitimi Tasorentsi: eiro iquenqueshireacotajimpirotsi pantajeiveitaniri. Impoiji quea novaotisajeitimi iritanteari pishaninca pavisacotaji.

⁴Imoncarataquero Joa icamantacotitari-niri peerani Isayashini: “Anta caaraiteriqui intime coajica quenquetsatacayerineri ishaninca. Incamantajeiteri ishaninca:

‘Coraque Avincatsarite, pamenaajeiteri, paamaajeiteari. Pincameetsatanaque irineacameetsatantapeempi. Ariorica pincameetsatanaque, pinquempetearo avotsi cameetsatatsiri inquenanteari Avincatsarite: poameetsatero irineacameetsatantearori. Pintampaticatero, ⁵pijayero otsateni, pinquiaarantajero toncaaripee, pintampaticatajero maaroni tipiyetatsiri, pintijayetajero ovintenipee. ⁶Impoiji maaroni atiri irineajeitavaqueri oavisacojeiterineri intianqueneri Tasorentsi’”.

Icantayetiriri Joa ishaninca.

(Mt. 3.7-12; Mr. 1.7-8; Joa 1.19-28)

⁷Ari ijatashijeivetacari Joa oshequi atiri irivaotisajeiterime. Jeroca icantavaqueriri:

—Avirojeitaque camaari: oshequi pamatavitantajeiti, te pincameetsajeiteji. Te pincoajeiveteoji pijate Sharincaveni-qui, iro cantaincha te pinintasanoteji pinquemisanteri Tasorentsi, irootaque picoantavetacari pivaotisajeiteame.

⁸Ariorica pinquenqueshirejeitea pimpashinitantajeari, pinte cameetsa iriojeitanteari itsipapee queario picantaque. Eiro picantashitatsi: “Noshanincatacari Avaramaní, irootaque niotantacari noavisacotajea”. Pamatavitaja avisati. Incoauericame Tasorentsi, irimatero intasonquerome oca mapica, impeajerome atiri, oshanincatajearime Avaramaní, iro cantaincha eiro avisacotitsi iroori. Patsipetashitaca pishanincavetacari Avarama: piquempetarocari mapi.

⁹Piquempejeitacaro aisati inchato. Iro cantaincha irotaintsi inchaquiero Tasorentsi inchato, imponquitireajero aisati. Terica oncameetsateji oitsoqui, inchaquiero, intasaanotajero, pomein. Piquempetarocari inchato caari cameetsatatsi oitsoqui: yojoquimpicari Tasorentsi.

¹⁰Ari isampijeitiri:

—¿Paita picoiri nantajeiteri?

¹¹Icantiri:

—Otimirica apite piitsaare, pimpaaranteri ashinoncaincarí aparo. Otimirica oshequi poari, pimpaaranteri aisati ashinoncaincarí. Pincavintsaantapinitate.

Irootaque icantapinitiriri Joa.

¹²Aisati ijatashitaqueri Joa aayetiriri quirequi: yainiri yora oromasati, oshequi yamatavitiri aisati ishaninca. Ijatashijeti, icoaque iravaotisajeitavaqueri, isampitapaaqueri:

—¿Paita nanteri piotantenari queario noquemisantaque?

¹³Ari icantavaqueri:

—Eiro paashititaritsi iirequite pishaninca, irointi pimoncaratero icantauquempi oromasati.

¹⁴Aisati ijatashijeteitaqueri soraro, isampitaqueri:

—¿Paita nanteri narori?

Ari icantavaqueri:

—Eiro piquishiritsi atiri paapitsatanteeari iirequite, aisati eiro picantacotashiritsi paitanteariri iirequite. Moncarataca ipinataquempi pivincatsarite, eiro picoitsi aisati.

¹⁵Ari yaamaajeitari Quirishito, ijitashijeveta irotaintsi irareetea. Iquenqueshirejeitiri: “Iriorica Joa Quirishito”. ¹⁶Iro cantaincha icantajeitaqueri Joa:

—Novaotisajeitaquempi nijaqui: te ompomerentsiteaji. Coajica impoque Avincatsarite inti, oshequi nopincatsataqueri, notseencaja narori. Intianajeitaquee inti Ishire Tasorentsi, quiso oajeitee, oameetsajeitee. ¹⁷Coajica irinashitacayeari cameetsatatsiri aisati caari cameetsatatsi. Oquempetaca arori anashitacaaro oitsoqui panqurientsi, aisati anashitacaaro osapentairoqui. Aquempoyeajiro oitsoqui, atairo osapentairoqui. Aisati inquempejeitee Avincatsarite arori: incavintsaajeiteri cameetsajeitatsiri, iroashinoncaajeiteri caari cameetsajeitatsi.

Ivaotisataca Jesoshi.

(Mt. 3.13-17; Mr. 1.8-11)

^{21,22}Ari ivaotisajeitaqueri Joa oshequi atiri, aisati ivaotisataca Jesoshi, irosati iquenquetsatacantacari iriri. Omapocanaca anuireashitapaaqueri Ishire Tasorentsi, oponeaca inquitequi. Oshiapaquaqueri sampaquiti. Aisati iquemajeitaqueri icantajeitaqueri Tasorentsi:

—Avirotaque notomi nonintasanotiri. Oshequi noveshireimentaqueMPI.

Yoiminqueacantaqueri Eroeshi Joa.

(Mt. 14.3; Mr. 1.14; 6.17)

¹⁸Aitaque icanta Joa: icamantapinitiri atiri incameetsatanaque, aisati icamantiri jaoca incantajeiteari iroavisacojeitanta-jeari.

^{19,20}Aisati icantaque:

—Te oncameetsateji yantayetiri Eroeshi. Yaavetaro irirenti Erorashi, iro cantaincha yaitaqueri Eroeshi. Ainiro oshequi pashini caari cameetsatatsi yantayetiri.

Ari iquisanaca Eroeshi. Ipincatsariven-tajeitiri cariresati, irootaque imatantacarori yaacantaqueri Joa, shepi, yoimin-queacantaqueri. Aiquero ijatati yantana-quero catsini caari cameetsatatsi.

Isanquenatiro ivajiropee
ishanincani Jesoshi.

(Mt. 1.1-17)

²³⁻³⁸Peerani yovetsiquiri Tasorentsi Aran.

Iri itomini Aran ipajitani Sete.

Iri itomini Sete ipajitani Enoshi.

Iri itomini Enoshi ipajitani Cainama.

Iri itomini Cainama ipajitani Marereri.

Iri itomini Marereri ipajitani Jarete.

Iri itomini Jarete ipajitani Enoco.

Iri itomini Enoco ipajitani Matosara.

Iri itomini Matosara ipajitani

Arameca.

Iri itomini Arameca ipajitani Noe.
 Iri itomini Noe ipajitani Seme.
 Iri itomini Seme ipajitani Aratajara.
 Iri itomini Aratajara ipajitani Cainama.
 Iri itomini Cainama ipajitani Sara.
 Iri itomini Sara ipajitani Evere.
 Iri itomini Evere ipajitani Jarareque.
 Iri itomini Jarareque ipajitani Aracao.
 Iri itomini Aracao ipajitani Seroco.
 Iri itomini Seroco ipajitani Nacoro.
 Iri itomini Nacoro ipajitani Tare.
 Iri itomini Tare ipajitani Avarama.
 Iri itomini Avarama ipajitani Isaca.
 Iri itomini Isaca ipajitani Jacovo.
 Iri itomini Jacovo ipajitani Jora.
 Iri itomini Jora ipajitani Jareshi.
 Iri itomini Jareshi ipajitani Eseromi.
 Iri itomini Eseromi ipajitani Arini.
 Iri itomini Arini ipajitani Aranini.
 Iri itomini Aranini ipajitani Aminarava.
 Iri itomini Aminarava ipajitani Nasono.
 Iri itomini Nasono ipajitani Sara.
 Iri itomini Sara ipajitani Voso.
 Iri itomini Voso ipajitani Jovere.
 Iri itomini Jovere ipajitani Jese.
 Iri itomini Jese ipajitani Iraviri.
 Iri itomini Ivaviri ipajitani Natama.
 Iri itomini Natama ipajitani Matata.
 Iri itomini Matata ipajitani Mena.
 Iri itomini Mena ipajitani Merea.
 Iri itomini Merea ipajitani Eriaquimi.
 Iri itomini Eriaquimi ipajitani Jonama.
 Iri itomini Jonama ipajitani Jose.
 Iri itomini Jose ipajitani Jora.
 Iri itomini Jora ipajitani Shimeo.
 Iri itomini Shimeo ipajitani Irevi.
 Iri itomini Irevi ipajitani Matata.
 Iri itomini Matata ipajitani Jorimi.
 Iri itomini Jorimi ipajitani Eriyesere.
 Iri itomini Eriyesere ipajitani Jesoshi.

Iri itomini Jesoshi ipajitani Ere.
 Iri itomini Ere ipajitani Eremarama.
 Iri itomini Eremarama ipajitani Cosama.
 Iri itomini Cosama ipajitani Ari.
 Iri itomini Ari ipajitani Merequi.
 Iri itomini Merequi ipajitani Neri.
 Iri itomini Neri ipajitani Saratiyeri.
 Iri itomini Saratiyeri ipajitani Sorovaveri.
 Iri itomini Sorovaveri ipajitani Eresa.
 Iri itomini Eresa ipajitani Joanana.
 Iri itomini Joanana ipajitani Jora.
 Iri itomini Jora ipajitani Joseca.
 Iri itomini Joseca ipajitani Semeinei.
 Iri itomini Semeinei ipajitani Matatashi.
 Iri itomini Matatashi ipajitani Mata.
 Iri itomini Mata ipajitani Nacai.
 Iri itomini Nacai ipajitani Eshiri.
 Iri itomini Eshiri ipajitani Naomo.
 Iri itomini Naomo ipajitani Amoshi.
 Iri itomini Amoshi ipajitani Matatashi.
 Iri itomini Matatashi ipajitani Jose.
 Iri itomini Jose ipajitani Janai.
 Iri itomini Janai ipajitani Merequi.
 Iri itomini Merequi ipajitani Irevi.
 Iri itomini Irevi ipajitani Mata.
 Iri itomini Mata ipajitani Eri.
 Iri itomini Eri ipajita Jose.
 Iri itomitsori Jose ipajita Jesoshi, iro cantaincha ijijeivetari ishaninca irio itomisanori. Ari ocarataque irosarintsite Jesoshi 30, intantacaroniri iquenquetatsatacaajeitiri ishaninca.

**Yora camaari irantacayerime
Jesoshi caari cameetsatatsi.
(Mt. 4.1-11; Mr. 1.12-13)**

4 ¹Ari ijatanaji Jesoshi, iponeanaja Joriraniqui. Quiso oanaqueri Ishire Tasorentsi, aanaqueri caaraiteriqui.
²Ocarati 40 quitaiteri itimaque anta,

tecatsi iroyeari: aasanotaqueri itashe. Ari maaroni quitaiteri ijatashitaqueri yora Satanashi, icoaveta irantacayerime caari cameetsatatsi. ³Icantavetapaacari:

—Avirorica itomi Tasorentsi, jentsite: pintasonquero oca mapica, pimpeero tanta, poyearo.

⁴Yacanaqueri Jesoshi:

—Isanquenatini peerani Moishishi: “Ocameetsati avajeitearo avanaro eiro acamanta, iro cantaincha ocameetsatasanotii anteneri Tasorentsi maaroni icoacaajeitaqueeri”.

⁵Aisati yaanaqueri antearoqui toncaari, ijicotapaaqueneri maaroni quipatsi, ⁶icantiri:

—Pincoaquerica noncantajeiteri maaroni savicajeitsiri impincatsajeitempi, iraacameetsajeitempi. Tempa narotaque pincatsariventajeitiriri maaroni, ⁷ariorica noncanteri impincatsajeitempi avirori, ari impincatsajeitempi. Apatiroquea nocoaque pintiyeroashitena, pimpincatsatena narori.

⁸Yacanaqueri:

—Ocameetsati ampincatsateri Tasorentsi, apaniro ampincatsateri irinti. Irootaque ocantiri irineane.

⁹Impoiji yaanajiri Jerosarequi, anta otataroqui ivanco Tasorentsi, antoo jenoqui. Icantiri:

—Avirorica itomi Tasorentsi, jentsite: pimpariye, eiro picamitsi. ¹⁰Tempa ocanti Sanquenarentsi: “Irishentempi inampiree Tasorentsi, inquempoyeaquempi”.

¹¹Ainiro aisati pashini isanquenatiniri: “Ari irancatsatavajempi irlori, eiro ishinetimpitsi pimpariye mapiqui”. Pinequero, ɿpaita pitsaroantacari?

¹²Yacanaqueri:

—Aisati ocanti Sanquenarentsi: “Eiro pineantaritsi Tasorentsi: yoasanquetaimpicari”.

¹³Ari irootaque camaari tecatsi incanteri Jesoshi, ijatanaji. Iro cantaincha ari irampiitajeri coajica.

Iopianaja Jesoshi Carireaquí.

(Mt. 4.12-17; Mr. 1.14-15)

¹⁴Ari impoiji ipianaja Jesoshi Carireaquí, oshequi omatacaqueri Ishire Tasorentsi. Te osamaniteji iquemacojeitaqueri maaroni savicajeitsirsii anta.

¹⁵Icantajeiti:

—Tempa icameetsati Jesoshi; ariorica apatojeita, tempa cameetsa yoamejeita-quee.

Yareetanaja Jesoshi Nasaretequi.

(Mt. 13.53-58; Mr. 6.1-6)

¹⁶Impoiji ijatanaji Jesoshi Nasaretequi, aitaque yanteearitaqueri inampisanoriqui. Ari saavarroqui ijatanaque anta yapatapapinjeitantzari, icantani ijatapiniti saavarroqui. Tsompoina icatiapaaca, irineanatenneri ishanincaphee irineane Tasorentsi.

¹⁷Ipeetavaqueri isanquenarenii Isayashini. Yampinaiccareavaquero, yamenaqueo irineanatenneriri. Ocanti: ¹⁸“Quiso oaquena Ishire Avincatsarite, otiancaquena noncamanteri ashinoncayetachari jaoca incanteari iroavisacotantajeari. Noncamanteri maaroni iperanatacari camaari noimpacacoventajerii. Namenacaajeri aisati caari amenatsi. Aisati noimpacacoventajeri maaroni yoashinonqueeyetiri. ¹⁹Aisati noncamantajeiteri atiri irotaintsi nontasoncacoventeri”.

²⁰Ari yampinaicajiro sanquenarentsi, yoipiajiniri ipajiri, impoiji isavicanaji. Yamenashejitanqueri, sorerere.

²¹Icantajeitiri:

—Queario meecca nomoncarataquero oca noneanataquempi, oquenquetsatocata.

²²Ari ineacameetsajeivetacari Jesoshi, aisati ineacameetsajeitaquero icantajeitiri. Aisati isampitavacaaca:

—¿Tempa irio itomi Jose?

²³Icantaque:

—¿Pitseencaquenampa? Naamaaca pincantename: “Jentsite, poavisacotajeriqueti pishanincasanori avirori. Noquemacotaquempi pitasoncantaque anta Caperenaoqui, meecaquea pintasoncantequeti aisati aca anampiquica”.²⁴Iro cantaincha noncamantempi pamejeita pitseenquiri pishanincasanori: te pioteji pimpincatsateri iriori, irintquea pashini pipincatsati.^{25,26}Queario oca noncamantempi: peerani itimantacari Iriashini, piojeiti te ompariyeji incani. Peerani osarintsitaqueni. Ocarati mava osarintsi aisati 6 cashiri, te ompariimateji incani catsimi. Itasheajeitanaque maaroni savicajeitatsiri quipatsi qui. Otimimi oshequi camajimentaaro aca, iro cantaincha itianquiri Tasorentsi Iriashini pashiniqui quipatsi opajita Shironi. Itianquiri irijatashitero camajimentaaro savicatsiri anta Sarepetaqui. Itasoncapiniti niro oari, ipapinitiro. Irointi savicatsiri aca inampiqui, te intasonqueneroji.²⁷Aisati, peerani itimantacari Iriseomi, itimini aca oshequi patsaincarí, iro cantaincha tecatsi iroavasacote. Apaniro irinti yoavisacotiri shiriasati pajitachari Nama.

²⁸Iquemajeitancarori apatojeitainchari, iquisajeitanaca. ²⁹Ari icatiaeitanaca, yaajeitaqueri, shepi. Yaanaqueri anta otsapitapaa nampitsi, otiminta imperita. Impishoncjejerime, iroariyerime,³⁰iro cantaincha ipeimotanajari, ijatanaji.

Iopianaja Jesoshi Caperenaoqui.
(Mr. 1.21-28)

³¹Ari iopianaja Jesoshi Caperenaoqui, ora carirequiniri. Saavarouqui yoamejeitajiri aisati atiri. ³²Yoajeitanaquei cavaco, icantajeiti:

—Tempa ocameetsati oca yoametaqueeri. Ipincatsariti: iotasano taquero oca yoametaqueeri.

³³Ari itimi anta yapatotapinijeitanta aparoni shirampari neiriri camaari. Antearojenca icajemacotavaqueri:

³⁴—Aviro Jesoshi poneachari Nasaretequi. Niotaquempi: aviro itomi cameetsari Tasorentsi. ¿Paita pipocashitantanari? ¿Picoavetampa pojoquena?

³⁵Ishintsitsataqueri Jesoshi, icantiri:
—Pimajerete. Pinijantareanajeri yoca shirampari.

Ari ipishoncanaqueri shirampari quipatsi qui, tiricn, irosati ijaniro tananjari. Tecatsi oajerine shirampari, tecatsitanaji.³⁶Yoajeitanaqueri cavaco aisati icantajeiti:

—Pineaqueri: apatiro ineanataqueri camaari, irosati ijatantanaja. Oshequi ipincatsariti, oshequi itansoncanti.

³⁷Ari iquemacojeitaqueri Jesoshi maaroni savicajeitatsiri.

Yoavisacotiro Jesoshi irairo Petero.
(Mt. 8.14-15; Mr. 1.29-31)

³⁸Impoiji ijatanaji Jesoshi ivancoqui Shimo. Icantajeitavaqueri:

—Ojooquittaca irairo Shimo, oshequi oyatsiire. Poavisacotajero.

³⁹Icatiapaaca onampinaqui, icantaqueri:

—Ari ompeanajea piatsiire, paviscacotaje. Irosati opeantanaja oyatsiire, maani; ocatianaja, opajeitajiri yoari.

Yoavisacoyetiri itsipapee atiri.
(Mt. 8.16-17; Mr. 1.32-34)

⁴⁰Ari iqueanaji catsirincaiteri. Yameetaqueneri Jesoshi oshequi mantsiayetatsiri, onashiyeta imantsiare. Ari ipamijeitavaqueri, yoavisacojeitavaqueri.⁴¹Impoiji ipocajeiti oshequi yoitsavianquiri camaari, icajemajeitapaaque:

—Aviro itomi Tasorentsi.

Iojeitaque camaari iringa Quirishito, irootaque icantantacariri:

—Pimajerete, eiro picamantacotanatsi.

Yovaanaja Jesoshi pashinipeequi nampitsi.
(Mt. 4.23; Mr. 1.35-39)

⁴²Ari oquitaitetamanaji ijatamanaque Jesoshi anta ocaraitetapaaque. Icoacoa-

jeitaqueri atiripee. Ineantajariri, icantajeivetapaari:

—Eiro pijatajitsi, pisavique aca Caperenaoqui.

⁴³Iro cantaincha icanti Jesoshi:

—Eiro nosaviquitsi. Nocoaque noncamanteri itsipapee atiri ipincatsariventajeitiri Tasorentsi, tempa cameetsa iriojeitero iriori. Irootaque itiancantanari Apa.

⁴⁴Ari iquenaquenayetanaque Jesoshi anta Joreaqui, iquenquetsatacaa jeitiri atiri anta pancotsipeequi yapatojeitanti.

Iquitsatiri Shimo oshequi shima catsini.

(Mt. 4.18-22; Mr. 1.16-20)

5 ¹Ari pashini quitaiteri iquenquetsati Jesoshi anta otsapijaqui incajare pajitachari Jenesarete. Itsitacajeitapaa-
cari atiripee, icoajeitaque inquemero irineane Tasorentsi. ²Ari ineaquero Jesoshi apite pitotsi anta otsapijaqui. Tecatsi tetearone: yora quitsatatsiri iquiviro iitsarite anta. ³Itetaca Jesoshi ivitoqui Shimo, icantiri:

—Shimo, pintianquero capichaji.

Ari isavicaque pitotsiqui nianquijamaji, yoamejeitiri apatojeitainchari otsapija-quinta. ⁴Ari osamanitanaque, itsoncan-
quero yoamejeitaqueri. Icantiri Shimo:

—Pijate anta osaanajataquenta,
pinquitsate.

⁵Yacanaqueri:

—Oametantatsiri, noquitaitetacotaque noquitsavetaca incaranqui, tecatsi naimate catsini. Meecaquea picanta-
quena, aitaque nojataque nonquitsajeita-
janteta aisati.

⁶Ari iquitsataji: yaasanotaque shima, oshequi catsini: monquire, monquire.

Jaaca inaca, irotantsi ompeshe quitsari.
⁷Icjemaqueri ishaninca savicatsiri

pashiniqui pitotsi:

—Caateve, pamitacojeitenave.

Ari ipocacotaque, itetacotaqueri shima apite pitotsi, tero, tero; irotantsi ontsitiye. ⁸⁻¹⁰Icarati oshequi shima iquitsatiri, irootaque yoantanacari Petero cavaco; aisati iquempejeitaca itsipapee:
jeri Santiaco aisati Joa. Iriotaque yoca itomipee Severeo. Iriotaque icaratapini-
tiri Shimo iquitsatapinitiri shima. Itiyeroashitanacari Shimo Petero, icantiri:

—Novincatsarite, cameetsa pijataje. Te noncameetsateji narori catsini, eiro pitsipatanatsi.

Yacanaqueri Jesoshi:

—Eiro pitsaroacaanatsi. Noncaman-
tempi: oquempetaca peerani piquitsatapi-
nitiri shima, nocoaque meeca pinquemi-
santacaapini jeiteri atiripee.

¹¹Ari yaatacojeitapaa-ji, irosati
yojocajeitantanajaro ivitopee, iitsarite-
pee, maaroni. Yojajeitanaqueri Jesoshi.

Yoavisacotiri Jesoshi patsaatsiri.

(Mt. 8.1-4; Mr. 1.40-45)

¹²Itimi anta nampitsiqui shirampari patsaasanotatsiri: otsoncaqueri ivatsaaro, opiticashaqueri maaroni itseempequiqui. Ineantavacariri Jesoshi, itiyeroashitava-
cari, icantiri:

—Novincatsarite, tempa pitasorentsiti:
pincoquerica, poavisacotena.

¹³Ari yacotashitaqueri, ipamitiri.

Icantiri:

—Nocoaque. Pavisacotaje.

Irosati opeantanaja ivatsaaro. ¹⁴Aisati icantiri:

—Eiroyea picamantacotanatsi. Meeca pijate saserotequi, pinijaapeeri irotanteari pavisacotaji. Pimatero icantiniri Moishishini: paanajeneri saserote pivira intayeneri Tasorentsi iriojeitanteeari atiri pavisacotaji.

¹⁵Iro cantaincha aiquero ijatatifi-
icamantacojeitaqueri Jesoshi. Icarati oshequi catsini jatashijeivetacariri inquemisanterime, aisati pashini

icoajeiveta iroavisacoterime.¹⁶Ari ijatanaque iriori anta caaraiteriqui, iquenquetsatacairy iriri.

Yoavisacotiri Jesoshi caari shevatacha.

(Mt. 9.1-8; Mr. 2.1-12)

¹⁷Ari pashini quitateri yoametantaji Jesoshi pancotsiqui. Isavicajeiti quempeji variseopee aisati oametantirori sanquenarentsi: iponeayetaca oshequi nampitsipeequi, anta Carireaquí, Joreaquí, aisati iponeayetaca Jerosarequi. Otimasanoti itasorenca Avincatsarite imatantarori yoavisacotantaque.¹⁸Jeritapaaque shirampari, icompitacojeitapaquaqueri caari shevatacha. Icoajeiveta iranaaquerime anta isavicaquenta Jesoshi, iro cantaincha tecatsi inquenapee, iticajeitaqueri atiripee.¹⁹Tecatsi incantea inqueapee, irootaque yataitacantacariri otataro-quinta pancotsi. Imorontaquero, impoiji yoaniitacotaqueri anta inauenta Jesoshi.²⁰Iotavaqueri iriori ishirejeitacari, irootaque icantantavacariri:

—Noshaninca, ainiro pantane, iro cantaincha eiro noquishimentimprotsi, irointi noncavintsayempi: eiro noquenqueshiretacotimprotsi aisati, irointi noavisacotempi.

²¹Ari icantavacaajeitaca variseopee aisati oametantirori sanquenarentsi:

—Piquemanirotaqueri: ijitasorentsinirotaca. Apaniro irinti Tasorentsi yoavisacotanti.

²²Ari iotaquero Jesoshi iquenqueshirejeitiri, irosati icantantanacari:

—¿Paita picantantari: “Ijitasorentsinirotaca”?²³Pamene, nocantaqueri: “Eiro noquenqueshireacotajimprotsi pantane, irointi noavisacotajempi”. Meeca pitseen-cajeitaquena. Tempa opomerentsivetaca naniitacaajeri yoca. Eirorica yaniitajitsi, ari pintseencasanajeitena, pishirontimen-tajeitena.^{24,25}Noponeaca narori inquiequi, natiritapaaque. Nocoaque piojeite

ainiro notasorenca, aisati nomataquero nocavintsairi antirori caari cameetsatatsi, noavisacojeitiri.

Ari icantiri caari shevatacha:

—Jentsite, pincatianaje, paanajero pinariantari, pijataje pivancoqui.

Ari ineajeitavaqueri icatianaja, yaanajiro inariantari, ijatanaji ivancoqui. Icantanaque:

—Ariove, icameetsati Tasorentsi.

Ari icantiri saserotepee:

—Pineaquero, nomataquero caari pineapiniti, irootaque piotanteameri oshequi notasorentsitaque. Aisati ari nomatajeri naanajeri coajica inquitequi.

²⁶Ari yojeitanaqueri atiripee cavaco, icantajeiti:

—Tempa icameetsatasanoti Tasorentsi, ipincatsaritasanoti. Te aneapiniteroji oca aneaqueri meeca.

**Yojatiri Jesoshi Irevi, yora
apatovetanariri pincatsari quirequi.**

(Mt. 9.9-13; Mr. 2.13-17)

²⁷Impoiji isoquijanaji Jesoshi, irosati ineantapaacariri Irevi, yora aitayetiriri ishaninca iirequite, impoiji ipiri pincatsari. Isaviqui anta isanquenatapiniti. Icantapaaqueri:

—Tsame, pojatanaquena.

²⁸Ari yoipacanaquero isanquenatacocy-tiri quirequi, icatianaca, yojatanaqueri Jesoshi.²⁹Impoiji ijataque Irevi ivancoqui, icajemacantaqueri itsipapee vionquiniriri pincatsari iirequite, pashini ishanincapee, Jesoshi, maaroni. Yoacaa-jeitacari maaroni.³⁰Ipocaque saserotepee aisati yora oametantirori sanquenarentsi. Icantapaaqueri iroamere Jesoshi:

—Pamenerite Jesoshi: icarajeitaqueri vionquiriri quirequi, yoajeita, irajeiti. Jeri aisati itsipapee caari cameetsayetatsi. Te oncameetsateji incarajeiteri iroajeitea.

³¹Ari icantiri Jesoshi:

—Yora joquiiitachari irootaque coatsiri iraavintea. Yorari caari joquiiitacha te

incoyeji aavinterineri.³²Iriotaque nopcashitiri caari cameetsatatsi niotacantajeariri eiro yantapinitajirotsi aisati caari cameetsatatsi. Te nompocashiteriji jivetachari icameetsati.

Isampitiri saserote:

“¿Paita caari ititanta poamere?”
(Mt. 9.14-17; Mr. 2.18-22)

³³Ari icantiri saserote Jesoshi:

—Pamene ititapinita iroamere Joa, aisati iquenquetsatacapinitiri Tasorents: aisati iquempejeitacari iroamere variseo. Irinti poamerepee, te intiteaji: yoapini-jeita, irapini-jeiti.

³⁴Ari yacanaqueri:

—Oquempetaca ariorica iraye shiram-pari ijina, incajemajeiteri ishanincapee inquimoshireventajetanteariri. Ariorica irareejeitaquea, ¿arimpa intijeitapeempa? Eiro. Aisati narori, nocarajeitiri meeca noamerepee: ¿paita nontitacanteariri?

³⁵Ariorica irojocajeitanajeri ishaninca aatsiri ijina, impoijiquea intjeitanaquea. Aisati nonquempetea narori: ariorica coajica noncame, impoiji iroashiretacojetanaquena noamere, irosatiquea intjeitanaqueari riори. ³⁶Aisati, otimirica piitsaare iroquerari, te pintsereroji pimpataquero peesatotaintsiri pimaatsara. Aisati, ariorica poavat-jerome, eiro omoncaratavacaatsi. Aisati pinquivajerorica ontsitiamaotanaque iroquerari, aisati antsivianaque peesatotaintsiri. Otseraeacoticari iroquerari.

^{37,38}Tempa apeantantaro iroquerajari pearentsi imeshinaqui iroquerari, impoiji antsitacotaquero eiro aparajatantsi. Ariorica oshimoretanaque, aravoncrajatanaque, otapiasanotaqueri imeshina. Iroquera ini, eiro ipesacotitsi, aisati eiro aparajatatsi oja. Irooricame ampeantantajearome pearentsi iroquerajari peesatitatsiri imeshina, tempa iraravoncanaque, intoncanaque: ton.

Aitaque intsereanaque, aisati amparajata-naquea iroquerajari.³⁹Tempa ariorica irajeitero peesatjataintsiri pearentsi, eiro acoirotsi irero iroquerajari.

Icantavacaimentaro saavarō.

(Mt. 12.1-14; Mr. 2.23-3.6)

6 ¹Ari osaavarotaque, iquenanaque Jesoshi tiricomashiqui, itsipatananacari iroamere. Yora iroamere yavijjeitaquero oitsoquipee, yamirocaitaquero otaqui, yojocaquero. Irointi oitsoqui, yoajeita-carō. ²Ineajeitaqueri variseopee, icantiri:

—Te oncameetsateji oca pantiri. Tempa irointi oca saavarō, amaoreajeitantarī, eiro ataquireitantarotsi meeca. ¿Paita pantantarori?

^{3,4}Yacanaqueri Jesoshi:

—Tempa pineanatiro isanquenatacotiriniri Iravirini. Aaqueri itasheni aisati itsipajeitari. Otimi anta ivancoqui Tasorents tanta yovetsiqueetiniriri Tasorents. Apaniro yoajeitaro saserote-pee, te irishineteriji itsipapee iroyearo. Iro cantaincha yashinoncaaca Iraviri, irotaque ipantacariri tanta yora ivincatsarite saserote, aisati ipajeitaqueri maaroni oijajeitiriri. Pineaquero, te irininteji iroashinoncayeri. ⁵Noponeaca narori inquitequi, natiritatapaque: naro cantacantirori paitarica anteri saavarō-qui.

⁶Ari pashini saavarō ijatanaji anta yapatotapinjeita, yoametantapaaque. Itimi anta shirampari tsiricoipacori. ⁷Yamenashetavaqueri oametantirori sanquenarentsi aisati variseopee, icoaque irioteri iroavisacotanterica saavarōqui. Icoaque incanteri ivincatsarite: “Noneaqueri Jesoshi yantaqueri caari cameetsatatsi”. ⁸Iro cantaincha iotaqueri Jesoshi iquenqueshire-jeitiri. Icantiri tsiricoipacori:

—Caate, pincatiapée aca.

Ari icatianaca, ijatashitaqueri. ⁹Icantajeitiri Jesoshi:

—Meeca nosampijeitempi. ñPaita cameetsatsatsiri antajeiteri saavaroqui? ñCameetsampa ancavintsayeri ashaninca? Terica, ñpicoaquempa avashinoncayeri? ñCameetsampa avavisacoteri ashaninca? Terica, ñpicoaquempa ayeri?

¹⁰Yamenajeitaqueri Jesoshi, imajerenirojeitanaque. Ari icantiri:

—Pancote.

Ari yacotanaque, cameetsatanaji iraco.

¹¹Ari iquisajeitanaca saserotepee.

Isampitavacaanaca:

—ñJaoca ancanteriri avacantanteariri?

Icoyeajeitaqueri Jesoshi iroamerepee.

(Mt. 10.1-4; Mr. 3.13-19)

¹²Pashini quitaiteri ijataque Jesoshi toncaariqui, iquenquetsatacairy iriri, iquitaitetacapaaque. ¹³Ari oquitätetamani icoyeajeitaqueri iroamerepee. Icarataque 12 icoyeaueri. Icoaque coajica intianqueri inquenquetsatacotan-teariri. Jero oca ivajiropee: ¹⁴⁻¹⁶Shimo (aisati ipajitiri Jesoshi: Petero), Antirishi (yora irirenti Shimo), Santiano, Joa, Jeripi, Varitorome, Mateo, Tomashi, Santiano (yora itomi Arijeo), Shimo (icanteetiri aisati Seraroro), Jorashi (yora itomi Santiano), aisati Jorashi Ishicariote (yora aacanterineri coajica Jesoshi). Aitaque ipajiteitari iroamere icoyeaueri Jesoshi.

¹⁷Impoiji yoirincapaaja anta opampaitetinta. Itiminta oshequi iroamerepee, aisati oshequi catsini pashinipee atiri: iponeajeitaca Joreaqui, Jerosarequi, Tiroqui, aisati Shiroqui. Otimi Tiro aisati Shiro arejiqui, anta otsapijaqui antearoja incajare. Ijatashijeitaqueri Jesoshi inquemisantajeitavaqueri, aisati icoajeitaque iroavisacojeiteri mantsiariee. ¹⁸Ari yoavisacojeitaqueri yatajeaoncayetiri camaari. ¹⁹Icoajeitaque impamijeitapeeri, intasoncacoventanteariri iroavisacojeitan-teariri.

Iquenquetsatacotaqueri Jesoshi quimoshirejeitatsineri.

(Mr. 5.1-12)

²⁰Ari yamenanaqueri iroamere, icantiri:

—Ariorica pashinoncaavetaca meeca, pinquimoshiretanaque: aitaque impincatsa-rirentajeitempi Tasorentsi, coajica.

²¹Ariorica pitasheavetaca meeca, pinquimoshiretanaque: aitaque inquemacaajempi Tasorentsi, coajica. Ariorica poashirevetaca meeca, pinquimoshiretanaque: aitaque inquimoshiretacaajempi, coajica. ²²Ariorica inquisajeitempi atiripee, intianquempi, incantimatempis, incante te pincameetsateji. Ariorica inquisimentajeitempiro piquemisantana, iro cantaincha inquimoshiretaca-yempi Apa. Tempa nopenaeca narori inquitequi, natiritapaaque. ²³Ariorica inquisajeitempi, pinquimoshiretasanotanaque, pincantajeite: “Cameetsave”. Tempa aitaque cameetsa impinatasanotempi Apa inquitequi. Queario yora intacantajeita-queeri iquisajeitaquerini peerani yora camantacotiriniri Tasorentsi.

Iquenquetsatacotiri Jesoshi ashinoncachaneri coajica.

²⁴Jero pashini aisati icantaqueriri Jesoshi:

—Iro cantaincha yora ashitaarantinci, iquimoshireimentaro yashjeitar: moncarata, iroashinoncaya irinti. ²⁵Aisati iroashinoncaya quemarori yoari meeca: coajica inquemero itashe. Iroashinoncaya shirontajeitachari meeca: coajica incavintsa-jeitea aisati iriraajeitea. ²⁶Ariorica irineacameetsajeitempi maaroni atiripee, pashinoncaya coajica: tempa yora intacarori inecameetsajeitashitari yora amatavijeitir.

Icoaque Jesoshi aninteri quisajeiteeri.

(Mt. 5.38-48; 7.12)

²⁷Aisati icantajeitaqueri:

—Pinquemisantajeitavaquena: pininteri avinti quisajeitimpire, pincavintssayeri.

²⁸Pincanteri Tasorentsi iramitacojeiteri maaroni cantimajeitimpiri, aisati maaroni quisajeitimpiri. ²⁹Ariorica impasavoro-tempi pampatevoroqui, pishineteri impasavorotempi acaqueroca aisati. Ariorica iraapitsatempio poicoro, pimperita pashini piitsaare aisati. ³⁰Ariorica iramanempiro paitapeerica, ari pimperi. Ariorica iraapitsatempio pivaararo, eiro picoacotiritsi aisati. ³¹Ariorica picoaque incavintsayempi itsipapee, ari pincavintsayeri avirori. ³²Ariorica pinintajeitiri maaroni nintajeitimpiri, tempa moncarataca: tecatsi incantea impinatempi Tasorentsi. Tempa ioti caari quemisantatsi inintiri nintiriri iriori. ³³Aisati oquempetaca: ariorica picavintsairi cavintsaaajeitimpiri avirori, tempa aisati moncarataca. ¿Paita picoori impinatempi Tasorentsi? Aisati iriori caari quemisantatsi, icavintsairi cavintsaajeitiriri iriori. ³⁴Ariorica picoaque iroimpiajemi pipaqueriri pishaninca, tempa moncarataca: ¿Arimpa picoaque impajempi aisati Tasorentsi? Tempa aisati ipavacaas iriori caari quemisantatsi paitapeerica, aisati icoaque irovanyeneri iroimpiajeneri. ³⁵Irootaque nocantantimpire pincavintsayeri avinti quisajeitaquempiri, pincavintsante, pimpashiyeteari ashinoncaincari: eiro piquenqueshiretirotsi irimaterorica iroimpiajemi. Ariorica pantero oca, cameetsa: impinatasanotempi Tasorentsi, aisati intomintasanajeittempi. Cameetsa ipincatsariventanti anta jenoqui. Queario icavintsairi piatsajeitariri, yora caari cameetsajeitatsi. ³⁶Icavintsantanotii Apa: pinquempejeiteari. ³⁷Eiro paamaashitaritsi pishaninca, aisati eiro picantitsi: “Ainiro irantane”, impoiji eiro icantimpi-tsi Tasorentsi: “Ainiro pantane avirori”. Eiro piquishimentirtsii pishaninca yantayetiri, irointi pincavintsayeri: impoiji eiro iquishimentimpirotsi

Tasorentsi pantayetiri avirori, irointi incavintsayempi. ³⁸Ariorica pimpayeteri ashinoncaincari coiteimoyetariri, aisati inquempetajempi iriori Tasorentsi: impayetempiro maaroni coiteimoyeta-quempiri avirori. Te irimashitsateji: impasanotempi. Ariorica capichaji pincavintsante, aisati capichaji incavin-tsayempi avirori. Ariorica oshequi pincavintsasanote, ari oshequi incavintsaasanotempi avirori.

Irootaque icantiriri Jesoshi.

Icoaque Jesoshi ancavintsayeri quisajeiteeri.

(Mt. 7.1-6, 15-23)

³⁹Jeroca ishiacaaventiniriri aisati Jesoshi:

—¿Arimpa irimatero camarajaquiri irancatsatanaqueri iamarajaquiririnte? Eiro imatirotsi: tempa ari impariajeitaque omoroqui. ⁴⁰Aisati iquempeta, yora iroamere te iranaacoteriji oametiriri ioti. Iro cantaincha ariorica irishitoriatasa-note, ariorica irimoncarateari. ⁴¹¿Paita piquishimentantariri pishaninca yantayetiri? Panaacotasanonoticari avirori. Oquempetaca picantiri pishaninca: “Pitijaquitaca ovane quipatsi”, iro cantaincha ainiro avirori pitijaquitacaro antearo inchato. ⁴²Arimpa pincanteri: “Jentsite, noshaninca, naajempiro pitijaquiro”. Tempa pioti otimi inchato pashicajaquitaquempiri avirori. ¿Jaoca pincanteari paantajeinariri itijaquiro pishaninca? Pamatavitanti, pinquempe-tearime cameetsatasanotatsiri. Pamene, pijivate pojoquero antearora inchatora pashicajaquitaquempirira, impoiji pamenasanotanaje paantajeinariri itijaquiro pishaninca iriori.

⁴³Jero oca pashini ishiacantiriri Jesoshi:

—Ariorica ocameetsati inchato, ocameetsati oitsoqui iroori. Aisati terica

oncameetsateji inchato, te oncameetsateji oitsoqui iroori.⁴⁴ Ariorica aneero oitsoqui inchato ayoti jaoca ocantari inchato iroori. Ariorica pincoaque chochoqui, ñarimpa pijatashitero anta manitincanamashiqui? Eiro pijatitsi, tempa piotiro te oitsoquitantearoji chochoqui, iyera, ova, tecatsi catsini.⁴⁵ Ariorica anquenqueshiterero cameetsatatsiri, antayetero cameetsayetatsiri. Ariorica anquenqueshiterero caari cameetsatatsi, antayetero caari cameetsatatsi. Queario, aneanatanataro aquenqueshireyetiri.⁴⁶ ¿Paita picantashitantavetanari: “Novincatsa-rite”? Te pinquemisantenaji.

Ivecarataquero icantajeitiriri.
(Mt. 7.24-29)

⁴⁷ Aisati icantiri Jesoshi:

—Meeca noshiacantempiri jaoca icantari quemisantanari. Iquemiro noneane, iquemisantasanoquaqueri: yantajeitaquero maaroni nocantaqueriri.⁴⁸ Ishiaqueri shirampari vetsiquirori ivanco. Iquiahsitaquero tsompoina, irosati mapiqui aitaque yovestarataquerori. Ari oniri ominca mapiqui, oquisotantacari. Opariasanoaque incani, ooncanaca eni. Antearo catsini otatsinavetapaacaro, iro cantaincha te aaveeroji: quisotaque onaque mapi.⁴⁹ Iro cantaincha yora caari quemisantana ishiaqueri shirampari vetsicavetarori ivanco, te intijacotasanoterojo. Impoiji ooncanaca, aanaquero ivanco. Ojaraanaque, aanaquero, te anejeroji.

Irootaque icantajeitiriri Jesoshi.

Yoavisacotiri Jesoshi inampire capitano.
(Mt. 8.5-13)

7 ¹Impoiji ipianaja Jesoshi anta Caperenoqui. ²Itimi anta nampsiti-qui aparo capitano. Oromasati ini, caari ini jorio. Ijoquuitaca inampire, irotaintsi income. Inintasanotiri capitano inampire.

³Iquemacotaqueri Jesoshi, itasoncantaque, irosati itiancantacariri jivatacaa jeitiriri joriopee:

—Pincamantaiteri Jesoshi impocanquaeta iroavisacotenari nonampire.

^{4,5} Ari yareejeitapaacari, icantasanojeitapaaqueri:

—Pijatashiteri. Icameetsatasanotri yora capitanonta, oshequi inintajeitaquee arori. Yovetsicacantaqueenero pancotsi apatojeitantarri. Cameetsa poavisacoteneri inampire.

^{6,7} Ari yojajaeitanaaqueri. Quempeji inapaaque, ineajeitavaqueri pashini ishanincaphee capitano, itianquiri.

Icamantapaaqueri:

—Jero oca icantaqueri noyapitanote: “Nopincatsatasanotaqueri Jesoshi, iro caari notonquitantavacari. Notseencaja narosati, irootaque caari nocanta impoque novancoquica. Niotaque incoaquerica iroavisacoteri nonampire, ari iravisacotaje.⁸ Timatsi cantanari paitarica nanteri, aisati timatsi soraro notiancapinitiri. Noncanteririca: ‘Pijate’, ari irijataque. Noncanteririca: ‘Pimpo-que’, ari impocanquaque. Aisati noquempetiri nonampire iriori, ariorica noncanteri: ‘Jero oca panteri’, ari irantaquero”.

⁹Iquemavaitiiri Jesoshi, yoanaque cavaco. Ari ipitsocashijeitacari oijajeitiriri, icantajeitiri:

—¿Piquemaquerompa oca icantiri oromasati? Oshequi ishiretaquena, te inquempejeitariji ashanincaphee arori.

¹⁰Ari impoiji ipiajeitanaja ishanincaphee capitano. Ineapaaqueri inampire, avisacotaji.

**Yoitinaajiri Jesoshi
camaintsiri anta Naiqui.**

¹¹Pashini quitaiteri ijatanaque Jesoshi anta Naiqui, icarajeitaqueri inampireepee aisati oshequi pashini oijajeitiriri.

¹²Iquempejijeitapaacaro nampsiti,

ineavaitiiri icompitacotapaqueri camatsiri, intijerime. Iro iriniro camain-tsiri camajimentaaro, aisati te intimeji pashini otomi. Oijatacoventiri otomini, ocarajeitiri oshequi oshaninca.¹³ Ineavacarori Avincatsarite, oshequi icavintsairo, icantiqueru:

—Eiro piraacotiritsi pitomi.

¹⁴Ari ijatashitaquero cajo yoantacariri, ipamitaquero. Icatiacaapaacari compitacotiriri. Icantiri Jesoshi camaintsiri:

—Evancari, pintinaaje.

¹⁵Irosati itinaantanaja, isavicaji; ineanatanaji. Impoiji icantiro Jesoshi:

—Jerica pitomi, aneanaji.

¹⁶Yoajeitanaque cavaco catsini neajeitaqueriri, icantajeiti:

—Tempa icameetsati Tasorentsi.

Itianqueeri oamejeiteerori irineane. Queario, itasoncaventaquee Tasorentsi, icavintsaajeitiri quemisantajeitiriri.

¹⁷Irosati iquemacojeitantzaculariri maaroni joreasati, aisati otsoteanaca neantsi pashinipeequi nampitsi.

Yora Joa Vaotisatantatsiri itianquiri iroamere Jesoshiqui.

(Mt. 11.2-6)

¹⁸Ari iquemacotaqueri Jesoshi iroame-repee Joa, yora vaotisatantatsiri. Ijatashitaqueri, icamantapaaqueri yantayetaqueri Jesoshi. Yora Joa, icajemiri iroamere apite,¹⁹ itiancaqueri Avincatsaritequi, icantavaqueri:

—Pijajeite Jesoshiqui, pisampitapeeri: “¿Avirompa Quirishito namenaajeivetari? ¿Pashinimpa naamaajeitea?”

²⁰Ari yareejeitapaacari, icantapaaqueri:

—Itiancaquena Joa, icantana: “Pisam-pitaiteri Jesoshi: ‘¿Avirompa Quirishito naamaajeivetari? ¿Pashinimpa naamaajeitea?’”

²¹Tecatsi incantea Jesoshi iranqueri, iroitinta yanti yoavisacoyeriri oshequi mantsiayetsiri, aisati yoavisacoyeriri

oshequi yatajeaoncayetiri camaari. Aisati yamenacaayetajiri oshequi caari amenayetatsi.²² Impoiji icantiri:

—Meeca pijajeitaje, pincamantapeeri Joa aitaquenea pineacojeitaquenari aisati piquemacojeitaquenari. Pincamantapaa- jeri amenanaji yora caari amenaveita- chani, anitanaji yora caari aniveita- chani, avisacojeitanaji patsaayeveitachaniri, iquemayetanaji yora caari quemaveitachani, itinaayetanaja camayevetain- chari. Aisati nocamantajeitiri ashinoncaa- jeivetachari jaoca incanteari irijate inuitequi.²³ Iquimoshireventajeitaquena maaroni quemisantasananari.

Ianti Jesoshi:

“Icameetsatasanotaque Joa”.

(Mt. 11.7-15)

²⁴Ari ipajetanaja itiancane Joa, impoiji iquenquetsatacaajeitiri Jesoshi apatotimentariri. Iquenquetsatacotiri Joa, icantiri:

—¿Paita pijatashijeitantariri Joa anta caaraiteriqui? ¿Pijitimpá itsataashita Joa, iquenquetsatashita? Te inquenquetsata-shiteají. ¿Pijiveturimpa icomitapinita, te irioteji paitarica iquenqueshiretiri?

Tempa ioti.²⁵ ¿Paita pijatashitasanotanta- riri? ¿Irompa pijijeitaqueri ashitarantin- cari ini, quitsaatrori cameetsamaori?

Caari ini. Pamene, yora quitsaatrori cameetsamaori ishanincatacari pincatsari, aisati iquempetaca: iveshirementaro irovaararo timatsiri ivancoqui pincatsari. Te inquempeteariji irinti Joa.²⁶ Jentsite, pincamantena: ¿paita pijatashitiri?

¿Irimpa pijitiri quenquetsatirori irineane Tasorentsi pijatashitantariri? Tempa queario, iquenquetsatiro, iro cantaincha yanaacojeitiri itsipapee quenquetsatacan- tantatsiri.²⁷ Tempa piojeitiro sanquena- rentsi cantatsiri: “Notiomí, nontianqueri jivatemperni, inquenquetsatacotempi. Incamantajeiteri atiri incameetsashirejei-

tanaque, inquemisantajeitempi". Queario, oca sanquenarentsi oquenquetsatacotiri Joa Vaotisatantatsiri. ²⁸Yanaacojeitaqueri maaroni itsipapee quenquetsatacantantsiri: imataquero maaroni icoacaqueri Tasorentsri, irootaque ineacameetsatanta-riri. Iro cantaincha ineacameetsatasano-tiri catsini Tasorentsri maaroni ipincatsari-ventasanojeitiri.

**Yora saserotepee itseenajeitiri Joa,
aisati Jesoshi.**

(Mt. 11.16-19)

²⁹Ari iquemajeitaqueri oshequi atiri icantakeriri Jesoshi. Iquemantacariri, icantajeiti:

—Queario, icameetsataque Tasorentsri.

Aisati icarajeitaqueri quemajeitaqueririri yora ivaotisayetiri Joa, aisati apatoyetiniriri oromasati quirequi. ³⁰Irintiquea yora variseo aisati yora oametantirori sanquenarentsi te irinintajeiteji iranteneri Tasorentsri icoacaavetariri, aisati te irijatashiteriji Joa irivaotisateri. Te iriveshireimentearo irinti icantiri Jesoshi.

³¹Icanti Jesoshi aisati:

—¿Paitaquea? ¿Jaoca icantari yocapee? ¿Paitaniquea caari iquemisantantana yoca? Te inquenqueshiretimateajei. ¿Paita noshiacanteri? ³²Irio noshiacanteri jananequi, isavicajeiti nampitsiqui nianqui, icanti aparo: "Apaniro nosoncavetaca, iro cantaincha te pojatacotenaji, te pimaninqueteji. Noashiretacovetari camaintsiniri, iro cantaincha te poashire-teoji avirori". ³³Pamene, yora Joa ititapinita, te iririmateroji cachojari, jero picantajeiti: "Irio camaari pincacairiri, caari yoasanotanta, aisati caari irantaro cachojari". ³⁴Iro cantaincha noponeaca nainti inquitequi, natiritapaaque: noapinita aisati nirapiniti. Aiquero picantajeiti: "Jerinta oashenti, shinquinrinti. Ishanincatacarri apatotapinitiniriri oromasati quirequi, icarajeitapinitiri

caari cameetsajeitatsi". ³⁵Ontimimota-quempericame piotantari, piotaqueme te ontampaticateji picantajeitiri.

**Yoavisacotiro Jesoshi tsinane
antapinivtarori caari cameetsatatsi.**

³⁶Ari aparoni variseo icantiri Jesoshi:
—Caate novancoqui, avajeitea.

Yacanaqueri:

—Jaa, ari.

Ari ijajeitanaque, yoajeitaca. ³⁷Otimi anta nampitsiqui tsinane antapinivtarori caari cameetsatatsi. Oquemacotaqueri Jesoshi, yoa anta ivancoquinta variseo, ojatashitiri oneeri. Aacotanaqueneri casancajari. Iro aacotantanacanariri mapi quitamarori imoqueetiri. ³⁸Ocatiapaaca itapiiqui Jesoshi, quempeji. Iraasanota-paaca, ovitezantacari ojaqui iitiqui, iro oshetantajanariri oishi. Impoiji onintiri iitiqui, aisati osaitantacari iitiqui casanca-jari. ³⁹Ineantavacarori yora variseo, iquenqueshiretanaca: "Iriome itiancane Tasorentsri, iriotavaquerome oca tsinane. Oshequi antapinitiro caari cameetsatatsi, eirome ishinetarome antiterime iiti". Ipajita variseo Shimo. ⁴⁰Iotaqueri Jesoshi iquenqueshiretiri, icantiri:

—Shimo, timtsi noncamantempi.

Yacanaqueri:

—¿Paita pincamanterari oametanari?

⁴¹—Noshiacantempiro. Itimi shirampari irevitiriri 5,000 soles, itimi pushini irevitiriri 500 soles. ⁴²Iro cantaincha te irimateroji yora apitetatsiri iroimpiajeneri iirequite, irootaque icantarari: "Aitanaji, eiro pipinatanatsi. Nopashitim-piri". Tempa icavintsairi apite. Aparo irevivetacari capichaji, irinti itsipa irevitasanovetacari. Pincamanterena: ¿janica neacameetsatasanoterineri?

⁴³Yacanaqueri:

—Naamaaca yora irevitasanovetariri, tempa iriotaque icavintsaasanotiri catsini.

Icantiri:

—Queario picantaque.

⁴⁴Impoiji yamenaquero Jesoshi tsinane, icantiri Shimo:

—Pamene, incaranqui noqueapaaque aca pivancoquica, iro cantaincha te paacameetsatavaquenaji: te pimpavaquenaji njija nonquivantapeemparomeri noiti. Pinequero irointi oca tsinaneca.

Oquivantapaquenaro ojaqui noiti, aisati oshetantaquenaro oishi. ⁴⁵Te pinintavorotenaji, irointi oca, onintapinitaquero noiti. ⁴⁶Te pisaitantenaro noitoqui quejitsi, irointi oca, osaitantaquenaro noiti casancajari. ⁴⁷Pamene, ainiro antayevetari oshequi, iro cantaincha nocavintsaquero, eiro noquenqueshireacotajirotsi antayetiri: tempa oshequi onintasanotaquena. Ariorica noncavintsa-
yeri antayevetarori capichaji, capichaji irinintavaquena iriori.

^{48,50}Ari icantiro tsinane:

—Ainiro onaveta pantayevetari, iro cantaincha eiro noquishimentimpirotsi, eiro noquenqueshireacotimpirotsi aisati. Pishiretaquena, irootaque pavisacotanta-
jari. Cameetsaya pijataje, piveshireasano-
tanaquea.

⁴⁹Ainiro inaveta oacojeitacariri, isampi-
natavacaaca:

—¿Paitampa ijita yoca, icavintsantarori
antirori caari cameetsatatsi?

Oijajeitiri Jesoshi tsinane amitacotapinijeitiriri.

8 ¹Pashini quitaiteri iquenaquenayeta-
naque nampitsipeequi Jesoshi.
Iquenquetsatacaaajeitiri atiri, icamantajei-
tiri:

—Irotaintsi impincatsariventajeitempi
Tasorentsi.

Quiso yoanajiri iroamerepee, yora
carajeitatsiri 12, ²aisati oijajeitiri tsinane-
pee. Peerani yoitsaviantaveitaroni
camaari, aisati ojoquiiveitani, iro cantain-

cha yoavisacojeitajiro Jesoshi. Opajita
aparoni tsinane Maria Maquitarasato.
Icaraveitani camaari oitsaviantaveitaro-
niri 7. ³Iro oijatiriri pashini, opajita
Joana, ijina Cosa. Yora Cosa, iringa
amitacotiriri pincatsari Eroreshi. Aisati
iroori oijatiri Sosana, aisati otsipapee
tsinanepee. Oca tsinanepee amitacotapi-
nijeitiri Jesoshi, opapinijeitiri coiteimota-
cariri.

Ishiacantiniri jocaitirori oitsoqui tirico.

(Mt. 13.1-9; Mr. 4.1-9)

⁴Yapatotimentajeitacari Jesoshi
oshequi atiri, ari ishiacantajeitiniri,
icantiri:

⁵—Ari ijataque shirampari yojocaitiro
oitsoqui tirico oaantsiqui. Aparopee
pariitapaintsi avotsiqui: yaaticayetaquero
aniiyetatsiri, impoiji yoajeitacaro
contsaropee, itsoncaquero. ⁶Pashinipee
pariitapaintsi mapiqui. Oparitsavetanaca
capichaji, iro cantaincha te oncajavatsati-
mateji, irootaque oshimpantanacari,
ocamajeitanaque. ⁷Pashini pariitapaintsi
quitotseequimashiuki: oshiocavetanaca,
iro cantaincha anaanaquero quitotseequi,
irootaque ocamantacari. ⁸Iro pashini
pariitapaintsiri cameetsariqui quipatsi:
oshiocanaque, otimasanotanaque oitsoqui
oshequi.

Irootaque ishiacantajeitiniri, impoiji
antearojenca icantajeitiri:

—Otimirica piquemantari, pinquemasa-
notavaquero.

Yoametiri Jesoshi iroamere oshiacaaventiri oitsoqui.

(Mt. 13.10-23; Mr. 4.10-20)

⁹Isampijeitiri iroamerepee:

—¿Paita pishiacantiri incaranqui?

¹⁰Yacanaqueri:

—Icoacaquempi Apa Tasorentsi
piojeitero caari iojeiti itsipapee atiri.
Avintiquea niotacaquempi jaoca icanta-

Apa ipincatsariventajeitaquempi. Irio noshiacantajeitiniri yoranqui: iramenajeivetea, iro cantaincha eiro ineasanotitsi; inquemajeivetea, iro cantaincha eiro iojeitavaquerotsi.¹¹ Jero oca noshiacaa-ventimpire: oca oitsoqui oshiacaaventiro irineane Tasorentsi.¹² Oca avotsi oparian-tavetapaacari oitsoqui oshiacaaventiri quemajeivetavacarori irineane Tasorentsi: ipocapaaque camaari, yojocacaajiri iquenqueshirevetacaro irineane. Te irinintacayeriji inquemisante aisati iroavisacotea.¹³ Orari mapitauntsiri opariantavetapaacari oitsoqui, oshiacaaventiri veshireimentavetarori irineane Tasorentsi, ineacameetsavetacaro. Iquemisantaveta, iro cantaincha te inquearioventeroji: ariorica opomerentsi-timotacari inquemisantaveta, ari yojocanajiro.¹⁴ Aisati oquempetaca quitotseequimashi opariantavetapaacari: oshiacaaventiri quemajeivetacarori irineane Tasorentsi, iro cantaincha iquenqueshiretasano-tiro yantapinitiri, veshireimentaro yashiyetari, aisati icoaque inquimoshire-tashitea. Yatsipetashitaro inquemavetaro irineane Tasorentsi: te inquemisantasano-teroji, te iranteneriji Tasorentsi icoacaavetacariri.¹⁵ Ocari cameetsataintsiri quipatsi oshiacaaventiri quemasanotavaquerori irineane Tasorentsi. Iquearioven-taquero inquemisantasanoque, icamee-tsashiretanaque. Iriataque matasanotirori maaroni icoacaaqueriri Tasorentsi.

Icantiri Jesoshi: “Piotasanojeitavaquero jaoca icanta Tasorentsi ipincatsariventajeitaquempi”.

(Mr. 4.21-25)

¹⁶Jero aisati yoamejeitiriri Jesoshi iroamere:

—Ariorica antsiotero tsiomentotsi amenajeitanteari, ¿arimpa antatacotero cantiriqui? ¿Arimpa amanaquero jaocarica ara? Tempa ocameetsati

avanqueteri jenioqijji onconijajeitanteari paitapeerica. Irootaque noamejeitanta-quempi: nocoaque piotasanojeite.

¹⁷Tequera piojeite jaoca icantari Tasoren-tsi ipincatsariventajeitaquempi, iro cantaincha coajica piotasanojeitajero.

¹⁸Pinquemasanojeitavaquena piojeitanta-jeari. Capichaji piotaque meeca, iro cantaincha ariorica pinquemisantasano-tena, nontsoteajeittempiro, niotacaasano-jeitempi. Ariorica pijiveta pioti, eiro piquemisantanatsi, impoiji icomitacaasa-notimpicari Tasorentsi: tecatsi piotima-taje.

**Ijatashijeitiri ishanincasanori
Jesoshi irineeri.**
(Mt. 12.46-50; Mr. 3.31-35)

¹⁹Impoiji ojatashtiriri Jesoshi iriniri, otsipajejitari irirentipee. Yareejeitapaaca pancotsiqui anta isaviquinta, iro cantain-chia tecatsi incantajeitea intsipajetapeem-pari: yojocajaajeitavaqueri oshequi atiripee.²⁰ Icamanteetiri:

—Ooopaaquempi piniro, jeri parenti-pee. Osavicapaaque anta saiteriqui.

²¹Iro cantaincha yacanaqueri:

—Nonirontacaro maaroni quemisanta-sanojeitiriri Tasorentsi, maaroni antasanotiniriri icoacaaquerori. Aisati nirentijeitacari maaroni quemisantiriri.

**Yoimajerentaquero Jesoshi tampea
aisati omotoncane incajare.**
(Mt. 8.23-27; Mr. 4.35-41)

²²Pashini quitaiteri itetajaro Jesoshi pitotsi, icarajeitaqueri iroamerepee. Icantiri:

—Tsame amonteajeitanage intatiquero incajare.

²³Ari ijatacojeivetanaca, aacotanaqueri tampea. Ari ijatacotaque nianquiaqui, imaanaque Jesoshi. Impoiji omapocajeitaqueri antearo tampea, otejatapaaacaro nija pitotsiqui, irotaintsi intsitiacojeite.

²⁴Icaocaaqueri iroamerepee:

—Pintinaye, oametanari, irotaintsive
antsitiacojeite.

Ari itinaanaca, impoiji ipeajiro tampea,
ipeajiro omotoncane: opeasanotanaja.

²⁵Icantiri:

—¿Paita caari pishirejeitantanana?

Itsaroacaajeitanacari, aisati yoajeitana-
queri cavaco. Icantavacaajeitanaca:

—¿Janicampa yoca? Imataquero
tampea, aisati omotoncane: ipeajiro. Te
aneapiniteroji oca.

Yoavisacotiri Jesoshi neiriri camaari.

(Mt. 8.28-34; Mr. 5.1-20)

²⁶Ari iponeanajari Jesoshi Carireaquí,
meeca yareetapaaca intatiquero: anta
Jerasequi. ²⁷Yaatacotapaaque, yamatse-
caejeitanaque quipatsiqui. Ineapaquaqueri
neiriri camaari: peerani, te inquitsaateaji.
Te irisaviqueji pancotsiqui, irointi
iquenaquenatsempequiyeti anta
tijaariqui. ²⁸Ineantavacariri Jesoshi,
itiyeroashitavacari, icajemanaque:

—¿Jaoca pincantenari? Niotavaquempi:
avirotaque itemi Tasorentsisanori savicatsiri
inquitequi. Eiro piquematsitacaanatsi.

²⁹Iro icajemantacari, itsaroacaavacari
Jesoshi, iotaque camaari intianqueri. Yora
shirampari ineapinitiri camaari, iquenaca-
pinitiri. Yoisotapiniyeetvare iracoqui aisati
itiqui carenatsa, iro cantaincha ishindsighta-
cairi camaari, ipesantarori carenatsa
yoisotanteevetacariri. Ariorica ipesanaquero,
ishiacaanacari camaari caaraiteriqui.

³⁰Icantiri Jesoshi:

—¿Jaoca pipajitari?

Yacanaqueri:

—Nopajita Oshequianti.

Iro ipajitantacari Oshequianti ineaqueri
oshequi camaari. ^{31,32}Ari itimi anta
tioncailiqui oshequi chancho yoajeita.
Yora camaari icantiri Jesoshi:

—Eiro pitiancajeitanatsi Sharincaveni-
qui, ainti pintiancajeitena anta chancho-
qui, nonijaapeemparita iriori.

Ari icantiri:

—Pijajeite.

³³Ari yojocajeitanajiri shirampari,
inijajaiteitapAACARI chanchopee, irosati
ishiaeitantanaca, ipariajeitanaque
imperitaqui, ipiincajeitanaque incajare-
qui, pocn, pocn, pocn, itsitiaeitanaque.

³⁴Ari ineantavacariri, ishiaeitanaaca
shentajeivetariri chancho, icamantajeita-
queri ishaninca anta nampsiqui aisati
oantsiqui. ³⁵Ari ipocajeitaque irameneri
yora neaveitariniri camaari, jaocarica
icantajari. Ineapaquaqueri, tecatsitaji inaji;
tecatsi oajerine, isavicaji Jesoshiqui.
Iquitsaataja, otimanaji iquenqueshiretan-
tari. Itsaroacaajeitapaaaci. ³⁶Yora
neasanotaqueri icamantajeitavaqueri
maaroni ishaninca yantiri Jesoshi,
itsoteaqueneri. ³⁷Ari itsaroajeitanaque
catsini maaroni timajeitatsiri ara.
Itiancajeitajiri Jesoshi:

—Pijataje, eiro pipocajitsi aisati.

³⁸Irintiquea yora neaveitariniri camaari
icantavetari:

—Nocoaque noijatanaquempi.

Iro cantaincha icantiri:

³⁹Eiro pojatanatsi, ainti pijataje
pivacoqui. Pincamantajeitapeeri
pishaninca oshequi icavintsaquempi
Tasorentsi.

Ari ijatanaque, iquenaquenayetanaque
nampsiqui, icamantajeitiri ishaninca:

—Pinequena: oshequi icavintsaajana
Jesoshi.

Yoavisacotiro Jesoshi irajatatsiri aisati yoitinaajiro irishinto Jairo.

(Mt. 9.18-26; Mr. 5.21-43)

⁴⁰Impoiji ipianaja Jesoshi, imontean-
jaro incajare. Yoyeajeitaqueri oshequi
atiri, yaacameetsajeitavaqueri. ^{41,42}Iton-
quitavacari shirampari pajitachari Jairo:
avirotaque jivatacaantatsiri anta pancotsi-
qui yapatojeitantar. Itiyeroashitapaaaci
itiqui Jesoshi, icantapaaqueri:

—Tsame novancoqui, irotaintsi oncame nishintio.

Apaniro oni irishinto, ocarataque osarintsite 12. Ari yojatanaqueri, itsitacajeitanacari oijajeitanacueriri.
⁴³Oijatanaqueri aisati tsinane irajasheta-tsiri: ocarataque 12 osarintsi intantana-cari irajashetanaque. Tecatsi materoneri iroavisacotajero. ⁴⁴Oquenapaaque itapiiqui antitaqueri iitsaare ocaratapaa-que, irosati opeantanajaro iraja. ⁴⁵Ari icanti Jesoshi:

—¿Janica antitaquenarori noitsaare?

Icantajeitanaque:

—Te nantitempiro piitsaare.

Impoiji icanti Petero:

—Oametanari, icarajeiti atiri oshequi ishoncageitaquempi, itsitacajeitaquempi. Aiquero picantanaitii: “¿Janica antitaque-narori noitsaare?”

⁴⁶Iro cantaincha yacanaqueri iriori:

—Ainiro antitaquenarori. Ocamanta-quena notasorenca: timatsi notasoncaco-ventajiri.

⁴⁷Iotaque tsinane tecatsi oncantea omanapitsateri antitaqueri iitsaare. Opioncanaque, ojatashitiri, otiyeroashita-cari, ocantiri:

—Narotaque antitaquempirori piitsaare, irootaque navisacotantajari nirajaveiteani.

Iquemajeitavaquero maaroni atiripee.

⁴⁸Aisati icantaquero Jesoshi:

—Noshaninca, pishiretaquena, irootaque pavisacotantajari. Cameetsa pijataje pivancoqui, pinquimoshiretanaje.

⁴⁹Ari pashini pocapaintsi ishaninca Jairo camantapairiri:

—Camanaque pishinto. Eiro picantiritsi meeca oametantatsiri irijate avancoqui.

⁵⁰Iquemavaqueri Jesoshi, icantiri:

—Eiro picantashiretitsi. Ariorica pishiretena, ari avisacotanaje pishinto.

⁵¹Ari yareejeitapaaca pancotsiqui.

Icanti Jesoshi:

—Eiro avinti piqueajeitapaitsi: irintiquea queapaintsine Petero, Joa, Santiaco, iri, aisati iniro, aitapaaaji.

⁵²Ainiro iraacojeitacaro oshanincani, yoashiretacojeitacaro. Icantajeitaqueri Jesoshi:

—Eiro piraacojeitarotsi: te oncamasa-noteji, irointi omai.

⁵³Ishirontimentajeitacari, iojeitaque ocamasanotaque. ⁵⁴Ari yajiricavacota-quer, antearojenca icanti:

—Evancaro, pintinaanaje.

⁵⁵Irosati otinaantanaja. Icanti:

—Pimpero oyeari.

⁵⁶Ari yojeitanaque cavaco maaroni oshaninca, iro cantaincha icanti Jesoshi:

—Eiro meeca picamanttsi.

**Itianquiri Jesoshi iroamere
inquenquetsatcayeteri atiri.**

(Mt. 9.35-38; 10.5-15; Mr. 6.7-13)

9 ¹Impoiji yapatojeitiri Jesoshi iroamere, imatacaajeitaqueri itasoncacaqueri itsipapee, icantajeitiri:

—Nocoaque pojocacoventajeiteri atiripee camaari, pimateri maaroni camaariepee, aisati poavisacojeiteri maaroni mantsiyetatsiri. ²Meeca pijajeite. Pinquenaquenayetanaque, pincamantajeiteri atiri: “Irotaintsi impincatsariventajeitimp Tasorentsi”.

Aisati poavisacyeteri mantsiyetatsiri.

³Noncantempi, tecatsiya paanaque: eiro paanaquerotsi piotiquiro, pitsarate, poyeari, piirequite, poicoro, tecatsi catsini. ⁴Jaocarica pareetapaaqueari, ari pisavicapaaque. ⁵Eirorica iquemisantajetavaquempitsi savicajeitatsiri, povaana-jea. Ariorica povaanajea pincantajeitan-queri: “Meeca te pinquemisantenaji, ari iroasanquetempi Tasorentsi”.

⁶Ari ijajeitanaque, iquenayetanaque nampitsipeequi. Icamantajeitaqueri atiri jaoca incantajeiteari iravisacotantajeari. Aisati yoavisacyetajiri mantsiyetatsiri.

Yora Eroreshi icoaque irineeri Jesoshi.
(Mt. 14.1-12; Mr. 6.14-29)

⁷Ari yora pincatsari Eroreshi iquemacotaqueri yantayetaqueri Jesoshi, itasoncantayetaque. Te irioteji paitarica inquenqueshireteri. Icantayeti: “Irio Jesoshitajantsiri Joani: itinaanaja”. ⁸Icantayeti itsipapee: “Yonijaantaja aisati Iriashi”. Pashini cantayetsati: “Itinaanaja camantantatsiniri”. ⁹Iro cantaincha icanti Eroreshi:

—Nopesacantaqueri Joani: camaque inaque. Iro cantaincha, ɿjanica yoca aquemacojeitaqueri itasoncacoventajeitaqueri atiripee? Nocoaque noneeri.

Itasonquiro Jesoshi tanta, yoshequiaquero.
(Mt. 14.13-23; Mr. 6.30-46; Joa 6.1-15)

¹⁰Ari ipiajeitanaja itiancajeitaqueri Jesoshi, icamantajeitapaqueri imayetaqueri. Impoiji itsataajeitanajiri yaajeitanajiri iroamere anta Vetsairaqui. ¹¹Iro cantaincha iojeitaqueri atiri ijatanaque, yoijajeitanaque oshequi. Ari yovetsajetavaci Jesoshi, yoamejeitavaqueri jaoca icanta Tasorentsi ipincatsariventajeitaqueri. Aisati yoavisacojeitaqueri mantsripee. ¹²Ari ishaavijiiteanaque, ipocashitiri iroamerepee, icantajeitiri:

—Pamenerote, caaraiteitaque aca. Pintiancajeiteri meeca nampitsipeequi: otiminta irimaajeitanteari aisati iroajeitanteari.

¹³Iro cantaincha icantavaqueri:
—Pimpajeiteri avinti iroajeiteari.
Icanti:
—Tecsti nompajeiteriri. Pamene, ocarataque tantajaniqui apapacoroni. Jeri apite shima. ɿPicoaqueempa nojajeite namananteneri iroajeiteari maaroni yocapee? Oshequi ini catsini.

¹⁴Aamaaca icarajeiti shirampari 5,000 yapatojeitaca. Icantiri Jesoshi:

—Poisavicajeiteri maaroni: pimoncarajeteri incarayetaque yora 50 irampato-

jeitaquea, aisati iriori yonta 50. Aisati inquempejeitaqueari maaroni.

¹⁵Ari imajeitaqueri, yapatojeitaqueri. Yoisavicajeitaqueri. ¹⁶Impoiji yajiricquerero Jesoshi tanta, jeri aisati shima. Yamenanaque inquitequi, icantiri iriri: “Ariove, Apa, pipaquetaro noyeari”. Impoiji ipaqueri iroamere, icantaqueri:
—Jeri, povaajeiteneri yora apatojetaincharira.

¹⁷Ari yoajeitaca maaroni, iquemajeitaca. Impoiji yaajeitajiro timaarantapaa jantsiri, yapatotajiro. Ocarataque cantiriqui ijaajiri 12.

Icantiri Petero Jesoshi: “Avirotaque Quirishito naamaajeitacari”.

(Mt. 16.13-23; Mr. 8.27-33)

¹⁸Pashini quitaiteri ijatanaque apaniro Jesoshi iquenquetsatacairy iriri. Iotanajiri yaanajiri iroameresanori. Impoiji isampitiri:

—ɿJanica ijitaquenari asháninca?
—Paita icantajeitiri?

¹⁹Yacanaqueri:
—Icantayeti aparopee: “Irioitatsi Joani vaotisatantaveitachaniri, itinaanaja”. Irio pashini icanti: “Irioitatsi Iriashi, yonijaantaja aisati”. Irio pashini icanti: “Irioitatsi camantantatsiniri, itinaanaja”.

²⁰Isampitiri:
—Avintiquea, ɿpaita picantajeitiri?
Yacanaqueri Petero:

—Avirotaque Quirishito naamaajeita- cari. Itiancaquempi Tasorentsi.

²¹Iro cantaincha icantasanojeitiri:
—Eiroyea picamantis. ²²Queario, nōponeaca inquitequi, natiritapaaque, iro cantaincha oshequi nonquematsicateari. Intseencajeitenasavicascantajeitatsiri, jivatacaajeitiriri saserotepee, oametantirori sanquenarentsi, maaroni. Incantajeite: “Caari ini Quirishito”. Iroyeetena, oncarataque quitaiteri mava, nontinaanaje.

Icanti Jesoshi: “*Pojatasanojeitanaquena: eiro piperaventaroysi.*”
(Mt. 16.22-28; Mr. 8.32-38)

²³Impoiji icantajeitiri Jesoshi:
—¿Picoajeitaquempa pojatasanojeita-
quena? Ari eiro picavintsaajtsi avisati, eiro
pantanontatsi avisati. Maaroni quitaiteri
pimpomerentsiventenaro nocoacaaqueMPIRI:
ariorica iroimenteetempiro, ariorica
inquisimenteetempiro. Iro cantaincha quiso
poyena, pojatasanojeitanaquena. ²⁴Ariorica
pantanontea pincavintsayea avisati meeca,
eiro piotasanotirtsii meeca Tasorentsi, aisati
eiro pisaviquimotirtsii coajica. Ariorica
pinintena narori, aisati pimpomerentsiventan-
yetenaro meeca nocoacaajeitimpipi, eiro
patsipetarotsi, irointi piveshireimenteari
meeca Tasorentsi, aisati pisaviquimoteri
coajica. ²⁵Ariorica pimpiotasanojeitero
vaararontsi catsini, iro cantaincha pintseen-
queri Tasorentsi; impoiji pijate Sharincave-
niqui. Tempa pantsipetashijeitearo maaroni
pashijeiveteari. ²⁶Eiro pipashiventacaanatsi;
aisati noneane, eiro pipashiventacarotsi.
Tempa naro poneachari inquitequi,
natiritapaaque. Coajica nojatanajye jenoqui.
Impoiji nompiapaaje aisati aca quipatsiqui,
nompincatsaritasanotapaaque, nontasoren-
tsitanotapaaque: nonquempeteari Apa
aisati maaroni inampirepee. Iro cantaincha
pinquenqueshirejeitea: ariorica pimpasshi-
ventacayena meeca, nompashiventaca-
quempi coajica avirori. ²⁷Iro cantaincha
queario oca noncamantempiri, eiro
namatavitimpitsi: eirotsitarica picamajeiti,
pineajeitavaquero jaoca icanta Tasorentsi
ipincatsariventanti.

**Ineaqueri iroamere
ipashinitanaque Jesoshi.**
(Mt. 17.1-8; Mr. 9.2-8)

²⁸Ari ocarataque quitaiteri 8, ijataque
Jesoshi toncaariqui, inquenquetsatacayeri
iriri. Yaanajiri aisati Petero, Santiago, jeri

Joa. ²⁹Ari iquenquetsatacayaqueri iriri,
imapocanaca ipashinivorotanaque, aisati
oshipaquirereasnotaque iitsaare,
atsioquintaqueri yora amenajeitaqueriri.

³⁰Imapocapaqueri aisati apite
shirampari, iquenquetsatacayaqueri
Jesoshi. Irio pocaintsiri Moishishini aisati
Iriashini; ³¹te inquempeteeji aquempe-
jeita arori, icameetsatasanotaque:
iquempejeitacari inquitesati. Ari
iquenquetsatavacaajeitaca mava:
iquenquetsatacotiro incame coajica
Jesoshi anta Jerosarequi. ³²Oshequi
ipochoquivetanaca Petero aisati itsipajei-
tari, iro cantaincha te irimayeji. Yamena-
shejeitaqueri Jesoshi, ishipaquireaque,
iquempetacaro quitaiteri. Aisati yamena-
shejeitaqueri yora itsipajeitari Jesoshi.
³³Irotaintsii impianaje yora apitetaintsiri,
icantiri Petero Jesoshi:

—Oametanari, aitaquempa nopoaque
narori aca, noneajeitaquempi. Nocoaque
novetsiquempiro mava pancotsijaniqui:
aparo pashi, aparo irashi Moishishi,
aparo irashi Iriashi.

Ari ineveetashitaca Petero, te inquen-
queshireteaji. ³⁴Ari omapocanaca
mencori, omaaroncajeitapaacari, irosati
itsaroajeitantanaca. ³⁵Impoiji iquemajei-
taqueri Tasorentsi, inaque mencoriqui:

—Iriotaque yoca notomi nonintasano-
tiri: pinquemisantajeitavaqueri.

³⁶Impoiji yamenajeivetanaca: tecatsi
irinee, apaniro irinti Jesoshi. Ari
imanajeitaqueri: peerani, tecatsi
incamantajeite. Impoiji, icamantaquee.

**Yoavisacotiri Jesoshi jananequi
yampitsiitacaari camaari.**
(Mt. 17.14-21; Mr. 9.14-29)

³⁷Oquitaitetamanaji, yoirincajeitama-
naja, itonquiojeitavacari oshequi atiri.

³⁸Icantavaqueri aparoni:

—Oametanari, pincavintsayeri notomi,
te intimeji pashini. ³⁹Yatajeaoncaqueri

camaari, icajemacaapinitiri. Yampitsiita-
caapinitari, ishimoretacaapinitari.
Yoashinoncaapinitaqueri: te irinijanta-
reempariji. ⁴⁰Nocantavetacari poamere-
pee iroavisacoteri, iro cantaincha te
irimateriji.

⁴¹Yacanaqueri Jesoshi:

—Eiro imatiritsi: tempa irinti pitseen-
caririnte, irootaque caari imatantari
camaari; te pinquenqueshirejeitempa.
¿Arimpa noshinetempi pintseencantapi-
nite? Jentsite pamaquenari.

⁴²Jeri inianquitacaavetaacari itomi,
imapocanaca camaari ipishoncaqueri
quipatsiqui, yampitsiitacaanajari aisati.
Ari itiancrajiri Jesoshi camaari, yoavisaco-
tajiri jananequi. Icantiri iriri:

—Jerica pitomi: avisacotaji inaji.

⁴³Yoajeitananaqueri cavaco maaroni
atiripee icantavacaajeitanaca:

—Tempa itasorentsitasanoti catsini
Tasorentsi.

Icamantavetari Jesoshi iroamere irayeeteri.
(Mt. 17.21-23; Mr. 9.29-32)

Ainiroquera icantavacaajeitaca, icantiri
Jesoshi iroamere:

⁴⁴—Pinquenqueshiretasanotero oca
noncamantempi. Eiro pipeacotarotsi.
Noponeaca inquitequi, natiritapaaque, iro
cataincha irayeetena.

⁴⁵Iro cantaincha te inquemajeitavaque-
roji icantavetacariri. Te irishineteriji
Tasorentsi inquemajeitavaquero.
Itsaroacaajeitacari irisampiterime:
“¿Paita picantaqueri?”

**Icantiri Jesoshi iroamere jaoca
incanteari impincatsaritantajeari.**
(Mt. 18.1-5; Mr. 9.33-37)

⁴⁶Impoiji icantavacaajeitanaca iroame-
repee Jesoshi, yaamaajeitaca:

—Aca acarajeitica: coajica, *čjanica*
anaacotantajantsine impincatsaritaje?
—Narompa pimpincatsajeite?

⁴⁷Iotashitacari Jesoshi iquenqueshire-
jeitiri. Icajemiri jananequi:

—Caatanaque aca nonampinaqui.

⁴⁸Impoiji icantajeitiri iroamerepee:
—Pameneri jananequica, quemisanta-
nari. Ariorica pincavintsayeri yoca,
pincavintsayena narori. Ariorica
pincavintsayena, aisati pincavintsayeri
tiancaquenari. Ariorica pincavintsayeri
itsipapee, ari pimpincatsaritanaque.

**Yoavisacotanti pashini
quemisantiriri Jesoshi.**

(Mr. 9.38-40)

⁴⁹Impoiji icantiri Joa:

—Oametanari, chapinqui noneaqueri
shirampari oavisacoyetiriri neiriri
camaari. Icamantavetana iquemisantimi,
irootaque imatantariri yoavisacotiri. Iro
cataincha te quiso iroajeitee, irootaque
notsaneacotantacariri iroavisacoteri
neiriri camaari.

⁵⁰Yacanaqueri Jesoshi:

—Eiro pitsaneapitsataritsi. Te inquisa-
jeiteeji, irootaque ayotantacari iquempe-
jeitaquee.

**Yora samariasati te
iraacameetsateriji Jesoshi.**

⁵¹Te osamaniteji meeca: irotaintsi
irijataje Jesoshi inquitequi. Ari iquenqueshiretaca irijate Jerosarequi. ⁵²Itiancaqueri iroamere:

—Pijivatanaque anta Samariaqui,
pamenapeero asavicantajeitapeempari.

⁵³Ari ijavetanaca, iro cantaincha
iojeitaque samariasati irijate Jesoshi
Jerosarequi, irootaque itsaneapitsatantava-
cariri irisavicanapeempameri inampiqui.
Ari ipianaja, icamantapajiri Jesoshi:

—Eiro ishineteetsi amaye inampiqui.

⁵⁴Ari iquemantacariri Santiago aisati
Joa, icantiri:

—Novincatsarite, picoaquempa
noncanteri Tasorentsi intaajeiteri

maaroni samariasati? Nonquempeteari Iriashini peerani: itaacantaqueri soraro quisajeitaqueriri.

⁵⁵Yamenashetaqueri Jesoshi, icantiri:

—Te oncameetsateji anquisherri. Te piojeiteji jaoca picantacari: te pincameetsashireteji. ⁵⁶Noponeaca narori inquitequi, natiritapaaque. Te iro nompocantea noayeteri atiri, irointi nopolcantaca noavisacojeiteri.

Impoiji yovaajeitanaja pashini nampitsiqui.

**Icantayetiri Jesoshi itsipapee atiri.
(Mt. 8.18-22)**

⁵⁷Ari iquenajeitanaque avotsiqui, itonquitovacari shirampari, icantavaqueri Jesoshi:

—Novincatsarite, nocoaque noijatasanotanaquempi, jaocarica pijateri.

⁵⁸Icantiri:

—Natiritapaaque noavisacotanteariri atiri. Pinquemisantavaquero oca noncamantempiri: yora otsitiniro timatsi imoro imaaipinitantari, yora tsimeripee timatsi itsityetari; iro cantaincha nainti, tecatsi nomaanterei.

⁵⁹Impoiji icantiri pashini:

—Pojatanaquena avinti.

Yacanaqueri iriori:

—Novincatsarite, nocoaveta, iro cantaincha incamavaquetsita apa. Ariorica nontijeri, impoiji noijatasanquempi.

⁶⁰Ipiatacari Jesoshi:

—Ainiro itseencaririnte, iriotaque tijerine ariorica incamaque. Aviroquea avinti, pincamantajeiteri atiri jaoca icanta Tasorentsi ipincatsariventajetirri.

⁶¹Icantiri pashini shirampari:

—Aitaque, novincatsarite, noijatasanotanaquempi: iro cantaincha nojivajeita-painterita novetsajeitapainteari noshanin-capee.

⁶²Iro cantaincha icantiri Jesoshi:

—Ariorica pitsapatiro piquiro quipatsi pimpanquitantearori pivanquire, te pamamenamenayetero paitapeerica, caari otipitantayeta piquiaqueri. Aisati oquempetaca: pincoaquerica impincatsariventempi Tasorentsi, pojatasanotena, eiro piquenqueshiretirotsi pantajero aisati pantapiniveitaniri.

**Itianquiri Jesoshi oshequi
quenquetstatacaajeitantsiri.**

10 ¹Impoiji itianajeitaqueri oshequi iroamere irijivajeitanacheri, icarajeiti 70. Icantavaqueri:

—Pijajeite, apitepee pincantayetanacea. Pijivajeite nampitsipeequi nocamantajeitaquempi, nimpoitanaje narori. ²Oquempetaca ocarataque oshequi oitsoqui panqurentsi, aparaitanaca: te iroshequiteji aviiteroneri. Pincanteri Avincatsarite intianajeitaneariri oshequi amitacotempineri pinquenquetstatacajeiteri atiri, irijajeitanteari iriori inquitequi. ³Pamene, oshequi ompomerentsitimojeitempi, oshequi irantanatempi tseencantatsiri: pinquempeteari ovisha, itsoncaqueri maniti. Meecaquea, pijajeite pinquenquetajeite. ⁴Eiro paanaquerotsi pitsarate, piirequite, pisapatote. Ariorica pintonquitovaqueari atiri nianqui, eiro piquenquetstataavaqueritsi, irointi pavisanacheri: apatiro povaanaquerero onta nocantauquempi. ⁵Jaocarica pisavicipapaqueri, pincanteri Tasorentsi iramitacoteri ashitarori ivanco inquemisantanteari. ⁶Ariorica inquemisantaque, iravisacotaje. Irompa eirorica inquemisanti, iro cantaincha eiro patsipetarotsi pinquenquetstacayeri Tasorentsi: tempa pimataqueneri oca nocantauquempi. ⁷Jaocarica anta pisavicipeerri, aitaque pisavicipaqueritsi. Eiro piquenquetayetitsi pancotsipeequi. Poyearo pitaricara impavacaqueri, aisati pirero,

maaroni. Ocameetsati impavaquempi paitapeerica coiteimotaquempi: tempa ocameetsati impinateri shirampari antaveetiniriri.⁸ Jaocarica pijateri, ariorica iraacameetsatavaquempi, poapaaquearo pitarica impavaquempi.⁹ Intimerica mantsiaripee, poavisacojeti-teri. Pincamantajeiteri maaroni: "Irotain-tsi impincatsariventajetempi Tasorentsi".¹⁰ Iro cantaincha terica iraacameetsatempisipapee asháninca, pincamantajeiteri:¹¹ "Pinquemajeitavaquena: icoaveta Tasorentsi impincatsariventempime, iro cantaincha te pincoyeji. Te paacameetsa-jeitavaquenaji, aisati oquempetaca, te paacameetsatavaqueriji Tasorentsi. Meeca pashinoncaitatiyempani".¹² Iroota-que nocoaqueri pincamanteriri. Pinequiero, peerani itseencajeitaqueri Tasorentsi soromasatini, irootaque ipoyereajeitancatariri. Iro cantaincha eiorica inquemisantajeitavaquempi asháninca meeca, iranaacoteri soromasatini, irashinoncaasanojeitanaquea catsini.

**Iquenquetsatacotaqueri Jesoshi
tseencajeitaqueriri.**

(Mt. 11.20-24)

¹³Aisati icanti Jesoshi:

—Irashinoncaasanojeitanaquea corasesati aisati vetsairasati: oshequi ineacojeivetaquena notasoncantapiniti, iro cantaincha te inquemisantajeitavaquenaji catsini. Irineajeitaquenaricame tirosatini aisati shirosatini, inquenqueshi-rejeitanajeame, irojocajeitajerome caari cameetsatatsi yantajeitiniri.¹⁴ Queariota-que iroasanquejeiteri Tasorentsi coajica tirosatini aisati shirosatini, iroashinon-aaajeiteri, iro cantaincha iroashinoncaa-sanojeiteri catsini corasesati aisati vetsairasati.¹⁵ Aisati icoajeiveta caperenaosati irijajeiteme anta inquie-qui, iro cantaincha ainti irijajeite Sharincaveniqui.¹⁶ Noamere, pinquema-

jeitena. Ariorica inquemisantajeitavaquempi atiripee, aisati narori inquemisantajeitena. Ariorica intseencajeitavaquempi, intseencajeitavaquena narori. Aisati oquempetaca, ariorica intseencajeitena, intseencajeiteri aisati yora tiancaquenari. Meeca quea, pijatasanojeite.

**Ijajeitaque iroamere Jesoshi,
iquenquetsatacotaqueri itsipapee, impoiji
ipiajeitapaaja.**

¹⁷Ari ipiajeitapaaja itiancane Jesoshi, iquimoshirejeitapaaque. Icamantajeita-paqueri:

—Novincatsarite, iotantacari camaari noquemisantaquempi, iquemisantaquena narori. Nomataqueriquea notiancajeitaqueri.

¹⁸Yacanaqueri:

—Queario yora Satanashi ipincatsari-ventavetacari iamaaririnte, iro cantain-cha noneajeitaquempi pimajeitaqueri pitiancaqueri camaari avirori: meeca niotaque eiro ipincatsaritasanotiritsi meeca Satanashi, tempa yanaacotaqueri Tasorentsi irinti.¹⁹ Meeca oshequi notasoncaventaquempi: oquempvetaca ariorica paatiquerri maranke, eiro yoamaiimpitsi; aisati yora quitoniro, tecatsi incantempi. Aisati inquisavetempi yora camaari, iro cantaincha tecatsi incantempi, tempa notasoncacoventempi.²⁰ Queario pitiancaqueri camaari, iro cantaincha eiro piveshireimentarotsi. Irointiquea pinquimoshireventasanojeita-naque pijajeite inquiteequi.

**Te iriojeiteroji irineane Tasorentsi, te
irineajeiteriji Jesoshi itasoncanti.**

(Mt. 11.25-27; 13.16-17)

²¹Impoiji oquimoshiretaacaasanotaqueri Ishire Tasorentsi, icantiri iriri:

—Oshequi, apa, picameetsati. Pipinca-tsariventajetirii maaroni inquitesati aisati

maaroni quipatsisati. Itimaveta atiri iovetachari, ioyevetaro paitapeerica, iro cantaincha pimanapitsataqueri pineane: te iriojeiteroji jaoca incanteari iravisacotantajeari. Irintiquea poametasanojeitaqueri caari iotasanolvetacha: itseencajievataceri ishaninca, iro cantaincha picoacaqueri iriote iriori.

²²Impoiniji icantajeitaqueri apatotimentajeitacariri:

—Iriotaque Apa matacaquenarori maaroni catsini. Apaniro iotasanoltona Apa, tecatsi pashini iotasanoltonane. Aisati noquempeta narori, apaniro niotasanoltiri, te intimeji pashini iotasanolterineri: irintiquea yora noamejeitiri, iojeitiri iriori.

²³Ari ipitsocashitanacari iriori iroamere, apaniro yoamejeitaqueri:

—Pineajeitaquena avinti nomataquero caari ineapinijeiti itsipapee atiri. Ocameetsati pinquimoshireventena, aisati inquimoshireventena pashini neenaneri. ²⁴Icoajeiveitani peerani yora quenquetsatacantaveitachaniri irineename nontasoncantayete, iro cantaincha te irineenaji notasoncantayeti. Aisati icoajeiveitani irineename yora pincatsariyeyeitachaniri. Aisati icoajeiveitani inquemajeitename, iro cantaincha, te. Avirojei avinti, pineajeitaquena, piquemajeitaquena.

Icoasanotaque Tasorentsi aninteri, aisati aninteri ashánincapee.
(Mt. 22.34-40; Mr. 12.28-34)

²⁵Pashini quitateri ijatashitaqueri iotasanoltiri isanquenaren Moishishi. Icoavetaca incomitacayearime Jesoshi; icantapaaqueri:

—Oametanari, ¿paita nanteri nosavicanteari inquitequi, noncantaitatiyempani?

²⁶Yacanaqueri:

—¿Paita ocantiri isanquenare Moishihi?

²⁷Icantiri:

—Ocanti isanquenare: “Ocameetsati anintasanoteri Tasorentsi: tempa iriotaque Avincatsarite. Cameetsa anintasanajeiteri catsini. Aisati oquemepetaca arosati nintajancha, anintasanajeiteri itsipapee ashánincapee, impoiji antime inquitequi”.

²⁸Icantiri:

—Queario picantaque: ariorica pimatero avinti, ari pincantaitatiyempani pintime inquitequi.

²⁹Iotaque iriori te irinintasanoteri maaroni ishaninca, iro cantaincha icoaveta irimanerome. Irootaque isampitantariri:

—¿Jaoca itimiri noshaninca noninteri?

Iquenquetsatacotiri samariasati, neshinoncatiriri jorio.

³⁰Yacanaqueri Jesoshi:

—Noshiacantempiro. Iquenanaque jorio avotsiqui. Iponeaca Jerosarequi, irijateme nampitsiqui pajitachari Jerico. Nianqui avotsiqui imapocaqueri coshitantatsiri, yaavajiri, tapi. Isapocajiri, yaitaqueri iitsaare, oshequi ipasanataqueri, tac, tac, tac. Impoiji yojoquitsempequitaqueri avotsiqui, irotaintsi incame. ³¹Ari impoiji iquenanaque avotsiqui saserote; jorio ini aisati. Ineavetapaacari ishaninca yoashinonqueetaqueri, iro cantaincha yanampitanaqueri, te irineshinoncateriji. ³²Aisati iquempetaca aparoni Irevita, iquenapaaque avotsiqui. Ineavetapaacari ishaninca, iro cantaincha aisati yanampitanaqueri, te irineshinoncateriji. ³³Impoiji, ari iquenapaaque iriori aparoni samariasati. Inashita irinti, te irishinancteariji jorio. Iro cantaincha ineantapaaacariri yora ashinoncaincarri, ineshinoncatapaaqueri. ³⁴Ijatashitaqueri, yaavintapaaqueri, aisati ipashicaqueri ora itoyetaqueri. Ainiro yamaqueri aisati samariasati imorane. Ari yaajiri ashinoncaincarri, yoanquetaqueri imoranequi, yaanajiri anta otiminta pancotsi. Anta cameetsa

ineshinoncatapaajiri aisati, yaavintapaaajiri.
³⁵Ari oquitaitetamaque icoaque samariasati
 irovaanajea. Icantiri ashitarori ivanco: "Jerica
 quirequi. Nocoaque pincavintsayeri yoca
 shirampari. Terica irimoncarateaji quirequi,
 ari nompajempi coajica pashini". ³⁶Ari itimi
 mava neaqueriri ashinoncaincari avotsiqui.
 Jaoca itimiri ishaninca nintasanotiriri?

³⁷Yacanaqueri:

—Tempa yora neshinoncatiriri.

Icantiri Jesoshi:

—Aisati pinquempeteri, pineshinonca-
 jeiteri pishaninca, maaroni.

Iquenquetsatacotiro Marita aisati Maria.

³⁸Impoiji iquenanaque avotsiqui Jesoshi,
 icarajeitiri iroamerepee. Yareejitapaaaca
 nampitsiqui. Oneavajiri tsinane pajitachari
 Marita, ocantavaqueri:

—Tsame, pijajeite novancoqui.

³⁹Otimi anta ovancoqui ireento, opajita
 Maria. Osaviquimotaqueri Avincatsarite
 iitiqui, oquemisantavaqueri icamantaque-
 rori. ⁴⁰Iroori Marita, oshintshintsiyeta-
 que, ovetsicayetiniri paitaricapee. Impoiji
 ojatashitaqueri, ocantaqueri:

—Novincatsarite, pamene apaniro
 novetsicayetimpiro poyeari. Orari eentio,
 te amitacotenaji. Pincantero amitacote-
 nata.

⁴¹Yacanaquiero:

—Oshequi piquenqueshiretaquero
 povetsicaquero ayeari, poameetsayeta-
 quero paitapeerica. Oshequi piquenque-
 shireyetaquero. Ocameetsayeveta, iro
 cantaincha timtsi aparoni cameetsasano-
 tatsiri: ⁴²irotaque ocoaqueri pireento,
 tecatsi cantimenterone.

**Yora Jesoshi yoamejeitiri iroamere
 iquenquetsatacaajeitiri Tasorentsi.**

(Mt. 6.9-15; 7.7-11)

11 ¹Pashini quitaiteri iquenquetsata-
 cairi Jesoshi iriri. Ari ivecaratan-
 tacarori, icantiri iroamere:

—Novincatsarite, yora Joani yoamejei-
 taqueri iroamereni iquenquetsatacaajeita-
 queri Tasorentsi. Nocoaque meeca
 pinquempetajeari avirori: poamejeitena
 nonquenquetsatacayeri narori.

²Icantakeri:

—Ariorica pinquenquetsatacayeri, jero
 oca, pinquempeterori:

Apa jenoquisati, oshequi picameetsati
 catsni,
 nocoajeitaque pimpincatsariventajei-
 tena, maaroni.

Ocameetsati nomajeitempiro maaroni
 picoacaajeitaquenari,
 nonquempeteari iriori inquitesati
 yantajeitimpido iriori maaroni
 picoacaajeitiriri.

³Pimpapinitenaro maaroni quitaiteri
 noyeari coiteimotanari.

⁴Eiro piquishimentanarotsi caari
 cameetsatatsi nantiri, irointi
 picavintsayena:
 tempa nocavintsaajeitiri noshaninca-
 pee.

Eiro pishinetirtsitsi camaari irantaca-
 yena caari cameetsatatsi.

**Icantiri Jesoshi: "Ariorica pincoacotasanoteri
 Tasorentsi coiteimotaquemperi,
 impasanotempiro".**

⁵Aisati icantakeri Jesoshi:

—Pamene, noshiacantempiro aisati.

Oquempetaca ariorica pijatashiteri
 pishaninca nianquuite pamanapeeri
 itantane. Pincantapaaqueri: ⁶"Nocoi
 pimpena mava pitantane noacaajeiteariri
 noshaninca. Iroquera yareetapaaca,
 tecatsi nompavaqueriri". ⁷Aamaaca ari
 incantavaquempime: "Eiro pashereanatsi,
 novochequineni. Maajeivetaquena:
 narori, notomipee, maaroni. Yavitaca oni
 ashitacorontsi. Tecatsi noncantea
 nontinaye aca nompantempirori
 notantane". ⁸Pishaninca inaveta, iro
 cantaincha eirorica icoitsi intinaye

impantempi itantane. Iro cantaincha te incoyeji aisati pampiitapiniteri, irootaque intinaantajeari, tinare, impaquempiro picoacotaqueriri. ⁹Aisati oquempetaca: ariorica pamanapiniteri Tasorentsi, impapinitempiro pincoacoteriri. Ariorica pincoapiniyetero paitarica, ari paajero. Ariorica pinquenquetsatacapiniteri Tasorentsi, ari inquemisantempi. ¹⁰Quentario, ipasanotee Tasorentsi maaroni coiteimojeitaqueeri: te irimashitsateji, intacojeitaquee. ¹¹Pamene, incoacotempirica pitomi tanta iroyeari, ɿarimpa pimpaqueri mapi? Incoacotempirica shima iroyeari, ɿarimpa pimpaqueri maranque? ¹²Ariorica incoacotempi iitsoqui teapa, ɿarimpa pimpaqueri quitoniro? Eiro pipiritsi, irointi pimpasanojeri yoyeyeyetari. ¹³Pinequero, te pincameetsajeiveteoji, iro cantaincha piojeiti picavintsaajeitiri pitomipee. Tempa aisati iotasanolri inti Apa jenoquiniri icavintsaajeitaquee arori. Ariorica pincoacojeiteri, intiancajeitempiro Ishire iriori amitacojeitempine.

Icantayeti atiripee: “Irio Jesoshi camaari”.
(Mt. 12.22-32; 12.43-45; Mr. 3.20-30)

¹⁴Pashini quitaiteri ineakeri Jesoshi shirampari imasontitacairi camaari. Itasoncacoventajiri Jesoshi, yoavisacotajiri, irosati ineaveetantanaja aisati. Yoajeitanaque cavaco maaroni neajeitaqueriri. ¹⁵Iro cantaincha icantayeti aparopee:

—Ishanincatacari Jesoshi Satanashi: yora ivincatsarite camaari, irootaque imatantarori yoavisacotiri neiriri camaari.

¹⁶Itimi pashini tseenquiriri Jesoshi, icantiri:

—Intsite, pintasoncante, niotantempiro queariorica piponeaca inquiteequi.

¹⁷Iro cantaincha iotaque iriori iquenqueshirejeitiri. Icantiri:

—Ariorica irimanatavacaajeitea atiri, tempa aitaque impoyereavacaajeitaquea. Aisati ariorica inquisavacaajeitea ashaninca, tempa ari irinijantareajeitajeri. ¹⁸Aisati oquempetaca, ariorica inquisajeiteime Satanashi iamaaririnte, ɿjaoca incanteari impincatsajeitanteari-rime? ¹⁹Aisati picantayeti: “Irio Satanashi amitacotiriri Jesoshi yoavisacotiri neiriri camaari”. Iriome amitacotenaneme noavisacotantariri, ɿjanica amitacotiriri pishanicajei yoavisacotantariri neiriri camaari? ɿIrisatimpa camaari pishaninca? ²⁰Iro cantaincha itasoncaca aquena Tasorentsi noavisacotantariri neayetiriri camaari, piojeitanteari meeca quiso yoajeitaquempi Tasorentsi, icoaque impincatsariventajeittempi.

Jero aisati ishiacantiniriri Jesoshi:

²¹—Pamene, oquempetaca oca: ontmerica shintsitsirsri shirampari ivesamento, ichacopite, maaroni, tempa irishentasantero ivanco. Eiro ishinetiritsi incoshiyeteri irovaararo. ²²Iro cantaincha impoquerica anaacotiriri ishinstasanoti, iranaacotapaqueri inti irantapaaqueri, impoiji iraapitsatapaqueri yoantamento. Impoiji incoshiteri irovaararo, impajeiteri ishanincaptee iriori. ²³Iquisajeitaquena maaroni caari oijajeitana, itseencajeitaquena maaroni caari amitacotana.

²⁴Ariorica iroavisacotajea neavetariri camaari, ocameetsati iraamaventajeri: yapiitajircari aisati. Ishiaquero oca: iquenayeti camaari caaraiteriqui, icoayevetaro pancotsi irisavicanteameri. Tecatsi irinee, irootaque iquenqueshiretantacari: “Nompianajeta anta pancotsi qui noponeacanta”. ²⁵Ariorica impiaje, irineapajero pancotsi, opishitaca. Vetsicayetaca irisavicantapeempari aisati.

²⁶Impoiji irijataque incajemerri itsipapee iyamaaririnte, incarate oshequi. Eiro icameetsatitsi camaari catsini, yora incajemerri. Pinequero, oca pancotsi

oshiaqueri neiriri camaari. Ariorica iraviscotaje, ocameetsati iraamaventajeari camaari: yapiitajiricari irineajeri aisati. Ariorica irampiitajeri irineajeri, catsiqueti iroasanoteri.

Icanti Jesoshi: “Iquimoshirejeitaque maaroni quemisantatsiri”.

²⁷Ari itimi oshequi quemajeitaqueriri Jesoshi. Antearojenca ocanti aparoni tsinane:

—Tempa ocameetsati oquimoshireven-tiri Jesoshi iriniro.

²⁸Iro cantaincha icanti:

—Je, queario, iro cantaincha iquimo-shiretasanajeitaque maaroni quemajeiti-rori irineane Tasorentsi, aisati maaroni quemisantajeitiriri Tasorentsi.

Icantiri Jesoshi atiri: “Ioti Tasorentsi pitseencajeitaquena”.

(Mt. 12.38-42; Mr. 8.12)

²⁹Ari yapatotimentajeitari Jesoshi itsipapee atiri aisati. Impoiji yoamejeita-jiri:

—Te pincameetsajeiteji. Picoajeiveta pineajeitename nontasoncantajeme aisati, iro cantaincha eiro pineajirotsi aisati. Pinquenqueshireteri Jonashini piotanteari: ³⁰peerani iniaqueri anteari omani. Ocarati mava imaacotaque tsompoina, impoiji isoquijanaji ivantequi, iotantacari ninivesati itiancaqueri Tasorentsi. Nonquempetajea coajica piojeitanteari itiancaquena Tasorentsi: tempa natiritapaaque nainti, noponeaca inquitequi. ³¹Aisati ora ivincatsaroten savasati, oponeaca arejiqui catsini, pashiniqui quipatsi. Oponeaca paricoti oquemisantantariri Saromoni, peerani. Ocoaque rirotacaasanotero. Pamene, nanaacotiri Saromoni nioti, iro cantaincha pitseencajeitaquena. Coajica, ariorica irampatojeiteri Tasorentsi maaroni camajeitatsiri, incantajeitempi: “Ainiro

pantane: pitseencaqueri notiancane. Irompa irointi oca ivincatsarote savasati te aneeroji antane: tempa oquemisantiri Saromoni”. ³²Aisati iquempeta yora ninivesatini: iquemisantirini Jonashini. Iquenqueshirejeitanaca, yoipacaajeitajiro caari cameetsatatsi yantajeitiri. Nanaacotiri nainti Jonashini, iro cantaincha te pinquemisantajeitenaji. Coajica incantempi Tasorentsi: “Iquemisantirini ninivesatini Jonashini: avintiquea, ɬpaita caari piquemisantantari notiancane?”

Icanti Jesoshi: “Ariorica piquemisanti pishiaquero tsiomentotsi”.

(Mt. 5.15; 6.22-23)

³³Aisati icantajeitiri Jesoshi:

—Ariorica pitsiotiro tsiomentotsi, ɬarimpa pimanaquero jaocarica? ɬPitetirompa cantiriqui? Tempa poapini-tiro onantariqui, pitsjojeitantsi. ³⁴Oca aqui oquempetaro tsiomentotsi. Ocameetsatirica aqui, amenajeitanaque paitapeerica. Iro cantaincha terica oncameetsateji aqui, tecatsi amenanteari, oquempetaca aqueni tsiteniriqui, te ayojeiteji jaocarica aqueniri. ^{35,36}Ocameetsati piotacotea avisati piquemisantasano-taquerica. Ariorica piquemisantasano-ti, ari piotasanotanaque, eiro pitseenquima-tantajitsi. Impoiji pinquempetearo tsiomentotsi tsiotasanotachari.

Irootaque icantajeitaqueriri Jesoshi.

Yora Jesoshi icantaqueri variseo aisati oametantirori Sanquenarentsi: “Ainiro pantanejei, iroasanquejeitempi Tasorentsi”.

(Mt. 23.1-36; Mr. 12.38-40; Ir. 20.45-47)

³⁷Impoiji icantaqueri variseo Jesoshi:

—Tsame ajate novancoqui, noacayempi. Ari yojatanaqueri, yoacaapaacari. ³⁸Te inquivacoteoji Jesoshi, irootaque yoantanacariri cavaco variseo. ³⁹Icantiri Avincatsarite:

—Queario, pamejeitacaro piquivapini-tiro pajo aisati piveratote: iro cantaincha apatiro otapiiqui. Te pojoqueroji caari cameetsayetatsi timatsiri osantequi. Piquempetacaro avirori: piquenqueshire-tapinitiro picoshiyeti aisati pantapiniye-tiro caari cameetsatatsi.⁴⁰ Te pinquen-queshireniroteaji. ¿Apatirotimpa yovetsi-quiro Tasorentsi paco? Tempa aisati yovetsiquiro piquenqueshireantari.⁴¹ Pipashiyevetari ashinoncaincari coiteimovetariri, iro cantaincha te pincavintsaasanoteriji. Ariorica pincavin-tsaasanoteri itsipapee pishaninca, ari pincameetsataque.⁴² Pashinoncaajeitea avirojei. Queario pipaaranapinivetari Tasorentsi piirequite capichaji, iro cantaincha tequera omoncarateaji. Timatsi pineacameetsatiri avirori aisati caari pineacameetsati. Iro cantaincha te omoncaratearoji icoacaauquempi Tasorentsi. Te pininteriji Tasorentsi aisati te pininteriji pishanincapee. Ocameetsati pimperi Tasorentsi quirequi, iro cantaincha eiro pipeacotirotsi pininteri aisati panteneri icoacaauquempi.⁴³ Pashinon-caajeitea avirojei. Ariorica irampatojeitea ashaninca inquemisantanteariri Tasorentsi, picoanirojeiti impincatsajeitempi avinti. Ariorica pinquenayetanaque nampitsiqui, picoaque cameetsa iraacameetsajeitempi atiripee.⁴⁴ Queario, iroashinoncajeitempi Tasorentsi. Piquempetacari camatsiri tijachari quipatsiqui, imanaca; iro cantaincha yavisajeitanaque atiripee, te iriojeiteji irotaintsi iratiquerime camayetatsiri patsaatsiri. Aisati avirori, pimanayeve-taro caari cameetsayetatsi pantayetiri.

Irootaque icantaqueriri Jesoshi variseo-pee.⁴⁵ Ari icantiri oamentantirori isanquenarenai Moishishini:

—Oametantatsiri, aisati narorijkei piquisaquena.

⁴⁶Icantiri Jesoshi:

—Je, aisati avirori iroashinoncaajei-tempi Tasorentsi. Oshequi piperanayeta-cari ashanincapee, iro cantaincha te pintacoteariji.⁴⁷ Queario, pashinoncaajei-tea. Pimoncarajeitacari pishanincani oajeitiriniri camantantatsiniri.⁴⁸ Avirojei oayeri. Pintimitaquearicame peerani avirori, poajeitaquerime aisati yora camantantatsiniri.⁴⁹ Iotacojeitaquempi Tasorentsi, icanti: “Nontianqueneri atiri quenquetsatacayerineri, iro cantaincha iroayetavaqueri aparopee, irio itsipapee inquisavaqueri, intianhaarantajeri”.⁵⁰ Ainiro pantajeitiri maaroni: pashi poajeitiro poanti. Yora peeraniniri poajeiterime, irosati picanta meeca poajeitiri quemisantajeitiriri Tasorentsi.⁵¹ Pishanincajeitacari oaqueriniri Averini. Aisati pishanincajeitacari oaqueriniri yora Sacariashini: yoyeetaqueri iriori anta ivancoqui Tasorentsi. Ainiro pantajeitiri maaroni, irootaque iroashinoncaimentempri Tasorentsi.⁵² Poametantavetaro isanquenarenai Moishishini, iro cantaincha pashinonca-jeitea: tempa pamatavijeitiri ashanincapee. Te pincoajeiteji pioteri Tasorentsi, aisati te pincoacaajeiteriji iriojeitajeri iriori ashanincapee.

⁵³Irootaque icantajeitaqueriri maaroni, impoji isoquijanaji. Iquisajeitaqueri yora variseopee aisati yora oametantirori sanquenarentsi, aisati iquenquejaajeita-queri. Aisati isampiyevetacari paitapee-rica,⁵⁴ icoajeiveta incomitacayearime. Icoaveta incomitacayearime iraacantan-teitimeri.

Yora Jesoshi yoamejeitiri iroamerepee.
(Mt. 10.28-33; 12.32; 10.19-20)

12 ¹Ari yapatotimentajeitari Jesoshi oshequi catsini atiri, itsitacaavaca-jeitanaca. Irosati icantantari iroamerepee:

—Paamayeariyea variseopee, yamatavi-jeitimpicari. Oshequi yamatavitanti.

²Ijijeivetaca tecatsi iotatsine yamatavijei-vetacari, iro cantaincha coajica iringatoc-jeitanaqueri maaroni atiri yashi yoiro yamatavitanti. ³Aisati avirripee, pitarica pimanavetacari picantiri meeca, inquemajeitero coajica. Pitarica pincanteri apaniro anta pivancoqui, irovaayetajero anta yapatojeitanta atiripee. ⁴Meeca, noshaninca, noncamantempi: eiro pitsaroacaaritsi yora atiri coatsiri iroyempi. Ariorica iroyempi, iro cantaincha irointi iroyeete pivatsa. Tecatsi incantero pishire. ⁵Irinti Tasorentsí pimpcatsate: incoaquerica, iroyempi. Iro cantaincha aisati icoaquerica, irimatero intianquempi Sharincaveniqui. Iroquea pintsoaroacayeari irointi pijate Sharincaveniqui. ⁶¿Ivinaronimpa tsimeripee? Te impinatasanoteaji, iro cantaincha ioejtiri Tasorentsí: te impeacojeiteariji. ⁷Aisati oquempetaca, iotasanojeitaquempi: ioti jaoca ocaratiri piishipee. Iquempoyeajeitaqueri tsimeripee, iro cantaincha avirojei iquempoyeasanojeitaquempi. Eiro picantashirettsi, irointi piveshireimenteari Tasorentsí. ⁸Aisati piojeitavaquero oca noncantempiri: eiro pipashiventacaannatsi, ariorica pincmantajeiteri itsipapee atiri piquemisantaquena, aitaque noncamanteri Apa anta inquitequi pishanincataquena. Tempa nopoloneaca inquitequi, natiritapaaque. ⁹Iro cantaincha ariorica pimpashiventacayena aca quipatsiqui, aisati avirori nompashiventacayempi anta inquitequi. ¹⁰Ariorica incantimatena atiri, ariorica incavintsayeri Tasorentsí, eiro iquenqueshiretajirotsi yantajeitiri. Iro cantaincha ariorica incantimajeitero Ishire Tasorentsí, eiro icavintsairitsi Tasorentsí catsini.

¹¹Ariorica irayeetempi anta yapatotapini-jeitanta, aisati anta joeshiqui, aisati anta pincatsariqui, eiro pitsaroacaajeitaritsi. Eiro piquenqueshirettsi: “¿Paita noncan-

teriri?” ¹²Ariorica irayeetempi, oametempi Ishire Tasorentsí pitarica pincanteriri.

**Icantajeitiri Jesoshi:
“Pinevetarocari vaararontsí”.**

¹³Impoiji icantiri aparoni shirampari: —Oametanari, ipanaquerini apani iyeca maaroni timimojeiveitariniri. Tecatsi impena nainti. Pincanteri iye impaarantajena narori irovaararo.

¹⁴Yacanaqueri: —Eiro nocantiritsi. ¿Narompa joeshi, noncantanteariri?

¹⁵Icantajeitiri maaroni apatotimentajeitariri: —Queariompia: pinevetarocari yashiye-tari itsipapee, eiro oveshireacaasanotimpitsi.

¹⁶Impoiji ishiacaventiniri oca: —Optimi iipatsite ashitaarantincari. Oshequi onintiro panquiresi quipatsi, cameetsa oshiocayetanaque ivanquirepee. ¹⁷Yaayetajiro oitsoquipee, inquempo-yeantearori ovancopeequi iroori, iro cantaincha opiojeitaca pancotsiqui. Te onajeitearori maaroni. Iquenqueshiretaca:

¹⁸“¿Jaocasa noncanterori? Tecatsi noantearori maaroni. Jaa, niotaque meeca: noshoveajero pancotsijaniqui, nantacantajero antearo pancotsi noantea-rori maaroni novanquirepee, aisati maaroni novaararo. ¹⁹Oshequitaque meeca maaroni, tecatsi coiteimotajena-neri. Peerani catsini, eirota otsonquitatsi; meeca nomaoree oshequi osarintsi. Cameetsa noapinita, noshinquitapinita, noveshireimentearo maaroni timimota-nari”. ²⁰Iro cantaincha icantiri Tasorentsí: “Te piotacoteaji. Meeca tsiteniri noyempi; impoiji, ¿janica ashitajearoneri maaroni timimojeivetimpiri?” ²¹Pinequero, te iriofeji maaroni coatsiri iroshequiyero irovaararo. Oncameetsateme irovetsique-rome irisavicanterime inquitequi.

**Icantiri Jesoshi: “Pincanteri Tasorentsi
inquempoyeaventempi”.**
(Mt. 6.25-34)

²²Aisati icantiri Jesoshi iroamere:
—Eiro piquenqueshiretatsi jaoca
payerori poyeari aisati pinquitsaateari.
²³Tempa Tasorentsi oaneaqueempiri.
¿Opomerentsitimotarimpa meeca
impaquempi poyeari aisati piitsaare?
²⁴Pinquenqueshireteri jaoca icantari
tsimerepee: te impanquitanonteaji aisati
te inquempoyeanonteaji iroyeari
pancotsiqui, iro cantaincha ipapinitiri
Tasorentsi yoari. Pamene, iquempoyea-
vantajeitiri Tasorentsi tsimeripee iriori,
tempa aisati avirori iquempoyeaventasa-
nojeitimi. ²⁵¿Paita patsipetashitantarori
picantashireti? ¿Pijitimpia ariorica
pincantashirete aiquero pijatatiye
panteeritasanotanaque? ²⁶Pineaquero,
patsipetashitacaro picantashireti. Tecatsi
paye. ²⁷Pinquenqueshiretero jaoca
ocantari oteaquipee tojari. Te ontsamee-
tanonteaji, aisati te ontijanonteaji
oitsaare, iro cantaincha ocameetsatasano-
taque. Peerani oshequi yoaneencaani
Saromoni, iro cantaincha te inquempetea-
roji oteaquipee: ocameetsatasanotaque
irointi. ²⁸Pineaquero, yoaneencaquero
Tasorentsi oteaquipee. Otimaveta, impoiji
oshintsiti oshimpetanaji. Peerani pintime
avirojei: tempa pijiti iquenqueshireta-
quempi avirori. ¿Paitasa pitseencantaca-
riri? ²⁹Eiro piquenqueshiretirotsi
paitarica poyeari, aisati paitarica pireri:
inquemacayempi Tasorentsi. ³⁰Tempa
icoajeitaque atiri iroapinjeitea. Iro
cantaincha iotaque Tasorentsi maaroni
coiteimotaquempi. ³¹Ariorica pimpinca-
tsatasanoteri, impaquempi maaroni
coiteimotaquempi. ³²Noamere, oshequi
inintaquempi Apa Tasorentsi: icoasanota-
que impincatsariventajeitemi, incavin-
tsaasanojeitemi. ³³Pimpimantero

pashiyetari, pimipayeteri ashinoncaincari
ovinaro. Impoiji impinatempi Tasorentsi
anta inquitequi. Ontimasanote pivaararo
anta: eiro opatsaajitsi, eiro opitsitsi, eiro
icoshiyeetajimpitsi, eiro yapeajirotsi
cajiro. ³⁴Ariorica otimi pivaararo aca
quipatsiqui, oshequi piquenqueshireta-
quero timayetatsiri quipatsiqui. Ariorica
otimi pivaararo inquitequi, ari
piquenqueshiretapinitiri Tasorentsi.

**Icantiri Jesoshi: “Pivetsicajeitea,
te pioteji jaoca oncarate
impocashijeitemi Tasorentsi”.**
(Mt. 24.45-51; 25.1-13; Mr. 13.33-35)

^{35,36}Jeroca icantaqueriri Jesoshi
iroamere:

—Paamaajeiteari pivincatsarite, pivetsica-
sanojeitea. Pinquempeteari yora inampire
ashitarori ivanco. Ijataque yora ashitarori
irineeri ishaninca irayero ijina. Yaamaajei-
tari inampire anta ivanco. Ariorica
irareetapaaje incoapaaje irashitareavaje-
neri, aisati incoapaaje irineapaajero
ovetsicayetaca ivanco. Ariorica ontsitenita-
naje, icoaque ontsiotea ivanco. Aisati
icoaque intinaye inampirepee, inquitsaajei-
tea. ³⁷Ariorica irineapaajeri yovetsicajeitaca,
inquimoshirejeitaque maaroni. Yora
ashitarori ivanco irisavicacaajeiteri maaroni
inampirepee, iroacajeiteari. ³⁸Iro
cantaincha te iriojeiteji jaocarica oncarate
impocantajeari: ariorica iroaquera imaajeiti,
riorica nianquiite. Iro cantaincha ariorica
irineapaqueri inampire yovetsicajeitaca, ari
inquimoshirejeitanaque, maaroni. ³⁹Piojeita-
vaquero oca noncamantempi: arioricame
pioteme impoque tsiteniriqui coshitantatsiri,
tempa pisaaquiteme poimpantavajearimeri,
eiro pishinetirime incoshitempime. Iro
cantaincha te pioteji jaocarica oncarate
impocanteari. ⁴⁰Aisati noquempevetari
coshinti, te noncamantempiji jaocarica
oncarate nompocantajeari. Peerani
noponeaca inquitequi, natiritapaaque.

Coajica nompiaje. Pinquenqueshirejeitena, paamaajeitajena: nomapocapaimpicari.

⁴¹Ari isampitiri Petero:

—Novincatsarite, ɿapanirompa poamejeitenanaroripee? Irompa tericampa, ɿpocoaquempa iriojeitanaque maaroni atir?

⁴²Yacanaqueri:

—Noquenquetsatacaaajeitiri maaroni quearioventirori nocoacaajeitiriri. Iquempetaca ivatorote atiripee, icoacaqueri aparoni iratirite iroacaapiniteari itsipapee. Impoiji ijataque ivatorote jaocarica. ⁴³Ariorica iroacaapiniteari cameetsa, ariorica impocaje ivatorote, iroveshireimentapaajeari. ⁴⁴Incantapajeri: "Cameetsa piquemisantaquena. Meeca aviro amenajeitenarone maaroni timimojeitanari". ⁴⁵Iro cantaincha, incanterica yora iratirite: "Eirotsita ipoqui novatorote". Icoacaavetari ivatorote incavintsayerime itsipapee, iro cantaincha imapocaqueri iquisajeitaqueri, ipasajeitaqueri: shirampari, tsinane, maaroni. Oshequi iperataca, oshequi ishinkuitaca. ⁴⁶Ari pashini quitaiteri impocaje ivatorote, irimapocapajeri. Iroasanquetapaakeri, inquempetacaanteri itsipapee caari quemisantiri. ⁴⁷Pinequero, iovetacaro icoacaavetacariri ivatorote, iro cantaincha te incoyeji irimatero. Irootaque impasatacantanteiriri, aiquero catsini impasatacantasano-teri. ⁴⁸Iro cantaincha eiro yoasanquetasa-notirts ci caari iotatsi. Eiro icoacotasanolritsi oshequi yora caari iotatsi. Irintuea iotasanolritsi, incoacotasanolteri irinti.

Icantiri Jesoshi iroamere: "Coajica oshequi inquisavacaimentajeitena atiripee".

(Mt. 10.34-36)

⁴⁹Aisati icanti Jesoshi:

—Nopocaque quipatsiquica inquisavacimentantenari atiripee, nocoasanotaque nomamajeitero maaroni nopolashitiri.

⁵⁰Oshequi noquenqueshireaca: irotaintsi

oshequi nonquematsicatearo. ⁵¹ɿPijitashijeive-tampa nopolashitiri atiri noimajerentajeiti-teri, cameetsa iraacameetsatavancanteari? Teve, irointi inquisavacaimentajeitena. ⁵²Ariorica incarate apapacoroni savicatsineri pancotsiqui, inquisavacaajeitea. Incarate mava quisherineri yora apite ishaninca. ⁵³Ariorica yora ashitariri inquieri itomi, aisati itomi iquieri iriri. Ariorica onquiero airo evatayero, onquiero iroori airo.

Pinquenqueshiretea piotanteari iroametempiro Tasorentsi.

(Mt. 16.1-4; Mr. 8.11-13)

⁵⁴Impoiji icantajeitiri apatotimentajeitariri:

—Ariorica pinequero antearo tampea amaquero mencori otsitemishaanaque, picantajeiti: "Coraqueve incani". Tempa piojeitaque ompoquerica incani. ⁵⁵Ariorica oquitamaroitetanaji, picantajeiti: "Eiro oparii incani, ari osarianaje". Tempa aisati piojeiti, ⁵⁶irointi pimanaquero piojeitiri. Piojeitaque ompariaquerica incani. Iro cantaincha te pincoajeiteji piojeite oshequi ompomerentsiti-mojeitempi coajica. ⁵⁷ɿPaita caari picoanta piojeitero queariosanotatsiri? ⁵⁸Ariorica inquishimentempiri pishaninca quirequi pireviteriri, incoaquerica iraanajempi joeshiqui. Ari tequeratsitarica irareetacayempi, pincantanaqueri: "Eiro piquisanatsi, coajica nompinatajempi". Yoiminqueimpicari caravosoqui. ⁵⁹Ariorica iroiminqueaqueMPI, incoacotasanoltempi maaroni quirequi pireviteriri. Eirorica pipiritsi, eiro yoimisoquija-jimpitsi.

Icantiri Jesoshi atiri:

"Pinquenqueshireajeitea, pojocajero caari cameetsatatsi pantapinjeitiri".

13 ¹Impoiji ipoqui pashini atiri, icamantapaaqueri Jesoshi:

—Ijajeivetaca carireasatipee anta Jerosarequi iroajeitenerime Tasorentsi ivira. Jeriniro yora Piratoniro yoacantanirojeitaqueri carireasatipee anta ivancoqui Tasoren-

tsi. Oconoajatacaro irirajani ashanincani irirajani ivira yoajeitiriri Tasorentsi.

²Yacanaqueri Jesoshi:

—¿Pijitirimpa yora carireasati antasano-jeitironiri caari cameetsatatsi ishinetantariri Tasorentsi yoacantaqueri Pirato?

³Noncamantempi: te iro incamantea. Iro cantaincha queariompiyea: eiorica piquenqueshiretajatsi, aisati eiorica pojocajirotsi caari cameetsatatsi pantapin-tiri, pinquempejeiteari yora yoyeetiri. Yoajeitimpicari, maaroni. ⁴Aisati peerani otireanaji antearo mapipanco anta Shiroequi, otsinacapaqueri 18 shirampari, icamajetaque. ¿Paita icamajetantacari? ⁵Iriompa antasanotirori caari cameetsatatsi icamantacari? Te. Iquempejeitacari maaroni ishiramparirinte. ⁵Pinquenqueshireajeitea avirori, pojocajero caari cameetsatatsi pantapinijeitiri. Eiorica piquenqueshirejei-tatsi, aisati pincamajeite avirorjei.

⁶Impoiji ishiacaventajeitini oca:

—Ipanquitaquero shirampari iyera anta irovamashitequi. Ocarataque peerani oshioaque, impoiji yamenapinivtar oitsoqui, irayerome: iro cantaincha te oitsoquiteji. ⁷Impoiji aisati icantiri yora tsameetiniriri iipatsite: “Pamene, ocarataque mava osarintsi nopolcapiniveta nayerome oitsoquipee. Te ontameji catsini. Atsipetash-taca otimi. Pimpesajero nompanquitantearor paitapeerica cameetsatatsiri”. ⁸Yacanaqueri tsameetiniriri ivatorote: “Ari onavaquetsita meeca osarintsiqica. Nonquiyetero quipatsi ometoitetanteari, aisati noapinitenero itia pivira, cameetsa ontimanteari oitsoqui.

⁹Impoiji ariorica ontimanaque oitsoqui pashini osarintsi, tempa cameetsa, eiro apeshirotsi. Iro cantaincha eiorica otimitsi oitsoqui, nompesa-jero”.

**Yoavisacotiro saavarroqui Jesoshi
yatajeonquiri camaari.**

¹⁰Pashiniqui saavarro yoametanti Jesoshi anta yapatapinijeitanta joriopee. ¹¹Otimi-

anta pancotsiqui aparoni tsinane yatajeon-quiri peerani camaari. Ocarataque meeca 18 osarintsi omitaque, irosati ocanta omitaque: tecatsi oncatajea oncatiaje.

¹²Ineantacarori Jesoshi, icajemaquero:

—Caatanaque, meeca noavisacota-jempi.

¹³Ipamitaquero, irosati avisacotantanaja. Cameetsatanaji, ocatianaja. Ocantanaque:

—Yoavisacotajana Tasorentsi, tempa icameetsatsi.

¹⁴Yora jivatacantantatsiri anta ivancoqui Tasorentsi iquisaqueri Jesoshi. Icantajeitiri apatojeitainchari:

—Ocameetsati antaveejeite 6 quitaiteri, iro cantaincha ariorica omoncaratapaaquea quitaiteri 7 ocameetsatsi amaoreasanojeitana-que. Eiro antaveetitsi catsini. Ariorica picoaque pavisacojeitaje, pimpoque pashiniqui quitaiteri, eiroquea pipoquitsi saavarroqui.

¹⁵Ipiatanacari Avincatsarite, icantana-queri:

—Osheequi pamatavinirotanti. Pantavee-jeiti avirori saavarroqui. Pamene, ariorica airi pivacate imire saavarroqui, tempa pitsatacoreiri paantanacariri anta otiminta nija. Aisati piquempetri pimorane, maaroni. Queario, picavintsaajeitiri pivirapee saavarro-qui. ¹⁶Iro cantaincha caari oni pivira oca tsinane, irointi pishaninca. Peerani omantsiataque: tempa ocameetsatsaue ancavintsayero saavarroqui.

¹⁷Iquemantarori oca, ipashiventajeita-naca maaroni quisajeitaqueriri Jesoshi. Irinti itsipapee atiri iveshireimentajeita-cari Jesoshi, icantajeiti:

—Ocameetsajeitaque yantayetiri Jesoshi.

**Icamantiri Jesoshi iroamere paita
oshiacaventiri moshitasa aisati
tapiacairori tanta.**

(Mt. 13.31-34; Mr. 4.30-32)

¹⁸Impoiji icanti Jesoshi:

—¿Piojeitimpa jaoca icanta Tasorentsi ipincatsariventanti? ¿Jaoca noncanterori

noshiacaaventantempiroi? ¹⁹Oshiaquero oitsoqui moshitasa ipanquitiri shirampari iroanequi. Oshiocanaque, oquimotanaque, oshiatetacaro inchato. Ipocapiniti tsimeri, yaatapinitiro ojempequi.

²⁰Yapiitajiro, icanti:

—¿Jaoca noncanterori noshiacaaventantempiroi? ²¹Oquempetacaro tsinane, airo tapiacairori tanta capichaji. Oconoiro oshequi tircopane otapiantanacari. Otapiaquero maaroni, ometsotantacari. Aisati iquempetaca ashinanca. Intimerica aparoni antirori caari cameetsatatsi, irantacaajeiteri ishaninca, maaroni.

Icantiri Jesoshi ishaninca:
“Pimpomerentsiventearo pareetanteari inquitequi”.

(Mt. 7.13-14, 21-23)

²²Ari iquenaquenayeti Jesoshi nampitsipeequi, yoametantayeti. Icoaque irijate Jerosarequi. ²³Isampiyetiri:

—¿Jaoca incarajeiteri oavisacojeitajchan? ¿Arimpa incarate aparopee?

Yacanaqueri:

²⁴—Noshiacantempiro. Oquempetaca orijaniQUI omorojaniQUI anqueanteari inquitequi. Intime oshequi coavetachane irijateme inquitequi, iro cantaincha eiro imatirotsi irareetearo. Pimpomerentsiventearo pareetanteari inquitequi. ²⁵Aisati oquempetacaro yantiri ashitarori ivanco. Itimi tsompoina iriori, yashitacatac, iyavitiro ashitacorontsi. Impoiji pimpoca-jeivetea avirorije, pincantavetapaa-queari: “Novincatsarite, pashitareenaro, nonqueanaque”. Iro cantaincha incanta-vaquempi: “Te niojeitempiji jaocarica piponeari”. ²⁶Impoiji pincantajeiveteari: “Peerani aitaque pitsipajeitaquena nonampiqui avajeitaca, aisati poamejeitaquena”. ²⁷Ari incantempi: “Te niotempiji. Pijataje, pimpianaje. Oshequi pantayetiro caari cameetsatatsi. Te pincameetsateji”.

²⁸Impoiji oshequi poashiretasanotanaquea catsini, piraasanotanaquea aisati. Pineaqueri Avarama, Isaca, Jacovo, maaroni yora quenquetsatacantatsiniri itimi jenoqui, iro cantaincha avirojei, eiro pimajeitirotsi pijate: iroimpiavajempi Tasorentsi. ²⁹Imponeajeitaquea quemisantsirsintatiquerero, acaqueroca, catonco, quirinca, maaroni quipatsipeequi. Irisavicajeitapaaque anta ipincatsarintta Tasorentsi. ³⁰Irareetasanotaquea yora pitseencajeitaqueri. Eiro yareetatsi intiri pipincatsajeitiri.

Yora Eroreshi iramataviterime Jesoshi.

(Mt. 23.37-39)

³¹Irosati ipocantaca aparopee variseo. Icantapaaqueri Jesoshi:

—Pijate pashiniqui quipatsi. Icoaque Eroreshi iroacantempi.

³²Yacanaqueri:

—Pincamantanirotaiteri yora amataviantatsiri: “Icanti Jesoshi: ‘Eiro noshiatsi. Noncanteani noavisacojeiteri neiriri camaari aisati mantsiaripee: meeca, osaitequera, aisati otsipa quitaiteri. Impoiji nonmoncarataquero maaroni’”. Irootaque pincanteriri. ³³Aitaque nonque-naquenayete meeca, osaitequera, aisati otsipaniQUI quitaiteri. Aisati ocameetsati noncame Jerosarequi: tempa anta icamapiniti quenquetsatapinitirori irineane Tasorentsi.

Icanti Jesoshi:

“Iroashinoncaajeitea jerosaresati”.

³⁴Aisati icantiri Jesoshi:

—Yora jerosaresati oshequi yoayetaqueri quenquetsatirori irineane Tasorentsi. Ipichaapinitaqueri itiancane Tasorentsi. Oquempetaca teapa osaramonquitiri orijanipee, oshequi nocoveta nampatojeiterime jerosaresati: nonquemisantacayerime, iro cantaincha te incoajeiteji.

³⁵Pamene, tecatsi amitacoterineri meeca,

yojocajeitiri Tasorentsi, icantiri: “Incanteata”. Eiro inepinitajanatsi meeca. Jaocarica intimeri pincatsateneri, ari irineajena aisati.

**Yoavisacotiri saavarroqui
Jesoshi eereyetsatsiri.**

14 ¹PashiniQUI saavaro itimi Jesoshi anta ivancoqui jivatacaajeitiriri variseo. Yamenasanojeitiri Jesoshi, icoaque irantero paitarica inquishimenteriariri. ²Itimi anta aparoni mantsiari, yeereyetsanaque, yeloncayetanaque maaroni. ³Isampitiri Jesoshi variseopee: —¿Ocameetsatimpa avavisacoteri mantsiaripee quitaiterica amaoreajeitanci?

⁴Iro cantaincha imajerejeitanaque, te irancaniroteji. Ari yacatsavacotaqueri Jesoshi mantsiari, yoavisacotiri, impoiji itiancajiri ivancoqui. ⁵Ari icantaqueri yora amenashejeitaqueriri:

—Tempa pantaveejeiti avirojei saavarroqui. Ariorica impariaque pivacate omoroqui, tempa ari paavajeri aisati.

⁶Aisati, imajerenirojeitanaque.

**Yoamejeitiri Jesoshi atiri: “Eiro
pishemejeititsi”.**

⁷Impoiji yamenajeitaqueri Jesoshi yora oajeitainchari yoacaajeitacari yora jivatacaajeitiriri. Icoajeiveta irisavique me quempeji yora pincatsari irineacameetsantearimeri. Ari icantajeitaqueri Jesoshi:

⁸—Ariorica iroacayempi pishaninca, eiro pisavicashitatsi quempeji yora pincatsaritatsiri. Pamene, ipoquicari pashini ivincatsaririnte, ⁹impoiji ipoquicari yora cajemacantimpire, icantimpicari: “Eiro pisaviquimotirtsiri pincatsarica. Irisaviqueta aca irinti ivincatsaririnte”. Isavacacaimpicari anta nijantiaji, impoiji pimpashiventanaquea. ¹⁰Iointiquea ocameetsati pisavicapaaque anta nijantiaji. Impoiji ariorica

irineajempi yora cajemacantimpire, incantempi: “Caatanaque, noshaninca, pisaviquimoteri aca pincatsari”. Irineajeittempi maaroni oajeitainchari ishanincataquempi pincatsari. ¹¹Ariorica pincoaque irineapincatsajeittempi itsipapee, pishemeticari; impoiji ipashiventacaimpicari Tasorentsi: tecatsi neapincatsatempineri. Iro cantaincha yora caari shemetatsi incarajeiteri Tasorentsi impicatsarivenante.

**Jesoshi iquenquetsatacotiri
cajemacantavetariri ishaninca
iroacaajeitearime.**

(Mt. 22.2-14)

¹²Aisati icantiri Jesoshi yora cajemacantiriri:

—Ariorica pincajamacanteri atiri poacantajeiteariri, eiro picajemapinijeitritsi pishanincasanori aisati yora ashitaarantincari. Ariorica poacaqueari, ari iriori impiatempi, iroacaajeempi. ¹³Iro cantaincha ocameetsatasanoti pincajamacanteri irinti yora caari ashitaarantayetacha, yora choriyetatsiri, jempayetatsiri, caari amenayetatsi, maaroni. ¹⁴Tecatsi incantajeitea irinti impiajeitajempi iroacaajeittempi. Iro cantaincha coajica irointinaajeitajeri Tasorentsi maaroni quemisantajeitiriri. Impoiji impinatempi irinti. Te pantsipetashiteaji picavintsanti.

¹⁵Iquemantacariri aparoni oainchari, icanti:

—Tempa oncameetsatasanotaque antime anta ipincatsaritinta Tasorentsi.

¹⁶Icantaqueri Jesoshi:

—Oquempetaca aparoni shirampari. Yovetsicacantaqueri oshequi yoari, impoiji icajemacantacqueri ishaninca iriori iroyea. ¹⁷Ovetsicajeadaca maaroni. Itiancaqueri inampire: “Pijate, pincaman-taiteri: ‘Moncarataca, vetsicajeadaca maaroni, pimpoque meeca’”. ¹⁸Iro cantaincha te incoajeiteji irijajeite. Icanti

aparoni: "Iroaquera namanantaquero noipatsite. Nojate meeca namenaiterota, ocameetsataquerica. Pincamantajeri: 'Eiro ipoquitsi'".¹⁹ Icanti pashini icajemacantiri: "Iroaquera namanantaqueri 10 vaca. Nocoaque namenaiteri icameetsataquerica. Pincamantapaajeri: 'Eiro ipoquitsi iroyea'".²⁰ Icantiri pashini: "Iroaquera naaque nojina. Tecatsi noncantea nojate".²¹ Ari ipianaja yora inampire camantavetariri ishaninca. Icamantapaajeri: "Icantajeiti: 'Eiro nojatitsi noyea'". Ari iquisanaca yora ivatorote, icantiri inampire: "Incanteata noshaninca. Meeca pijate anta nampitsiqui, pinquenayetanaque pincoacoayeteri yora caari ashitarrantayetachane, choriyetatsiri, jempayetatsiri, caari amenayetatsi, maaroni". Ari ijataque, icajemajeitaqueri, ipocajeitaque.²² Ari ipiajaro aisati, icantapaajiri ivatorote: "Nojaiti, nocamantajeitaqueri. Ipocajeitaque, iro cantaincha tequerata omoncarateaji".²³ Ari icantiri aisati: "Ari pijate anta aisati, pinquenayetanaque avotsipeequi, pincantajeiteri itsipapee impoque, nocoaque irijaasanojeitapeemparo novanco".²⁴ Irinti yora noshaninca nojivavetacari nocajemacantavetacari, eiro catsni yoimatarotsi oca novetsicavetanariri".

Irootaque iquenquetsatacaa jeitiriri Jesoshi anta ivancoqui variseo.

Icanti Jesoshi:

**"Pimpomerentsiventasanotenaro
nocoacaajeitaquemperi".**
(Mt. 5.13; 10.37-39; Mr. 9.50)

²⁵ Ari iquenanaque Jesoshi avotsiqui aisati, yojajaeitanacueri oshequi atiri. Ipitsocashijetanacari, icantajeitiri:

²⁶ —Niotaque pinintajeitiri piripee, piniropee, pijinapee, pitomipee, parentipee, pitsiropee, maaroni. Aisati avisati nintajeitacha avirori. Iro cantaincha pincoajeiterica pojajeitena,

ocametsati nainti pinintasanojeitena catsini. Eirorica pinintasanotanatsi, tecatsi pincantea pimpeajea noamere.²⁷ Aisati eirorica pipomerentsiventasanotanarotsi nocoacaajeitaquemperi, aisati eirorica pojatasanotanatsi, tecatsi pincantea pimpeajea noamere. Pinquenqueshirejeitea jaocarica oncanteari.

²⁸ Oquempetaca ariorica icoaque irantacantero shirampari ivanco, irijivataque irisampiteri yora vetsiquenerine jaoca oncarate ompinatea. Impoiji irimoncarateri iirequite iritanteari moncaratacarica. ²⁹ Eirorica ijivati iriote irimoncaratearica, icomitarocari. Ariorica irimoncaratearo ominca, ari ocarati. Impoiji tecatsi pashini iranteneri yora vetsicavetanariri. Impoiji irishirontimenteari ishaninca.³⁰ Incantajeite: "Pineaqueri, irovetsicacanterome pancotsi, iro cantaincha te intsoncacanteoji. Te intimeji iirequite, iji, iji, iji".

³¹ Aisati yora pincatsari, ariorica inquemacoteri itsipapee atiri itiancaqueri 20,000 soraro inquisanteariri. Ariorica intime isorarote pincatsari 10,000. Te irioteji ocameetsatirica irimanatavaqueri yora pocatsineri. Tempa irijivate incajemajeiteri ishanincapee iroametavacanteari: impoiji iriote ocameetsatirica irimanatea iroimpanteariri yora pocashiterineri.³² Ariorica incantajeite ishaninca: "Yanaacojeitaquee, ishequitasanotaque. Tecatsi ancantea aimpiavajeri". Ari incanteri: "Tequera irareejeitea, tsame antianqueri aparopee ashaninca irisampiteri paitarica incoacojeitaqueeri eiroquea imanatantapeetsi".³³ Aisati pinquempeteta avirorije: ariorica pincoaque pojatena, pijivate pinquenqueshirete jaoca ocantajeitari maaroni timimojeitimpire. Piotasanojeitero: impoiji pojocajeitajero, pojatasanojeitanaquena.^{34,35} Nocoaque yora quemisantanari iroameteri itsipapee atiri intime cameetsa, irompa eirorica

yoametiritsi, te irimateroji nocoacaavetacariri, yatsipetashitaca itimi. Iquempetacaro tivi caari poteatatsine: tempa ajocajero. Pinquenqueshiretasanotero oca nocantajeitaquempiри piotasananotanterrori.

Irootaque icantajeitaqueriri Jesoshi oijajeitiriri.

**Iquenquetsatacotiri Jesoshi
yora ovisha peachari.**
(Mt. 18.10-14; Joa 10.1-18)

15 ¹Itimi anta oshequi jorio aitiriri iirequite ishaninca impanteariri yora oromasati, aisati icoshitaqueri ishaninca. Iro cantaincha yamejeitaca iriori yapatotimentapinitari Jesoshi, icarajeitaqueri itsipapee antapinitirori caari cameetsatatsi. Iquemisantapinijeitaqueri Jesoshi iquenquetsati. ²Ari icantajeiti yora variseopee aisati yora oametantirori Sanquenarentsi:

—Te oncameetsateji oca yantapinitiri Jesoshi: icarajeitapinitiri caari cameetsayetatsi, itsipajeitacari yoajeita.

³Impoiji, jero oca ishiacantiniriri Jesoshi:

⁴—Aamaaca intimerica povishate 100. Impeaquearica aparoni, tempa ari poanaqueri yora 99 anta queshioui, impoiji pijatanaque anta caaraiteriqui, pincoacoanteariri peainchari. Pincoacoayetajeri irosati pineantajeariri. ⁵Ariorica pineapaajeri, tempa oshequi pinquimoshireventajeari. Tempa pinquijajeri, paanajeri, pojateri anta itimajetinta ishaninca. ⁶Aisati, ariorica pareetea pinampiqui, tempa pincajemaitejeri pishaninca, pincantajeiteri: “Tsame anquimoshirejeite: ipeavetaca novishate, naajiri aisati”. ⁷Aisati iquempeta Tasorentsi. Ariorica inquenqueshiretaja aparoni antirori caari cameetsatatsi irojocanterrori, incanteri maaroni savicajeitatsiri inquitequi: “Tsame anquimoshireventajei-

teri”. Te irio incantacote yora itsipapee cameetsajeitatsiri.

**Iquenquetsatacotiri Jesoshi
quirequi peachari.**

⁸Jero pashini icantiriri Jesoshi:

—Pashini aisati noshiacaventempiro: otimi tsinane oirequite, icarati iitsoqui 10. Ariorica impeaquea aparoni, oncoacoayetajeri. Ariorica ontsitenitanaque, ontsiotero otsiomento, oneanteariri, aisati ompishitasanotero pancotsi amenayetajeri otijaqueririca quipatsi. Ari oncoacoayetajeri irosati oneantajeariri.

⁹Ariorica oneajeri, oncajemerri oshanincaeji, oncanteri: “Tsame pintsipajeitena, anquimoshirejeitanaque. Noneajiri aisati noirequite peavetainchari”. ¹⁰Aisati noncamantajeitemi: aisati iquempetaca Tasorentsi. Ariorica inquenqueshiretaja aparoni antirori caari cameetsatatsi irojocantajearori yantayetiri, inquimoshiretanaque Tasorentsi, irineajeiteri inampirepee.

**Iquenquetsatacotiri Jesoshi
evancari jatapitsavetariri iriri.**

¹¹Pashini aisati ishiacantiniri Jesoshi:

—Itimi shirampari itomi apite. ¹²Yora impoitatsiri itimi icantiri iriri: “Apa, nocoaque pishinetenaro nayerota maaroni novaararo aisati maaroni noirequite. Pimpenero meeca maaroni”. Ari ipajeitaqueri. ¹³Pashini quitajeriyapatojeitaquero irovaararo, maaroni. Ijataque arejiqui, pashiniqui nampitsi, yaanaquero maaroni timimojeitiriri. Anta te irisavique cameetsa, irootaque yaparatantacarori maaroni irovaararo aisati iirequite. ¹⁴Ari tecatsi timimotajerine, aisati te ontimasanoteji iroajeiteari atiri. Oshequi yashinoncaaca evancari, iquemasanotaquero itashe. ¹⁵Impoiji iquenaquenayetanaque iramenayeteri tsameetacayerineri. Ineapaquieri aparoni

ashitariri ichanchote, icantapaaqueri: “¿Picoaquempa nontsameetempi?” Icantiri: “Je, nocoaque pamenenari nochanchote”. ¹⁶Ari yamenavetacanari ichanchote, ipapinitiri yoari: ora shiavetarori otaqui intsiipa. Iro cantaincha tecatsi oacayearine yora evancari, icoavetanaca iroacotearime yoari chancho. ¹⁷Impoiji iquenqueshiretanaja: “Icarajeitaque iratirite apa oshequi. Timatsi yojeitari maaroni, iquemapinijeitaca, timatsi timaarantapaintsiri aisati. Naintiquea, aasanotaquena notashe. ¹⁸Meeca nompianaje anta apaqui, noncantapaajeri: ‘Apa, te nonquemisan-tempiji, aisati te nonquemisanteriji Tasorentsi. Ainiro nantane oshequi. ¹⁹Eiro meeca pitomintajanatsi, ainti pinampitajena. Nontsameetempiro piipatsite’”. ²⁰Impoiji ipianaja, iquenanaji avotsiqui. Icaantanaja, irotapajantsi ivanco iriri. Ari iniitavajari iriri anta paricoti, iquenapaaji. Oshequi iquimoshiretanaque, icavintsaasanotavajiri. Ishiashitavajari iquempejitatavajiri, yavitsanotavajiri, inintavorotavajiri. ²¹Ari icantapaaqueri itomi: “Apa, te nonquemisanteriji Tasorentsi, aisati te nonquemisan-tempiji avirori. Ainiro nantaneve. Te oncameetsateji pintomintajena”. ²²Iro cantaincha icajemiri iriri inampirepee, icantajeitiri: “Pishintsijeite, paitero quitsaarentsi cameetsari, pinquitsaateri notomi. Aisati paiteneri aniylo, pisatevacoteneri iracotsapaquiqui. Paiteneri aisati sapato, irisapatotapaajeari. ²³Aisati paiteneri vacajaniqui, timasanotatsiri ireji, moyeneri. Tsame maaroni anquimoshireventavajeri notomi, avacaajeitava-jeari, maaroni. ²⁴Nojivetaca eiro noneajiritsi, oquempetimotaquena icamaque. Iro cantaincha meeca oquempetaca yaneanaji aisati, meeca noneajiri. Ipeavetaca, meeca ipocaji, aneajeitajiri aisati”. Ari iquimoshirejeitanaque,

yoacaajeitajari. ²⁵Ari itsameeti itomi pashini anta oantsiqui: te irineavajeriji irirenti. Impoiji yareetapaaja iriori, iquempejitatapajji iquemapaaquerero moshica, aisati ivairajeitaque. ²⁶Icajema-paaqueri aparoni namparentsi, isampitiri: “¿Paita pivairajeitantzari?” ²⁷Yacanaqueri: “Areetapaaja pirenti. Yoacantaqueri piri vacajaniqui, yoacaajeitacari maaroni. Oshequi iquimoshireeventavajiri pirenti ipocaji, cameetsa yareetaja, tecatsi oyerine”. ²⁸Irosati iquisantanaca irirenti, te incoyeji inqueapaaje pancotsiqui. Isoquijanaque iriri, icantavetavajari: “Caate, notiomni, pinqueapee. Piveshireimentavajeari pirenti”. ²⁹Iro cantaincha yacanaqueri: “Peerani nantaveetaquempiro paitapeerica picantaquenari, te nompiatsatimatempiji. Iro cantaincha tecatsi pimpena nanti catsini noacayearimeri noshanincapee. Te pimpenariji chivo, tecatsi catsini. ³⁰Jeri iyeniro, ijatanaque arejiqui itsonquitaquemperi piquirete: ipinajeitaquero tsinanepée ineavintsaajeitaquero. Meeca ipianirotaja, ari poaqueneri cameetsari vaca”. ³¹Ari icantiri: “Notiomni, acantani quiso avavacaaca. Avirotaque ashitearoneri maaroni vaararontsi oca avancoquinirica. ³²Iro cantaincha ocameetsati aveshireimenteari pirenti. Oquempetetaca icamaque, ajijeivetaca eiro anejiritsi aisati. Meeca oquempetaca yaneanaji aisati, aneajeitajiri. Ipeavetaca, meeca aneajeitajiri aisati. Tsame aveshireimentajeiteari”.

Iquenquetsatacotaqueri Jesoshi amatavitiriri ivatorote.

16 ¹Aisati icantiri Jesoshi iroamere: —Itimi ashitaarantincari quem-poyejiniriri iiquirete, maaroni. Impoiji icanteetiri: “IcoshitaqueMPI yora quempoyeavetimpiriri piquirete”. ²Impoiji icajemaqueri, isampitiri: “¿Paita

ojita oca icanteetaquenari? ¿Paita picoshinirotantanari? Meeca poimpiajene nari maaroni noirequite, pisanquenatenaro ivajiropee maaroni irevananari. Meeca eiro noshinetajimpiritsi aisati noirequite".³ Ari iquenqueshiretanaca iriori: "Eiro meeca ishinetajanatsi novatorote nonquempoyejeneri iirequite. ¿Paita nanteri meeca? Te noshintsiteji nontsameetanteari. Aisati nopashiventaca noncanterime atiri impashitename quirequi. ⁴Ja, je niotaque meeca. Noncavintsaajeiteri maaroni irevijeitiriri novatorote. Impoiji, iraacameetsajeiteina anta ivancoqui: eiro ishinetantana nashinoncaaveetea".⁵ Ari icajemajeitaqueri maaroni irevijeitiriri ivatorote. Isampitiri yora jivatatsiri yareetapaaja: "¿Jaoca icaratiri pirevitirri novatorote?"⁶ Yacanaqueri: "Nirevitiri oshequi oja orivo. Ocarati nirevitiri jaachari virojaniqui 100". Icantiri: "Je, queario. Jeroca paperi osanquenataca pirevitiriri. Payero paperica, pisanquenateneri otsipa, pincante: 'Nirevitimpi 50 virojaniqui jachari oja orivo'. Amataviterita novatorote". Icantiri: "Je, ari".⁷ Ari ijataque jivatatsiri, ipocaque itsipa. Isampitiri: "¿Jaoca ocaratiri pirevitirri novatorote?" Yacanaqueri: "Oshequi nirevitiri tirico, ocarati jainchari coshitariQUI 100". Ari icantiri: "Jeroca paperica pisanquenatiniri peerani novatorote. Queario, ocarati pirevitiri 100. Tsame amataviterita. Payero oca paperica, pojocajero; pisanquenateneri otsipa, pincanteri: 'Nirevitimpi 80 coshitari, jainchari tirico'". Ari isanquenataquero.⁸ Impoiji iotanaque yora ivatorote yamatavitaqueri. Icantaque: "Te oncemeetsateji yamatavitaquena, iro cantaincha otimi ionirotantari irayero coiteimotacariri". Queario yora tseencattatsiri ioniroti iomparitavacaajeita. Irintiquea yora quemisantatsiri te

iriotasanoteji.⁹ Meeca noncamantajeitempi: intimerica piirequite, pincavintsaajeiteri pishaninca, pimpajeleiteri coiteimotariri iriori. Eiro ipeacotarotsi. Impoiji pincamajetanaque, pojocajeleitero timimojeitimpipi, iro cantaincha iraacameetsajeiteMPI anta inquitequi yora picavintsaajeitaqueri. Tempa anta otimi pisavicanteari caari tsonganetachane.¹⁰ Eiroric a picoshititsi capichaji, eiro picoshititsi aisati antearoite. Iro cantaincha pincoshiterica capichaji, picoshiticari aisati antearoite.¹¹ Ariorica pincoshiyete quirequi, iriotanaque Tasorents te pinquenqueshireteriji iriori: impoiji eiro ishanincatimpitsi, eiro pineirotsi inampi.¹² Ariorica pincoshiteri iirequite itsipapee, ɿpaitaquea impashitatemppiri Tasorents piirequite avirori?¹³ Tecatsi pincantea pantaveeteneri apite pivatorote. Ariorica pinintasanoteri aparoni, eiro piquempataritsi itsipa. Piveshireimenteari aparoni, irinti itsipa, eiro. Aisati ariorica pishintsiventeri quirequi, eiro pimatirotsi pishintsiventeri Tasorents.

**Yora Jesoshi yoametaqueri variseopee
icoacaqueririr Tasorents.**

¹⁴ Ari iquemajeitaqueri variseopee icantaqueririr Jesoshi, irosati ishirontimentajeitancari. Icoaque irashitaarentea oshequi, irotaque ishirontimentantari Jesoshi.¹⁵ Ari icantiri:

—Picoajeitaque irijijeitempi atiri picameetsajeitaque, iro cantaincha iojeitaquempi Tasorents. Ineacameetsavetimpi atiri, iro cantaincha iotaque Tasorents te pincameetsajeiteji.

¹⁶ Peerani ocameetsatini piquemisantironi isanquenaren Moishishini aisati yora camantantatsiniri paviscotantajari. Iro cantaincha areetapaaca meeca Joa, yora vaotisatantatsiri. Onashita meeca icoacaajeitaquemppiri Tasorents. Yora Joa

intanacaro icamantajeitaquempi cameetsatatsiri: irotaintsi impincatsari- ventajeitempi Tasorentsi. Icoasanojeiveta atiri irineeri.¹⁷ Coajica ompeanajea quipatsi aisati inquite, iro cantaincha eiro opeatsi irointi isanquenare Moishishi: icoi Tasorentsi pincanteani pinquemisantero piotanteari cameetsa pisavique.¹⁸ Tempa ocanti: "Eiro paimentarotsi pijina". Ariorica pojoquero pijinasanori paantea- rori otsipa tsinane, paimentearo pijina. Aisati te oncameetsateji payero tsinane joquiriri ojime.

**Yora Jesoshi iquenquetsatacotiri
ashitaarantincari aisati Irasaro iriori.**
(Mt. 19.1-12; Mr. 10.1-12)

19 Ari icantajeitiri Jesoshi:

—Itimi aparoni shirampari ashitaaran- tincari, oshequi iitsaare cameetsamaota- tsiri, oshequi yoaneencaca. Maaroni quitaiteriqui yoacaajeitacari ishaninca yoari pinatasanotachari.²⁰ Itimi aisati ashinoncaasanotachari pajitachari Irasaro. Osoncayetanaque isompoppee opatsaayetanaqueri. Ari isavacapiniveta anta iqueapinitinta ashitaarantincari ivancoqui.²¹ Oshequi yashinoncaaca, aasanotaqueri itashe. Icoaveta iroajearome yoari yoariayetaqueri ashitaarantincari quipatsiqui. Aisati yora otsitipee yatsoyetapaaqueri ivatsaaropee- qui.²² Impoiji icamaque iriori. Ijatashita- queri inampireepe Tasorentsi, yaavajiri, impoiji yaanajiri anta itiminta Avaramani. Ocameetsaitetinta catsini. Aisati icamaque yora ashitaarantincari.²³ Oshequi yashinoncaaca meeca yora ashitaarantaveitachaniri anta Sharincave- niqui, oshequi ineacatsitacaro. Yamena- naque anta osamani itiminta Avarama. Ineaqueri Avarama, jeri aisati yora Irasaro.²⁴ Icajemacotaqueri: "Apa Avarama, pineshinoncatajena. Pincanteri yora Irasaro irovinquerota iracotsapaqui

nijaqui, impoqueta aca nantsotantearori nija. Oshequi catsini nashinoncaaca aca paamariqui".²⁵ Iro cantaincha icantaqueri Avarama: "Notiomi, pinquenqueshiretea jaoca ocantani peerani pitimaveitani quipatsiqui. Cameetsa pisaviquini catsini, irintiquea Irasaroca oshequi yashinoncaa- veitani. Meeca cameetsa isavicapaaque irinti, irompa avinti oshequi pashinon- caaca.²⁶ Aisati pineaquero nijantaitetaco- taquempi, tecatsi inquenashitantempi Irasaro. Aisati avirori, tecatsi pinquena- shitantenari".²⁷ Ari icantiri: "Eirorica pimatirotsi pincavintsayena. Iro cantain- cha pintianqueri Irasaro quipatsiqui: anta ivanconiqui apani.²⁸ Aneatsiquera anta iyepee, icarati apapacoroni. Nocoaque inquemisantacaapaajeri, ipoquicari aca. Pamene meeca narori, oshequi noquema- tsicatacaro catsini".²⁹ Iro cantaincha icantiri Avarama: "Otimi isanquenare Moishishi aisati isanquenare itsipapee quenquetsatacantantatsiniri. Irootaque inquemisantajeiteri irointi".³⁰ Ari yacanaqueri: "Je, ainiro onaveta. Iro cantaincha ariorica irineajeri camaintsiri intinaanaje, aitaque inquenqueshirejeita- najea, irojocajero caari cameetsatatsi yantajeitiri".³¹ Icantiri Avarama: "Terica inquemisantero sanquenarentsi, eiro aisati iquemisantiritsi tinaajantsiniri".

**Icantiri Jesoshi iroamerepee:
"Pantacairicari pishaninca caari
cameetsatatsi".**

(Mt. 18.6-7; Mr. 9.42)

17 ¹ Icantajeitiri Jesoshi iroamere- pee:

—Noncamantempi: incanteani intime atiri antacajaeiterineri ishaninca caari cameetsatatsi. Iro cantaincha iroashinon- caajeiteri Tasorentsi yora antacairiri ishaninca caari cameetsatatsi.² Aitaque iroashinoncaasanoteri antacajaeitiriri jananequipee caari cameetsatatsi.

Oncameetsateme irijivataqueme iroisoyeeterime mapiqui antearo, irovincanteetearirime. Irovinqueeterime, eiro yantacairime jananequi caari cameetsatatsi.³ Queariompia, pantacairi cari pishaninca caari cameetsatatsi.

Icantiri Jesoshi: “Pincavintsaapiniteri antitapinitimpiori paitapeerica”.

(Mt. 18.21-22)

Aisati icantiri:

—Ariorica pineacotaqueri pishaninca yantiro caari cameetsatatsi, pinquenqueshi-retacayeari. Ariorica irojocajero yantiri, pincavintsayeri, paacameetsatajeri.⁴ Ariorica inquishempি pishaninca, incoshitempi, incantimatempি, paitarica. Iro cantaincha ariorica incantempi: “Te oncameetsateji nantitaquemppi, pincavintsayena”, ari nocoaque pincavintsayeri. Ariorica oshequi irampiitajero irantitajempi, aisati oshequi incantempi: “Pincavintsayena”. Ari nocoaque oshequi pincavintsayeri aisati, eiro piqushimentirtsisi.

Icantiri Jesoshi: “Ariorica pinquemisante, oshequi irimatempiro Tasorentsí paitarica pincacoteriri”.

(Mt. 21.22; Mr. 11.22-26)

⁵Yora iroamerepee icantaqueri Avincatsarite:

—Noquemisantaveta. Nocoaque poametena nonquemisantasanotantajeari.⁶ Ari yacanaqueri:

—Pinquemisanteme capichaji, pincoa-quericame, pincanterime Tasorentsi imponquitireajero inchatora, iroviincaitero anta incajarequi. Ari inquemisantem-pime, iroviincaiterome.

Icanti Jesoshi: “Avirojei piquempejeitacari iratirite Tasorentsí”.

⁷Aisati icantajeitiri Jesoshi:

—Oquempetaca itimi shirampari iratirite. Itsameetapinitiniri aisati

yamenapinitiniri ivira. Ariorica impocaje iratirite pancotsiqui, ¿paita incantavaqueri ivatorote? ¿Incanterimpa: “Caate, pisavicatee, poapeempa”? Eiro icantiritsi.⁸ Tempa incanteri ivatorote: “Meeca povetsiquenarota noyeari, aisati nireri. Pamaquenaro. Ariorica nonquemanaquea, ari poyea avirori, aisati pire”.⁹ Aisati eiro icantavetaritsi: “Ariove, pimataquenaro”; tempa yametacaro yantaveetapinitiniri ivatorote.¹⁰ Aisati avirorije, ocameetsati pimatapinijeiteneri maaroni icoaca-quemppi Tasorentsi. Impoiji oncameetsate pincante: “Apatiro nomataqueneri icoacaquenari. ¿Paita noshemetanteari? Te noncoyeji noncoacoteri Tasorentsi impinatena”.

Yoavisacojeitiri Jesoshi 10 patsaajeitatsiri.

¹¹Ari yovaanaja Jesoshi, iquenayetana-que Samariaqui aisati Carireaqui. Ishiretaca irareetea Jerosarequi.¹² Ari yareetapaaca pashiniqui nampsitsi, ineajeitavaqueri patsaajeitatsiri, icarajeiti 10. Icatiaeitaca aquietiji ara.¹³ Icjema-cojeitaqueri:

—Jesoshi, aviro nopincatsajeitiri, pincavintsaajeitena, poavisacojeitena.

¹⁴Ari ineantacariri Jesoshi, icantajeitiri:

—Pijajeite anta itiminta saserote, pinijapeempari.

Ari iquemisantajeitaqueri, ijajeitana-que. Anta nianqui avotsi yavisacojeitajiji.¹⁵ Ari iojeitaque yavisacojeitajiji, iro cantaincha ipianaja aparoni anta Jesoshi-qui. Antearojenca icantaque:

—Tempa icameetsataque Tasorentsi, yoavisacotaquena.

¹⁶Itiyoashitapaaacari Jesoshi, yoivot-sanotashitacari, ipincatsatasanotaqueri, ipasonquitasanotaqueri. Iponeaca yoca shirampari Samariaqui.¹⁷ Ari icanti Jesoshi:

—Tempa icarajeiti noavisacojeitiri 10. Jaoca itsipapee noavisacojeitiri?

¹⁸Ipiashitajana yoca pashinisati atiri, ipasonquitaquena, aisati ineacameetsatiri Tasorentsi. Irintipee ashanincasanoripee, Ʉpaita caari ipiantaja impasonquitanteeari Tasorentsi?

¹⁹Impoiji icantiri tiyeroashitacariri:

—Meeca pincatiae, ocameetsati pijataje. Pishiretacari Tasorentsi, irootaque pavisacotantajari.

**Yoamejeitiri Jesoshi atiri jaoca icantari
Tasorentsi ipincatsariventanti.**

(Mt. 24.23-28, 36-41)

²⁰Ari yora variseopee isampijeitiri Jesoshi: —¿Jaoca oncarate impoque Tasorentsi impincatsariventajeitajee?

Ari yacanaqueri:

—Ariorica impincatsariventante Tasorentsi, iro cantaincha eiro pineasano-tiritsi. ²¹Eiro pimatirotsi pincante: “Jeri yoca”, aisati: “Jeri yonta”. Queario, eiro iconijatasanotitsi: ocameetsataque pimpincatsashireajeiteri maaroni.

²²Aisati icantajeitiri iroamerepee:

—Tempa nownopeaca inquitequi, natiritapaaque, iro cantaincha eiro nocantani quiso noajempi. Coajica pincoajeivetanaquea pineajename aisati, iro cantaincha eiro pineajanatsi. ²³Impoiji incanteetempi: “Ipiaja Jesoshi, itimi anta”, pashini incanteete: “Jeri yora”. Iro cantaincha caarina. Eiro patsipetashitatsi pijatashitena. ²⁴Ariorica omoncaratasanotaquea nompocanteari, ari piotasanolavaquena. Iquempetaca te irimaneari itirei, aisati iporequi; aisati nonquempetajea narori, nompocajerica. Eiro nomanapaa-tsi, eiro picomitavaquena. ²⁵Nojivatava-queta nonquematsicatavaquearota oshequi, aisati intseenajeitaquenata savicajeitatsiri. ²⁶Oquempetaca peerani itimantacari Noeni itseenajeitea ariorica nompiaje narori, intseenajeite atiri maaroni. ²⁷Yoapinijeita peerani,

irapinijeiti, yaapinijeitiro ijinapee, yaacaayetiro irishintopee, paitapeerica. Icantajeitani, irosati itetantanaca Noe ivitoqui. Impoiji opoqui antearo incani, incajaretanaque maaroni. Icamajetana-que maaroni tseenajeitantsiri. ²⁸Aisati iquempejeitacani ishaninca Oroti, savicajeitatsiniri Soromaqui: yoapinijeita, irapinijeiti, iquenayetanaque iyompariye-tanaca, ipanquiyetiro yoari, yovetsica-nontayeta ivancopee. ²⁹Iro cantaincha ijatantanacari Oroti, itiancaquero Tasorentsi oshequi paamari, itaajeita-queri maaroni soromasatini. Itseenajei-tini, irootaque ipoyereajeitancariri Tasorentsi maaroni, poyere. ³⁰Aitaque oncanteari ariorica nompiaje. Intime oshequi tseencantatsineri, eiro iquenque-shiretiritsi Tasorentsi. ³¹Pamene, ariorica omoncarataquea nompocantajeari, pintimerica saiteriqui, eiro piqueapan-jantitsi pancotsiqui paantapanajantearori pivaararo. Aisati, pintimerica oantsiqui, eiro pipapanajantatsi nampsitsiqui paantapanajantearori pivaararo.

³²Piquempetarocari ijinani Oroti, pipitsoquicari. ³³Picoicari poavisacotajea avisati, impoiji pijaticari Sharincaveniqui. Iro cantaincha ariorica pincamientoena narori, pincantaitiyempani pisaviqui-motena inquitequi. ³⁴Ariorica nompocaje, intime apite maatsineri imaamentoqui. Aparo naanajeri nontsipatanaqueari, irinti itsipa, eiro naanajiritsi. ³⁵Ontime apite tsinane ontsipatavacaquea ontononquero tirico. Aparo naanajero nontsipatanaquearo, irointi otsipa, eiro naanajirotsi. ³⁶Intime apite shirampari anta oantsiqui, intsipatavacyea intsameete. Aparo naanajeri nontsipata-naqueari, irinti itsipa, eiro naanajiritsi.

³⁷Ari iquemajeitancariri iroamere-pee, isampitiri:

—Novincatsarite, ¿jaocampa pinijanta-jeari oca picantauenari?

Yacanaqueri:

—Jaocarica anta intimeri tseencantatsiri, yora iroashinoncayeri Tasorentsi.

Yora Jesoshi iquenquetsatacotiri yora jesoshi caari cameetsatatsi.

18 ¹Pashiniqui quitaiteri iquenquetsatacaajeitiri aisati Jesoshi iroamere. Icoaque iroameteri inquenquetsatacapinteri Tasorentsi, inquearioventajeteiro, eiro yoipacaajirotsi. ²Icantajeitiri:

—Itimini anta nampitsiqui yora joeshitasiri, caari pincatsatiri Tasorentsi. Aisati te iriteniji incavintsayeri ishanincapee. ³Otimi anta inampiqui aparoni tsinane, camajimentaaro. Ojatashitapinivetari yora jesoshi, ocantapinivetari: “Pamitacotena, te oncameetsateji iquisapinitana yora itsipa shirampari”. ⁴Te incoaveteoji yoranqui iramatacoto, iro cantaincha iquenqueshiretanaca: “Te nompincatsateriji Tasorentsi, aisati te noninteki noncavintsayeri itsipapee noshaninca. ⁵Iro cantaincha oshequi ashere aquena oca tsinane. Namitacoterota, impoiji eiro opocashitapinitajanatsi, eiro ashereapinitajanatsi aisati”.

⁶Ari icanti Avincatsarite:

—Pamene, te incameetsateji yora jesoshi noquenquetsatacotiri, iro cantaincha yamitacotaquero oca tsinane cantapinitiriri. ⁷Irintiquea Tasorentsi, icameetsataque.

Ariorica incanteani incantapiniteri quemisantsirsiri, tempa iramatacoteri.

⁸Queariotaque oca noncamantempi: intsipaite iramatacojeiteri Tasorentsi maaroni quenquetsatacaajeiterineri. Iro cantaincha ariorica nompiaje aca quipatsiquica ñarimpa noneapeempi piquemisanta-jeiti, piquenquetsatacaajeitiri Tasorentsi?

Yora Jesoshi iquenquetsatacotiri yora variseo aisati yora apatotiniriri oromasati quirequi.

⁹Pashini aisati iquenquetsati Jesoshi. Iquenquetsatacotiri yora shemetatsiri,

yora tseencajeitiriri itsipapee ishaninca.

Icantiri:

¹⁰—Ijataque apite shirampari ivancoqui Tasorentsi, inquenquetsatacayeri Tasorentsi. Variseo ini aparo, irinti itsipa yapatotiniri oromasati iirequite joropee. ¹¹Ari icatiapaaca yora variseo, icantavetapaacari: “Tasorentsi, ariove, oshequi nocameetsataque nainti. Tecatsi nante, te nonquempeteariji yora coshitantatsiri, yora amatavitantsiri, aavioncatsiri ijina. Aisati te nonquempeteariji yora aitiriri noshaninca iirequite.

¹²Nametacaro maaroni tominco notitapinita apite quitaiteri, aisati nopaarantapiniyetimpilo maaroni naayetiri. Naaquerica 10, aparoni nopaquempi”. ¹³Irinti yora apatotapinitiriri oromasati iirequite ishaninca, icatiapaaca irinti njanteaji. Te irishemeteji irinti, irointi oshequi ipashiven-tacaacaro yantayetiri, irootaque caari yamenanta jenoqui, irointi iposanejitaca. Icanti: “Tasorentsi, pincavintsajena narori, te noncameetsateji catsini, ainiro oshequi nantane”. ¹⁴Ari noncamantempi, oshequi onaveta irantane yora shirampari, iro cantaincha icavintsairi Tasorentsi. Ariorica impiaje ivancoqui iriotanaque ineacameetsatiri Tasorentsi. Irintiquea yora variseo, te inquempeteariji. Eiro ineacameetsatiritsi Tasorentsi shemetatsiri. Irinti yora caari shemetatsi impeajeri pincatsaritajantsine.

Icoaque Jesoshi impocashijeiteri jananequipee.

(Mt. 19.13-15; Mr. 10.13-16)

¹⁵Impoiji tsinanepee amajeitirini Jesoshi otomipee, ocoaque impamijeiteri aisati incanteri Tasorentsi iramatacoteri. Iro cantaincha ineantacarori iroamere, itsaneacovetacari impocashiteri. ¹⁶Iro cantaincha icajemiri Jesoshi jananequipee, icantiri iroamere:

—Eiro pitsaneacotanaritsi, aitaque nocoaque impocashijeitena. Pineajeitaqueri prioriej: te intseencajeitenaji,

irointi ishirejeitaquena. Maaroni quempe-
jeitacariri irineajeiteri Tasorentsi
impincatsariventajeiteri.¹⁷ Aisati,
queariotaque oca noncamantempi:
maaroni caari quempetari jananequi
iriori, eiro ineiritsi Tasorentsi impincatsa-
iventajeiteri.

**Iquenquetsatacairy Jesoshi
ashitaarantincari.**

(Mt. 19.16-30; Mr. 10.17-31)

¹⁸Pashini quitaiteri ijatashitaqueri
Jesoshi aparoni ivincatsarite jorio.
Icantapaaqueri:
—Oametanari, oshequi picameetsati.
Pincamantena: ¿paita nanteri nojatan-
teari anta inquitequi, noncantaitatiyem-
pani?

¹⁹Icantiri Jesoshi:
—¿Paita picantanaran: “Picamee-
tsati”? Itimi aparo cameetsatatsiri, yora
Tasorentsi. ²⁰Piojeitiro maaroni icantiri
Tasorentsi: “Eiro paimentarotsi pijina,
eiro paimentaritsi pijime, eiro picoshiti-
tsi, eiro pitseeyacotaritsi pishaninca,
pimpincatsateri piri, aisati pimpincatsa-
tero piniro”.

²¹Yacanaqueri:
—Aitaque nocantani nomoncarataque-
roni: nevancaritapaini, irosati meeca.

²²Iquemantacarori oca, icantiri Jesoshi:
—Apanivaniji pimatero aisati: pimpiman-
tajeiteri maaroni timimojeitimpiri,
pimpajaeiteri ashinoncaincari ovinaro.
Ariorica pimatero oca ontine oshequi
timimojeitajempineri anta inquitequi.
Ariorica pimpimantero pivaararo,
pimpoque, pojatasanotanaquena.

²³Iquemantacarori oca, oshequi yoashire-
tanaca. Ashitaarantincari ini, te incoyeji
impimantero irovaararo, irointi yompetana-
caro. ²⁴Ineaqueri Jesoshi yoashiretanaca,
impoiji icanti:

—Opomerentsitimotacari ashitaarantin-
cari irijate anta ipincatsaritinta Tasoren-

tsi. ²⁵Tempa opomerentsitimotari cameyo
inqueero omoro quitsapi, iravasantana-
jeari. Irioqua ompomerentsitimotasano-
teari catsini irijate ashitaarantincari anta
Tasorentsiqui.

²⁶Ari isampitiri yora quemavaqueriri:
—¿Ariompa? Pomerentsitaca.

²⁷Janicampa meeca avisacotajantsineri?

²⁷Yacanaqueri Jesoshi:
—Oca caari imatapiniti atiri,
imataquero Tasorentsi irinti.

²⁸Ari icantiri Petero:
—Oametanari, nojocajeitaquero
maaroni noijajeitantaquempi.

²⁹Yacanaqueri:
—Queariotaque oca noncamantempi: te
pantsipetashitarojo. Ariorica pojocajeitajero
pivancopee, pijinapee, pirentipee, pitsiropee,
piripee, piniropee, pitomipee, pishintopee:
iro cantaincha irootaque pojocajeitanteeariri
picoasanotaque impincatsariventempi
Tasorentsi, eiro patsipetashitarotsi.

³⁰Aitaque impinataquempi Tasorentsi
meeca aca quipatsiquica, aisati impinata-
quempi anta inquitequi: paneantasanotajeari
anta, pincantaitatiyempani.

**Icamantajeitiri Jesoshi
iroamere: “Noncame”.**

(Mt. 20.17-19; Mr. 10.32-34)

³¹Impoiji icajemaqueri Jesoshi iroame-
repee, icantaqueri:

—Tsame ajajeite meeca Jerosarequi.
Timatsi isanquenatacotaquenanir
peerani yora quenquetsatacantantsiniri.
Noponeaca inquitequi, natiritapaaque.
Meeca anta Jerosarequi omoncarataquea
maaroni isanquenatacotaquenaniri.

³²Iraacantena ashaninca arori, irayena
itsipapee atiri. Irishirontimentajeitena,
iroashinoncaajeitena, inquitiojena,

³³impasanatena, iroyena. Oncaratapaa-
que mava quitaiteri, nontinaanaje aisati.

³⁴Iro cantaincha te inquemajeitavaque-
roji icantajeitavacariri, icomijeitavacaro.

Yoavisacotiri Jesoshi caari amenatsi.
(Mt. 20.29-34; Mr. 10.46-52)

³⁵Ari icaantanaca Jesoshi, iquenanaque avotsiqui, irotaintsi irareetea nampitsiqui pajitachari Jerico. Itimi anta avotsinampiqui shirampari caari amenatsi, icoacotapinijeitiri avisayetatsiri irineshinocatanaqueri, impayetanaqueri quirequi. ³⁶Ari iquemavaque caari amenatsi ipocajeitapaaque oshequi atiri. Isampitiri itsipa:

—¿Janica pocatsineri?

³⁷Yacanaqueri:

—Coraque Jesoshi, yora nasaretesati, yoijajeitiri oshequi atiri. Iravisanaje aca.

³⁸Ari icajemacotavaqueri:

—Jesoshi, aviro ishanincani Iravirini.

Pincavintaanaquenave.

³⁹Ari icantajeitiri jivajeitiriri Jesoshi:

—Pimajerete.

Iro cantaincha, aiquero icantanaitii:

—Jesoshi, pincavintaanaquenave.

⁴⁰Ari icatiapaaca Jesoshi, icantanaque:

—Pamaqueri aca.

Ari yameetaqueri. Impoiji isampitiri:

⁴¹—¿Paita picoaqueri?

Yacanaqueri:

—Novincatsarite, nocoaque namenaje narori.

⁴²Icantiri:

—Ari, aitaque pamenaje meeca.

Pishiretaquena, irootaque pavisacotantajeari.

⁴³Irosati yamenantanaja. Ari yoijatanqueri Jesoshi, icantanaque:

—Yamenacaajana Tasorentsi, tempa icameetsataque.

Aisati iquempejitarceri maaroni amenajeitaqueriri, icantajeitaque:

—Tempa icameetsataque Tasorentsi.

Yora Saqueo ineaqueri Jesoshi.

19 ¹Impoiji iquenanaque Jesoshi nampitsiqui, pajitachari Jerico. ²Itimi anta ashitaarantincari pajitachari

Saqueo. Iriotaque iriori jivatacaajeitiriri yora apatotapinitimiriri oromasati iirequite jorio. ³Icoaveta Saqueo irineerime Jesoshi, iro cantaincha te iranteariteji, icaajaniquitiji. Icarati oshequi atiri, yojocaaajeitavaqueri. ⁴Ari ishianaca, ijivatanaque anta avotsiqui. Yataitapaaquero inchato anta otsapiqui, anta inquenanaquenta Jesoshi. Iramenavaqueri inquenapaaque ishaaviji. ⁵Ari yareetantapaacari Jesoshi, yamenapaaque jenoqui, ineapaqueri, icantiri:

—Saqueo, pishintsite paniireapaaje. Nocoaque meeca nosavique pivancoqui.

⁶Ari ishistsaque yaniireapaaji, icantakeri:

—Tsamequeti novancoqui.

Ari oshequi iquimoshiretanaque Saqueo, ⁷iro cantaincha iquisajeitanaca amenajeitaqueriri. Icantajeiti:

—Te incameetsanirotejive yora. ¿Paita ijatashtantariri Jesoshi anta ivancoqui?

⁸Ari iquempejitasanotapaacari Saqueo Jesoshi, icantiri:

—Novincatsarite, meeca nompaaranta-jeitajeri ashinoncaincari cashetani timimojeitanari. Itimirica atiri namatavittiri nocoshitancariri, noimpajeneri maaroni, aisati nompajeri aisati. Ocaratrica aparo nocoshitaqueri, nompajeri 4.

^{9,10}Ari icantiri Jesoshi:

—Meeca quitateri paviscotajiri, aisati iraviscotaje pishaninca aca pivancoqui. Noponeaca narori inquitequi, natiritapaaque: nocoaque namenacaajeitajeri ashinoncaajeitachari, nocoaque noavisa-cojeitempi maaroni. Tempa aviro ishanincani Avaramani.

Yora Jesoshi iquenquetsatacotiri pincatsari paqueriri ishaninca quirequi.

(Mt. 25.14-30)

¹¹Ari iquemajeitaqueri atiripee icantakeri Jesoshi. Aisati iojeitaque irotaintsi irareetea Jerosarequi. Ijitashi-

jeitaca irotaintsi meeca impoqe
Tasorentsi impincatsariventante aca
quipatsiqui,¹²irotaque ishiacantiniriri
oca:

—Itimini aparoni shirampari, pincatsa-
rivetachari. Impoiji icajemaqueri pashini
pincatsari anta pashiniqui quipatsi. Ari
irijatanaque, impeaqueri pincatsarisanori
impincatsariventanteariri ishaninca anta
inampiqui.¹³ Ari irotaintsi irijate,
icajemaqueri iratirite caratatsiri 10,
ipajeitaqueri oshequi quirequi.

Icantiqueri: “Jerica aparoni quirequi,
ipinataca oshequi. Nocoaque piomparije-
tea. Ariorica nompiaje, namenapaajeri
jaoca incarate quirequi pampatotenari”.¹⁴
Ari ijatanaque impeantajeari pincatsari.
Iro cantaincha te impincatsajeiteriji
ishaninca, oshequi iquisajeitaqueri.
Itiancayevetacari aparopee ishaninca,
icantavetacari yora itsipapee pincatsari:
“Te nonintajeiteji impincatsariventajei-
tena yoranqui, te incameetsateji”.¹⁵ Iro
cantaincha ipeaqueri pincatsari, impoiji
ipianaja impincatsariventanteariri.

Icajamacantajeitaqueri iratiritepee: yora
ipajeivetari iirequite. Isampijeitaqueri:
“¿Pishequiaquenarimpa noirequite?”¹⁶
Ari icantiri yora jivatatsiri: “Pamene,
meeca noshequiasanotaqueri quirequi.
Aparo ishequiasanotanaque, icarataque
meeca 10”.¹⁷ Ari icantiri pincatsari:
“Cameetsataque. Oshequi piotaque.
Piquearioventaquenaro capichaji. Meeca
nompeaqueMPI pincatsariventeroneri
oshequi nampitsi, oncarate 10. Pinquea-
rioventenaro pimpincatsate”.¹⁸ Ari
ipocapaaque itsipapee, icantajeitapaa-
queri: “Jerica piirequite. Pipaquetanari
aparo, meeca icarati apapacoroni”.

¹⁹Icanti: “Ari pimpincatsariventeri atiri
savcatsiri apapacoroni nampitsi”.

²⁰Impoiji ipoquaque itsipa aisati, icanti:
“Novincatsarite, jerica piirequite
pipaquetanari chapinqui. Noquempoyea-

quempi novaniotequi.²¹ Oshequi
notsaroacaquempi, niotaque oshequi
pipincatsaritaque. Paapitsatiri itsipapee
yashiyetari, aisati paayetiro oitsoqui
caari pipanquiti”.²² Impoiji icantaqueri:
“Te pincameetsateji, te pimatenojji
nocoacaavetaquempi. Picantavetana:
‘Oshequi pipincatsariti, paapitsatiri
itsipapee yashiyevetari, paayetiro
oitsoqui caari pipanquiti’. Ari pioveta,
irotaque noquisantaquempi meeca.
²³ ¿Paita caari poantari noirequite
vaancoqui? Poaquerime anta, ari
intimeme meeca noirequite, aisati itsipa
quirequi impaquerarime yora quempo-
yeajananariri”.²⁴ Irosati icantantari yora
catiaeitainchari: “Paapitsatajeri
noirequite. Pimperi yora ashitariri 10”.
²⁵ Ari icantajeivetari: “Novincatsarite,
oshequi iirequite meeca. ¿Paitaquea
pimpashitanteariri itsipa aisati?”
²⁶ Yacanaqueri: “Noncamantempi,
intimerica ashitaarantayetachari,
nompajeri aisati. Irinti yora caari ashita-
rantacha, naapitsatjeri ora capichaji
timimovetariri.²⁷ Aisati itimi quisaque-
nari caari coatsine impincatsajeitena.
Pamajeitaquenari, namenacojeitempuri
poajeiteri”.

Irootaque iquenquetsatacaaajeitiriri
Jesoshi atiripee.

Yareetapaaja Jesoshi Jerosarequi.

(Mt. 21.1-11; Mr. 11.1-11; Joa 12.12-19)

²⁸ Impoiji yovaanaja aisati Jesoshi, irijate
Jerosarequi.²⁹ Irotapaintsi irareetearo nampitsi
pajitachari Vetajaje aisati Vetania. Ottimi anta
toncaariqui pajitachari Orivomashi. Impoiji
itianquiri iroamere apite,³⁰ icantaqueri:

—Pijate anta nampitsiqui, pineapaa-
queri voro itsatacota anta. Tequera
inuijacoyeeteari. Pintsatacoreapaaqueri,
pamaquetanari.³¹ Ariorica irisampiyee-
tempi: “¿Paita pitsatacoreantariri?” Ari
pincanteri: “Icoaqueri Avincatsarite”.

³²Ari ijajeitanaque apite, ineapaaqueri icantaqueriri Jesoshi. ³³Ari itsatacoreapaqueri. Irosati isampitantacari ashitariri:

—¿Paita pitsatacoreantariri novorote?

³⁴Yacanaqueri:

—Icoqueri Avincatsarite.

—Ari, paanaqueneri.

³⁵Ari yaanaqueri anta Jesoshiqui.

Yoanquetaqueneri imititsaqui iitsaarepee irisavicanteari Jesoshi, impoiji iquijacotanacari. ³⁶Ari yovaacotanaja anta avotsiqui, yoajeitiniri atiripee iitsaarepee avotsiqui, iraniitantanaqueari voro. ³⁷Ari intanacaro meeca yoirincacotanaja. Yojajeitanaqueri oshequi quemisantajeitatsiri, iveshireimentajeitanacari, icajemajeitanaque. Icantajeitanaque:

—Tempa icameetsataque Tasorentsi. Aneajeitaqueri itasoncaventapinijeitaquee. ³⁸Icameetsataque Avincatsarite itianaqueeri Tasorentsi. Cameetsa isavicajeitaque maaroni inquitesati, ineacameetsajeitaqueri Tasorentsi.

³⁹Ari itimaiti anta variseopee, icarajeitaqueri atiripee. Icantavetari Jesoshi:

—Oametantatsiri, poimajerentajeiteri yora oijajeitimpiri.

⁴⁰Yacanaqueri:

—¿Paita noimajerentanteariri?

Ocameetsataque icantajeitaqueri. Irimaje rejeteime yocapee, irointi irineanatacaa- queme Tasorentsi mapipeeompincatsat- tantenameri.

⁴¹Ari iquempejijeitapaaque, meeca oconijatapaaque Jerosare. Iraacojeitaqueri Jesoshi savicajeitatsiri, ⁴²icanti:

—Nocoavetaca nosavicacaajeitimpime cameetsa catsini, iro cantaincha te pincoajeiteji. Pitseencajeitaquena, meeca eiro pineanatsi nompincatsariventajeitimpesi. ⁴³Coajica intime quisasanojeitempineri, inticasanojeitapaaquempi, irishon- cajeitapaaquempi soraropee, eiro ishinejeitimpitsi pinquenanaje jaocarica.

Irimanjeitempi, ⁴⁴intireajeitajero pivancopée, intireasanojeitajero catsini. Irovaaranteri savicajeitatsiri. Nopocashi- jeivetaquempi, nompincatsariventajeitimpime, iro cantaincha te pimpincatsa- jeitavaquenaji, irointi pitseencajeitava- quena. Irootaque inquisajeitatemperi coajica soraropee.

**Yora Jesoshi iquisajeitaqueri
pimantayetatsiri anta ivancoqui Tasorentsi.**

(Mt. 21.12-17; Mr. 11.15-19; Jea 2.13-22)

⁴⁵Ari yareetapaaca Jesoshi ivancoqui Tasorentsi, yaajeitapaquaqueri pimantay- tatsiri aisati amanantayetatsiri, yojocajeitaqueri saiteriqui. Itsonajeitaqueri maaroni, ⁴⁶icantaqueri:

—Tempa osanquenataca irineane Tasorentsi: “Nocoaque inquenquetsata- caapinijeitena atiri aca novancoquica, irootaque novetsicacantarorai”. Iro cantaincha avirojeitaque amatavitanta- tsiri, pipeaquero pivanco avirori.

⁴⁷Impoiji ipiapinita maaroni quitaiteri ivancoqui Tasorentsi, yoametantapinita- que. Iro cantaincha iquisajeitaqueri yora jivatacaaajeitiriri saserotepee, yora oametantirori isanquenaren Moishishi, aisati yora pincatsariventajeitiriri savicajeitatsiri. Isampitavacaajeitaca:

—¿Jaoca ancanteriri Jesoshi, avacan- tanteariri?

⁴⁸Iro cantaincha te iriojeiteji jaoca incanteriri, tempa itimi oshequi atiri pincatsajeitiriri, quemisantajeitiriri.

**Isampitiri Jesoshi: “¿Janica
tiancaquempi?”**

(Mt. 21.23-27; Mr. 11.27-33)

20 ¹Ari pashini quitaiteri itimi Jesoshi anta ivancoqui Tasorentsi yoamejeitaqueri atiripee, icamantaqueri jaoca incantajeiteari iroavisacotantajeari. Ari ipocajeitaque yora jivatacaaajeitiriri saserotepee, yora oametantirori

sanquenarentsi, yora jivatacaa jeitantsi, maaroni.² Icantajeitapaqueri:

—Pincamantajeitena janica peaquem-piri pincatsari: ¿janica tiancaquem-piri pantayetantarori oca?

³Yacanaqueri:

—Aisati narori, timatsi nosampijeitem-piri. Pincamantajeitena:⁴ ¿janicampa tiancaqueriri Joa ivaotisatanti? Iriompa Tasorentsi tiancaqueriri? Terica, Iriompa tianquirirri atiri?

⁵Te irancajeiteriji, irointi icantavaca-a-jeitanaca:

—¿Paita ancanteriri? Ancanteririca: “Irio Tasorentsi tianquirirri”, icantajeitee-carí: “¿Paita caari piquemisantantari?”⁶ Irompa ancanteririca: “Irio atiri tiancaqueriri”, tempa inquisajeitaquee atiripee. Ipitseecari. Icantajeitaque iriori itiancaqueri Tasorentsi Joa ivaotisatanti.

⁷Ari impoiji icantajeiti:

—Te niojeiteji janicarica tiancaqueriri Joa.

⁸Irosati icantantari Jesoshi:

—Aisati narori, eiro nocamantimpitsi janica tiancaquenari.

Yora Jesoshi iquenquetsatacotiri yora panquitirori ova.

(Mt. 21.33-44; Mr. 12.1-11)

⁹Impoiji aisati iquenquetsatacaajeitiri Jesoshi atiri, jero oca ishiacantiniri:

—Itimini panquitirori ova anta iipatsitequi. Impoiji icantakeri iratirite: “Pamenenarorica, coajica ariorica oitsoquitanaque, paaqueyea avirori cashetani oitsoqui, cashetani pimpenna narori”. Icantajeiti: “Ari cameetsa”. Impoiji ijatanaque pashiniqui quipatsi, peerani ipeaca.¹⁰ Impoiji omoncarataca irayetero oitsoqui. Yora ashitarori irovate itianaque yora inampire: “Pijataite anta otiminta novate, picoacotateri yora amenanarori impaaranrena cashetani”. Ari ijavetaca, iro cantaincha iquisajeita-

vaqueri, ipasanatavaqueri, yoipiavajiri. Tecatsi impavaqueri.¹¹ Impoiji itiancaveta-cari pashini inampire, iro cantaincha ishirontimentavacari, ipasanatavaqueri, yoipiavajiri. Tecatsi impavaqueri.

¹²Impoiji itiancavetacari pashini aisati, iro cantaincha ipasanayetavaqueri, tac, tac, oshequi irirajanive. Yojocanajiri aisati.¹³ Iotantacari yora ashitarori, icanti: “¿Paita nanteri meeca? Irioyeata nontianqueri notomi nonintasanotiri. Ariorica irineajeitavaqueri irinti, impincatsatavaqueri”. Ari itiancavetacari iriori.¹⁴ Ineantajeitavacariri, icantavaca-jeitanaca: “Pamenerite itomi ashitarori iipatsite. Ariorica incame iriri, irotaque ashitajearoneri. Tsame avavaqueri, impoiji ashijeitajearo ainti quipatsi”.

¹⁵Ari yaajeitavaqueri, shepi. Yaajeitana-queri anta ocaratapaaque iipatsite, yoajeitaqueri, shemi.

Irotaque iquenquetsatacaajeitaqueriri Jesoshi. Impoiji isampijeitiri:

—Aamaaca, ¿jaoca incanteriri yora ashitarori iipatsite?¹⁶ Tempa irijate iriori, inquisasanojeitaqueri tsamevetanariri iipatsite, iroapaaqueri. Impoiji iramenaje pashini tsameetajenerine.

Ari icantajeiti quemajeitaqueriri:

—Te oncameetsateji irimajeitero oca, eiro ishinetiritsi Tasorentsi.

¹⁷Yamenajeitaqueri Jesoshi, icanti:

—¿Pijivetacampa eiro imatirotsi?

—Paitampa otimantacari oca sanquenaren-tsi? Tempa ocanti: “Itseencaquero yora vetsicavetarori pancotsi otincami, yojocajiro. Iro cantaincha ipeaquero Tasorentsi antearo otincami pancotsi”.

—Paita oshiacantiri?¹⁸ Incarajaque maaroni pariatsiri mapiqui, ariorica ontsinacapaaqueri atiri oca mapi, ompeaqueri ovane quipatsi, ontsonca-queri. Narotaque shiaquerori mapi: nompoyereajeitaqueri maaroni quisajeita-quenari.

Yoametiri Jesoshi atiri inquemisanteri pincatsari aisati inquemisanteri Tasorentsi.

(Mt. 21.45-46; 22.15-22; Mr. 12.12-17)

¹⁹Yora jivatacaa jeitiriri saserotepee, aisati yora oametantirori Sanquenarentsi icoajeiveta irayerime meeca Jesoshi, tempa ioejtique que ashiaqaventiri iringi. Irayerime, iro cantaincha itsaroacaajeita- cari atiripee, icanti: “Eiro airitsi, quisacoventaricari ashanincaepe.”

²⁰Impoiji itiancaqueri saserote ishaninca:
—Meeca pijate pamatavitateri yora Jesoshi. Pishiaccantamempeapeempa picoaque pinquemisanteri, iro cantain- cha, pincomitacayeari irineane. Ariorica incomitanaquearo incanteri, pishintsite pimpoque pincamantapeena. Impoiji ancamanteri pincatsari icantaqueri.

²¹Ari ijatashitaqueri Jesoshi, icantapa- queri:

—Oametanari, niojejtique queeariota- sanotaque maaroni picantaquenari aisati maaroni poametaquenari. Te pamenashi- teariji ashaninca piotanteari icameetsati- rica, irointi piotasanotaqueri iquenque- shiretiri. Aisati cameetsa poamejeitaque- naro icoacaajeitaquenari Tasorentsi.

²²Meeca pincamantena: ¿ocameetsatimpa ampajeteri yora ivincatsarite oromasati airequite icoacotaqueeri? ¿Eirompa apiritsi?

²³Ari iotaqueri Jesoshi icoajeiveta iramataviterime. Icantiri:

—¿Paitaquea picoantari pincomitacaye- naro noneane? ²⁴Ponaijayanari iitsoqui piirequite. ¿Janica ishiavorotaqueri aca quirequipi? ¿Janica ashitarori ivajiro isanquenataqueri?

Yacanaqueri:

—Iro ivoro ivincatsarite oromasati, aisati osanquenataca ivajiro: yora Sesari.

²⁵Ari icantiri Jesoshi:

—Ocameetsataque pimpincatsateri yora Sesari, iro cantaincha ocameetsata-

que aisati pimpincatsatasanoteri Tasoren- tsi.

²⁶Tecatsi icantajeitea incomitacayeari irineane Jesoshi, cameetsa yoametantasa- notaque. Yoajeitanaqueri cavaco yora amataviterinemerri, irootaque imajerejei- tantacari. Tecatsi incantajeri aisati.

Yoamejeitiri Jesoshi saroseo: “Queario intinaajeitaje camayetainchari”.

(Mt. 22.23-33; Mr. 12.18-27)

²⁷Impoiji ijatashitaqueri saroseo Jesoshi. Icantaque iringi saroseo eiro itinaajeitajatsi camayetatsiri, eiro ijajeititsi inquitequi. Ari icantapaaqueri:

²⁸—Oametanari, peerani isanquenata- queroni Moishishi. Icanti ariorica iraavetearo shirampari ijina, impoiji incamaque. Eiroricia itimacairo ijanane- quite, cameetsataque iraajero irirentini. Impoiji intimerica otomi irishiacantajeri itomini irirentini. ²⁹Ariorica itimi shirampari irirenti 6. Yaavetaro ijina, impoiji icamaque. Te intimeji itomi.

³⁰Impoiji yaavetajaro iringi irirentini. Aisati te intimacayeroji ijina itomi, impoiji icamaque iringi, toren. ³¹Aisati iquempetaca pashini irirentini. Yaaveta- jaro tsinane, impoiji aisati icamaque. Aisati iquempejeitaca maaroni irirentini. Tecatsi timacayerone otomi. ³²Ari imoitanaque iroori tsinane, ocamaque.

³³Meeca pincamantena: queariorica intinaajeitanaje maaroni camajeiveta- chari, ¿janica jinantajearone oca tsinane? Tempa icarajeiveta aayevetaroniri 7.

³⁴Ari yacanaqueri Jesoshi:

—Queario, aca quipatsiqui yamejeitacaro shirampari yairo ijina. Aisati tsinanepée aajeiti ojime. ³⁵Ari iroitintaajeitajeri Tasorentsi maaroni atiri ineacameetsatiri, iro cantaincha anta inquitequi eiro yaajitsi ijina. Aisati tsinane, eiro aaajitsi ojime.

³⁶Aisati eiro anta icamajitsi aisati, inquem- pejeiteari maaroni inampireee Tasorentsi,

saviquimojeitiriri: te incamajeiteji iriori. Icantani yaneajeiti. Aisati intomintasanajojeteari maaroni atiri yora irointinaajeitajeri. ³⁷Peerani iotitani Moishishini intinaajeitajane camayetatsiri. Iquenquetsatacotantarori totseequi otaavetaca, iquenquetsatacotocri aisati Avincatsarite. Icantini: “Iquemisantiri Avarama Tasorentsi. Aisati Isaca iquemisantaqueri, jeri aisati Jacovo”. ³⁸Pinequiero, te incanteji: “Iquemisantaveitarini Avaramani”. Yaneanaji Avarama aisati itsipapee, irootaque icantantacari: “Iquemisantiri”.

³⁹Impoiji icantayetiri aparopee oametantirori sanquenarents:
—Oametanari, cameetsa oca picantaqueriri.
⁴⁰Ari itsaroacaajeitacari irisampitajerime aisati.

Yora Quirishito irio ishanincani Iravirini.

(Mt. 22.41-46; Mr. 12.35-37)

⁴¹Pashini aisati icantaqueri Jesoshi: —¿Paita picantajeitantarí: “Iriotaque Quirishito ishanincani Iravirini”? ⁴²Tempa peerani ipampoyeaventirini Iravirini Tasorentsi, isanquenataquero oca: “Yora Tasorentsi, icantaqueri novincatsarite: ‘Notomi, pisavique aca nacosanoríqui, pincaratena ampicatsarijeite’, ⁴³irosati impincatsajeitantempiri maaroni quisajeive-taquempiri”. ⁴⁴¿Iriompa Quirishito ishanincani Iravirini? Iriorica ishanincani, ¿paita icantantariri peerani: “Novincatsarite”? Te pamejeivetearoji pimpincatsajeiteri impositatsiri itimi.

Icanti Jesoshi: “Paamayeariyea oametantirori sanquenarentsí, yamatavitimpicari”.

(Mt. 23.1-36; Mr. 12.38-40; Ir. 11.37-54)

⁴⁵Impoiji iquemajeitaqueri atiri Jesoshi, yoamejeitaqueri iroamerepee, icantaqueri:

⁴⁶—Paamayeariyea yora oametantajeitiori sanquenarentsí. Oshequi icoaque

inquenaquenatsantsanayete. Icoaque aisati cameetsa iraacameetsajeitavaqueri ishaninca anta nampitsiqui. Aisati anta pancotsiqui apatojeitaptapinitari, icoaque irisaviquimotapiniteri pincatsaripee. Aisati ariorica yampatojeita atiri yoajeita, icoaque quiso iroapiniteri pincatsaripee. ⁴⁷Oshequi ishiacantanirota. Osamani iquenquetsatacaa-mempeacari Tasorentsi. Icoaque irijitashijietanteariri ishaninca iquemisantasanoti. Iro cantaincha yamatavitapinitiro camajimentaaro, icoshitantarori timimojeivetarori. Quearioque oca noncamantempiri: iroasanquetaasanojeitaqueri Tasorentsi, catsini.

Iquenquetsataciro Jesoshi tsinane paqueriri Tasorentsi maaroni timimovetarori.

(Mr. 12.41-44)

21 ¹Ari isavicaque Jesoshi anta ivancoqui Tasorentsi. Yamenayeta-vaqueri ashitaarantincari yamayetaqueri irequire anta inantariqui quirequi. ²Aisati inequiero camajimentaaro amaqueri apite itsoqui quirequi, caari pinatacha. ³Icanti: —Queario oca noncamantempiri: pitseenquitirocari yoca amaqueri oca camajimentaaro. Oshequi ineacameetsat-tacaro Tasorentsi yoca amaqueri, anaaco-taqueri yamatavetacari yora ashitaaran-tincari. ⁴Oshequi ivinaro yamatavetacari iriori, iro cantaincha itimaarantaque oshequi catsini iquempoyeanontavajari iriori. Irompa oca, amaqueri maaroni timimovetarori, te aneajeriji timaaranta-jantsine, tecatsi amanantantearori oyeari.

Icanti Jesoshi:

“Coajica intreetajero ivanco Tasorentsi”.

(Mt. 24.1-3; Mr. 13.1-4)

⁵Ari iquenquetsatavacaajeitaca iroame-repee, icantajeiti:

—Tempa ocameetsatasanotaque ivancoca Tasorentsi. Aisati maaroni mapipee

yovetsicantacarori, ocameetsajeitaque, aisati maaroni yoaneencajeitancarori anta otantoqui.

Iquemantajeitacariri, icantiri Jesoshi:

“—Coajica intireetajero maaroni oca pineacameetsajeitiri meeca. Irojoqueeta-jero mapipeeca arejiqui.

“Ari isampijetaqueri:

—Jaoca oncarate omoncaratanteari oca picantaquenari? Aisati, ɿpaita iotacaayenaneri irotaintsi omoncaratea?

**Icantiri Jesoshi: “Coajica
ompomerentsitimoteari atiripee”.**

(Mt. 24.4-14; Mr. 13.5-8)

“Icantaquequi:

—Paamaya, yamataviyeetimpicari. Impoque osheequi atiri cantempineri: “Naro nanti Quirishito”. Pashini incante: “Itiancaquena Quirishito noncamantempi irotaintsi impoque”. Iro cantaincha eiro piquemantisriti. ⁹Pinquemapiniteri atiri incante irimanatavacaajeitea atiripee, aisati irojocajeiteri ivincatsarite. Iro cantaincha eiro pitsaroajeititsi. Aitaque incanteari inquisavacaapinijeitea, iro cantaincha tequera omoncarateaji.

“Jero pashini icantaquequeri aisati:

—Yora atiripee irimanayeteri itsipapee atiri. Yora savicayetatsiri aparopeequi nampitsi irimanateri yora savicayetsiri pashinipeequi nampitsi. ¹¹Aisati osheequi onicasanotanaquea quipatsi. Aajeiteri atiripee itashe, osheequi incamajetaquea; aisati iroquoijijeitea itsipapee atiri, incamaarantayetanaque iriori. Aisati, anta inquitequi pineaquero caari pineapinijeiti, osheequi pintsaroacayearo.

Yora Jesoshi icantaquequi iroamere:

“Coajica iraajeitanaquempi,
inquisajeitempi atiripee”.

(Mt. 24.9-14; Mr. 13.9-13)

“Aisati icantajeitiri:

—Iro cantaincha irijivayeetempi inquisanayeeitempi. Iraajeitanaquempi anta pancotsiqui yapatojeitancarori, aisati

iroiminqueayetempi caravosoqui.

Iraajeitanaquempi aisati anta pincatsari-peequi, inquisatsajeitempi: “ɿPaita piquemantisantirotantariri Quirishito?”

¹³Iro cantaincha eiro pitsaroacaaritsi yora quisavetempineri, irointi pincamantaje-teri jaoca nocanta noavisacojeitaquem-piri. ¹⁴Eiro piquenqueshiretitsi: “Ariorica irayeetena, ɿpaita noncanteriri?”

¹⁵Ariorica iraanajempi noamejeitempi nainti paitarica pincanteriri. Eiro imatiros-ti yora quishempineri impiatsatempi.

¹⁶Noncamantempi: iraacantempi piripee, piniropee, parentipee, pitsiropee, pishanincaphee, maaroni. Iroaarantempi aparopee. ¹⁷Iriojeitanaque atiri piquemisantaquena, irootaque inquisajeitante-mpiri. ¹⁸¹⁹Iro cantaincha ariorica quiso poyena aisati pinquearioventenaro maaroni nocantajeitaquemppiri, nonquem-poyeasanojeitaquemppi. Tecatsi catsini incantajeitempi yora quishempineri, eiro yaapitsatimpirotsi aparoni piishi. Aisati pincantaitatiyempani pintime inquitequi.

Icantiri Jesoshi:

“Yora soraro intsoncajeiteri jerosaresati”.

(Mt. 24.15-22; Mr. 13.14-20)

“Aisati icantiri Jesoshi:

—Ariorica pineajeitavaqueri soraro irishoncajeitaquearo Jerosare, ari piojeitanaque irotaintsi intsoncajeitajero pinampi. ²¹Ocemeetsati irishiajeitanaque toncaariqui maaroni savicajeitatsineri. Aisati maaroni savicatsineri Joreaqui, irishiajeitanaque. Aisati yora jayetatsineri oantsipeequi, eiro ipiajeitanaja nampitsi-qui. ²²Aitaque omoncarataquea maaroni oca isanquenatiniri peerani: “Iroasanque-taasanojeiteri Tasorentsi maaroni tseencajeitaqueriri”. ²³Ashinoncaajeitana-quea maaroni tsinane tsomonteyetatsi-neri, aisati maaroni antsotaayeterineri ojananequite. Osheequi irineacatsiyetearo yora savicajeitatsiri. Osheequi iroasanque-

taajeiteri Tasorentsi. ²⁴Irimanajeiteri oshequi atiri, incamaarantayetanaque. Itsipapee iroisoyeteri, iraanajeri otsipapeequi quipatsi. Intime pashinipee atiri Jerosarequi peerani, irosati incantanteari Tasorentsi: "Moncarataca".

Iquenquetsatacotaja irisati Jesoshi, jaoca oncanteari ariorica impiaje.

(Mt. 24.23-31; Mr. 13.21-27)

²⁵Jeroca icantiriri aisati Jesoshi: —Pineajeitavaqueri impashinijeitanaque inquitesati: yora catsirinaiteri, cashiri, impoquieropee, maaroni. Pineero caari pineapinijeiti. Aisati intsaroajeitanaque maaroni atiri, inquemajeitavaqueri oneajatanaque antearoja incajare, soooo. Aisati irineavaqueri antearoja otavoncrajare. Iramenajeitavaqueri, sorererere. ²⁶Eiro iojeitsi atiri jaocarica incanteeteriri, irootaque intsaroasanojetantanaqueeari catsini. Irishevayetanaquea impoquiero. ²⁷Impoiji pineajeitavaquena, nompiaje aisati. Tempa noponeaca peerani inquitequi, natiritapaaque. Ariorica nompiaje aisati, nonquenapaaje mencoriqui, nontasorentsitasanotapaaque, nompincatsaritasanotapaaque.

²⁸Ariorica pineajeitavaquero oca nocanta-jeitaquempi, piveshireajeitanaquea, pamenejaitavaquena: irotaintsi noavisa-cotasanojeitempi.

Icanti Jesoshi:

"Irotaintsi impoqua Tasorentsi".
(Mt. 24.32-35; Mr. 13.28-32)

²⁹Impoiji ishiacantiniri oca:
—Ari pamenero iyera, jaoca ocantari. Terica iyera, ari pashini inchato pamenero. ³⁰Ariorica ontimayetanaje oshi, eereshitanaje, ari piojeitaque irootimatajantsi onquimojantsitaje.
³¹Aisati oquempetaca, ariorica pineaqueri omoncarataquea maaroni nocamantitanaquempi, piojeitaque

irotaintsi impincatsariventasanojeitempi Tasorentsi. ³²Ariorica pineajeitavaquero intanaquea oca nocamantaquempi, ari eirotsitarica picamitsi, aitaque pineajeitavaquero omoncarataquea maaroni.

³³Coajica, peerani, ompeanaquea quipatsi aisati impeajeitanajea maaroni inquite-quiniri: cashiri, catsirinaiteri, impoquieropee, maaroni. Iro cantaincha eiro opeimatatsi irointi noneane catsini.

Icanti Jesoshi: "Paamaasanojeitajena".

(Mt. 24.36-44; Mr. 13.33-37)

³⁴Aisati icantiri:

—Paamaasanojeitajena: nomapoca-paimpicari. Piquenqueshiretirocari caari cameetsatatsi. Pishinquejiteacari. Piquenqueshiretapiñitrocari timajeitatsiri aca quipatsiqui. ³⁵Aitaque nomapocapaaqueri maaroni savicajeitatsiri quipatsiqui. Iroashinoncaajeitea maaroni caari aamaventajeitachane. ³⁶Paamaventea. Aisati pincanteri Tasorentsi iramatac-tempi cameetsa pareejitajenari, eirota piquematsicatarotsi maaroni oca nocamantaquempi.

³⁷Ari maaroni quitaiteriqui yoametantaque Jesoshi anta ivancoqui Tasorentsi. Maaroni tsiteniriqui ijatapiniti anta toncaariqui ipajiyeetiri Orivomashi.

³⁸Aisati maaroni quitaiteriqui ijajeitamanaji atiripee ivancoqui Tasorentsi iquemisantapinijeitiri.

Yoametavacaajeitaca saserotepee jaoca incantajeiteriri iraacantajeitanciariri Jesoshi.

(Mt. 26.1-5, 14-16; Mr. 14.1-2, 10-11;
Joa 11.45-53)

22 ¹Irotaintsi quitaiteri yoapinijeitantarori tanta caari iconoyeeti tapiacairori. Yapiitapinijeitiro jorioopee maaroni osarintsi iquenqueshireantarori peerani anta Ejipitoqui yavisajeitanajiro oantatsiri ivancopee. ²Ari yoametavaca-

jeitaca yora jivatacaajeitiriri saserotepee
aisati yora oametantajeitirori sanquenarentsi:

—¿Jaocasa ancanteriri Jesoshi avantea-
riri? Aamaaca ari inquisacotanaqueari
atiripee.

³Impoiji yora Satanashi ishintsinata-
queri Jorashi Ishicariote, yora yoameve-
tacari Jesoshi: yoametaqueri iraacanteri.

⁴Ari ijatashitaqueri yora saserotepee,
icantapaaqueri:

—Namitacotempi paacanteri Jesoshi.

⁵Iquemantavacariri, iquimoshirejeita-
naque, icantajeitavaqueri:

—Ari, cameetsa. Ariorica ayeri, ari
nompinatempi quirequi.

⁶Icanti:

—Ari. Namenasanoteri, impoiji
noncamantempi jaoca pincanteari
pimanacanteariri paacanteri. Eiroquea
ineajeitirtsii atiripee.

Yora Avincatsarite yoacaacari iroamerepee. (Mt. 26.17-19; Mr. 14.12-16)

⁷Ari moncarataca meeca vieshita.
Meeca yoacaajeitacari atiripee ovisha,
iquempetacari ishaninca peerani anta
Ejipitoqui. ⁸Ari Jesoshi itiancaqueri
Petero aisati Joa, icantavaqueri:

—Pijate povetsicajeitapee avajeiteari,
anquenqueshirejeiterota yavisantanacari
peerani oamaantatsiri.

⁹Isampitiri:

—¿Jaoca picoaqueri novetsiquerori?

¹⁰Yacanaqueri:

—Ariorica pareetea nampsiqui,
pineapaqueri shirampari yaacotanajiro
nija. Pojatanaqueri anta pancotsiqui,
jaocarica inqueapaajeri. ¹¹Pincantapaa-
queri yora ashitarori ivanco: “Icanti
Avincatsarite: ‘¿Jaoca noacayeari
noamerepee?’” ¹²Ari ironijayempiro anta
oshitamenconta jenoqui. Ovetsicajei-
taca asavicajeitanteari. Ari povetsicajei-
tero avirori avajeiteari.

¹³Irosati ijajeitantanaca, ineajeitapaa-
quero icantaqueri Jesoshi. Yovetsicajei-
tapaquaquiero yoari.

Yora Jesoshi yoamejeitaqueri iroamerepee iroimentapiniteari tanta.

*(Mt. 26.20-29; Mr. 14.17-25; Jea 13.18-30;
I Cor. 11.23-26)*

¹⁴Impoiji yareejitapaaca maaroni,
yoajeitapaaaca. ¹⁵Impoiji icantajeitaqueri
Jesoshi:

—Oshequi nocoitacani tequeratani
noncame, nontsipajetanajempita meeca
tsiteniriquica noacaajeitanajempita tanta.
¹⁶Noncamantempi, eiro napiitajirotsi
noajearo aisati aca quipatsiqui. Aintiquea
noapaajearo anta ipincatsarintina
Tasorentsi.

¹⁷Ari yaaquero tsota, ipasonquitaqueri
Iriri, impoiji icanti:

—Paacojeitavaquero oca, pirajeitero.

¹⁸Noncamantempi: eiro nirajirotsi ovaja
aca quipatsiquica. Aintiquea nirapajajero
aisati anta ipincatsarintina Tasorentsi.

¹⁹Impoiji yaaquero tanta, ipasonquitiru
Iriri. Icarajaquero, ipajeitaqueri iroamere,
icantiri:

—Jero oca tanta, poajeitearo. Narota-
que camimentajeitempineri. Nocoaque
poapinitearo tanta pinquenqueshiretapi-
nitantenari nocamimentajeitaquempi.

²⁰Ari yoajeitaca, maaroni. Impoiji
ipacojeitaqueri ovaja aisati. Icantajeitaqueri:

—Ariorica pirero oca, nocoaque
piojeite nocamantajeitaquempi noavisa-
cojeitempi. Irootaque niraja amparajati-
mentajeitempineri, noncamimentajei-
tempi noavisacoeitantempiri.

²¹Impoiji icantajeitaqueri:

—Timatsi acarajeitaqueri meeca
avajeitaca yora aacantenaneri iroacantan-
tenari. ²²Noponeaca inquitequi, natirita-
paaque noncamimentajeiteri maaroni
atiri, iro cantaincha irashinoncaasanoita-
quea yora aacantenaneri iroacantena.

²³Iquemantajeitacariri, isampitavacaajeitaca:

—¿Janicampa aacantaniroterineri?

Yoamejeitaqueri Jesoshi iroamerepee jaoca incanteari impincatsaritanteari.

(Mr. 10.42-45)

²⁴Ari anta icantavacaajeitanaca iroamerepee:

—¿Janica coajica jivatacaajeiteeneri?

¿Janica anaacojeiteeneri impincatsaritansonot? ¿Naroitatsimpa jivatacaajeitajepine?

²⁵Ari icantiri Jesoshi:

—Yamejeitaro yora atiripee ipincatsa-jeitaqueri ivincatsaritepee, iro cantaincha iperanatapinijeitacari pincatsari ishanin-capée. Jero icantashijeitaca: “Nintacojeitacari natiritepee”. ²⁶Iro cantaincha eiro piquempejitaritsi. Ariorica picoaque pimpincatsariventante, eiro pishemetitsi, irointi pamitacotapiniteri itsipapee.

²⁷¿Janica ipincatsatasanotiri atiri?

¿Yorampa vetsicapinitiniriri yoari? Teve. Tempa ipincatsayeetiri yora peranajeitiriri inampirepee. Iro cantaincha te nomperanajeitempiji nainti, irointi nintacojeitaquempi. ²⁸Quiso poajeta-quena peerani, piojeitaque opomerentsiti-motapinijeitaquee. ²⁹Irootaque nocantantimpiri meeca: oquempetaca incantena Apa nompincatsaritante, aisati noncantajeitempi pimpincatsarijeite. ³⁰Pincaratapinijeitena avapinijeitea aisati irapinijeite anta nompincatsaritenta, aisati ampinca-tsariventajeiteri maaroni joriopee.

Icantiri Jesoshi Petero:

**“Meeca tsiteniriquica pincantapinite:
“Te noneeriji Jesoshi”.**

(Mt. 26.31-33; Mr. 14.27-31; Joa 13.36-38)

³¹Aisati icantiri Avincatsarite:

—Shimo, yora Satanashi icantaqueri Tasorentsi icoaque irineantempi, riotanteari piquemisantasanotirica.

Queariomphia, icoaque irantacayempiro caari cameetsatatsi. ³²Iro cantaincha noncanteri Tasorentsi iramitacotempi eiroquea pojocasanotantarotsi piquemisanti. Coajica, ariorica pinquenqueshire-reempa aisati pinquemisantajena, pinquenqueshiretacaajeiteri maaroni piyemisantaririnte, pinquemisantacaasanojeiteri.

³³Yacanaqueri Shimo:

—Tempa aviro novincatsarite, quiso noanaquempi; ariorica iroiminqueetempi, eiro nojoquimpitsi. Iroiiminqueetenata narori. Ariorica iroyeetempi, nontsipata-sanotanaquempi. Iroyeetenata narori.

³⁴Icantaqueri:

—Noncamantempi: meeca tsiteniriquica, eirotstarica ineaji teapa, oncarate mava pincante: “Te noneeriji Jesoshi”.

Icanti Jesoshi: “Irotantsi omoncaratea isanquenatacotaquenaniri peerani”.

³⁵Impoiji icantajeitiri Jesoshi iroamerepee:

—Peerani notiancajeitaquempi piquen-quetsatacrica jeitaqueri atiripee. Nocantajeitavaquempi: “Eiro paanajirotsi pitsarate, piirequite, aisati otsipa piitsaare”. Meeca nosampijeitempi: “¿Pashinoncaajeitanacampa? ¿Otima-quempa coiteimojeitaquempi?”

Yacajeitanaqueri:

—Te. Tecatsi.

³⁶Impoiji icantajeitaqueri:

—Meeca noncantajeitempi: ontimerica pitsarate, paanajero. Intimerica piirequite, paanajeri. Terica ontme pivesamento, pimpimantero poicoro pamanantantearori aparoni. ³⁷Aitaque omoncarataquea isanquenatacotaquenaniri peerani Isayashini: “Iroyeeteri, inquempetacanteeteri oayeri”. Queario, ontsatacrica maaroni isanquenatacotaquenaniri peerani yora quenquetsatacantantatsiniri.

³⁸Impoiji icantajeitiri:
—Jero oca, Novincatsarite: apite
ocarati avesamento.

Yacanaqueri:
—Ari, moncarataca.

**Ari anta Jetsemaniqui
iuenquetsatacairy Jesoshi Iriri.**
(Mt. 26.36-46; Mr. 14.32-42)

³⁹Impoiji isoquijanaji Jesoshi, ijatanaji
anta ijatapinitinta: anta toncaariqui
pajitachari Orivomashi. Yojajeitanaqueri
iroamerepee. ⁴⁰Ari yareejeitapaaca,
icantajeitaqueri:

—Meeca pincantajeiteri Tasorentsi
iramatacojeitantempiri: pantirocari caari
cameetsatatsi.

⁴¹Impoiji ari ijataque Jesoshi apaniro
aiquetiji ara. Itiyeroapaaca, iuenquetsa-
tacairy Iriri:

⁴²—Apa, pincoaquerica, poavisacote-
naro oca nonquematsicataqueeari. Iro
cantaincha eiro pantirotsi nocoaqueri
narori, irointi picoacaquenari avirori.

⁴³Impoiji ipocaque aparoni inampire
Tasorentsi, intacotapaacari Jesoshi,
ishintsitantacari. ⁴⁴Oshequi iquematsica-
tarco, aiquero ijatattii iuenquetsatacairy
Iriri. Oshequi imasavitanaque, ovitejata-
naque quipatsiqui, oquempevetaca
iriraja. ⁴⁵Ari itsoncanaquero iuenquetsa-
tacairy iriri, ijatanaji anta yoisavicana-
querinta iroamerepee, ineajeitapaatiiri
maajeitaque ini. Oshequi yoashirejeita-
naca incaranqui, irootaque imaojeitanta-
cari. ⁴⁶Icantajeitapairi:

—¿Paita pimaajeitancari? Pintinaajei-
tanaje. Pincantajeiteri Tasorentsi
eiroquea pantantarotsi caari cameetsata-
tsi.

Yayeetaqueri Jesoshi.
(Mt. 26.47-56; Mr. 14.43-50; Jea 18.2-11)

⁴⁷Ainiroquera iuenquetsatacajeitiri
Jesoshi iroamere, yareejeitapaaca

oshequi atiri, ijivajeitapaquaqueri Jorashi.
Iroamere Jesoshi inaveta, iro cantaincha
icoaque iraacantajeri meeca. Ijatashita-
queri, mintavoronirotapaquaqueri. ⁴⁸Icant-
avaqueri:

—Iro pinintavoronirotantanari, paacan-
tena. Tempa piotaque naro poneainchari
inquiteequi, natiritapaaque.

⁴⁹Ari ineajeitavaqueri itsipajeitari
Jesoshi. Isampijeitiri:

—Novincatsarite, ¿picoaqueempa
nompesheri?

⁵⁰Ari ipeshitavaqueri iyempitasanori
aparoni inampire yora ivincatsarite
saserote, peti. ⁵¹Icantiri Jesoshi:

—Ari inaji, eiro pantiritsi.

Impoiji yoipiajiniri iyemrita, yoavisa-
cotajiri. ⁵²Irio itsipajeitapaacari Jorashi
yora jivatacajeitiriri saserotepee, jeri
aisati yora jivatacaantatsiri anta
ivancoqui Tasorentsi, jeri aisati
savicacaantajeitatsiri. Icantavaqueri
Jesoshi:

—¿Paita pamashitananari pivesamen-
topee aisati inchaquipee? ¿Narompa
coshinti? ⁵³Tempa nocaratapinijeita-
quempi anta ivancoqui Tasorentsi, iro
cantaincha te payenaji. Ja, moncarataca
meeca paantaquenari: meeca ipincatsari-
tanti camaari.

Icanti Petero: “Te noneeriji Jesoshi”.

(Mt. 26.57-75; Mr. 14.53-72; Jea 18.15-27)

⁵⁴Impoiji yaasanotaqueri Jesoshi, shepi.
Yaajeitanaqueri anta ivancoqui ivincatsa-
rite saserote. Osamanitanaque Petero,
yoijatacoventavetanacari. ⁵⁵Anta
pancotsiqui, ocaraiteti, yoisheetiro
paamari. Isavicajeitapaaque, icotsitajeita-
paaca yora aajeitaqueriri Jesoshi. Impoiji
itsipajeitapaacari Petero. ⁵⁶Impoiji aisati,
opoqui aparoni inampire saserote.
Ocatiapaaca, amenapaquaqueri Petero,
sorerere. Impoiji ocanti:

—Jeri yoca oijatiriri Jesoshi.

⁵⁷Icanti:

—Te nioteriji.

⁵⁸Impoiji pashini amenaqueriri, icantiri:

—Aviro oijatiriri Jesoshi.

Icantiri:

—Teve. Te noijateriji.

⁵⁹Ari osamanitapainti aisati, icantiri pashini:

—Queario yojavetacari yoca shiram-pari, tempa aisati iponeaca iriori Carire aqui.

⁶⁰Icantiri:

—Te nioteji paitarica picantaqueri.

Irosati ineantanaca teapa. ⁶¹Yora Jesoshi ipitsocashitanacari Petero, yamenanaqueri. Irosati iquenqueshiretan-tanacaro icantaqueriri incaranqui:

“Tequeratsitarica irineaje teapa, mava pincante: ‘Te nioteriji Jesoshi’”. ⁶²Ari ijatanaque Petero, iraasanotanaca, jii, jii. Oshequi yoashiretanaca, catsini.

Ishirontimentajeitacari Jesoshi.

(Mt. 26.67-68; Mr. 14.65)

⁶³Yora shentajeitaqueriri Jesoshi ishirontimentajeitacari, aisati ipasanataqueri, tac, tac, tac. ⁶⁴Impoiji ipashicaajaquitaqueri aisati ipasavorotaqueri, icantaqueri:

—Pincamantenate janica pasavorota-quempi. Iji, iji, iji.

⁶⁵Icantani, oshequi yoashinoncaaqueri, ishirontimentacari.

Iquisajeitaqueri Jesoshi yora oametavacainchari.

(Mt. 26.59-66; Mr. 14.55-64; Joa 18.19-24)

⁶⁶Ari meeca oquitaitetamanaji. Yapato-jeitamanaja yora savicacantajeitatsiri, yora jivatacaajeitiriri saserotepee, yora oametantirori sanquenarentsi, maaroni. Yaajeitanaqueri Jesoshi anta yoametava-caapinjeitanta. ⁶⁷Isampijeitaqueri:

—Pincamantenate: ¿avirompa Quirishi-totatsiri naamaajeitacari?

Yacanaqueri:

—Noncantempiricame: “Je, narotaque Quirishito”, eiro pishiretarotsi. ⁶⁸Aisati, nosampitempiricame paitapeerica, eiro pacanatsi. ⁶⁹Noponeaca nainti inquitequi, natiritapaaque. Irotaintsi nompianaje jenoqui, nosaviquimotapaajeri Apa iracosanoriqui, noncaratapaajeri nontasoncantajeitaje.

⁷⁰Isampijeitaqueri:

—¿Avirompa Itomi Tasorentsi?

Yacanaqueri:

—Je, narotaque.

⁷¹Impoiji icanti:

—¿Paita ancoanteari itsipa camantaco-terineri? Tempa aquemajeitaqueri, ijitasorentsinirotacateemi. Ainiro yantane.

Yaanaqueri Jesoshi anta Piratoqui, icantapaaqueri: “Ainiro yantane yoca namaquerica”.

(Mt. 27.1-14; Mr. 15.1-5; Joa 18.28-38)

23

¹Ari ijajeitanaque, yaajeitanaqueri Jesoshi anta Piratoqui. Oromasati ini iriori, ipincatsariventajeti-tiri joriopee. ²Icantapaaqueri:

—Ainiro yantanirotaqueri yoca. Yamata-vijeitaqueri noshanincapée, icantajeitavacare: “Eiro pipiritsi pincatsari piirequite”. Aisati icantapiniti: “Narotaque Quirishito, pimpincatsajeitena nainti”.

³Ari isampitiri Pirato:

—¿Queariompa? ¿Avirompa ivicatsa-rite jorio?

Yacanaqueri:

—Je, narotaque.

⁴Impoiji yora Pirato icantajeitavaqueri:

—Te aneroji irantane yoca.

⁵Aquiero icantajeiti:

—Iquisacaajeitacari atiripee, icantajeitavaqueri atiri: “Tsame ajocajeri avincatsa-rite”. Intanacaro anta Carire aqui, meeca iquenaquenayetiaca Jore aqui, yamatav-jeitaqueri maaroni.

Yaanaqueri Jesoshi anta Eroreshiqui.

⁶Iquemantacarori Pirato icantajeitaqueri, isampitaqueri:

—¿Iriompa carireasati yoca?

⁷Yacanaqueri:

—Je, iriotaque.

Icantiri:

—Ari, paanajeri anta Eroreshiqui.

Iriotaque pincatsariventajeitiriri carireasati. Savicatsi meeca aca Jerosarequi. Ipoqui chapinqui.

⁸Ari yaajeitanajiri anta. Ineantavacariri Eroeshi Jesoshi, iquimoshiretanaque.

Oshequi iquemacotapinitaqueri, itasoncantayetaque, irootaque icoantavetacaniri irineeri. Icoaveta irineerime intasoncantayeteme. ⁹Oshequi isampiyevetacari paitapeerica, iro cantaincha te iranqueriji Jesoshi. ¹⁰Oshequi yapiitapinitiri yora amaqueriri:

—Te incameetsateji. Ainiro irantane.

¹¹Impoiji ishirontimentajeitacari Jesoshi yora Eroeshi aisati maaroni soraropee. Impoiji iquitsaataqueri cameetsari quitsarentsi, ishiacantamempeacari pincatsari, irishirontimentajeitaneariri aisati. Impoiji itianquiri aisati anta Piratoqui. ¹²Ari peerani iquisavacaapinita Eroeshi aisati Pirato, iro cantaincha meeca intanacaro yaacameetsatavacaaja. Yojocajiro iquisavacaaveitani.

Yoacantaqueri Pirato Jesoshi, irinti Varavashi yoipacaajiri.

(Mt. 27.15-26; Mr. 15.6-15; Joa 18.39-19.16)

¹³Impoiji yapatojeitacari Pirato yora jivatacaaajeitiriri saserotepee, pincatsariee, aisati oshequi atiripee pashini.

¹⁴Ari icantavaqueri:

—Pamene, incaranqui pamavetaque-nari yoca, picantajeivetaquena yoamejeitaqueri atiri irojocajeitena narori, aisati iriori novincatsaririnteppee. Pineajeitaquena nosampitaqueri paitaricapee, iro

cantaincha noneacameetsatiri: te aneeroji irantane. ¹⁵Aisati iriori Eroeshi, ineacameetsataqueri, irootaque yoipian-tacariri aca. Pineaquero, tecatsi irante noacantanteariri. ¹⁶Meeca nompasatacan-teri, impoiji noimpacajeri.

¹⁷Ari maaroni osarintsi ariorica omoncarataca oca vieshita iquenqueshiretantaror yavasantaniri peerani inampire Tasorentsi, yora oantsirsiri, yora Pirato yoipacajiri aparoni shirampari yoiminqueetaqueri.

¹⁸Ari itsipatavacaajeitaca icantajeitaqueri:

—Poacanteri yoca, irinti Varavashi poimpacajeri.

¹⁹Ari yora Varavashi peerani icantajeitaqueri ishaninca anta Jerosarequi: “Tsame ajocajeri yora pincatsari”. Impoiji yoajueri ishaninca, irootaque yoiminqueantacariri caravosoqui. ²⁰Icoaveta Pirato iroimpacajerie Jesoshi, irootaque icoantavetacari iroimajerentajerime atiripee, iro cantaincha

²¹aquiero icantajeitanajatiiri:

—Pimpajacotacanteri. Pimpajacotacanteri.

²²Yapiivetajari aisati Pirato:

—¿Paita nompajacotacantanteariri?

¿Paita yantaqueri? Nosampijeveta-quempi, iro cantaincha tecatsi piotaca-sanotena noacantanteariri. Nompasanata-canteri, impoiji noimpacajeri.

²³Icantani icajemajeitanaque:

—Pimpajacotacanterive. Pimpajacota-canterive.

Aquiero icantanaitii, irosati iquemisan-tantacariri Pirato, ²⁴icantiri:

—Ari nomajeitempiro oca picoacaajeitaquenari.

²⁵Yoipacaacantajiri Varavashi, aisati icantajeitaqueri:

—Paajeitaniqueriqueti Jesoshica, jaocarica pincanteriri.

Ijatacaaajeitaqueri anta impajacoterinta.

(Mt. 27.31-32; Mr. 15.21-23; Joa 19.16-17)

²⁶Ari yaajeitanquaqueri Jesoshi anta impajacoterinta, iquenanaque avotsiqui.

Jeri itonquiojeitavacari shirenesati pajitachari Shimo. Iponeanaca oantsiqui. Ari iperanatavacari soraro yanatanaqueri Jesoshi coroshi, ora impajacotanteeariri. Yojatapairi itapiiqui Jesoshi.

²⁷Yojajetanaqueri oshequi atiri. Otimi aisati oshequi tsinane iraacojeitaquerir. Oshequi oashiretacotacari, irootaque ocajemacojeitancariri aisati. Jerosaresato onajeiti. ²⁸Iro cantaincha yamenanquero Jesoshi, icantajeitanaquerido:

—Eiro piracojeitanatsi, avisati iracojetajanchane, aisati piracojeiteri pitomipee.

²⁹Coajica ompomerentsitimojeitempi, pashinoncaajeitanaquea. Pincantajeite: “Oquimoshiretaque caari timatsi otomi”.

³⁰Incoajeivetea atiri ontijerime imperita.

³¹Pamene, tecsti nanteni nainti, iro cantaincha iroashinoncayena. Tempa coajica irashinoncaasanotaquea maaroni antirori caari cameetsatatsi.

³²Aisati anta yaayeetanajiri apite coshitantatsiri, intspajaeiteari iriori Jesoshi, impajacojeiteri.

Ipajacotaqueri Jesoshi coroshipu.

(Mt. 27.33-38; Mr. 15.22-32; Joa 19.18-24)

³³Ari yareetacaajeitapaacari anta Caraveraqui, ipajacojeitapaacueri coroshipu, tac, tac, tac. Iranti yora coshitantatsiri, ipajacotaqueri pashiniqui coroshi anta iracosanoriqui Jesoshi. Irio itsipa ipajacotaqueri anta irampatequi.

³⁴Impoiji iquenquetsatacairy Jesoshi iriri:

—Apa, pincavintsayeri yocapee, eiro poasanquetamentiritsi yoquena. Te iriojeji paitarica yantiri.

Ari icoajeitaque soraropee iraajeitero iitsaareni Jesoshi. Icantando:

—Tsame ampishonquero mapijaniqui ayojeitanteari janicarica aitajerine iitsaareni.

Icantando itsipa:

—Jaa, jentsiqueti, aneantearo.

³⁵Ari itimi anta oshequi atiri, amenajeitaqueriri, aisati itimi yora pincatsaripee,

ishirontimentajeitacari Jesoshi, iji, iji, iji; icanti:

—Yoavisacovetacari itsipapee, jentsite amenavaquerita ariorica irimatajea iroavisacotajea irisati. Iriotasanotaquerica Quirishito, itiancane Tasorentsi, ari irimatajea irisati iroavisacotajea.

³⁶Aisati iriori soraropee, ishirontimentajeitacari. Ijatashitaqueri, imperime ovaja, quepishijari. ³⁷Icantajequeri:

—Avirorica ivincatsarite jorio, jentsite poavisacotajea avisati: iji, iji, iji.

³⁸Ainiro ipajacoyeetaquerido anta coroshipu sanquenarentsi, otimi itoqui Jesoshi, jenioquiji. Osanquenataca irineanequi quereshiasati, aisati irineanequi oromasati, aisati irineanequi jorio. Osanquenataca, ocanti: “Jeri yoca ivincatsarite jorio”.

Iquenquetsatacairy Jesoshi coshitantatsiri ipajacoyeetiri.

(Mt. 27.39-53; Mr. 15.33-38; Joa 19.28-30)

³⁹Aisati yora coshitantatsiri ipajacoyeetaqueri, ishirontimentacari iriori.

—Avirorica Quirishito, poavisacotajea avisati, aisati poavisacotena narori.

⁴⁰Iro cantaincha quisatsataqueri itsipa coshitantatsiri:

—Tempa pimpincatsateri Tasorentsi. Aisati avirori, irotaintsi pincame.

⁴¹Ainiro antanepree arori ancamajeitanteari, irintiquea yoca, tecsti irante incamanteari.

⁴²Aisati icantando:

—Jesoshi, ariorica pareetea anta pimpincatsaritenta, pinquenqueshireapena narori, poavisacotena.

⁴³Yacanaqueri:

—Queario oca noncantempiri: meeca quitaiteri pintspatanaquena anta ocameetsaitentita.

⁴⁴Itampaticatapaaque meecca catsirincaiteri. Omapocashitanaca antearo otsitenitanaque. Ari otsitenitanaque

irosati ishaaviniji.⁴⁵ Aisati itsitenitanaque catsirinaciteri. Aisati otimi anta ivancoqui Tasorentsi oticaashiro nianqui. Ari omapocashitanaca, otsereanaque, tsererere, tsati; apitemao tanaque. Impoiji antearojenca icantanaque Jesoshi:

⁴⁶—Apa, meeca noncame. Aviro quempoyeajenaneri.

Irosati icamantanaca, toren.

Yoashirejeitanaca maaroni neaqueriri Jesoshi icamaque.
(Mt. 27.54-56; Mr. 15.39-41)

⁴⁷Ineantavacariri iyapitanote soraro, icanti:

—Tempa icameetsataque Tasorentsi. Queario icameetsatasanotini yoca shiramparini. Te ontimeniji irantane.

⁴⁸Aisati yora amenajeitiriri, iquenque-shirejeitanaca maaroni. Ipijaitanaja nampitsiqui, yoashirejeitanaca catsini.⁴⁹Irintiquea yora iojeitiriniri Jesoshi, icatiajeitaca ara aquietiji, yamenajeitanaque. Ocarajeitiri oca tsinanepee poneachari Carireaqui, tsipatapaacariri chapinqui Jesoshi.

Yoiminqueetaqueri Jesoshi omoroqui.
(Mt. 27.57-61; Mr. 15.42-47; Joa 19.38-42)

^{50,51}Ari itimi anta cameetsari shirampari, pajitachari Jose, arimateasati. Otimi Arimatea anta Joreaqui. Ari icarajeitaqueri Jose yora itsipapee pincatsariyetatsiri, yoametavacaapinijeita, iro cantaincha te incoaveteají irinti impajacotacanteri Jesoshi. Ipincatsataqueri irinti Tasorentsi, yaamaajeitacari impoque impincatsariventajeiteri maaroni atiri.⁵²Ari ijataque iriori, yameniri Pirato, icantaqueri:

—Nocoaque pishinetenari Jesoshini, naanajeri.

Icantiri:

—Ari, pijatequeti, paanajeri.

⁵³Impoiji yoaniireajiri, yapinaicacotaqueri tocoyaqui, cameetsamaotatsiri.

Yaanajiri anta oninta mapi, ora iroaquera imoqueeti, yominqueapaaqueri tsomponinaqui. Tecatsi itsipa iroyeete anta omoroquinta.⁵⁴Tempa irootaque Viereneshi icamantacari Jesoshi. Yovetsi-cajeitaqueri atiri paitapeerica, tempa irotaintsi saavarlo imaoreajeitantarli.

⁵⁵Ora tsinanepee oijatacojeitiri Jesoshi, amenacojeitaqueri yaajeitanaqueri omoroqui, anta yoajeitaqueri tsomponia.⁵⁶Impoiji opiajeitanaja anta ovancoqui. Ovetsicapaquaqueri casancajari aisati pashini casancatatsiri. Impoiji saavarlo omaoreajeitanaque, omoncarataqueri isanquenare Moishishi.

Itinaanaja Jesoshi.
(Mt. 28.1-10; Mr. 16.1-8; Joa 20.1-10)

24 ¹Ari otomincotamanaji, tsiteniqueru ojatamanaque tsinane anta yoyeetaquerinta Jesoshi. Aanaquero casancajari ovetsicaqueri. Oijatanaqueru otsipapee tsinane.²Ari yoyeetaqueri chapinqui omoroqui antearo mapi, itsinacacoyeetanaqueri omoroqui. Iro cantaincha areevetapacaro oneapaatiiro tivironcaja oni.³Oqueashivetapaacari Jesoshi omoroqui, iro cantaincha te oneapeeriji Avincatsarite.⁴Te iojeiteji paitarica onquenqueshirejeiteri. Impoiji imapocashitapaacaro apite shirampari, icatiimotapaacaro quempeji. Oshipaquireamaotanaque iitsaare.⁵Oshequi otsaroacaavacari, oivotasananaca. Isampitapaaqueru:

—¿Paita picoantariri aneatsiri aca? Aca yoyeetapinitiri camasanoyetasiri.⁶Te aneajeriji Jesoshi aca, tempa tinaanaja ini. Pinquenqueshiretero icamantitaquempi: anta Carireaqui.⁷Tempa icamantitaquempi: “Noponeaca inquitequi, natiritapaaque. Coajica irayena caari quemisantatsi, impajacotena coroshipiqui. Oncarate mava quitaiteri ari nontinaanaje aisati”. Meeca omoncarataca icamantitaquempiniri.

⁸Impoiji oquenqueshiretasanotaquero icamantitacaroniri Jesoshi. ⁹Opianaja nampitsiqui, ocamantapaaqueri iroamerepee aisati itsipapee quemisantatsiri. ¹⁰Opajita oca tsinaneepe Maria ora maquitarasato, Joana, Maria iriniro Santiaoco; aisati otimi otsipapee tsinane. ¹¹Iro cantaincha te irishiretearoji yora quemisantatsiri oca ocamantavetapaacariri, ijitashijeiveta te ioteji. ¹²Iro cantaincha iriori Petero ishianaca anta omoroqui yoajeivetacarinta chapinqui Jesoshi. Yamenapaaquero tsompoina, ineapaaquero tocoya yapinaica-cotantavetacariri. Impoiji ipianaja pancotsi-qui, oshequi iquenqueshiretanaca.

Anta avotsiqui ineajiri iroamere Jesoshi.
(*Mr. 16.12-13*)

¹³Impoiji ijatanaque apite iroamere Jesoshi anta Emaoshiqui. Ariorica imponeaquea Jerosarequi, ocarati 11 quirometoro irareetanteari nampitsiqui. ¹⁴Ari iquenanaque, iquenquetsatavacaajeitaca. Iquenque-tsatacotaqueri jaoca icanteetiri Jesoshi, aisati maaroni yantayetiri iriori. ¹⁵Ari iquenanaque, icantavacaanaca, irosati itsipajeitancari Jesoshi, quiso yoanaqueri anta avotsiqui. ¹⁶Ineajeivetacari, iro cantaincha te irishineteriji Tasorentsi iriojeitajeri. ¹⁷Ari isampitiri Jesoshi:

—Incaranqui, piquenantacari avotsiqui, ¿paita picantavacaimentacari? ¿Paita poashirejeitancari?

¹⁸Ari ipajita aparoni Quereojashi, yacanaqueri iriori:

—Iojeitaque maaroni jerosaresati: ¿paita caari piotanta avirori?

¹⁹Isampitiri:

—¿Paitaquea?

Yacanaqueri:

—¿Tempa pinquemacoteri Jesoshini, yora nasaretatesi? Iquenquetsatacaapinjiteitan-roni irineane Tasorentsi aisati oshequi itasoncantapiniyetini. Ineacameetsataqueri Tasorentsi aisati noneacameetsajeitaqueri

narori. ²⁰Yaajeitaqueri yora jivatacaajeitiriri saserote aisati avincatsaritepee. Icantajeiti te incameetsateji, ipajacotacantaqueri, icamaque toren. ²¹Nojjieivetaca irio oavisacojeiteenemerí, pincatsariventajeiteenemerí. Meeca ocarataque mava quitaiteri icamantacari. ²²Ocarajeitaquena aparopee tsinane jatamanatsiri incaranqui anta noavetacarinta. Opiaja, omapocapaaquena, ²³ocamantapaaquena: “Te noneapaajeriji Jesoshini, te aneajeriji. Irintiquea noneapaaque inampirepee Tasorentsi, icantaquena iriori: ‘Tinaanaja Jesoshi’”. Irootaque ocantaquenari. ²⁴Impoiji ishiyatetanaca aparopee anta, ineapaaquero ocantaquenari tsinaneepe: irintiquea Jesoshi, te irineeriji.

²⁵Impoiji icantaqueri Jesoshi:

—Te aneajeroji piojeitantarí, pitseenca-queri yora quenquetsatirori irineane Tasorentsi. Te pinquemisantajeiteriji.

²⁶Tempa icantajeiti irijivate Quirishito inquematsicataquearo maaroni oca, impoijiquea impincatsaritasanotaque.

²⁷Ari yoametasanojeitanaqueri Sanquen-rentsi, itsoteaquero maaroni quenquetsatacoti-riri iriori. Ijivataqueneri isanquenare Moishishini, impoiji yoamejeitiri isanquenare itsipapee quenquetsatacaantajeitatsimiri. ²⁸Ari yareejeitapaca nampitsiqui, iravisanajeme Jesoshi, ²⁹iro cantaincha icantaqueri itsipapee:

—Eirota pijatita, pisavacapee novancoqui. Ishaavijiteanaji, irotantsi ontsitenijencaitete.

Ari ijatapainti ivancoqui iriori. ³⁰Impoiji itsipatavacaajeitaca, yoajeitaca. Impoiji yaquero Jesoshi tanta, ipasonquitiri Tasorentsi, impoiji ipajeitaqueri itsipapee.

³¹Irosati iquenqueshireantanaja, iojeitavajiri. Impoiji imapocanaja Jesoshi, ipeanaja.

³²Icantavacaajeitanaca:

—Tempa ocameetsatasanotaque icantaqueeri anta avotsiqui. Oshequi aquenqueshiretaquero, aquimoshireven-tasanotaquero.

³³Irosati ijajeitantanaja, ipajeitanaja Jerosarequi. Ineapaaqueri yora iroamereni

Jesoshi, icarataji 11, itsipajeitacari itsipapee quemisantatsiri, yapatojeitaca.³⁴ Icantajeita-vaqueri yora savicajeitatsiri:

—Quearioteemi: itinaasanotanaja Avincatsarite. Ineaqueri Shimo.

³⁵Irosati icamantantapaacari:

—Aisati narori, noneajeitaqueri anta avotsiqui, cameetsa catsini yoameta- quena, iro cantaincha te nioveteariji. Impoiji anta novancoqui icarajaquero tanta, ipaquenaro, irosati niotantajari.

Ineajeitajiri iroamere Jesoshi.

(Mt. 28.16-20; Mr. 16.14-18; Jea 20.19-23)

³⁶Ari ainirojeitatsi iriori anta pancotsi- qui, iquenquetsatavacaajeitaca, irosati imapocantapaajari Jesoshi, icatiimojeita- paajari nianqui. Icantapaajiri:

—Pinquimoshirejeitanaque, maaroni.

³⁷Yoajeitanaqueri cavaco, te iriojeitava- queriji, ijitashijeivetavacari camaari. Itsaroajeitanaque. ³⁸Isampitapaaqueri:

—¿Paita pitsaroacantanari? ¿Paita pitseencajeitantanari? ³⁹Pamenajeitero naco aisati noiti oqueanaquena quiravo. Narotaque pocajantsiri. Jentsite, pimpamijeitena piojeitantenari. Pineaquena, otimi novatsa aisati notonqui, te nonquempeteariji camaari.

⁴⁰Irosati yonijantajeitacari iraco aisati iiti. ⁴¹Iro cantaincha tequera irishiretasa- noteari itinaanaja. Iquimoshirejeivetaca, iro cantaincha itseencashirejeitaque. Icantiri Jesoshi:

—¿Timatsimpa avajeiteari?

⁴²Ari ipavaqueri shima shincorentsi, ⁴³yoacari. Iriorijeji yamenashejeitaqueri, sorerere.

Ari yovecarataquero Jesoshi yoamejeitaqueri iroamerepee.

(Yan. 1.4-8)

⁴⁴Impoiji icantajeitaqueri:

—Tempa chapinqui nocamantaqueimpí: “Oshequi nonquematsicataquearo,

iroyeetena. Aitaque omoncarataquea maaroni isanquenatacotitaquenaniri Moishishini, aisati yora quenquetsata- caantatsiniri, aisati yora pampoyeaventa- jeitiriniri Tasorentsi”. Meeca moncarataca.

⁴⁵Impoiji yoametasanojeitaqueri ocantayetiri Sanquenarentsi, ⁴⁶icantajeitaqueri:

—Tempa ocanti Sanquenarentsi: “Incamaque Quirishito, oncarate mava quitafteri ari intinaanaje aisati. ⁴⁷Inquen- quetsatacyeeteri maaroni quipatsipee- qui, irijivate aca Jerosarequi: inquemaco- jeitaqueri maaroni atiri. Incamantajeiteri atiri: ‘Pinquenqueshirejeitanaquea, pojocajeitajero caari cameetsatsatsi pantajeitiri. Paventeari Tasorentsi iroavisacotantempi’”. ⁴⁸Ari pineajeita- quero meeca omoncarataca isanquenata- cotitaquenaniri peerani. ⁴⁹Meeca nontian- quempiro icashiacaquempiro Apa: ompocashitempi Ishire, quiso oajeitan- tempiri. Pisavicavaqueta aca nampitsiqui irosati ompocanteari. Impoiji irimataca- jeitempi Tasorentsi pantajeitanteorí paitapeerica incoacaayempiro.

Ijatanaji Jesoshi inquitequi jenoqui.

(Mr. 16.19-20; Yan. 1.9-12)

⁵⁰Impoiji yora Jesoshi yaajeitanaqueri iroamerepee anta Vetaniaqui. Ari anta nianqui, yacotanaque Jesoshi, iquenque- tsatacairy iriri, icantiri:

—Apa, jeri yoca noamereca: pintason- caventajeiteri, poveshireacaaajeiteari.

⁵¹Irosati yovancantanaja inquitequi, ipeanaja. ⁵²Oshequi ipincatsajeitaqueri, impoiji ipiajeitanaja Jerosarequi, iquimo- shirejeitanaque catsini. ⁵³Ijatapinitaque anta ivancoqui Tasorentsi icantapinijeita- que:

—Tempa icameetsataque Tasorentsi.

Ari ocarati. Narotaque sanquenatirori: *Irocashi*

YORA JOA ISANQUENATACOTAQUERI JESOQUIRISHITO, JAOC A ICANTA IRIORI YOAVISACOTANTI

Intanacaro Joa iquenquetsataque.

1 ¹Iriotaque Quirishito intasanotarori itimi: irio Ashitarori Irineane oamejeitaqueeri. Itsipatarini Tasorentsi, tempa Tasorentsi ini iriori. ²Itsipatarini peerani iriori. ³Iriotaque vetsicajeitirori maaroni, paitaricapee. Tecatsi imashiye-tachane: eirome itimime eiro ovetsicaye-tame timayetantsiri. ⁴Iriotaque oaneajeitaqueeri, quitaitetacojeitaqueeri: tempa iotacaajeitaquee jaoca icantari Tasorentsi. ⁵Peerani te ayojeiveitarini, oquempeti-moveiteeni atimini tsiteniriqui; impoiji ipocapaaque, iotacaajeitapaaquee, meeca oquempetimotaquee iquitaitetacojeita-quee. Meeca eiro atimajitsi aisati tsiteniriqui.

⁶Ari itimaveitani aparoni shirampari pajitachari Joa, itiancane Tasorentsi. ^{7,8}Iquenayetanaque, icamantacoyetapa-aqueri yora quitaitetacojeitaqueeri, iquemisantajeitantariri maaroni atiri. Yora Joa caari ini quitaitetacotantatsi, iroitintquea ineaqueri aisati iquenquetsatacoqueri. Irootaque itiancantacariri Tasorentsi.

⁹Ari impoiji ipocapaaque aca quipatsiqui yora quitaitetacotasanolantatsiri irinti, iotacaajeitaquee arori, aisati iriori maaroni savicajeitatsiri. ¹⁰Ari itimapaaque quipatsi-qui, oca yovetsicaqueri peerani, iro

cantaincha te iriojeitavaqueriji atiri, yora yovetsicajeivetaacari. ¹¹Ipcavetapaaca inampiqui, ishanincavetapaacari joriopee, iro cantaincha te iraacameetsajeitavaqueriji.

¹²Irintquea aacameetsatavaqueriri, yora quemisantajeitavaqueriri: itasoncacoventa-jeitaqueri, ipeajeitajiri itomi Tasorentsi.

¹³Iriotaque Tasorentsi tomintajeitaqueeri arori, aisati maaroni quemisantajeitiriri iriori. Te inquempeteariji ashijeitaqueeri aca quipatsiquica, itimacaajeitiro irinti ijina itomi. Aisati tecatsi ancantajeite arori: “Nompeajeata nainti itomi Tasorentsi”, eiro amatirotsi. Tempa icoashita irinti, irootaque itomintajeitantaqueeri, maaroni.

¹⁴Tempa Tasorentsi ini yora Ashitarori Irineane: iponeanaca inquitequi, yatiritapaa-que, itimimojeitapaaquee aca quipatsiqui. Yashi yoiro ineshinoncajeitaquee, queariota-sanotaque oca yoamejeitaqueeri. Noneajei-tavaqueri narori ipincatsaritasanotaque, iquempetacari Tasorentsi; tempa irotaque itomi irapintire.

¹⁵Yora Joa icamantacotaqueri Quirishito, icantajeitaqueri atiri:
—Jeri yoca nocamantacotaqueri chapinqui: “Yanaacotaquena impoitapee-naneri, ipincatsaritasanoti irinti. Te nompincatsariteji narori. Tequerani nontimeni narori, itimitani irinti”.

¹⁶Yashi yoiro ineshinoncatantaque Quirishito, irootaque ineshinoncatanteeri

arori. Aiquero ijatatii ineshinoncajeita-quee. ¹⁷Peerani yora Moishishini, isanquenatironi oca peranajeitaqueeri; irintquea Quirishito ineshinoncajeita-quee, queariotasanotaque maaroni yoamejeitaqueeri. ¹⁸Tecatsi atiri neerine Tasorentsi, apaniro irinti ineiri itomi irapintite. Iquempetacari iriri, tempa quiso yoitarini, irootaque iotantacariri: meeca yoamejeitaquee jaoca icantari.

Intanacaro Joa icamantacotaqueri Jesoshi.
(Mt. 3.11-12; Mr. 1.7-8; Ir. 3.15-17)

¹⁹Yora jorioopee jerosaresati itiancayeta-queri saserotepee, jeri ishanincapeeni Irevi. Itiancaqueneri Joa, ari ijataque. Isampitapaquaqueri:
—¿Janicampimpa? ¿Avirompa Quirishito naamaajeivetacari?
²⁰Ari te irimanacoteaji. Icamantasano-tavaqueri:
—Caarina noni Quirishito.
²¹Yapiitajiri:
—¿Queariompa? ¿Avirompa Iriashini?
—Caarina.
—¿Avirompa camantantatsineri naamaajeitacari?

—Caarina.
²²Isampitajiri aisati:
—¿Janicampimpa? ¿Paitampa noncaman-tapeeriri tiancaquenari? ¿Paita pantiri?
²³Icantiri:
—Narotaque iquenquetsatacotiniri peerani Isayashini, tempa isanquenatini: “Coajica impoque camantantatsineri, inquenquetsatapi-nite anta caaariteriqui, incante: ‘Pinquenque-shireempa, pinquemisanteri Avincatsarite iroameetsatantempiri’.”

^{24,25}Ari isampitaqueri:
—¿Queariompa? ¿Caarimpimpa Quirishito? ¿Caarimpimpa Iriashini?
¿Caarimpimpa yora camantantatsineri naamaajeitacari impoque? ¿Paitampa pivaotisatantariri ashaincapee?

²⁶Yacanaqueri Joa:

—Iro novaotisatantariri nija. Timatsi meeca pashini shirampari caari piojeiti. ²⁷Iriotaque impoitapeenaneri, pincatsa-tasanotatsiri ini. Oshequi nopincatsata-queri, te nompincatsateji narori.

²⁸Aitaque icantapinita Joa anta Vetaniaqui. Otimi Vetania intatiqueronta Jorirani. Anta ivaotisatantapinitinta.

**Yapiitajiro Joa
iquenquetsatacotajiri Jesoshi.**

²⁹Otsipani quitaiteri yamenanaque Joa, inevevaqueri Jesoshi, ipocapaaque. Icantiri atiripee:

—Jeritapaaque ovishatatsiri itianca-queeneri Tasorentsi. Iriotaque oavisaco-jeiterineri maaroni atiri caari cameetsata-tsi. ³⁰Iriotaque noquenquetsatacotajiri chapinqui: “Yanaacotaquena impoitapee-naneri, ipincatsaritanoti irinti. Te nompincatsariteji nainti. Tequerani nontimeni narori, itimitani irinti”. ³¹Te nioveteearini narori, iro cantaincha meeca icoaque Tasorentsi iriojeiteri maaroni ajorioririnte. Irootaque nopocantacari narori novaotisatantayeti.

^{32,33}Icamantantaji Joa aisati:

—Te nioveteearini narori. Iro cantaincha itiancaquena Tasorentsi, icantaquena: “Pivaotisatapiniteri pishaninca nijaqui, poamejeiteri inquenqueshirejeitanaquea. Coajica pineavaquero aniireapee noshire. Janicarica aatapaaqueri, iriotaque yora pajeiterineri atiripee noshire”. Ari impoji noneavaquero aniireapaaque Ishire Tasorentsi, oponeanaca inquitequi. Oshiyavetapaacari sampaquiti: aatapaa-queri Jesoshi. ³⁴Queario noneasanota-queri. Irootaque nocamantacotancariri: “Iriotaque Itomi Tasorentsi”.

**Intanacaro Jesoshi
icoyeaqueri iroamerepee.**

³⁵Oquitaitetamani icatija Joa aisati ara, itsipatacarri iroamere apite. ³⁶Ipam-

poyeaqueri Jesoshi yaniiti anta avotsiqui.
Icanti:

—Jeri yonta ovishatatsiri itiancaqueeri Tasorentsi, iriotaque camimentajeiteeneri oameetsajeitajeeneri.

³⁷Iquemantavacariri iroamere apite, yoijajeitanaqueri Jesoshi. ³⁸Ipitsocashitanacari iriori, ineavaqueri yoijatapaaqueri. Icantavaqueri:

—¿Paita picoiri?

Icantanaqueri:

—¿Jaoca pisaviquiri maishitoro?

Acantiri maishitoro aneanequi arori: oametantatsiri. ³⁹Ari icantiri:

—Pojatanaquena, nonijayempiro.

Irosati yoijajeitantanacari, ineapaaqueri ivanco isavincantari. Ari ishavijiitenaque catsirinacanteri, irosati isaviquimajeitantapaacari. ⁴⁰Ari ipajita aparoni savicapaintsiri Antirishi, iriotaque irirenti Shimo Petero. ⁴¹Impoiji ijatanaque Antirishi, icoapaaqueri irirenti. Ineanta-paacariri, icantapaaqueri:

—Noneaqueri Meshashi.

Acanti Meshashi aneanequi arori: Quirishito. ⁴²Icantiri:

—Tsame, pojatanaquena, pineapeeri.

—Tsame.

Ari yareetacaacari Jesoshiqui. Yamenvaqueri, icantavaqueri:

—Tempa aviro Shimo, itomi Jonashi.

Coajica impajiyetejempí: Sejashi.

Acantajeitiri Sejashi aneanequi arori: Petero, mapitatsiri. ⁴³Otsipaniqui quitaiteri ijataque Jesoshi pashiniqui quipatsi. Opajita quipatsi Carirea. Ari ineapaaqueri Jeripi, icantapaaqueri:

—Pojatanaquena.

⁴⁴Yora Jeripi vetsairasati ini. Vetsaira iriotaque inampi Antirishi, jeri Petero.

⁴⁵Jeripi ineapaaqueri Natanaeri. Icamantapaaqueri:

—Noneaqueriyea yora isanquenatacotacaniri peerani Moishishini. Aisati camantantatsiniri isanquenatacotitajeita-

carini iriori. Iriotaque Jesoshi, itomi Jose nasaretesati.

⁴⁶Icantanaqueri Natanaeri:

—Te incameetsajeiteji nasaretesati.

¿Icameetsatimpa iriori?

Yacanajiri Jeripi:

—Tsame, pamenaiteri, piotanteariri icameetsatirica.

⁴⁷Ari iquempejijeitapaacari Jesoshi, ineavaqueri ipocapaaque, icantiri itsipajieitari:

—Pamenerite yora Natanaeri. Iriotaque quempetasanotariri Ishiraeri: icameetsataque, te irioteji iramatavitante.

⁴⁸Isampitapaaqueri Natanaeri:

—¿Jaoca picantacari piotantavaquenari nocameetsati?

Yacanajiri Jesoshi:

—Noneitaquempi anta pitsititaro iyera, tequerata incamantempi Jeripi.

⁴⁹Icantakeri:

—Tempa aviro itomi Tasorentsi: pitsoteaquero maaroni, pioyetyiro. Aviotaque pincatsariventerineri joropee.

⁵⁰Icantiri Jesoshi:

—Pamene, incaranqui nocantaquempi: “Noneitaquempi pitsititaro iyera”.

¿Irootaquempa piquemisantantaquenari?

Ari pineaquero coajicani nontasoncantasanoyetanaque, impoiji quea pinquemisantasanotanaquena. ⁵¹Queario oca nocantimpíri. Aitaque pineaquero coajica inquite tsompoina. Pineaquei inampire Tasorentsi iraniireashitena, iroancanajea aisati. Tempa naro poneachari inquitequi, natiritapaaque.

Ijivataque Jesoshi itasoncantaque.

2 ¹Avisanaque mava quitaiteri, aitaque iquimoshirejeitanaque canasati. Otimi Cana Carireaqui. Yoveshireimentajeitacari aparoni shirampari aatsiri ijina. Ainiro iroori iriniro Jesoshi. ²Ari icajemacanteetaqueri aisati Jesoshi, aisati narori,

jeri aisati itsipapee iroamerepee. ³Ari nirajeitapaaque ovaja; nocarajeitaqueri itsipapee pocajeitatsiri. Otsaatapaaca, te ontameji aisati. Iriniro Jesoshi ocantiri otomi:

—Te anejeroji ovaja: ¿arimpa pimataquero pamitacoteri?

⁴Icantiro:

—¿Paita, ina, picantanari? Tequeratsita omoncarateaji nontasoncantayete.

⁵Iro cantaincha ocantiri nampirentsí:

—Pinquemisanteriya paitarica imperanataquempi.

⁶Onaque ara chomo, ocarati 6. Yovetsiqueetiro mapi, antearo oni. Irootaque onantari njija iquivapinitantari joriopée.

⁷Jesoshi icantajeitiri nampirentsí:

—Pisaje njija chomoquirá.

Isajeitanaque, ijaa jeitaquero. ⁸Irosati icantantanacariri:

—Pinquite meeca. Paacotanaqueneri peranatimpíri.

Yaacojeitanaqueneri. ⁹Ineantavacarori, opeanaja ovaja aisati. Te irioteji peranatariri nampirentsí jaoca oquenacotapajiri. Irinti iotaintsi nampirentsí quitaquerori njija. Irosati icajemantacariri aatsiri ijina. ¹⁰Icantiri:

—Tempa iro ajivatapinitiri cameetsajari ovaja. Ariorica ashinqui jeitanaquea ompocacotapee masancajari. Aitaque ocantari amejeitari. Aviroyeata quempo-yeaquerori cameetsajari. Iroquera meeca pamacantajiro aisati.

¹¹Otomi Cana anta Carireaqui. Ijivataque Jesoshi anta itasoncantaque. Nocarajeitaqueri itsipapee iroamerepee noneajeitaquero, irosati noshirejeitanacariri.

Isavicaque Jesoshi Caperenaoqui.

¹²Irosati noirincantajeitanaca Caperenaoqui. Itsipatanacaro Jesoshi iriniro, irirentipee, narori, itsipapee iroamerepee aisati. Nomaajeitanaque anta aparopee quitaiteri.

Yoimisoquijaqueri pimantsiri anta ivancoqui Tasorentsí.

(Mt. 21.12-13; Mr. 11.15-18; Jr. 19.45-46)

¹³Irotimataintsí quitaiteri iquimoshirejeitaptinatari joriopée, ipajiyetiro: yavisantaniri. Iro iquenqueshiretiri quitaiteri peerani yavisantaniri inampire Tasorentsí anta Ejipitoqui: te iroyeriji itomipee jorio, irinti yoaque itomipee ejipitosati. Ari itoncaanaque Jesoshi Jerosarequi. Nocarajeitanaque itsipapee iroamerepee, noijajeitanaqueri. ¹⁴Noneajeitapairi ivancoqui Tasorentsí pimanta-jeitiriri vaca, ovisha, sampaquiti, maaroni. Isavicajeitaque ara pinavaca-yetariri atiri iirequite. ¹⁵Ari yampsataquero Jesoshi iviritsa impasatanteariri vaca. Irosati yoimisoquijacantajeitaricari ovisha, vaca, maaroni. Ipitamonquitaqueri imesatepee pinavacaariri iirequite, itequitaqueri iirequite. ¹⁶Icantiri pimanta-jeitiriri sampaquiti:

—Poimisoquijajaeitajeri yoca. Eiro pipimantayetitsi aca ivancoquica Apa.

¹⁷Irosati noquenqueshireantajeitanajaroni isanquenatitacaniri: ‘Icanti Quirishito: ‘Nontsaneacotearo, Apa, pivanco; irootaque iroimenteenenari coajicani’’. ¹⁸Icantanaque jorio:

—¿Paita pantantarori oca? ¿Paita pinijayenari niojeitantempíri avirorica Tasorentsí?

¹⁹Yacanaqueri Jesoshi:

—Pintireajerorica oca ivancoca Tasorentsí, ari oncarate mava quitaiteri novetsicajero aisati.

²⁰Irosati icantantanacarí:

—Ocarati 46 osarintsi yovetsicanteeta-carori pancotsica. ¿Ariompa oncarate mava quitaiteri povetsicantajejarori avinti?

²¹Ja, irisati shiacantaincha. Tempa iriotaque shiaquerori ivanco Tasorentsí, tempa quisó yoqueri. ²²Icamanaque,

ocarataque mava quitaiteri itinaantana-jari aisati. Impoiji, aitaque noquenque-shireajeitanajiro oca ishiacantaqueri. Aisati niotanaquero oquenquetsatacota-queniri peerani sanquenarentsi, moncarataca meeca maaroni oquenquetsatacota-queriniri.

**Intayetanaca
iquemisantajetaqueri Jesoshi.**

²³Areetapaja aisati yavasantaniri, iquimoshirejeitanci. Itimapajji Jesoshi Jerosarequi, oshequi itasoncantayetapaa-que. Ineayetaqueri atiri, irootaque iquemisantajetaitariri oshequi. ²⁴Yora Jesoshi ioti jaoca icantashirejeitari maaroni atiri, irootaque yaamaventanta-nacari: "Yayeetanacari". ²⁵Iojeitaqueri atiri jaoca ocantajeitari iquenqueshirejei-tiri. Iotashitaca, tecatsi camanterineri.

**Yora Nicoremo
yananincashitanquaqueri Jesoshi.**

3 ¹Itimini aparoni shirampari pincatsa-riventiriri joriopee, ipajita Nicoremo. Variseo ini. ²Ari yananincashitanquaqueri Jesoshi, icantapairi:

—Niotaquempi, oametanari, piponeaca Tasorensiqui; irootaque pipocantacari, poamejeitapeena. Eirome itsipatimpime Tasorentsi, eirome pitasoncantime.

³Icantiri Jesoshi:

—Queariotaque oca noncamantempiri: yora caari apiitajanchane intimaje, tecatsi incantea irijate anta ipincatsar-tinta Tasorentsi.

⁴Icantiri iriori Nicoremo:

—Ariorica anteashiparanaje, jaoca ancantajejari antimaje aisati? Arimpa amatajearo ampianajero otsomontequi anironi ontimacotantajeeri aisati?

⁵Yacanajiri:

—Queariotaque oca noncamantempiri. Maaroni caari vaotisatajachane nijaqui, aisati maaroni caari ontimaje Ishire

Tasorentsi, tecatsi incantea irareetea anta ipincatsaritinta Tasorentsi. ⁶Tsinane, ariorica ontimeri otomi, irishanincata-jeari iriri. Aisati oquempevetaca Ishire Tasorentsi: ariorica optimajeri atiri, irishanincatajeari Tasorentsi. ⁷Ariorica noncantempi: "Pampiitajea pintimaje", eiro poanatsi cavaco. ⁸Jaocarica oninti, ojeaooncaque tampea, piquemavaqueri opoimatapaaque, sooo. Iro cantaincha te pioteji jaoca oquenapaaqueri, aisati te pioteji jaocarica ojateri. Aisati iquempe-yevetaro maaroni otimajiri Ishire Tasorentsi.

⁹Icantajiri Nicoremo:

—Jaoca ocantari oca pishiacantanari?

¹⁰Yacanajiri iriori Jesoshi:

—Caarimpimpa oamejeitiriri ariorori-rintepree? Paita caari piotantavacaro oca nocantempiri? ¹¹Queariotaque oca noncamantempiri: nocamantaciro nioyeritiri aisati noneayetiri, iro cantain-cha te pinquemisanteroji nocamantayeve-timpiri. ¹²Jero noquenquetsavetimpiro ineyetiri aca quipatsiquica, iro cantain-cha te pinquemisantenaji. Nonquenque-tsatempiro timayetatsiri inquitequi, arimpa pinquemisantaquename?

¹³Aitaque noponeari narori inquitequi, natiritapaaque; coajica nompianaje aisati. Noquenquetsatacotoricaria inuite, niotaquero nocantaqueri. ¹⁴Peerani anta caaraiteriqui yatsicajeitaqueri ashani-canis oshequi marankepee. Ari icantirini Tasorentsi: "Pishiacanteri maranke, poatiacoteri inchaquiiqui iramenajeitanc-teariri atiripee, eiroquea icamajeitantsi maaroni amenajeiterineri". Ari yoatiacotaqueri Moishishi, yavisacojeitajari oshequi atiri. Aisati narori iroatiacoyeeta-quena, coajica. ¹⁵Maaroni quemisantena-neri incantaitatiyempani iraneajeitanaje anta inquitequi. ¹⁶Inintasanojeitiri Tasorentsi maaroni atiri, irootaque itiancantaqueñari aca quipatsiqui.

Narotaque itomi irapintite. Incantaitatiyempani iraneajeitapaaje inquitequi maaroni quemisantajeitanari; eiro catsini ijatitsi ishaaviji maaroni quemisantajeitanari.¹⁷ Te iro intiancantena Apa noasanquetaajeiteri atiripee, irointi itiancantauquena noavisacojeiteri.¹⁸ Eiro yashinoncaajeitatsi maaroni quemisantana. Iro cantaincha iroasanquetaajeiteri Apa maaroni caari quemisantana. Iro iroasanquetaanteeariri, itseencajeitana.¹⁹ Nopoqui noamejeiteri atiri jaoca icantari Tasorentsi aisati iritanteari intimajeite cameetsa: oquempevetaca noquitaitetacovetacari atiri. Iro cantaincha yantapinijeitiro caari cameetsatatsi, te incoajeiteji iriojeitero oca noamejeive-tacariri; oquempetaca inintasanajojeitiro tsiteniri irointi. Te incoajeiteji intimajeite quitaiteriqui, icantajeiti: “Ineiteerocari Tasorentsi antayetiri, yoasanquetayee-cari”.²⁰ Yora antajeitirori caari cameetsatsi iquisajeitana. Te incoajeiteji impocashitena: iotaque nonijaantiteri caari cameetsatatsi yantajeitiri, irootaque caari ipocashitana inquemisantena.²¹ Antirori cameetsayetatsiri, iotaque pocashitanari irinti. Nonijayetiri ocameetsajeitaque yantayetaqueri. Tempa irio Tasorentsi antacaajeitirori cameetsayetasiri, irootaque caari ipashiventanta ipocashitana.

Irootaque icantiqueriri Jesoshi Nicoremo.

Mavatanaque iquenquetsatacotiri Joa Jesoshi.

²²Irosati ijatantanaja Jesoshi Joreaqui, nocarajeitanaqueri itsipapee iroamerepee, noijajeitanaqueri. Nosavicajeitapaajji anta, novaotisatantapaajji.²³ Aisati iriori Joa, ivaotisatanti aisati Ainoqui, oquempejitaro Sarimi. Oshequitapai nije anta. Ijatashijeitanaqueri oshequi atiri irivaotisatanteariri.^{24,25} Tequeratsita

iroiminqueeteriji Joa. Yora iroamere, ipiatsataceri aparoni jorio. Iro ipiatsata-vacamentari jaoca ancantajeitajeari ancameetsajeitajeari.²⁶ Irosati ipocashitantaacari Joa iroamere, icantapaaqueri:

—Oametanari, jeri ivaotisatanti yoranqui pitsipatariranqui chapinqui intatiqueronta Jorirani. Yoranqui picantiri Quirishito. Irootaque ijatashijeitantanacariri maaroni atiri, meeca yojocajeitanaquee arori. ¿Paitaquea?

²⁷Yacanaqueri Joa:

—Tecatsi amatashitea arori, irintiquea Tasorentsi jenoquisati matacayerori maaroni cameetsayetatsiri.²⁸ Piquemajeitaquena nocantakeri chapinqui: “Caarina noni Quirishito. Itiancaquena Tasorentsi nojivataqueri”.²⁹ Yora aintsiri ijina, iotaque aasanotirori. Yora ishaninca icarajeitiri inquimoshireimenteari inquemavaqueririca irineanate. Aisati meeca noquempetari narori. Oshequi noquimoshireimentasanotanaqueri iriori Jesoshi.³⁰ Aiquero ijatatiipincatsaritasanotanaque irinti. Narori, te:³¹ eiro nopincatsaritsi. Yora quea poneachari jenoqui ipincatsariventasanotanti irinti. Aroquea quipatsisati ashanicatasanojeitari savicajeitatsiri quipatsiqui, te ampincatsarijeiteji. Aquenquetsatacoti oca aneayetiri aca quipatsiqui.

³²Yora poneachari inquitequi icamantacoyetiro paitarica ineayetiri aisati iquemayetiri anta. Iro cantaincha te intimasanoveteaji quemisantasananotavaqueroneri icantakeri.³³ Irintiquea maaroni quemisantavaquerori, ioti irinti otampaticatasanotaque maaroni icantiriri Tasorentsi.³⁴ Irootaque Tasorentsi tianquiriri Jesoshi, meeca yoametapaaqueero irineane. Yora Tasorentsi te intsaneemparojo Ishire, quiso oajeitaquee.³⁵ Apa jenoquisati inintiri Itomi, itiancaqueeri ipincatsariventajeitee maaroni.³⁶ Maaroni

quemisantajeiterineri Itomi Tasorentsincantaitatiyempani iranee inquitequi. Eiro ijatitsi inquitequi caari quemisantirine irinti, irosati incantatiyempani Tasorentsinquischeri irinti.

Ijati Jesoshi Carireaqui.
(Mt. 4.12; Mr. 1.14; Ir. 4.14)

4 ^{1,2}Yora variseopee iquemacotaqueri Jesoshi, icantajeitiri atiri:
—Jesoshi yanaacotiri Joa yoametanti. Oshequi iquemisantacaqueri atiri, oshequi ivaotisatanti.

Te iri Jesoshi vaotisaterine atiri, narojeitaque nainti iroamerepee vaotisantatsiri. Iotaque Avincatsarite icantaqueri variseopee, ³yojocanajiro Jorea, ipianaja aisati Carireaqui.

Iquenquetsatacaaquiero Jesoshi samariasato.

^{4,5} Iquenanajji Jesoshi Samariaqui, noijatanaque ri narori. Nareejitapaaclaro nampitsi samariaquiniri pajitachari Shicari. Oquempejitaro iipatsiteni Jacovoni: oca ipaqueriniri itomini Jose. ⁶Otomi ara iiyanareni Jacovoni. Imaotapaaque Jesoshi, tempa noponeajeitaca arejiqui. Isaviquimotapaaquero iriori iiyanareni. Irotimataintsi intampaticate catsirincaiteri. ⁸Notsipatacari itsipapee iroamerepee, nojajeitapainti nampitsiqui namanantapaintiro noyari. ⁷Irosati opocantapaaca tsinane samariasato, onquitaate nija. Icantavaaquiero Jesoshi:

—Pimpacotena nire.

⁹Ocantiri:

—¿Caarimpampa jorio? ¿Paita pamanantanari nija? Samariasato noni. Te iraacameetsajeiteriji jorio samariasati, irootaque ocantantacariri. ¹⁰Yacaniqueru Jesoshi:

—Te pioteji paitarica inintacaquempiri Tasorentsincamatempiri. Aisati te piotenaji narori, janicanarica. Nocanta-

quempi: “Pimpacotena nireta”. Iro cantaincha piotaquename, pincantaquename avinti: “Aviro avinti penaneri nireri”. Irosati nompashitantempirome nija oaneantatsiri.

¹¹Ocantanaqueri:

—Tecatsi pinquitaatanteari. Tsompoina oni nija. ¿Jaoca payerori oca nija ovaneantatsiri? ¹²¿Panaacotirimpá yora Jacovoni, quianatironiri oca iiyanareni? Irironi nijaca, irajeitironi itomipee iriori, aisati ivira. Irosati meeca nirajeitironarori. Ocameetsajataque nijaca: ¿pijitimpa ari pimpajena nija anaacoteroni oca ocameetsajati?

¹³Yacanajiro aisati:

—Irimirejeitanaje aisati maaroni irapinitirori oca nija. ¹⁴Irintiquea yora iraqueroneri nija nompaqueriri nainti: eiro imiretajitsi aisati. Ora nija nomperiri amotoapaaque ishirequi, irootaque aneacaajerine incantaitatiyempani.

¹⁵Ocantanajiri tsinane:

—Pimpenarioqueti meeca ora nija picantaquenari, eiroquea nomiretantaatsi. Eiro natsipetajatsi nompocaje nonquataataje aisati.

¹⁶Icantanajiro:

—Pijate meeca, pincajemaatenari pijime, pimpiaje aisati.

¹⁷Acanajiri:

—Te intimeji nojime.

Icantanajiro:

—Queario quea picantaquenari: “Te intimeji nojime”. ¹⁸Icarajeitaque pijime paavetacari apapacoroni. Yora pitsipatari meeca caari ini pijime. Queario picantaquena.

¹⁹Ocantanajiri:

—Aviroyeata camantantatsiri: aparo meeca nosampitempi. ²⁰Aca toncaariqui iquemisantapinjeitiri noshaninca Tasorentsinc. Avirojei jorio, picantajeiti avirori cameetsa anquemisantajeite Jerosarequi. ¿Paitaquea anashitavacantacari?

²¹Icantanajiro:

—Pinquemisantero oca noncamantem-piri meeca. Coajica eiro piquenqueshire-tajirotsi jaocarica pinquemisanteriri Tasorentsi. Atsipetashita aquenqueshire-tashitaro jaoca anquemisanteri, irointi cameetsatasanotatsiri anquenqueshiretero janica aquemisantiri. ²²Avirojei samaria-sati te piojeiveteariji yora piquemisanta-jeivetari. Narojei, jorio, niojeitiri nainti janica noquemisantajeitiri. Jorio irine oavisacotantatsineri. ²³Moncarataca pinquemisantasanojeiteri Apa: pincoaquerica, ari amitacojeitempi Ishire Tasorentsi, oametempiro quearioyetatsiri. Aitaque icoaque Apa inquemisantajeiteri maaroni coyeroneri Ishire oamejeiteri.

²⁴Te ontimeli ivatsa Tasorentsi, irointi Ishire. Coatsiri inquemisanteri Tasorentsi inquemisantasanotero Ishire iritantearori quearioyetatsiri.

²⁵Ocantanajiri:

—Niotaque impoque Meshiashi, yora icanteetiri Quirishito. Irareetapeempatica iritotacaajeitapajee maaroni.

²⁶Icantanaquero:

—Narotaque nainti Quirishito neanata-queempirica.

²⁷Irootaque icantaquerori Jesoshi. Irosati narori, nocarajeitiri itsipapee iroamerepee, nareejeitapaja. Noneapaaqueri iquenque-tsatacairo tsinane, noajeitapaaque cavaco. Iro cantaincha te nosampitapeeri: “¿Paita picantirori tsinane? ¿Paita piquenquetsata-cantarori?” Namenashitapaacari.

²⁸Irosati ojocantanacaro ochomone, ojatanaque nampitsiqui. Ocamantapairi onampquiniri:

²⁹—Tsame, pojajaeitanaqueuna. Nonija-yempiri shirampari cantaquenari maaroni, paitarica nantayetiniri. Irioyeata Quirishito.

³⁰Irosati yojajaeitanacaro irameneri Jesoshi. ³¹Irosatiquera nonajeitaque iiyanareniqui, nocantavetari Jesoshi:

—Oametanari, poyea.

³²Icantana:

—Timatsi noari narori caari piojeiti avinti.

³³Irosati nocantavacaajeitananaca:

—¿Yameetinirimpa yoari?

³⁴Icantanaquena:

—Nantiniri tiancaquenari intacaa-nari: oquempetimotaquena noaca, te meeza nonquemeroji notashe. ³⁵Ariorica pipanquitiro pivanquire, tempa picanta-vacaajeita: “Itsipasatinivani cashiri aajeitanteearori avanquire”. Pinquemisan-tajeitero noncamantajeitempi meeca: piotavaquero noshiacantempiri. Pamena-jeitero panquirents: sampatanaque,

³⁶moncarataca iraanteetearori. Impinateri ashitarori, impoiji inquimoshirejeitana-que: yora ashitarori, aisati iratiritepee, maaroni. Aviro noshiacantiri aayetirori, irio Tasorentsi ashitarori. Ariorica

pinquemisantacayeri atiri impinatempi, aisati incantaitatiyempani iranee maaroni pinquemisantacaajeiteri. Irampatojeiteri Tasorentsi maaroni irioriqui, anquimoshi-rejeitantejeari, maaroni. ³⁷Queariotaque oca icantapiniyeetiri: “Yora panquitaque-rori, eiro yaayetirotsi; irinti pashini aajeroneri”. ³⁸Notiancajeitaquempi nainti paajeitanteearori caari pipanquiti avirori. Timatsi pashini panquitaquerori, pimpo-jeitajeri avirori. Ari pimoncaratavacajei-taca pantajeitaquero nocooacaajeitaquem-piri.

³⁹Irosati areetantajari tsinane aisati maaroni oijajeitaquerori. Iro ipocajeitan-tacari ishirejeitavacaro ocantapaaquerir tsinane. Ocantapaaqueri onampipeequi-niri incaranqui: “Icantauena Jesoshi maaroni, paitarica nantayetiri: iriroyeata Quirishito”.

Irootaque iquemisantajeitanacariri Jesoshi oshequi. ⁴⁰Irosati ipocashijeitan-tacari, icantapairi:

—Pisaviquimotanaquenatsita.

Ari isavicanaque apite quitaiteri,
⁴¹iquenquetsatacanaqueri. Iquemisanta-
 sanojeitanaqueri oshequi. ⁴²Icantajeita-
 quero tsinane:

—Noquemisantavetacaro picantaque-
 nari, iro cantaincha meecaquea noquema-
 sanotaqueri iriori Jesoshi, irootaque
 niojeitantacari queario oni picantaque-
 nari. Irootaque oavisacojeiteeneri.

Irootaque yoca Quirishito.

⁴³Ari apite imaaque Jesoshi anta,
 irosati ijatantanajari. Ijatanaji aisati
 Carireaqui. Narori, noijajeitanaqueri.

⁴⁴Jero oca icantapinitiri Jesoshi: “Te
 impincatsatasanoteriji yora inampipee-
 quiniri camantantatsiri, irointi itseencapi-
 nitiri ishanincasanori”.

⁴⁵Ari nareejeitapaaja Carireaqui.
 Yaacameetsajeitavaqueri cariresati
 irinti. Ijajeitanaque chapinqui iriori anta
 Jerosarequi, iquimoshirejeitinta. Aitaque
 anta ineayetaquero yantayetiri Jesoshi.
 Irootaque meeca ineacameetsajeitantaca-
 riri.

**Ipianaja Jesoshi Carireaqui,
 yoavisacotiri itomi pincatsari.**

⁴⁶Ipianaja aisati Jesoshi Canaqui: ora
 carirequiniri. Anta chapinqui ipeaquero
 nija ovaja. Itimaiti Caperenoqui pincatsari,
 yojoquiiitaca itomi. ⁴⁷Iquemacotavaqueri
 Jesoshi, iponeanaja Joreaqui, yareetapaaja
 Carireaqui. Ari ijatashitanaqueri, icantapairi:
 —Irotaintsi incame notomi. Tsame
 poavisacotajantenari.

⁴⁸Icantakeri Jesoshi atiripee:
 —Eirorica notasoncantayeti, ¿ariompa
 pinquemisantajeitena? Aitaque picanta-
 jeitari avirori, pitseencajeiti.

⁴⁹Icantanajiri aisati:
 —Intsipaite apa, pijate novancoqui.
 Icamicari notomi.

⁵⁰Icantanaqueri:
 —Pijataje meeca. Eiro icamitsi pitomi,
 aitaque iravisacotaje.

Iquemisantaqueri icantakeri,
 ijatanaji. ⁵¹Nianqui itonquitavacari
 inampirepee, icantavajiri:

—Avisacotanaji pitomi.

⁵²Irosati isampitantavacari:

—¿Jaoca ocaratiri yavisacotantajari?

Yacanajiri:

—Oshaiteji, itaanaji catsirincaiteri,
 aitaque opeanaja iyatsiire.

⁵³Iquenqueshireeanajiro aitaque icaratari
 catsirincaiteri icantantacariri Jesoshi:
 “Eiro icamitsi pitomi”. Ari iquemisanta-
 naque iriori. Aisati iquempejeitaja
 maaroni ishaninca, iquemisantajeitaji.

⁵⁴Ari meeca isaviqui Jesoshi Carireaqui,
 iponeanaja chapinqui Joreaqui. Ocarati
 meeca apite itasoncantaque Jesoshi anta.

Yoavisacotiri mantsiari anta incajarequi.

5 ¹Irosati iquimoshirejeitantanaja aisati
 joriopee. Itoncaanajji Jesoshi Jerosare-
 qui, tonca, tonca. ²Otsapiqui nampitsi otimi
 yoimunqueantapinitariri ovisha. Otimi anta
 quempeji incajare. Irineanequi Evereo
 opajita Vetsata. Otimi anta pancotsipee
 apapacoron. ³Irootaque inariantajeitari
 joquijjeitachari oshequi. Yapatojeita
 quitapoajari, mayempiri, choriveetatsiri.
 Yoyeajeitiro nija oshevajatajea. ⁴Yaniireashi-
 tapinitiro incajare inampire Tasorentsi.
 Ishevajatacapinitaro nija, irosati
 iqueajatantarori yora joquijjeitachari.
 Jaocarica itimiri jivatasanotatsiri iqueajata-
 que, yavisacotaji; opeanaja paitarica
 oavetariri. ⁵Itimaiti ara aparoni shirampari
 joquittachari: ocarati 38 osarintsi yojoquii-
 tantacari. ⁶Ineapaaqueri Jesoshi inariaita.
 Iotacotapaaqueri aitaque ocaratiri yoshequi-
 taquero osarintsi. Icantiri:
 —¿Picoimpa paviscotaje?

⁷Yacanajiri:

—Tecatsi queajatacayenane ariorica
 oshevajaveta nija. Irointita nopalmeren-
 tsita narori, irosati yanaacotantanari
 itsipapee: iqueajatanaque irinti.

⁸Icantanaqueri Jesoshi:

—Pintinaanaje, pajiricajero pinarianta-veitari, paniitanaje.

⁹Irosati yavisacotantanaja. Yajiricana-jiro inariantaveitamiri, irosati yanitanta-naja.

**Icantavacaimentaro
quitaiteri imaoreantari.**

Irootaque saavaro, quitaiteri imaorean-teetari. ¹⁰Irootaque icantajeitancariri jorioppee yora avisacotajantsiri:

—Irootaque meeca quitaiteri amaoreantajeitari. Te oshinetanteaji paanajero meeca pinariantari.

¹¹Yacanaqueri:

—Yora oavisacotajanari irio cantanari: “Paanajero pinariantaitari, paniitanaje”.

¹²Irosati icantantanajiri:

—¿Janicampa cantaquemperi?

¹³Te irioteji iriori janicarica oavisacota-jiriri. Itimaiti ara oshequi atiri, ipeimota-nacari Jesoshi. ¹⁴Impoiji ineajiri aisati anta ivancoqui Tasorentsi. Icantiri:

—Pineaquero, avisacotajimpi meeca. Eiro pantajirotsi aisati caari cameetsat-tsi. Apiitajimpicari, omatasanoticari catsini.

¹⁵Irosati ijatantanaja shirampari.

Icamantapajiri jorioppee:

—Irío oavisacotajanari Jesoshi.

¹⁶Irootaque iquisajeitantanacariri jorioppee Jesoshi. Iro icoantacari iroyerime, ineakeri yoavisacotantaque quitaiteriqui imaoreantajeitari. ¹⁷Iro cantaincha icantanaqueri:

—Irosati icantani Apa yantayetiro cameetsatsatsiri. Aisati noquempetacari narori: ¿paitampa noimpacaantearori saavarroqui?

¹⁸Aquiero catsini icoasanotanaiti iroyerime. Ineakeri Jesoshi yantaveetan-taro quitaiteri imaoreantajeitari. Iquema-queri aisati icanti: “Irootaque Apa Tasoren-tsi”. Irosati icantantanaca jorioppee:

—Ijitasorentsitsacateemi, te incameetsa-teji.

**Yora Jesoshi imoncarayetacari iriri,
paitarica yantayetiri.**

¹⁹Yacanajiri Jesoshi:

—Queariotaque oca noncamantempi. Naro itomi Tasorentsi. Te nantaveetashiteji, irointiquea nomoncarayetaquero paitarica noneacotiriri yantiri Apa.

²⁰Inintaquena iriori, yoameyetaquenaro maaroni nantayetiri. Coajica irimatacayena nomatasanoyetero catsini nontason-cantayete, poantenari cavaco. ²¹Tempa yoitinaapinyetiri Apa camayetatsiri, yoaneajiri. Aisati nonquempetea narori, noaneajeri janicarica noncoacayeri.

²²Eiro icantacoventiritsi Apa atiri, eiro catsini; irootaque itiancantaqueunari nainti noncantacoventanteariri. ²³Icoaque Apa impincatsajeiteri maaroni atiri. Aisati icoacaquena narori, impincatsa-jeitenas maaroni. Yora caari pincatsatana narori, te impincatsateriji aisati Apa, yora tiancaquenari. ²⁴Queariotaque oca noncamantempi. Maaroni quemeroneri noneane, ariorica inquemisanteri tiancanari, incantaitatiyempani iraneajei-tanaje inquitequi. Eiro yoasanquetairitsi Apa. Incamavetaquea, iro cantaincha iraneanaje aisati. ²⁵Queariotaque oca nocantimpri. Irotimataintsí yora camave-tinchari inquemajeitena noneanate: tempa naro Itomi Tasorentsi. Icantatiti-yempani iraneajeitanaje maaroni quemajeiteneri. Aitaquequea meeca omoncarataca inquemajeitantenari.

²⁶Irisati aneashitacha Apa. Aisati icoaca-quena narori nomoncaratacari, narosati aneashitacha narori. ²⁷Tempa nopone-a-naca inquitequi, natiritapaaque. Irootaque itiancantanari noncantacoven-teri maaroni atiri. ²⁸Eiro poajeititsi cavaco. Coajica inquemajeitena noneanate maaroni yora tijajeivetain-

chari. ²⁹Aitaque intinaajeitanaje antirori cameetsayetatsiri, iraneajeitanaje aisati. Aisati iriori antayetirori caari cameetsatsi: intinaajeivetanajea, iro cantaincha noashinoncaasanojeiteri irinti. ³⁰Tecatsi noncantea nantashitearo. Nocantacoventantirica, nomoncarataquero icantanari Apa. Tampatica nocantacoventanti. Te nantashitearoji paitarica nonintiri narori, irointi nantiniri Apa tiancanari inintacaquetenari iriori.

Apa icamantacotaqueri Itomi.

³¹Aisati icantajeitiri Jesoshi:

—Narosatirica camantacotachaneme apaniro pincanteme: “Te ontampaticateji icantiri”. ³²Iro cantaincha ainiro pashini camantacotananiri: yora Joani. Nioti queario oni icamantacotanari iriori. ³³Pitiancayetaqueri pishaninca, pisampatacantaqueri. Ari icamantacotasanotaqueri queariotasanotsiri, icamantaquempi: “Iriotaque Jesoshi Quirishitotatsiri, Itomi Tasorentsi”. ³⁴Te oncantimeneentenaji incanterica atiri: “Icameetsati Jesoshi”, iro cantaincha nocoaque pavisacojeitaje, irootaque nocamantantimpiori oca. ³⁵Yora Joa iquempevetacaro tsionmentotsi amorecasanotsiri. Pineajeitavaqueri itsiojeitapaaquempi: tempa oshequi iotacaajeitaquempi. Piquimoshireventajeivetavacari osamani. ³⁶Timatsi aisati otsipa iotacaaqueempiri, ora anaacotiriri Joa, piotasanolantenari. Apa itianquena. Meeca nontsoteeneri icantaquenari. Paitarica nantayetiri narori, irootaque piotantenari itianquena Apa. ³⁷Aisati icamantacotaquena Apa tiancaquenari. Queario, te pinquemapiniteriji irineanate, aisati te pineapiniteriji jaoca icantari. ³⁸Iro cantaincha te pinquemisanteriji itiancane, irootaque caari pishiretantarao irineane. ³⁹Pineanatapinijeitaqueri Sanquenaretsi, tempa pijitashijeivetaca ariorica

pineanatero, pincantaitatiyempani paneajeitanaje. Tempa irootaque camantacotanari. ⁴⁰Iro cantaincha te pincoyeji paventena noaneantajeitajem-piri. ⁴¹Te oncantimoneentenaji pineacameetsajeitanarica. ⁴²Niojeitimpi nainti, te pininteriji Tasorentsi. ⁴³Itiancana Apa, irootaque nopocantacari. Iro cantaincha te pineacameetsajeitenaji. Ariorica impocashitempi irinti yora caari itiancane, irioquea pineacameetsajeitavaqueri irinti. ⁴⁴Avisati neacameetsatava-caajeitacha. Aitaque picantajeitari. Iro cantaincha te pincoyeji irineacameetsajeitempi Tasorentsi. Iriotaque Tasorentsi apaniro. ¿Jaoca pincanteari meeca pinquemisantasanooteri? ⁴⁵Eiro pijitashitatsi naro camantacotempineri Apaqui: “Ainiro, Apa, yantajeitiri yocapee”. Timatsi pashini camantacotempineri: iriotaque yora Moishishini, incanteri Apa: “Te inquemisantajeiteroji yocapee ora pisanquenatacaaquerenari”. ¿Pijivetacampa ari irancacovaquempi? ⁴⁶Arime pinquemisantasanojeiterime Moishishini, aitaque pinquemisantajeitavaquenename narori. Isanquenatacaquena iriori peerani. ⁴⁷Niotaque te pinquemisanteroji isanquenatiniri. ¿Ariompa pinquemisantero nocantimpiri narori?

Irootaque icantajeitiriri Jesoshi joropee.

**Yoshequiacaquero Jesoshi tanta,
jeri shivajaniqui.**

(Mt. 14.13-23; Mr. 6.30-46; Ir. 9.10-17)

6 ¹Irosati imonteantanajaro Jesoshi incajare pajitachari Tiveriashi, onta carireaquniri; noijajeitanaqueri. ²Oshequi catsini oijajeitiriri. Ineacojeitaqueri itasoncacoventajiri joquittachari, irootaque yojajetantanacariri. ³Itonca-naque Jesoshi toncaariqui. Isavicapaaque anta, nocarajeitaqueri itsipapee iroameree, notsipajetanacari. ⁴Irotimataints

inquimoshirejeitajeari joriopee. Ipajiyeetiro quitaiteri "Yavisanteri".
5 Yamenanaque Jesoshi. Ineavaqueri oshequi atiri pocashijeitaqueriri, isampitiri Jeripi:

—Jeripi, ¿jaoca amananterori meecca tanta iroajeiteari ashánincapée?

6 Iro icantashitancariri, icoaque Jesoshi irineanteari Jeripi. Iranti Jesoshi, iotaque jaoca incanteriri. **7** Ari yacanaqueri:

—Amanantavetearorica tanta oshequi, ampinaventavetaquearorica 200 tenario, eiro inajeitarotsi. Ariorica ampayevetaqueari capichaji, eiro inajeitarotsi.

8 Ari itimi anta pashini iroamere, yora Antirishi. Iriotaque irirenti Shimo Petero. Icantiri:

—Oametanari, jerica aparoni evancari, timatsi itantane apapacoroni. Timatsi aisati ishivajaniquite apite. Iro cantaincha notseencaqueri: tempa oshequi catsini atiri.

10 Irosati icantantanacari Jesoshi:

—Poisavicejeteri maaroni atiri.

Ocasaveshiitequera. Icarajeitaque 5,000 shirampari savicajeitauntsiri.

11 Irosati yaantacaro Jesoshi tanta.

Ipasonquitacotaquero. Ipajeitaqueri savicajeitauntsiri. Aisati iquempetaqueri shivajaniqui, ipajeitaqueri. Aitaque ocarati icoajeitaqueri aitaque ocarati ipaqueriri. **12** Iquemajeitanaca maaroni. Irosati icantajeitajeari Jesoshi iroamerepee:

—Paajeitajero timaarantapaaajantsiri, aparatacari.

13 Iquemajeitacaro oca tanta apapacoroni. Yaajeitajiro timaarantapaaajantsiri. Itetajiro cantiriqui. Ijaajeitajiro ocarati 12. **14** Noneajeitaqueri itasoncaquero tanta, irosati nocantajeitanacari:

—Iriotasanoque yoca camantantatsiri aquemacotaqueri, aamaajeiveitaniri peerani.

15 Iotavaque Jesoshi impocashijeiterime oajeitainchari iraanaquerime, impeajerime ivincatsarite. Irosati ipeapitsatantanajari. Ijatanaji toncaariqui apaniro.

Iopianaja Jesoshi Caperenaoqui.

(Mt. 14.24-33; Mr. 6.47-52)

16 Ishavijiiteanaque, nocarajeitanajiri itsipapee iroamere, noirincajeitanaja incajarequi, **17** notejeitapaa jaro pitotsi. Notiancajiro nomonteanaje intatiquero, anta Caperenaoqui. Tsitenitasanotanajji, tequeratsita intsipajeitajena Jesoshi.

18 Opocaque antearo tampea, oquisaata-naca incajare, soooo, irootaque otimanta-cari antearo omotoncane. **19** Aitaque nonajeitaque nianquiaqui. Osamani quipatsi, aamaaca ari ocarati 5 quirome-tero, arioricampa 6 nareetantajeari. Aiquero nocomejivetaca. Irosati nonean-tavajari Jesoshi yanijatapaaji incajare-qui, te intsitiaquiteji. Iquempejitetapaa jaro pitotsi. **20** Notsaroajeitanaque. Icantapaa-jana iriori Jesoshi:

—Narotaque, eiro pitsaroacaajeitanatsi.

21 Nocoajeivetanaca nontetavajerime, iro cantaincha noneacotashitapaaca naatacojeitapaaque otsapijaqui, anta nojajeitenta.

Icoajeitajiri Jesoshi.

22 Oshaiteji icatiaeitaca atiri intatique-ronta. Ineajeitavajana narori notejeitanajira novitoqui. Te intsipajeitanajena Jesoshi, nainti jajeitajantsi. Tecatsi pashini pitotsi vaattachane anta. **23** Meeca yareejivetapaaca tiveriashisati, iquenacotapaaque ivitoqui. Yaatacojeita-paaque quempeji yoacaajeitacarinta oshaiteji tanta. Icoavetapaaacari:

—¿Jaocame Jesoshi? ¿Jaoca iroamere-peee?

24 Te irineajeitapaajeriji Jesoshi; aisati naroriji iroamerejei, te irineajeitapaa-naji. Ari impoiji itejeitanaja atiripee

ivitopeequi, ijatacojeitanaji Caperenaoqui, icoajeitapajiri Jesoshi.

**Iriotaque Jesoshi shiirori oanarontsi
aneacaqueriri quemisantatsiri.**

²⁵Aitaque ineajeitapajiriri intatiquero. Icantajeitapajiri:

—Oametanari, ćjaoca ocaratiri pareetantajari aca?

²⁶Yacanajiri:

—¿Paitasa picoantanari? Queariotaque oca noncamantempiri: te iro pincoimtena pimpincatsatena, iroitquea picoimentana noacaaquempi oshaiteniji tanta. Meeca picoajeiveta noacaajeitajempi aisati. ²⁷Ora ayeari ario ontsoncanaquea. Eiro piquenqueshiretapinitirotsi. Naintquea pinquenqueshiretasanote nainti, naro materone noaneasanojeitempi pincantaitatiyempani paneasanojeitantapajeari anta inuitequi. Notimtani inuitequi, itiancaquena Apa quipatsiquica, natiritapaaque noaneajeitantajempiri.

²⁸Isampitiri jorio:

—Jaoca noncanteari nantanteanariri inintacaanari Tasorentsi?

²⁹Yacanajiri Jesoshi:

—Pinquemisantajeitena: irootaque inintacaajeitimpiri Apa.

³⁰Irosati isampitantanajiri:

—¿Paita ponijayenari nonquemisantempiri? Ariorica noneaquempi pintasoncante, ari niotaque queario picantaqueri.

³¹Peerani yora ashanincani yoajeitaro mana anta caaraiteriqui. Ocanti sanquenarentsi: “Ipeetaqueri yoari yoajeitarorori. Oponeaca inuitequi”. Tempa irio Moishishi pajeitaqueriri, irootaque iojeitantanacirri ashanincani ocameetsati irojajeiteri.

³²Icantanajiri Jesoshi:

—Queariotaque oca noncamantempiri. Te irio Moishishini perineri yoajeitari poneainchari inuitequi. Irinti Apa

pajeivetacariniri. Meeca icoaveta impempi pashini poajiteari, cameetsatasanotatsiri, poneachari inuitequi.

³³Noponeaca narori inuitequi, naniireapaque quipatsiqui noaneajeiteri maaroni atiri: noshiaquero poyeameri impemperi Tasorentsi.

³⁴Icantanajiri:

—Irosati pincanteani, novincatsarite, pimpapinitenaro ora noyeari picamantaquenari. Aiquero pimpapinitenaro.

³⁵Icantanajiri iriori:

—Narotaque shiirori oanarontsi aneacantsatsiri. Pocashitanari eiro aajiritsi itashe. Quemisantanari eiro imiretajitsi.

³⁶Aitaque nocantajeivetaquempi. Pineajeivetaquena, iro cantaincha te pinquemisantenaji. ³⁷Yora icantanari Apa: “Pinquempoyeajetenari”, iriojeitache pocashitajenneri. Pocashitapajeneri eiro noipiavajiritsi. ³⁸Te iro naniireantapeempa nantapeero nonintiri narori, irointi nante inintacaanari tiancanari. Irootaque naniireantapaacari. ³⁹Yontapee noquempoyeaqueneri Apa, eiro ipeatsi aparoni. Nontinaajeitajeri omoncaratapeemparica quitaiteri. Irootaque inintacaanari Apa tiancaquenari. ⁴⁰Maaroni neenaneri, ariorica inquemisantena, incantaitatiyempani iraneanaje inuitequi. Nontinaajeitajeri coajicani, omoncaratapeemparica quitaiteri. Irootaque inintacaanari Apa tiancaquenari.

⁴¹Irosati icantimajeitantanacariri joriopee. Iquemaqueri icantaqueri: “Narotaque shiirori oanarontsi, poneachari inuitequi”, irosati icantimajeitantanacari. ⁴²Icantajeiti:

—Tempa irootaque Jesoshi, itomi Jose. Tempa aneapinijeitiri iriri, iriniro aisati.

⁴³Paita icantantari: “Noponeaca inuitequi”?

⁴⁴Icantanaqueri iriori Jesoshi:

—Eiro picantimajeitanatsi. Eirome inintacairime Apa tiancaquenari, tecatsi

pocashitimatenaneme. Iriotaque nontinaajeri coajicani omoncarataapeem-parica quitaiteri.⁴⁵ Isanquenatacotitacarini peerani camantantatsiniri: "Tasorentsi iroamejeitajeri maaroni". Maaroni quemavaquerori icantiri Apa, iriotavaquerorica, impocashitena noavisacotan-teariri.⁴⁶ Noponeanaca Tasorentsiqui, irootaque noneantariri Apa. Tecatsi pashini neerine.⁴⁷ Queariotaque oca nocantimpiri. Yora quemisantanari incantaitatiyempani iraneajeitanaje inquitequi.

**Iriotaque Jesoshi shiirori oanarontsi
aneacantatsiri.**

⁴⁸ Jero oca icantajeitiri aisati:

—Narotaque oanarontsi aneacaantsi. ⁴⁹ Yoajeivetacaroni pishanincani mana peerani anta caaarateriqui, iro cantaincha yanteashipajetanaque, icamajetanaque.⁵⁰ Oca oanarontsi noquenquetsatacotiri oponeaca inquitequi. Eiro icamanetajitsi oaquareoneri irinti. ⁵¹ Narotaque shiirori oanarontsi aneatsiri, noponeaca inquitequi. Maaroni oyearoneri oca oanarontsi incantaitatiyempani iraneajeitaje inquitequi. Nompa-jeiteri maaroni atiri iraneajeitajeari: irootaque novatsa.

⁵² Irosati icantavacaajeitantanacari joriopee. Icantajeiti:

—Jaoca incanteari yoca impanteerori ivatsa avantearori?

⁵³ Icantajeitiri Jesoshi:

—Queariotaque oca noncamantempiri. Noponeaca inquitequi, natiritapaaque. Eirorica poarotsi novatsa, aisati eirorica pirrotsi niraja, eiro paneajitsi.⁵⁴ Maaroni oyearoneri novatsa, aisati ireroneri niraja, incantaitatiyempani iraneaje inquitequi iriori. Nontinaajeri coajicani omoncarataapeemparica quitaiteri.

⁵⁵ Novatsa irootaque oanarontisanori. Niraja irootaque ireetasanoyeetiri.

⁵⁶ Oyearoneri novatsa aisati ireroneri niraja irosati incantea, quiso iroajena. Aisati nonquempetea narori, quiso noajeiteri.⁵⁷ Aneatsiri ini Apa tiancaque-nari: iriotaque oaneaquinari narori. Aisati inquempejeitea iriori oyearoneri novatsa, noaneajeiteri maaroni.⁵⁸ Irootaque oca oanarontsi amiireapaintsiri inquitequi. Te onquempetearoji ora yoajeivetacaniri peerani pishanincani. Tempa icamajetitaque irinti. Yora oyearoneri oanarontsica nocantaquemperi incantaitatiyempani iraneajeitanaje irinti inquitequi.

⁵⁹ Aitaque ocanta icantajeitaqueriri Jesoshi anta pancotsiqui yapatojeitantari. Otimi anta Caperenaoqui.

**Jero oca icantiriri Jesoshi
quemajeivetacariri.**

⁶⁰ Oshequi catsini quemajeivetavacarori yoamejeivetacariri, irosati icantajeitanta-naja:

—Te oncameetsate oca icantiri, tecatsi ancantea anquemisantero.

⁶¹ Iotashitaca Jesoshi icantimentavacaajeitacaro yora yoamejeivetacari.

Icantanajiri:

⁶² —Terica oncameetsatimotempi oca nocantaquemperi. Peerani noponeanaca narori inquitequi, natiritapaaque. Coajica pineajeitavajena nompianaje aisati jenoqui. Impoiji, ḡpaita pinquenqueshirejeiteri?

⁶³ Ishire Tasorentsi, irootaque oaneajeitajerineri maaroni savicajeitatsiri inquitequi. Eiro isavicajeititsi maaroni atiri. Oca nocamantaquemperi oshiyavetaro Ishire Tasorentsi: ariorica pinquemisantero, ari oaneaquempi inquitequi.⁶⁴ Niotaçojeitimpi: timtsi picarajeitica caari quemisantsatsine.

Peerani iotitari Jesoshi caari quemisantajeitatsine. Aisati iotitacari aacanterineri coajicani.⁶⁵ Icantanaqueri:

—Niotaque te pinquemisantajeitenaji maaroni, irootaque nocantantaquemperi

incaranqui: "Eirome intintacairime Apa, tecatsi pocashitenaneme narori".

⁶⁶Irosati yojocaarantantanajari oshequi yora yoamejeivetacari. Te meeca irojajeitanajeriji. ⁶⁷Irosati icantajeitantanajari Jesoshi:

—Noamerepee, ¿aisatimpa pojocajeitajenena avirori?

⁶⁸Yacanaqueri Shimo Petero:

—Novincatsarite, eirorica noijatimpitsi, ¿janicampa noijatanajeri? Incantaitatiyempani iraneajeitanaje inquitequi maaroni quemisantajeitirori pineane. ⁶⁹Noquemisantajeitimpi, niojeitanaquempi; aviotaque itiancane Tasorentsi, picameetsataque.

⁷⁰Yacanajiri Jesoshi:

—Tempa nocoyeajeitaquempi. Picarajeitiaca 12, iro cantaincha aparo picarajeitica, irotaque camaaritajantsineri.

⁷¹Iquenquetsatacotaqueri Jorashi Ishicariote, yora itomi Shimo. Ainiroquera icarajeivetana maaroni. Iriotaque aacanterineri Jesoshi coajicani.

**Jero oca icantayetiriri carireasati,
jeri jerosaresati.**

7 ¹Irosati iquenantanaca Jesoshi Carireaqui. Icoaveta joriopee iroyerime, irotaque caari icoanta irijate Joreaqui. ²Irotimataintsi inquimoshirejeitanteeari joriopee. Irotaintsi irovetsicajeitero pancotsijaniqui inquenqueshirejeitanteearori iquenajeitanaque ishanincani caaraiteriqui. ³Irinentipee Jesoshi icantajeitiri:

—Pijate meeca Joreaqui. Pinijaayeta-peeri poamerepee anta paitarica pantayetiri. ⁴Pincoaquerica irijoitempi maaroni atiripee pinquenaquenayetanaque irineajeitantempiri. Eiro pimanirotsi paitarica pantayeteri. Ariorica pintason-cantayete, pinijaayeteri maaroni atiri.

⁵Te inquemisantajeiteji irinentipee iriori, ⁶irotaque icantantarori. Icantajeitanajiri Jesoshi:

—Tequerata omoncarateaji nomatan-tearori. ⁷Avirojei, pijajeite avinti. Tecatsi incantea atiri inquisajeitempi avinti. Irompa nainti, iquisajeitaquena.

Nocamantajeitaqueri: "Te oncameetsateji oca pantayetiri", irootaque iquishimenta-quenari. ⁸Pintoncaajeitanaquetsita avinti Joreaqui. Eirotsita nojatita narori, tequeratsita omoncarateaji nojatanteari.

⁹Aitaque icantajeitaqueriri Jesoshi.

Isavicanaji Carireaqui. ¹⁰Irinti irinentipee jajeitaintsi Joreaqui, itoncaajeitanaque, tonca, tonca. Iquimoshirejeitapaaque. Impoitanaji iriori Jesoshi, itoncaanaji, iro cantaincha te irinijaantapeempaji: te incoyeji irineeyeteri. ¹¹Icanta joriopee iquimoshirejeitanaque. Icoajeivetacari Jesoshi Jerosarequi, icantajeiti:

—¿Jaoca meeca yoranqui Jesoshi?

¹²Apatojeitainchari anta icantavacaajeitanaca. Icantacoyeriri Jesoshi:

—Cameetsari ini.

Pashini cantayetaintsi:

—Te incameetsateji, irointi yamataviri atiri.

¹³Iro cantaincha itsaroacaajeitacari atiripee yora jivatacaaajeitiriri, irotaque imanacojeitantacarori icantacoyeriri Jesoshi.

**Yoametantaque Jesoshi anta
ivancoqui Tasorentsi.**

¹⁴Yovaanajiro aisati iquimoshirejeitana-ji. Itoncaanaque Jesoshi iriori ivancoqui Tasorentsi, yoametantapaaji.

¹⁵Yoajeitanaque cavaco joriopee. Icant:

—¿Jaoca icantari iotantarori paitapee-rica? Tecatsi oameterine.

¹⁶Yacanaqueri Jesoshi:

—Te naro iotashitearone oca noame-timpipi, irinti iotacaanaro yora tiancaque-nari. ¹⁷Pincoasanoterica panteneri inintacaquempiri, aitaque piotanaque.

Piotanaque itiancaquenarica Tasorentsi.

Piotanaque noneaveetashitarica. ¹⁸Yora

neaveetashitachari icoi impincatsayeeye-
teri iriori. Intimerica coatsiri impincatsa-
yeeyeteri tiancaqueriri, icameetsati iriori;
te irioteji iramatavitante. ¹⁹Tempa
irootaque icantajeitimpiniri Moishishini
peerani: "Jeroca pantayeteri". Iro
cantaincha tecatsiaca matasanojeitero-
neri oca icantaquempiniri. ²⁰Paita
pisareantanari poyena narori?

²⁰Yacajeitanaqueri apatojeitainchari:
—YoitsaviantaqueMPI camaari. ²¹Janica
sareimpiri iroyempi?

²¹Yacanaqueri:

—Jero aparo notasoncantaque saavar-
qui, meeca poajeitanaquena cavaco
maaroni. ²²Icantimpiniri Moishishini:
"Pintoyeantea". Iro cantaincha caari ini
Moishishini cantasanotatsine, irintiquea
yora intasanotaroniri. Irootaque meeca
pitoyeantantacari. Pitoyeantapinita aisati
saavarouqui amaoresentari. ²³Tempa
pitoyeantapinita saavarouqui, pimoncar-
tantarori isanquenatiniri. Irosati saavar-
ouqui noavisacotantariri yora shirampari.
Aiquero pi quisananitiana. ²⁴Pataquea?
²⁴Ariorica pamenavoroteri pishaninca,
eiro picantashitasi: "Cameetsari ini. Yora
pashini te incameetsateji". Pijivateta
piotasanofteri, impoijiquea piotanaque
paitarica pinquenquetsatacoteriri. Aisati
onquempetea, pinquenqueshiretasanotero
nocantimpiri piotasanonantenari.

Iponeanaca Quirishito Tasorentsiqui.

²⁵Irosati icantayetantanaca jerosaresati
aparopee:

—Caarimpa yoca icoyeetiri iroyeeteri?

²⁶Pameneri meeca, yoametantayeti, te
irimaneroji. Tecatsi cantimenterine:
"Pimajerete". ²⁷Yaamaajeitarimpa
avincatsarite iriosanotaque yoca
Quirishito? ²⁷Iro cantaincha ayotacojeita-
queri arori jaoca iponeacari yoca.
Impocasanotapaajerica Quirishito, tecatsi
iotacoterine jaoca imponeempari iriori.

²⁸Yoametanti Jesoshi ivancoqui
Tasorents, icanti:

—Piojeitanampa? ²⁹Piotimpa jaoca
noponeacari? Te nompocashiteaji, timatsi
tiancaquenari: icameetsatasanotaque
catsini. Te pioteriji avinti, ²⁹narori niotiri
nainti. Iriotaque tiancaquenari, iriotaque
noponeimotacari.

³⁰Irosati icoajeitantavetacari
iraayerime. Iro cantaincha tecatsi
ayerine. Tequeratsita omoncarateaji
iraanteeeariri.

Irotaintsi irijataje Jesoshi.

³¹Osheequi apatojeitainchari quemisan-
tajeitaqueriri. Icantayeti:

—Ariorica impocapaaque Quirishito,
iranaacotapeerimpa Jesoshi intasoncanta-
yetapee?

³²Yora variseopee iquemajeitavaqueri
atiri iquenquetsatacojeitaqueri Jesoshi.
Irosati itiancantacari variria iraayerime.
Iriojeitaque tiancaqueriri jivatacajeitiriri
saserotepee, variseopee aisati. ³³Irosati
icantantanacari Jesoshi atiri:

—Capichanivaniji nontsipajeitana-
jemp. Irotanaintsi nompianaje tiancana-
riqui. ³⁴Pincoajeitvajenarica, iro
cantaincha eiro pineajanatsi. Jaocarica
nosavicapaaaje eiro pimatirotsi pijataje
avirori.

³⁵Icantanaque jorio:

—Jaocampa irijateri yoca eiro
aneantajaritsi? ³⁶Ariompa irijatashiteri
ashaninca savicayetatsiri pashinipeequi
nampitsi? Irioyeata oamejeitapeerine
itsipapee atiri. ³⁶Jero icantaque: "Pincoa-
jeitvajenarica eiro pineajanatsi.
Jaocarica nosavicapaaaje eiro pimatirotsi
pijataje avirori". ³⁷Paita icantantari?

Nija oaneantatsiri.

³⁷Irootaque quitaiteri ivecaratantarori
iquimoshirejeitanaque. Irosati icatianta-
naca Jesoshi. Icjemanaque:

—Maaroni miretatsiri impocashitenata irirapeeta,³⁸ontimanteari ishirequi quemisantanari njia oaneantatsiri, oncontejatapaaqueri. Aitaque oquenquetatsatacrito Sanquenarentsi njia nocantaquempiiri.

³⁹Iro ishiacantaqueri nijatatsiri Ishire Tasorentsi, quiso oajeiterine quemisanta-jeiterine corajicani. Iro cantaincha tequeratsita iroancajeiji Jesoshi jenoqui, irootaque caariqueru opocashitantar quemisantajeitatsiri.

Icantavacaimentajeitari Jesoshi.

⁴⁰Apatojeitainchari ara iquemajetava-queri icantaqueriri Jesoshi, irosati icantayetantanaca aparopee:

—Iriotsanotaque yoca camantantatsiri aamaajeitacari.

⁴¹Pashini cantayetatsi:

—Iriotaque Quirishito.

Pashini cantatsi:

—¿Ariompa imponeempari Quirishito Carireaqui? ⁴²Tempa ocanti Sanquenarentsi: “Quirishito irio irishanincatajeari Iravirini. Imponeaquea Verequi, anta isavicateitani Iravirini peerani”.

⁴³Impoiji icantavacaimentajeitacari Jesoshi. ⁴⁴Timatsi aparopee coayeveta-chari irayerime, iro cantaincha te irimateroji. ⁴⁵Ipiajeitanaja variria.

Yareetapaajari jivatacaajeitiriri saseroteppe, jeri variseopee. Icantajeitavajiri:

—¿Paitasa caari pamantanari aca?

Nocantavetimpi incaranqui: “Pamaque-nari”.

⁴⁶Yacanaqueri:

—Cameetsa ineanati yonta shirampa-rinta. Cameetsa yoametanti, tecatsi pashini quempetearine.

⁴⁷Icantavaqueri:

—¿Yamatavitajimpimpa aisati avirori?

⁴⁸¿Iquemisantaquerimpa jivatacaairi ashaninca arori? Te inquemisanteri.

¿Iquemisantaquerimpa variseo? Te.

⁴⁹Yonta atirinta te irionirojeiteroji Sanquenarentsi. Te oncameetsateji impincatsajeiteri Jesoshi: iroasanquejei-teri Tasorents.

⁵⁰Itimaiti ara Nicoremo, ananincashita-naqueriri Jesoshi chapinqui. Itsipatava-caajeita ivariseoririnte, icantanaqueri:

⁵¹—¿Paita ocantiri Sanquenarents?

¿Oshinetantampa ancantashitea: “Te incameetsateji Jesoshi”? Tempa ocameetsati ajivatavaqueri anquemisanteri incantaqueeri. Tempa ocameetsati aisati ajivataque ayote pitarica yantayeta-queri.

⁵²Yacanajiri:

—Aviroyeata avirori carireasati. Pineanatasanotero Sanquenarentsi piotanteari te imponeempaji Carireaqui camantantatsiri.

⁵³Irosati ijajeitantanaja maaroni ivancopeequi.

Tsinane aimentariri ojime.

8 ¹Yora Jesoshi ijatanaque toncaariqui, ipajiyetironta Orivomashi. ²Oquitatetamanaque ipiapaja ivancoqui Tasorentsi. Maaroni atiri ijatashijetajiri. Isavicapajji, yoametapajiri. ³Yamajeita-paaqueneri aparoni tsinane, ineetaquero aimentacari ojime. Irio amirori oametan-tirori Sanquenarentsi, jeri variseopee. Isatecaquero nianqui, ⁴icantapaaqueri:

—Oametantatsiri, ineetaquero oca aimentacari ojime. ⁵Peerani icantini Moishishini ocameetsati ampichanatero aimentariri ojime. ¿Paita picantiri avirori?

⁶Ineantavetari, icoajeiveta incomitacaye-rame, irootaque icantantajeivetariri. Itsentetanaque Jesoshi, isanquenatantana-caro iracotsapaqui quipatsi. ⁷Yapivetajiri:

—¿Paita picantiri?

Icatianaja Jesoshi. Icantajeitiri:

—Timatsirica picarajeitica meeca caari antiro caari cameetsatatsi, irijivaterota

impicheero; impoiji ari pimpichaajeitero maaroni.

⁸Yoivotanaja aisati. Isanquenatanaji aisati quipatsiqui. ⁹Maaroni quemajeita-vaqueriri, ijajeitanaji. Ijivajeitanaji yora anteashiparipee, impojeitanajiri iriori maaroni evancaripee, ijajeitanaji. Apanivaniji irinti Jesoshi, jero iroori tsinane. Irosati ocatia ara. ¹⁰Icatianaja aisati. Tecatsi irineaje, irointi tsinane apaniro. Icantiro:

—Jaoca meeca yoranqui quisajeita-queempiranqui? ¹¹Tempa intimeji quishimentempiron pantiri?

¹¹Ocantanaqueri iroori:

—Te aneajeriji, novincatsarite, jajeitanaji inaji.

Irosati icantantajaro:

—Aisati narori, eiro noquishimentimprotsi. Pijataje meeca, eiro papiitajirotsi caari cameetsatatsi.

Irio Tasorentsi camantacotiriri Jesoshi.

¹²Ineanatajiri aisati Jesoshi atiri, icantajiri:

—Narotaque iotacaajeitiriri atiripee, oquempetaca noquitaitetacojeitiri. Eiro iquenashiyetanajatsi tsiteniriqui oijajeitnaneri. Queario, naro iotacaajeitiriri atiripee, aisati oaneajeiterineri.

¹³Irosati icantantanacari variseopee:

—Avisati camantacotashitacha.

Irootaque caari otampaticatanta picantayetaqueri.

¹⁴Yacanajiri Jesoshi:

—Je, narosati camantacotacha, iro cantaincha otampaticati nocantaqueri. Iro otampaticatancari nioti nainti jaoca noponeacari. Aisati nioti jaoca nojatajeri. Te piojeiteji avinti jaoca noponeacari, aisati te piojeiteji jaoca nojatajeri.

¹⁵Piquempejeitacari pashinisati atiri: te piojeitenaji, iro cantaincha picantacoven-tashijeitaquena. Naintiquea, te meeca noncantacoventempiji. ¹⁶Iro cantaincha,

noncantacoventempime meeca, ontampa-ticatemne noncantacoventempime.

NiotaqueMPI; aisati quiso yoaqueña Apa tiancaquenari, iotaquempi aisati. Nocara-taque apite iotasanojeitimpiri. ¹⁷Tempa ocanti Sanquenarentsi pineanatapinitiri: “Apiterica incarate camantacoterineri ashaninca, ari paamaya queariotaque incanteri”. ¹⁸Ari nocamantacotaja narosati, icamantacotana Apa tiancaque-nari iriori; apite nocanta.

¹⁹Icantanaqueri:

—Jaoca meeca piri?

Yacanajiri Jesoshi:

—Te piotenaji. Te piojeiteriji aisati Apa. Ariorica piojeitaquename piotaque-rime aisati Apa iriori.

²⁰Irootaque icantajeitaquerir Jesoshi anta ivancoqui Tasorentsi. Icatianaja anta ipapinjeitirinta Tasorentsi quirequi. Tequera omoncarateaji incamanteari Jesoshi, irootaque caari imatanteetari irayeeteri.

Yora caari quemisantatsi, incanteani irantapinitero caari cameetsatatsi yantayetiri.

²¹Yapiitajiri aisati:

—Irotimataintsi nojataje. Pincoacoajei-vetajena pineajename aisati, iro cantain-cha eiro pineajanatsi. Irotaintsi nojataje. Pincoajeivetea pojajeitena, iro cantain-cha eiro pimajeitirotsi pijajeitaje nojatajenta narori. Irosati pincanteani pantapinjeitero caari cameetsatatsi irosati pincamanteari, irootaque pijajeitanteeari Sharincaveniqui.

²²Icantajeitanaque jorio:

—Irisatiyeata oajanchane. Piquemaque-rinea icantantari: “Irotaintsi nojataje, eiro pimajeitirotsi pijajeitaje nojatajenta narori”.

²³Icantajiri Jesoshi:

—Avirojeitaque timajeitatsiri quipatsi-quica. Noponeaca nainti jenoqui. Aca

quipatsiquica irootaque pisavicantajeitari avirori. Te nosavicasanote narori quipatsiquica.²⁴ Irootaque nocantanta-quempiри incaranqui: “Irosati pincanteani pantapinijeitro caari cameetsatatsi irosati pincamanteari”. Eirorica piquemisantirotsi nocantakuempiri, irootaque pijatanteari Sharincaveniqui.

²⁵Isampitajiri:

—¿Janicampimpa?

Icantanajiri iriori:

—Aitaque nocamantasanovetaqueMPI.

²⁶Timatsi oshequi noncamantempimeri; optimi aisati pantayetiri noncantacoven-tantempimeri. Iro cantaincha icameetsataque tiancaquenari, timatsi icamanta-quenari iriori: irootaque oca novaquene-riri atiri.

²⁷Te iriojeiteriji joriopee irio iquenquesatacotaqueri Jesoshi Iriri. ²⁸Icantanajiri Jesoshi:

—Ariorica poatiacotaquena, aitaque piojeitanaqueunari. Piojeitenanoponeana-naca inquitequi, natiritapaaque. Aisati piojeitanaque tecatsi nantashitea nainti. Noneanatiro oca yoametaquenari Apa tiancaquenari,²⁹ quiso yoana iriori. Irosati nantiniri narori paitarica inintacaquenari iriori, irootaque caari yojocantana.

³⁰Aitaque ocantari icantaqueriri. Icarati oshequi quemisantajeitanaqueriri.

Yora camaari iririntajeitacari caari quemisantajeitatsi.

³¹Irosati Jesoshi icantajeitantanajari joriopee quemisantajeivetacariri:

—Ariorica pincantaitatiyempani pishiretearo noneane, avirosanojeitaque noamere. ³²Aitaque piotavaquero queariotsiri. Irootaque oipacaacoventajempineri. Eiro itimajitsi peranatajempineri aisati.

³³Yacanaqueri:

—Narojeitaque ishanincani Avaramani. Tecatsi peranatenane. ¿Paitasa picantan-

tanari: “Oimpacaacoventajempi queario-tatsiri”?

³⁴Yacanajiri Jesoshi:

—Queariotaque oca noncamantempiri. Timatsi peranajeitariri maaroni antajeiti-rori caari cameetsatatsi. Ora caari cameetsatatsi yantapinijeitiri, oshaveta-carri peranajeitariri. ³⁵Yora peranarontsi eiro icantatiani irisavicasanote ivancoqui peranatariri. Irintiquea itomi ashitarori ivanco incantatiyempani irisavicasanote inti. ³⁶Narotaque itomi Tasorentsi.

Ariorica noimpacaacoventajempi, eiro yapiyeetajimpitsi iromperanayeetajempi. ³⁷NiotasanojeitaqueMPI, avirojeivetaca ishanincani Avaramani. Iro cantaincha te pinquemisanteroji noneane. Irootaque pisareantanari poyena. ³⁸Ora icamanta-quenari Apa, irootaque nocamantajeitimpiri. Ora icantimpiri piritajeitari irootaque pantapinijeitiri avirori.

³⁹Yacanaqueri:

—Nirintajeitacari Avaramani.

Icantanajiri Jesoshi:

—Avirome ishanincani Avaramani, aitaque pinquempejeitajearime. Iquemi-santini peerani iriori; pishanincataquearime, pinquempejeitaquearime avirori, pinquemisantajeitaquename. ⁴⁰Narotaque neanavetarori queariotsiri noquemiriri Tasorentsi. Iro cantaincha pisareajeitana poyena. Te inquempeteaniji inti Avaramani. ⁴¹Pantapinijeitiro avinti yantayetiri pirintasanotari.

Irosati icantajeitantanacari:

—¿Pashinimpa ashitana? Apaniro ini nirintajeitari. Iriotaque Tasorentsi.

⁴²Icantajeitaqueri Jesoshi:

—Irioricame piritajeiteame Tasorentsi aitaque pinintajeitaquename narori. Te nompocashiteaji; aitaque noponeacari Tasorentisqui, iriotaque tiancaquenari.

⁴³¿Paita caari piotantavacaro nocantimpiri? Te pimateroji pinquemisantero noneane. ⁴⁴Camaari ini pirintajeitacari.

Irootaque picoantajeitacari pantapinijeiti-niri inintacaajeitimpri. Oantsiri ini peerani: irio nijantirori yoanti. Te inquenqueshireteroji quearioyetatsiri, irootaque caari icameetsatanta. Tseeyari ini, irootaque itseyantacari. Yashi yoiro itseyya. Iriotaque tseyaya yetariri atiri.
⁴⁵Irompa nainti nocamantavetaquempiro queariotatsiri, te pinquemisantenaji.

⁴⁶¿Timatsimpa aca neaquerenari narori nantiro caari cameetsatatsi? Tempa otampaticati nocantajeitaquempiro. ¿Paitampa caari piquemisantantana?
⁴⁷Maaroni itomintajeitari Tasorentsi, iriojeitaque quemisantajeitirori irineane. Te intomintajeitempiji avirori. Irootaque caari piquemisantantaro irineane.

⁴⁸Irosati yacantanajari jorio:
—Queariotaque nocantajeitimpri. Avirotaque samariasati, yoitsavianta-quempi camaari.

⁴⁹Yacanajiri:
—Te nontsaviateji. Nopincatsatiri Apa. Irompa avinti te pimpicatsajeiteriji; pitseenajeitiri avinti.
⁵⁰Te noncoyeji impincatsayeetena nainti. Irintiquea Apa coantsi impincatsayeetena. Aisati iriotaque cantacoventajeiterineri maaroni tseenajeitanari.
⁵¹Queariotaque oca nocantimpri. Quemisantavaquerori noneane eiro icamanetajitsi.

⁵²Irosati icantanajari joriopee:
—Meecaquea niotasanojeitaquempi pitsaviataque. Camaque Avaramani. Aisati camantantatsiniri, camajeitaque iringi. Aiquero picanti: “Eiro icamitsi quemisantajeitirori noneane”.
⁵³Camaque ashanincani Avaramani. Camajeitaque iringi camantantatsiniri. ¿Arimpa pijipincatsaritashitaca? ¿Pijivetampa panaacojeitiri maaroni peeraniniri pipincatsaritasanotaque avinti?

⁵⁴Yacanajiri Jesoshi:
—Narosatiricame jitashitachaneme nopincatsatiraque, tempa nantsipetea-

rome. Apa, yora picantajeitiri avirori: “Notasorentsits”, iriotaque pincatsarita-caaquerenari.
⁵⁵Te piojeiteriji. Nainti niotiri. Ariorica noncantaqueme narori: “Te niotjeriji”, aitaque nonquempeta-quempime, nontseeuya queame narori. Irompa niotiri. Noquemisantiro irineane.
⁵⁶Icamantacotaquerenani pishanincani Avaramani, icantini: “Coajica ontine quitaiteri noneanteeariri Quirishito, irootaque noquimoshiretacari”. Ari ineaqueña, irosati iquimoshiretasanotantanacari aisati.

⁵⁷Icantanaqueri jorio:

—Tequeratsita oncarate pisarintsite 50.
⁵⁸Icantanajiri Jesoshi:

—Queariotaque oca noncamantempri. Tequeratsitani intimeni iringi Avaramani, notimitani nainti. Je, noneiri.

⁵⁹Irosati yaantajeitvetanaca mapi, impichaa jeiterime. Iro cantaincha ipeapitsajeitanajari ivancoqui Tasorentsi, inecotashitapaaja jaocarica anta.

Yoavisacotiri Jesoshi quitapoajari.

9 ¹Ari iquenanaque anta Jesoshi. Ineapaaqueri aparoni shirampari quitapoajari. Aitaque icantitapaani iroquera itimapaaque.
²Nocarajeitiri iroamerepee nosampijeitiri:

—Oametenari, ¿paitampa itimantapaari quitapoajari? ¿Irompa yantayetiro caari cameetsatatsi ashitariri iquitapoajatantacari itomi? ¿Irioricampa yoca antaquerori caari cameetsatatsi iquitapoajatantacari?

³Yacanajiri Jesoshi:

—Tecatsi irante, iquitapoajatashitaca. Aisati ashitariri, tecatsi irante. Iro iquitapoajatantacari yoca intasoncaventantajeariri Tasorentsi. Icoacaajeitari atiri iriojeitanaque queario itasorentsitsaque. Ainiroquera meeca oquitaiteti.
⁴Ocameetsatimotana nanteneri meeca tiancanari inintacaanari.

Ariorica ontsitenitanaje, tecatsi matajerone irantaveetaje.⁵ Ainiroqueratasina quipatsiquica narotaque iotacaajeitaqueriri atiri.

⁶Irootaque icantaqueriri, irosati iquitiojantanacaro quipatsi. Ocavavatsataque oca iquitiojaqueri quipatsi, irosati ipatsancajaquitantacari quitapoajari.

⁷Icantajiri:

—Pijate anta Shiroequi, pinquivajaquijantanea.

Incrajare oni Shiroe. Acanti aneanequi arori: Itianqueetiri. Irosati ijatantanaca, iquivajaquitapaca. Ipiaja, amenanaji ini.

⁸Itimi ara inampquiniri, aisati yora neapinitiriri yamanantapiniti quirequi. Icantajeitanaque:

—¿Caarimpa yoca yoranqui savicapintatsiri amanantapinitatsiri quirequi?

⁹Aparopee cantayetanaintsi:

—Iriotaque.

Pashini cantayetatsi:

—Caari ini. Shiavtariri ini.

Icantanaque iriori:

—Narotaque.

¹⁰Icantajeri:

—¿Jaoca icanteetajimpiri pamenantajari?

¹¹Yacanaqueri iriori:

—Yora shiramparinta pajitachari Jesoshi icajavatsataquero quipatsi, ipatsancajaquitantajanaro noquiqui. Icantajana: “Pijate Shiroequi, pinquivajaquitajantea”. Nojatanaque, noquivapaa; irosati namenantanaja.

¹²Irosati icantantanajiri:

—¿Jaocarieame iriori?

Yacanajiri:

—Jaocarica, te nioteji.

Icantavacaimentajeitanacari Jesoshi.

^{13,14}Irootaque saavaro icajavatsatantacarori Jesoshi quipatsi yamenacantajariri quitapoajaveitachaniri. Iro saavaro imaooreanteevetari. Ari yayeetanaqueneri variseopee,¹⁵ isampitavaqueri:

—¿Jaoca icantajimpiri?

Icantiri:

—Ipatsancajaquitaquena quipatsi noquiqui, irosati nojatananaca noquiva-jaquitaja. Meeca namenanaji.

¹⁶Irosati icantantanaca variseo aparopee:

—Yora shirampari yantaveetantaro saavarro. Te imponeempaji Tasorentsiqui.

Pashini cantayetatsi:

—Irioricame antayetirori caari cameetsatatsi, eiro imatirome intasoncantayeteme.

Irosati icantavacaimentantajeitanacari.

¹⁷Yapiitajiri isampitajiri:

—¿Paita pijitiri avirori yora amenacaajimpiri?

Icantanaqueri:

—Nojitiri itiancane Tasorentsi.

¹⁸Yora joriopee te irishiretearoji iquitapoajaveitani. Icajamacantaqueri iriri, jero iriniro,¹⁹ isampitavaqueri:

—¿Iriotaquempa yoca pitomi picantiriranqui: “Itimapaaque quitapoajari”?

—¿Jaoca icantajari yamenantajari meeca?

²⁰Yacanaqueri:

—Je, iriotaque notomi. Noneasanotiri yashi yoyer iquitapoajatapaaque.²¹ Jaocarica icantajari yamenantajari, te nioteji narori. Te nioteji aisati janicarica amenacaajiriri. Te irijananequitajeji meeca. Pisampiteri iriori. Irisati camantacotajanchane.

²²Yora ashitariri itsaroacaacari joriopee, iotaque aitaque yapatotimentajeitacari Jesoshi. Icantajeititaca: “Intimerica cantatsine: ‘Iriotaque Jesoshi Quirishito’, eiro ashinetajiritsi irinti intsipajeitee anquemisantajeite”. Irootaque itsaroajeitanacari ashitariri,²³ irootaque icantantanacariri: “Te irijananequitaje meeca notomi. Irio pisampite”.²⁴ Ari yapiitajiri icajemajiri.

Icantavaqueri:

—Tasorentsi pimpincatsate. Yora shirampari niojeitiri irio antayetirori caari cameetsatatsi.

²⁵Irosati yacantanacari iriori:

—Irioricampa antayetirori caari cameetsatatsi, te nioteji narori. Apatiro niotaque noquitapoajaveitani, meeca namenanaji.

²⁶Icantanajiri aisati:

—¿Jaoca icantajimpiri yamenacanta-jimpiri?

²⁷Yacanajiri iriori:

—Aitaque nocamantavetaquempi incaranqui, iro cantaincha te pinquemisanteroji piquemavetaquenari. ¿Paita picoantari aisati pinquemajero? ¿Picoajeitajimpa avirori pimpeajeitacea iroamere?

²⁸Irosati iquisatsatantanacariri, icantanaqueri:

—Avironirotaque avinti iroamere. Naro nainti iroamerepeeni Moishishini.

²⁹Niojeiti iquenquetsatacaquerini Tasorentsi Moishishini peerani. Irompa yoranqui, te niojeiteriji jaocarica iponeacari iriori.

³⁰Yacanajiri iriori:

—Iriotaque amenacaajanari. Piojeiteri-quetite avirori jaocarica iponeacari, irootaque noantanaquempi cavaco.

³¹Ayotacojeitiri Tasorentsi, te inquemeriji antayetirori caari cameetsatatsi. Yora quemisantiriri Tasorentsi, antirori inintacaqueriri, iquemapinitiri irinti.

³²Te anquemacotapiniteriji amenacaye-rine timapaatsiri quitapoajari. ³³Eirome iponeame Tasorentsi qui, tecatsi irimateme.

³⁴Yacanajiri:

—Peerani pitimantapaacari te pincameetsataapeeni. ¿Arimpa picoaque meeca poamejeiten?

Irosati yojocantanajari.

Iquemisantaque quitapoajaveitachaniri.

³⁵Iquemacotajiri Jesoshi yojocajeita-queri quitapoajaveitachaniri. Impoiji ineapaajiri aisati, icantapaajiri:

—¿Piquemisantirimpia Atiritapaintsiri?

³⁶Ari yacanaqueri:

—¿Jaoca itimirí, apa? Nonquemisan-teri.

Yacanaqueri:

³⁷—Tempa narotaque: noponeanaca inquitequi, natiritapaaque. Pineaquena, meeca noneanataquempi.

³⁸Icantanaqueri:

—Noquemisantimpi, Novincatsarite. Itiyeroashitanacari. ³⁹Icantiri Jesoshi:

—Irootaque nopocantacari quipatsiqui noncantajeitanteeariri atiri jaoca incanta-jeiteari. Namenacaajeitjeri quitapoaja-vetachari. Yora amenajeivetachari nonquempetacantajeri quitapoajatatsiri. Pinequero, niotacaajeiteri caari iojeitatsi; irinti iovetachari nompeapitsa-tjeri iotantavetari.

⁴⁰Yora variseopee itsipajeitacari, iquemajeitavaquero icantaquerir. Irosati icantajeitantanaca aparopee:

—¿Jaocampa nocantajeitari narori?

¿Noquitapoajatimpa?

⁴¹Yacanajiri Jesoshi:

—Pinquitapoajateeme, eiro otimime pantane; iro cantaincha picantajeiveta: “Namenajeiti”, irosati picantani pantapi-nijeitiro caari cameetsatatsi.

Yora Jesoshi iquenquetsatacotiri ashitariri irovishate.

10 ¹Aisati yoametanti Jesoshi, icanti:

—Queariotaque oca noncamantempi. Tempa yoiminqueapinitiri ashitariri irovishate itantoqui iquempoyeantariri. Yora coshitiriri irovishate, te inqueapeeji omoroqui, ainti yataitashitapaaqueri ariquerora. Icanti: “Ineanacari ashitariri”.

^{2,3}Intimerica iratirite shentiniriri omoro, ariorica impocapaaque irinti ashitariri, ari irashireavaqueneri, irishineteri iravisanaje. Ariorica inqueashitapaajeri, incajemapeeri ivajiropee, ari impocashi-

jeiteri, eiro itsaroacaavacaritsi. Impoiji iraajeitanajeri anta paashitomashiqui, ⁴irijivatanaqueri. Ari iotsajeititiri irineane, irootaque yojajaeitanariri. ⁵Ariorica incajamaveteari caari inepiniti, eiro iotsajeitavaqueritsi irineane. Eiro yojajaeitirtsí, aintquea irishiapitsajeitanaqueri.

⁶Aitaque ocantari ishiacaaventaqueñeriri Jesoshi, iro cantaincha te iriojeitavaqueroji icantavetacariri. ⁷Icantajeitaqueri aisati:

—Queariotaque oca noncamantempi. Narotaque shiacaventachari omoro tantorentsi iqueapinitantari ovisha. ⁸Maaroni jivajeitaquenari, coshinti ini irinti, coshitantatsiri; irootaque caari iquemisantajeitantari ovishapee. ⁹Narotaque iqueapinitantari, nareetacaajeiteari maaroni pocashijeitenane. Iriojeitaque avisacotajantsine. Inqueapinijeite, aisati irijatashitapinitero iroyeari. ¹⁰Ipcashitiri coshinti icoshiteri ovisha, iroyeri, impoyereeri. Irompa nainti, nopocashitiri naneacaajeiteri oijajeitenaneri, naneacaasanojeitajeri inquitequi. ¹¹Narotaque ashitariri cameetsari, irootaque nocooantacari noncamimenteri novishate. ¹²Te nonquempeteariji oisantiniriri ashitariri. Caari ini ashitariri ovisha. Ariorica irineavaqueri maniti impocapaaque, intsaanaque, irishiapitsatanaqueri; irojocanaqueri ovishapee. Irosati iraantapeempariri maniti ovisha, irovarayeta-peeri. ¹³Aitaque icantari oisantiniriri irovishate. Te inquenqueshireteriji ovisha, irinti iquenqueshireti quirequi impinayeeteri, irootaque ishiantanacari. ¹⁴Narotaque ashitariri cameetsatatsiri. Niotiri novishate. Yora nashjeitacari iojeitaquena iriori. ¹⁵Aisati iquempeta Apa, iotaquena; aisati niotiri narori. Coajica noncamimentajeiteri novishate noavisacotanteariri. ¹⁶Ainiro aisati pashini, tequerata noviratajeari aca.

Iriojeitaque nampatojeitajeri. Ariorica noneanateri irlotsatavaquena, inquempevacantajeitajeari novishatepee maaroni. Apaniro nashjeitajeari maaroni.

Incamimenteri Jesoshi irovishate.

¹⁷Aisati icanti Jesoshi:

—Noncamimenteri novishate, irosati naneantajeari. Irootaque inintacaanari Apa. ¹⁸Tecatsi matashitenaneme iroyename, iroitquea nocooasanotaque noncamimenteri novishate. Noncamavetaquea, aisati nontinaanaje: irootaque inintacaquenari Apa.

Icantavacaimentajeitacari Jesoshi.

¹⁹Aitaque ocantari icantaqueri Jesoshi. Irosati icantavacaimentajeitacari joriopee. ²⁰Timatsi icarajeiti oshequi cantayetatsiri:

—Yoitsaviantaqueri camaari. Ishinqui-ventaitia. ¿Paita piquemisantantariri?

²¹Icanti itsipapee:

—Te intsaviateji: tempa cameetsa yoametanti. Caari ini camaari: tempa icavintsaajiri quitapoajari, irootaque yamenacantajariri.

Iquempetasnotacari Jesoshi iriri.

²²Iquimoshirejeitaji aisati joriopee Jerosarequi. Iquenqueshiretajiro yoameetsayeatantajaroniri peerani ivanco Tasorentsi. Opariansitapaaji. ²³Yanii-veeti Jesoshi anta oveshinsayetacanta otincamipee pancotsi. Iro yovetsicacantiri peerani Saromoni. ²⁴Yapatojeitashita-paacari joriopee. Icantapaaqueri:

—Peerani pimanapitsataquenaro.

Pincamantasanothena: ¿avirompa Quirishito?

²⁵Yacanajiri:

—Aitaque nocamimentajeitavempi. Iro cantaincha te pinquemisantavaque-naji. Pitarica nomayetaqueri, irootaque

Apa tiancanari matacaquenarori. Oca nomayetaqueri, irootaque iotacayetempi-neri narotaque Quirishito.²⁶ Aitaque nocantaqueMPI: "Avirojeitaque caari novishate, irootaque caari piquemisan-tantana".²⁷ Novishate iquemisantiro noneane. Niojeitiri, aisati iriori, yoijajei-tana.²⁸ Aitaque naneacaajeitajiri. Incantaitatiyempani iraneanaje inquiet-qui. Eiro yashinoncaajatsi. Noquempo-yeasanotaqueri, oquempetimotaquena najiricaqueri. Tecatsi aapitsatajenarine. ²⁹Icantauenra Apa: "Pinquempoyeaje-nari". Yanaacojeitiri maaroni itasoncanta-sanoti, tecatsi aapitsatajericne aisati iriori Apa.³⁰ Nomoncaratasanotacari Apa, imoncarataquena iriori.

³¹Irosati yaantajeivatanaca mapi impichaaajeiterime.³²Icantanajiri Jesoshi:
—Iriotaque Apa tasoncacaquenari. Oshequi nonijayetaquempiro. ¿Paita pimplseimentenari?

³³Icantanajiri:

—Te iro nompitseimentempi pantiri cameetsatatsiri. Aviro shirampari, iro cantaincha pijitasorentsitsashitaca, irootaque nompitseimentempiri.

³⁴Yacanajiri Jesoshi:

—Tempa isanquenayeetinirini atiri: "Noncamantajeitempi: 'Avirojeitaque tasorentsitsatsiri'".³⁵Yora isanquenatinirini irineane Tasorentsi, icanteetiri: "Tasoren-tsitsatsiri". Tecatsi ancantero ampashinita-jero Sanquenarentsi.³⁶Inintacaquena Apa, irootaque itiancantaqueunari aca quipatsiquica. Incaranqui nocantaqueMPI: "Narotaque Itomi Tasorentsi". ¿Paita meeca picantanantari: "Pijitasorentsita-shitaca"? Itasoncantaque Apa.³⁷Terica nonquempeteari eiro piquemisan-tanatsi.³⁸Irompa noquempetacaririca, pinquemi-santajeitena. Eiro piquemisan-tashitanatsi narori, irointi pinquemisantimenaro nomayetaqueri. Pinquemisante, piotanteari iquempetaquena Apa. Aisati

narori noquempetacari Apa. Piotasanota-vuquero.

³⁹Icoasanojeivetanaja aisati irayerime, iro cantaincha ipeimotanacari Jesoshi.

Imonteanajaro Jesoshi Jorirani.

⁴⁰Ari imonteanajaro aisati Jesoshi Jorirani. Ijataji anta intacaronta peerani Joani ivaotisatantaqueni. Aitaque itimapajiri anta.⁴¹Oshequi pocashijeita-jiriri aisati. Icantajeitapaaji:

—Te intasoncanteji irinti Joani, iro cantaincha queario oni maaroni icantaco-taqueriri Jesoshica.

⁴²Oshequi quemisantajeitavaquerirri Jesoshi anta.

Iopianaja aisati Jesoshi Vetaniaqui.

11 ¹Isaviqui Vetaniaqui shirampari pajitachari Irasaro, yojoquiitaca. Osaviqui aisati ivancoqui iritsiropee: jero Maria, jero Marita.²Chapinqui osaitiri Maria Avincatsarite iitiqui. Iro osaitantari casancajari. Oshetantajari oishi aisati. Ari yojoquiitaca ojariri,³irootaque otiancan-tacariri camanterine Jesoshi. Arejiqui ijatashitaqueri. Ineantapaacariri icantapaquaqueri:

—Novincatsarite, yora Irasaro pininta-sanotiri, yojoquiitaca.

⁴Iquemavaqueri Jesoshi, icantavaqueri:

—Yojoquiivetaca, iro cantaincha eiro icamasanotitsi. Iro yojoquitantacari, icoaque Tasorentsi impincatsatanteetea-riri, aisati impincatsatanteetenari narori.

⁵Jesoshi inintiro iroori Marita, ireento, jeri ojariri.⁶Ari iquemacotitacari yojoquiitaca, iro cantaincha apite quitateri isavicanaque.⁷Irosati icantatjana aisati icantajeitiri itsipapee iroamerepee:

—Tsame ampiajeitanaje aisati Joreaqui.

⁸Nocantanaqueri narori:

—Chapinqui, oametanari, anta impichaaquempime ashanincaphee.

¿Ariompa pimpiashitanajeri aisati anta?
Eiro ajatitsi: yoicari.

⁹Yacanaquena:

—Noshiacantempiro. Icontetapaaque catsirincaiteri, iquitaitetacotapaajee. Ariorica inquianaje, ari ontsiteniiteanaje. Yora aniiatsiri quitaiteriqui, iniiro oquitaiteti quipatsiqui, irootaque caari itsitincanta. ¹⁰Iro cantaincha itsitincajeita aniiatsiri tsiteniriqui. Iro itsitincantacari, tecatsi quitatetacoterine.

¹¹Aitaque icantaquenari. Irosati icantantanari:

—Maanaqueyea Irasaro. Nojate meeca noncaocapaajeri.

¹²Nocantanaqueri:

—Maanaquerica, Novincatsarite, aitaque iravisacotaje.

¹³Iro cantaincha, irointi iquenquetsatacovetacari Irasaro, icamaque. Narori, nojitalshivetaca iro icantaquenari: “Imaashita, irimaoreanteari”. ¹⁴Irosati icamantasanotantanajari:

—Camanaque Irasaroni. ¹⁵Te nontspatavaqueariji narori. Meeca pinquemisan-tajeitanaquena, irootaque noquimoshire-tantanacari. Tsame amenajeitaiteri.

¹⁶Yora Tomashi ipajiyetiri Tsipari, icantajeitana:

—Tsame aijajeitanaqueri, iroavaqueeta arori.

Oquenquetsatacari Marita Jesoshi.

¹⁷Irotimataintsai inampini Irasaro. Niojeitaque icaratacotaque otsipasati quitaiteri yoiminqueantacariri Irasaroni omoroqui imperita. ¹⁸Ora Vetania oquempejitaro Jerosare, ocarati 3 quirometero. ¹⁹Iponeanaca Jerosarequi oshequi joriopee pocashitirori Marita, jero Maria. Icantapaaquiero:

—Eiro poashiretacoshirearitsi pijaririni.

²⁰Oquemacotavaqueri Marita quempejita-paaque Jesoshi. Osoquijanaque, ojataque otonquiotavacari. Irointi Maria,

ainiro osaviqui pancotsiqui. ²¹Ocantava-queri Marita Jesoshi:

—Ariorica pintimaiteme aca, Novinca-tsarite, eiro icamime jaijini. ²²Niotaque meeca paitarica pincanteriri Tasorentsi aitaque inquemisantaquempi.

²³Icantanaquero Jesoshi:

—Aitaque intinaaje pijaririni.

²⁴Ocantanajiri aisati:

—Ariorica omoncaratapaaquea intina-jeitantanajejeari camajeitaintsiri, aitaque intinaanaje iriori jaijini. Niotaquero.

²⁵Icantanajiro:

—Narotaque tinaajeitajerineri camajeitain-tsiri, oaneajeitajerineri aisati. Incamajeiveta-quea quemisananari, iro cantaincha iraneanaje aisati. ²⁶Maaroni aneajeitatsiri, inquemisantenarica iriori, eiro icamasanotitsi. &Pishiretacarompa oca nocantaquempirica?

²⁷Ocantanajiri:

—Je, Novincatsarite, niotaquempi, aviotaque Quirishito, Itomi Tasorentsi pocaintsiri quipatsiquica.

²⁸Irosati opiantanaja ocajemiro ireento. Ocamantatsatapaaquiero:

—Areetapaaca Oametantatsiri, icajema-cantaquempi.

²⁹Ocantiro:

—Ari.

Intsipaite ocatianaca, ojatashitanajeri Jesoshi. ³⁰Tequeratsita irareetea iriori nampitsiqui. Ainiroqueratatsi anta oneaitirinta Marita. ³¹Ari ineajeitavaquero quivantajeitirori ojatanaque, irosati yojajeteitanacaro.

Ijijeivetaca ario ojateri omoroqui yoiminqueetaquerinta ojaririni. Aisati ijijeitiro ojate iraacotajejari aisati anta. ³²Ari oneapaquieri Jesoshi, ojatashitiri, otiyeroashitapaaacari. Ocantapaaquiero:

—Ariorica pintimaiteme aca, Novinca-tsarite, eiro icamime jaijini.

Itinaanaja Irasaro.

³³Ineavaquero Jesoshi iraimotapaacari. Iraajeitaca joriopee tsipajeitarori. Irosati

icantashiretantanacari iriori Jesoshi, yoashiretanaca. ³⁴Icantanaque:

—¿Jaoca poaqueriri?

Icantanaqueri:

—Anta, Novincatsarite, noaqueri omoroqui. Tsame pamenaiteri.

^{35,36}Iraapaaca Jesoshi iriori. Irosati icantantanaca jorio:

—Pinequeri, oshequi intasantanovetarini.

³⁷Timatsi aparopee cantatsiri:

—¿Caarimpa yoca amenacaajiriri quitapoajari? Intimeme aca, ¿eirompa aisati yoavisacotajirime Irasaroni, eiro icamime?

³⁸Icantashiretasanotanaji Jesoshi aisati.

Iquempejitaapacaro omoro, ora imorotashi-yeetaqueriri imperitaqui. Yashitacyeetanta-
cari mapi. ³⁹Icantappaque Jesoshi:

—Pintivironcajero mapica.

Ocantanaqueri Marita:

—Novincatsarite, otsipasatitanaque quitaiteri icamantacari. Shititanaque.

⁴⁰Icantanajiro:

—Tempa nocantakuempi: “Pinquemi-
santaquenarica aitaque pineaquero
intasoncante Tasorentsi”.

⁴¹Irosati itivironcanteetajaro mapi.

Yamenanaque Jesoshi jenoqui, icantanaque:

—Ariove, Apa, niotaque piquema-
quena. ⁴²Niotaque irosati picanta
piquemapinitana. Jeri oshequi catimojei-
tanari. Nocoaque iriojeite pitiancaquena,
irootaque noquenquetsatacantimpiri.

⁴³Irosati icajemasanotantanaca:

—Irasaro, pintinaanaje, pimpocaje.

⁴⁴Irosati isoquijantanaja camavetain-
chari. Ora chapinqui yoisotanteetavaca-
riri tocoyatsa: iracoqui, iitiqui, maaroni.
Ipashicavorotanteetavacariri paanio.

Icantiri Jesoshi:

—Poisoreajeri, pishineteri irijataje.

Icantayetiri oametavacainchari.

(Mt. 26.1-5; Mr. 14.1-2; Jr. 22.1-2)

⁴⁵Joriopee, yora tsipajeitacarori Maria,
ineacojeitaqueri Jesoshi. Oshequi

quemisantajeitanaqueriri; ⁴⁶itsipapee
ijatashitaqueri variseopee, icamantacota-
paqueri Jesoshi. ⁴⁷Yora jivatacaaajeitiriri
saserotepee, jeri aisati variseo, yapatojei-
taqueri pincatsaripee oametavacaajeitain-
chari. Icantavacaajeitaca:

—¿Paita antajeiteri? Yora shirampari
oshequi itasoncantapinitaque. ⁴⁸Ariorica
ashinetajeri aisati, ario inquemisantajei-
tanaqueri maaroni atiri; impoiji ipocashi-
jeiteecari oromasati, itireayetirocarci
ivanco Tasorentsi. Ipyoyereajeiteecari,
maaroni.

⁴⁹Itsipajeitari anta Caijashi iriori.

Meeca osarintsi ipincatsariventiri
saserotepee. Icantanaque iriori:

⁵⁰—Tecatsi piojeite avinti. Te pinquen-
queshireempaji. Pamenajeite: ocameetsa-
timojitee incameta shiramparinta
aparoni, iroavisacojeitantzajeeri eiro
apoyereajeitantzatsi.

⁵¹Te incantashitearoji oca. Iriotaque
pincatsariventajeitiriri maaroni saserote-
pee. Yoametiri Tasorentsi, iotantacari
incamimentajeiteri Jesoshi maaroni
joriopee. ⁵²Te apaniro incamimentajeiteri
joriopee, irointi incamimenteri maaroni
atiri intomintajeiteari Tasorentsi.
Inashijkeiveta, isavicajeiti nampitsipeequi
arejipequiniri, iro cantaincha
incamimenteri irampatojeitantzeariri
maaroni. ⁵³Irosati isareajeitantzacariri
iroyeri Jesoshi. ⁵⁴Irootaque caari meeca
iquenapinitantaja Jesoshi anta yoshequi-
tinta joriopee, te ironijaapeempariji.
Ijatanaji quipatsiqui pajitachari Ejeraí,
otsapitapaacanta caaraiteri. Aitaque
isavicapajiri, icarajeitana, aisati maaroni
itsipapee iroamerepee. ⁵⁵Irotimataintsi
Yavisantaniri, inquimoshirejeitanaque
noshanincapee. Meeca itoncaajeitanaque
Jerosarequi iroameetsatantajeari,
inquemisanteariri Tasorentsi. Ijajeita-
naque maaroni savicajeitatsiri jaocarica,

⁵⁶icoajeitapajiri Jesoshi. Iqueajeitapaa-

que ivancoqui Tasorentsi, icantavacaajei-tapaaja:

—Paamaaca, ¿ari impoque Jesoshi?
Eirorica ipoquitsi iriori inquemisante.
⁵⁷Aitaque icantacantaque jivatacaaajeiti-riri saserotepee, jeri variseopee:
—Piotaqueririca jaocarica inaqueri Jesoshi, pincamantenata.
Icoajeitanaque iraacanteri.

Anta Vetaniaqui osaitiri tsinane Jesoshi.

(Mt. 26.6-13; Mr. 14.3-9)

12 ¹Ocaranivani 6 quitaiteri
inquimoshireventearo Yavisanta-niri. Yareetaja Jesoshi Vetaniaqui, anta isaviquinta Irasaro camavetainchari: yora yoitinaajiri Jesoshi, yoaneajiri. ²Aitaque icarajeitiri Irasaro Jesoshi, yoajeita. Marita irootaque amacoyetiniriri yoari. ³Maria amaqueneri Jesoshi casancajari, cameetsajatasanotatsiri. Opinatasanotaca. Quejitsi oni, ojaacaro voteyajaniqui. Osaitiri iitiqui, irosati oshetantajari oishi. Otimanaque ojencaare, otsoteanaquero maaroni pancotsi. ⁴Ari itimaiti ara Jorashi Ishicariote. Iroamere Jesoshi inaveta, irootaque aacanterine coajicani. Icantanaque:

⁵—¿Paitampa caari pipimantataro casancajarica? Opinaveta 300 tenario, ampayetajerimeri iriori ashinoncaincari. Paparajatashitacaro maaroni.

⁶Icantashita: te irineshinchoncateriji ashinoncaincari. Iquempoyeajeitvetanari noirequite maaroni, iro cantaincha coshinti ini. Ari icoshitaarantitavajanari, irootaque iquishimentantarori te omperiji ovinaro casancajari. ⁷Icantiri Jesoshi:

—Oncanteata. Iotaque noncame, irootaque osaitantanari tequeratsita noncame. ⁸Incantaitatiyempani incarajei-tempi ashinoncaincari, ari pineshinchoncatapi-nitatiyerini. Irompa nainti eiro nocantatiani noncarajeitempi. Eiro osamanitajitsi pineshinchoncatantajenari aisati.

Oshequi quemisantajeitiriri Jesoshi.

⁹Oshequi jorio quemacojeitajiriri Jesoshi itimapaaji anta, ijatashieitana-queri. Aisati ijatashieitanaqueri irineeri Irasaro, yora camavetainchari yoitinaajiri. ¹⁰Isareajeitacari jivatacaaajeitiriri saserotepee iroyeri aisati Irasaro.

¹¹Oshequi jorioopee neacojeitaqueri Jesoshi yoitinaajiri Irasaro, irootaque yojocajeitantanajarori iquemisantavetari saserotepee, iquemisantajeitantanajariri Jesoshi inti.

Yora jerosaresati

ipincatsajeitavaqueri Jesoshi.

(Mt. 21.1-11; Mr. 11.1-11; Jr. 19.28-40)

¹²Oquitaitetamanaji aisati. Oshequi catsini pocaintsiri inquimoshirejeite. Iquemacojeitajiri Jesoshi impoque Jerosarequi. ¹³Ari ijajeteitanaque itonquio-jeitavacari. Yaajeitaqueri tsiaroshi. Icajemajeiti:

—Jeri yoca oavisacotajeeneri, icamee-tsatasanoti. Iriotaque itiancane Avincatsarite. Iriotaque yoca pincatsari-ventajeitajerine ashanincapee, maaroni.

¹⁴Ineapaaqueri Jesoshi aparo voro caariquera iquijacoyeeta. Iriotaque iquijacotapaaacari. Aitaque peerani isanquenatacotitari: ¹⁵“Savicajeitatsiri Sioniqui, eiro pitsaroashitatsi. Jeri yoca pocaintsiri, iriotaque pincatsariventajei-tempine; iquijacotapaaacari vorojaniqui”.

¹⁶Tequeratsita niotacojeiteri oca isanquenatacotitacariniri peerani: ijatanaji Jesoshi jenoqui, impojiquea noquenque-shireajeitanaquero. Aitaqueuea imoncarataquero maaroni isanquenatacotitacariniri. ¹⁷Ari chapinqui icajemiri Irasaro: “Pincontetapaaaje”, ari icontetapaaaji. Camasanovetainchari, iro cantaincha yoitinaajiri: nocarajeiti oshequi neacojeitiriri, impoji nocamantacojeitaquero ora noneajeitaqueri. ¹⁸Ari iquemacojeitaqueri

atiri itasoncantayeti Jesoshi, irootaque ijatashijeitantzarcari itonquiojeitavacari.

¹⁹Icantavacaajeitanaca variseo:

—Pineaquero, tecatsi ancantanirojeteri. Yojajeitaqueri maaroni atiri.

**Icoajeiti pashinisatipee
atiri irineeri Jesoshi.**

²⁰Itoncaajeitanaque Jerosarequi oshequi atiri inquimoshirejeite, inquemisantajeite. Icarajeitiri pashinisatipee atiri, iroaquera peajancha jorio. ²¹Ijatashijeitapaaqueri iriori Jeripi, yora vetaisrasati. Otimi Vetsaira Carireaqui. Icantapaaqueri:

—Apa, nocoi noneeri Jesoshi.

²²Jeripi ijatashitanaquei icamantaitiri Antirishi. Irosati ijatantanaja apite, icamantiri Jesoshi.

Incamaque Jesoshi, intinaanaje.

²³Icantavaqueri:

—Noponeanaca inquitequi, natiritapaaque; irotantsi meeca impincatsayetena.

²⁴Queariotaque oca noncamantempi. Ariorica ompariye quipatsiqui apaitsquoiro tirico, eirorica otijatsi, irosati oncantea: apaitsquoiro onapaaque. Irompa ontijaquearica, ari oshiocanaque, oshequiasanotanaque aisati oitsquoi. ²⁵Timatsi atiri quempoyeavetchari irisati, te incoyeji irashinoncayea, yatsipetashitaca iquempoyeaca irisati; eiro yaneasanotajtsi inquitequi iriori. Irintiqueacaari quempoyeacha irisati meeca, incantatiyempani iraneanaje irinti inquitequi.

²⁶Maaroni coatsiri irantayetenaro nocoaciriri, irojatenata; incarajeitenaya jaocarica nontimeri narori. ^{27,28}Aisati impinateri Apa. Meeca noquenqueshiretanaca. ¿Paita noncanteriri meeca Apa? ¿Noncanterimpá: “Apa, irotantsi iroashinonqueetena, poavisacotena”? Eiro nocantiritsi. Irootaque nopoantacari quipatsiqui nonquematsictearo meeca.

Irosati iquenquetsatacantacariri iriri:

—Apa, nocoaque impincatsajeitimpita atiripee, irineacameetsajeitimpita.

Irosati noquemajeitantzarcari Apa anta inquitequi, icanti:

—Aitanaque niotacaajeitiri nopincatsaritasanotaque. Coajica niotacaajeitajeri aisati.

²⁹Ari iquemajeivetavacari catiaeive-tainchari, iro cantaincha te irtotasanotaqueroji. Icantashijeitanaca:

—Otirei.

Pashini cantayetanantsi:

—Ineanatiri inampire Tasorentsi.

³⁰Icantiri Jesoshi:

—Te naro iroamete: avirojeivetaca avinti yoamejeivetaca. ³¹Meeca quea incantacoventajeiteri maaroni tseencanta-yetatsiri: “Ainiro pantane, aitaque noasanquetimentempiro”. Meeca aisati irojoqueri Apa yora pincatsariventajeitirri tseencantatsiri. ³²Irotantsi iroatiaco-yetena, irosatiquea nampatojeitanteeariri maaroni atiri, impocashijeitena.

³³Irootaque icantaqueriri Jesoshi.

Icamantitacari jaoca incanteari incaman-teari coajicani.

Ipiatsayetacari Jesoshi.

³⁴Yacanaqueri atiri:

—Oamejeitee Sanquenarentsí: “Irosati incantaitatiyempani Qurishito iranee”. ¿Paita picantirí? ¿Paita picantantarori avirori: “Iroatiaco-yetena queri Atiritapaintsiri”? ¿Janicampa yora Atiritapaintsiri camatsineri?

³⁵Yacanajiri Jesoshi:

—Ainiroquera oquitaiteti, iro cantaincha eiro meeca osamanitajtsi ontsiteni-tantajeari. Paniitanaque meeca, omapoquimpicari tsiteniri. Ariorica paniitanaje tsiteniriqui, eiro piotitsi jaocarica pinquenanajeri. ³⁶Ainiroquera noquitaitacotimpi, niotacaimpi; picoaquerica pinquemisantena, pinquemisantenata meeca. Impoiji

pinquempejeteri pishaninapee:
pinquitaitetacoteri, piotacaajejeteri iriori.
Irosati ijatantanaja, imanapitsatanajari.

Caari iquemisantanta joriopee.

³⁷Ineajeiveta cari oshequi atiri itasoncantayeti Jesoshi, iro cantaincha te inquemisantajeitavaqueriji. ³⁸Imoncarajetaquero isanquenatacotitacaniri peerani Isayashini: “Novincatsarite, eiro ishequitanotitsi quemisantavaqueroneri ora ancamanteriri. Irineajeivetempi pintasonante, iro cantaincha eiro iquemisantimpitsi”. Camantantatsiniri inaveitani Isayashini. ^{39,40}Icantitacani aisati: “Yora Tasorentsi inquitapoajatacayeri tseencajeitiriri, impeitaqueri iquenqueshireantavetari. Icant: ‘Ineicari. Ioticari. Yaventanacari. Noavisacotiricari’”. Irootaque caari imajeitantar tseencantatsiri inquenqueshireempa. ⁴¹Peerani ineakeri Isayashini ishipaquireaque Avincatsarite, impoiji iquenquetsatacotori. ⁴²Aisati oshequi jivatacaajeitiriri joriopee, iquemisantajeitavetacari Jesoshi. Iro cantaincha itsaroacaajeitacari variseopee, irootaque caari icamantantari ishaninca: “Noquemisantiri Jesoshi”. Iquenqueshireti: “Iquishimentanaricari noquemisantiri Jesoshi, eiro ishinetanatsi nampatojeiteari noshaninca nonquemisantajeite”. ⁴³Yora variseopee icoapini-jeiti irineacameetsajeiteri atiri, te irio incoye irineacameetsateri Tasorentsi irinti.

Cameetsa anquemisanteri Jesoshi.

⁴⁴Irosati icajemantanaca Jesoshi:
—Maaroni quemisantanari, te naro inquemisantasano, irintiquea iquemisantasano que tiancaquenari. ⁴⁵Maaroni neaquinari, irinti ineaque aisati tiancaquenari. ⁴⁶Irootaque nopocantacari nonquitaitetacoteri atiri, niotacaasanojeiteri. Yora quemisantanari,

eiro yatsipetajaro intimaje tsiteniriqui; tempa ioyetaque. ⁴⁷Yora quemayevetacorri noneane: eiroric a iquemisantiro, eiro noasanquetiritsi nainti. Te iro nompocantea quipatsiquica noasanquetaayeteri atiri, irointi nopocanta noavisacojeiteri.

⁴⁸Maaroni tseencaquenari, caari quemisantiro noyenquetsare, timatsi oasanquetaajeiterineri coajicani. Jero oca noneane nocantavetacari: coajica omoncarataapeempatica, iroasanqueteri itseenquiro noneane. Te noneaveetashiteaji. ⁴⁹Apa tiancaquenari, iriotaque cantavaquenari: “Iroyea oca pineanataapeeri. Jero oca pincantapeeriri”. ⁵⁰Yora quemisantavaquerori irineane Apa, incantaitiyempani iraneanaje inquitequi. Niotaquero oca. Oca nocantauquemperi, nomoncarataquero icantaquenari Apa.

Yora Jesoshi iquiviniri iroamerepee iiti.

13 ¹Tequeratsita inquimoshireventajetaque Yavisantaniri. Aitaque iotaque Jesoshi omoncarataca irojocantajearori quipatsica, impiantanajeari iririqui. Icantatiani inintajeitaqueri yashijeitacari quipatsiquiniri. Meeca inintasanojeitiri. ²Ari noajeitaca, notsipajetacari Jorashi Ishicariote, yora itomi Shimo. Iquenqueshireacaacari camaari iraacanteri Jesoshi coajicani. ³Iotaque Jesoshi itiancaqueri Iriri impincatsariventajeiteri maaroni atiri. Iotaque aisati iponeaca Tasorentsi, impiashitanajeri aisati. ⁴Ari yoacaajeitaquena Jesoshi, impoiji icatianaca. Yojoquireaque yoicoro. Ishiticatsaqitanacaro ishevortantari. ⁵Irosati isantacaro njia metarouqui, irosati iquivantajeitaquenarori noitipee: narori, aisati itsipapee iroamerepee. Iro ishetantajanarori noiti ishevortantari. ⁶Irovetainchia inquivaquitapeerime iriori Petero, icantavaqueri:

—Tempa aviotaque Novincatsarite, te oncameetsateji pinquivenaro noiti narori. Oncameetsateme nonquivempirome piiti avinti.

⁷Yacanaqueri Jesoshi:

—Te piotacoteroji meeca oca nantaquempi. Aitaque piotajero coajicani.

⁸Icantanaqueri:

—Eiro piquivanarotsi noiti catsini.

Yacanaqueri:

—Eriorica noquivimpirotsi piiti, eiro aquempeavacaatsi coajicani.

⁹Irosati icantantacariri:

—Jentsite, Novincatsarite, pinquivenaro noitipee, naco, noito, maaroni.

¹⁰Icantanajiri Jesoshi:

—Eiro yapiitajatsi inquivajea caajeitantsiri. Quitejeivetaquempi avinti, iro cantaincha te pinquitejeiteji maaroni.

¹¹Iotaque Jesoshi janica aacanterineri.

Irootaque icantantacari: “Te pinquitejeiteji maaroni”. ¹²Itsoncajeitaquena iquivajeitaquenaro noiti maaroni. Iquitsaatajaro aisati yoicoro. Aisati isaviquimojtajana, icantana:

—¿Piojeitaquempa meeca paita nantantaytarori ocapee? ¹³Tempa picantapini-jeitana: Oametantatsiri, aisati Pincatsari. Queariotaque oca picantaquenari. Narotaque oamejeitimpire, pincatsariven-tajeitimpire. ¹⁴Pinequena meeca, noquivajeitaquempiro piiti. Aitaque pinquempetavacaajeiteari avirori, pinquivavacayea piitiqui. ¹⁵Naro onijaaquempirori. Aitaque meeca pinquempejitevacayea avirori, pinquiva-vacaajeitea. ¹⁶Queariotaque oca nocantimpire. Inampire te iranaacoteriji nampitariri impincatsarite. Aisati itiancane eiro yanaaacotiritsi impincatsarite yora tianquiriri. ¹⁷Ariorica piquema-vaquero oca noametimpire, pimataquero nocoacaimpiri pinquimoshirejeitanteari.

¹⁸Timatsi meeca aparoni nocamantacota-

sanotiri, te maaroni nonquenquetsataco-tempiji. Nocoyeajeitaquempi, tempa niojeitaquempi. Ainiro Sanquenarentsi caariquera moncaratacha, ocanti: “Yora oacotaquenari notantane, iraacantena”.

¹⁹Aitaque nocamantitajeitaquempi tequeratsita irayeetenana. Ariorica piotaque omoncarataca nocantimpire, aitaque pishiretearo naro nainti isanquenatacotaniri. ²⁰Queariotaque oca nocantimpire. Ariorica iraacameetsayeetaavaqueri notiancane, aisati narori, iraacameetsatena. Ariorica iraacameetsatavaquena narori, aisati inquempeteri iriori tiancanari, iraacameetsateri.

Icanti Jesoshi: “Iraacanteetena”.

(Mt. 26.20-25; Mr. 14.17-21; Jr. 22.21-23)

²¹Irosati yoashiretanana Jesoshi, icamantajeitana:

—Queariotaque oca noncamantajeitem-piri. Timatsi aca aacantenaneri.

²²Ari namenavacaajeitanaca, te nioteji janicarica icantacotaqueri. ²³Narotaque iroamere inintasanotiri Jesoshi, ainirona narori, notiinatacarri inejiqui. ²⁴Ijcota-quena Shimo Petero, icantana:

—Pisampiteri. ¿Janica iquenquetsata-cotiri?

²⁵Irosati notiinatasanotantanacariri aisati inejiqui Jesoshi. Nosampitaqueri:

—Novincatsarite, ¿janicampa aacantempine?

²⁶Yacanaquena:

—Ariorica novincaquero tantaca, yoca nompaqueri, iriotaque aacantenaneri.

Irosati yovincantanacaro tanta, ipaqueri. ²⁷Irosati iquenqueshiretacaanta-cariri Satanashi Jorashi iraacanteri Jesoshi. Icantanaqueri Jesoshi:

—Ora piquenqueshiretiri panteri, pimateroqueti.

²⁸Yora oajeitainchari ara te iriotava-queroji icantacotaqueri. ^{29,30}Ari yaanirota-vaquero tanta, irosati ijatantanaca

iraacaantanteeariri. Yora Jorashi iriotaque quempoyeaquenariri noirequite maaroni. Ijatantacari, yaamaanaca aparopee icantiri Jesoshi: "Pamanantaite ayeari anquimoshireventearo Yavisantaniri". Pashini yaamaaca icantiri: "Pijate pimpashiyetaiteari ashinoncayetachari". Ari ijatantanacari, otsitenitanaji.

Icamantajiri iroamere irijataje.

³¹Impoiji icantanaquena Jesoshi:
—Noponeanaca narori inquitequi, natiritapaaque. Irotantsi meeca impincatsa-jeitena atiripee, aisati niotacaajeiteri impincatsajeiteri Apa. ³²Aisati inquempetea Apa iriori, iriotaacaajeiteri atiri impincatsajeitena narori. Meeca irimatero, eiro isamanitrotsi. ³³Meeca, noamerejei, eiro osamanititsi nojocajeitantanajempiri. Aitaque nocamantatacari joriopee, aisati meeca noncamantajeitensi avirori: anta nojatajenta, eiro pimatirotsi pijataje avirori. ³⁴Pashini noncantajeitempiri meeca: pinintavacaajeitea maaroni. Oquempetaca narori noninta-jeitimpri, aisati pinquempetavacaajeitea avirori, pinintavacaajeitea. ³⁵Ariorica pinintavacaajeitaquea, aitaque iriojeita-quempi maaroni atiri: avirojeitaque noamere.

Incante Petero: "Te noneeriji Jesoshi".
(Mt. 26.31-35; Mr. 14.27-31; Ir. 22.31-38)

³⁶Icantanaqueri Shimo Petero:

—¿Jaoca pijatajeri, Novincatsarite?
Yacanaqueri:

—Anta nojatajenta, eiro pimatirotsi pojatananaquena meeca. Coajicaquea aitaque pojatanajena.

³⁷Icantanaqueri Avincatsarite:

—¿Paitampa caari nomatantearo noijatananaquempi meeca? Iroyeeteerica, iro cantaincha nintacotanaquempi.

³⁸Yacanajiri Jesoshi:

—¿Ariompa pintacotasanotanaquena? Queariotaque oca noncamantempiri:

eirotsitarica inei teapa, pincantaque: "Te noneeriji Jesoshi". Oncarate mava pincantaque.

Iraanajeri Jesoshi quemisantatsiri Apaqui.

14 ¹Aisati icantajeitana Jesoshi:
—Eiro picantashirejeititsi, irointi pishireteari Tasorentsi. Aisati narori, pishiretena. ²Anta inampiqui Apa otimi oshequi pancotsipee. Eiro oshequitime, aitaque noncamantaqueempime te oshequiteji. Nojate anta novetsicanonta-peempi pisavicantajeiteari avirori coajicani. ³Ariorica nomatempiro pisavicanteari, nompiashijeitajantempi aisati, naajeitajantempi. Aitaque pintsipa-jeitapajena nosaviquinta narori.
⁴Piojeitaque jaoca nojatajeri. Piojeitaque aisati jaoca nonquenanajeri.

⁵Icantanaqueri Tomashi:

—Te niojeiteji jaocarica pijatajeri.
¿Jaoca noncanteari niotanteari jaoca pinquenanajeri?

⁶Icantanajiri Jesoshi:

—Tempa narotaque nijaanajempironeri pinquenanajeari, aisati narotaque oametapinijeitaqueempirori queariotas-notatsiri, aneacaajeitaqueempiri. Tecatsi pincantea pijatashiteri Apa, narotaque aajeitanajempine. ⁷Piojeitaquenaricame, aisati piojeitaquerime Apa iriori. Meeca piojeitaqueri. Aitaque pineajeitaqueri.

⁸Icantanaqueri Jeripi:

—Novincatsarite, ponijayenari piri; irootaque aparoni nocantimpiri, aitapaji.

⁹Icantanajiri Jesoshi:

—Peeranitaque notsipajeitaquempi.
¿Tequerampa piotimatena? Maaroni neaquinari, inequieri Apa iriori. ¿Paita picantantanari meeca: "Ponijayenari piri"? ¹⁰¿Tequerampa piotimateji noquempetacari Apa? Aisati iquempetana iriori. Te noncantashiteaji. Iquempeta-queuna Apa, iriotaque matacaanarori notasonanti. ¹¹Tempa nocamantimpri

noquempetacari Apa. Aisati iquempeta-
quena iriori. Pishiretearo oca nocamanta-
quempi. Pineasanojeitaquena notason-
cataque, pinquemisantimentasanote-
naro.

**Ariorica irijataje Jesoshi, oshequi
irimateneri quemisantatsiri.**

¹²Jero aisati icantajeitana Jesoshi:

—Queariotaque oca noncamantempi.
Maaroni quemisantanari inquempejite-
tena, intasoncante iriori. Nompianaje
Apaqui, irootaque iranaacojeitantenari
intasoncantasanojeite iriori. ¹³Ariorica
pishiretaquena, aitaque nomataquempiro
paitarica pincoacoteriri Apa. Oca
nomatempo irineapincatsatanteeteariri
Apa. Tempa narotaque Itomi. ¹⁴Pishirete-
narica, aitaque nomataquempiro
paitarica pincanteriri. ¹⁵Pinintanarica,
pinquemisantajeitena paitarica
noncamantajeittempi. ¹⁶Narotaque
quenquetsatacerine Apa. Noncanteri,
irootaque intiancantajeittempirori pashini
Amitacotajempineri. Irosati oncanteani
ontsipajeittempi irointi: ¹⁷irootaque Ishire
Tasorentsi, oamejeitempironeri maaroni
quearioyetatsiri. Te iriojeiteroji irinti
tseencantatsiri, irootaque caari opocashi-
jeitantari ontsipajeiteari. Aitaque quiso
oajeitaquempi, oncantaitiyempani.
Irootaque piojeitancarori avinti. ¹⁸Eiro
nojoquimpitsi apapiro, aitaque nompia-
shijeitajempi. ¹⁹Irotaintsi nojataje. Eiro
ineajeitanatsi tseencantatsiri,
avintiquea neajeitajenane. Nashi noiro
nanei, irootaque paneantajeitanajeari
avirori: pincantaitiyempani inquitequi.
²⁰Ariorica nontinaanaje, impoijiquea
piojeitanaque noquempetacari Apa.
Piquempeitaquena avirori, aisati
noquempeitaquempi narori: aacamee-
tsatavacaajeitaca. ²¹Maaroni iotavaque-
rori nocantiriri, inquemisantaquerorica
aisati, irootaque nintanari. Apa ario

irinintaqueri nintaquenari. Aisati narori
ario nonintaqueri. Niotacaasanojeiteri
jaoca nocanta.

²²Ainiro anta pashini Jorashi, caari ini
yora Ishicariote. Isampitiri:

—Novincatsarite, piotacaasanotaquena
narori jaoca picanta. ¿Paita caari
piotacantari tseencantatsiri iriori?

²³Yacanaque Jesoshi:

—Ariorica pinintena, pinquemisantero
noneane, irosati irinintantempi Apa
iriori. Impoiji nompocashijeitajempi
quiso noantempi. ²⁴Irintiquea caari
nintana, eiro iquemisantiotsi noneane.
Oca nocantauquempirica, caari nashi
noneane, irointi irineane Apa tiancaque-
nari. ²⁵Ainiroqueratatsi nocarajeitimpis,
aitaque nocamantauquempiro. ²⁶Ioti Apa
pishiretaquena, irootaque intiancantem-
pirori Ishire, Amitacojeitajempineri.
Oamejeitapajempineri maaroni. Irootaque
quenqueshireacaajeitajempironeri
maaroni nocantajeitaquempi.

**Icamantajeititajari Jesoshi
iroamere: “Nojataje”.**

²⁷Aisati icantajeitana Jesoshi:

—Noquimoshiretanaque narori, te
noncantashireteji. Noninti pinquempetena,
pinquimoshirejtanaque avirori. Eiro
imatirotsi atiri iroimoshirenquempi. Eiro
meeca picantashiretitsi, irointi piveshireajei-
tanaquea. ²⁸Aitaque piquemaquero nocanta-
jeitaquempi. Nojatanaje, coajica
nompashijeitajantempi aisati. Yanaacotana
Apa itasorentitasanoti. Arioricame
pinintajeitaquename pinquimoshireimenta-
jeitaqueme nocamantauquempi:
“Nojatanaje Apaqui”. ²⁹Meeca nocamantau-
quempiro tequeratsita nojataje. Ariorica
piotaque omoncarataca nocamantauquem-
piri, pinquemisantajeitaque. ³⁰Eiro osaman-
tajitsi nonquenquetsatacaajejempis
Quempejitapaaque pincatsariventajeitiriri
tseencantatsiri. Tecatsi incantea iriori

impincatsariventena.³¹ Meeca iriojeitana-
quero atiri nonintiri Apa, tempa nantapiniti-
niri paitarica inintacaquenari. Ari, pincatia-
jeitanaje. Tsame avaajeitanajea.

**Yora Jesoshi irisati shiacantajancha
ovorents ova.**

15 ¹Jero aisati ishiacantaquenari
Jesoshi:

—Narotaque quempetarori ovorentsasa-
nori ova. Iriotaque Apa tsameetacotirori.² Ipsayetiro ojempequi caari oitsoquitatisi.
Irompa irointi oitsoquitatsiri yoameetsata-
quero oitsoquitasanotantanaqueari.³ Oca
noamejeitaquempi, aitaque oameetsashire-
jeitaquempi.⁴ Quiso poajeiten. Aisati
narori, quiso noajeitempi. Ojempequi ova,
ariorica onchaoreanaque ovorents, eiro
omatajatsi oitsoquitaje, tempa oncamaque.
Aitaque piquempejeitarori avirori. Eirorica
quiso poajeitanatsi, eiro pimatirotsi
cameetsayetasirs.⁵ Narotaque quempetarori
ovorents. Avirojeitaque quempejeitarori
ojempequi. Maaroni quiso oanari irio
majeitajerone paitarica noncoacaayeteriri.
Quiso noyeri narori. Ariorica pintentarejei-
tanajena, tecatsi pimatimataje.⁶ Yora caari
quiso oana, inquempetacaanteeteri
ojempequi ova, impesheetero, peti. Impoiji
ompirijatanaque, irampatoyeetajero
coajicani, iroquojeetero paamariqui,
ontayea, pomein.⁷ Irosatirica quiso
poajeiten, aisati ariorica pishiretearo
noneane, pincantena paitarica picoayetiri:
aitaque nomataquempiro.⁸ Ariorica
pimayetaquero paitarica noncoacyempiri,
impincatsayeetearir Apa. Impoiji
iriotasanojeitempi avirotasanotaque
noamere.

**Yora Jesoshi ishanincatacari
maaroni iroamerepee.**

⁹Jero aisati icantajeitanari Jesoshi:
—Inintana Apa. Aisati noquempejei-
tempi narori, nonintajeitimp. Quiso

poajeiten, anintavacaajeitanteari.

¹⁰Pinquemisanterorica nocantajeitimpipi,
irosati noncanteani nonintajeitempi
narori. Noquemisantiro icantaquenari
Apa, irosati icantani iriori, inintana.

¹¹Noquimoshiretanaque narori. Iro
nocamantantimpipori oca pinquempetan-
tenari, pinquimoshirejeitanteari avirori.
Nocoaque pinquimoshiretasanajeitanaque
maaroni.¹² Jero oca noncamantempipi:
tempa nonintajeitimp. Aisati
pinquempetea avirori, pinintavacaajeitea.¹³

Yora intacotariri ishaninca, incamimen-
taqueririca, iriotaque nintasanotiriri.

¹⁴Ariorica pimajeitaquero nocantaquem-
piri, avirotasanotaque noshaninca.¹⁵ Eiro
meeca nocantajeitajimpitsi nonampire, te
irioteji nampirentsi paitarica yantiri
nampitariri. Iro cantaincha niotacaajeita-
jimpi paitarica icantaquenari Apa,
irootaque noshanincatasanotantajimpipi.

¹⁶Te aviro coyeajeitenane; naro nainti
coyeajeitimpipi. Nontianquempi pimatant-
tearori paitarica noncoacaayetempipi.
Eiro patsipetarotsi paitarica pantayete-
nari. Pishiretenarica, aitaque irimatem-
piro Apa paitarica pincanteriri.¹⁷ Nampii-
tajempiro oca noncamantajeitajempi:
pinintavacaajeitea maaroni.

**Yora tseencantatsiri iquishiri Jesoshi
aisati inquisajeitaqueri maaroni
quemisantajeitiriri.**

¹⁸Pashini aisati icantaquena Jesoshi:

—Ariorica inquisajeitaquempi
tseencantatsiri, piotasanoote naro
ijivataque iquisaqueuna peerani.¹⁹ Yora
tseencantatsiri inintavacaaca. Arioricame
pinquempetearime avirori, aitaque
irinintajeitaquempime. Iro cantaincha te
pinquempejeitajeari. Nocoyeajeita-
quempi, irootaque iquisajeitaquem-
piri.²⁰ Pinquenqueshireajero nocanta-
quempi chapinqui: “Yora inampire te
iranaacoteriji nampitariri impincatsarite”.

Ari iquisajeitaquena. Aisati inquempejitempi avirori, inquisajeittempi. Te inquemisanteroji nocantajeitavetacariri. Aisati avirori, eiro iquemisantajeitirotsi pincamantajeitaveteariri.²¹ Irootaque Tasorentsi tiancaquenari. Iro cantaincha te iriojeiteriji iriori, irootaque inquisajeitatempi. ²²Ari nopolashivetacari, noquenquetsatacavetacari. Eirome nopolashitirime, eiro otimimotirime meeca irantane. Iro cantaincha meeca tecatsi incantajeite incante: “Te aneroji nantane”. ²³Yora quisakenari iquisaqueri Apa iriori. ²⁴Tempa ineajeiveitaquena notasoncantayeti. Nomayetaquero caari imayeti atiri iriori. Eirome ineajeivetaquenam, eirome otimimotirime irantane. Aiquero ineavetaquena, iquisaquena. Aisati iquisaqueri Apa iriori. ²⁵Aitaque icantajeitari. Moncaratapaaca oca isanquenayeetiniri: “Iquisashijeitaquena, tecatsi nantavetea”. ²⁶Ari nontiancajeitajempi Amitacotempineri, ora Ishire Tasorentsi. Omponeaquea Apaqui, cameetsa oamejeitapeempi. Ariorica ompocaque oncamantacopataajena narori. ²⁷Aisati avirori, pincamantacojetajena narori. Tempa avirojeitaque tsipatapinijeitaquenari peerani.

Icantiri Jesoshi: “Coajica inquisajeittempi”.

16 ¹Aisati icantana:
—Nocoi eiro pojocajirotsi pique-misanti, irootaque nocamantantajeitimpiori oca. ²Coajica pincoajeivetea pincarajeiterime ajorioririnte anta apatojeitapinitanta, iro cantaincha iroimpiajavajempi. Coajica iroyempi aisati. Aiquero yora quisajeitaquempineri iraamayea yantiniri Tasorentsi inintacaqueriri. ³Te iriojeiteriji Apa, aisati narori te iriojeitenaji, irootaque inquisajeitatempi. ⁴Ariorica ommoncarataquea oca nocamantauquempiri, aitaque pinquenqueshireanaquero nocamantitaquempiniri, irootaque meeca

nocamantantimpiori. Peerani notsipatimpini, irootaque caari nocamantitan-timpini peerani, meecari meeca irootaji nojataje, irootaque nocamantasano-timpiri.

Ompocapaaque Ishire Tasorentsi.

⁵Aisati icantana Jesoshi:

—Meeca nojatanaje tiancaquenariqui.

Iro cantaincha te pisampijeitenaji:

“¿Jaoca pijatajeri?” ⁶Meecaquea, meeca, nocamantaquempi, irootaque poashire-sanojeitantanacari. ⁷Tampatica nocaman-taquempiro oca. Ocamente satimotimpi nojataje. Eiroric a nojatajitsi, eiro opocashijeitimpitsi Amitacojeitempineri. Ariorica nojatanaje, aitaque nontiancajeitapaaquempiro. ⁸Areetapeemparica, iotacaajeitapaaqueri tseencantatsiri te oncameetsateji yantayetiri. Iotacaajeita-paaqueri aisati jaoca incantajeitajeari incameetsatantajeari. Aisati iotacaajeita-paaqueri jaoca incanteari Tasorentsi iroasanquetanteariri maaroni tseenquiriri. ⁹Te inquemisantajeitenaji, irootaque iroasanquetimentanteariri caari cameetsatatsi. ¹⁰Coajica nompeimotana-jempi, nojatanaje Apaqui, irootaque iotacantajeitapeempariri atiri nocamee-tsataque. ¹¹Iotacaajeitapeeri iroasanque-jeiteri Tasorentsi. Tempa irisati oasanquejeiterineri yora pincatsariventajeitiriri tseencantatsiri. ¹²Ainiroquera oshequi noncamantajeitimpimeri, iro cantaincha eiro pimajeitirotsi piojeitava-quero meeca. ¹³Queariotasanoque maaroni oamejeitempiri Ishire Tasorentsi. Ariorica ompocapaaque, iotacaapeempiro maaroni queariotatsiri. Eiro oametanta-shitapaatsi. Paitarica oquemaqueri irootaque oamejeitapeempi. Oametempi jaoca incanteeteari coajicani. ¹⁴Oca nocantajeitimpiri, irootaque oametempi-neri; iotacantempiri nopolincatsaritaque. Maaroni icantayetanari Apa, nocamanta-

yetajimpiro aisati narori,¹⁵irootaque nocantajeitantaquempi: "Oca nocanta-yetaquempi, irootaque oametempineri".

Icantiri Jesoshi: "Poashirejeivetaquea, impoiji pinquimoshirejeitanaje".

¹⁶Aisati icantana Jesoshi:

—Capichanivanji eiro pineajanatsi. Osamanitimataque capichaji, ario pineajena aisati.

¹⁷Irosati nocantavaacaarantantanacari:
—¿Jaoca ocantari oca icantaqueer?
"Capichanivanji eiro pineajanatsi. Osamanitimataque capichaji, ario pineajena aisati". Icanti aisati: "Nojataje Apaqui".¹⁸ ¿Paitasa icantantari:
"Capichanivanji"? Te ayotacotavaqueri icantaqueeri.

¹⁹Iotaque Jesoshi nocoajeiveta nosampiterime. Icantanaquena:
—¿Pisampitimentavacaarompa nocantaquempi? "Capichanivanji eiro pineajanatsi. Osamanitimataque capichaji pineajena aisati".²⁰ Queariotaque oca noncamantajeitimpesi. Ario piraacojeitanaquena, maaroni, poashirejeitanaquea. Iranti quimoshirejeivetaquea tseencantatsiri. Poashirejeivetaquea, iro cantaincha pinquimoshirejeitanaje aisati.²¹ Ariorica omoncarataca otimiri tsinane otomi, oquemaatsitacari. Itimanaquerica ojananequite, te onquenqueshireajeroji oquemaatsitacari, irointi oquimoshirementiri yora timaintsiri.²² Aitaque pinquemejeitaqueari meeca avirori, poashirejeivetaquea. Iro cantaincha aitaque noneajeitajempi aisati. Pinquimoshirejeitanaque, tecatsi oashiretacaajepine aisati.²³ Meeca, eiro pisampijejatansati paitarica. Queariotaque oca nocantimpesi. Ariorica pishiretaquena, impaquetempi Apa paitarica pincantajeiterriri.²⁴ Peerani te pishirejeitenani, te pinquenquetsatacaajeiterini Apa. Meeca quea pinquenquetsatacapiniteri.

Paitarica pincanteriri, aitaque inquemi-santaquempi, pinquimoshirejeitasanotantanaqueari.

Jesoshi icamantacotasano

tiri Apa.

²⁵Aisati icantauquena:

—Ari noshiacaventapinitimpironi paitarica, iro cantaincha coajica eiro noshiacaventajimpirotsi aisati. Aitaque tampatica noncamantacotasano Apa, eiro nomanapitsatajimpirotsi.^{26,27} Impoiji pishiretanaquena, pinquenquetsatacayeri Apa. Avirojeitaque nintaquenari. Pishiretacaro noponeaca Tasorentsiqui, irootaque inintajeitantimpiri Apa. Ari inintasanojeitaquempi, irootaque impajeitantempipori maaroni coiteimojeitimpiri. Natsipetashitarocari namanacoventajempi aisati.

²⁸Nosavicaveitani irioriqui, irosati nopocantacari quipatsiquica. Meeca nojocanajero quipatsica, nompiashitanajeri Apa.

²⁹Nocantiri:

—Meeca quea picamantasanotaquenaro. Te pishiacaventajenaroji.³⁰ Meeca niojeitaque pitsotencajeitiro piojeitiro maaroni, irootaque noquemisantantacari piponeaca Tasorentsiqui. Tecatsi meeca nosampitajempiri.

³¹Yacanajana Jesoshi:

³²—¿Ariompa piquemisantasanotaque meeca? Irotantsi iroimishiyetempi, pijajeitaque pinampipeequi. Pojocajeitanajena apaniro. Aitaque irotantsi omoncaratapeempa meeca. Iro cantaincha te apaniro none, quiso yoana Apa iranti.³³ Iro nocamantantimpiori oca piveshireanteari. Aitaque piveshireimentajena. Aca quipatsiquica iroashinonqueetempi, iro cantaincha piveshirejeitanaquea. Nanaacojeitaqueri maaroni timajeitatsiri quipatsiquica, nopincatsaritasanoti nainti.

Irisati cantacoventashitacha Jesoshi.

17¹ Irootaque icantajeitanan Jesoshi, irosati yamenantanaca jenoqui. Icanti:

—Apa, moncaratapaaca. Meeca piotacaajeiteri atiri nopincatsaritasanoti: tempa narotaque pitomi. Aisati nonquempetea, niotacaajeiteri pipincatsaritasanoti avirori. ²Tempa aitaque pitiancaquena nompincatsariventajeiteri maaroni atiri, irootaque nomatantarori naneacaajeitajiri maaroni picoyeaquenari. Iro picoyeantacariri incantaitatiyempani iraneajeitanaje iriori aviroriqui. ³Aviro Tasorentsi, apaniro pini. Cameetsa iriojeitempi maaroni atiri. Cameetsa iriote naro pitiancane, naro Jesoquirishito. Maaroni iotanari incantaitatiyempani iranee inquitequi. ⁴Aca quipatsiqui nomajeitaquempiro maaroni pinintacaquenari, irootaque ipincatsatantimpire atiri. ⁵Peerani, Apa, tequeratani avetsiqueroni quipatsi, notspatimpini, nopincatsaritaqueni. Meeca pinquempetacaajena aisati, nompincatsaritaje, nontspatajempi.

Icantacoventiri Jesoshi iroamerepee.

⁶Ari yovaajiro aisati, icantiri Iriri: —Jeri yoca atiripee quipatsiquiniri pashijeitacari. Picantaquena: “Pinquempoyejenari”. Ari niotacaajeitaqueri jaoca picantari. Iquemisantajeitavaquero pineane. ⁷Meeca iojeitanaque aviro avinti intasanotarori maaroni poamejeitaquenari. ⁸Maaroni poametaquenari, novaaqueneri noamerepee, noametasanojeitaqueri maaroni. Iojeitavaquero. Iotasnotavaque aviro tiancaquenari. Ainiro ishire iriori iquemisantantarori aviro tiancaquenari. ⁹Iriojeitaque nocantacoventaqueri. Te noncantacoverteriji irinti tseencantatsiri, irintiquea yoca noquempoyejimpipi. Tempa avirotaque ashijeitariri, ¹⁰aisati nashijeitacari narori. Aisati nashijei narori, pashijeitacari avirori. Iquemisantajeitana, irootaque ineapincatsajeitantanari. ¹¹Eiro notimajitsi aisati quipatsiquica, irioquea irinti timajeitanajantsine, naintiquea nainti

piashitanajempine. Aviro, Apa, cameetsari. Tempa picantani pitasoncanti. Meeca aviro quempoyeajeitajerine yoca noquempoyeaquempi, inquempavacaanteari. Nocoaque irimoncarajeita-jeeta aquempeavacaajeita arori. ¹²Nocarajetantacariri, tempa pimatacaquena, irootaque nomatantarori noquempoyeantacariri. Nojocacoventajeitaqueri: tecatsi ashinoncachane, apaniro irashinoncayea Jorashi, iriotaque jatatsineri Sharincave-niqui. Aitaque omoncarataquea ocaman-tacotitarini sanquenatachaniri peerani. ¹³Meeca nompiashitanajempi. Ainiroqueratatsina quipatsiquica, nocamantajeitir oca, inquimoshirejeitasanotanteari, inquempetena narori noquimoshireti. ¹⁴Noametaqueri pineane, meeca iquisajeitanaqueri tseencantatsiri. Iro iquisantacariri, te inquempempariji. Iquempetana narori, te nonquempempariji tseencantatsiri. ¹⁵Jeri itimajeiti noquempoyeaquempi quipatsiquica. Te noncantempiji: “Paanajeri”. Apatiroti nocantimpi: “Pojocacoventeri. Yantiricari camaari”. ¹⁶Te inquempempariji tseencantatsiri. Iquempetana narori, te nonquempempariji. ¹⁷Piotacaajeiteri queariotasanotsiri, inquearioventantempirori maaroni picoacairiri. Ora pineane, irootaque queariotasanotsiri. ¹⁸Pitiancaquena nojatashtantariri atiri noquenquetsatacaajeitiri. Aisati narori noquempetaqueri, notiancajeitaqueri irijatashtanteariri atiri inquenquetsatacaajeiteri. ¹⁹Noquearioventimpire maaroni, iojeitantarori queariotatsiri, irosati inquearioventajeitantzempirori iriori.

Icantacoventajeitiri Jesoshi maaroni quemisantiriri.

²⁰Jero aisati icantiriri Jesoshi iriri: —Nocantacoventajeitiri noamereca. Aisati noncantacoventajeiteri yora iquemisantacaajeitiri: yora quemisanta-

jeitanari, maaroni.²¹Nocoaque inquem-peavacaajeitanajea maaroni. Tempa aquempeavacaaca, Apa, arori. Aisati nocoaque inquempeajeitajee iriori quemisantajeitanari, irosati inquemisan-tanteari atiri pitiancasanotaquena.

²²Pitasoncacoventaqueña noquempetan-taquempi avirori, aisati notasoncaco-ventajeitaqueri iriori, inquempetavaca-jeitajeari. Irimoncarajeitajee arori, aquempeavacaaca.²³Iquempetaquena narori. Noquempetaquempi avirori. Irootaque inquempetavacaasanojeitan-teari, irosati iriojeitanteari atiri pitianca-quena. Iriojeitanaque pinintaquena, aisati piquempeajeitaqueri, pinintasanojeitaqueri maaroni.²⁴Tequerani ontimeni quipatsi, tempa pinintitanani, irootaque pipeanta-quenari pincatsari. Meeca, Apa, nocoaque intsipajeitena iriori irineantenari nompin-catsaritasanotanaque. Tempa picantana: “Pinquempoyeajeitenari”, aitaque nomataquempi.²⁵Picameetsatasanota-que, Apa. Te iriojeitimpiji tseencantatsiri, iro cantaincha niotimpi nainti. Aisati iojeitaquempi yocapee pitiancaquenari,²⁶niotacaajeitaqueri jaoca picantari avirori. Aitaque nampiitajeri niotacaasa-noteri, pinintasanojeitanteeariri, pinquem-petacanteri narori pinintasanotana. Aisati inquempeajeitena.

Irootaque icantiriri Jesoshi Iriri.

Yaantanacariri Jesoshi.

(Mt. 26.36-56; Mr. 14.32-52; Ir. 22.39-53)

18¹Ari yovecarataquero Jesoshi iquenquetsatacaíri iriri, irosati nojajeitantanaja: Jesoshi, aisati maaroni iroamerepee. Nomonteanajaro pirijavinteni pajitachari Seroni. Nojajeitanaji panquiveerentsiqui anta.²Aitaque anta ijatacaapinijeitanari Jesoshi, irootaque iotantarori iriori Jorashi, yora aacanteri-neri.³Yora jivatacaajeitiriri saserotepee, jeri variseopee itiancajeitavaque soraro,

jeri variria. Ijivajeitapaaqueri Jorashi. Yamajeitapaaque tsionmentotsi, sampa, yoantamento aisati;^{4,5}ipocashijeitapaa-queri Jesoshi. Iotaque iriori Jesoshi jaoca incanteriri. Ijatanaque itonquitavacari, icantavaqueri:

—¿Janica picoiri?

Yacanaqueri:

—Yora Jesoshi nasaretesati.

Icantavaqueri:

—Narotaque.

⁶Icantavacariri Jesoshi: “Narota-que”, irosati ipiantanaca itapiiqui.

Iparajeitanaque quipatsiqui, tiriucion.

⁷Yapiitajiri:

—¿Janica picoasanotiri?

Yacanajiri iriori:

—Yora Jesoshi nasaretesati.

⁸Icantajiri:

—Aitaque nocantajeivetaquempi: “Narotaque Jesoshi”. Naroricampa picoiri, pishinejeiteri irijajeiteta yoca notsipajeitacarica.

⁹Moncaratapaaca icantiquerir Jesoshi Iriri: “Yoca picantaqueñari: ‘Pinquempoyenari’, tecatsi ashinoncachane”.¹⁰Irosati Shimo Petero yaantanacaro isavirite. Ipesaqueri inampire ivincatsarite saserotepee: ipeshitaqueri iyempita iracosanoriquiniri. Ipajita nampirentsi Marico.¹¹Irosati icantantanacari Jesoshi Petero:

—Poimpajero pisavirite poantaroriqui. Irootaque inintacaquenari Apa irayetena. ¿Nontsaneapitsatearima?

Yayeetanaqueri Jesoshi Anashiqui.

(Mt. 26.57-58; Mr. 14.53-54; Ir. 22.54)

¹²Irosati yaajeitantanacari Jesoshi. Irio aajeitanaquerir soraropee, iyapitanote, variria. Ari yoisojeitaqueri.¹³Ijivatapainti yaanaqueneri Anashi. Iriotaque iriconquiri Cajashi. Ari iquenquetsatacaíri Jesoshi.²⁴Impoiji icanti yora Anashi:

—Paanajeri anta Cajashiqui, irisampi-tavaquerita iriori paitapeerica.

Yora Cajashi, iriotaque meeca ivincatsarite saserotepee,¹⁴ cantaqueriri joriopee: “Ocameetsatimotimpí incameta shiramparinta aparoni, iraviscojeitanta-jeari ashánincapee”.

Irisati manacotaincha Petero.

(Mt. 26.58-70; Mr. 14.66-68; Ir. 22.55-57)

¹⁵Shimo Petero iriotaque oijatacoventa-vetanacariri Jesoshi, itsipatari pashini iroamere. Yora ivincatsarite saserote iotiri yora tsipatarir Shimo, irootaque ishinetantacariri iriori ipocaque ivancoqui, itsipatapaacari Jesoshi. ¹⁶Irinti Petero icatiapaaca ashitacorontsiqui araquerora. Isoquijanaji yora itsipatapaacari, icantapaaquero shentirori ashitacorontsi:

—Pishineteri inqueapee iriori.

Ocantiri:

—Ari.

Irosati iqueantapaacari Petero iriori.

¹⁷Ora nampirentsi ocantavaqueri:

—¿Caarimpimpa avirori iroamere

Jesoshi?

Icantiro:

—Caarina.

¹⁸Ocatsincaiteaque. Yoisajeitaquero paamari nampirentsipee, jeri soraropee. Yaquitsiantajeitaca paamariqui. Aisati iriori Petero itsipajeitapaacari yaquitsian-tapaaca.

Yaanajiri aisati Jesoshi Cajashiqui.

(Mt. 26.59-66; Mr. 14.55-64; Ir. 22.66-71)

¹⁹Yora ivincatsarite saserote isampita-queri Jesoshi:

—¿Janica poametapinitiri? ¿Paita poametapinijeitiriri?

²⁰Yacanaqueri Jesoshi:

—Iquemajeitaquena maaroni atiri noametantiri. Noametantapiniti anta yapatojeitantari. Aisati noametapinitanta-

que ivancoqui Tasorentsi. Tecatsi nonamanapsateri ashaninca.²¹ ¿Paita pisampitantanari narori? Pisampijeiteri irinti quemajeitaquenari paitarica nocantaqueriri. Iajeitaquero iriori.

²²Irosati ipasavorotantanacari aparoni soraro catiainchari ara. Icantiri:

—¿Arimpa ampiatsateari ivincatsarite saserote?

²³Yacanaqueri:

—Terica oncameetsate nocantaqueriri, piotacyenaro. Irompa ocameetsatirica nocantaqueriri, ¿paita pipasavorotantanari?

Yapiitaja Petero imanacotaja irisati.

(Mt. 26.71-75; Mr. 14.69-72; Ir. 22.58-62)

²⁵Ainiroquera Shimo Petero yaquitsian-taca. Irosati icantanteetacariri:

—Tempa aviro iroamere Jesoshi.

Irisati manacotanaincha, icantanaque:

—Caarina.

²⁶Itsipajeitari aparo inampire Cajashi. Iriotaque ishaninca yora ipesaquempita-vetaci Petero. Icantaqueri:

—Tempa noniimpi panquiresntsiqui, pitsipatari Jesoshi.

²⁷Yapiitajiro Petero imanacotaja.

Irosati ineantanaca teapa.

Yaanajiri Jesoshi Piratoqui.

(Mt. 27.11-14; Mr. 15.1-5; Ir. 23.1-5)

²⁸Capichaji quitaiteri yojocajeitanacuero ivanco Cajashi. Yayeetanaqueri Jesoshi ivancoqui Pirato, yora pincatsaritsiri. Caari ini jorio, irootaque caari icoajeitanta joriopee inqueajeitapee ivancoqui. Icant:

—Irotaintsi avajeitimentearo Yavisanta-niri. Ariorica ajate ivancoqui Pirato, eiro amatirotsi avajeitea, eiro ineacameetsa-jeiteetsi Tasorentsi.

²⁹Irosati isoquijashijetantanacariri Pirato. Icantajeitavaqueri:

—¿Paitampa yantaqueri yoca shiram-parica pamantaquenariri?

³⁰Yacanaqueri iriori:
—Ainiro yantayetiri. Eirome yantirome caari cameetsatatsi, eiro namimpirime.

³¹Irosati icantantavetacari Pirato:
—Paajeitanajeri avinti. Tempa optimi sanquenarentsi oametimpiri poasanquejanteariri. Pimamateriquetite avinti poasanquetayeri.

Icantanaqueri iriori:
—Te irishineyeetenariji noyeri.

³²Irootaque icantaqueri omoncaratantacari icantitacari Jesoshi. Tempa icantitani: "Impajacoyeetena". ³³Irosati ipiantanaja Pirato ivancoqui. Icajamacantajiri Jesoshi aisati. Icantiri:
—¿Avirompa ivincatsarite joriopee?

³⁴Yacanaqueri Jesoshi:
—¿Piovetaquenampa? ¿Paita pisampantanari? ¿Timatsimpa pashini camantquempi?

³⁵Yacanaqueri Pirato:
—¿Narompa meeca jorio? Iriotaque pishaninca amajeitaquempi aca, jeri jivatacaajeitiriri saserotepee iriori. ¿Paita pantiqueri iquisajeitantaquempi?

³⁶Yacanaqueri Jesoshi:
—Te nompincatsariventante aca quipatsiqui. Nompincatsariventanteme aca, aitaque inquisacoventajeitaquename nonampire. Eirome ishinetirime joriopee iramename. Iro cantaincha te aca nompincatsariventante.

³⁷Irosati icantantacari:
—¿Ariompa? ¿Aviotaquempa pincatsari?

—Je, narotaque Pincatsari. Queario picantaquena. Nocamantajeitiri atiripee queariotasnotatsiri. Irootaque notimantacari, irootaque nopocantacari quipatsiquica. Maaroni yora iotavaqueroriqueariotasnotatsiri, iriojeitaque quemisantanari.

³⁸Icantiri iriori Pirato:
—¿Paita ojita oca picantiri: "Queariotasnotatsiri"?

Irosati isoquijashitantanajari joriopee, icantajeitiri:

—Nosampivetaquempi incaranqui, te pincamantenaji paita yantasanotaqueri noamaanteariri.

Iroimpacajerime Pirato Jesoshi.

(Mt. 27.15-31; Mr. 15.6-20; Ir. 23.13-25)

³⁹Pashini icanti aisati:

—Ariorica omoncaratapaaja Yavisantniri, noimisoquijapinitimpiri aparo yoiminqueetiri. Tempa aitaque ocantari amejeitari. ¿Picoimpa noimpacajempiri pivincatsariteca?

⁴⁰Irosati icajemantajeitanaca maaroni:

—Eiro poipacanaritsi yora. Irio poimisoquijajenari Varavashi irinti. Yora Varavashi coshinti ini.

19 ¹Irosati yaacantantacariri Pirato Jesoshi, ipasatacantaqueri. ²Yora soraro itapoyetaqueneri iramatseere quemariiti. Yamatseetacaacari. Iquitsataqueri quitioncari. ³Ipocashitapinijeitacari, icantamempeashijeitacari:

—¿Avirompa pincatsariventiriri jorio? Iji, iji, iji.

⁴Ipasavorotantapaacari iraco. Isoquijashitanajiri Pirato joriopee aisati. Icantajeitiri:

—Jeri yoca, namajimpiri aisati. Nosampivetaquempi, iro cantaincha tecatsi pincamantajeitena niotanteari paita piquisantacariri.

⁵Isoquijanaji Jesoshi iriori. Yamatseetacaro quemariiti, iquitsaataca quitioncari. Icantajeitiri Pirato:

—Jerica.

⁶Yamenajeitavaqueri jivatacaajeitiriri saserotepee, soraro aisati. Icajameitanaji:

—Pimpajacotacanteri, pimpajacotacanteri.

Icantiri Pirato:

—Paajeitanajeri avinti, pimpajacojeti. Nosampitacovetacari, tecatsi nonquemacoteri irante.

⁷Yacanajiri jorio:

—Timatsi sanquenarentsi oametanari ocameetsati incame jitasonrentsitachari. Tempa icanti iriori: “Narotaque Itomi Tasorentsi”, irootaque ocameetsatantacari incame.

Yapiitajiri Jesoshi, isampitajiri aisati.

⁸Iquemantavacariri Pirato icantajeitaqueriri, aiquero ijatatii itsaroasanotanque. ⁹Iopianaja, iqueanaji ivancoqui.

Icantapajiri Jesoshi:

—Jaoca piponeari avirori?

¹⁰Te iranqueji Jesoshi iriori. Irosati icantantanacari Pirato:

—Paita caari pacantana? Naro pincatsari. Noncoaquerica, ari nomatero noimpacacoventajempi. Aisati oquempeta, noncoaquerica, nomatero nompajacotacantempi. Tempa piotaquero.

¹¹Yacanaqueri Jesoshi:

—Eirome ishinetimpime Tasorentsi, tecatsi pincantenamé. Yora amacantaque-nari aca, irio antasanotaquerori caari cameetsatatsi irinti.

¹²Irosati icoantavetanaja Pirato iroimpacaajerime. Iro cantaincha icajemajeitanaji joriopee aisati:

—Ariorica poimpacaajeri yora, te pishanicateariji Shisari. Jeri yora cantashitachari: “Narotaque pincatsari”. Tempa iriotaque quisakeriri pivincatsarite.

Ipajacotacantaqueri Jesoshi.

¹³Iquemantacari Pirato icantajeitaqueriri, isoquijacaanajiri Jesoshi. Isavicapaaque anta icantacoventantapinitinta. Anta yovetsiqueetironta mapi, ipampaiteyeetironta. Icanteetiro evereo “Cavata”.

¹⁴Itampaticati meecca catsirincaiteri, irotaintsi quitafteri iquenqueshiretarrantorri Yavisantaniri. Irosati icantajeitancari Pirato:

—Jeri yoca pivincatsarite.

¹⁵Icjajemajeitanaque iriori:

—Payeri. Paanaqueri anta. Pimpajacotacanteri.

Isampitiri:

—¿Nompajacotacanterimpa pivincatsarite?

Yacanaqueri jivatacaajeitiriri saserotepee:

—Te nompincatsateriji, apaniro irinti Shisari.

¹⁶Irosati ipajacotacantantacari.

Ipajacotacqueri Jesoshi anta Coricotaqui.

(Mt. 27.24-50; Mr. 15.21-41; Jr. 23.25-49)

¹⁷Irio soraro aajeitanquerirri. Irisati aanaajiro Jesoshi coroshi. Yojocanajiro nampitsi, yareetapaaca toncaariqui pajitachari litontsini. Evereo ipajitiro: “Coricota”. ¹⁸Aitaque ipajacoyeetaquerirri coroshiqui. Itsipatacarí apite shirampari. Ipajacoyeetaqueri iriori coroshiqui pashini. Yoyeetaqueri Jesoshi nianqui. Aparo yoyeetaque iracosanoriqui Jesoshi, irio itsipa irampateequi. ¹⁹Pirato isanquenatacantaque cantatsiri: “Jesoshi nasaretatesi, iriotaque ivincatsarite jorio”. Ipatacacotacantaquero coroshiqui. ²⁰Oquempejitaro nampitsi aitaque ipajacotaquerirri Jesoshi. Oshequi jorio neanataquerori isanquenatiri. Osanquenavetaca irineanequi jorio, oromasati, aisati irineanequi quireshiasati. ²¹Yora jivatacaajeitiriri saserotepee icantiri Pirato:

—Eiro pisanquenatirosi: “Iriotaque ivincatsarite jorio”, irointi pisanquenate: “Irio cantashitachari: ‘Naro ivincatsarite jorio’”.

²²Yacanaqueri Pirato:

—Aitanaque, nomataquero: nosanquenatacantaquero.

²³Ari ipajacotaqueri soraro. Yovojeaqueri iitsaareni, otsipasatitapaaque, irosati ipavacaantacaro. Te orimpiteaji

iroicoroni, intani itijeetiro maaroni.
24Irootaque icantavacaantajeitacari:
 —Eiro atsereirotsi. Tsame antanatiteri,
 ayotanteari janica ashitajearone.
 Aitaque icantari soraro. Imoncarata-
 quero Sanquenarentsi cantatsiri:
 “Impavacayearo noitsaareni. Irantanatita-
 jeitaquenaro noicoroni”. **25**Ora iriniro
 Jesoshi ocatiapaaca quempeji ipajaco-
 taca. Ainiro otimi ireento, aisati opajita
 iroori Maria. Irootaque ijina Quereojashi.
 Otimi ara aisati Maria maquitarasato.
26Ineajiro Jesoshi iriniro, aisati
 inequena narori. Narotaque iroamere
 mintasanotiri. Icantanaquero:

—Ina, jeri yora, pintomintajeari.

27Icantanaquena:

—Jero ora, pinirontajearo.

Irosati naantanajaro novancoqui.

28Iotanaque Jesoshi aitaque moncarajei-
 taca maaroni. Irosati icantantanaca:
 —Nomireni.

Iro icantari imoncarataquero
 ocantiri Sanquenarentsi. **29**Otimi ara
 choncorina, ojaaca quepishijari.
 Yoviinqueetaquero atsimiicajatirori.
 Yoaqueneri sataamentotsiqui. Ijicotacota-
 queneri ivantequi Jesoshi. **30**Yatsimiica-
 vaquero, irosati icantantanaca:

—Aitaque meeca, nomoncarataquero
 icoacaanari Apa.

Irosati yoivotantanaca, icamanaque,
 toren.

Isataaqueri Jesoshi.

31Meeca yovetsiquimentajeitiro jorio
 Yavisantaniri. Onquitaitetamanaque, iro
 saavaroo irimaoreantasanojeiteari. Te
 incoajeiteji jorio yora pajacojeitachari
 iroavisayero saavaroo coroshiqui,
 irootaque icantajeitancariri Pirato:

—Pincarajacantajeiteri ivoripee,
 irosati pimpaajcoreacantantajeariri.

32Irosati ijatashiteitantanajari soraro,
 icarajavoritaqueri yora itsipatacarri

Jesoshi. Aisati icarajitaqueri iriori
 pashini. **33**Yovaashivetapaacari iriori
 Jesoshi, incarajiterime iriori; iro cantain-
 cha ineapaaqueri camaque irinti,
 irootaque caari icarajitantari irinti ivori.
34Iro cantaincha aparo soraro isataapaa-
 queri imerequiqui. Ocontejatapaaque
 iriraja, tsiquiririri. Nija aisati. **35**Naro
 neacotaqueriri, meeca narotaque
 camantacotaqueriri. Nioti queario oni
 nocamantimpiri, pinquemisantajeari
 avirori. **36**Aitaque icanteetaqueriri,
 irootaque omoncararatantacari Sanquena-
 rentsri cantatsiniri: “Eiro icarajiteeritisi
 itonqui aparoni”. **37**Timatsi pashini
 isanquenayeetiniri: “Aitaque irameneeteri
 Quirishito, yora irisatayeteeri”.

Yoiminqueetaqueri Jesoshini omoroqui.

(Mt. 27.57-61; Mr. 15.42-47; Ir. 23.50-56)

38Itimi anta Jose arimateasati. Iroamere
 Jesoshi inaveta, iro cantaincha
 imanaquero. Iro imanantacarori,
 itsaroacaacari ivincatsaritepee jorio.
 Ijatashitaqueri meeca Pirato, icantapairi:
 —Pishinetajenari Jesoshini, naanaje-
 rita.

Icantiri:

—Paanajeri.

Irosati ijatantanaca, yaanajiri.

39Ijatanaque iriori Nicoremo. Iriotaque
 jatashitiriniri peerani Jesoshi tsiteniriqui.
 Yaacotanaqueneri intiritanteariri.
 Iconoquero oyashi inchato pajitachari
 mira, ovane inchato pajitachari aroeshi.
 Aamaaca otenati 45 quiro. **40**Yaajeitan-
 queneri Jesoshini. Iro tocoyatsa yapinai-
 cacotantacariri, itsipataquero casancajari.
 Irootaque yametari joriopee, ariorica
 yovetsiquiri camatsiri. **41**Otiminta
 panquirentsí quempeji ipajacojeitaque-
 rinta. Anta panquirentsí qui omintima
 iroanteariri camatsiri, iroquera
 imoqueetiro. **42**Irotaintsi inquee catsirin-
 caiteri, omoncaratanteari Yavisantaniri.

Ineaquero Jose oquempejitaque omoro, irootaque yoantacariri Jesoshini anta.

Ocoavetari Maria Jesoshini.

(Mt. 28.1-10; Mr. 16.1-8; Ir. 24.1-11)

20 ¹Otomincotapaaque. Tsiteniquera ojatamaque Maria maquitara-sato anta omoroqui yoavetacarinta Jesoshini. Oneapaatiiro jocanaja mapi yashitacotanteevetacariri. ²Narotaque iroamereni inintasanotiniri Jesoshi. Notsipatari anta Shimo Petero. Jero oshiashitapaaquena Maria. Ocantapaa-quena:

—Yayeetajiri Avincatsariteni. Te aneajeriji yoavetacarinta. Te nioteji jaocarica yoyeetajiriri.

Yamenajeivetajari Petero, jeri Joa.

(Ir. 24.12)

³Irosati nojatantanaca apite. Nojatana-que yoavetacarinta. ⁴Noshianaca apite, nanaacotaqueri nainti Petero. Naro anaacotaqueri nareetapaaca anta yoavetacarinta. ⁵Noivotapaaca, namenapaque tsompoina. Noneajiro tocoyatsa ovaja omoroqui, iro cantaincha te nonqueapeeji. ⁶Impoitapaja iriori Shimo Petero. Irinti queapaintsi tsompoina. Irosati ineapaaque iriori tocoyatsa. ⁷Ora panio ipashicanteevetacariri iitoqui, te ontsipatearoji tocoyatsa. Apitivitaja, ovashitaja iroori. ⁸Ari noqueanaque narori, noneapaaquero, irosati niotanta-naca tinaanaja Jesoshi. ⁹Tequerata nonquenqueshiretajeroji Sanquenarentsi cantatsiri: “Incamavetaquearica Quirishito, aitaque intinaanaje”. ¹⁰Irosati nopiantanaja novancoqui.

Oneaqueri Maria Jesoshi.

(Mr. 16.9-11; Ir. 24.10)

¹¹Irointi Maria catianaincha saiteriqui, iraacotaqueri. Oivotanaca, amenanaque tsompoina. ¹²Oneaqueri apite inampire

Tasorentsi, iquitsaataro quitamarori. Isavicaque yoavetacarinta Jesoshini. Isavicaque aparoni iitoyeevetacari Jesoshini, irio itsipa iitiqui.

¹³Icantiro:

—Tsinane, ¿paita piraantari?

Ocantajiri iroori:

—Yayeetanajiri novincatsariteni. Te nioteji jaocarica yoyeetajiriri.

¹⁴Irosati opitsocantanaja. Oneaqueri Jesoshi icatiapaaca, iro cantaincha te iotavaqueriji. ¹⁵Icantiro:

—Tsinane, ¿paita piraantari? ¿Janica picoiri?

Ojitavaqueri irio tsameetacoyerirori panquiresipee. Ocantiri:

—¿Avirompa aanajiriri novincatsariteni? Pincamantajenate jaocarica poajiriri. Aitaque naajanteri narori.

¹⁶Icantanajiro iriori:

—Maria.

Opitsocanaca iroori, ocantanaqueri:

—Oametenari.

¹⁷Irosati avitsanotantacariri. Icantana-jiro:

—Poimpacajena: tequeratsita novajeno-quea Apaqui. Meeca nocoaque pijatashi-jeiteri quemisantajeitanari, pincamanta-jeitapajeri meeca novajenocaja Apaqui. Tempa iriotaque Tasorentsi. Tempa irisati Piri avirori, piotiri Tasorentsi ini, irootaque pipincatsatantacariri avirori.

¹⁸Irosati opocashitantanari narori, aisati itsipapee iroamerepee, ocamanta-jeitapajana:

—Noneajiriyea Avincatsarite.

Ocamantapaaquena icamantayetaque-rori Jesoshi.

Intapaajari Jesoshi, inijaapaajari iroamereni.

(Mt. 28.16-20; Mr. 16.14-18; Ir. 24.36-49)

¹⁹Ishaavijiiteanaji meeca, napatojeitaja, nocarajeitajiri itsipapee iroamere. Notsaroacaajeitanacari jivatacaajeitiriri

noshaninapee, yora oacantaqueriri Jesoshi, irootaque noyavitantacarori ashitacorontsi. Imapocashijeitapaajana Jesoshi, icatiapaaaja nianqui. Icantajeita-paajana:

—Piveshireajeitanajea.

²⁰Irosati inijantajeitapaquenaro iraco, aisati imerequi. Noneajeitavajiri Novincatsarite, irosati noquimoshirejeitanajena.

²¹Yapiitajana:

—Piveshireajeitanajea. Tempa irio tiancaquenari Apa peerani, aisati meeca nonquempetacayempi avirori, nontian-quempi.

²²Irosati itasoncantajeitanajena, joo.

Icanti:

—Meeca ompocashijeitempi Ishire Tasorentsi, quiso oajeitanaqueMPI.

²³Ariorica pineaqueri ashaninca iquemisantasanotaquena, irosati pincantanteeariri: "Incavintsayempi Tasorentsi avirori, eiro iquishimentimprotsi pantayetiri". Irootaque pincanteriri: tempa aitaque incavintsaasanoteri Apa yora pincanteri. Pincanteririca itsipapee: "Te pinquemisanteji, irootaque inquishimentantempirori Tasorentsi pantayetiri", aitaque inquishimentaqueeri.

²⁴Ipocashijeitantaquenari, te aneriji inti Tomashi, yora ipajiyetiri Tsipari; aparoni peaincha. ²⁵Ari ipocapaaji iriori, nocamantavajiri:

—Noneajeitajiriyea Avincatsarite.

Icantanaque:

—Nocoi noneero iraco, ora oqueaqueri quiravo, noninti noiminqueero nacotsapaqui. Aisati noninti noiminqueero naco imerequiqui. Eivorica noiminqueirotsi, eiro noquemisantsi.

Yapiitajiri ineajeitajiri Jesoshi iroamere.

²⁶Avisanaque 8 quitaiteri, ari napatojetanaja aisati pancotsiqui, itsipajeitajana iriori Tomashi. Osheequi catsini notsaroacaajeitacari quisajeitanari, irootaque

noyavitantacarori ashitacorontsi. Imapocapaajana aisati Jesoshi, icatiashi-tapaajana nianqui. Icantajeitapaajana:

—Piveshireajeitanajea.

²⁷Irosati icantantanacari Tomashi:

—Pamenero naco. Pancote, poimin-queero pacotsapaqui aca. Pancote aisati, poiminqueero paco nomerequiquica. Eiro pitseencajanatsi aisati, pinquemisante irointi.

²⁸Irosati yacantanacari Tomashi:

—Avirotasanotaque novincatsarite, avirotasanotaque notasorentsite.

²⁹Icantanaqueri Jesoshi:

—Meeca pineajana, irootaque piquemi-santajanari. Timatsi caari neenane, iro cantaincha inquemisantajeitena; inquimoshiretasañojeitanajena inti.

³⁰Osheequi catsini itasoncantayetaque Jesoshi. Narojeitaque iroamere, noneajeitaqueri, iro cantaincha te nosanquenajeiteroji maaroni aca. ³¹Nosanquenajeiteresa oca pinquemisantantajeiteariri Jesoshi irojaque Quirishito, yora Itomi Tasorentsi. Ariorica pinquemisantajeiteresa, aitaque iraneacajaitejempa anta inquitequi, pincantaitatiyempani.

Mavatanaque inijaajari Jesoshi iroamerepee.

21 ¹Irosati inijaantajeitajana aisati Jesoshi, aisati itsipapee iroamerepee. Noneajeitajiri ortsapijaqui incajare Tiveriashi. Aitaque ocantari. ²Napatojetaca, nocarajeitiri Shimo Petero, jeri iriori Tomashi: icanteetiri aisati Tsipari. Jeri Natanaeri poneachari Canaqui, onta carirequiniri. Narojeitaque itomipee Severeo. Jeri aisati apite pashini iroamere Jesoshi. Napatojeitaca maaroni.

³Icantajeitana Shimo Petero:

—Nojate nonquitsate.

Nocantajeitanaqueri:

—Narosati, noijajeitanaqueMPI.

Ari nojajeitanaque. Notejeitapaaaca pitotsiqui. Noquitsajeivetaca, irosati

noquitaitetacotantacari. Tecatsi naye.

⁴Oquitaitetamanaji, irosati icatiantapaaaja Jesoshi otsapijaqui. Te niojeitavajeriji.

⁵Icantajeitana:

—Ayompari. ¿Chorampa shima?

Nacajeitanaqueri:

—Te aneeri.

⁶Icantajeitana:

—Pinquitsataje aisati pacosanoriqui, aitaque paye.

Ari noquitsajeitanaji. Naajeitaque oshequi catsini shima, te naaveacoteriji nontetacoteri pitotsiqui. ⁷Naro iroamere intintasanotiri Jesoshi. Nocantiri Petero:

—Ja, iriotaqueyeatsi Avincatsarite.

Ari isapocaquero Shimo iitsaare incaranqui, irointi itorosate. Iquemantaquenari, irosati iquitsaatantanajaro iitsaare. Ishiticatsaquitanaja. Ipiincacotanaquero iitsaare, pocn; yamaatashitanajiri, yaatapaaji. ⁸Nimpoitacojeitapaaji narori, nonoshicacojeitiri shima. Quempejitaapaji otsapija, aamaaca ocarati 100 metro. ⁹Nomitajajeitanaque quipatsiqui. Noneapaaque oparasheti paamari, itashitiri shima. Ottimi aisati tanta. ¹⁰Icantajeitavaquena Jesoshi:

—Pamaquenari meeca shima piquitsataqueri.

¹¹Itetapaaja aisati Shimo Petero, inoshicacotajiri shima quipatsiqui. Jaasanotaca antearipee shima, icarati 153. Yoshequiasanovetaca catsini, iro cantaincha te ompesanaqueji noquitsatantariri. ¹²Icantajeitana Jesoshi:

—Pimpocajeite meeca poajeitapeempa.

Notsaroacaacari noncanterime: “¿Janicampima?” Maaroni niojeitaqueri Avincatsarite ini. ¹³Irosati iquempejiteitantaquenari Jesoshi. Yaaquiero tanta, ipajeitaquena. Aisati shima, ipajeitaquena maaroni. ¹⁴Icamavetaca Jesoshi chapinqui, itinaanaja. Mavatanaque meeca inijaaiana.

Icantiri Petero.

¹⁵Noajeitaca. Irosati isampitajari Jesoshi:

—Shimo, itomi Jonashi, ¿panaacojeitaquerimpa yocapee, pinintasanotana avinti?

Yacanaqueri iriori:

—Aviro, Novincatsarite, iotatsiri nonintimpi.

Icantiri:

—Pimperi novishajaniquite iroyea.

¹⁶Yapiitajiri aisati isampitajiri:

—¿Pinintanampa?

Yacanajiri aisati:

—Je, Novincatsarite. Aviro iotatsiri nonintimpi.

Icantiri:

—Pinquempoyeajeitenari novishate.

¹⁷Mavatanaque isampitiri:

—¿Pinintasanotanampa?

Irosati iquenqueshireantanaca Petero. Iro iquenqueshireantanacari, mavatanaque isampitaqueri: “¿Pinintanampa?” Yacanajiri aisati:

—Avirotaque, Novincatsarite, iotirori maaroni. Piotana avinti nonintasanotimpirica.

Icantiri:

¹⁸—Pimperi novishate iroyea. Queario-taque oca noncamantempiri: peerani, ainiroquera pevancariveitani, piquitsata-piniveitaroni piitsaare. Pijatapinyetini jaocarica pinintiri: tecatsi tsaneempineri. Iro cantaincha ariorica panteashiparitasana-tapaaque, pancotsaye pacoqui, iroisoyeetempi, inquitsaatajempi itsipapee. Iraanaquempi tenta pincoave-tea pijate.

¹⁹Aitaque icantaqueriri. Yoametaqueri jaoca incanteari incamanteari Petero iriori. Ariorica irineeteri incamaque, irioyeetanaque ipincatsaritasanoti Tasorentsi. Irosati icantantanajari:

—Tsame, pojatanaquena.

Inintane Jesoshi.

²⁰Ipitsocanaca Petero. Inequena noijatanaqueri, tempa naro iroamere

Jesoshi intintasanotiri. Chapinqui noacaa-jeitantacariri Jesoshi, naro sampitaque-ri: “Novincatsarite, ¿janicampa aacantempineri?”²¹ Ineantaquenari Petero, ijicotana, aisati isampitiri Jesoshi:

—Novincatsarite, ¿jaoca incanteeteriri coajica yora?

²²Icantanaqueri:

—Noninterica intimavaqueta aca irosati nompiantajeari, eiro piquenque-shiretirotsi. Poijsatenata nainti.

²³Yovaajeitaquero maaroni quemisanta-tsiri icantiriri Jesoshi. Ijijeivetaca eiro

nocamitsi. Iro cantaincha te incanteriji Jesoshi: “Eiro icamitsi Joa”. Irointuea icantavetari: “Noninterica intimavaqueta aca irosati nompiantajeari, eiro piquenqueshiretirotsi”.

²⁴Narosanotaque iroamereni Jesoshi, sanquenatirori oca. Ayojeitaque queario-tasanotaque oca nosanquenataqueri.

²⁵Timatsi oshequi pashini yantayeta-queri Jesoshi. Ariorica nontsoteaquerome nosanquenataquerome maaroni, eiro onarome quipatsiquica sanquenarentsi. *Joa*

YANTAYETINIRI ITIANCANENI JESOSHI

Icamantiri Irocashi jaoca ocantari
inquenquetsatacayeriri.

1 ¹¿Ainirompi Tiojiro? ¿Tecatsimpa oyempine? Peerani nintantacarori nosanquenatantaquempiroñi, noquenquenquetsatacaimpironi maaroni yantayetiniri Jesoshi. Aisati noquenquenquetsatacaimpironi maaroni yoametantayetiniri. ^{2,3}Ari oshequi ineacatsitacaro, icamaque, itinaanaja aisati, irosati yonijaantapaaajariri iroamerepeeni. Oshequi ineacotapini-jeitajiri yantayetapaajiri, irootaque iotasanolantajari itinaanaja. Ocarati 40 quitaiteri yonijaapinitantajari. Iquenquenquetsatacokeri jaoca icantari Tasorentsi ipincatsariventanti. Itiancajeitaqueri iroamerepee, iriotaque yora icoyeajeitaqueri. Iro cantirir Ishire Tasorentsi. Impoiji yoancajiri Tasorentsi inquitequi, irosati narori novecaratantarori noyenquetsare peerani. Meeca novaajempiro: noncamantajeitimpido yantayetiri iriori iroamereni Jesoshi, yora itiancanaqueri peerani.

Yoverantasananacarori Jesoshi irineane.

⁴Ari yoacaajeitajari Jesoshi. Icantas-notaqueri:

—Eirota pojoquitarotsi Jerosare; nocoaque poyeavaquerota icashiaca-quempi Apa: ora piquemitaquenari peerani nocamantitaquempi. ⁵Yora Joani ivaotisajeitaquempi nijaqui iojeitancarori atiri piquemisantajeitirini.

Iro cantaincha eiro osamanitsi ompocashijeitempi Ishire Tasorentsi, quiso oajeitempi iriojeitanteeari atiri queario piquemisantaquena narori.

⁶Yora apatotimentacariri, isampijeitiri:

—Novincatsarite. Arojeitaque ishanin-caní yora intacaroniri Ishiraeri. Peerani itimaveitani pincatsariventaveitariniri ashanincaní; meecampa, tecatsi. ¿Ariompa meeca pincanteri pashini impincatsariventajeitajena? Oshequi nocoajeitaque.

Yacanaqueri:

⁷—Te incoacyempiji Apa piojeitero jaoca oncarate. Osamanitatsirica, irompa jaocarica oncarate. Irintiquea Apa apaniro cantatsine. ⁸Coajica intasonca-ventajeitimpido, aisati ompocashijeitempi Ishire. Nocoaque pinquenquenquetsatacojei-tena anta Jerosarequi, pintsoeteaquero Jorea. Pinquenquenquetsajeite anta Samaria-qui, aisati pintsoeteanaquero anta pashini-peequi quipatsi.

Yoajenocantanajari Jesoshi.

⁹Irootaque icantanaquerirri Jesoshi. Ari yamenajeitavajiri, irosati yoajenocanta-naja jenoqui, ipeanaja menceriqui. ¹⁰Ari yamenajeitavajiri sorerer, ijatanaji. Ari imapocapaqueri apite shirampari, icatiimojeitapaacari. Quitamarori iitsaare. ¹¹Icantapaqueri:

—¿Ainirompi, carireasati? ¿Paita pamenantarori inquite? Pineavajiri yora Jesoshi yoajenocanaja inquitequi.

Iriotaque piajantsineri coajica aisati. Ariorica impiaje aisati, inquempetapaaajea meeca ijatananajari.

¹²Ari ipiajeitanaja Jerosarequi iroameri Jesoshi. Iponeanaja toncaariqui opajitanta Orivomashi. Oquempejitaro Jerosare, te arejiteji. ¹³Ari yareejeita-paaja, yataijeitapaaji oshitamencotanta jenoqui. Anta imaapinijeitinta yora Petero, jeri Joa, Santiaco, Antirishi, Jeripi, Tomashi, Varitorome, Mateyo, Santiaco itomi Arijeo, Shimo yora Shintsitsatsiri. Aisati imaapinitinta Jorashi, yora itomi Santiaco, maaroni. ¹⁴Ari yapatojeitaja aisati iquenquetsata-caajeitiri Tasorentsi. Itsipajeitari irrentipeeni Jesoshi, jero Maria irinironi, jero otsipapee tsinane. Aitaque icantani iquenquetsatacapinijeitiri Tasorentsi.

**Icyeantacariri Matiashi
poyeetajariri Jorashi.**

¹⁵Ari pashini quaitateri yora Petero icatiimojeitanacari iyemisantaririnteepee. Aamaaca icarajeiti 120. Icanti:

¹⁶—Noyemisantaririnte, moncarataca ocantiniri Sanquenarentsi. Peerani oametirini Ishire Tasorentsi Iravirini iquenquetsatacotantariniri Jorashini: yora jivajeitaqueriri aajeitaqueriri Jesoshi. ¹⁷Aitaque acarajeiveitarini. Peerani itsipajeiveiteeni intacojeitantanai, iro cantaincha ¹⁸impoiji yaacantanirota-queri Avincatsarite, ipinatashiyeevetacari quirequi. Yaavetacari, impoiji yoipiajiri, iriotaque quirequi yamanantanteeta-jarori quipatsi. Impoiji irisati shiticajancha, shiti; itsatanaca. Impoiji ipesacota-naque, peti; iquenaitaque tirin; ipitianca-paaca; irosati itsirajantapaaca imotijaqui, tsira, osoquijanaque iramporetsa.

¹⁹Iojeitaqueri maaroni jerosaresati. Irootaque ipajitanteetarori quipatsi yamananteetiri Asererama. Acantiri aneanequi arori: “Ivinaroni Jesoshi

yoanteevetacariniri”. ²⁰Aitaque isanque-nayeetironi peerani pampoyeantsi cantatsiri: “Oncaarapancoitetanaque ivanconi aacanterineri Avincatsarite, eiro itimajitsi timantitajearine”. Aisati ocantini pampoyeantsi: “Ocameetsati intimaje poyeetajearineri quenquetsata-cantajantsineri”. ^{21,22}Tsame meeca ancanteri itsipa: “Pimpoyeetajeari Jorashini”: tempa irootaque icoacaa-queeri Tasorentsi. Iriotaque ancanteri tsipatitapinijeiteeniri peerani: neasanoti-riri Joani ivaotisatantini, aisati neapiniti-riri Jesoshi. Acoaque neaqueriri itinaanaja aisati ijatanajji jenoqui: ancanteri incarajeitee anquenquetsataco-jeiteri Jesoshi. ¿Janicampa meeca ancanteri?

²³Ari icanti itsipa:

—Iriorica yoca Jose Varasavashi, ipajiyetiri aisati Joshito. Terica, iriorica yoca Matiashica.

Ari icajemiri apite:

—Caate aca nianqui.

²⁴Impoiji iquenquetsatacari Tasorentsi, icantiri:

—Novincatsarite, aviro avinti iotirori jaoca icantajeitari maaroni atiri. Jeri yoca apite. Piotacyenari janicarica picoasanotaqueri avinti ²⁵poyeetajearine Jorashini. Tecatsi incantea meeca iriori inquenquetsataje aisati irintacotantajea: tempa camaque ini, janirotaque anta Sharincaveniqui.

²⁶Impoiji ipishoncajeitiro mapijaniqui iriotanteari janicarica icoacaaqueri Tasorentsi, irio icoyeaque Matiashi. Ari icaraveita itiancane Jesoshi 11. Meeca icarajeitajiri aisati Matiashi.

Quitateri ipajiyetiri: “Pentecoshiteshi”.

2 ¹Ari omoncaratapaaja meeca quaitateri ipajiyetiri: “Pentecoshiteshi”. Ari yapatojeitaca Jerosarequi quemisantajeita-siri. ²Omapocashitapaacari, iquemavaquero

shiavetarori tampea antearo, oneapaaque, sooo. Oponeanaca jenoqui, otsoeteapaquero pancotsi isavicajeitantar. ³Aisati oconijati-motashitapaacari shiavetacarori paamari, ovaraaapaaca; opomencajeitapaquaqueri iitopeequi maaroni savicajeitaantsiri, pomein. ⁴Otimantashirejeitapaacari Ishire Tasorentsi. Irosati ineanatantanacaro otsipapee neantsipee, imajeitaquero ora oneaveetacaquaqueri Ishire Tasorentsi. ⁵Ari isaviqui anta Jerosarequi joriopee, quemisantasanoatsatsiri, iponeayetaca pashinipeequi quipatsi, jaocaricapee. ⁶Iquemantajeitavacariri ineanajeitanaque, irosati yapatojeitanta oshequi atiri. Iquemajeitapaquaqueri irineanesanori. Te iriotacotapeeriji. ⁷Yoajeitapaquaque cavaco, iquenqueshireajeitapaaca, isampitavacaajeitapaaca:

—Tempa cariresati inajeiveta yoca neaveetantsirica. ⁸¿Jaoca icantacari iquemantajeitaror maaroni aneanepree? ⁹Meeca acarajeitaqueri paratosati, merosati, eramitasati. Jeri savicatsiri Mesopotamiaqui, Joreaqui, Caparoshiaqui, Pontoqui, Ashiaqui, ¹⁰Jirijiaqui, Pampiriaqui, Ejipitoqui. Aisati acarajeitaqueri poneaye-tainchari otsapitapaaca Iriviaqui anta oquempejitatapai Shirene. Jeri aisati acarajeitaqueri quivantatsiri poneayetachari Oromaqui. ¹¹Acarajeitaqueri joriosanotatsiri aisati peajanchari jorio. Acarajeitiri queretasati aisati aravesati. Iro cantaincha aquemajeitaqueri ineanajeitantar aneanesanoripee. Iquenquetsatacotiri Tasorentsi, jaoca icanta itasoncantayeti.

¹²Ari yoajeitanaque atiripee cavaco, te iriotacoteriji. Isampitavacaajeitanaca:

—¿Paitaquea iquemantarori aneane?

¹³Irinti pashini, ishirontimentajeitanacari, icanti:

—Inshinquejiteca yonta, iji, iji, iji.

¹⁴Ari ainiro anta iriori Petero, icarajeiti itsipapee itiancane Jesoshi.

Quimojenca icamantaqueri:

—Nojorioririnte: maaroni aviro savicajeitatsiriaca Jerosarequi, piojeita-vaquero oca noncamantempiri, pinquemisantajeitavaquena. ¹⁵Pijitashijeivetacari ishinquejiteca yocapee. Ja, te irishinquejiteaj. Tempa ashinquitapiniyeita tsiteniriqui, iro cantaincha oquitaitetamani meeca, tequera irijenoquitapeeji catsirincateri. Tequera omoncarateaji ishinquitapiniyeeta, ¹⁶iointi oca piquemaqueri icamantacotiri camantantaveitachaniri peerani Joirini: ¹⁷“Icanti Tasorentsi: ‘Coajica irineajeitiero maaroni atiri nontianqueneri Noshire. Incaman-tantayete itomipee, irishintopee. Yora evancaripee irioshiredashitearo paitapee-rica. Aisati irimishiveetashitea anteashi-paripee. ¹⁸Jeri quemisantajeitene: shiramparipee, tsinaneppee, nontiancajei-teneri Noshire, inquenquetsatacotante-nari. ¹⁹Ari nomatero coajica caari pineapiniti inquitequinta jenoqui, aisati aca quipatsiqui: poajeitanaquero cavaco. Aitaque pineajeitiero coajica irirajani camajeitatsineri, aisati pineavaquero ontaajeitanaquea pancotsipee: oshequi oncachaajencatanaque. ²⁰Irijivate intsivacanaque catsirincateri; aisati yora cashiri, inquitioncatanaque, irishiana-quero irajantsi. Impoijiquea omoncarata-paaquea quitaiteri irareetantapaaqeeari Avincatsarite. Oshequi irimatapaaque, iriotacojeitaqueri maaroni atiri. ²¹Iroavisa-cojeitea maaroni aventajeitearine”. Irootaque isanquenatiniri Joirini.

²²Aisati icanti Petero:

—Noshaninca. Pinquemisantavaquero oca noncamantempiri, nonquenquetsata-coteri Jesoshi, yora nasaretesatini. Itasoncantayeti, imayetaquero caari aneapiniti. Aisati imayetaquero paitapee-rica, ayotantariri itasorentsitasanotaque. Tempa pineapinjeitaqueri avirori, piotitacari. Tempa irio Tasorentsi mataacaqueriri. ²³Peerani aitaque

iotacotitarini, icantitani: “Aitaque oncanteari, impimanteeteri yora Jesoshi”. Irio caari cameetsatatsi oaqueriri, iro cantaincha pipajacotacantajeitaqueri avirori, poamaacantajeitaqueri. ²⁴Ari oshequi iquematsicayetacaro, icamanaque, torein. Iro cantaincha yoitinaajiri Tasorentsi, te incoacayeriji incamasanote. ²⁵Tempa isanquenatitacaroni peerani Iravirini irineane Jesoshi: “Niotaque quiso yoaqueña Novincatsarite, isavicaque nacosanoriqui yamitacotapinitantanari, caari noashiretanta. ^{26,27}Oshequi noquimoshireventaqueeri, otimantari nocantantariri: ‘Apa, oshequi noveshireaca. Niotaque eiro pojocanatsi anta ishaaviji. Aisati eiro pishinetanatsi nompatsaye, tempa pineacameetsatana. Niotaque pimataquenaro oca picantaque-nari. ²⁸Piotacaaquenaro noncanteani naneasanotanaje, quiso avavacayea, noncanteani noveshireimentanaquempi’”. Irootaque irineane Jesoshi isanquenatini Iravirini.

²⁹Ari yovaajiro aisati Petero:

—Meeca, noshaninca, noncamantasa-notempi. Icamaque intacantaqueeri Iravirini, itijaca. Timatsiquera meeca itijacanta. ³⁰Camantantsiniri inaveitani. Iotasanolironi icantitariniri Tasorentsi: “Queariotaque oca noncamantasanotem-piri, eiro namatavitimpitsi. Coajica impincatsariventante pishanincasanori, poyetajempineri”. ³¹Pineaquero, tequera-tsitaní intinaajeji Quirishito, iro cantaincha iotacotitacarini Iravirini. Tempa isanquenatini: “Incante Quirishito: ‘Apa, niotaque eiro pojocanatsi anta ishaaviji, aisati eiro pishinetanatsi nompatsaye’”. ³²Irootaque Jesoshi yoitinaajiri Tasorentsi. Aitaque noneajeitaqueri narori, meeca nocamantasanotaquempi. ³³Impoiji yoancajiri anta iracosanoriqui, icaratan-tapaajariri ipincatsariventanti. Irosati quiso oantacariri Jesoshi Ishire Tasoren-

tsi, ora icashiacaqueriri Iriri. Meeca quea, itiancajeitaquenaro narori aca: irootaque pineantajeitaquenari aisati piquemajeitantaquenari. ³⁴Pamene, te iro quenquetsatatajanchane irisati Iravirini peerani, irintiquea iquenquetsatacotori Quirishito. Te irovajenocajeaji irinti Iravirini jenoqui, irintiquea Quirishito. Tempa isanquenatitani peerani: “Tempa iro Tasorentsi cantiriri Avincatsarite Quirishito: ‘Pisavacapee aca nacosanoriqui, pincaratená ampincatsari-ventante ³⁵irosati impincatsajeitatem-piri maaroni quisajeivetimpiri’”.

³⁶Aisati icantajeitiri Petero:

—Tempa arojeitaque ishanincani Ishiraerini. Cameetsa iritasanojeitero ashanincaeji oca nocantaqueempiri: pipajacotacantavetacari Jesoshi, iro cantaincha yoitinaajiri Tasorentsi, ipeavajiri aisati Pincatsari, irisati Quirishito.

³⁷Iquemantajeitavacarori oca, oshequi iquenqueshiretasanojeitanaca. Isampijeitiri Petero:

—Noshaninca, ¿jaoca noncantajeitari?

Yacanaqueri:

³⁸—Pinquenqueshireaja, eiro piquem-petajatsi peerani. Paventajeitajeari Jeso quirishito aisati pivaotisatimentajeitajeari, incavintsaajeitatem-piri Tasorentsi, eiro iquenqueshireacotajimprotsi aisati caari cameetsatatsi pantajeiveitani. Irootaque quiso oajeitatem-piri aisati Ishire intianquempi. ³⁹Irootaque icashiacaajeitaquempi avirori; aisati icashiacaajeitaqueri iriori pishanincata-jeari coajicaní, jeri aisati maaroni arejipeequiniri iriori. Irootaque icashiacaajeitaqueeri maaroni; irootaque icoacaajeitaqueeri Avincatsarite, ariorica anquemisanteri.

⁴⁰Oshequi pashini icamantasananojeitiriri, icoaque inquemisantacayeri. Jero oca icantiqueriri aisati:

—Poavisacojeitea. Pishiaeitaricari timajeitatsiri meeca: yora caari cameetsa-jeitatsi.

⁴¹Ivaotisajeitaca maaroni quemisanta-jeitaquerori irineane, aamaaca icarajeita-que 3,000. ⁴²Icantatiani iquemisantapini-jeitiro oca yoamejeitiriri. Icantatiani cameetsa iquempeavacaajeitaca: itsipata-vacaajeitaca icarajapinijeitiro tanta, iquenqueshirejeitancariri yora camimentajeiteeri, aisati iquenquetsata-caapinijeitiri Tasorentsi.

⁴³Yora quemisantatsiri imatapinitaque-neri atiripee caari inepinijeiti, aisati imayetaquero paitarica iotantacariri queario itsipatari Tasorentsi. Yoajeitana-queri cavaco maaroni. ⁴⁴Ari iquempeava-ccaajeitaca quemisantajeitatsiri. Te irimashitsajeiteji, irointi ipavacaapinijeita timimojeitiriri, paitaricapee. ⁴⁵Ipmanta-jeitiro irovaararo, iipatsite aisati. Ipaarantajeitiri maaroni ishaninca coiteimojeitariri. ⁴⁶Maaroni quitaiteri ijatapinijeiti anta ivancoqui Tasorentsi. Aisati icarajajeitaquero tanta ivancopee-qui iriori, iquenqueshireantariri camimentajeitaqueeri. Ariorica yoajeita, iquimoshiretasanojeiti, aisati cameetsa ipashitavacaajeitaca. ⁴⁷Icantajeiti:

—Cameetsa ini Tasorentsi.

Jeri yora maaroni timajeitatsiri ineacameetsajeitaqueri quemisantatsiri. Icantatiani maaroni quitaiteri iquemisan-taque pashini atiri, yoshequiacasaanojei-taqueri Avincatsarite.

Icamantanti Petero anta ivancoqui Tasorentsi.

3 ¹Pashini quitaiteri, jenoquiquera catsirincaiteri, irotantsi omoncar-tea iquenquetsatacaantapinitariri jorio Tasorentsi. Itoncaanaque Petero, jeri Joa anta ivancoqui Tasorentsi. ²Ainiro isavicaque anta aparoni shirampari, choriveetatsiri iitiqui. Aitaque icantatapaa

peerani, iroaquera itimapaaque. Ari maaroni quitaiteri yameetapinitiri omoroqui pancotsi ipajiyeetiri: "Camee-tsari omoro". Aitaque yoyeetapinitiriri omoroqui iramananteariri iirequite queayetatsiri. ³Yora Petero, jeri Joa irovetailancha inqueajeitapeeme pancotsi-qui, iro cantaincha ineavaqueri, icantave-tavacari:

—Pincavintsayena noshaninca, pimpema quirequi.

⁴Ari yamenapaquaqueri Petero, icantiri:

—Pamenenate.

⁵Yamenasanovetavacari, ijitashivetaca ari impaquerime paitarica. ⁶Iro cantain-cha icantanaqueri:

—Tecatsi noirequite, iro cantaincha nocoaque noncavintsayempi. Noncanteri Jesoquirishito, yora nasaresesati iraniita-caajempi irinti, paniitantajeari.

⁷Yajiricaqueri iracosanoriqui, yoatiaqueri. Intsipaita yavisacotaji, ishintitanaji iitiqui. ⁸Ishintitsi icatianaja, cati. Icatiasanotanaja, yaniitanaji. Itsipatanacari, iqueanaque pancotsi-qui. Isapocasapocatanaque, icantanaque:

—Cameetsa ini Tasorentsi.

⁹Ineajeitavaqueri maaroni atiri: yaniita-naji. Iquemajeitavaqueri icantanaji:

—Cameetsa ini Tasorentsi.

¹⁰Ari iojeitavaqueri, irlotaque yoca savicaveitachaniri omoroqui, amananta-veitachaniri quirequi. Ineajeitaqueri yavisacotaji, irootaque yoajeitantanacariri cavaco. Te iriotacoteriji. ¹¹Ari yajiricasanotajiri Petero, jeri Joa. Inajeitaque anta yapatotapinijeitanta: irio Saromo vetsicacantironiri peerani pancotsi. Irosati ishiashitantapaacari maaroni atiri, yoajeitanaqueri cavaco.

¹²Ineavaqueri Petero, icantavaqueri ijorioririnte:

—Noshaninca, ¿paita poajeitantanacari cavaco? ¿Paita pamenantajeitanari, sorerere? Eiro pijitashitanatsi naro

Tasorentsi naniitacantajajariri yoca choriveitachaniri. Eiro aisati pijitanatsi noquemisantasanoti nomatantajajariri.^{13,14} Irinti Tasorentsi oavisacotajiriri. Peerani iquemisantaveitarini Avarama, Isaca, Jacovo, jeri aisati maaroni intacantarioniri. Ocameetsati pinquempejeiteari iriorini, pinquemisantajeiteri Tasorentsi. Iriotaque neacameetsatasanotiriri Jesoshi, icanti: "Pineaueri, icameetsatasanoti Notomi, yantaquenaro maaroni nocoacaquaqueriri". Queario icameetsatasanoti Jesoshi, catsini. Iriotaque paacantaqueri. Iro iroimpacaajerime Pirato, aiquero picantacoventatiiri: "Te noncoyeji poimpacaajeri", irinti picoaqueri yoipacajimpri oantatsiri.¹⁵ Poacantaqueri oaneajeitiriri atiri. Icamavetapainta, impoiji yoitinaajiri Tasorentsi. Aisatitapajji, noneajeitajiri.¹⁶ Jeri yoca shirampari: iquemacotantavariri Jesoshi, iquemisantaque, irootaque yavisacotantajari. Jerica pineaueri. Tempa piojetirri. Ari iquemisantaque, irootaque itecatsitajari. Pineaueri meeca yaniitanaji.

Aisati icantajeitiri Petero:

¹⁷—Ari noshaninca, meeca niotaque te piojeiveiteani avinti. Aisati iquempeta avincatsaritepee, te iriojeiveiteani.¹⁸ Imataquero Tasorentsi oca icantitaniri peerani: "Coajica oshequi inquematsictearo Quirishito, incamimentajeiteri atiri iroavisacotantajeariri". Tempa iquenquetatsatacitarini Quirishito maaroni yora camantantatsiniri.¹⁹ Pinquenqueshirejetanaquea, eiro piquempejeitajatsi peerani, iroitiquea pinquemisantajeite; impoiji incavintsayempi Tasorentsi: iroameetsajeitempi, eiro iquenqueshirecotajimpirotsi aisati caari cameetsatatsi pantaveitaniri. Irosati intsipajejantempi Avincatsarite, iriveshireacaajeitempi.²⁰ Aisati intianquemppiri Jesoshi, yora Quirishitotatsiri. Tempa peerani icaman-

tasanotaquemppini.²¹ Incantaitatiyempani intimapaaje anta jenoqui, irosati iroameetsatantanetaquearori maaroni, paitapeericá. Tempa irootaque icantiniri peerani yora camantantatsiniri, yora yoameetsajeitiri Tasorentsi: iriotaque neanatacaaajeitiriniri maaroni.²² Icantini Moishishi: "Yora Avincatsarite Tasorentsi intianquemppiri camantajempineri, inquempetajena narori itiancaquena. Avirotaque irishanincatajeari. Paitarica incamantempiri, pinquemisantavaqueri.²³ Irinti maaroni caari quemisantiri iriori, eiro quiso yoiritsi ishaninca, iroitiquea intsoncajeitajeri".²⁴ Iquenquetatsatacitoroni peerani maaroni camantantajeitatsiniri oca pineayetaqueri meeca. Jeri yora Samoirini, intacaroniri, jeri aisati maaroni impojeitiriri. Iquenquetatsatacjeitiro, maaroni.²⁵ Aitaque ashánincajetacari yora camantantatsiniri. Peerani icantirini Tasorentsi Avarama: "Coajica iriveshireimentajeiteari maaroni atiri pishanincani: yora Quirishito pocatsneri". Moncarataca icantaqueriniri. Ocameetsati meeca piveshireimentajeiteari.²⁶ Itiancaqueri aroriqui, ijivajeitacuee yoamejeitaquee. Ainiro pantajeitiro caari cameetsatatsi, iro cantaincha ipocashijeitimpí iroavisacojeitempi eiro pashinoncanta; icoaque iroveshireacaajeitempi.

**Yora oametavacainchari,
yapatashijeitacari quemisantatsiri.**

4 ¹Irosatiquera iquenquetatsatacari Petero ishaninca, ari ipocapaaque saserotepee. Jeri aisati jivatacairiri atiri anta ivancoqui Tasorentsi. Jeri saroseopee.² Icantashirejeitanaque, icantavacaa-naca:

—Paitateemi yoametantariri atiri. Jero icamantaqueriri: "Intinaye camajetatsiri: tempa itinaaja Jesoshi". Te oncameetsateji oca yoamejeitiriri.

³Ari ishaaviniji catsirincaiteri, irosati yaantacari, tapi. Yaajeitanaqueri, yoimunqueajeitapaaqueri, ari iquitaitacojeitaque. ⁴Iro cantaincha iquemisantaque oshequi quemajeitavaqueriri Petero, aamaaca icarajeiti 5,000 shirampari, quemisanta-jeitaintsiri.

⁵Oquitaitetamanaji yapatojeitaja aisati anta Jerosarequi pincatsaritatsiri, savicacantantatsiri, oametantirori sanquenarentsi. ⁶Icarajeitiri Anashi, yora ivincatsarite saserote. Aisati yapatotiri Cajashiri, Joa, Arijantero, jeri maaroni ishaninca ivincatsarite saserote. ⁷Ari icajemacantaqueri quemisantatsiri, isatecaqueri nianqui, isampijetaqueri:

—¿Janica matacaaquempirori oca?
¿Janicampa cantaquempi?

⁸Ari oametaqueri Ishire Tasorentsri Petero, omataacaasanotaqueri. Iquenquetstatacaajeitaqueri apatotimentajeitariri:

^{9,10}—¿Iriompa pisampitacoventiri yora choriveitachaniri ineshinoncatiri Tasorentsi? Pinequeri, avisacotanaji ini.

¿Picoaquempa piote jaoca icantacari yavisacotantajari? Pinquemajeitavaquero oca. Aisati ocameetsati iriojeitavaquero maaroni ashanincapée. Iriotaque Jesoquivishito, yora nasaretesati, oavisacotajiriri. Pipajacotacantavetacari, iro cantaincha yoitinaajiri Tasorentsri. ¹¹Iriotaque Jesoshi shiacantachari mapitatsiri itseencaqueri vetsicavetarori pancotsi: iro cantaincha ipeaqueri Tasorentsri itincamtantarori. Avirojeitaque avinti shiaqueriri vetsicavetarori: pitseencaqueri Jesoshi.

¹²Iro cantaincha te intimeji pashini oavisacotantsineri: te intimeji aca quipatsiqui pashini oavisacojeiteeneri: apaniro Jesoshi.

¹³Ari yoajeitanqueri cavaco yora pincatsaripee, icanti:

—Pineajeitaqueri, te intsaroajeitanaqueji iriori. ¿Paita caari itsaroacantajeetee? Aisati te intsoteavetearoji sanquena-

rentsi, te irishitoriotasanoveteoji, iro cantaincha oshequi ioti. ¿Paitaquea iotacairiri? ¿Iriompa oametiriri Jesoshi, yora quiso yoaveitaniri?

¹⁴Ari ineajeitaqueri itsipatacari yora yoavisacoyeetajiri. Tecatsi incantea incantimenteri. ¹⁵Ari itiancrajiri:

—Pisoquijajeitanaje anta; ari coajica noncajemajempi aisati.

Ari isoquijajeitanaji. Impoiji icantava-
caajeitanaca iriori pincatsaripee:

¹⁶—¿Jaoca ancarteriri yonta? Ijeitana-
queri maaroni jerosaresati itasoncaventa-
queri yora choriveitachaniri. Tecatsi
ancante: “Te irimateroji”. ¹⁷Te oncamee-
tsateji inquenquetsatacaajeitajeri pashini
atiri. Tsame ancantasanoterita: “Eiroyea
meecha piquenquetsatacotajiritsi yora
Jesoshi”.

¹⁸Ari yapiitajiri, icajemajiri. Icantasa-
notiri:

—Eiroyea meecca piquenquetsatacotaji-
ritsi Jesoshi. Eiroyea picamantacotajiritsi.

¹⁹Yacanaqueri:

—Tempa ineajeitee Tasorentsri.

Pincamantasanotenate: ¿cameetsampa
nonquemisantempi? Tempa irio Tasorentsi
nonquemisanteri. ²⁰Tecatsi noncantea
meecha nojocajero noquenquetsatacotiro
oca noneasanotaqueri, aisati oca
noquemasanotaqueri.

²¹Ari yapiitajiri aisati icantasanoveta-
jari, irosati itiancantajari. Tecatsi irante
impasatimenteriri. Ineajeitaquero atiri
oca imataqueri, icantapinijeitanaque:
“Cameetsa ini Tasorentsri, oshequi
imatacaajeitaqueri quemisantatsiri”,
irotaque caari ipasatantari. ²²Peerani
imoncarataquero 40 irosarintsite
choriveitachaniri. Ari oshequi iquenque-
shirejeitaquero atiri yoavisacotiri Jesoshi,
iojeitancari itasorentsitaque.

²³Ari yoimpacajaejtajiri pincatsaripee,
impoiji ijajeitanaji quemisantatsiri
ishanincaqui. Icamantapaaqueri oca

icantavetacariri yora cantavetacariri.

²⁴Iquemantavacarori oca, iquenquetsataajeitaqueri Tasorentsi. Antearojenca icanti:

—Novincatsarite. Aviro vetsiquirori inquite, quipatsi, incajare, maaroni; aisati povetsicajeitaqueri maaroni timantajeitatorri. ²⁵Aisati peerani poametaquerini noshanincani Iravirini, yora quemisantimpiri. Oametaqueri pishire, isanquenatantarori oca: “¿Paita itseencajeitasantacari yora pashinisatipee atiri? ¿Paita iquenqueshiretashitantarori caari cameetsayetatsi? ²⁶Yora ivincatsaritepee iraimanajeiveteeari Pincatsarisanori, aisati yora Quirishitotatsiri; incoajeivetea intsoncajeiterime”. ²⁷Aca nampitsiquica yapatojeitaca yaimanajeivetacari pitomi Jesoshi, yora pineacameetsatiri. Tempa pipeaqueri Quirishitotasanotsatsiri. Icarajeiti aimanajeitantzchari Eroreshi, Pontsio Pirato, joropee, pashinisatipee atiri, maaroni. ²⁸Peerani piotitani, picantitani: “Aitaque oncanteeari”. Ari meeca imataquero yocapee. ²⁹Meeca, Novincatsarite, piotaquero oca icantasnovenetaquena: “Eiro piquenquetsatacotajiritsi Jesoshi”. Tempa narotaque quemisantimpiri. Pimatacaasanotena eiro notsaroantatsi nonquenquetsatasanotero pineane. ³⁰Pintasoncacoventante, poavisacotantearirri mantsiaripee; pimata-pinitero caari ineapinijeiti, piotacaajeiteri atiri queario iriotaque Jesoshi pitomi, aisati pineacameetsatiri.

³¹Aitaque icantajeitiriri Tasorentsi. Impoiji onicanaca pancotsi isavicajeitanci. Otasoncacoventajeitapaaqueri Ishire Tasorentsi, irosati cameetsa iquenquetsatantarori irineane Tasorentsi, te intsaroimateji.

Yaacameetsatavacaajeitaca yora quemisantatsiri.

³²Oshequi icarati meeca quemisantsiri, cameetsa isavicajeitaque, aisati

imoncaratavacaajeitaca: pitarica icajeitiri aisati pitarica iquenqueshirejeitiri. Te irimashitsajeiteji, irointi ipavacaajeitacaro maaroni coiteimojeitari. ³³Jeri iroamereni Jesoshi, icamantaninitiri atiripee:

—Itinaasanotaja Avincatsarite Jesoshi.

Aisati icantajeiti atiripee:

—Tempa icameetsajeiti quemisantajeitatsiri.

^{34,35}Yora maaroni ashijetachari iipatsite aisati ivanco, ipimantajeitiro. Oca opinayetari, yamajeitaqueneri iroamereni Jesoshi, ipapaqueri. Irosati ipaarantaqueriru itsipapee iriori coiteimtariri, caari yashinoncaajeitanta quemisantajeitatsiri. ³⁶Icarajeitiri quemisantatsiri ishanincani Irevi, pajitachari Jose. Pashini ipajitiri yora itianqueetiri: Verenave. Ocanti ivajiro aneanequi arori: “Veshireacaantachari”. Iriotaque poneachari Tsipirequi. ³⁷Yashivetaro quipatsi, impoiji ipimantiro. Yaanaque ovinaro, ari ipapaqueri yora iroamereni Jesoshi.

5 ¹Iro cantaincha itimi pashini ²shirampari pajitachari Ananiashi, iro ijina Sajira. Ipmantiro iipatsite, ³yaaran-tavaji ovinaro nianqui. Irointi cashetani aisati yaanaque, ipapaqueri iroamereni Jesoshi. Icantapairi:

—Jeri yoca quirequi, iriotaque maaroni ovinaro noipatsiteni nopimantiqueru.

Iotaque aisati ijina iroori iramatavite-
rime. ³Iro cantaincha icantavaqueri Petero:

—Ananiashi, tempa paarantavaji ovinaro piipatsite. Yoametaquempi Satanashi, picoantavetacari pamatavite-rome Ishire Tasorentsi. ⁴Tempa iro piipatsiteni onaveitani, tempa iriotaque pashi ovinaro. Ocameetsati pinquempo-
yeri ovinaro. ¿Paita picantanirotantari: “Jeri yoca maaroni ovinaro noipatsiteni”? Pamatavivetaquena narori, iro cantain-

cha tecatsi pincanteri pamataviteri irinti Tasorentsi.

⁵Iquemantavacariri Ananiashi, irosati itaantanaca, poron. Icamanaque, toren. Itsaroasanojeitanaque catsini maaroni neajeitaqueriri. ⁶Impoiji yovetsicajeitaqueri evancaripee intijeri; yaanaqueri, itijiri. ⁷Osamanitapainti capichaji, ari oqueapaque ijinani iroori. Te ioteji camaque ojimeni. ⁸Icantavaquero Petero:

—¿Pipaqueranrimpa maaroni quirequi, ora ovinaro piipatsiteni pipimantaqueri?

Ari acanaqueri:

—Je, nopaquemperi maaroni.

⁹Irosati icantantacaro iroori:

—¿Paita piquempetantariri pijimeni, pamataviterome Ishire Avincatsarite? Jeritapaaaji tijaitiriri pijimeni: irisati aanaquempine avirori.

¹⁰Irosati oteimotantanacari, ocamanaque. Iqueapaaaji yora evancari, ineapaaqueri, camaque. Ari yaanaquero, itijaitiro iroori, itsipatujantiro ojimeni.

¹¹Ari itsaroajeitanaque maaroni yora quemisantajeitsirsiri, aisati itsaroajeitanaque maaroni quemacojeitaqueriri.

Yora oametavacainchari, iquishimatiri iroamereni Jesoshi.

¹²Oshequi itasoncaventanti yora iroamereni Jesoshi. Oshequi imayetaqueri atiri, irosati yoantajeitanacari cavaco. Ari yapatojeitaca anta pancotsi qui yovetsicacantiniri Saromoni.

¹³Oshequi ipincatsajeitaqueri atiripee, irootaque itsaroacantajeitacariri intsipajejearime. Iro cantaincha icantajeiti atiripee:

—Icameetsatasanojeiti quemisantajeiti riri Jesoshi.

¹⁴Aquiero ijatatii yoshequiasanotanaque quemisantiriri Avincatsarite. Oshequi icarajeiti shirampari, jero tsinane.

¹⁵Yoapiniyetaqueri atiri mantsiaripee anta avotsiqui: yoiponaayetiri shitashin-

tsiqui, oncanteata ariorica iravisanaque Petero, intsimancayetanaqueri iravisacottantajeari. ¹⁶Aisati yapatotashitaca oshequi atiri, poneayetachari nampitsipeequi anta otsapiyetapaa Jerosare. Yamayetaqueneri mantsiaripee, jeri aisati neiriri camaari. Yoavisacojeitajiri maaroni.

¹⁷Ari ocantimoneentanacari ivincatsarite saserote, jeri itsipapee: iriojeitaque saroseotatsiri. ¹⁸Ari yaacantaqueri yora iroamereni Jesoshi, yoiminqueacantavetacari caravosoqui. ¹⁹Iro cantaincha yananincaque inampire Avincatsarite, yashitareapaajiniri ashitacorontsi, yaanajiri saiteriqui. Icantiri:

²⁰—Pijataje anta ivancoqui Tasorentsi, pincatiapaaje. Pincamantasanojeiteri atiri jaoca incantajeari intimantajeari inquietui, incantaitatiyempani.

²¹Yacanaqueri:

—Je, ari noncamantajeitaqueri.

Ari iroaquera oquitaitetamani ijatanaque ivancoqui Tasorentsi, yoametantapaaji.

Jeri ivincatsarite saserote, itsipajeitacari ishanincapée anta pashiniqui pancotsi. Yapatojeitiri oametavacainchari: yora ivincatsaritepee jorio. Ari icantiri variria:

—Pijajeite anta poiminqueaquerinta oshaiteji quemisantiriri Jesoshi, pamajeitennari.

²²Ari ijatashivetari, te irineapaajeriji. Irosati ipiantaja, icantapaaqueri:

²³—Te aneajeriji. Noneapaaqueri pancotsi, ashitasanovetaca ashitacorontsi, oyavivetaca. Ainiro icatiavetaca shentavetarori omoropee. Iro cantaincha nashitareavetapaacaro omoro, noquea vetapaaca; tecatsi noneapaaaje tsompoina.

²⁴Iquemantavacariri, icantavacaanaca:

—¿Jaocaquea meeca iquenanajiri?

—Jaocateemi.

—¿Jaocaqueame ancanteriri?

²⁵Irosati yareetantapaacari aparo camantapaaqueriri, icantapairi:

—Yora shirampari poiminqueacantavetacari, catiajeitapaja anta ivancoqui Tasorentsi. Yoamejeitapaaajiri atiri.

²⁶Irosati ijatashitantajariri capitano, yaajeitanaque ri variriapee, iro cantaincha itsaroacaacari ashanincapee; icanti:

—Iquisacovendaricari atiripee quemisantatsiri, ipitseecari.

Irootaque cameetsa yaantanacariri, te inquisanatanaqueriji. ²⁷Ari yaanaqueri, yoatiapaaqueri anta itiminta oametava-cainchari. Icantavaqueri ivincatsarite saserote:

²⁸—¿Paita piquenquetsatacantajariri aisati atiri? Tempa nocantasanovetimpí: “Eiro picamantacotajiritsi Jesoshi”. Meeca aiquero poamejeitatiiri maaroni jerosaresati. Jero oca picantacotaquena: “Irio saserotepee oacantaqueriri Jesoshi”. Te oncameetsateji picantajeitaqueri. Pimajerejeite, eiro picamantantajitsi aisati.

²⁹Yacanaqueri Petero:

—Eiro noquemisantiritsi atiri, irintiquea nonquemisantasanoteri Tasorentsi. ³⁰Queario avirojeitaque oacantaqueriri Jesoshi. Pipajacotacantaqueri coroshiqui. Irinti oitinaajiriri Tasorentsi, yora iquemisantiniri ashanin-caní peerani. ³¹Yoancajiri anta iracosanoríQui. Ipeajiri Jivatacaajeitaqueeri, aisati Oavisacojeitaqueeri. Icoacaajeitaqueri ajorioririnte inquenqueshirejeitanaquea, impoiji incavintsaajeiteri, eiro iquenque-shiretajirotsi aisati caari cameetsatatsi yantajeitaqueri. ³²Aitaque noneasanot-aqueri yantayetaqueri Jesoshi, aisati niotaque quiso oajeitiri Ishire Tasorentsi maaroni quemisantajeitiriri. Irootaque noquenquetsatacapinitiriri atiri. Tecatsi noncantea nomajerete.

Impoiji icantajeiti itsipapee iroamereni Jesoshi:

—Queario oca icantiri Petero.

³³Ari iquemantajeitavacariri, iquisajeitanaqueri, icoajeitavetanaca iroyerime.

³⁴Ari icatianaca ishaninca pajitachari Camariyeri. Variseo ini, irisati oametanti-rori sanquenarentsi. Maaroni ineacamee-tsajeitiri atiri. Icanti:

—Noshaninca, nocoaque irisoquijajeita-naque quemisantiriri Jesoshi, eiro iquemantaro noncantempi. Impoiji quea impiaje aisati.

Ari itiancajeitaqueri saiteriqui.

³⁵Impoiji icantiri:

—Noshaninca. Quearioya, pantiricari quemisantiriri Jesoshi. ³⁶Jeri itimaveitani peerani yora Teorashi, oshequi ishemeta-veni. Ari yapatotashivetacari oshequi iratiritepee, naamaaca icarajeiti 400. Yoyeetaqueri, impoiji inijantareavacaajeitanaca oijajeivtariri. Ipeashijeitanaca, tecatsi anquemacotajeri aisati. ³⁷Impoitori aisati Jorashi, yora carireasati. Anta isanquenatacojeitanta, aisati ijivatana-queri aparopee atiri. Aisati irori, yoyeetaqueri. Yovaraanaca oijajeivtariri, tecatsi aisati anquemacotajeri. ³⁸Ari meeca noncamantempi, eiro pineashiren-quiritsi yocapee, incanteata. Iriorica tianquiriri atiri iquenquetsati, tempa aisati impeajeitanajea irori. ³⁹Iriorica tianquiriri Tasorentsi, tecatsi pincanteri poimajerenteri. Piquishimatiricari Tasorentsi.

⁴⁰Ari onimojeitanaqueri irori. Icajemajiri aisati, ipasanatacaantaqueri. Impoiji icantasanovetari:

—Eiro aisati piquenquetsatacotajiritsi Jesoshi.

Irosati itiancantajariri. ⁴¹Ari ijajeitana-que, Iquimoshirejeitanaque, icantajeiti:

—Ineacamestsajeitee Jesoshi, irootaque ishinetantaqueeri aneacatsitimentajeita-cari.

⁴²Maaroni quitaiteri yoametantapiniti anta ivancoqui Tasorentsi, aisati pancotsi-

peequi. Icantani: yoametantapiniti, icamatantapiniti. Icantapinitiri ishaninca:

—Iriotaque Jesoshi yora Quirishitotasiri aamaajeitaniri peerani.

Icoyeaqueri intacotantachaneri.

6 ¹Yoshequiantacari quemisantatsiri, jeri iquisashireanaca yora iotirori quirieco. Icantavacaanaca:

—Maaroni quitaiteri, ariorica intacotanta, te irintacotearoji ashaninca arori: oca camajimentaaro. Apaniro intacotaro irointi iotirori evereo.

²Ari yora iroamereni Jesoshi yapatojeitaqueri maaroni quemisantatsiri. Icantiri:

—Te oncameetsateji nojocajero noquenquetsetsatapinitiro irineane Tasorentsi, nompantayetempirori poyeari. ³Meeca, noshaninca, pincoyeanontea 7 shirampari, yora pineacameetsatasanotiri. Pincoyeaqueri timatsiri iotantari, quemisantasanojirori Ishire Tasorentsi. Noncanterita iriori irintacotantea. ⁴Irompa nainti, apatiroti nonquenquetsetsacoteri Tasorentsi, aisati noncanteani nonquenquetsetsatero irineane.

⁵Onimojeitacari oca icantaqueriri. Icoyeaqueri Ishiteva: quemisantincari ini, quemisantasanojirori Ishire Tasorentsi. Icoyeaqueri Jeripi, Pirocoro, Nicanori, Timo, Parimenashi. Aisati icoyeaqueri Nicorashi, yora peajanchari jorio, poneachari Antioquiaqui. ⁶Irosati yonijaantapaacari. Icantajeitiri Tasorentsi: “Pamitacojeiteri yocapee irintacotantea”, aisati yajiricainataqueri iitoqui.

⁷Oshequi icarati quemajeitaquerori irineane Tasorentsi. Aiquero ijatati yoshequiti quemisantatsiri anta Jerosarequi. Aisati oshequi catsini icarati saserote shiretaracorri oca aquemisantiri.

Yora Ishiteva, iriotaque icoyeane Tasorentsi.

⁸Catsini icameetsashiretaque Ishiteva. Oshequi itasoncacairi Tasorentsi.

Imatasanoyetiniri atiri caari ineapinijeiti. Imataqueneri paitapeerica iojeitantzacari Tasorentsi ini Jesoshi. ⁹Ainiro yapatapinijeitanta anta ivancoquinta Tasorentsi atiri yora ipimanteevetari peerani, iro cantaincha yoipacajiri amanantavetariri. Aisati anta yapatotanta shirenesati, arejantiriasati, poneachari Shirishiaqui, Ashiaqui. Ijatashijeivetacari Ishiteva, iquisatsajeivetaqueri aisati ipiatsajeivetaqueri. ¹⁰Iro cantaincha oshequi ioti Ishiteva yoametanti, tecatsi incantajeiteri impiatsatasanojeiteari. Ainiro iotantari, cameetsa ineanati aisati, tempa oametaqueri Ishire Tasorentsi. ¹¹Ari oshequi iquisajeitaqueri yoranqui, icantiri pashini ishanincapee:

—Pamene, nocoaque pintseeeyacoteari Ishiteva. Ariorica pimajeitero nocantaquemperi, nompinatempi quirequi. Jero oca pincantacotashiteariri: “Noquemajerqui Ishiteva, itseenquimataqueri Moishishi. Aisati iquempetaqueri iriori Tasorentsi, icantimataqueri”.

Icantiri:

—Ari, noncamantajeiteri ashánincapee.

¹²Iquemantacariri atiripee, iquisajeitanaca: savicacantantsiri, oametantirori sanquenarentsi, maaroni. Jentsipaite ijatashijeitaqueri Ishiteva, yaapaintiri, tapi; yaajeitanaqueri anta yoametavacaapinijeitanta pincatsaripee. ¹³Yaanajiri aisati iriori yora tseyachari, icantanirotapaaqueri:

—Aitaque icantani Ishiteva, icantapiniti: “Te oncameetsateji ivanco Tasorentsi”. Aisati iquempetiro isanquenare Moishishi, itseencaapinitiro. ¹⁴Noquemajerqui, icanti: “Yora Jesoshi, nasaretasati, intireajero oca pancotsica. Impashinitero oca ameyetacari, aisati impashiniyetajero yoameyetaqueeniri Moishishi”.

¹⁵Yamenajeitaqueri maaroni savicajeitantsiri, sorerere. Ishipaquireavorotanaque Ishiteva, iquempetanacari inampire Tasorentsi.

7 ¹Isampitiri ivincatsarite saserote:
 —¿Queariompa oca icantaqueri?
²Yacanaqueri Ishiteva:
 —Novincatsarite, pinquemisantajeita-
 vaquena. Peerani isavificantaveitaniri anta
 Mesopotamiaqui intacantaqueeniri
 Avaramani, inijaapaacari Tasorentsi, yora
 cameetsatatsiri. ³Ari icantapaaqueri:
 “Pojocanajero piipatsiteca, pijate anta
 pashiniqui quipatsi ora nonijayempi”.
⁴Irosati yojocantanajaro iipatsite
 careasati, yovaanaja anta Jaraqui.
 Aitaque icamapaquaqueri iriri, irosati
 yovaacaantajariri Tasorentsi aca
 aipatsitequica. ⁵Iro cantaincha, te
 imperiji iipatsite, te impimateriji
 capichaji irisavicantereari. Aisati tequerani
 intimeni itomi. Iro cantaincha icantita-
 cari: “Intime pitomi, aisati nompempi
 piipatsite avirori. Aisati nompajeiteri
 maaroni impojeitelpineri intimaje”.
⁶Aisati icantaqueri Tasorentsi: “Coajica
 intimaje poyeetajempineri iipatsitequi
 pashinisati atiri. Peerani catsini irompe-
 ranatasanoteari, oncarate osarintsi 400
 iroashinoncaasanoteri. ⁷Impoijiniquea
 noasanquetaqueri yora peranaveteearineri.
 Irintiquea pishanincani, noimpajetajeri
 aca quipatsiquica, impoiji inquemisanta-
 quena aca. ⁸Nocoaque meeca pintoyean-
 tea irotanteari atiri piquemisantaquena
 aisati pinquenqueshiretanteearori nocanta-
 quempiri”. Ari impoiji itimanaque itomi,
 yora Isaca. Ocarataque quitaiteri 8,
 irosati itoyeantantacari. Itimaque itomi
 iriori Isaca, ipajitaqueri Jacovo. Itomipee
 iriori Jacovo icarajeitaque 12. Tempa
 irojeitaque intacantajeitaqueeri.
⁹Ari yovaajiniri Ishiteva, icantiri:
 —Ari yantearjeitanaque, iquisajeita-
 queri irirenti, pajitachari Jose. Ipimanta-
 jeitaqueri, impoiji yayeetanaqueri
 Ejipitoqui. ¹⁰Ari yoashinoncaajeivetacari
 savicajeitatsiri, iro cantaincha yoavisaco-
 tiri Tasorentsi. Itasoncacoventiri,

irootaque ineacameetsatantariri
 ivincatsarite ejipitosati, pajitachari Jarao.
 Ineaqueri optimotiri iotantari, irootaque
 ipeantajariri iriori ivincatsaririnte.
 Ipincatsariventajeitiri maaroni ejipitosati,
 aisati ishaninca Jarao. ¹¹Impoiji otashen-
 tsiteanaque maaroni Ejipitoqui, aisati
 Cananaqui. Oshequi yashinoncaajeitaca,
 tecatsi iraanajero intacantaqueeri
 iroajeitajeari. ¹²Irriori Jacovo iquemacota-
 quero ari otimaqueri tirico anta
 Ejipitoqui. Ijivataqueri itiancaqueri
 itomipee: “Pijajeite Ejipitoqui pamanan-
 taitero ayeari”. Ari yamanantaiti, aisati
 ipianaja. ¹³Impoiji otsoncaja, itiancajiri
 aisati: “Pijajeite pamanantajante aisati”.
 Ari ijajeitanaji aisati, jeri ineajeitapaajiri
 pincatsari. Icantavaqueri: “Narotaque
 Jose pipimantaqueri peerani”. Aisati
 icantiri Jarao: “Jeri yoca iyentisanoripee
 narori”. ¹⁴Impoiji icantiri aisati: “Pincan-
 taiteri apa impoque aca, aisati maaroni
 ishaninca”. ¹⁵Irosati ijatantanacari
 Jacovo anta Ejipitoqui, yaajeitanaqueri
 ishaninca, icarajeiti 75. Ari icamapa-
 queri. Aisati iquempejeitacari maaroni
 itomipee, icamajeitaque iriori. ¹⁶Impoiji
 yaatonquijeitanajiro itonquini Jacovoni,
 itijapajajiro anta Shiquemiqui, ari
 opajitari quipatsi yamanantiniri Avarama.
 Irio pimantirori quipatsi itomipee Emori.
 Ipinataqueri quirequi.
¹⁷Irosati yovaajiniriri Ishiteva, icantiri:
 —Irotanaintsi omونcarataquea
 icantitacaniri Tasorentsi. Icarati oshequi
 ashaninca arori, yoshequianaque anta
 Ejipitoqui. ¹⁸Impoiji ipincatsariventanti
 pashini, caari iotacotiri Jose. ¹⁹Yamatavi-
 jeitiri ashaninca. Ishintsitsanajeitiri,
 yaajeitaqueri itomipee, yoitajeitaqueri.
²⁰Irosati itimantanaca Moishishi. Aitaque
 icanta Tasorentsi, ineacameetsatiri.
 Icarati mava cashiri iqueveanaque anta
 ivancoqui iriri, imanapitsataqueri
 ejipitosati. ²¹Te irimateroji irimaner

aisati ivancoqui, irootaque yovetsicanta-canariri pitotsijaniqui, imanavetacari otsapijaqui eni. Iro cantaincha oneaqueri irishinto Jarao, aaqueri. Oyeveajiri onampiqui, oquempetacantajiri otomisano-nori. ²²Yoametasanotiri ejipitosati maaroni ocarayeti ioyetiri iriori. Cameetsa ineaveeti. Imatasanoyetiro paitapeerica yantayetiri.

Jero aisati icantiriri Ishiteva:

²³—Ari ocarati irosarintsit Moishishi 40, irosati ijatantanacari irineeri ishaninca: yora ijorioririnte. ²⁴Ineapaa-queri aparo, yashinoncaaca: ipasanatiri ejipitosati. Ari iquisacoventapaacari Moishishi ashaninca, irosati yoantapaaca-riri ejipitosati. ²⁵Ijivetaca iriori Moishishi ari impincatsajeitavaquerime ishaninca-pe, aisati ijivetaca ari iriojeitavaqueri iriotaque cavintsaajeitajerine. Ijivetaca irioteme itiancaqueri Tasorentsi, iro cantaincha te impincatsajeitavaqueri. ²⁶Oquitaitetanaji ineaqueri ishaninca apite, iquisatsatavacaanaca. Icoaveta iroimajererenterime. Icantiri: “Tempa pishanincatavacaaca. ¿Paita piquisava-cantajeitacari?” ²⁷Ari itatsincavaqueri yora quisasanotainchari, icantiri: “¿Janicampa peaquempi meeza novincatsarite? ¿Picoaquempa pimpera-najeitena? ²⁸¿Picoaquempa meeca poyena narori, pinquempetacantena yoranquini ejipitosati poaqueri oshaite-niji?” ²⁹Iquemavaque icantaqueriri, irosati ishiantanaca Moishishi, itsaroana-que. Irosati isavanticapaaca nampsiti-neentsiqui anta iiaptsitequi Matia. Yaapaaque ijina, impoiji itimanaque itomi apite.

³⁰Ari yovaajiniri Ishiteva iquenquetsa-tacaajeitiri:

—Ocarataque 40 osarintsi isaviquimo-tiri Moishishi iriconquiri. Irosati inijaantacari inampire Tasorentsi, anta amorequimotaqueri totseequishi.

Ocaaraitetinta anta, oquempejitaro toncaari pajitachari Shinai. ³¹Yamenana-quero, irosati yoantanacaro cavaco: “Otaavetaca totseequishi, iro cantaincha te ontsonqueaji. ¿Paitaquea?” Ari ijatashitaquero, icoaveta iramenasanote-rome. Irosati iquemantacari Avincatsa-rite, ³²icantiri: “Narotaque Tasorentsi, icantani ipincatsajeitaquena pishanincani: yora Avarama, Isaca, jeri yora Jacovo, maaroni”. Jaa iriori Moishishi itsaroasa-notanaque, te iramenanajeroji. ³³Icantiri aisati Tasorentsi: “Pipincatsatanarica, pisapatoreempa, picatiantacaro meeza quipatsi noameetsantiri, oca nopashini-tiri. ³⁴Noneaqueri anta Ejipitoqui pishaninca nocoyeaqueri, oshequi yashinoncaajeitaca. Noquemaqueri icavintsaajeitaca, meeza nocavintsaajei-tiri. Irootaque nopalashitantariri noimpacacoventajeri. Meeca, nontianquempi Ejipitoqui”. ³⁵Tempa peerani itseenquee-vetacari yora Moishishi, icantirini: “¿Janicampa peaquempi novincatsa-rite?” Iriotaque yoca itiancaqueri Tasorentsi. Ipeajiri pincatsaritatsiri, aisati oavisacojeitiriri ashaninca. Irio tiancaqueriri inampire Tasorentsi, yora ineaqueri peerani anta totseequishi. ³⁶Yaajantiri ishaninca, imayetaquero caari inepinijeiti, aisati itasoncacoven-tanti. Imayetaquero anta Ejipitoqui, incajarequi Quitioncajaran, jero aisati anta caaraiteriqui. Ocarati 40 osarintsi imatapiniyetaquero.

Aisati icanti Ishiteva:

³⁷—Iriotaque yoca Moishishi cantiriri ajorioririnteni: “Oquempetaca narori itimacaquena Tasorentsi, aisati inquem-peteri pashini ashaninca intimacayeri: camantantapaatsineri iriori”. ³⁸Peerani iquenaquenajeitantaniri ashaninca anta caaraiteriqui, ijivajeitaqueri yora Moishishini. Anta toncaariqui pajitachari Shinai iquenquetsatacari inampire

Tasorentsi. Iquemavaquero Moishishi irineane Tasorentsi, irosati yovaajeitancanariri intacantaqueeri, iotantacariri Tasorentsi. Irosati yovaajeitantaqueero meeca arori.³⁹Iro cantaincha te incoyeji intacantaqueeri inquemisanteri Moishishi, irointiquea itseencaqueri. Icoajeiveta impianajeme Ejipitoqui. ⁴⁰Icantajeitiri Aaro: "Yora Moishishi iriovetaca aajeitajanteeri anta Ejipitoqui, yamajeivetaquee aca. Iro cantaincha ijataque chapinqui Shinaiqui. Meeca te ayotacoteriji paitanirica oaqueriri caari ipocantaja. Povetsicajetajena pashini atasorentsire, ampincatsajeitajero iroori".⁴¹Ari yovetsicajetiro, ishiacantiri vacajaniqui. Icoi impeajerome itasorentsire. Yoaquenero ovisha, yamashiyetacanaro, ipashiyetacaro. Iquimoshireventashivetacaro yovetsicane.⁴²Ishemanaca Tasorentsi, yojocanaqueri: ishinejeitiri ijitasorentsitashiyetari catsirincaiteri, cashiri, impoquiropee, paitapeerica. Tempa irootaque isanquenatacotiniri peerani yora Amoshini. Jero oca isanquenatiniri: "Noshaninca, jero oca icantimpiri Tasorentsi: 'Ishanincani Ishiraeri, anta ocaaraiteapaaquenta pisavicateitani 40 osarintsi. Iro cantaincha te poapinitenariji poshiniri, te pintaapinitenariji: te pimpincatsatimajeitenaji catsini.⁴³Irointi pipincatsatashitacaro ipajieyetti Maroco. Aisati pipincatsatashitacari impoquiro pajitachari Ireja. Aisati pipincatsatashitacaro povetsicajetiri. Irootaque nontiancanteariri vavironiasati iraajeitanaquempi inampiqui, imperanajeitempi'". Irootaque isanquenatiniri peerani Amoshini.

⁴⁴Irosati yovaaqueperi aisati Ishiteva: —Peerani anta caaarateriqui otimimo-veitarini ashánincani cajo, onantari isanquenare Moishishi. Irio vetcicantirori Tasorentsi. Imoncarataqueneri Moishishi icantaqueiri. ⁴⁵Impoi

yaajeitanaquero ashánincani jaocarica ijayetiri. Ijivajeitaqueri Josoe iipatsitequi pashinipee atiri. Itiancajeitiri Tasorentsi atiripee, otimantari isavicanteri ashánincani. Quiso yoajeitiro cajo, irosati itimantacari Iravirini iriori.⁴⁶Yora Tasorentsi ineacameetsatiri Iravirini. Icantavetarini iriori: "Apa, tempa aviro Tasorentsi, ipincatsatimpini Jacoboni. Nocoaque pishinetena meeca novetsi-quempiro pinampitanteari".⁴⁷Iro cantaincha irinti Saromoni vetcicasanotiori pancotsi.⁴⁸Te irisavicanteroji Tasorentsi oca pancotsi yovetsicayetiri atiri. Tempa irio savicasanotatsiri inquite-quinta jenoqui. Tempa aitaque icantita camantantatsiniri:⁴⁹"Icanti Avincatsarite: 'Irootaque inquite nosavicasanotantari. Ora quipatsi, te iro nonampi. ¿Jaoca pincanteari povetsicantenari pancotsi nosavicanteri? ¿Arimpa nonaquearo pancotsi? ⁵⁰Tempa narotaque vetcicajetaquerori maaroni timayetatsiri'".⁵¹Noshaninca, te pincoyeji piote. Pishiajeitaqueri pashinisati atiri: te pinquenqueshireempa. Te pinquemisanta-jeiteji. Aitaque picantaitatiani pipiatsatacaro Ishire Tasorentsi. Pishiaqueri intacantimpiniri.⁵²¿Timatsimpa camantantatsiniri caari iquishini pishanincani? Teve aneeriji, tempa iota iquisajeitaquerini. Yoajeitaquerini maaroni camantantajeitavachaniri; icantini: "Coajica impoque cameetsatasanotatsineri". Ipocavetaca, iro cantaincha te pimpincatsajeitavaqueriji avinti, irointi paacantaqueperi, poacantaqueperi.⁵³Piojeivetero irineane Tasorentsi yoamevetimpiri inampire, iro cantaincha te pinquemisanteroji.

Irootaque icantiriri Ishiteva ishaninca.⁵⁴Ari iquemajeitavaqueri oca icantaqueiri, irosati iquisajeitantanaca. Oshequi iquisajeitanaqueri, yatsicanajitimentajeitanacari irajiqui, taquiririri.⁵⁵Irompa

irinti Ishiteva, iveshireimentashiretasano-tacaro Ishire Tasorentsi. Yamenasanota-naque inquitequi, inequiero ishipaqui-reane Tasorentsi. Jeri inequeri Jesoshi aisati, icatiaca iracosanoriqui Tasorentsi.

⁵⁶Icantanaque:

—Jaa, yonta noneasanotaqueri inquite-qui, icatiaca Atirivetapaintachaniri anta iracosanoriqui Tasorentsi.

⁵⁷Shintsi icajemajeitanaque, yovijeita-naqueri iyempita, ishiashijeitapaacari. Yaajeitaqueri, shepi; ⁵⁸yaajeitanaqueri anta ovecaratapaacanta nampitsi. Irosati ipichaanajeitancariri. Yora pichaaque-riri, isapocaqueri yoicoro, yoquiero iitiqui Saoro, icantiri:

—Pamenenaro noicoro, nompichaava-querita.

Icantiri:

—Ari.

Evancari ini Saoro iriori. ⁵⁹Ari ipichaa-nataqueri Ishiteva, irosati iquenquetsata-cantanacari Tasorentsi, icantanaque:

—Novincatsarite Jesoshi, paavajero noshire.

⁶⁰Itiyeroanaca, antearojenca ineanata-naque, icanti:

—Novincatsarite, te oncameetsate oca yantajeitaqueri, iro cantaincha eiro piquishimentiritsi.

Irootaque icantaqueriri, irosati icaman-tanaca, torein. Icantanaque Saoro iriori:

—Ariove, camanirotaque ini; ineacarove.

Ijati quemisantatsiri anta Samariaqui.

8 ¹Irosatiquea intantanacari iquisajei-tiri quemisantatsiri anta Jerosarequi. Itsoncajeitanaca maaroni, ishiajeitanaca Joreaqui, aisati Samariaqui. Irinti timajeitanantsi yora iroamerepeeni Jesoshini. ²Ari itijaqueri Ishitevani. Irio tijaqueriri quemisantasanotatsiri. Oshequi iraacojeitaqueri. ³Irinti Saoro, icoaveta intsoncajeiterime yora

quemisantatsiri. Ijatashijeitiri ivancopee-qui, inoshicajeitiri shirampari, tsinane, maaroni. Yoiminqueajeitaqueri.

Iquemisantaque savicatsiri otsipapeequi nampitsi.

⁴Yora shiajeitanainchari, iquenaquena-yetanaque otsipapeequi nampitsi. Iquenquetsajeitaqueri irineane Tasorentsi. ⁵Yora Jeripi yareetapaaca nampitsi-qui, onta Samariaquiniri. Icamantacota-paaqueri Quirishito. ⁶Iquemajeitancariri, aisati ineajeitancariri itasoncanta-yeti, iquemisantasanojeitavaqueri atiripee. ⁷Yoavisacojeitiri oshequi neiriri camaari, antearojenca icajemajeitanaque camaaripee, irosati ijtantanaja. Yoavisa-cojeitiri oshequi choriveetatsiri, aisati amashitachari iitiqui. ⁸Irosati iquimoshirejeitantanaca yora savicajeitatsiri nampitsiquinta.

⁹⁻¹¹Itimi aisati anta shirampari pajitachari Shimo. Peerani oshequi osarintsi isheripiariveitani. Yoajeivtarini cavaco maaroni samariasati, irootaque ishemetantacari oshequi. Ipincatsajeivtarici atiripee: pincatsaripee, iratiritepee, maaroni. Icantajeiti:

—Tempa iriotaque Shimo yoca matirori itasorenca Tasorentsi. Tempa irio pincatsaritatsiri. Tsame ampincatsajeiteri.

¹²Iro cantaincha impoiji yareetapaaca Jeripi, icamantacotaqueri Tasorentsi, jaoca icanta ipincatsariventanti. Aisati icamantacotaqueri Jesoquirishito. Ari ivaotisajeitaqueri quemisantajeitantsiri: shirampari, tsinane, maaroni. ¹³Aisati iquempetaja Shimo iriori, quemisantaji, ivaotisataja. Impoiji quiso yoanaqueri Jeripi. Ineacoyetaqueri pitarica yantaye-taqueri, aisati itasoncantasanoyeti. Irosati yoantanacari cavaco.

¹⁴Yora iroamereni Jesoshi savicatsiri Jerosarequi iquemacojeitaqueri samariasati, quemisantajeitaqueri iriori irineane

Tasorentsi, irosati itiancantacariri Petero, jeri Joa.¹⁵ Ijajeitanaque anta. Icantiri Tasorentsi: "Pintasoncacoventajeiteri samariasatipee, quiso oajeitanteeariri Pishire".¹⁶ Iro cantaincha tequerata quiso oajeiteri, apatiroquera ivaotisimentajetacari Avincatsarite Jesoshi.¹⁷ Ari yajiricainatapaquaqueri iitopeequi, irosati yaashirejeitancaro Ishire Tasorentsi, otasoncacaajeitaqueri.¹⁸ Ineacotaqueri Shimo. Iotanaque ariorica yajiricainatapaquaqueri, yaashirejeitaquero iriori Ishire Tasorentsi, irosati icantantacarí:

¹⁹—Jerica quirequi, nocoaque poamenteña nontasoncante narori, nonquempe-tempi avirori. Nocoaque ariorica najiricainateri noshaninca, iraashirejei-tantearori Ishire Tasorentsi.

²⁰Icantanaqueri Petero:

—Pijate Sharincaveniqui, paanajeri aisati piirequite. Pijitashivetaca avirori ari pamanantero itasorenca Tasorentsi: apaniro imatacanti Tasorentsi.²¹ Tecatsi pincantea pinquempe-tena: ioti Tasorentsi te pincameetsashireteji.²² Te oncameetsateji oca piquenqueshirevetacari. Pinquenqueshiretanaquea, pojoquero caari cameetsatatsi pantayetiri. Pincanteri Avincatsarite: "Pincavintsayena".²³ Niotaquempi, oshequi pishemeti, aisati pashi poiro te pincameetsateji.

²⁴Yacanaqueri Shimo, icanti:

—Pincanterite Tasorentsi incavintsa-yena oncateataquea eiro nojatantatsi Sharincaveniqui.

²⁵Yora Petero aisati Joa, icamantacotiro irineane Avincatsarite, iquenquetsatacotiro. Iquenayetanaque oshequi nampitsipeequi Samariaqui, icantajeitiri savicajeitatsiri:

—Ariorica pinquemisanteri Jesoshi, iroavisacotempi Tasorentsi, iraajeitana-quempi inquitequi.

Irosati ipiajeitantanaja Jerosarequi.

Iquemisantaque etiopiasati.

²⁶Ari ineanatiri inampire Avincatsarite, icantiri Jeripi:

—Meeca pijatanaque, pinquenanaque anta avotsiqui quenantachari caaraiteriqui: ora poneachari Jerosarequi, jatatsiri irosati Casaqui.

²⁷Ari ijatananaque, iquenanaque avotsiqui. Itonquitavacari shirampari poneachari Etiopiaqui. Aitsoquireari ini. Irisati ovincatsarinte Cantasheshi, yora quempoyeinirori maaroni oirequite. Irootaque iroori ivincatsarote etiopiasati. Ari ijaiti anta Jerosarequi, iquemisantatiri Tasorentsi.²⁸ Meeca ipiaja, isavicaque ishiacomentoqui, ineanatiro isanquereni Isayashini, camantantaveitachaniri.²⁹ Iro Ishire Tasorentsi cantaqueriri Jeripi:

—Pijate anta, pintonquitavaquearo shiacomentotsinta.

³⁰Ishiashitinanacari, iquemapaaqueri ineanatiro. Icantapaaqueri:

—¿Piotaquerompa oca pineanatiri?

³¹Yacanaqueri:

—Teve nioteroji. ¿Jaoca noncanteari niotantearori? Tecatsi oametenarone. Pintetapeempa, pisaviquimotapeena aca.

³²Jero oca ocantiri sanquenarentsi ineanatapairi: "Ariorica yoyeetiri ovisha, imajeretashitanaca. Ariorica yameeyeeetiri ovishajaniqui, imajeretashita. Aisati inquempeteari Quirishito iriori, irimajere-te. ³³Iroashiventeeteri, eiro otampaticitsi incantacoyeeteriri. Impoiji iroyeeteri. Eiro itimitsi irinti itomipee".

³⁴Isampitiri:

—Pincamantenate. ¿Janicampa iquenquetsatacotiri yora camantantatsi-niri? ¿Irisatimpa quenquetsatacotashita-chi? ¿Pashinimpa iquenquetsatacotiri?

³⁵Irosati icamantantanacari Jeripi, icamantacotiri Jesoshi. Ijivataqueneri ocantiri ora Sanquenarentsi, yoametas-notaqueri. ³⁶Aiquero ijatacairiri avotsiqui, irosati ineanatapaacaro nija. Icantiquerí:

—Jero oca nija. ¿Cameetsanimpá novaojisatea?

³⁷Yacanaqueri:

—Piquemisantasanotiririca Quirishito, cameetsa pivaotisataquea.

Icantiri:

—Noquemisanti. Iriotaque Jesoquiriti shito Itomi Tasorentsi.

³⁸Yoatiaquero shiacomentotsi. Ari yaniireajeitanaque, itsipatavacaanaca apite, yanijjatanaquero nija, ivaotisataqueri. ³⁹Ari yaatanaji, irosati quiso oantanacari Jeripi Ishire Avincatsarite. Te irineavajeriji aisati yora itsipavetacari. Apaniro yovaanaja iriori, iquimoshiretanaque. ⁴⁰Irintiquea Jeripi ineacotashita-paaca nampitsiqui anta opajitanta Asoto. Ari yovaanaca, iquenquetsayetanaque nampitsipeequi:

—Pinquemisantajeiteri Quirishito paviscojeitantzeari.

Irosati yareetantana ja anta Sesareaqui.

Ipashimitantajari Saoro.

9 ¹Ari yashi yoiro iquisa Saoro.

Isareavetacari iroajeiterime maaroni quemisantajeitiriri Avincatsarite. Irosati ijatashitancarri ivincatsarite saserote, icantiri:

²—Nocoaque pisanquenateneri yora quemisantacaajeitiriri ajorioririnte anta Tamashicoqui, pincanteri: “Pamitacojeiteri Saoro iraajeiteri maaroni quemisantajeitiriri Jesoshi. Nocoaque iraajeiteri: shirampari, tsinane, maaroni. Impoiji irosojeiteri, iramajeiteri aca Jerosarequi”.

Ari isanquenatiniri, ipavaqueri. ³Impoiji ijatanaque, icantanaca, icantanaca: irotapaintsi Tamashico. Omapocapaaqueri amorecatsiri, amorecacotapaqueri, morec: oponeaca inquitequi. ⁴Iparianaque quipatsiqui, tiricn, iquematiro irineane Jesoshi:

—Saoro, Saoro: ¿paita piquisantanari?

⁵—¿Janicampi, Novincatsarite?

⁶—Narotaque Jesoshi, piisane. Pijate, povanaquea nampitsiqui. Coajica incamanteetempi pitarica panteri.

⁷Ari icatiaeitaca yora shirampari

itsipajeivetacari, yoajeitaque cavaco. Iquemashitacaro irineane, iro cantaincha tecatsi irinee. ⁸Iriori Saoro, icatianaja. Yoquireavetanaja, te irimatajeoji iramenaje, irootaque yacatsatantanajariri, yareetacaacari Tamashicoqui. ⁹Ocarati isavicasitaca mava quitateri. Te irineajeji, te iroajeji, te irirajeji.

¹⁰Ari itimiri anta Tamashicoqui quemisantatsiri, pajitachari Ananiashi. Ineashitavacari Avincatsarite, icantapaaqueri:

—Ananiashi.

Yacanaqueri:

—¿Paita, Novincatsarite? Ainirona aca. Icantiri:

¹¹—Meeca pijate anta avotsiqui ipajiyetirinta: “Tampaticari”. Pincoapaaqueri shirampari pajitachari Saoro, yora tarisosati. Pincoapaaqueri anta ivancoqui Jorashi. Ainiro iriori, iquenquetsatacaana. ¹²Nomishitacaacari, ineaqueMPI piqueashitapaaqueri, pajiricainatapaaqueri; ineaca yamenanaji.

¹³Yacanaqueri:

—Oshequi noquemacotiri, iquenquetsatacocyetiri yora picantaquenari. Oshequi yoashinoncaajeitiri quemisantajeitimpiri anta Jerosarequi, icantirive. ¹⁴Tempa itianquiri aca yora jivatacaaajeitiriri saserote iraajeitantzacaenari, maaroni aventajeitimpiri. Oshequi notsaroacacari.

¹⁵Iro cantaincha icantiri:

—Pijate. Tempa iriotaque nocoyeaqueri. Iriotaque quenquetsatacujenneri. Inquenquetsatacajeiteri joriopee, pashinisatipee atiri, pincatsaripee, maaroni. ¹⁶Aisati nonijayeri jaoca oncarate irineacatsitimentena.

¹⁷Ari ijatanaque Ananiashi, iqueapaaque panceotsiqui. Yajiricapaqueri, icantiri:

—Saoro, avirotaque noyemisantari-rinte. Itiancaquena Avincatsarite Jesoshi,

yora onijaaquempi anta avotsiqui piquenapaqauenta. Itiancana pamenanta-jeari, quiso oasanotantempiri Ishire iriori.

¹⁸Irosati opariantanaja iroquiquiniri shiavetarori inventaqui shima, yamenasa-notanaji. Ari ijatanaque, ivaotisataca.

¹⁹Aisati yoaja, ishintsitanaji. Aparoee quitaiteri itimimovetanacari quemisanta-tsiria anta Tamashicoqui. ²⁰Impoiji icamantantayeti anta pancotsiqui yapatojeitanta joriopee. Icantapinijeitiri:

—Iriotasanoqueyeata Jesoshi Itomi Tasorentsi.

²¹Yoajeitanaqueri cavaco yora quemajitavaqueriri. Icantajeiti:

—Tempa iriotaque yora tsoncajeiterine-meri quemisantatsiri anta Jerosarequi. Tempa irootaque ipocashitantavetacariri aca irosojeiterime quemisantiriri Jesoshi, iraajeitanaquerime anta saserotepee-quinta.

²²Aiquero ijatatiini Saoro iquenques-tati, tecutsi intsaroacaimateari. Yoajeita-viquerri cavaco yora joriotatsiri. Iotaca-sanotaqueri, icanti:

—Yora Jesoshi, iriotaque Quirishitota-siri.

²³Ari avisanaque oshequi quitaiteri, irosati isareantajeivetacari iroyerime. ²⁴Iro cantaincha iotacotaqueri Saoro isareacari. Maaroni quitaiteriqui, tsiteniriqui, yamenajeivetacaro joriopee iqueantapinitari nampitsi, icoajeivetaca iravaquerime Saoro, iroyerime. ²⁵Iro cantaincha, osaite yaanaqueri iroamere-peee tantotsiqui, ora shoncarori nampitsi; yataitacaanaqueri, impoiji yoaniireacojeitajiri cantiriqui ariquerora. Irosati ishiantanaja, te irineajiteitavajeriji oyerie-meri. ²⁶Ari yareetapaaca Jerosarequi.

Icoaveta intsipajeitapeemparime quemisantajeitatsiri, iro cantaincha itsaroacaajitavacari. Ijitalshivetacari te inquemisanteji.

²⁷Impoiji yaanaqueri Verenave, ijivatanaqueri anta itiminta iroamereni Jesoshi. Icamantapaaqueri:

—Queario, iraajeiterime Saoroca ayemisantaririnte anta Tamashicoqui, iro cantaincha anta avotsiqui ineakeri Avincatsarite, iquenquetsatacaaqueri. Iquemisantaque, impoiji anta Tamashico-qui iquenquetsatacapinitiri Jesoshi, te intsaroacayeariji tseencantatsiri.

²⁸Ari yaacameetsajeitaqueri quemisan-tatsiri, cameetsa itimimotaqueri iriori anta Jerosarequi. Icantani Saoro, quiso yoajeitaqueri ayemisantaririnte.

Cameetsa iquenquetsatacasanotiri Avincatsarite. ²⁹Iquenquetsatacaajeiveta-cari joriopee iotirori quirieco, iro cantain-cha ipiatsajeitavacari; icoajeivetanaca iroyerime, ³⁰iro cantaincha iotacotaqueri iyemisantaririnte, irosati yaantanajari Saoro anta Sesareaqui. Impoiji itiancajeitaqueri Tarisoqui.

Itasoncantayeti Petero anta Iriraqui.

³¹Cameetsa itimajeiti quemisantajeita-tsiri anta Joreaqui, Carireaqui, Samaria-qui. Aiquero ijatati iquemisantajeitana-que. Yamejeitaca ipincatsajeitiri Avincatsarite. Aisati oshequi oveshireaca-sanojeitacari Ishire Tasorentsi. ³²Ari iquenaquenayetanaque Petero iquivanta-yetiri quemisantayetatsiri, irosati yareetantacari Iriraqui. Anta isaviqui oshequi quemisantatsiri. ³³Ineapaaqueri shirampari pajitachari Eneashi. Ocarati osarintsi 8, inareaca imaamentoqui, ichoritaque. ³⁴Icantapaaqueri:

—Eneashi, iriotaque Jesoquirishito oavisacotajempine. Pincatianaje, povetsi-cajero pimaamento.

Jentsipaite itinaanaja. ³⁵Ineajeitaqueri irirasati, jeri saronasati; irosati iquemisantajeitantanajari Avincatsarite.

³⁶Otimaveta Jopequi quemisantsiri pajitachari Tavita. Acanti aneanequi

arori: Maniro. Cameetsa oca antayetiri: ashi oiro intacotantayeta. ³⁷Omantsiata-naque, impoiji ocamaque, torein. Ari iquivatsempre quiyeetaquero ovatsani, impoiji yoaquero anta shitamencotsiqui, onta jenioquijiniri. ³⁸Jero Irira oquempe-jitaro Jope. Yora quemisantajeitatsiri, iquemacotaqueri Petero, inapaaque anta. Itiancaqueri apite shirampari:

—Pishintsite, pincantaiteri Petero impoque.

Ari ijataque, icantasanotappaqueri:

—Pishintsite pojatanaquena pamena-peero tsinane, camaque oni.

³⁹Ari ijatanaque Petero, yojatanaqueri.

Yareetacaacari, yaanaqueri anta pancotsi-qui jenioquiji. Oshonquimentajeitacaro maaroni camajimentaaro, iraajeitaca. Onijaayetiri oicoropee, aisati oitsaresa-noripee. Ocantajeitaque:

—Tequerani oncameni Tavita, otijaye-tanaroni maaroni ocapee.

⁴⁰Ari yoimisoquijapaaqueri maaroni atiri. Itiyeroanaca, iquenquetsatacairyi Tasorentsi. Iptsocashitanacaro camain-tsiri, icantiro:

—Tavita, pintinaanaje.

Oquireanaji, oneaqueri Petero, irosati osavincantaja. ⁴¹Yaavacotiro, yoatiajiro. Icajemejtiri aisati quemisantajeitatsiri, aisati iroori icajemejtiro camajimen-taaro, maaroni. Icantajeitavaqueri:

—Jero, aneanaji.

⁴²Ari iquemacojeitaquero maaroni jopesati. Icarati oshequi quemisantayeta-najiriri Avincatsarite. ⁴³Oshequi quitaiteri isaviqui Petero Jopequi. Isaviqui ivancoqui Shimo, yora vetcicapinitiriri meshinantsi.

**Iquemisanti Coronorio,
yora capitano-tatsiri.**

10 ¹Ari itimaiti anta Sesareaqui shirampari pajitachari Coronorio. Iriotaque iyapitanote oshequi soraro,

poneayetachari Itariaqui. ²Quemisanta-notatsiri ini, ipincatsatiri Tasorentsi. Aisati iquempejeitari maaroni ishaninca-pee iriori, saviquimojeitiriri. Oshequi icavintsaajeitiri atiripee. Icantani iquenquetsatacairyi Tasorentsi. ³Ishaaviji-tanaque catsirincaiteri ineashitavacari inampire Tasorentsi, iconijatasanotappa-que. Iquempejitapaacari, icantapaqaqueri:

—Coronerio.

⁴Yamenasanotavaqueri, sorerere.

Itsaroasanotanaque catsini. Icantava-queri:

—¿Paita, Novincatsarite?

Icantiri:

—Iquemaquempi Tasorentsi piquen-quetsatacainaqueri, aisati ineaqueMPI pintacotapinijeitacari atiripee. ⁵Icoaque meecca pintianque aparopee shirampari anta Jopequi. Pincajemacanteri yora Shimo, ipajiyetiri aisati Petero. ⁶Irío isaviquimotiri pajitachari aisati Shimo, yora vetcicapinitiriri meshinantsi. Otimi ivanco otsapijaqui incajare.

⁷Ari ipianaja inampire Tasorentsi, yora neanaitiriri. Icajemaqueri Coronorio inampire apite, aisati soraro aparo. Quemisantasanotatsiri ini soraro. Icarajeitiri amitacojeitiriri Coronorio. ⁸Icamanta-jeitaqueri maaroni oca icantaqueriri inampire Tasorentsi, impoiji icantiri:

—Nocoaque pijajeite Jopequi, pamenaiteri yora Petero.

Ari ijajeitanaque. ⁹Oquitaitetamanaji, itampaticatapaaque catsirincaiteri. Iquenapaaque, irosati iquempejtantapaa-caro nampsiti. Irriori Petero, yataitanaque jenoqui, iquenquetsatacairyi Tasorentsi.

¹⁰Itasheavetaca, icoaveta iroyeame.

Ainiroquera ovetsiquiniri iroyeari, omapocapaqaqueri ineashitacaro.

¹¹Ineaquero inquite tsompoina.

Oaniimaotapaaca quipatsiqui shiavetarori tocoya antearo. Yajiriqueetaquero anta ocaramaotapaaque. ¹²Iteyetaca yora caari

yoyeeta; jeri iteyetaca maranquepee, vanquiyetachari, maaroni. ¹³Iquemavaqueri Tasorentsi, icantiri:

—Petero. Jeri yoca, poyerí, impoiji poyerí.

¹⁴Icantanaqueri:

—Novincatsarite, eiro noaritsi. Te nameteariji caari yoyeeta, caari icoacayeetana noyeari.

¹⁵Yapiitajiri:

—Tempa narotaque Tasorentsi, nocamantimpi nainti: “Cameetsari ini, poyerí”. Eiro picantashitaritsi avirori: “Te incameetsateji”.

¹⁶Yapiitajiniri aisati:

—Poyerí, poyerí.

Irosati yoancacotanteetajariri jenoqui.

¹⁷Te irootacoteroji Petero oca ineakeri.

Irosati yareetantapaaca pancotsiqui itiancane Coronero. Isampitacopaaqueri:

—Jaoca ivanco Shimo, yora vetcicapitiriri meshinantsi?

Icamanteetiri:

—Irootaque oca ivanco.

¹⁸Ari isampitajiri:

—Ariompá isaviquimotimpí yora Shimo Petero?

Icanteetiri:

—Je, aitaque isavquiri.

¹⁹Irosatiquera iquenqueshiretiro Petero ineakeri. Ari ocantaqueri Ishire Tasorentsi:

²⁰—Jerijeitapaaque shirampari, coimpíri. Pijate, paniireashitanaqueri. Eiro picantashiretitsi, pojajeitanaqueri. Tempa narotaque amajeitaqueriri.

²¹Ari yaniireashitapaqueri, icantapaaqueri:

—Narotaque picoiri. ¿Paita pipocashitantanari?

²²Ari yacanaqueri iriori:

—Itiancaquena Coronero, yora capitanotatsiri. Icameetsashiretasanoti, aisati ipincatsatiri Tasorentsi. Maaroni

joriotatsiri ineacameetsajeitiri. Icantiri inampire Tasorentsi: “Pincajamacanteri Petero pivancoqui. Pinquemisantavaquerio irineane”. Irootaque itiancantanari aca.

Ari icantavaqueri:

²³—Pinqueapee.

Ari ineshinoncatavaqueri. Ari oquitaitamanaji yojatanaqueri, itsipajeitanacari iyemisantairinte aparopee, yora jopesati.

²⁴Aparo imaajeitanaque nianqui, irosati yareetantamanaca anta Sesareaqui.

Yoyaqueri Coronero anta, yapatojeitaqueri maaroni ishaninca aisati itsipatapiniyeitari. ²⁵Iqueapaaque Petero. Yovetsatavacari Coronero, impoiji itiyeroashitavacari iitiqui. ²⁶Ari yoatajiri Petero, icantiri:

—Pincatianaje. Te naro Tasorentsi, tempa narosati narori atiri, aquempetavaaca.

²⁷Ari iquenquetsatavacaaca, iqueapaaquerio pancotsi. Ineapaatiiri oshequi apatojeitainchari, ²⁸icantapaaqueri:

—Naro jorio. Piojeiti avirori te irishinetaji noshaninca nontsipajeiteari pashinisatipee atiri. Aisati te irishinetenaji nonquivanteri. Iro cantaincha yoametaquena Tasorentsi te oncameetsateji nompinqueri pashini atiri, te oncameetsateji noncante: “Te incameetsateji”. ²⁹Ari picajemacantaquena, irosati nopocantanaca, te nonquisotanaque. Meeca nosampitempi, ¿paita picajemacantantanari?

³⁰Icantiri Coronero:

—Ocarati meeca 4 quitaiteri, ishaavijitanaque catsirincaiteri, iquempetaca meeca. Noquenquetsatacairy Tasorentsi aca novancoqui. Noneaqueri aparoni shirampari, icatiimotapaaquena. Iquitsataro shipaquireatsiri iitsaare. ³¹Icantapaaquena: “Coronero. Iquemavaquerio Tasorentsi piquenquetsatacaaqueriri. Iotaquempi pintacotantayeta. ³²Pintian-

que anta Jopequi, pincajema canteri Shimo, ipajiyetiri aisati Petero. Isaviquimotiri itsipa Shimo, yora vetsiquiriri meshinantsi. Otimi ivanco otsapijaqu incajare".³³ Intsipaita nocajemacantaquempi, irosati pipocantacari. Meeca nocarajeitaqueri iriori Tasorentsi aca. Nocoajeitaque nonquemajeitero oca inintacaquempiri Avincatsarite.

³⁴Ari ineaveetanaque Petero iriori, icanti:

—Meeca niotasano taque te irinashitacaajeiteji Tasorentsi, tempa icanti: "Piquempetavacaajeitaca, eiro pipincava- caajeitatis".³⁵ Te iquenqueshiretacoteeroji onashiyeterrica aneane aisati ameyetari, irointi inecameetsajeitaqueri maaroni pincatsajeitiriri, aisati maaroni antapinitirori cameetsayetatsiri.³⁶ Naro jorio. Piojeitavaquero irineane Tasorentsi ijivajeitaquena, iotacaajeitaquena. Cameetsa oca icamantaquenari: "Ariorica pinquemisantajeiteri Jeso quirishito, cameetsa nosavicasaajeitempi, pinquempetavacantajeiteari". Tempa iringa que Jesoshi Avincatsarite maaroni,³⁷ piojeitavaquero. Ijivataque Joani iquenquesataco- taqueri, icanti: "Cameetsa pivaotisati- mentajeiteari Quirishito". Impoiji iquenquesatacoaqueri itsipapee, intanacaro anta Carireaqui. Yovaacaana- caro maaroni nampitsipeequi anta Joreaquei.³⁸ Icamantajeitiri atiri jaoca icantaqueriri Tasorentsi Jesoshi, yora nasaretetas, itiancantacariri Ishire, aisati ipantacariri itasorenca; irootaque iquenaquenayetantacari, yantantayetacarori cameetsayetatsiri. Yoavisacojeitiri neajeitiriri camaari. Quiso yoiri Tasorentsi, irootaque imatantacariri.³⁹ Noneajeitaqueri yantayetiri anta inampipeequi noshaninca, aisati anta Jerosarequi. Noneaqueri yoanteetacariri, ipajacotan- teetacariri coroshipui.⁴⁰ Omavatapaaque quitaiteri itinaajiri Tasorentsi, yonijaaja-

nari.⁴¹ Te ironijaa jeiteriji maaroni, narojeitaque nainti, yonijaajiri. Icoye aquena Tasorentsi, irootaque noneantavajariri. Icamasanovetaca, itinaanaja aisati. Impoiji noacaavajari, aisati niracaavajiri.⁴² Icantaquena: "Pincamantajeiteri atiri: 'Inintacaqua queri Tasorentsi Jesoshi incantacoventajeiteri maaroni atiri: anea tsiri aisati camaintsiri'".⁴³ Tempa peerani iquenquesatacotirini Quirishito yora camantantatsiniri, icantajeitini: "Ainiro yantajeitaquero maaroni atiri caari cameetsatatsi; iro cantaincha ariorica inquemisanteri Quirishito, incavintsaajeiteri irinti, eiro iquishimentiritsi yantajeitiri, eiro iquenqueshireacotiritsi".

⁴⁴ Ainiro quera iquenquesati Petero, irosati opocashitancacari Ishire Tasorentsi. Aisati opocashijeitaqueri maaroni quemajeitavaqueror i cantakeriri.⁴⁵ Ari yoajeitanaque cavaco yora jorio, quemisantatsiri: yora tsipatariri Petero. Ari iojeitaque itiancasanotaquero Tasorentsi Ishire, quiso oantacariri pashinisati atiri. Irootaque yoajeitantanacari cavaco.⁴⁶ Iquemajeitavaqueri ishaninca Coronero ineanatantashitana- caro pashinipee neantsi, aisati icantajeiti:

—Cameetsa ini Tasorentsi.

Ari icantanaji Petero:

⁴⁷ —Iquempetaque arori, yaashirejeitaquero Ishire Tasorentsi. Tempa ocameetsati irivaotisajeitea.

Icantiri itsipapee jorio:

—Je, cameetsataque.

⁴⁸ Irosati icantanariri Petero ishaninca Coronero:

—Pivaotisatimentajeiteari Jeso quirishi, irojeitantzempiri atiri pipincatsajeitaqueri.

Icantajeitaqueri:

—Jentsiqueti pivaotisatena.

Ari ivaotisajeitaqueri. Impoiji icantajeitaqueri:

—Pisaviquimotanaquenatsita aparopee quitaiteri, poametasanotajena aisati.

**Iquemajeitaque jerosaresati
iquemisantaque itsipapee atiri.**

11 ¹Iquemacojeitaqueri joreasati: jeri yora itiancanepee Jesoshi, jeri maaroni quemisantajeitatsiri. Icamanteetiri:

—Iquemisantaqueri Jesoshi pashinisati-peee atiri; irio quemisantacaajeitaquerirri Petero.

²Itoncantanajari Petero Jerosarequi, iquishimentajeitavaqueri ijoriorintre: quemisantatsiri inaveta. ³Icantajeitavaqueri:

—¿Paita pijatashitantariri pashinisati-atiri? ¿Paita poimotantariri iriori? Te oncameetsateji.

⁴Itsoteasanotaqueneri Petero, icantiri:

⁵—Meeca noncamantempi. Anta notimaitinta Jopequi, noquenquetsata-cairi Tasorentsi. Noneashitavacaro, noneaquero shiavetarori tocoya antearamonca. Yajiriqueetaquero anta ocaramaoyetapaaque, oponeaca inquite-quinta, oaniimaotimotapaaquena.

⁶Namenasanotavaquero sorerere: noneaqueri caari avajeita: chancho, maranque, vanquiyetachari, maaroni.

⁷Noquemaqueri Tasorentsi, icantaqueuna: “Meeca poyer; poyeari”. ⁸Iro cantaincha nocantavetacari: “Novincatsarite, eiro noaritsi. Te nameteariji caari yoyeeta, caari icoacayeetana noyeari”. ⁹Apiteta-que Yapiitaquena, icantana: “Tempa narotaque Tasorentsi cantimpiri: ‘Camee-tsari ini’. Eiro picantashitaritsi avirori: ‘Te incameetsateji’”. ¹⁰Aitaque apitatacava. Irosati ovancantanaja inquitequi.

¹¹Irosati yareetantapaaca mava shirampari anta pancotsiqui notimaitinta. Iponeanaca Sesareaqui, itianqueetaque-nari. ¹²Irosati ocantantaquena Ishire Tasorentsi: “Pojatanaqueri, eiro piquiso-

tanaquetsi”. Ari noijatanaqueri. Aisati yoijatanaquena iriori ayemisantairinte, icarajeiti 6. Noqueajeitapaaque ivancoqui yora cajemacantaquenari. ¹³Iquenquetsatacavaquena, icamantavaquena jaoca icantacari ineantacariri inampire Tasorentsi. YonijantapAACariri, icantiri: “Pintianque anta Jopequi. Pincajamacanteri Shimo: ipajieetiri aisati Petero.

¹⁴Iriotaque oametapeempirone irineane Tasorentsi, paviscotantajeari. Aisati inquempejeitaja iriori maaroni pivanco-quiniri”. ¹⁵Nintantacarori noquenquetsataquaqueri, ari opocashijeitaqueri Ishire Tasorentsi. Oquempetacaajeitaquee intantaqueeri arori. ¹⁶Noquenqueshiretanaquero irineane Avincatsarite icantitacari: “Yora Joa ivaotisatantaroni nija, irompa nainti nontianquempiro Ishire Tasorentsi”. ¹⁷Peerani aquemisantajeitan-tariri Avincatsarite Jesoquirishito, itianqueero Tasorentsi Ishire. Meeca imoncaratajiniri iriori itsipapee atiri. ¿Arimpa nontsaneaqueari? Tempa irio Tasorentsi.

¹⁸Iquemajeitavacarori oca, tecatis incantanaqueri impiateari, iointi icantajeiti: —Cameetsa ini Tasorentsi. Tempa icoacairi aisati pashinisatipee atiri iquenqueshirejeitiri, irijajeitantajeari iriori anta jenoqui.

Icamantanti anta pashinipeequi nampsitsi.

¹⁹Ari quisacoyeetanacari Ishitevani. Meeca quisacoyeetanacari maaroni quemisantajeitatsiri, irosati ishiajeitanta-naca pashinipeequi quipatsi: Jenishiaqui, Tsipirequi, Antioquiaqui, maaroni. Anta te inquenquetsatacayeriji pashinisati atiri, irinti itsataayetiri ijorioririnte. ²⁰Ainiro iconoayetacari itsipapee quemisantatsiri, poneayetanainchari Tsipirequi, jero Shirenequi. Yareetantanacari irinti anta Antioquiaqui, iquenquetsatacapaquaqueri caari joroyetatsi. Icantajeitiri:

—Pinquemisantajeiteri Jesoquirishito paviscotantajeari.

²¹Itasoncacoventapinitiri Avincatsarite, itimantacari oshequi catsini quemisanta-jeitavaqueriri, aventajeitariri. ²²Ari anta Jerosarequi iquemacojeitaqueri quemisantatsiri. Itiancaqueri Verenave anta Antioquiaqui. ²³Yareetapaaca iriori, iotapaquaqueri ineshinoncatiri Tasorentsi.

Iquimoshiretapaaque, icantajeitiri:

—Quearioyea, quiso poajeiteri yora Avincatsarite, pinquearioventeneri maaroni icoacaajeitimpiri.

²⁴Cameetsari ini iriori Verenave. Quiso yoasanotiro Ishire Tasorentsi, yashi yoiro iquemisantasanoti. Aisati aiquero ijatati yoshequiajeitanaque quemisantajeitiriri Avincatsarite. ²⁵Impoiji yovaanaca Verenave Tarisoqui, icoapaquaqueri Saoro. Ineapaaajiri, irosati yojatantajariri Antioquiaqui. ²⁶Anta yapatotapinitirinta quemisantatsiri. Icantani, ocarati aparoni osarintsi. Yoametapaquaqueri oshequi catsini atiri. Aitaque anta intanacaro ipajiyetiri quemisantatsiri: “Quirishitia-notatsiri”.

²⁷Irosati yareejitantaapaaca Antioquia-qui pashini camantantatsiri, iponeanaca iriori Jerosarequi. ²⁸Icarataqueri aparoni, pajitachari Acavo. Icatiapaaca anta yapatojeitanta, oametaqueri Ishire Tasorentsi, icantantari:

—Coajica intasheajeitanaque atiripee anta Joreaqui.

Ainironi ipincatsariventanti Caraorio, omoncarataja icantitaniri Acavo.

²⁹Icantajeiti quemisantatsiri:

—Tsame ancavintsajaeiteri ayemisanta-ririnte anta Joreaqui, ampacanteri paitarica icoajeitiri. ³⁰Jaocarica ocaraye-tiri timimoyeteeri, aitaque oncarate ampacantayeteriri.

Aitaque imataquero icantajaeiteri. Yapatotaqueri quirequi, ipavaquaqueri Verenave, jeri Saoro. Icantajaeiteri:

—Jeri yoca quirequi: paajeitanaqueneri quenquetsatacantatsiri anta Jerosarequi, incavintsaajeitanteeariri ashinoncaajeita-chari.

Ari yaanaqueneri jerosaresati, ipapaa-queri quenquetsatacantatsiri. Ari yovaajeitaqueneri iriori ashinoncaajeita-chari.

Eroreshi Aquiripa, iriotaque quishiriri quemisantatsiri.

12 ¹Impoiji yora pincatsari Eroreshi iquisayetaqueri aparopee quemi-santatsiri. ²Yoacantaqueri Santiac, iro ipesanteetacariri saviri, peti. Irio irirentini Joa. ³Ionirotaque Eroreshi onimojeitaqueri joriotatsiri, irootaque yaacantantavetacariri Petero aisati. ⁴Iro yaacantantacariri quitaiteri yoantapini-yeetarori tanta caari tapiacha. Ijitalshive-taca ariorica omoncarataquea quitaiteri Yavisantaniri, iramenacojeiteri jorioppe iroyeri. Yaaqueri, impoiji ipaqueri 16 soraro, irishentanteeariri. ⁵Ari yominquea-queri. Yora quemisantatsiri iquenquetsa-tacaasanojeitiri Tasorentsi, icantiri: “Poavisacotajeri Petero”. ⁶Ari otsitenita-naque, iro osaitequera iroisoquijerime Eroreshi, iroacaantantearirime. Icoaveta iramenajeiterime atiri incamaque. Ainiro inaveta Petero caravosoqui, imaanaque; isatecaqueri apite soraro. Yoisotantacari apite carenatsa. Ishentavetaro ashitacorontsi itsipapee soraro. ⁷Ari imapocapaa-queri anta inampire Avincatsarite. Oconijaitteashitimotanacari. Itincapaa-queri imerequiqui, icaocapaaquaqueri. Icantajaeiteri:

—Pishintsite pintinaanaje.

Irosati oisoreashitantanaja carenatsa iracoquiniri, yoisotantavetacariri. ⁸Aisati icantiri:

—Pinquitsaatajea, pisapatotajea.

Ari iquitsaataja, isapototaja. Aisati icantajiri:

—Pampinaicajearo poicoro, pojatanaquena.

⁹Isoquijanaji, yojatanaqueri. Te irioteji Petero queariosanotaquerica yoavisacotajiri inampire Tasorentsi. Yaamaaca imishitaca. ¹⁰Yavisanaqueri shentavetariri aparo, jeri aisati itsipa yavisanaqueri. Yareetacaro onta ashitacorontsi, onta iquenantapinitari nampsiqui. Ashitareimotashitanajari. Yavisanajiro, yovaanaca anta avotsiqui. Irosati inijantareantana-jari inampire Tasorentsi. ¹¹Iotacotaja Petero, icanti:

—Meeca niotasanoque itiancaquenari Novincatsarite inampire. Yojocaacoventaquena iroyename Eroreshi. Aisati iquempetacoventaquena, yojocaacoventaquena jaocarica incantenameri noshanin-capée. ¹²Iquenqueshiretanaquero, irosati ijatantaca ovancoqui Maria, iriniro Joa. Ipajiyetiri Joa aisati Maricoshi. Anta yapatojeitacanta oshequi quemisantatsiri, iquenquetsatacaciajeitiri Tasorentsi. ¹³Iposanavetapaaro Petero ashitacorontsi, ora otsapiquiniri: toc, toc. Ari ocatashi-vetanacari nampirentsi pajitachari Irore. ¹⁴Iotsatavajiri irineane Petero, oquimo-shiretasanotanaque. Iro cantaincha te ashitareanaqueneriji, ainti oshiashitana-ca. Ocamantajeitiri quenquetsatacaciajeitiriri Tasorentsi:

—Jeritapajji Petero omoroquinta.

¹⁵Icantajeitavaquero:

—Pishinquiventacateemi.

Aiquero ocantanaitii:

—Queariosanotaque.

Icantauquero:

—Caari ini Petero, irintiata inampire Tasorentsi, amenacoventiriri.

¹⁶Aiquero catsini iposanaitiyo, toc, toc, irosati yashitareantajanari. Ari ineajeitavajiri, yoajeitavaqueri cavaco, icantava-caciajeitanaja:

—¿Jaoca iquenapajiri?

¹⁷Ari yacotashitanaqueri, icantiri:

—Pimajerejeite.

Impoiji icamantajeitapaajiri jaoca icantajiriri Avincatsarite, yoimisoqujan-tajariri. Aisati icantiri:

—Pincamantaiteri Santiaco, aisati pincamantajeiteri ayemisantaririnte.

Irosati isoquijantanaja, ijatanaji imanapitsatacari soraropee. ¹⁸Oquitaite-tamani oshequi icantavacaimentajeitacari soraropee:

—¿Jaocaquea meeca icantanajari Petero?

¹⁹Icoacantavetacari Eroreshi, te irineajeriji. Isampinatiri soraro shentavetariri:

—¿Jaocaqueame iquenanajiri?
Yacanaqueri:

—Caa, jaocarica, te nioteji; te noneava- jeriji.

Ari iquisaqueri Eroreshi soraropee, yoacantajeitaqueri, shemi. Ari impoiji yojocanajiro Eroreshi Jorea, yovaanaja anta Sesareaqui, irosati isavicantapaaja.

²⁰Ari anta Tiroqui aisati Shiroqui aajeitaqueri savicajeitatsiri itashe, te ontimasanoteji iroajeiteari. Peerani icantiri iriori Eroreshi:

—Pincavintsaajeitena, nocamicari.
Pimpapinijeitenaro noyeari.

Ari ipapinijeivetacari, iro cantaincha meeca iquisajeitaqueri. Oshequi iquenqueshirejeitanaca tirosati aisati shirosati. Icantavacaajeitaca:

—Itsaneapitsajeiteerocari avajeiteari. Tsame ancanteri Varashito iramatocojei-tee ampitsimareacaajeari: tempa iriotaque inampire Eroreshi. Ariorica incanteri, iraacameetsajeitajee aisati, eiroquea itsaneapitsatanteerotsi ayeari. Icantiri Varashito; impoiji icantiri iriori:

—Ari, namitacojeitempi. Noncanteri novincatsarite incajemajeitempi, iraacameetsajeitempi.

²¹Ari pashini quitaiteri icajemajeitaqueri Eroreshi, yaacameetsajeitaqueri.

Yoaneencaro pincatsari iitsaare, isavicaque anta ivincatsarimentoqui. Oshequi ishemetaque, iquenquetsatacaa-jeitaqueri. Icantiri:

—Eiro piquenqueshirejeitatsi. Nompa-jeitempi maaroni coiteimojeitaquemperi.

²²Irosati iquimoshirejeitantanaca pocajeitaantsiri, icantajeitaque:

—Te irio atiri aquemajeitaqueri, irinti Tasorentsi. Cameetsa ini.

²³Ari oshequi ishemetaque Eroreshi, iveshireimentacaro icantajeitaqueriri atiri. Iro cantaincha ishemacari Avincatsarite, itiancaqueri inampire:

—Te impincatsatenaji Eroreshi. Pijate pojoquitacayeari.

Ari ijataque, yojoquitacaacari, impoiji icamanaque, torein, irosati yoantacari quenitsi.

²⁴Irosati iquenacaantayetanacaro quemisantatsiri irineane Avincatsarite. Yoshequianaque quemisantajeitatsiri.

²⁵Iriori Verenave, aisati Saoro intacotanta anta Jerosarequi. Irosati ipiantanaja Antioquiaqui, itsipatanajari Joa, ipajiyee-tiri aisati Maricoshi.

Ijati Saoro aisati Verenave anta Tsipirequi.

13 ¹Icarajeitiri quemisantatsiri anta Antioquiaqui camantantatsiri, aisati oametantatsiri: jeri Verenave, aisati Shimo Nijeri. Iroshio shiresesati, Manaemi ishaninca pincatsari Eroreshi, Saoro, maaroni. ²Ari pashini quitateri yapatojeita iquemisantajeitiri Avincatsarite, tecatsi iroajeiteari. Irosati icantanta-cari Ishire Tasorentsi:

—Pincantajeiteri Verenave aisati Saoro: “Pimateneri Tasorentsi paitarica incoaca-yemperi”.

³Ari impoiji yajiricainajeitaqueri iitoqui, irosati icantantariri:

^{4,5}—Pijate pantero icoacaimperi Tasorentsi, naroquea canterineri Tasoren-tsi iramitacotempi.

Ari otiancaqueri Ishire Tasorentsi, irosatis ijtantacari anta Sereoshiaqui. Yojatanaqueri Joa Maricoshi iramitaco-tanteariri. Ari itetapaaca pitotsiqui. Otiancacotiri tampea, iquenacotanaque Tsipirequi. Otimi anta nampitsiqui pajitachari Saramina: yareejitantanapa-a-cari anta, iquenquetsatapaaquero irineane Tasorentsi anta pancotsiqui yapatotapinijeitantari joriopee. ⁶Impoiji itsoteajeitanaquero maaroni nampitsipee-qui anta Tsipirequi, maaroni. Impoiji yareejitapaaaca Pajoshiqui. Anta ineapaa-queri sheripiaritatsiri, pajitachari Varijesoshi. Jorio ini. Irishiyerime camantantatsiri, icantapiniti:

—Naro quenquetsatirori irineane Tasorentsi.

Ja, itseeanyi. ⁷Itsipatapinitari pincatsa-ritatsiri pajitachari Serijo Pavoro. Ainiro iotantari iriori. Icjamacantaqueri Verenave, jeri Saoro: icoaque inquemero irineane Tasorentsi. ⁸Iro cantaincha itsaneavetacari yora sheriipiari: te irinintacaaveteariji inquemisante yora pincatsaritatsiri. ⁹Ari iotacotaqueri Saoro, pajitachari aisati Pavoro. Oametasanotiri Ishire Tasorentsi, yamenasanotanaqueri sheriipiari, ¹⁰icantanaqueri:

—Pamatavitantanotaque. Te catsini pincameetsateji: piquempetacari camaari. Te pininteroji cameetsayetatsiri, irointi picoasanotaque pamatavitante. Picoaque pamatavijeiteri maaroni coatsiri irloteri Novincatsarite. ¿Eirompa piquenqueshi-retatsi? ¹¹Meeca intasonquempi Novinca-tsarite pinquitapoajaquitanaque. Osamanitanaque, eiro pamenitajtsi.

Irosati icamarajatantanaca, otsiteniitea-cotanaqueri. Ipamipamitanaque, pami, pami; icanti:

—Teve namenajeve. Pancatsatanajenave.

¹²Ari ineaquaqueri yora pincatsaritatsiri, aisati iquemiro irineane Avincatsarite, irosatis iquemisantantanaca. Icanti:

—Cameetsave oca icamantacotiriri Avincatsarite.

Yovaanaja camantantatsiri anta Ashiaqui.

¹³Iponeanaja Pavoro Pajoshiqui, itetanaja pitotsiqui, itejeitanaja aisati maaroni icarajeitiri. Iquenacotanaque anta Perejequi, ora Pampiriaquiniri. Iriori Joa yojocanajiri, ipianaja iriori Jerosarequi. ¹⁴Impoiji itsipapee, yovaajeitanaja aisati. Yareejeitapaaca anta pashiniqui Antioquia: ora Pishiriaquiniri. Quitaiteri imaoresentajeitari iqueajeitapaaque pancotsiqui yapatojeitantar, ari isavicajeitapaaque. ¹⁵Ineanayeetiro isanquenareni Moishishi, aisati isanquenareni camantantatsiniri. Yora jivatantanatsiri anta pancotsiqui, icantavaqueri:

—Noshaninca, pincoaquerica avirori pinquemisantacayeri ashánincae aca, pincamanteriqueti.

¹⁶Ari icatianaca Pavoro, yacotashitaqueri yoimajerentajeitaqueri. Icantí:

—Noshaninca, ariorica pipincatsataqueri Tasorentsi, pinquemisantajeitavaquena. ¹⁷Meeca nonquenquetsatacotempi Tasorentsi iquemasantiniri Ishiraerini. Peerani icoyeaqueri intacantayetacariniri inquemisanteri. Impoiji, itimantacari ashánincani anta Ejipitoqui, yoshequia-caaqueri. Itasoncacoventajeitiri, irosati ishinetantacari peranavetariri ijajetanaque. ¹⁸Ocarati 40 osarintsi itimajeiveitani ashánincani anta caaraiteriqui, iro cantaincha oshequi itseenajeitaqueri Tasorentsi. ¹⁹Icoajeivetaca irareejeiteame Cananaqui, iro cantaincha isaviqui pashinisatipee atiri, ticaajeivetavacariri. Inashiyetaca iriori, ocarati irineanepee 7. Impoiji itasoncaventiniri Tasorentsi ashánincani, itsoncajeitaqueri savicajeitachaniri. Impoiji ipaqueri ashánincani iipatsite, icantiri: “Jero oca, pisavicajeitanteari”. ²⁰Ari ocarataque osarintsi isavicajeitaque 450. Te intimeji pincatsa-

riventasanojeiterineri, irinti ijivatashijeivetacarini itsipapee savicacantayetatsiri. Impoiji ijivatacanti yora camantantatsiri pajiveitachaniri Samoiri. ²¹Impoiji icantaqueri ashánincani Tasorentsi: “Nocoajeitaque pincatsariventasanojeitenaneri”. Ari icoyeaqueri Saoro, ipincatsariventantariniri ashánincani. Irio iriri iriori Saoro ipajita Shishi. Iriojeitaque ishanincapeeni Vejami. Ocarati 40 osarintsi ipincatsariventantaque Saoro, ²²impoiji icanti Tasorentsi: “Eiro ipincatsariventantajitsi aisati Saoro, te incameetsateji, irinti pincatsaritajantsine Iraviri, yora itomi Jese. Irio noneacameetsasanotaqueri, irantenaro irinti maaroni nonintacayeriri”. ²³Iriotaque ishanincani Iravirini oavisacotajeeri: ipajita iriori Jesoshi. Tempa icantini Tasorentsi: “Irio ishanincani Iravirini oavisacojeiterineri atiri”. Moncarataca meeca icantitacaniri. ²⁴Ijivataqueri Joa iquenquetsatacaya-jeitaqueri maaroni asháninca: “Pinquenqueshirejeitaja, eiro piquempejeitajatsi peerani, impoiji novaotisajeitempi, aisati iroavisacojeitempi Tasorentsi”. Impoijiquea iquenquetsatapaaque Jesoshi. ²⁵Iriori Joa irotaintsi incame, ari icanti: “Te narosano yora piquenqueshirejeivetari. Te naro Quirishito oavisacojeitempineri, irintiquea imoitapeenaneri. Oshequi nopincatsatasanotaqueri narori; irompa nainti, te nompincatsatimateaji”.

²⁶Ari yovaajiniri aisati Pavoro, icantiri:

—Noshaninca, tempa ashánincaeitarini Avaramani, tsame anquempetasanojeiteari, ampincatsatasanojeiteri Tasorentsi. Meeca noncamantajeitempi: ariorica ampincatsatasanojeiteri Jesoshi, ari iroavisacojeitee. ²⁷Te iriojeitavaqueri jerosaresati, itseenajeitavaqueri. Aisati iquempejeitaqueri ivincatsaritepee, te iriojeiteriji Quirishito ini. Maaroni saavaró ineanatapinijeivetaro isanquena-

yentiniri camantantatsiniri, iro cantaincha te inquemasanotavaqueroji, irootaque caari iojeitentario oquenquetsatacotiri Jesoshi. Irootaque oquenquetsatacotiri Sanquenarentsi: "Iroyeeteri Quirishito". Ari yoacantajeitaqueri ashaincajei Quirishito, iro cantaincha te iritoteri. ²⁸Tecatsi irantavetea, yoacantashitacari. Icantacoventashitacari Pirato: "Poacanteri". ²⁹Moncarayetaca maaroni isanquenatacotitacariniri: oshequi yoashinoncaaqueri, ipajacotaqueri coroshiqui, icamanaque, torein. Impoiji yoaniireajiri, yoqueri anta omoroqui imperita. ³⁰Icamasanovetaca, iro cantaincha yoitinaajiri Tasorentsi. ³¹Ari ocarataque oshequi quitaiteri inijaapinijeitajari iroamere, yora tsipajeitapajariri chapinqui Jerosarequi: yora poneachari Carireaquí. Iriojeitaque meeca camantajeitiriri atiri.

Jero aisati icantajeitiriri Pavoro:

^{32,33}—Ocameetsataque icamantaqueri niri peerani Tasorentsi ashaincani. Isanquenatacaaqueri peeraniniri otimantacari pampoyeantsi, oca apitetaintsiri. Ocantini: "Incanteri Tasorentsi Quirishito: 'Ariorica nontinaajempi noncantajempi notomi'". Meeca noncamantajeittempi: imataquero Tasorentsi icantaqueriniri ashaincani: yoitinaajiri Jesoshi, ayojeitentario Quirishito ini. ³⁴Jeroca pashini icantaqueriniri Tasorentsi: "Notiom, nomoncaratasanotempiro maaroni nocantaqueriniri Iravirini: nontasoncacoventempi pimpincatsaritasanotanteari. Queariotasanoque: tempa narotaque cantaquemperi". Irootaque, noshaninca, piojeitantarcariri yoitinaasa-notajiri Tasorentsi Quirishito, irootaque ipincatsaritasanotantajari. Icamasanovetaca, yoitinaajiri, te impatsayeji quipatsiqui. ³⁵Tempa irootaque oca isanquenataqueniri pashini pampoyeaveitachaniri: "Tasorentsi, niotaque eiro pishinetiritsi

pitomi impatsaye quipatsiqui: tempa oshequi pineacameetsataqueri".

³⁶Pinquenqueshireteri peerani Iravirini, imoncarataqueneri Tasorentsi maaroni icoacairiri. Impoiji icamaque iriori, torein. Itijeetaqueri, itsipayeetaqueri ishanincapeeni, irosati ipatsaasanotantanaca. ³⁷Irompa irinti Jesoshi itinaajiri Tasorentsi, te impatsayeji irinti.

^{38,39}Meeca, noshaninca, piojeitavaquero oca. Ainiro pantajeitaqueri caari cameetsatatsi, iro cantaincha aneatsi meeca irinti Jesoshi, icavintsaajeitaquempi. Te incoacyempiji pijajeite Sharincaveniqui, irointi icoaque iroameetsajeitempi, iroavisacojeitempi. Ocarimeeca isanquenare Moishishi, tecatsi oncantea oameetsajeitempi. ⁴⁰Paamaventeaya, piquempetaricari yora iquenquetsatacotiniri camantantatsiniri icantini: ⁴¹"Pamene, tseencantatsiri, pinquenqueshirejeitanaquea: pijajeiticari Sharincaveniqui. Coajica pineajeitena nontasoncantasanotanaque, nomayetero caari pineapinijeiti. Ariorica noncamantavetempi pitarica nanteri, eiro piquemisanatansi".

Irootaque icantaqueriri Pavoro ijoririnte. ⁴²Ari isoquijajeitanaji, icantasanojeitavajiri:

—Coajica otsipani saavarro pimpocajanteaya aisati. Pashini pinquenquetsatacaa-jeitenaro niotasanolanteari.

⁴³Ari ijajeitanaji. Jeri Pavoro iquenajiri avotsiqui, itsipatanajari Verenave. Yojajeitanaquei quemisantatsiri: jeri joriosanori aisati peajanchari jorio. Ari icantaqueri Pavoro:

—Pinquemisantasanoteri Jesoshi irineshinoncatantempiro Tasorentsi.

⁴⁴Ari otsipani saavarro yapatojeitaca oshequi nampitsiquiniri. Te irishequiteji caari apatotacha. Yapatomitentaro inquemisantero irineane Tasorentsi.

⁴⁵Yora ivincatsaritepee jorio ineakeri

apatojeitainchari, irosati ocantimoneen-tantanacari. Icantajeiti:

—Te oncameetsateji oca icantiri
Pavoro, aisati te incameetsateji iriori.
Oshequi yamatavitanti.

⁴⁶Cameetsa yacasanotanaqueri Pavoro,
jeri Verenave. Te intsaroashiretanaqueji,
icanti:

—Avirojeitaque nintavetacari
nocamantajeivetaquempiro irineane
Tasorentsi, iro cantaincha pitseencava-quero avinti. Meeca niotaque te pincoyeji
pincantaitatiyempani paneasanotaje anta
inquitequi. Meeca nojatashiteri irinti
pashinisati atiri, niotaque inquemisante
irinti. ⁴⁷Irootaque nojatashitanteeariri,
tempa icantitaquena Novincatsarite:
“Tempa avirotaque notiancaqueri
pincamantayeteri pashinisatipee atiri,
iravisacotantajeari iriori. Pinquenquetsa-tacaajeiteri maaroni, pintsoeteajeitan-aquer
maaroni nampitsipeequi”.

⁴⁸Iquemantajeitavacari yora caari
joriotatsi, iquimoshirejeitanaque.
Icantajeiti:

—Cameetsa oni irineane Avincatsarite.

Ari itimi oshequi caari joriotatsi
icoyeaqueri Tasorentsi intime inquitequi,
incanteani: iriojeitaque quemisantajeitain-tsiri, maaroni. ⁴⁹Otsoteayetanaca irineane
Avincatsarite maaroni nampitsipeequi anta.

⁵⁰Irinti ivincatsarite jorio, oshequi
iquisajeitanaca. Ijatashijeitiro quemisan-tincaro shanincatacariri savicacaantaye-tatsiri, aisati ijatashijeitaqueri
savicacaantajeitsiri iriori. Icantajeitiri:

—Tsame, anquisajeiteri yora Pavoro,
jeri Verenave. Te incameetsateji.

Irosati itiancantajariri:

—Tsame pijajeitaje. Eiro pipocajitsi
aisati aca nonampiquica.

⁵¹Ari iriori, ipacaraanajiniri quipatsi
iitquiniri, pacara, pacara. Icantiri:

—Meeca piojeitaquena eiro nopiajatsi.
Te pincoajeiteji pinquemisante.

Irosati yovaantanaca Iconioqui. ⁵²Ari
iquimoshiretasanojeitanaque quemisanta-tsiri anta. Quiso oasanojeitaqueri Ishire
Tasorentsi.

Yovaanaja Pavoro anta Antioquiaqui.

14 ¹Anta Iconioqui iqueapaaque
Pavoro, jeri Verenave, anta
pancotsiqui yapatojeitantzari jorio,
iquenquetsatapaaque. Iquemisantavaque
oshequi catsini jorio, aisati caari
joriotatsi. ²Yora jorio, caari quemisanta-si, yoamejeitaqueri pashinisatipee atiri,
iquisajeitavaqueri quemisantajeitatsiri.
³Ari osamani isavicapaaque Pavoro,
iquenquetsatacopatiniri Avincatsarite,
te intsaroyeji. Yora Avincatsarite,
imatacaquaqueri quemisantsatsiri itasoncan-tayeti, imatacaquaqueri paitarica caari
ineapiniyeti. Iotacaquaqueri atiri queariota-sanotaque ineshinoncatasontantaque.
⁴Iro cantaincha icantavacaajeitanaca
nampitsiquiniri. Itimi aparopee quempea-yetanacariri jorio. Irio itsipa quempeaye-tanacariri quemisantatsiri. ⁵Jeri yora
jorio, caari joriotatsi, pincatsaritsiri:
icoajeivetaca iroatsinayerime, impichaa-naterime Pavoro, jeri Verenave. ⁶Ari
iotanaque, irosati ishiajeitantanaca anta
Irishitaraqui. Impoiji yovaanaja
Terevequi. Irootaque oca nampitsi
Iricaoniaquiniri. Aisati ijati otsapiyeta-paa, ⁷icamantajeitapaaqueri atiri jaoca
incanteari iravisacotantajeari.

⁸Anta Irishitaraqui isavicaque shiram-pari yamashita iitiqui. Choritatsiri ini.
Aitaque icantitapaani iroaquera itimapaa-que. Te iraniiimateji capichaji. ⁹Iquemi-santavaqueri Pavoro. Ari yamenapaa-queri iriori iotacotaqueri, iquenqueshire-tiri Tasorentsi, iravisacotantajeari.

¹⁰Antearojenca icantaqueri:

—Pincatiasanotaje.

Ari imitajitanaque iriori, mita, irosati
yanittantanaja. ¹¹Oshequi catsini icarati

nequierori oca imataqueri Pavoro. Ari ineanatantajeitaro irineane iricaoniasati, antearojenca icantajeitanaque:

—Yaniireashitapaaquee tasorentsitsiri, iquempetapaacari shirampari.

¹²Iriori Verenave ipajitashitari Seoshi. Yora Pavoro quenquetsatacantatsiri, irootaque ipajitantacariri iriori Eremeshi. ¹³Anta oquempejitaro nampsitsi ovanco Seoshi. Jeri yora saserotetimentarori Seoshi, yamajeitaqueri toropee, aisati inchateaqui. Yamayetaqueneri anta iqueapinitiro nampsitsi, icarajeitaqueri oshequi ishanincapee. Icoajeivetaca iroyenerime toropee; imperime Verenave, jeri Pavoro.

¹⁴Iquemantavaitiari iriori, itsereanaquero iitsaare. Ishiashijeitanacari apatotimenteriri. Icjemanaque, ¹⁵icanti:

—Ashaninca. ¿Paita pantajeitiri? Aisati aquempeavacaajeita, atiri anajeiti. Iro nopoantacari noncamantempiro pojocajero caari cameetsatatsi pantayetiri. Eiro meeca patsipetashitarotsi pimpincatsatashitajearo pivetsicayetiri. Pinquenqueshirejeiteri Tasorentisanori irinti, yora aneasanotatsiri. Iriotaque vetsicajeitirori inquite, quipatsi, incajare, maaroni; yovetsicajeitiri aisati maaroni timantajeitarori. ¹⁶Peerani ishinejeitimpri maaroni caari joriotatsi paitarica pamayetacari. ¹⁷Iro cantaincha yovetsicaguempiro Tasorentsi iotacaajeitimpri. Ineshinoncajeitaquempi. Yoariajeitimpri incani. Itimacayetiro oitsoquitapinitantari inchatopee. Iquemacaapinitimpri poari. Yoimoshirencapinjeitimpri. Iriotaque yoca noocoacaquempiro pimpincatsateri: eiroquea pipincatsatanatsi nainti.

¹⁸Oshequi icamantanavetacari, iro cantaincha irovetañaincha iroashiteanarime toro. ¹⁹Jeri ipocapaaque joriopee, poneayetachari Antioquiaqui aisati Iconioqui. Yamatavitapaaqueri oshequi atiri, icantiri:

—Oshequi yamatavitanti Pavoro: pinquisheri.

Ari ipichaajeitaqueri, ijijeivetacari camasanotaque. Inoshicanaqueri, yojocaitiri anta otsapitapaa nampsitsi. ²⁰Ari ijatashijeitaqueri quemisantatsiri, ishoncapaacari; irosati itinaantanaja. Ipiajeitanaja nampsitsiqui. Oquitaitamanaji yovaanaja Pavoro Terevequi, itsipatanajari Verenave. ²¹Iquenquetsatacotapaaquero jaoca icantari Tasorentsi yoavisacotanti. Iquemisantacaqueri oshequi atiri. Impoiji ipianaja Irishitaraqui, Iconioqui, Antioquiaqui. ²²Aquiero ijatatiini iquemisantasanotacairi quemisantatsiri. Icantasanotiri:

—Eiro pojoquirotsi oca piquemisantaqueri. Oshequi anquematsicataquearo paitaricapee, irosati quea ajatantanaqueari anta ipincatsaritinta Tasorentsi; iro cantaincha eiro ashemarotsi.

²³Jaocarica anta yapatotapinijeitari quemisantatsiri, icoyeaqueneri jivatacaajeiterineri. Impoiji iquenquetsatacaajeitiri Tasorentsi, aisati itjeita. Impoiji aisati icantajeitiri Avincatsarite:

—Jerica quemisantajeitimpri. Pojocacoventajeiteri.

²⁴Ari iquenanaque Pishiriaqui, irosati yareetantanaca Pampiriaqui. ²⁵Icamantaniro irineane Tasorentsi anta Perejequi, irosati yovaatanaja anta Atarayaqui. ²⁶Irosati itetantanaja pitotsiqui, iquenacotanaji Antioquiaqui. Aitaque anta itianqueetaquerinta peerani, icanteetirini Tasorentsi: “Jeri yoca, pineshinoncateri irimatantempirori paitanirica pincoacayeriri”. Tempa aitaque imataquero.

²⁷Ari yareetapaaja. Yapatojeitaqueri quemisantajeitatsiri. Iquenquetsatacaajeitaqueri maaroni yantacaajeitaqueriri Tasorentsi iriori. Aisati icantiri jaoca icantari ishinejeitantanajariri pashinisatipee atiri iquemisantajeitajari. ²⁸Ari

osamanitanaque itimimotaqueri
iyemisantaririnte anta.

**Icoaveta jorio inquempetearime itsipapee
atiri yameyetacari iriori.**

15 ¹Ari yareejitapaaca Antioquia-
qui joriopee poneachari Joreaqui.
Yoametapaaqueri ayemisantaririnte,
icantapaaqueri:

—Isanquenatini Moishishi: “Pintoyean-
tea”. Eirorica piquemisantiri, eiro
pavisacotajitsi.

²Ari ipiatsatavacari Pavoro, itsipatari
Verenave. Te capichaji incantavacyea:
osheequi yoametavacaaca. Ari itianquiri
Pavoro, Verenave, aisati aparopee
pashini. Icantavaqueri:

—Pijajeite Jerosarequi anta itiminta
iroamereni Jesoshi, aisati yora quenque-
tsatacantatsiri. Pisampitacoventapaa-
queri icantiri yoca. ¿Queariompa icoaca-
jeitaquena nontoyeantajeitea?

³Irio tiancajeitiriri quemisantatsiri anta
Antioquiaqui. Ari ijataque, iquenanaque
Jenishiaqui. Yovaanaca, irosati Samariaqui.
Icamantapinietiri joriopee quemisantatsiri:

—Osheequi iquemisantajeiti meeca
pashinisatipee atiri, yojocajeitiro
yamejeivtarie peerani.

Ari iquimoshiretasanojeitavaque
maaroni quemajitavaqueriri.

⁴Anta yareejitapaacanta Jerosarequi,
yaacameetsajeitavaqueri quemisantajeita-
tsiri: iroamereni Jesoshi, quenquetsata-
cantatsiri, maaroni. Icamantapaaqueri:

—Osheequi imatacaaquaena Tasorentsi
noquemisantacaajeitiri itsipapee atiri
anta otsipapeequi nampitsi.

⁵Ari icatiayetanaca aparopee variseo,
quemisantatsiri inaveta iriori. Icanti:

—Aitaque incanteari intoyeantea
itsipapee atiri. Ocameetsati antsoteaquero
isanquenareni Moishishi, maaroni.

⁶Ari impoiji yapatojeitanaja aisati
iroamereni Quirishito, quenquetsatacaan-

tatsiri, maaroni. Icoajeitaque iriotanaque
paitarica incanteriri antioquiasati.

⁷Osheequi yoametavacaajeitaca. Impoiji
icatianaca Petero, icantajeitiri:

—Noyemisantaririnte. Peerani
icoyeaquena Tasorentsi, piojeitaquero:
tempa pineacojeitaquena. Aitaque
icoyeaquena noncamantajeiteri pashini-
sati atiri jaoca incanteari inquemisant-
tajeari, iravisacotantajeari. ⁸Tempa irio
Tasorentsi iotirori aquenqueshirejeitiri.
Iriotaque tianquiniriri itsipapee atiri
Ishire, ayojeitancari yavisacojeitaji.

Tempa meeca iquempejeitaquee arori.
⁹Queario, aitaque amoncarajeitacari
iriori. Tempa aisati icanti Tasorentsi:
“Pimoncaratavacaajeitaca”. Iquemisanta-
que itsipapee atiri, irosati yoameetsashi-
reantajariri. ¹⁰Meeca, ¿picoaquempa
pincanteri Tasorentsi: “Te pioteji”? Jero
oca picoaque pimpomerentsitacaasano-
teari ayemisantaririnte. Arojeitaque jorio,
amejeivetaro, iro cantaincha te amateroji
antsoteajeitero, aisati maaroni ashani-
cani, te irimajeitero. ¿Jaoca incanteari
itsipapee atiri irimatantearori? Osheequi
opomerentsitaca. ¹¹Ineshinoncatajee
Jesoquirishito, irootaque avavisacotanta-
jari. Tempa maaroni ashirejeitaro oca.
Aisati irishiajeitajee arori itsipapee atiri.

¹²Imajerejeitanaque maaroni apatojei-
tainchari. Iquemisantajeitavaqueri
Verenave, aisati Pavoro. Icantiqueri:

—Imatacaaquaena notasoncacoventiri
itsipapee atiri. Imatacaaquaena caari
ineapinijeiti, irootaque iojeitancari
queario Tasorentsi ini Jesoshi.

¹³Impoiji imajeretanaque apatojeita-
chari. Impoiji aisati iquenquetsati
Santiago, icanti:

¹⁴—Noyemisantaririnte, pinquemisanta-
tena. Iquenquetsatacaimpi Shimo jaoca
icanta Tasorentsi intantajarori ineshinon-
cajeitajiri pashinisati atiri. Aitaque
icoyeaquera iquenquetsatacotantajariri.

¹⁵Omoncarataca oca isanquenatitacaniri camantantatsiniri pajitachaniri Amoshi. Isanquenatini: ¹⁶⁻¹⁸“Icantí Avincatsarite: ‘Coajica nompiapaa je quipatsiqui, novetsicapaajero aisati inampini Iravirini itireevetacari. Novetsicajero aisati maaroni pancotsi. Nocoaque iraventajeitená maaroni itsipapée atiri, nocoaque inquemisantajeitena’. Irootaque icantiri Avincatsarite, vetsiquirori peerani maaroni timajeitatsiri”. ¹⁹Irootaque nocantantacari nainti te oncameetsateji ampomerentsitsacayeari yora pashinisatipee atiri. Iquemisantiririca Tasorentsi, moncarataca. ²⁰Iro cantaincha, tsame ampacanteri sanquenarentsi. Ancamanteri oca: “Paamaventearo yovetsicane atiri ijitasorentsitsashitari: amatavitashi-jeitimpicari. Eiro pineavintsatirotsi tsinane caari pai. Eiro poaritsi ampitsiita-chari, poacotarocari ivatsa iriraja”. ²¹Tempa maaroni saavarroqui, ariorica yapatotapinijeita ajorioririnte, icantani itsaneapinitacaro oca nocantimpiri: tempa itsaneajeitacaroni peerani Moishishi. Eirorica yantajeitiro oca, ari ocameetsati iraacameetsajeiteri ashinan-capee.

Irootaque icantaqueriri Santíaco. ²²Ari onimojeitaqueri maaroni quemisantajeitsiri, icanti:

—Cameetsataque. Irootaque ancamanteriri antioquiasati.

Ari icoyeajeitaqueri apite jivatacaaajeiti-ri quemisantatsiri: Jorashi Varasavashi, aisati Shirashi. Icantaqueri:

—Avirojei oijajeiterineri Pavoro aisati Verenave anta Antioquiaqui. Pincamanta-paaqueri ayemisantaririnte nocantaqueri aisati pimpapeeri sanquenarentsica.

²³Jero oca ocatiri sanquenarentsi isanquenatiniri: “¿Ainirompi noyemisantaririnte? ¿Tecatsimpa oyempine? Aca Jerosarequi nocarajeitiri iroamereni Jesoshi aisati itsipapée quenquetsata-

caantatsiri. Meeca nosanquenajeitimpido caari joriotatsi, savicajeitatsiri anta Antioquiaqui, Shiriaqui, aisati Shirishiaqui. ²⁴Noquemacotaqueri yora nocarajeitvetari: oshequi iquenquetsatacaamem-peaquempi, icomitacaaqueMPI. Icantashi-retacaaqueMPI. Te naro tianquerine. ²⁵Aitaque onimojeitaquena maaroni narori nontianquemppiri yoca nocoyeaqueri. Intsipatanaqueeari Verenave, jeri Pavoro: yoca nonintane. ²⁶Iriojeitaque caari tsaroatsi incamimenteri Avincatsarite Jesoquirishito. ²⁷Nontianquemppiri Jorashi, jeri Shirashi. Incamantasanotem-piro iriori oca nosanquenatimpido. ²⁸Ari onimotaquero Ishire Tasorentsi, aisati onimotaquena narori noncamantempido oca. Eiro noperanatimpitsi, irointi apatiroti pimatero oca. ²⁹Eiro poaritsi yora yoyeevetacanariri yovetsicane atiri: caari oni Tasorentsi. Eiro poacotarotsi ivatsa iriraja. Eiro poaritsi ampitsiita-chari. Ariorica poyeari, oshequi inquenqueshretanaque joriopee. Eiro pineavintsatirotsi tsinane caari pai. Ariorica pimayetaquero oca, cameetsataque. Ari cameetsa pintimajeite”. Irootaque isanquenatiniriri antioquiasati.

³⁰Ari ijajeitanaque Antioquiaqui yora itianquiri. Yapatojeitapaacari quemisantajeita-tsiri, ipapaqueri sanquenarentsi. ³¹Ineanajei-tavaquero, irosati iquimoshirejtantanaca.

³²Irisati camantantatsiri iriori Jorashi, aisati Shirashi. Oshequi iquenquetsatacaapaaqueri iquimoshiretacaapaaqueri, iquemisantacaasa-nojeitapaqaqueri. ³³Osamani isaviquimotaitiri, impoiji ipianaja aisati Jorashi. Yovetsatavajari yora iyemisantarinrepeee, icantavajiri:

—Cameetsayea pijataje.

Irosati ipiantanaja anta itiminta tiancaqueriri.

Yapiitajiro iquenaquenayetaji Pavoro.

³⁴Irinti Shirashi icoaque irisavicanaje Antioquiaqui. ³⁵Irosati isavicanapapaaca

Pavoro, jeri Verenave. Yoametantanaque, icamantantanajiro irineane Avincatsarite. Itsipajeitacari aisati oshequi pashinipee, icamantantajeiti. ³⁶Pashini quitateri icanti Pavoro:

—Verenave. Tsame aneajanteri aisati ayemisantairinte anta maaroni nampitsipeequi: yora peerani acamantajeitaitiri irineane Avincatsarite. Amenajanterita jaocarica icantajeitacari.

³⁷Icoaveta Verenave iraanajerime aisati Joa. Ipajiyetiri aisati Maricoshi. ³⁸Iro cantaincha Pavoro, icantaqueri:

—Peerani anta ajatantacari Pampiriaqui, yojocanaquee. Te intsipatanaqueeji anta aquenquetsatinta. Eiro meeca aanajiritsi.

³⁹Ari ipiatsatasanotavacaaca, irosati inijantareavacantanaca. Yora Verenave, yaanaqueri Maricoshi. Itetanaca pitotsiqui, ijataque Tsipirequi. ⁴⁰Irintquea Pavoro, yaanaqueri iriori Shirashi. Icantajeiti quemisantatsiri:

—Novincatsarite, pineshinchoncajeiteri yoca, quiso poanaqueri cameetsa.

⁴¹Ari iquenanaque Shiriaqui, aisati Shirishiaqui. Anta iquemisantacaasanojeitaqueri quemisantatsiri.

16 ¹Impoiji yareetapaaja Terevequi, aisati Irishitaraqi. Itimaiti anta quemisantatsiri pajitachari Timoteo. Irootaque irinirontari jorio. Irompa irinti iriri, te irijorioteki. Quemisantatsiri oni iriniro. ²Icantajeiti quemisantajeitatsiri anta Irishitaraqi aisati Iconioqui:

—Icameetsati Timoteo.

³Icoaque Pavoro intsipatanaqueeari. Iotacojeitiri joriopee iriri, caari ini jorio iriori, icantantariri Timoteo:

—Ariorica pintoyeantea, iraacameetsajeitempi jorio.

Icantiri:

—Ari.

Ari yaanaqueri, itoyeantimentanacari joriopee, timayetatsiri anta nampitsipee-

qui. ⁴Impoiji iquenantanajari nampitsipeequi, yoamejeitaqueri maaroni icantayetiri jerosaresati: yora iroamere Jesoshi aisati jivatacaajeitiriri quemisantatsiri. Icantiri:

—Ariorica inquemisanteri itsipapee atiri Quirishito, eiro acantirtsii: “Pimpeaja jorio”.

⁵Ari iquemisantacaasanotaqueri maaroni quemisantatsiri. Maaroni quitateripee aiquero ijatatiimi yoshequia-sanotanaque.

⁶Iquenanaque Jirijiaqui, Carashiaqui. Tempa ocanitacari Ishire Tasorentsii:

—Eiro picamantantitsi anta Ashiaqui.

⁷Yareetanaca Mishiaqui, ari icoavetaca irijateme Vitiniaqui. Iro cantaincha aisati te oshineteriji Ishire Jesoshi. ⁸Iquenanaque Mishiaqui, irosati yoirincantanaja Toroarequi: ari noneavaquerir narori.

⁹Tsiteniriqui imishitacari Pavoro aparo maseroniasati. Icatiimotapaacari, icantasanotapaqueri:

—Pimpoque aca Maseroniaqui, pintacojeitea.

¹⁰Irosati nocoantanaca jaoca nonquen-tanteari nareetanteari Maseroniaqui. Niotanaque itiancaquena Tasorentsii anta noncamantanteariri savicajeitatsiri jaoca incantajeiteari iravisacojeitantzeari.

Ijati Pavoro Eropaqui.

¹¹Anta Toroarequi notejeitanaca pitotsiqui. Aacotanaquena tampea Samotorashiaqui. Oquitaitetamaque aisati novaamanaja Neaporishiqui.

¹²Novaanaja aisati Jiriposhiqui. Irootaque intapaarori nampitsi Maseroniaquiniri. Inampitapaaro meeca poneachari Oromaqui. Ari notimajeitapai aparopee quitateri. ¹³Ari saavarroqui nosoquijanaji omoroqui tantorentsii shoncarori nampitsi, nojatanaque anta otsapijaqui eni. Naamaapaacari aitaque anta iquenquetsatacapinitiri joriopee

Tasorentsi. Nosavicapaaque, noquenquetatacapaquaquero tsinanepee apatojeitainchari.¹⁴ Otimaiti aparo quemavaquenari pajitachari Iiria. Oponeanaca peerani nampitsiqui anta Tiatiraqui. Irootaque quemisantiriri Tasorentsi. Opimantapiniyetiro tocoya quisaaripee. Iotacaquaquero Avincatsarite oquemisantavaquaquero icantayetiri Pavoro.¹⁵ Ovaotisataca, otsipajeitacari maaroni savicajeitatsiri ovancoqui. Ocantasanoquena:

—Ariorica piotaquena noquemisantsanta-notiri Avincatsarite, pijajeite novancoqui, pisaviquimotanaquenatsatsa.

Ari ocoacaquaquena, irosati nocantancari:

—Tsamequeti.

¹⁶ Ari nojajeitanaque anta iquenquetsatacapiniyeetirinta Tasorentsi. Otonquio-tavaquena namparentsi, iotacairo camaari. Iotashita, oquenquetsatacotitaro paitarica tequeratsita oneeroji. Irootaque yaantayetacari oshequi quirequi yora nampitarori. Icantapinitiri atiri:

—Pincoauerica pinquemero, pimpinatena.

¹⁷ Ari oijajeitanaquena. Ocajemi, ocanti:

—Yoca shirampari, iriojeitaque quemisantiriri Tasorentsi, yora jenoquiniri catsini. Incamantajeitempi jaoca pincanteari pavisacotantajeari.

¹⁸ Aitaque ocantapinita maaroni quitaiteriqui. Ishemanacaro Pavoro, ipitsocashitanacaro, icantanaqueri camaari:

—Iriotaque Jesoquirishito noquemisantiri, irootaque nocantantimpiri: pojocanajero.

Irosati yojocantanajaro.¹⁹ Iotanaque yora nampitarori, icantaniroti:

—Eirove, tecatsi ancantajea meeca aantajeariri quirequi.

Irosati yaantacari Pavoro aisati Shirashi, tapi. Inoshicanaqueri nampitsiqui, nianqui: anta itiminta pincatsarita-

tsiri.²⁰ Yaanaqueri pincatsariqui, icantapaquaqueri:

—Iquenqueshiretacaajeitaquena maaroni savicajeitatsiri aca anampiqui. Tempa jorio ini iriori.²¹ Icamantacotiro oca yameyetacari iriori. Te oncameetsateji anquemisantavaquaquero icantaqueeri, te oncameetsateji ameyetearo. Tempa ashanincajeitacari arori oromasati.

²² Iquisajeitanaca maaroni apatojeitainchari, irosati icantantari comantanti:

—Pisapoquieri iitsaare Pavoroca, jeri Shirashica; pimpasatsempequijeiteri.

²³ Oshequi ipasanataqueri, impoiji yoiminqueaqueperi caravosoqui. Icantana-notiri catsini yora shentiriri:

—Cameetsayea pishentasanoteri, ishiacari.

²⁴ Iquemaquero oca icantasanotaqueriri, yoiminqueaqueperi. Aisati itsinacaquitaqueri inchatoqui.²⁵ Nianquiite tsiteniri, ari iquenquetsatacaajeitiri Tasorentsi, ipampoyeaventajeitaqueri. Iquemisanta-jeitiri itsipapee yoiminqueeyetiri.

²⁶ Omapocashitanaca onicanaca quipatsi, aisati onicanaca pancotsi, jero maaroni otincamipee, nica, nica, nica. Intsipaite ashitareajeitanaca ashitacorontsipee. Irosati onijantareantanaca tsinacaquive-tacariri iitiqui.²⁷ Itinaanaca shentiriri. Inequero ashitacorontsi, ashitareajeitanaca. Ijishavetaca shiajeitanaca yora yoiminqueajeitiri, irosati yaantanacaro isavirite, irovetanaincha iroashitana-jeame irisati.²⁸ Ari intsipaite icajemacotaqueri Pavoro:

—Eiro poashitajatsi avisati. Irosati nocantajeita maaroni aca, te noshiyeji.

²⁹ Icantiri variria inampire:

—Pamaquena tsionmentotsi.

Ari yamaqueneri, irosati iqueantanaca anta yoisovetacarinta. Ipioncanaque, itiyeroimotapaacari Pavoro, jeri aisati Shirashi.³⁰ Impoiji yaanaqueri saiteriqui. Icantiri:

—Noshaninca, *čjaoca noncanteari*
narori navisacotantajeari?

³¹Yacanaqueri:

—Pinquemisanteri Novincatsarite
Jesoshi, iroavisacotantajempiri. Aisati
inuempejeiteari maaroni pishaninca.

³²Icamantasano tiri irineane Tasorentsi.
Aisati ishanincaphee iriori, icamantajeitiri.

³³Irosati osaite yaantanacari, iquivayeta-
jiniri oca yaaveaqueri ipasanataqueri,
impojii yaavintajiri. Irossati ivaotisatan-
taja, icarajeitaqueri maaroni ishaninca.

³⁴Ari yaanaqueri ivancoqui, yoacaapaa-
cari. Iquemisanteri Tasorentsi,
irotaque iquimoshirejeitantanacari
maaroni ishaninca.

³⁵Ari oquitaitamanaji, jeri yora
pincatsari itianquiri variria:

—Pijate caravosoqui, pincamantaiteri
iroimisoquijajeri quemisantatsiri.

Ari ijataque, icamantapaquaqueri
shentiriri:

—Pintiancajeitajeri irijatajeta.

³⁶Irosati icantantajari iriori:

—Icantajana pincatsari nontiancajemp.
Meeca pisoquijanaje, cameetsa pijataje.

³⁷Iro cantaincha icantiri Pavoro:

—Jampa noshanincatacari oromasati.
Te irisampitacoventenaji pincatsari, te
irioteji ainirorica nantane. Ipasatacanta-
shitaquena, aisati yoiminqueacantashita-
quena. Tempa ineajeitaquena maaroni
savicajeitatsiri yoashinoncaaquea:
ijijeiveta ainiro nantane. *¿Ariompa*
meeca irimanaquero iroimisoquijacanta-
jena? Tempa eiro. Impoqueta iriori,
irotsitaquea oimisoquijajantene
iriojeitanteari ashanincaphee tecatsi nante.

³⁸Ari ipianaja variria, icamantapaajiri.

Intantacari pincatsari ishanincatacari Pavoro
oromasati, ari itsaroanaque. ³⁹Ipocapaaque,
cameetsa iquenquetsatacapaaqueri. Irosati
yoimisoquijantapaa jari:

—Meeca pijataje, pojocanajero
nonampi.

⁴⁰Ari isoquijanaji, iquenanaji ovanco-
qui Iriria. Ineapairi ayemisantaririnte,
icantapaaqueri:

—Cameetsaya pintimajeite.

Irosati yovaantanaja pashiniqui
nampsitsi.

17 ¹Iquenanaque Pavoro Antipori-
shiqui, Apornoniaqui, irosati
yareetantaca Tesaronicaqui. Ari anta
otimi pancotsi yapatotantari jorio,
²irosati iqueantapaaca. Aitaque
icantatiani yametapinitaro iquenquetsata-
caapinijeitiri jorio. Ocarati mava saavaro
yoamejeitiri ocantayetiri Sanquenarentsi.
³Ari yoametasanotapaquaqueri. Iotacaasa-
notaqueri, icantiri:

—Aitaque ocantitani Sanquenarentsi:
“Irineacatsitaquearo yora Quirishito.
Incamaque, irosati intinaantajeari”. Irio
nocamantacotiri Jesoshi, irotaque
Quirishito.

⁴Iquemisantavaquero aparopee icantaque-
riri, irosati yojajejitanacariri Pavoro, jeri
Shirashi. Aisati iquempejeitaca oshequi caari
joriotatsi, quemisantatsiri: yojajejitanaqueri
Pavoro. Aisati oquempetaca iroori tsinane,
ishanincaphee pincatsaritatsiri. Oquemisanta-
jeitake. Te aparopee one iroori. ⁵Ari
oshequi iquisanaca jorioppee, yapatojeita-
queri caari cameetsajeitatsi, aisati perayeta-
chari. Iquisacaajeitacari timajeitatsiri
nampsitsi. Ijajeitanaque ivancoqui Jaso,
icoajeivetapaa cari Pavoro, jeri Shirashi.
Icoavetaca iraanaquerime anta yapatojeita-
canta atiri, inquisajeiterime. ⁶Te irineapee-
riji, irinti inoshicasitanaca Jaso, jeri
aparopee quemisantatsiri aisati. Yaanaqueri
anta savicacaantatsiri qui. Icajemaitepaa-
que:

—Jeri yoca quisacaantajeitaqueriri
maaroni savicajeitatsiri. Jeri yoca Jaso
aacameetsataqueriri. ⁷Yoametantajeiti,
icanti: “Eiro pimoncaratinirtsí Sesari
icantimpiri. Timatsi pashini pincatsarita-
tsiri, yora Jesoshi”.

⁸Ari iquemantavacarori oca, iquisajeitana naca atiripee, aisati yora savicacaanta-tsiri. ⁹Icantanaque Jaso, aisati itsipapee:

—Jerica quirequi: pinquempoyejenari piotantenari eiro noshiapitsatimpitsi, tecatsi nante. Ontimerica nantane, ari paasanoterita noirequite.

¹⁰Irosati itiancantajari. Ari otsitenitana que. Itiancajiri Pavoro aisati Shirashi. Irio tiancajiriri ayemisantairintre. Yovaanaca Vereaqui. Yareetantapaacari, irosati ijatantapaaca yapatotapinitanta jorio.

¹¹Irio irinti cameetsatasanotantsiri, te irishiyerji yora tesaronicasati. Icoasano-taque inquemisantero Sanquenarentsi. Ineanatapinitiro maaroni quitaiteriqui iriotanteari queariosanorica oca icantaqueriri. ¹²Oshequi iquemisantajeitaque iriori. Oquemisanti tsinanepee caari joriotatsi, ishanincapée pincatsarita-tsiri, maaroni. Aisati iquemisanti shiramparipee, te aparo irine: oshequi catsini. ¹³Ari icamantantiro Pavoro irineane Tasorentsi anta Vereaqui. Iotacotaqueri joriotatsiri, yora tesaronicasati. Ipocapaaque iriori, iquisacaapaacari atiri, icantashiretacaqueri. Icantiri:

—Eiro piquemisantajeitirtsí Pavoro, irointiquea pinquisajeiteri.

¹⁴Yora quemisantatsiri intsipaite itiancaqueri Pavoro anta incajarequi. Irinti savicanaintsi Shirashi, jeri Timoteo.

¹⁵Ainiro aanaqueriri Pavoro anta Atenashiqui. Icantavajiri Pavoro:

—Ariorica pareetajea pinampiqui, pincamantapaajenari Shirashi aisati Timoteo intsipaite impocajeta.

Ari ijatanaque, icamantapaajiri.

Yantayetapairi Pavoro anta Atenashiqui.

¹⁶Ari yoyeapaajiri Pavoro anta Atenashiqui. Irio yoyeapaajiri Shirashi aisati Timoteo. Ineapaquiero anta nampitsiqui oshequi catsini yovetsicashiyetari ijitasorentsitashiyetari, irosati

yoashiretantanaca. ¹⁷Aisati anta Atenashiqui oshequi yoamejeitiri joriopee aisati caari joriotatsi: yora quemisantajeitiri Tasorentsi. Oshequi yoametavacaa-jeitaca. Aisati iquempetacaapinitacari maaroni atiri anta nampitsiqui nianqui.

¹⁸Yoametapaqueri coapinitatsiri iringe paitaricapee, icarajeitiri iroamereni Epecoreo. Aisati icarajeitiri caari intacotacha irisati: yora icanteetiri eshitoico. Yora Pavoro icamantacotiri Jesoshi, aisati icanti:

—Intinaaje camajeitatsiri.

Icanti aparopee quemavaqueriri:

—¿Paita icantaqueri yoca neaveetashitachari?

Icanti pashini:

—Icamantacotiri pashinisati tasorentsi-tatsiri.

¹⁹Yajiricaqueri, yaanaqueri anta yapatotapinjeitanta, icantajeitiri:

—¿Cameetsampa niotero oca iroaque-ratatsiri poametantiri? ²⁰Te nonquemapi-niteroji oca picantaqueri. Nocoajeiti niotero jaoca ocantacotari oca.

²¹Aitaque icantari atenashisati: te intsameeteji, irointi icoaque inquemisan-tashiteari quenquetsatacacjeitiriri iroaqueyetatsiri caari iquemapinijeiti. Aisati iquempejeita poneayetachari paricoti, iquenquetsatacotashiyetaro paitapeerica. ²²Anta icatiaca Pavoro nianqui, icantiri:

—Atenashisati. Niotacotaquempi avirori, pashi poiro piquemisantayeveta. ²³Anta noquenaquenayetinta noneayetaquero oca piquemisantashiyetari. Aisati noneapaa-quero anta poapinitiniri pitasorentsite paitaricapee. Ainiro osanquenataca, ocanti: “Anquemisanteariri tasorentsitatsiri caari ioyeeti”. Yora caari pioti: piquemisantashi-tari, irotaque yoca noncamantempiri.

²⁴Yora Tasorentsisanori, irotaque vetsiqui-rori quipatsi. Yovetsicajeitiri maaroni timantajeitarori. Irotaque vetcicayetirori

inquite aisati quipatsi. Te irisavicatearoji ora pancotsi yovetsiquiri atiri.²⁵ Aroquea ainti, tecatsi ancanteri intacajeiteari. ¿Ariompa incoanaque intacotearine? Tempa iriotaque oaneajeiteeri, intacajeiteeri irinti. Tempa iriotaque paqueerori maaroni, paitaricapee.²⁶ Aparoni yovetsicavetaca peerani, iriotaque intanacaroniri; meeca ashequiaeitanaque, atsoteajeitanaquero maaroni quipatsipee. Iriotaque Tasorentsisa-nori cantatsiri jaocarica irisavicateiteri maaroni atiri, aisati jaocarica oncarate intsoncajeitanteeariri; iriotaque cantacantirori.²⁷ Itimacaajeitaquee ancoanteari ayojeiteri, aisati aneantajeariri coajica. Iro cantaincha, te irarejiteji.²⁸ Iriotaque ovaneajeiteeri. Iriotaque shevatacaajeiteeri. Iriotaque timacaajeiteeri. Tempa aitaque icantitani pishaninca pampoyeapinitatsiri: “Arojeitaque itimacaane Tasorentsi”.²⁹ Arojeitaquerica itimacaanepee Tasorentsi, te oncameetsateji meeca ashiacanteri oro, perata, mapi, yovetsicanepée atiri. Aisati eiro ashiacantiritsi paitarica iquenqueshire-tiri atiri.^{30,31} Peerani te irioveiteani ashanin-caní, ari tecatsi incantimenteri Tasorentsi inquishimenterini yantajeitiniri. Iro cantaincha ioti irinti jaoca oncarate incantacoventanteariri maaroni atiripee. Timatsi shirampari pajitachari Jesoshi, icamasanovetaca. Impoiji itinaajiri Tasoren-tsi, iotantajeitariri maaroni atiri. Ipeaqueri iriori cantacovenantatatsineri. Cameetsa incantacoventante. Irootaque icantantajeita-riri atiri meeca: “Pinquenqueshirejeitana-quea, paventajeitari Tasorentsisanori”. Aitaque icantajeitiri maaroni atiri, jaocarica isavicateitiri.

Irootaque icantiriri Pavoro.

³²Ari iquemantajeitavacariri icanti: “Itinaanaja camavetainchari”, ainiro shirontimentaarantacariri; iro cantaincha icantanaqueri pashinipee:

—Coajica pashini pampiitajenaro oca aisati.

Irosati ijatantanaja Pavoro.^{33,34} Itimaa-rantaque quemasantavaqueriri, irosati yojatantanacari iriori. Ipajita aparoni quemisantatsiri Tionishio: iriotaque pincatsaritsiri anta nampsitsqui, icarajeitiri ivincatsaririnte yoametavaca-jeitaca. Aisati oquemisanti tsinane pajitachari Tamarishi. Icaratiri aisati itsipapee quemasantajeitatsiri.

Icamantanti Pavoro anta Corintoqui.

18 ¹Impoiji yojocanajiro Pavoro Atenashi, yovaanaja anta Corintoqui. ²Anta ineapaqueri joriotatsiri pajitachari Aquira. Pontosati inaveta, iponeanaca meeca Itariaqui. Iroquaera yareetapaaca. Itsipatapaacaro ijina, Pirishira. Iro ipocantacari, yora pincatsari pajitachari Caraorio iquisajeitaqueri jorio savicajeivetachari Oromaqui, itiancajeitaqueri:

—Pijajeite pashiniqui quipatsi, eiro pisavicateititsi aca.

Ari isavicateitapaaque Corintoqui. Impoiji yareetapaaca Pavoro, isaviquimo-tapaqueri. ³Aisati iquempetavacaajei-taca, iojeiti yantiro tocoyapanco. Irootaque isaviquimotantapaacariri, itsipatavacaaca anta yantaveejeiti.

⁴Maaroni saavarroqui yoametavacaajei-taca anta pancotsiqui yapatojeitancari. Iquemasantacaasanojeitaqueri joriotatsiri, caari joriotatsi aisati. ⁵Impoijiquea iponeanaja Maseroniaqui Shirashi aisati Timoteo. Irosati yareetantapajariri. Ineapaajiri Pavoro, iquenquetsati iriori. Icamantapinivetacari joriotatsiri:

—Iriotaque Jesoshi yora Quirishitotsiri aamaajeitaniri peerani.

⁶Ipiatsajeitavacari aisati icantimajeitaqueri, irootaque itequimotantanajariri itsaare iriojeitanteari irotajatsi irijataje. Icantanaqueri:

—Avisati jatacantajanchane anta Sharincaveniqui: te aneeroji nantane

nainti, tempa nocamantavetaquempi. Meecaquea nojatashiteri irinti pashinisati atiri, nonquenquetsatacaajeiteri.

⁷Ari yovaanaja anta, iquenanajiro ivancoqui Tishio Joshi: iringota quemisantiriri Tasorentsi. Isavicanampitiro pancotsi yapatotantapinitari.

⁸Yora Quirishipo iringota quequetsatacaantsiria anta pancotsiqui yapatotantari. Cameetsa iquemisantaqueri Avincatsarite. Aisati iquempejeitaca maaroni savicajeita-tsiri ivancoqui, iquemisantajeiti. Aisati iquempetaarantaca oshequi corintosati. Iquemavaquero irineane Tasorentsi, iquemisantavaquero, irosati ivaotisatantajetaca. ⁹Ari tsiteniriqui ineashitacari Pavoro yora Avincatsarite, iquemaqueri icantiri:

—Eiro pitsaroitsi. Pincamantante, eiro pimajeretitsi. ¹⁰Quiso noaquempi. Aca nampitsiqui, tempa icarati oshequi quemisantanari. Tecatsi incanteetempi iroashinonqueetempi.

¹¹Irosati isavicananaca aparo osarintsi, oquimojantsivetaapaaja aisati. Yoamejeitaqueri corintosati irineane Tasorentsi.

¹²Ipincatsariventanti meeca Cario acayasati. Irosati jorioopee iquisantanacari Pavoro. Yaanaqueri anta itiminta oametavacainchari. ¹³Icantapaaqueri:

—Jeri yoca shirampari, icantanirotiri atiri: “Pinquemisantajeiteri Tasorentsi”, iro cantaincha icantashitacaro irineane Tasorentsi.

¹⁴Irovetanaincha irineaveetanaqueme Pavoro, ari yora Cario icantiri joriotatsiri:

—Aviro joriyetsatsiri, pashereajeita-quena. Irooricame iranterome yoca caari cameetsatatsi, irooricame iroanteme, aitaquemequea oncameetsateme pamaquerime aca. ¹⁵Jero meeca picantavacainmentacaro oca yoametantiri. Picantavacainmentacari atiripee. Picantavacainmentacaro Sanquenarentsi. Aviroyeate. Oshequi pashereajeitaquena: eiro pipocashitanatsi. ¹⁶Pijanirojeitaje.

Ari ijajeitanaji. ¹⁷Yora atiripee yaajeitaqueri Soshiteneshi, shepi; ipasanajeitaqueri, tac, tac. Yora ipasataqueri iringota quequetsatacaantsiria anta pancotsiqui yapatotantari. Ineacovetacari Cario ipasajeitaqueri, iro cantaincha tecatsi oncantimoneentanaqueari, tecatsi incantajeiteri.

¹⁸Oshequi quitaiteri isavicanaji Pavoro, impoji ijatanaji, yojocanajiri ayemisantairinte. Itetapaaca pitotsiqui, aacotanaqueri tampea Shiriaqui, icantanaca, shiririri. Itsipatanacaro Pirishira, jeri ojime, Aquira. Timatsi icashiacaaquerirri Pavoro Tasorentsi, irootaque yameetantarori iishi anta Senquereshiqui. ¹⁹Yareejietantanacari Ejesoqui, ari yojocanajiri itsipataniri. Yovaanaja apaniro Pavoro anta pancotsiqui yapatotapinitanta jorio, iquenquetsatacaapaquaqueri. ²⁰Icantajeivetavacari:

—Osamanita pisavicanaquetsita, poamejeitena.

Iro cantaincha te incoyeji iriori.

²¹Icantanaqueri:

—Oshequi noshiretanaca meeca, iro cantaincha, ariorica incoacaquena Tasorentsi, nompiaje, coajica.

Irosati itetantanaja aisati pitotsiqui, aacotanaqueri tampea, icaantanaca aisati shiririri. ²²Yareetapaaca Sesareaqui, irosati yovaantanaca Jerosarequi, iquivantapaaqueri ayemisantairinte. Impoji yovaanaja aisati Antioquiaqui, iponeanaca peerani.

Mavatapaaque iquenayetaque Pavoro.

²³Osamani isavicanaque Pavoro Antioquiaqui, impoji ijataji aisati. Iquenayetanaque Carashiaqui, aisati Jirijiaqui. Yoametasanojeitaqueri maaroni quemisantatsiri.

²⁴Yareetaca Ejesoqui jorio pajitachari Aporo, arejantiriasati ini. Cameetsa iquenquetsatapiniti, iotasanoliro Sanque-

narentsi.²⁵ Icamanteetiri jaoca icantaniri Joani, aisati jaoca ocantari maaroni iquenquetsatacotiriniri Jesoshi, iro cantaincha tequera inquemacotasanotero maaroni yantayetiri iriori Jesoshi. Itsoteasanotaquero yoametantiro maaroni ioyevetari.²⁶ Ari iquenquetsatacotasano-tiro anta pancotsiqui yapatojeitancari. Te intsaroyeji, cameetsa iquenquetsati. Iquemantavacari Aquira, jero Pirishira, icantiri Aporo:

—Nocoaque nonquenquetsatacayempi apaniro.

Icanti:

—Ja, tsamequeti.

Ari apaniro itsoteaqueneri, yoamejeita-queri jaoca icantari Jesoshi, aisati jaoca ancantajeiteari ajajeitancari anta Tasorentsiqui.

²⁷ Impoiji icanti Aporo quemisantajeita-tsiri:

—Nocoaque nojate meeza Acayaqui, noamejeiteri savicajeitatsiri anta.

Ari icantajeitavaqueri:

—Cameetsataque pijate, poamejeiteri cameetsa. Jeroaca sanquenarentsi paajeita-naqueneriri.

Jero oca isanquenatavaqueneriri iyemisantarinirenta anta: “Paacameetsajeitavaqueriye Aporo, pinquemisantajeita-viqueru”.

Ari peerani ineshinoncatitacari Tasorentsni acayasati, irootaque iquenquetsatacantajari. Meeca, yareetancacari Aporo, oshequi intacojeitapaaacari.

²⁸ Yoametasanotiri iotasanolantajari. Iquemajeitiri atiri yoametantiro Sanque-narentsi, icanti:

—Iriotaque Jesoshi oquenquetsatacotiri Sanquenarentsi, iriotaque Quirishitotatsiri.

Ijataque Pavoro Ejesoqui.

19¹ Isavicaque Aporo Corintoqui, iriori Pavoro iquenanaque toncaariqui, yareetapaaca Ejesoqui.

Ineapaaqueri aparopee quemisantatsiri.

² Icantapaaqueri:

—Peerani, piquemisantajeitancari, ipaashiretaquerompa Ishire Tasorentsni?

—Te. Te nonquemacoteroji.

³ —¿Paita pivaotisatimentari?

—Novaotisatimentari Joa.

⁴ Ari icantiri:

—Ariorica iquenqueshiretanaca atiri, ivaotisatiri Joa iriotanteariri atiri te incoyeji irampiitapinitero caari cameetsatsati, irointi icoaque inquemisanteri Tasorentsni. Tempa icantitarini: “Pinquemisantajeiteri yora impoitapeenane, iriotaque Jesoshi”.

⁵ Ari iquemantajeitavacarori oca, ivaotisatimentajeitanacari Avincatsarite Jesoshi. ⁶ Yajiricainataqueri Pavoro itoqui, irosati opocashitancari Ishire Tasorentsni, ineaveetantajeitanacaro pashinipee neantsi, icamantantajeiti.

⁷ Aamaaca icarajeiti 12 shirampari vaotisajeitainchari.

⁸ Ari ijatapiniti Pavoro pancotsiqui yapatontari, icarati mava cashiri iquenquetsatacantayetaque. Te aneerieji tsaneacotearine. Oshequi icamantacota-queri Tasorentsni, jaoca icanta ipincatsari-ventanti. Impoiji oshequi yoametavaca-jeitaca. ⁹ Aparopee, te aneeroji iquenque-shireantari, te incoyeji inquemisante. Icantajeitiri yora atiripee:

—Te oncameetsateji oca yoametantiri Pavoro.

Irosati yojocantanajari Pavoro, yaanaqueri quemisantajeitatsiri. Iquenquetsatacapi-nitiri maaroni quitaiteriqui anta yoametanta-pinitinta Tirano. ¹⁰ Icantatiani apite osarintsi, irootaque iquemantacarori maaroni ashiasati irineane Avincatsarite. Iquemajeitaquero: jorlopee, caari joriotatsi, maaroni.

¹¹ Itasoncantayeti Pavoro, imatantarori caari aneapiniti. Irio matacairiri Tasorentsni. ¹² Ipamititiri atiri ivaniote Pavoro, aisati yoicoro, irosati yavisacotantajari.

Aisati iriori mantsiari, yaanaqueneri, yoavisacotajiri. Aisati yoavisacotajiri neiriri camaari.^{13,14} Ainiro anta jorio, quenaquenayetatsiri, oavisacotapiniveta-riri neiriri camaari: iriojeitaque itomipee Esheva, icarajeiti 7. Jorio ini Esheva, ishanincatacari saserote. Ineajeivetacari Pavoro yoavisacotiri neiriri camaari. Icoajeiveta inquempetearime, icantashi-tantariri itsipa camaari:

—Ainiro Jesoshitatsiri iquenquetsataco-tiri Pavoro. Iriotaque amitacotanari noavisacoteri yoca neaquempi.

Pojocanajeriqueti iravisacotantajeari.

¹⁵Yacanaqueri camaari:

—Noneiri Jesoshi. Noneiri Pavoro. Irompa avinti, te noneanirotempiji. ¿Paita nonquemisantantempiri?

¹⁶Irosati imitajashitantanacari, mita; yantapaaqueri apitero. Imataqueri, irosati ishiatsempequijeitantanaca, yojocana-quero pancotsi. Oshequi yoatsinaqueri.

¹⁷Iquemacojeitaqueri maaroni ejesosati: jorio, caari joriotatsine, maaroni. Itsaroajeitanaque aisati icantajeitaque:

—Icameetsati Avincatsarite Jesoshi: imatacairy quenisantasanotiriri yoavisa-cotiri neiriri camaari. Iranti shemetatsiri, tecatsi matacayerine.

¹⁸Impoiji ipocapaaque oshequi quenisantatsiri, icantajeitapaaque:

—Ainiro nantayetiro caari cameetsata-si, nocoaque iroameetsatena Tasorentsi.

¹⁹Oshequi sheripiaritsiri yamayeta-quiero sanquenarentsi yashiyetari: irootaque oamejeitiriri isheripiaritantari. Yapatojeitaquero, irosati itaimotantacari maaroni atiri. Icantajeiti:

—Te noncoyeji namatavijeitajeri aisati noshaninca.

Imoncarajeitaquero ovinaro sanquenarentsi, opinajeitaca S/.50,000.²⁰Oshequi iquenacayetanaquero irineane Avincatsarite, aisati itimi oshequi quenisantajeita-vaquerori.

²¹Impoiji ishiretaca Pavoro irijate Jerosarequi, irosati ijatantanaca. Iquenanaque Maseroniaqui, jero anta Acayaqui. Icantitaca:

—Nintanaquearo nojate Jerosarequi, impoiji nojatanaque Oromaqqui.

²²Itiancaque apite amitacotapinitiriri maseroniasatipee: yora Timoteo, jeri Erashito. Iriori Pavoro, osamani itimana-que anta Ashiaqui.

Iquisajeitanaca ejesosati.

²³Te meeca capichaji incantavacaimen-tearo oca acamantacotaqueriri Avincatsa-rite. ²⁴Itiminta vetcicapinitirori perata pajitachari Irimitirio. Ishiacantapinitiro ovanco Aretemisa iquemisantapinijeitan-tarori ishaninca. Ora Aretemisa irootaque ijitasorentsijeitane. Ainiro yora amitacotiriri, vetcicapinitiriri ora pancotsijani-qui; ari ipinatapinitiri oshequi perata, yaajeitantzari oshequi quirequi. Iro cantaincha te meeca iramanantajeroji quenisantajantsiri, irosati iquenqueshire-tantanaca Irimitirio. ²⁵Ari yapatojeitiri maaroni iratiritepee, icantajeiti:

—Antapinijeitiro oca shiacaantsi aajectan-tari airequite oshequi. ²⁶Meeca pineaqueri Pavoro, aisati piquemacotaqueri: yamatavi-jeitiri oshequi atiri, ipashinijeitantajari. Icantanioti: “Caari oni Tasorentsi oca yovetsicayetiri atiri”. Te apatiro iroametante aca: irotaintsi intsoteero Ashiaqui iroametantayete. ²⁷Itseenajeitanaqueecari maaroni atiri, aisati itseenancaquerocari maaroni avetsicajeitiri. Tempa opincatsaro-tasanoti Aretemisa: iquemisantajeivetacaro maaroni ashiasati, jeri maaroni atiri. Ipincatsajeivetaro meeca, iro cantaincha inquemisantajeiteririca Pavoro, irojocaca-jeiteri iquemisantiro.

²⁸Iquemantajeitavacarori oca, iquisajeitanaca. Icajemajeitanaque:

—Opincatsarotasano Aremisa, oca pincatsariventajeitiriri ejesosati.

²⁹Icajemejitanaque savicajeitatsiri nampitsiqui. Ishiaeitanaca maaroni anta yantaveetapinijeitinta. Inoshicajeitanaqueri Cayo, jeri Arishitaraco, sorororo. Maseroniasati ini apite, tsipatapinitariri Pavoro. ³⁰Icoaveta Pavoro iroijatacoven-tanaquerime anta, iro cantaincha te irishineteriji quemisantatsiri. ³¹Ainiro itimi aisati aparopee pincatsaritatsiri, ponechari Ashiaqui, nintiriri Pavoro. Itianquiri ishaninca, camantapaaqueriri:

—Eiro catsini pojatiritsi anta: yoimpi-carri.

³²Icajemejitanaque apatojeitainchari, onashiyetaca icantayetiri. Icajemashijei-tanaca. Te iriojeiteji oshequi paitarica yapatotimentari. ³³Ainiro anta Ariantero, itiancane jorio, isatecaqueri nianqui. Yacotashitanaqueri maaroni atiri, iritanteari icoaque inquenquetsatcaa-jeiterime. ³⁴Iro cantaincha iojeitancarari jorio, icajemapinijeitanaque maaroni:

—Opincatsarotasano Aretemisa, oca pincatsariventiriri ejesosati.

Osamani icajemejitanaque, ishirinca-naca catsirincaiteri. ³⁵Yoimajerentajeitaqueri yora sanquenatapinitatsiri anta nampitsiqui. Impoiji icantajeitiri:

—Noshaninca. Tempa arojeitaque pincatsajeitirori Aretemisa, aisati ashentapinitiro ovanco. Tempa aisati ashentapinitiro oca shiaquerori, pariapaintsiri jenoqui. Ayojeitanaquero oca, ³⁶tecatsi tseenquerone oca nocanta-queri. Cameetsa meeca pimajerejitan-aque. Eiro pishintsitsi panteri yoca shiramparipee. ³⁷Jerica pamaqueri, tecatsi incantero ovanco, aisati te incantimateroji atasorentsitsi. ³⁸Jeri aisati yoca Irimitirio, icarajeitiri pashini antirori perata. Incoauerica incantaco-teri, cameetsa iraanajeri anta savicacaan-tatsiriqui, impoiji iroametavacaajeitea anta. Irijatequeti anta incantacoventava-cayea. ³⁹Otimirica pashini picoaqueri

piote, ari pincanteri coajica yora oameta-vacaachari, irampatojeitajearica. ⁴⁰Jero aca meeca apatojeitaca, aquisatsatavaca-jeitaca. Icamantacotashiteecari aquisajei-taqueri avincatsarite, impoiji tecatsi ancantea ancantacoventajea arosati.

⁴¹Icantantarori oca, itianajeitajiri maaroni apatojeitainchari:

—Meeca aitapaaji, pincatsimareajeita-naje, pijajeite pivancopeequi.

Ijatanaque Pavoro Jerosarequi.

20 ¹Ari imajerejitanaque ejesosati. Impoiji iriori Pavoro icajemejiti-ri quemisantajetatsiri, yoametasanojei-tiri. Impoiji ijatanaji, yovaanaja Maseroniaqui. ²Anta oshequi iquenaquenayeta-naque, oshequi yoametantayetanaque. Irosati yareetantanaca Quireshiaqui. ³Icarati mava cashiri isavicapaaque. Irovetainch intetearome pitotsi irijatan-teameri Shiriaqui. Irosati iotacontacariri jorio, yaimanavetacari iroyerime. Irosati iquenqueshiretantanaca:

—Nompianajeta anta Maseroniaqui.

⁴Ari ijatanaque, icarajeitanaque Sopatoroshi itomi Piro vereasati, Arishitaraco, jeri Seconto tesaronicasati, Cayo terevesati, Timoteo, Tiquico, jeri Torojimo ashiasati, maaroni. ⁵Ijivajeita-naquena Toroarequi, yoyeajeitaquena anta. ⁶Avisanaque quitaiteri yoanteetapi-nitarori tanta caari tapiacha, impoiji noponeanaja Jiriposhiqui, noquenacota-naque pitotsiqui. Ocarati 5 quitaiteri nareetantajari Toroarequi, anta itiminta oyeajeitaquenari. Irosati nosavicana-paaca ocarati 7 quitaiteri.

⁷Otomincotapaaque. Napatojeitaca nocarajajeitaquero tanta noquenqueshire-jeitantajariri Jesoshi icamimentajeita-quee. Iquenquetsatacaajeitanaque Pavoro. Ishiretaca irijatamane, irootaque yosama-nitantanacarori iquenquetsatanaque, vero, vero. Irosati nianquiiteni. ⁸Otima-

que oshequi tsiomentotsi anta napatojeitacanta. Iro napatojeitacari shitamencotsi onta jenoquiniri; mavatapaintsiri, jenoqui anta. ⁹Isavicaque omoroqui yora evancari pajitachari Eotico. Osamani iquenquetsataque Pavoro, irootaque aantapaacariri ivochoquine. Irosati ipariantanaca: iquenaitanaque, sheroo, tirin, anta quipatsiqui. Ari naniireashijetanaqueri, itinayeevetapaaacari; camaque ini, torein. ¹⁰Ari yaniireapaaque Pavoro iriori. Itsentetashitapaaqueri, yavitsanota-paaqueri. Icant:

—Eiro poashiretacotaritsi: aneatsi ini.
Ari itinaanaja, aisatitanaji.

¹¹Ari natajjeitanajji, icarajapaaquero Pavoro tanta, noajeitaca. Impoiji iquenquetsatacaaajiri, irosati oquitaitetantanaja. Irosati ijatantanaja. ¹²Yayeetana-jiri evancari ivancoqui, aneanaji. Te capichaji iroveshireajeitanaquea.

¹³Nojivatanaque pitotsiqui, noquenacota-naque Asoqui; irinti Pavoro iquenana-que avotsiqui. ¹⁴Ari ineapajanari Asoqui, irosati notetantanajariri pitotsiqui. Novaajeitanaja Mitirenequi, nocaanta-naca, shiririri. ¹⁵Oquitaitetamanaji novaanaja aisati. Nomontetacotanacaro Quio. Omavatanaque quitaiteri, irosati anta Samoshiqui. Quitaiteri pashini nareetanaca Miretoqui. ¹⁶Iquenqueshire-taca Pavoro iravishitanaquearo Ejeso, eiro itimaanitapajitsi Ashiaqui. Icoasanotaque irareetitacea Jerosarequi, irimoncaraapeemparo quitaiteri pajitachari Pentecoshiteshi.

¹⁷Itiancaque Ejesoqui, icajemacanta-queri quenquetsatacaaqueriri quemisan-tajeitatsiri anta. ¹⁸Ari yareejitapaaca ejesosati, irosati icantajeitavacari:

—Piotacotasanoquena jaoca nocantari notimimotantajeitaquempi. Iroquerani nareetaca Ashiaqui, aitaque nocantitapaaca, irosatitatsi meeca. ¹⁹Anta oshequi nantaveetapinitiniri Avincatsa-

rite, teyea iro noshemete. Niraacotapini-taquempi. Aisati ocantimoneentaquena anta yaimanavetaquena jorioppe iroyename. ²⁰Notsoteaquero, tempa aitaque nocamantajeitaquempi maaroni oca cameetsayetatsiri. Te nomajeretashi-teaji. Noamejeitimpri anta yapatojeita-canta atiripee aisati anta pivancopeequi.

²¹Nocamantajeitiri jorio, jeri caari joriotatsi, maaroni: “Pinquenqueshirejetanajea piojeitantajeariri Tasorentsi. Pinquemisanteri Novincatsarite Jesoshi”.

²²Ari meecca nojate Jerosarequi, ojataca-naquena Ishire Tasorentsi. Te nioteji jaocarica incanteetenari anta. ²³Apatiro niotaquero oca ocamantaqueuenari Ishire Tasorentsi. Maaroni nampitsiqui ocaman-tapinitana: “Queario iroisoyeetempi, iroashinoncayeeetempi”. ²⁴Te noncoasano-teji noncantaitatiyempani nontime aca quipatsiqui, irointiquea nocoasanotaque nomateneri Avincatsarite Jesoshi paitarica inintacaquaenari. Aisati nocoasanotaque nontsoteeneri oca nantaveetapinitiniriri. Ocameetsati oca nocamantapinjeitimpri: “Ineshinoncajeitaquee Tasorentsi”. ²⁵Niotaque meeca eiro aneavacaajatsi aisati. Nocarajeiveta-quempi, nocamantajeitaquempi jaoca icantari Tasorentsi ipincatsariventanti.

²⁶Irootaque meeca nocamantantimpiori oca. Ariorica iroasanquetarantempi Tasorentsi, te naro oasanquetacantem-pine: tempa nocamantitaquempini peerani. ²⁷Te nontsaroyeji, notsotea-quempi maaroni icantayetiri Tasoren-tsi.

Irootaque icantajeitiriri Pavoro.

²⁸Jero oca icamantajeitiriri aisati:

—Queariompia, pojocaacoventajeiteri piyemisantaririnte anta. Tempa avirojeita-que ocoyeane Ishire Tasorentsi. Pamenaco-venteri maaroni quemisantajeitatsiri, pintacoejteari. Tempa iriojeitaque yoavisacojeitaqueri Jesoshi, icamimentajei-

taqueri, yaparajatimentajeitaqueri iriraja.
²⁹Coajica, nojatanajerica, impocashitempi amatavitempinemer: noshicantacaqueri catsimayetatsiri. Eiro ipeacotimpitsi, yoashinoncaimpicari. Niotaquero oca.
³⁰Timatsi aca picarajeitica quenquetsatacaa-vetempineri, iro cantaincha eiro otampatica-tasanotitsi iroamejeitempi. Yojocacaimpircari piyemisantarinnte, irojatanteariri iriori.
³¹Queariompia, pinquenqueshiretero. Ocarati mava osarintsi noametapinita-quempi. Nocantatiani: tsiteniriqui, quitaiteri-qui. Aisati niraacotapinitaqueMPI. ³²Nocan-tiri Avincatsarite: "Pojocacaoventajeiteri ejesosati, aisati pineshioncatimenteri iquemisantiro pineane". Aitaque omataca irineana oquemisantacaasanotaquempi, oavisaconteitaquempi. Tempa picarajeitiri quemisantajeitiriri icoyeaqueri. ³³Te noncoitayeteriji iirequite pashini atiri. Te noncoitayeteriji itisaare. ³⁴Piojeitaque narosatiquea antaveetanontacha, naantaye-tarori maaroni coiteimotanari, aisati mintacojeitarri notsipajeitarri. ³⁵Nomayeta-quero maaroni oca piojeitanteari avirori pintacotantajeitea. Pinquempejeitena narori, pantaveetasanojeite, pintacotantajeiteeariri ashinoncaincari. Pinquenqueshiretero irineana Avincatsarite Jesoshi, icantitaniri: "Iro cameetsatasanotatsiri ampashitantea. Te iro cameetsatasanotatsine aashitearo paitarica impashiyeteeri".

³⁶Irootaque icantajeitaqueriri Pavoro ejesosati. Impoiji itiyeroanaca, icarajeitiri ejesosati maaroni, iquenquetsatacaaajeitiri Tasorentsi. ³⁷Irajeitanaca maaroni. Yavitsanojeitavajiri, intavorojeitavajiri. ³⁸Yoashiretacojeitanacari iquemaqueri icantanajiriri: "Eiro pineajanatsi aisati". Yoajeitavajiri anta pitotsiqui, yamenava-jiri ijatanaji.

21 ¹Irosati nojocajeitantanajari quemisantacaajeitiriri ejesosati. Notejeitanaca pitotsiqui, tampatica noquenacotanaque Coshiqui, nocanta-

naca shiririri. Oquitaitetamanaque novaamanaja Irorashiqui, irosati novaan-tanaja Pataraqui. ²Noneapaquiero anta pitotsi monteachaneri Jenishiaqui. Notetapaaca, noquenacotanaque.
³Noneantanacarori Tsipire, noquenanam-pitanaquiero nampatequi. Nanaanaquiero, irosati Shiriaqui, naatapaaque Tiroqui. Anta nampitsiqui yoaniitanaquero marinero ovaararontsi. ⁴Nocoayetapaa-queri narori quemisantatsiri. Noneanta-paacariri nosaviquimotapaaqueri ⁷ quitaiteri. Oamejeitaqueri Ishire Tasoren-tsi, icantajeitantariri Pavoro:

—Eiro pijatitsi Jerosarequi: yoashinon-queetavaquempicari.

Iro cantaincha te inquemisanteri Pavoro. ⁵Ari omoncarataja notetantana-jari aisati, nojajeitanaji. Itsipajeitana-quena quemisantajeitatsiri irosati otsapitapaa nampitsi, icarajeitanaquero ijina, jeri itomipee. Notiyeroajeitanaca anta otsapijaqui, noquenquetsatacaaajeitaqueri Tasorentsi. Impoiji novetsatavaca-jeitanaja. ⁶Notetanajaro pitotsi, ari ipiajeitanaja iriori ivancopeequi. ⁷Ari noponeanaca Tiroqui, noquenacotanaque, novaanaja aisati Toremairaqui.

Noquivantapaaqueri ayemisantarinre. Aparo nomaaque. ⁸Oquitaitetamanaque, novaamanaja aisati. Nareetantapaaacari Sesareaqui, noquivantapaaqueri Jeripi, yora quenquetsatacaaantatsiri. Ari oshequi nosaviquimotapaaqueri. Iriotaque icarajeitiri yora intacotantachari sietetatsiri. ⁹Timatsi otsipasato irishinto, timashitachari; ocamatantajeiti iroori.

¹⁰Oshequi nomaaque. Jeri yareeta-paaca camantantatsiri pajitachari Acavo, iponeanaca iriori Joreaqui. ¹¹Ipocashita-paaquena, yaapaaquiero ishicitcatsaquirro Pavoro. Irisati oisotashitajancha iitiqui, iracoqui. Icanti:

—Aitaque ocanti Ishire Tasorentsi:
 “Aisati inquempeyeetaqueri yora

ashitarori ishiticatsaquito. Iroisoteri jorio, yora jerosaresati: oiso, oiso. Imperi pashinisati atiri, iraanaqueri".

¹²Noquemantavacarori oca, nocarajeitaqueri maaroni asháninca, nocantajeiveteri Pavoro:

—Eiro pijatitsi Jerosarequi.

¹³Yacanaquena:

—¿Paita piraantari? ¿Paita picantashi-retacaantanari? Tempa naro quemisanti-riri Avincatsarite Jesoshi. Iroisoyeenetanta Jerosarequi, iroyeenetata: te nontsaroacayeariji.

¹⁴Te inquemisantenaji, irosati nomaje-retantanaca. Nocantajeiti:

—Aitake oncateata paitarica icoiri Avincatsarite.

Yareejeitanaca Jerosarequi.

¹⁵Impoiji novetsajeitanajari sesareasati, novaanaja Jerosarequi: noquenanaji avotsiqui. ¹⁶Itsipajetanaquena aparopee quemisantsatsiri, sesareasati. Yaanaquena anta ivancoqui Manaso, yora tsipiresati: iriotaque intacantarori iquemisanti. Nomaimotapaaqueri iriori. ¹⁷Nareetanta-paacari Jerosarequi, yaacameetsajeitava-quena ayemisantairinte, iquimoshireven-tavaquena. ¹⁸Oquitaitetamani iquivanta-jantiri Pavoro Santiacono, noijatanaqueri narori. Anta yapatojeitacanta maaroni quenquetsatacantatsiri. ¹⁹Novetsatava-caajeitaca, impoiji itsoteaqueneri Pavoro, iquenquetsatacapaaqueri:

—Itiancaquena Tasorentsi noquenque-tsatacaajeitiri oshequi pashinisatipee atiri. Icarajeiti oshequi quemisantajeitirri.

²⁰Iquemantavacarori, icantajeiti:

—Cameetsa ini Tasorentsi.

Impoiji icantajeitiri:

—Pamene, Pavoro, amoncaratavaca-jeitaca aquemisantajeitiri Jesoquirishito. Iquemisantajeitaque oshequi catsini ajorioririnte, iro cantaincha aisati

iquemisantasanojeitaquero isanquenati-niri Moishishi. ²¹Oshequi iquemacojeita-quero picantiriri ajorioririnte, saviquimo-tiriri pashinisati atiri: "Pojoquero isanquenare Moishishi. Eiro pitoyeanta-jeitiritsi pitomi. Pojocajeitajero oca amejeiveitaniri arori". ²²¿Jaoca pincanteari? Aitake inquemacojeita-quempi, areetapaaquempi: inquisajeitava-quempi. ²³Pinquemisantero oca noncan-tempiri: jerica itsipasati shirampari, timatsi icashiacaacariri Tasorentsi.

²⁴Paanajeri maaroni ivancoqui Tasorentsi, pincanteri Tasorentsi iroameetsanta-jeittempi. Pimpinateneri yocapee paitarica, irameetantearori iishi. Impoiji iriojeitanaque ajorioririnte te ontampati-cateji oca iquemacotaquempi. Iriotana-que pimoncarataquero isanquenare Moishishini. ²⁵Ja meeca yora pashinisati atiri, yora quemisantsatsiri: nopacanta-queri iriori sanquenarentsi. Jero oca nocantakeriri: "Eiro poitaritsi ivatsa yoyeetaquenerori yovetsiqueetiri, caari oni Tasorentsi. Eiro poacotarotsi ivatsa iriraja. Eiro poaritsi ampitsiitachari. Eiro pineavintsirotsi tsinane caari pai".

²⁶Ari iquemisantaqueri Pavoro. Oquitaite-tamaque yaanaqueri evancari, icantajeitaqueri iroameetsatanteariri, aisati iqueajeita-paaque ivancoqui. Icamantapaaqueri anta:

—Oncarate 7 quitaiteri nomoncaratan-taquearori nantajeiteri iroameetsatante-nari Tasorentsi, impoiji noajeiteneri virantsi, nompajeiteri.

Yoiminqueaqueri Pavoro.

²⁷Irovetainchá omoncarateame 7 quitaiteri. Ineajeitaqueri anta ivancoqui Tasorentsi joriopee, poneachari Ashiaqui. Iquisacaacari apatojeitainchari, impoiji yaajeitaqueri Pavoro, shepi. ²⁸Icadjemajei-tanaque:

—Noshaninca, pamitacojeitena. Iriotaque yoca quenaquenayetatsiri

amatavijeitiriri atiri; icantanirotaqueri: "Te incameetsateji joriopee. Te oncameetsateji isanquenare Moishishi. Te oncameetsateji ivanco Tasorentsi". Irootaque icantajeitiriri atiri. Pamenete meeca yamanirotaqueriaca pashinisati atiri, caari ocameetsatantanaja meeca oca pancotsica cameetsavetachari.

Irootaque icantajeitaqueriri. ²⁹Chapinqui ineavaqueri Pavoro anta nampitsiqui, itsipavetari Torojimo: yora ejesosati. Ijitoshajeitavacari irotaque iqueacaapaaqueri ivancoqui Tasorentsi, irootaque icantantacari: "Yamanirotaqueriaca pashinisati atiri". ³⁰Ari iquisajeitanaca maaroni nampitsiquiniri, yapatojeitanaca anta. Yaaqueri Pavoro shepi, inoshicanqueri saiteriqui, sorororo. Irosati yashitantanacaro ivanco Tasorentsi. ³¹Irovetainchairoyerime, iro cantaincha iquemacotaqueri yora iyomantantiesoraropee, carajeitantsiri 600. Icamanteeriti:

—Iquisajeitanaca maaroni jerosaresati.

³²Ishintsiti yaanajiri soraro, jeri capitanotatsiri, ishiashijeitanacari. Ineanstageitavacariri atiri, yoipacaajeitanaquero ipasajeitiri. ³³Ari ipocapaaque comantanti, yaapaaqueri Pavoro. Yoisotacantaqueri. Iro yoisotantapaacariri apite carenatsa. Isampitacotiri:

—¿Janicampa yoca? ¿Paita yantaqueripi quisajeitancariri?

³⁴Ipashinijetanaquero icantayetanaqueri. Icajemejtanaque, tecatsi incanteacomantanti iriotacoteri, irootaque yaacantantanacariri anta ivancoquisoraro. ³⁵Yareetapaacaro ataimentotsinta, oshequi itatsincajeitanaqueri. Irosati yoancaacaantapaacari soraro. ³⁶Yojatanaqueri oshequi atiri, icajemejtanaque:

—Paanirotanaqueri.

³⁷Irovetapaincha inqueacaapeerime Pavoro pancotsiqui. Icantiri yora comantanti:

—¿Cameetsampa nonquenquetsatacayempi?

Icantiri:

³⁸—¿Piotrirompa quirieco? ¿Tempa aviro ejipitosati, yora quisacaacariri atiri chapinqui? ¿Tempa aviro aanajiriri chapinqui 4,000 oantatsiri anta caaraite-riqui?

³⁹Yacanaqueri:

—Te. Nainti jorio. Noponeanaca Tarisoqui, ora shirishaquiniri. Iotacojetiro nonampi. Meeca noncamantempi: pishinetena nonquenquetsatacayeri atiri.

⁴⁰Ari ishinetaqueri, icantiri:

—Jentsiqueti, pinquenquetsatacayeri. Irosati icatiantapaaca ataimentotsiqui, cati. Impoiji yacotashitanaqueri atiri. Imajerejeitanaque, irosati iquenquetsatacajeitancariri. Iro iquenquetsatacaantirirevereo.

Iquenquetsatacaaqueri Pavoro joriopee.

22 ¹Jero oca icantajeitiriri Pavoro ijorioririnte:
—Noshaninca. Meeca narosati camantacotachane. Pinquemisantajeitavaquena.

²Iquemantavacariri ineanatantaro evereo, aiquero catsini imajeretasanojetanaque. Ari icantanaque:

³—Narotaque jorio. Ari otimaquenari ina anta Tarisoqui, onta shirishaquiniri. Aca nampitsiquica ari nantearitaqueri. Yoametaquena Camariyeri, itsoteasanotaquenaro oca icantajeitiri intacantaqueeri. Nocoasanotaque noshintsiteneri Tasorentsi paitarica nantiniriri, noquempevetaqueMPI avirori meeca. ⁴Noquisasanotiri oametantirori oca iroqueratatsiri, irootaque noantayetariri, noisotacantayetaqueri, aisati noiminqueacantayetaqueri shirampari, tsinane, maaroni. ⁵Iotana ivincatsarite saserote queariotaque oca nocantauquempi. Aisati iquempejeitanajamaaroni savicacaantajeitatsiri: yora

oametavacainchari, ioejiti. Iriojeitaque panarori sanquenarentsi isanquenatiniri tamashicosati. Itiancaquena nonquisajeitanteairirime quemisantajetiriri Jesoshi. Nojavetaca Tamashicoqui naayeterime savicatsiri anta, noisoterime. Namaquerime aca iroasanquetanteairirime saserotepree. ⁶Noquenanaque avotsiqui, noquempejitapAACaro Tamashico. Ari icarataque tampatica catsirinacaiteri. Omapocapaaquena, amorecacotapaaquena amorecatsiri, oponeanaca inquitequi. ⁷Notaanaque quipatsiqui, porocn. Noquemaqueri icantaquena: "Saoro. Saoro. ¿Paita piquisantaquenari?" ⁸Nacanaqueri: "¿Janicampi Novincatsarite?" Icantaquena: "Narotaque nainti Jesoshi, nasaretesati: narotaque piquisaqueri". ⁹Ineajeitaquero notsipajeitari oca amorecatsiri, iro cantaincha te inquemajitavaqueroji icantaquenari Jesoshi. ¹⁰Nocantiri: "¿Paita picoacaquenari nanteri?" Icantana Pincatsari: "Pincatianaje, pijate Tamashicoqui. Anta incamananteempi paitarica panteri". ¹¹Oshipaqui-reacotasanolanaquena amorecatsiri, irootaque caari noneantaja. Ari yacatsatanaquena notsipajeitari, irosati nareetapataaca Tamashicoqui. ¹²Itimi anta shirampari pajitachari Ananiashi. Iquemisantasanoliro isanquenare Moishishini. Ineacameetsajeitiri maaroni jorio, savicajeitatsiri anta. ¹³Ipocashitaquena, iquempejitapaaquena, icantapaaquena: "Saoro, aviro noyemisantaririnte. Pamenanaje". Irosati namenantanaja, noneaqueri. ¹⁴Aisati icantana: "Icoyeaquempi Tasorentsi piotanteairori icoacaaquempi iriori. Icoyeaquempi pineanteairiri yora Cameetsatasanolatsiri. Aisati icoyeaquempi pinquemasanotanteairiri iriori. ¹⁵Aisati pinquenquetsatacoteri. Pincamanteri maaroni atiri oca pineaqueri aisati oca piquemaqueri. ¹⁶¿Paita poisamanincantacarori? Tsame,

pivaotisatea. Ainiro caari cameetsatatsi pantayetiniri, iro cantaincha ariorica paventeeari Tasorentsi, iroameetsanta-jempi". ¹⁷Ari impoiji nopianaja Jerosarequi. Noquenquetsatacavetacari Tasorentsi anta ivancoqui, impoiji te niotacoteaji, ¹⁸irointi noneashitacari Avincatsarite. Icantaquena: "Pishintsite, pojocanajero Jerosare, pishianaque. Eiro iquemisantetirotsi oca piquenquetsatacotaquenari". ¹⁹Nocantiri: "Novincatsarite, ioejitaque notsoteaquero maaroni pancotsi yapatojeitantzari, naajeitaqueri quemisan-timpipi. Noiminqeacantaqueri, aisati nopusanatacantaqueri. ²⁰Narotaque oacantaquerirri Ishitevani: yora camanta-cotimpipi. Nocatiaca ocaaqui, nocantiri: 'Cameetsa incame'. Namenaqueri oaquerirri iroicoropee". ²¹Iro cantaincha icantaquena: "Tsame pijate. Nocoaque nontianquempi arejiqui, anta itiminta pashinipee atiri".

²²Iquemisantajevetacari jorioppee, iro cantaincha iquemajitavacarori oca, icajemajitanaque. Icantajeiti:

—Pojocanirotanajeri. Te oncameetsateji iranee: poyer, incameta.

²³Icjajemajitanaque, iquisejitanaca, irootaque ipishoncajeitantanacarori iroicoropee aisati quipatsipane. ²⁴Ineantajejitariri comantanti iquisejita, irosati icantantacari soraro:

—Paanaqueri, pinqueacaanaqueri anta; pimpasanateri incamantantempipi paitarica yantaqueri iquisejitanacariri ishaninca.

²⁵Ari yoisovetacari impasatanteairirime. Ari itimi anta capitanoatsiri, icantiri Pavoro:

—Narotaque shanincatariri oromasati. Tequera piotacojeitenan otimirica nantane, carimpa pimpasatashitena?

²⁶Iquematiiri, ijatashitaqueri comantanti. Icantapaaqueri:

—¿Paita poyeriri? Iranti ashaninca arori.

²⁷Ari ipocashitaqueri comantanti,
icantiri:

—Pincamantasanotenate. ¿Pishaninca-
tarimpa oromasati?

Icantiri:

—Je, noshanincajeitacari.

²⁸Icantanaque comantanti:

—Oshequi nopolinaventaqueri oromasati
noshanincatantacariri.

Icanti Pavoro:

—Aitaque notimaqueri noshanincatan-
tacariri.

²⁹Intsipaite itiancrajiri yora pasaterine-
meri. Irinti comantanti, itsaroanaque.
Iotaque yoisotashitacari shanincatacariri
oromasati: te oncameetsateji iroisotashi-
tearri.

Yaanaqueri Pavoro anta inauenta oametavacainchari.

³⁰Icoaque comantanti iriotasanote paita
icantacotantariri jorioppe Pavoro.
Oquitaitetamanaque yoisoreajiri. Yapato-
tacantaqueri jivatacaaajeitiriri saserote,
jeri maaroni oametavacaajeitainchari.
Irosati yoirincacantanacari Pavoro,
yaanaqueri anta.

23 ¹Yamenasano tapaaqueri maaroni
oametavacainchari. Icantiri:

—Noshaninca. Nioti ineacameetsatas-
notaquena Tasorentsi. Nocantatiani
cameetsa nosaviquini, irosatitasi meeca.

²Yora Ananiashi ivincatsarite saserote,
icantiri tsipatariri anta:

—Pimpasavanteniroteri.

³Icantanaque Pavoro:

—Avirotaque avinti inquishe Tasorentsi;
ainiro pantane: oshequi pamavitananti. Jero
meeca pisaviqui aca, picoaque pimoncarate-
rome Sanquenarentsi, pincantacoventante-
narime. Iro cantaincha pipasatacantaquena,
te pimoncarateroji Sanquenarentsi.

⁴Icantanaque catiainchari ara:

—Iriotaque picantaqueri ivincatsarite
saserote.

⁵Yacanaqueri:

—Te nioteji iriorica ivincatsarite
saserote. Ocanti Sanquenarentsi: “Eiro
picantimatiritsi pincatsariventiriri
pishaninca”. Niotaqueme, eiro nocanti-
rime.

⁶Iotaque Pavoro anta iconoayetacari
saroseopee, jeri aisati variseopee.

Icajemanaque:

—Noshaninca. Narotaque variseo.

Narotaque itemi variseo. Niotaque
intinaajeitaje maaroni camajeitaintsiri,
irootaque iquishimentaqueri meeca yoca.

⁷Iquemantajeitavacarori oca icantaqueriri,
iquisatsatavacaajeitanaca variseopee jeri
saroseopee. Iquisavacaajeitanaca. ⁸Icantapi-
nijeiti saroseo: “Eiro itinaajatsi camajeitaint-
siri. Te aneriji Tasorentsi inampire. Te
aneroji ashire arori”. Iro cantaincha
icantajeiti variseo: “Antinaajeitanaje.
Timatsi inampire Tasorentsi. Timatsi ashire
maaroni”. ⁹Ari iquisatsatavacaajeitanaca.
Icatianaca oametantirori sanquenarentsi,
variseo ini. Icantasanotanaque:

—Tecatsi nonquemacoteri yoca,
yantaquero caari cameetsatatsi. Ariorica
yoametaqueri Tasorentsi. Ariorica
yoametaqueri inampire.

¹⁰Aiquero catsini iquisatsatavacaajeita-
naca. Yaamaanaca comantanti ari impicha-
reajeitanaqueri Pavoro. Itiancraqueri sororo:

—Pijate, paajanteri.

Ari yaniireajeitanaque, ijajeitanaque
nianqui, yaapitsajeitavajiri. Yaanajiri
anta pancotsiqui. ¹¹Aparo imaaque,
otsitenanaji aisati, iconijatimatapaa-
queri Avincatsarite. Icantapaquaqueri:

—Piveshireanaquea. Piquenquetsataco-
taquena aca Jerosarequi, aisati pinquem-
petajea coajica anta Oromaqui.

Yaanajiri Pavoro Sesareaqui.

¹²Ari oquitaitetamanaji, yora jorioppe,
isareajeivetacari Pavoro iroyerime.
Icantavacaajeitaca:

—Meeca, eirotsitarica airi, eiro avajatsi, aisati eiro irajitsi. Ariorica amatavitavacaajeitea, tempa ari iroasan-quetaquee Tasorentsi.

^{13,14}Yanaajeitaquero 40 shirampari sareavetacariri iroyerime. Ijatashijeitiri jivatacaaajeitiriri saserotepee, jeri aisati savicacaantayetasiri. Icantapaaqueri:

—Eirotsitarica noiri Pavoro, eiro noitajatsi, aisati eiro niritajatsi. Eirorica nomajeitiro, nocoajeitaque iroasanquejeiteni Tasorentsi. ¹⁵Pincarajeiteri maaroni oametavacainchari, pincantaiteri yora comantanti: “Pamaquenari Pavoro, nocoaque niotacotasanojeri, paitarica yantiri”. Irootaque pincanteriri. Naroquea nainti, novetsicajeititaquea noantavaqueariri nianqui, tequeratsita irareeta.

¹⁶Jeri otomi iritsiro Pavoro, iquemaco-ventaqueri iriconquiri isareacari iroyeeteri. Ari ijataanaque anta ivancoqui soraro, icamantapaaqueri Pavoro.

¹⁷Irosati icajemacantantacari iriori aparo capitanotatsiri, icantiri:

—Paanaqueri yoca evancari anta itiminta comantanti. Timatsi incamante-ri.

¹⁸Irosati yaantanacari anta. Icantapaaqueri:

—Icajemaquena Pavoro, yora aiminqueiri oshaiteji. Icantaquena: “Paanaqueneri comantanti yoca. Timatsi incamanteriri”.

¹⁹Ari yacatsatanaqueri aquietiji ara. Imanacaacari, isampitaqueri:

—¿Paita ojita oca pincamanteri?

²⁰Icantiri:

—Icantavacaaca joriopee, incoacojeita-quempi paanajeneri Pavoro anta yoametavacaajeitacanta. Icoaque iramatavitempi, incante icoaque irisampi-tacoventasanoteri coqui. ²¹Iro cantaincha, eiro piquemisantiritsi. Timatsi shirampa-ripee, yavisajeitaquero 40 icarajeiti,

sareacariri ioyereri. Icantajeitaque: “Eirotsitarica airi, eiro avajatsi, aisati eiro irajitsi. Eirorica airitsi, acoaque iroasan-quetaajeiteeta Tasorentsi”. Meeca yovetsicajeitaca. Yoyeaquempi meeca, panteneri oca incoacotempi.

²²Ari itianquiri comantanti yora evancari. Icantavaqueri:

—Eiro picamantiritsi ashanincapee oca picamantaquenari.

²³Impoiji icajemiri apite capitano. Icantiri:

—Ariorica onianquiitimatanaque, povetsicajeiteri 200 soraro, 70 quijacotearineri cavayo, jeri 200 ajiriqueroneri isataamento. Irijajeite Sesareaqui.

²⁴Povetsiqueneri Pavoro cavayo, inquicotaquearei. Cameetsa paajeitanaqueri anta itiminta pincatsari Virishi.

²⁵Impoiji isanquenatiniri sanquenarentsi, iquempetaquero oca: ²⁶“¿Ainirompi Virishi? ¿Tecatsimpa oyempine? Narotaque Caraorio Irishiashi sanquenatimpiori oca. Oshequi nopincatsatimpi. ²⁷Pineavaqueriya yoca shirampari nontianquempi. Irovetainchia iroajeiterime chapinqui joriopee. Icamantetana ishanincatacari oromasati, irosati nojatasitantacariri, notsipatanacari soraro, noavisacotajiri. ²⁸Nocoanaque niote paita incantacoteriri, naanaqueri anta yoametava-jaeitanta. ²⁹Noquemapaquaqueri, icantava-caimentajeitaro sanquenarentsi. Iro cantaincha tecatsi incantacoteri aiminquean-teariri aisati avanteariri. ³⁰Timatsi camanta-paaquenari isareetacari iroyeeteri, irootaque nontiancantempiriri. Nontianquempi coajica yora quisakeriri irijatashitempi incamantacotasanojeri Pavoro”. Irootaque isanquenatiniriri, impoiji ipavaqueri soraro:

—Jeroca paanajeneri Virishi, aisati paanajeri Pavoro.

³¹Ari iquemisantaqueri soraro, yaanaqueri Pavoro. Tsiteniriqui yareeta-caacari Antipatirishiqui. ³²Oquitaitetama-naque ipiajeitanaja soraro inampiqui.

Irinti tsipatasanotanacariri Pavoro yora quijacojeitariri cavayo.³³ Yareejeitanta-paacari Sesareaqui, ipapaaqueri pincatsari sanquenarentsi. Aisati iriori Pavoro, yonijaapaaqueri.³⁴ Ineanatava-quero sanquenarentsi, irosati isampitan-tavacari:

—Jaoca opajitari piipatsite piponean-tacari?

Yacanaqueri Pavoro:

—Noponeanaca Shirishiaqui.

³⁵ Icantiri pincatsari:

—Coajica impocavaquetsita camantaco-tempineri, ari nonquemisantanaquempi.

Impoiji icantiri soraro:

—Pashitacoteri anta ivancoqui

Eroreshi, pamenasanoteriyea.

24 ¹Ocarataque quitaiteri apapac-roni, ari ijatanaque Ananiashi, yora ivincatsarite saserote, itsipatanacari aparopee savicacaajeitantsiri. Jeri aisati itsipatanacari amitacotiriri, pajitachari Teretoro. Ijatashijeitanaqueri pincatsari, incantacojeiteri Pavoro.² Icajemeetaqueri, impoiji iquenquetsati Teretoro. Iquenque-tsatacaapaaqueri Virishi, ineshinoncata-mempeacari, aisati icantacotashitacari Pavoro, icanti:

³—Meeca, novincatsarite, nopasonqui-jeitimpi. Cameetsa pipincatsariventajeita-quena, irootaque cameetsa nosavicaje-tantacari aca. Poameetsajeitaquenaro paitaricapee, irootaque nopasonquitimen-taquempi maaroni.⁴ Meeca eiro nosamanitimpirotsi. Aitaquenea pametaro pineshinoncatanti, capichaji nocoaque pinquemisantavaquena.

⁵Noneaqueri yoca Pavoro, oshequi ineashirencanti. Iquisacaajeitacari jorioppee maaroni nampitsipeequiniri. Iriotaque jivatacairiri quemisantajeitiriri yora nasaretesati.⁶ Irovetanaincha impincacayenarome ivanco Tasorentsi, irosati naajiteitacari. Irovetanaincha nomoncaraterome isanquenajeitananiri

Moishishini, noncantacoventantearirime yoca.⁷ Iro cantaincha yareetapaaca Irishiashi, yora comantanti. Itatsinqui-mentayetapaaquenari, yaapitsatapaaque-nari. Itiancaquena nopocantacari aca, noncantacoventanteariri Pavoro.⁸ Meeca, pisampiteri, piotanteari queariorica oca nocantacotaquerir.

⁹Icantajeitanaque jorioppee:

—Queariotaque oca icantaqueri.

Aitaque ocantacari.

¹⁰Ari yora pincatsari icantaqueri

Pavoro irineanate iriori. Ari icanti:

—Niotaque ocarati meeca oshequi osarintsi pipincatsariventajeitiri noshaninca, irootaque noquimoshiretan-tanacari. Meeca narosati camantacoven-tajanchane.¹¹ Jentsite, pisampitacovent-a-jeiten. Iroqueratatsiquera ocarati 12 quitaiteri nojatantaitari Jerosarequi.

Nojaiti noquemisantaiti.¹² Tecatsi neenaneri nompiatsatavacayempají anta ivancoqui Tasorentsi, aisati te nompiatsa-tavacayempa anta pancotsiqui napotantan-tari, nampitsiqui, tecatsi. Aisati te nampatojeiteri oshequi atiri.¹³ Tecatsi incantea meeca iriotacaasanotempi oca icantacotashitaquenari.¹⁴ Meeca

noncamantasanotempi. Noquemisantiri yora Tasorentsi iquemisantiniri intacanta-nari. Noquemisantajeitiro isanquenaren Moishishi, aisati iroori isanquenaren camantantajeitatsiniri. Queario, ainiro yoametaquenari Jesoshi ayojeitanteari ajajeitantaqejeri inquitequi, iro cantaincha icantashijeitaca yocapee te oncameetsa-teji anquemisanteri.¹⁵ Noquempejeitacari iriori, niotaque irootinaajeitajeri Tasorentsi maaroni camajeivetainchari: cameetsatatsiri, caari cameetsatatsi, maaroni.¹⁶ Irootaque nocoasanotantacari noncameetsashiretimoteri Tasorentsi, aisati atiri. Tempa ineajeitaquena. Nocoaque nontime cameetsa, niotanteari ineacameetsataquena.¹⁷ Notimavetaca

anta arejiqui oshequi osarintsi, meeca nopiaja. Namaqueneri noshaninca ipacantashiyetacariri savicayetatsiri otsipapeequi nampitsi. Aisati nopashita-paacari Tasorentsi paitarica.¹⁸ Pamenete meeca, inequena yoca anta ivancoqui Tasorentsi, noquemisantaque. Tecatsi nampatotacayeari, aisati tecatsi nonquisacayeari.¹⁹ Itimi anta ivancoqui Tasorentsi jorioppee poneayetachari Ashiaqui, iriotaque quisacaajeitacariri atiripee. Ontimeme nantayetiri, tempa impoqueme iriori incantacoventena.²⁰ Iro cantaincha ¿paita icantajeitiri yocapee? ¿Paita iotacotanari anta yoametavacaajeitacanta? ¿Timatsimpa nantaqueri?²¹ Apatiroti nocantaqueri chapinqui: "Niotaque intinaajeitanaje maaroni camajevetainchari, irootaque picantacoventantaque-nari meeca".

²²Iotasanolri iriori Virishi oca acamantacotiriri Tasorentsi. Icantanaque:

—Aitapajitsita meeca. Coajica impocavajetsita comantanti Irishiashi, ari noncantacoventempi.

²³Icantiri capitano:

—Paanajeri Pavoro, poiminqueajeri: pamenasanoteri, iro cantaincha pishineteri paitanirica incoyer. Aisati pishineteri ishaninca irintacoteari.

²⁴Pashini quitaitei ipocapaaque Virishi. Itsipatapaaro ijina pajitachari Toroshia. Jorio oni. Icajemacantiri Pavoro inquemisantanteeariri. Iquenquetsatacoti jaoca ancanteari anquemisanteri Jesoquirishito.

²⁵Aisati iquenquetsatacoti jaoca ancanteari ancameetsashiretanage, aisati antime cameetsa. Aisati iquenquetsatacoti Tasorentsi, jaoca incanteari coajican incantacoventanteeariri maaroni atiri. Ari itsaroanaque Virishi. Icant:

—Meeca pijataje. Coajica, tecatsirica nante, ari noncajemacantajempi aisati.

²⁶Ari oshequitaque icajemacantapinitaqueri, ijitashitaca Virishi ari impashitana-

jearie quirequi irishinetanteearirime irijatantajeari. Ari iquenquetsatacapi-taqueri, iro cantaincha te imperiji quirequi.²⁷ Apitetaque avisanaque osarintsi. Ipoyeetajari Virishi yora Porishio Jeshito. Icoaque inquimoshiretacayempari jorioppee, irootaque caari ishinetantajari Pavoro irisoquijanaje.

Yaventacari Pavoro Sesari.

25¹Ari yareetanaca Jeshito anta impincatsariventantenta. Mava imapaqaue Sesareaqui, irosati yovaantanaja Jerosarequi.² Jeri yora jivatacaajeitiriri saserotepee, jeri pincatsariventiriri jorio, icantacojeitiri Pavoro. Icantiri Jeshito:

³—Pinquimoshiretacayena. Pamacantenari Pavoro aca Jerosarequi.

Ari isareavetacari irimapocavaquerime nianqui, iroavaquerime.⁴ Icantiri Jeshito:

—Irisavicavaquetsita Sesareaqui. Eiro osamanititsi nompiaje.⁵ Ari otimirica yantane, nocoaque intsipatanaquena pincatsariventimpiri, incantacotanteeariri.

⁶Ari aamaaca isavicaque anta 8 quitaitei, ariorica 10. Te iroanayeroji 10. Irosati ipiantaja Sesareaqui. Oquitaitetamaque isavicaque anta ivincatsarimen-toqui. Icajemacantiri Pavoro.⁷ Yareetapaaca, ari ishoncavacari yora poneachari Jerosarequi. Oshequi icantacotasanolveta-cari, iro cantaincha tecatsi incante iriotacotasanolteeariri Jeshito.⁸ Irisati cantacoventavajancha Pavoro, icanti:

—Tecatsi noncantero Sanquenarentsi iquemisantiri jorioppee. Tecatsi noncantero ivanco Tasorentsi. Aisati oquempe-taca, tecatsi noncantimateri Sesari.

⁹Iro cantaincha Jeshito icoaque inquimoshiretacajeteeri jorioppee. Icantiri Pavoro:

—Piquemaque meeca icantacojeitim-piri yocapee. ¿Picoimpa pijate Jerosarequi? Anta ari noncantacoventajempiri.

¹⁰Yacanaqueri Pavoro:

—Noshanincatacari nainti oromasati, avetacanea aca pincantacoventenameri. Piotasanotaque tecatsi noncanteri joriopee. ¹¹Nantaquerorica caari cameetsatatsi, ainirorica nantane iroyeetantenari, ari. Cameetsataque iroyeetenata. Iro cantaincha ariorica icantacotashijeitana, tecatsi pincantea pishinetacoventena. Nocoaque pintianquena meeca Sesariqui, incantacoventena intiri.

¹²Ari iquenquetsatacaaqueri Jeshito yora oametavacainchari. Impoiji icantiri Pavoro:

—Meeca picoaque nontianquempi Sesariqui. Aitaque nontianquempi irioriqui, incantacoventantempiri.

Iquenquetsatacaaqueri Pavoro Aquiripa.

¹³Jaocarica ocarati imaaque. Jeri yareetaca pincatsari Aquiripa, itsipataro Verenise. Ipoqui iquivantiri Jeshito.

¹⁴Isavicapaaque oshequi quitaiteri, ari iquenquetsatacotaqueri Pavoro:

—Timatsi aca shirampari yoiminqueaqueri Virishi. ¹⁵Nojatantacari Jerosarequi, icantacotaqueri joriopee: yora jivatacaajeitiriri saserote, savicacaajeitantsiri, maaroni. Icoacotaquena noncantacoventashiteari Pavoro: “Ainiro yantane”. ¹⁶Iro cantaincha nocantaqueri: “Naro oromasati. Te nameteaji noshinetacantashiteari tequerartsitarica incantacyeeteri. Inquemavaquerotsita oca pincantacoteari. Impoijiquea irisati cantacoventajanchane”. ¹⁷Irosati yapatojeitancaca aca, ari te nosamaninquierojo. Oquitaitetamanaque nosavicaque aca novincatsarimentoqui, nocajemacantaqueri Pavoro. ¹⁸Ari nojivetaca incantajeite yantasanotiro caari cameetsatatsi. Iro cantaincha, tecatsi incantacotasanojeiteri. ¹⁹Iquisatsimentavacaacaro oca yaamaashiyetari iriori. Aisati iquisatsimentavacaacari

Jesoshini. Icamaque, iro cantaincha icanti Pavoro: “Aneaji”. ²⁰Te nioteji jaoca noncanterori nosampitacoventantearori oca icantayetiri. Nosampivetacari icoaquerica irijate Jerosarequi, anta noncantacoventantearirime. ²¹Iro cantaincha icoanaque incantacoventeri irinti Sesari, yora Aocoschito. Ari nocantaqueri soraro irishenteri, irosati nontiancanteariri anta Sesariqui.

²²Icanti Aquiripa:

—Nocoaque nonquemisanteri nainti.

Icantiri:

—Aitaque, osaitequera pinquemamani.

²³Oquitaitetamanaque ijataque Aquiripa, jero Verenishe. Ari yoaneenca-sanojeitanaca apite. Iqueanaque anta yapatotapiniyeetanta. Icarajeitaqueri comantantipee, aisati pincatsariyetatsiri: yora savicajeitatsiri anta. Yora Jeshito, icajemacantaqueri Pavoro. Ari yamapaaqueri soraropee. Icanti Jeshito:

²⁴—Pincatsari Aquiripa. Maaroni aviro nocarajeitiri aca. Jeri yoca. Ipcashijeitiquena maaroni joriopee: jerosaresati, jeri yoca savicayetatsiri aca. Icantacovetari yoca: “Te oncameetsateji intime”. ²⁵Iro cantaincha tecatsi niotacoteri noamaanteariri. Jero meeca yaventacari Sesari, ari meeca nocoii nontianqueri irioriqui. ²⁶Iro cantaincha te nioteji paitarica noncamantanoteriri avincatsarite. Irootaque nocajemacantantaquempi avinti, asampitacoventanteariri. Impoijiquea ontine nosanquenatacotanteeariri. ²⁷Jeri yoca noiminqueaqueri. Te oncameetsateji nontiancashiteari, tecatsirica noncamantacoteri.

26 ¹Yora Aquiripa icantiri Pavoro:

—Meeca noshinetempi avisati cantacoventachane.

Irosati yacotashitantanacari Pavoro, impoiji icantacoventaja irisati:

²—Pinequena, pincatsari Aquiripa. Meeca noncamantempi paita iquishimen-

tantaquenari nojorioririnte. NoquimoshireventaqueMPI,³piotasanotiro maaroniyameyetari noshaninca, aisati pioyetiro maaroni icantavacaimentajeitarri. Nocoaque pinquemisantasanoTenA, eiro pishemanatsi.⁴Iotacotitajeitaquena noshanincappee, peerani ainironi nevancaritapaini. Nosaviquini Jerosarequi, nocarajeitaqueri noshaninca. Irosatitatsimeeca iotana.⁵Tempa quemisantincari variseotatsiri. Peerani novariseoveitani narori, noquempetasanoveitarini. Iotasanojeitaquena noshanincappee, incoauericame incamantajeitempime.⁶Nocoasanotaque noneeri icashiacaacariri Tasorentsi noshanincani, irootaque meeca picantacoventimentaqueunari.⁷Peerani itimini Jacovoni itomini 12, ijoriojeitini. Meeca icoajeitaque maaroni ishanincani irineeri yora Quirishitotatsiri iquenquetsatacotiniri Tasorentsi. Coajicani irootinaajeitajeri maaroni camajeitatsiri. Icantatiani yaamaajeivetacari: quitaiteriqui, tsiteniriqui. Meeca nocantaque ipocasanotaque, irootaque icantacotantanari meeca noshaninca.⁸¿PijitimpA eiro imatirotsi Tasorentsi irointinayeri camajeitatsiri? ¿Paita pitseencantarari?⁹Nojitashiveitani narori peerani cameetsa nonquisheri yora quemisantajeitiriri Jesoshi nasaresesati.¹⁰Aitaque nomavetacaro anta Jerosarequi. Noiminqueayetaqueri oshequi icoyeanepEE Tasorentsi. Irootaque tiancaquenari jivatacaaajeitiriri saserote. Nocoaveitani incamajeiteme quemisanta-jeitiriri Jesoshi.¹¹Aitaque oshequi noashinoncaapiniveitarini anta maaroni pancotsipeequi yapatojeitancari. Nocoacaavetari incantimaterime Tasorentsi. Nocaantirive, noijajeitaqueri pashinipeequi nampitsi, nonquisanteariri.¹²Irootaque nojatashitantavetacariri tamashicosati, itiancana jivatacaaajeitiriri saserote nayerime.¹³Ari nocaantanaca,

itampaticataque catsirincaiteri. Ari noneavaquero anta avotsiqui amoreca-tsiri, oponeanaca inquitequi, morec. Oshipaquireasenanotapaaque catsini, te oshiyeriji catsirincaiteri. Oshoncapa-quena, aisati iriori nocarajeitaqueri.¹⁴Notaaejitanaque quipatsiqui, porocn. Irosati noquemantacariri, iquenquetsata-caana evereoqui. Icantaquena: "Saoro, Saoro. ¿Paita piquisantanari? Ariorica nonquenquetsatacayempime, ¿paita pipiatsatantanari? Tempa pashinoncaja avisati".¹⁵Nacanaqueri: "¿Janicampi, Novincatsarite?" Icantaquena: "Narota-que Jesoshi, piisaneeentane.¹⁶Pintinaana-jequeti, pincatianaje. Nocoaque nompea-jempi intacojeitearine atiripee, camanta-jeiterineri; irootaque noquenquetsatacan-timpri meeca. Pincamanteri atiri oca pineaqueri, aisati oca nonijayempiri, coajica.¹⁷Jaocarica incantavetemperi pishaninca, jeri pashinisatipee atiri, ari noavisacotempi: eiro noshinejeitiritsi iroashinoncaajeittempi. Iro nontiancantau-empiri¹⁸irijojeitantajeari. Oquempeti-movetacari otsitenitimovetacari: te irijojeitenaji, irinti Satanashi amatavijeiti-riri. Pijatashijeiteri, poamejeiteri iraventantenari, impoiji onquempetimo-tajeari intime quitaiteriqui. Impoiji noameetsajeiteri, eiro noquenqueshirea-cotajiritsi caari cameetsatatsi yantajeive-tari; incarajeiteri maaroni quemisantajeitanari, aisati nosavicaaajeiteri cameetsa".¹⁹Irootaque noneaqueri aisati irootaque icantaquenari Jesoshi. Te nompiateariji, irointi notsoteaqueneri icantaquenari.²⁰Nintanacari yora tamashicosati, nocamantaqueri. Impoiji anta Jerosarequi nocamantantaque. Aisati notsoteajeitaqueri anta Joreaqui. Nocamantajeitaqueri yora pashinisatipee atiri, maaroni. Nocamantajeitirii: "Pinquenqueshirejeitanaquea, paventajei-teari Tasorentsi. Cameetsayea pisavica-

jeite, iriojeitantaquejari atiri queario piquemisantasojeitaque".²¹Ari noquenquetsatacotaqueri Jesoshi, irootaque yaajeitantaquenari joriopee anta ivancoqui Tasorentsi, iroyename.²²Icantatiani Tasorentsi intacotana: peerani, irosatitatsi meeca. Irootaque nomatantarori noquenquetsatacacaajeitiri pincatsaritsatsiri, caari pincatsaritsatsine, maaroni. Ari noametantapinitiro isanquenare camantantatsiniri, aisati isanquenaren Moishishi. Nocamantacotiri iquenquetsatacotiniri peerani: moncarataca iquenquetsatacotiniri, aneayetaquero.²³Tempa irootaque icantitaniri: "Irineacatsitearo Quirishito, incamaque. Impoiji irjivajeiteri maaroni camajeitantsiri, intinaanaje. Incamantajeiteri jorio, jeri pashinisati atiri: 'Meeca piotasanojeiteri Tasorentsi'".

²⁴Aitaque ocantari icantaquerir Pavoro. Antearojenca icajemanaque Jesrito:
—Pitsaviataqueteemi, piomempeavetaca.

²⁵Yacanaqueri:
—Te nontsaviateji, niotasanoque. Queariotaque catsini oca nocamantaquempi. ²⁶Yoca Aquiripa iojeitiro oca nocantaqueri, irootaque cameetsa noquenquetsatacasanotantacariri. Tecatsi nomaneri, niotasanoque itsoteaquero, iotavaquero; te omaneaji. ²⁷Pincatsari Aquiripa: tempa piquemisantiro isanquenajeitaqueniri camantantatsiniri. Niotaque piquemisantaquero.

²⁸Yacanaqueri:
—Irovetainchapinquemisantacayenarime Quirishito.

²⁹Yacanaqueri:
—Irovetaincharica pinquemisante, irompa osamaniquerarica, te nioteji. Iro cantaincha nocantaqueri Tasorentsi pinquempetantajenari narori. Aisati noocoacaajeivetacari inquempejeitename

maaroni quemajeitaquenari meeca: apatiro te noncoacayempiji iroisotantee-tempiro oca carenatsa.

³⁰Icatianaca pincatsaritsatsiri: yora Aquiripa, jeri Jesrito, aisati oquempetaca Verenise, ocatianaca iroori. Aisati iquempejeitanaca maaroni saviquimojetiriri, icatiaeitanaca. ³¹Ijajeitanaque, icantavacaajeitanaca:

—Tecatsi irante Pavoro incamanteari. Tecatsi irantavetea, yoimunqueashiyeetacari.

³²Yora Aquiripa icantiri Jesrito:
—Eirome yaventarie Sesari, antianquerime irijatajetame.

Ijataque Pavoro Oromaqui.

27 ¹Ainiro anta iyapitanote oshequi soraro, pajitachari Jorio. Ipajiyeyetiri soraropee Aocoschita.

Icanteetiri:
—Ainiro meeca antearo pitotsi, paanajeri Pavoro Itariaqui, jeri yonta pashini yoisoyeetiri.

Aisati icanteetana:
—Pincoaquerica pojatanaqueri Pavoro, pintetearo onta pitotsinta inquenanteari iriori.

²Ari notejeitanacaro pitotsi ponechari Ataramishiaqui, irovetainchajonquempi. ³Oquitaitetamanaque nareetaca Shiroqui. Yora Jorio, ineshinoncataqueri Pavoro: ishinetaqueri ijati iquivantiri ishaninca anta, ari intacojeitavacari. ⁴Irosati novaantanaja aisati. Iro oimpiajotajename tampea, irootaque noquenantanacari Tsipirequi, antaqueronta. ⁵Nomonteanajaro incajare oquempejitaro Shirishia, aisati Pampiria. Novaanaja, nareetanaca Miraqui, ora irishiaquiniri. ⁶Ari ineapaquero capitano

pitotsi poneachari Arejantiriaqui: ojateme Itariaqui, irosati notejeitantanacaro.

⁷Ocarati oshequi quitaiteri noquenacojetanaque, jentsiquero. Opomerentsitimotaquena, iro cantaincha noquempejitatapacaro Jeniro. Te oshinetenaji tampea, irootaque noshoncantanacarori Quereta. Noquenanaque antaqueronta, anta quempeji Saramona. ⁸Opomerentsitimotaquena, iro cantaincha noshoncanacaro ora ovoyeja. Impoiji nareetanaca onta ipajiyetiri: Cameetsajari. Oquempejitaro nampitsi pajitachari Irasea.

⁹Meeca operaniihanaque, avisanaque meeca quitaiteri ititantapiniyeetari. Ari ocovencatasanotanaque noquenacotanaque: irotantsi oshequi tampea, oshequi omotoncane. Icamantavetacari Pavoro:

¹⁰—Noshaninca, niotaque ompomerentsitimotaquee anquenacojetanaque meeca. Ayeecari antearo tampea. Otsitiicari pitotsi, otsoncacari vaararontsi, aisati atsitiaeitaci arori.

¹¹Yora capitano, te inquemisanteriji Pavoro; iquemisantasanotiri yora jivatiriri marinero, irinti. Aisati iquemisantiri yora ashitarori pitotsi. Icantajeiti riiori:

—Tsame avaajeitanajea.

¹²Irotajantsi ompocanteari antearo tampea, iro cantaincha te oncameetsatimoteriji nosavicasanojeite anta. Yora oshequiaintsiri icoajeitaque novaajeitanaja. Icoavetaca nareeteame Jenishiaqui, onta queretaquiniri. Anta onapiniti pitotsi, ocameetsatimojeitiri nosavicaejiteme anta. Icoaque anta iroyeavaquero-tame tampea, ompeantajeari. Ocameetsati intsatacoterome pitotsi Jenishiaqui: te aneasanoteroji tampea anta.

¹³Ari impoiji cameetsa ojeaoncaque tampea: ojati anta noshirejeiveta nantem. Ijitalshijieiveta ari nareejeiteame Jenishiaqui, irosati novaantanaja. Noquenacotanaque otsapijaqui Quereta.

¹⁴Iro cantaincha, te osamaniteji, ari omapocaquena antearo tampea, icantee-tiro Noreshite. Oponeanaca quipatsiqui, ¹⁵otiancasanotaquero pitotsi nianquijaqui; tecatsi oncantea ojate oquenapaa-quenta tampea. Ari noshinetacotanaca, aiquero otiancasanotirori. ¹⁶Noquenacotanaque anta ovoyejajaniqui qui pajitachari Caora. Aisati oponeanaca tampea ovoyejaqui. Opomerentsitimojei-vetaquena, iro cantaincha nomataquero naasanotavaquero pitotsijaniqui: ora onoshicapinitiri opatiqui. ¹⁷Impoiji yoancaquero marinero. Ari yaamaacaro ari ontsipareanaquea taaverapee yovetsi-cantarori antearo pitotsi, irosati yoisotan-tacarori. Aisati itsaroajeitanaque ojocaco-jeitename quipatsiqui, anta Shiritequi, irootaque yaajeitanta jarori maaroni tocoyatatsiri. Ishinetaquero pitotsi, incanti:

—Aanaquerota tampea, tecatsi ancantero.

¹⁸Oquitaitetamaque, aiquero catsini otiancacotasanojeitaquena tampea. Ari yoviinceitaquero vaararontsi, pocn, pocn, pocn. ¹⁹Omavatapaaque quitaiteri yoviincashitacaro aisati ovaararo pitotsi, soocatsa, maaroni. ²⁰Ari ocaratanaque oshequi quitaiteri: te inconijatajeji catsirincaiteri, aisati impoquiro, tecatsi. Ocantatiani tampea, antearo ojeaoncaque, sooo. Nojijeivetaca eiro navisacojetajitsi.

²¹Avisanaque oshequi quitaiteri, te noajeiteaji. Icatianaca Pavoro, icantaque:

—Noshaninca, pinquemisantaquename, oncameetsataqueme. Eirome ajoquirome Quereta, eiro otsitiime pitotsi, eiro otsoncame maaroni. ²²Iro cantaincha piveshireajeitanaquea meeca. Coajica ontsitianaque pitotsi, iro cantaincha eiro atsitiaeititsi ainti. ²³Iriotaque Tasorenti jocaacovetaquenari. Noquemisantiri nainti. Osaite noneaqueri inampire,

²⁴icantaquena: "Pavoro, eiro pitsaroitsi. Aitaque pareetaqueari Sesari. Picantqueri Tasorentsi incavintsaajeiteri maaroni picarajeitaqueri aca: ari iquemisantaquempi". ²⁵Meeca, piveshi-reajeitanaquea. Noquemisantiri Tasorentsi, niotaque ontsataaquea maaroni icantayetaquenari. ²⁶Ario coajica ojocacotaquee tampea ovoyejaqui, eiro acamajeititsi.

²⁷Ocaratanaque meeca 14 quitaiteri, meeca otsitenitanaque. Noquenacotashitanaca incajarequi pajitachari Atiria. Onianquitetanaque, yaamaaca marinero ari noquempejitanacaro otsapijaqui. ²⁸Ineantacaro, osanajatirica. Ocarati 37 metero. Oshamaniji yapiitaquero. Ocarati meeca 28 metero niotantacari quempej-tapaaque quipatsi. ²⁹Itsaroajeitanaque, icanti:

—Queariyea, atsitincacotarocari mapi.

Anta opataquiqui yoviincaquero 4 ortsatacotari pitotsi, ortsatacojatantacari nianquiaqui. Icoasanotanaque onquitaitetaje. ³⁰Icoasanovetanaca yora marinero iravisacotanaque, iroviinque-rome pitotsijaniqui inquenacotanteameri ortsapijaqui. Icoaveta irijocajeitename narori. Icoajeiveta iramatavijeitename, icantajeivetana:

—Noviinquerota ortsatacotantari pitotsi, onta otsoviquiniri. Iro naantajearori pitotsijaniqui, noviinquero ara, onquiso-tanteari antearo pitotsi.

Ja, icoajeiveta irijocajeitename. ³¹Yora Pavoro icantaqueri capitano, jeri soraropee:

—Eirorica quiso yoiro marinero pitotsi, tecatsi pincantea avirori pavisacojeitaje.

Eiro pishinetiritsi irijocajeitee.

³²Irosati ipesantacaro soraro socatsa: oca ortsatacotantaveitaniri pitotsijaniqui.

Yoviincaquero, pocn. ³³Irotanajantsi onquitaitetaje, icantajeitaqueri Pavoro:

—Tsame, poajeitavaqueata. Ocarati meeca 14 quitaiteri pinashitaca, te

poajeiteaji. ³⁴Meeca nocantasanota-quempi, poajeitea. Oshintsitacaajempi. Piotasanotanaque: tecatsi oyempine catsini.

³⁵Icantantarori oca, ipasonquitaqueri Tasorentsi, noneajeitaqueri. Icarajaquero tanta, ijivataque yoanaca. ³⁶Yoveshireajeita-naja maaroni, yoajeitanaca. ³⁷Nocarajeita-que maaroni tetarori pitotsi 276. ³⁸Iquema-jeitanaca, ari yoviincajeitaquero maaroni tirico, irosati opijoncatantanaja pitotsi.

³⁹Ari oquitaitetasanotanaji, te iriojeitaje-roji quipatsi. Iro cantaincha ineaquero ortsatsajatanaque irosati anta quipatsiqui, otiminta impanequi. Icoajeiveta iraataco-tapeeme anta. ⁴⁰Yojocajiro ortsatacotantavei-taniri incajarequi. Ari itsatacoreajiro soocatsa oisotantaveitaniri oomaro. Yovancajiro tocoya, ora otsoviquiniri. Aacotanaquena tampea, icoajeiveta iraatacotapeeme impanequivi. ⁴¹Iro cantaincha navicacotapaque nianquiaqui, eentapaaca quiripequiriqui. Avicasanotapa-que otsoviqui. Oquisotasanotapaque, te oshevatajeaji. Ora omotoncane ocarajaquero opataquiqui, patire. ⁴²Icoajeiveta soraro iroajeiterime maaroni yora yoiminqueajeita-queri. Iquenqueshiretanaca:

—Yamaatanaquecari, ishiapitsatana-queecari.

⁴³Iro cantaincha icoaque capitano iroavisa-coteri Pavoro. Te irishinejeiteriji iroajeiteri. Icantajeitaqueri maaroni iojeitatsiri yamaati:

—Pijivajeite pimitajajeitanaque, pamaajeitanaque irosati anta quipatsiqui. ⁴⁴Avirojei caari iotatsi pamaate, jero oca taavera, aisati carajayetantsiri: irootaque pamaatantanaqueari.

Aitaque ocantacari, navisacojeitaji. Naatajeitapaaaji anta quipatsiquinta.

Isavicajeitapaque Marataqui.

28 ¹⁻²Naajeitantaacari, ineshinon-
catasanojeitavaquena yora
savcatsiri. Icamantavaquena:

—Opajita oca ovoyejaca Marata.

Ari yoisavaquenaro paamari, icajema-jeitaquena:

—Caate pimpoque aca, pintatapee paamarica.

Opariaque incani, ocatsincaiteanaque.

³Yaayetapaaque Pavoro inchajempequi, aripati. Yoisapaaquero paamariqu. Ocatsirincatanaque, irosati isoquijantana- naca maranque, irosati yatsicantapaacari iracoqui, shepi. ⁴Ineajeitatiiri itsatanacari iracoqui, icantavacaajeitanaca:

—Iriitatsi oantatsiri. Ineacarove. Te intsitiatveteaji anta incajarequi, iro cantaincha irineashiiteteearota meeca.

⁵Iro cantaincha itecanaqueri maranque paamariqu, teca, pomein; te inquematsi- cateariji. ⁶Ijitalshijeivetaca ari irishintsita- naqueme ireeretacaanaquerime; irishintsite intaanaqueme, incamana- queme. Osamani yamenashejeitaqueri, sorerer. Ineakeri tecatsi oaquerine. Impoiji iquenqueshirejeitanaja aisati, icantajeiti:

—Iriotaque tasorentsitsatsiri caari icamanta.

⁷Ainiro quempeji ora iipatsite yora pincatsariventiriri savicajeitatsiri. Ipajita Povirio. Yaacameetsajeitavaquena. Ocarataque mava quitaiteri cameetsa ineshinoncajeitaquena. ⁸Ainiro iponaaca iriri priori imaamentoqui. Icatsirincata- que, ishijataca. Iquivantaqueri Pavoro, iquenquetsatacaaqueri Tasorentsi, aisati yajiriquiri, yoavisacotaqueri. ⁹Imatanta- rori oca, ipocashijeitaqueri maaroni pashini mantsiaeitatsiri. Yoavisacojeita- jiri. ¹⁰Oshequi ipincatsajeitaquena savicajeitatsiri. Irotaintsi nojate, ipajeita- vaquena paitarica coitemotaquenari.

¹¹Ari icarati mava cashiri, irosati notejeitantanaca pitotsiqui poneachari Arejantiriaqui. Otimantacari chapinqui antearo tampea, ainiro onaque pitotsi anta ovoyejaci. Ainiro isheroncayetiri

anta otsoviqui, ishiacantaqueri tsipari.

¹²Naatapaaque Shiracosaqui, ocarati mava nomanaaque. ¹³Novaanaja aisati, noshoncanajaro anta otsapijaqui, irosati Irequio. Oquitaitetamanaque oponeanaca tampea irampatequi catsirincaiteri.

Irosati oquitaitetamanaque nareetanta- cari Posoriqui. ¹⁴Noneapaquaqueri ayemisantaririnte. Icoaque nosaviquimo- tanaqueri 7 quitaiteri. Novaanaja, irosati nareetantanaca Oromaqui. ¹⁵Ari iquema- cojeitavaquena ayemisantaririnte, irosati ipocashijeitaquena, intonquiojeitava- quena. Osamani iponeayetanaca.

Iponeanaca Jororeapioqui, aisati Tireshi Taverinashiqui. Pavoro, ineantacariri, ipasonquitaqueri Tasorentsi aisati iveshireanaca. ¹⁶Nareetantacari Oromaqui, ishineyeetaqueri Pavoro isavicapaaque ivancoqui priori. Itsipata- cari aparo soraro, ameniriri.

¹⁷Mava imaapaaque, impoiji icajema- cantaqueri jivayetiriri joriopee. Yapato- jeitantacari, icantaqueri Pavoro:

—Noncamantajeitempi, noshaninca. Te noncantimateriji ashanincapée arori.

Aisati tecatsi noncantacotero oca yamejeiveitaniri ashanincani peerani.

¹⁸Iro cantaincha yoisoyeetaquena anta Jerosarequi, icantiri oromasati: “Payeri yoca”. Isampitacoventaquena pincatsari, impoiji icoaveta iroimisoquijacantaje- name. Iotaque tecatsi nanteri noncaman- teari. ¹⁹Iro cantaincha ipiatsatavacari joriopee, irootaque naventantacariri Sesari. Tecatsi noncantimateri ashaninca. ²⁰Irootaque nocajemacantantaquemperi, noquenquetsatacaaajeitaquemperi. Peerani aamaajeivetacari Quirishito impocan- teari. Meeca nocamantajeitiri ashaninca yareetaita, irootaque yoisoyeetantaque- nari carenatsaqui.

²¹Yacajeitaqueri:

—Tecatsi noneero sanquenarentsi poneachane Joreaquei, quenquetsataco-

tempineri. Aisati te intimeji ashaninca cantacotempineri. ²²Iro cantaincha nocoajeitaque pincamantena paitarica piquenqueshireyetiri. Onashitaca oca piquemisantiri: niotaque oshequi iquishimentajeitacaro anta maaroni nampitsipeequi.

²³Ari iotacaajeitaqueri jaoca oncarate quitaiteri incantavacaimentajeitanteearori. Ari oshequi ijajeitanaque ivancoqui. Icamantasanotavaqueri jaoca icanta Tasorentsi ipincatsariventanti. Intamancaro, irosati itsitenitacotanaquero. Icoaque iriotacaasanotaqueri isanquenatacotiri Moishishini, jeri maaroni camantantatsiniri: tempa isanquenatacotueri Jesoshi. ²⁴Iquemisantaqueri aparopee, itseencaqueri pashini. ²⁵Ipiatsatavacaanaca, impoiji iteentarea-vacaanaca. Icantaque Pavoro:
—Queario oca ocantaqueri Ishire Tasorentsi. Osanquenatacaaqueri Isayashini, camantantatsiniri. Isanquenataqueneri iriori ashanincani. ²⁶Icantini: “Pijate anta joriopeeque, pincamanta-peeri: ‘Otimaveta piyempita pinqueman-

teameri, iro cantaincha te piotavaqueroji. Poquireavetanaja, pamenavetanaja, iro cantaincha te pamenasanoteji”. ²⁷Te meeca aneeroji atiri iquenqueshireantari. Te inquemisanteji, te irameneji. Icantashirejeitaque: ‘Amenicari. Aquemisanticari. Ayotasanoticari. Aquenqueshi-retacari. Avavisacotacari’”. ²⁸Piojeitavaquero meeca: yoavisacotanti Tasorentsi. Meeca itianquiri quemisantatsiri iriotacaajeiteri pashinisati atiri. Inquemisantajeitavaque irinti.

²⁹Iquemantavacarori joriopee oca icantaquerir, ijajeitanaque, iquisatsata-vacaajeitanaca.

³⁰Ocarati apite osarintsi isavicaque Pavoro pancotsineentsiqui, ipinataquero. Yaacameetsajeitaqueri maaroni quivanta-jeitiriri. ³¹Icantani, icamantacotapinitiri Tasorentsi, jaoca icantari iriori ipincatsariventanti. Icamantacotapinitaqueri Avincatsarite Jeso quirishito, te irimane-roji. Te intimeji tsaneacotearine iquenquetsati.

Narotaque sanquenatimpirori:
Irocashi

YORA PAVORO ISANQUENATINIRI OROMASATI

Ivetsajeitari Pavoro quemisantajeitatsiri
anta Oromaqui.

1 ¹¿Ainirompi oromasati? ¿Tecatsimpa oajeitempíne? Narotaque Pavoro sanquenajeitimpírori oca. Itiancaquena Jesoquirishito nantaveetiniri. Icoacaaquena noncamantajeiteri atiri jaoca icantari Tasorentsi yoavisacotanti. Tecatsi pashini incoacayenari. ^{2,3}Tempa peerani icamantajeitaquerini Tasorentsi yora quenquetsatacotaqueriniri imponeaquea inquitequi Itomi, irantiritapaaque, iroavisacojeiteri maaroni caari cameetsajeitatsi. Icantauerini irishanincatajeari Iravirini. Impoiji isanquenatacotaqueriniri yora quenquetsatacantatsiniri, irootaque otimantacari meeca irineane Tasorentsi. ⁴Impoiji ipoaque Jesoquirishito aca quipatsiquica, yoyeetaqueri, impoiji itinaanaja. Ayojeitaque ainiro itasorenca, iriotaque itemi Tasorentsi, aisati quiso oaqueri Ishire Tasorentsi. Irootaque apincatsajeitancariri. ⁵Aquemisantaqueri, irootaque icavintsaajeitantaqueeri Tasorentsi, aisati itiancajeitantaqueeri anquemisantacaajeiteri maaroni itsipapee atiri. ⁶Aisati avirorije, icoacaquempi pishanincajeiteari Jesoquirishito. ⁷Oshequi inintajeitaquempi Apa Tasorentsi, aisati maaroni itsipapee quemisantajeitiriri. Meeca nocoaque incanteani incavintsaasanojeitempi, aisati cameetsa irisavicacaajeitempi. Aisati inquempetaaajeitempi Avincatsarite Jesoquirishito.

Icantiri Pavoro: “Nocoaque nojate pinampiqui, noneempi”.

⁸Meeca noncamantempi: jaocarica nojayetaqueri noquemacotapinitaquaempi piquemisantasanojeitaque. Iquemacojeitaquempi maaroni atiripee, savicayeta-tsiri jaocaricapee, irootaque nopasonquittantacariri Tasorentsi, tempa narosati narori quemisantiriri Jesoquirishito. ⁹Ioti Tasorentsi nocantapinitiri iramitacojeitempi. Noquearioventiniri nantaveetiniri, aisati nocantani noquenquetsatacotiri Itomi: nocamantajeitiri atiri jaoca icanta yoavisacotanti. ¹⁰Aisati nocantiri Tasorentsi: “Nocoaque, Apa, pincoacyena nareejeiteari oromasati”. ¹¹Oshequi noquenqueshirejeitimpí noneajeitempi: nocoaque omatacaaajeitempi paitapeerica ora Ishire Tasorentsi, pinquemisantasano-tanteariri. ¹²Aisati ariorica aneavacaajeitea aquemisantasanojeitaque, ari aveshireimentavacaajeitea. ¹³Nocoaque piojeitero, noyemisantaririnte, oshequi nocoapiniveta nojatashijeitimpime, irootaque te incoacayenaji Tasorentsi nojatashitempi. Nocoaveta namitacojeitempe, oquempetaca namitacojeiteri itsipapee ashanicá anta pashinipeequi nampitsi. ¹⁴Nocoasanotaque nonquenquetsatacaaapiniteri yora quereshiasati aisati yora itsipapee atiri; yora iovetachari aisati yora caari iotatsi. Tempa itiancaquena Tasorentsi nonquenquetsatacaaajeiteri maaroni. ¹⁵Irootaque

nocoasanotantacari nonquenquetsatacaa-
jeitempi ara Oromaqui aisati.

Icantaqueri paitarica inquenquetsatacoteri.

¹⁶Te nompashiventeaji nocamantajeitiri atiri jaoca icanta Quirishito icavintsaajeitaquee. Intasoncaventeri Tasorentsi maaroni quemisantajeiterineri, iroavisa-cojeiteri. Ijivataque iotaque jorio, iro cantaincha ocameetsati iriojeitee meeca maaroni itsipapee atiri. ¹⁷Pinequiero, ariorica anquemisantasanotaque, iroameetsajeitaquee Tasorentsi. Tempa peerani isanquenatacairy Tasorentsi yora Avacoconi: “Iroameetsajeiteri Tasorentsi maaroni quemisanterineri, cameetsa irisavacajeitanteari anta inquitequi”.

Yora itsipapee atiri te iriojeiteriji Tasorentsi.

¹⁸Itimi Tasorentsi inquitequi, iro cantaincha iotacaajeitaquee iquisaqueri maaroni caari quemisantiri, aisati maaroni antapinitirori caari cameetsatsi, aisati iriori yora maaroni caari coatsi inquemisantero oca cameetsatatsiri. ¹⁹Incoajeitaquericame iriojeiteme jaoca icantari Tasorentsi, iriojeiteme. Te ompomerentsitimoveteariji, tempa yoamejeivetari. ²⁰Peerani oconijataque maaroni yovetscajeitiri, ayojeitancacari itimi Tasorentsi, aisati otimi itasorenca. Conijatasanotaque. Tecatsi incantajeitea tseencantatsiri incantajeite: “Te niotacoteriji Tasorentsi”. ²¹Tempa iojeivetari, iro cantaincha te impincatsajeiteriji. Icavintsaapinijeivetari, iro cantaincha te impasonquijeiteriji iriori. Te inquenqueshirejeiteaji: yatsipetashitacaro inquenqueshiretashitacaro paitapeerica; meeca te aneajeiteroji iotantari. ²²Icantajeiveta: “Oshequi nioti nainti”, iro cantaincha te iriotasanoteji. ²³Icameetsatasanotaque irinti Tasorentsi, icantani itimi inquitequi, iro cantaincha te impincatsajeiteriji

atiripee. Jero ishiacantajeitaqueri tsimeripee, poshinripee, maranquepee, maaroni: joo, irointi ipincatsatashitaro yovetscashiyevetari.

Iroasanquetaajeiteri Tasorentsi yora caari joriotatsi.

²⁴Oshequi icoajeitaque atiri iquenqueshiretapijjeitaquero caari cameetsatsatsi, imayempitavacaapinijeita; icanti Tasorentsi: “Ari incanteata, eiro iquemitsi”. ²⁵Ari peerani iosanojeivetari jaoca icanta Tasorentsi, iro cantaincha yamatavijeitaja irisati. Ipincatsatashijeitacaro maaroni yovetscajeitiri Tasorentsi, iquemisantsashijeitacaro. Irintiquea yora vetsicajeitrori, te impincatsajeiteriji iriori. Tsame ainti aneacameetsajeiteri, ancantaitati-yempani. Tempa aitaque ancantajeiteari. ²⁶Ari ishinetiquerri Tasorentsi yantanirojeitaquero paitarica icoajeitaqueri. Te oncoyeji tsinane aye ojime, irointi ocoaque otsinampairo otsinaneronte. ²⁷Aisati iquempetaca shirampari: te incoyeji iraye ijina, irointi itsinampaapnitiri ishiramparirinte. Paitapeerica yantajeitaqueri, iro cantaincha te irioteji impashiventea. Impoiji yoasanquejeitaqueri Tasorentsi, ineacarove.

²⁸Ari te incoajeiteji impincatsajeiteri Tasorentsi, irootaque icantantari Tasorentsi: “Incanteata. Inquenqueshireterota caari cameetsatsatsi, aisati eiro itimitsi cameetsa”. ²⁹Imatapinijeitaquero caari cameetsayetatsi: yashi yoiro te incameetsajeiteji, ineventitacari ishaninca yashiye-tari, icoaque iroashinoncaayeteri itsipapee, iquisavacaajeitaca, yoavacaajeitaca, iquisatsatavacaajeitaca, yamatavitapinijeiti, itsimaavacaajeitaca, yaamaacotavacaajeitaca, ³⁰icantimatava-kaajeitaca, iquisajeitaqueri Tasorentsi, icantimajeitaqueri ishaninca, inintajeitaja irisati, ishemejeiti, icoacoayetaque irantajeitero pashinipee caari cameetsa-

yetatsi, ipiatsajeitacari ashijeitariri,³¹ te aneajeiteroji iojeitantari, te inquemisanta jeiteji, te irinintavacaajeiteaji, te incavintsavacaajeiteaji.³² Iojivetaro icantiri Tasorentsi: “Maaroni antapinijeitirori caari cameetsatatsi irijajeite Sharincaveniqui”, iro cantaincha itsataa yantashijeitacaro aisati yantacaajeita queri pashinipee.

**Aisati iriori jorio, eiro
yavisacotashijeitajatsi.**

2 ¹Naamaaca itimi jorio cantatsiri: “Ineashiitacarove irintipee, te incameetsajeiteji”. Iro cantaincha noncamantemp; queariompi, ariorica pincantacoteri itsipapee atiri: “Ainiro yantane”, ainiro pantane avirori, piquemejiteacari yora picantacovetacari. ²Ayojeitaque ocameetsati iroasanquetaa jeiteri Tasorentsi yora antirori caari cameetsatatsi. ³Iro cantaincha avirori, picanti: “Ainiro irantanejei irinti”, aisati piquemejiteacari, pantapinijeitiro avirori caari cameetsatatsi. ¿Pijitashampa eiro yoasanquejeitimpitsi avirori Tasorentsi? ⁴Pamene, oshequi ineshinoncajeitaquempi, icavintsaasanojeitaquempi, te intsipaite irishemempi: osamani icoavetaca pinquenqueshirejeita jeame, pojocajeitajerome caari cameetsatatsi pantajeitiri. Iro cantaincha, te pimajeiteroji.

⁵Te pinquenqueshireteroji icantiri Tasorentsi, te pinquenqueshireempaji. Aiquero pijatattipantapinitaquero caari cameetsatatsi, irootaque iroasanquemtempiri Tasorentsi. Queario, coajica inquisasanojeiteri maaroni antirori caari cameetsatatsi. Iro cantaincha ayojeitanque icameetsatasanoti Tasorentsi, eiro iquisashitaritsi atiri, iotasanoquaqueri maaroni, jaocarica icantajeitari. ⁶Iroasanquejeiteri maaroni caari cameetsatatsi, irisavicacaajeiteri cameetsa anta inquite-

qui maaroni cameetsajeitatsiri. ⁷Ariorica acoasanotaque aneajeiteri Tasorentsi aisati ancameetsatasanotanaque, aisati ancantaitatiyempani antime inquitequi, tsame anquearioventajeitero maaroni icoacaajeitaqueeri Tasorentsi. Impoiji irisavicacaajeitjee inquitequi, ancantaitatiyempani asaviquimojeitajeri. ⁸Iro cantaincha ainiro irinti caari cameetsatatsi, caari coatsi riotoro icoacaavetariri Tasorentsi: icoashijeita irantapinitero caari cameetsatatsi. Ari inquisasanojeiteri Tasorentsi, iroasanquetasanojeiteri. ⁹Irimoncararatavacaajeitea jorio aisati itsipapee atiri: ariorica incanteani irantero caari cameetsatatsi, ari irashinoncajeitea, iroasanquejeiteri Tasorentsi. ¹⁰Iro cantaincha maaroni antapinitirori cameetsatatsiri irineapaa jeri Tasorentsi inquitequi, irineacameetsatavajeri iriori, irisavicacaajeiteri cameetsa: jorio, itsipapee atiri, maaroni. Amoncararatavacaajeitaquea. ¹¹Yora Tasorentsi te irinashitacaajeitajiji itsipasatipee atiri: ioti aquempetavacaajeitaca.

**Timatsi iotacaajeivtariri
yora caari joriotatsi.**

¹²Yora itsipapee atiri te irineeroji isanquenaren Moishishi, iro cantaincha ainiro yantayetiri, aisati irijate Sharincaveniqui. Iro cantaincha eiro icantiritsi Tasorentsi: “¿Paita caari piquemisantataro isanquenatiri Moishishi?” Iro cantaincha irinti iovetarori isanquenare ainiro yantayetiri, aisati irijate Sharincaveniqui; ari iroasanquetasanojeri Tasorentsi, incanteri: “Te pinquemisanta sanoteroji oca isanquenatiniri Moishishini”. ¹³Te irineacameetsatashiteariji Tasorentsi quemashijeivtarorri irineane, irintiquea ineacameetsatasanojeiti quemisantasanojirori. ¹⁴Pameneri yora itsipapee atiri, piote jaoca icantajei-

tari. Te irineeroji Sanquenarentsi, iro cantaincha ainiro imayetaquero ocantayetiri. Pineaquero, iotashiyetiti cameetsa. ¹⁵Ariorica irisavique cameetsa, ayojeitaque iovetaro ioriori ocantiri Sanquenarentsi. Ainiro iquenque-shireantavetari: iojeitaque ocameetsatrica yantajeitiri. ¹⁶Coajica incanteri Tasorentsi yora Jesoquirishito: “Aviro iotirori jaocarica ocantari yantajeitaqueri atiripee, pitsoteaquero maaroni iquenqueshirejeitiri. Meeca aviro cantatsine jaocarica irijajeiteri. Aviro cantatsine ariorica aneacameetsateri, ariorica avashinoncayeri”. Irootaque nocamantajeitiriri narori, inquenqueshi-rejiteanteari, iroavisacojeitantajeari.

**Yora jorio iojeivetaro isanquenaren
Moishishi: ariorica irantero caari
cameetsatatsi, ontimasanote irantane.**

¹⁷Iro cantaincha, avirorica jorio, queariompa. Picanticari: “Niotiro nainti isanquenare Moishishi. Noshanincatas-notacari nainti Tasorentsi”. Pishematicari. ¹⁸Piojeitiro icoacaajeitaqueeri Tasorentsi. Peerani piovetacaroni Sanquenarentsi, irootaque piojeitantavetacaroniri cameetsayetatsiri. ¹⁹Meeca pijitashijeiveta pimatero piotacaajeiteri maaroni caari iojeitatsi. Oquempetetaca pintsiota-cojeiterime maaroni timajeitatsiri tsiteniriqui. ²⁰Piotacaajeiterime maaroni caari iojeitatsi, oquempetetaca poamejeiterime jananequipee. Queario piojeivetaro Sanquenarentsi, tempa cameetsa oamevetaqueMPI, te amatavitanteji.

²¹Pamene, poamejeiterime itsipapee, iro cantaincha ɿpaita caari piotanta avirori? Tempa oncameetsateme poametavacaajeiteame avirori. Jero picantajeitaqueri itsipapee: “Eiro picoshititsi”. Tempa picoshiti avirori. ²²Picantajeivetari: “Eiro painmentarotsi pijina”. Tempa painmentaro avirori pijina. Picantajeivetari: “Eiro

picantirotsi povetsicane: ‘Irio Tasorentsi. Caari oni’. Iro cantaincha ɿpipincatsasanotirimpavainti Tasorentsisanori?

²³Pishemejeitaque, picantajeiveta: “Niotiro nainti irineane Tasorentsi”. Iro cantaincha terica pimoncarayeterojo ocantayetiri, tempa pitseencaqueri Tasorentsi. ²⁴Jero oca isanquenayeetinirri peeraniniri: “Ainiro yantayetiri ajorioririnte caari cameetsatatsi, irootaque icantimajeitantariri itsipapee atiri Tasorentsi, icantajeiti: ‘Te incameetsateji Tasorentsi, eiro aquemisantiritsi’”.

Jaoca icanta quemisantasanotatsiri.

²⁵Pamene, ariorica piquemisantaquero irineane Tasorentsi, te pantsipetashiteaji pijoriotaque, tempa piotaqueri Tasorentsi. Iro cantaincha terica pinquemisanteri, patsipetashita pijoriotashiveta. ²⁶Ariorica inquemisante caari joriotatsi, tempa irineacameetsateri Tasorentsi ioriori. Inquempetacayeari jorio, quemisantsirsiri ioriori. ²⁷Avirorica jorio, piovetarorica isanquenare Moishishi; iro cantaincha terica pinquemisantasanotero, ɿocameetsatimpa? Teve, te oncameetsateji. Jeri yora caari joriotatsi: te irineeroji Sanquenarentsi, iro cantaincha ariorica irisavique cameetsa, ari irimataquero icoacaakeriri Tasorentsi. Tempa ocameetsatasanoti oca. ²⁸ɿJaoca icantari quemisantasanotatsiri? ɿJoriompa inajeiti? Teve. ɿIriompa toyantajeita-chari? Teve, caari ini. ²⁹Irinti quemisantincari yora quenqueshiretapinitiriri Tasorentsi. Te iro irineacameetsatimenteri itoyeanta, iroitquea ineacameetsatimentiri iquemisantiri. Eivorica ineacameetsatiritsi atiri, irintquea Tasorentsi neacameetsaterine.

3 ¹Naamaaca picantaque: “ɿNatsipetashitampa nojoriotaque? ɿNatsipetashitampa notoyeanta?” ²Te pantsipeve-tearoji pijoriotaque. Tempa irio jorio

yoametiri Tasorentsi. ³Queario, te inquemisantajeiteji maaroni, ainiro amataviyeterinemerri Tasorentsi. ⁴Ariompa iramatavitaqueri Tasorentsi yora quemisantiriri? ⁴Teve, eiro yamatavitiritsi. Ariorica iramatavitanjajeite maaroni atiri, iro cantaincha tecatsi incantea Tasorentsi iramatavijeitee irinti. Tempa peerani isanquenatinii Iravirini, icanti: "Otampaticatasanotaque, Tasorentsi, pineane: te pintseeyaji. Tecatsi incantea atiri impiatsajeitempi".

⁵Naamaaca itimi cantashitachari: "Ariorica nantero caari cameetsatatsi, impoiji iriojeite noshaninca icameetsatasanotaque Tasorentsi, te inquempetenaji narori. Impoiji ariorica impincatsajeiteri. ⁶Paita meeca inquisimentantenaorri Tasorentsi caari cameetsatatsi nantayetiri? Tempa irootaque irineacameetsatans teariri noshaninca". ⁶Teve. Te oncameetsateji oca yaamaayevetari. ⁷Arimpa iramatavitaquee Tasorentsi? Icanti intianqueri antapinitirori caari cameetsatatsi Sharincaveniqui. ⁷Pinequero, ⁸ocameetsatimpa nontseeya niotacante rimeri atiri te intseejyaji Tasorentsi, impoiji impincatsateri? Impoiji oncameetsateme nontseeya, eirome iquishimentanarome Tasorentsi notseeya. Iro cantaincha, te oncameetsateji oca icantiri. ⁸¿Ocameetsatimpa antapinitero caari cameetsatatsi inquimoshiretanteeari Tasorentsi? Teve, eiro antirotsi. Ocameetsati intianqueri Tasorentsi Sharincaveniqui cantashiniroyetarori oca, aitanaquem paquea irineashiiteteartave coajicani. Iro cantaincha itimi cantacotashitanari: "Yoametiri Pavoro ashinina yantiro caari cameetsatatsi". Itseejashita iriori.

⁹Ari arojei jorio. ⁹Ocameetsatimpa ancante: "Te incameetsajeiteji itsipapee atiri, aroquea ainti, acameetsajeiti"? Te oncameetsateji ancantero oca. Tempa amoncaratavacaajeitaca, ainiro antanejei

maaroni: aroripee, aisati iriori itsipapee atiri. ¹⁰Tempa aitaque ocanti Sanquenarentsi: "Te intimeji cameetsatatsineri, tecatsi catsini. ¹¹Te intimeji coatsine irioteri Tasorentsi, aisati te intimeji coatsine iriotero icoacaaqueriri. ¹²Iquishi manataqueri Tasorentsi, yantajeitiro caari cameetsatatsi. Te intimeji cameetsatatsine, tecatsi catsini. ¹³Te oncameetsateji catsini iquenquetasatashiyetari. Oshequi itseeya. Oshequi catsini iquisatsajeitiri ishanincabee. ¹⁴Oshequi yoamaimanatiri ishaninca, iquisatsatapinijeitiri. ¹⁵Aisati yoashiyetacari ishaninca, shemi, shemi. ¹⁶Jaocarica ijayetaqueri, yoashinoncaayetaqueri ishaninca. ¹⁷Te iriojeiti catsini incavintsante, irineshiloncatante. ¹⁸Te impincatsajeiteri Tasorentsi". Irootaque isanquenatacaaqueriniri Tasorentsi peeraniniri.

¹⁹Ayojeitaque meeca irashinoncaasano tea maaroni iojeivtarori isanquenareni Moishishi. Iojeiveta paita icoacaaqueriri Tasorentsi, tecatsi incantajeite: "Te nioteji". Tempa iroashinoncaajeiteri maaroni atiri antirori caari cameetsatatsi. ²⁰Tecatsi incante atiri: "Nomajeitaquero maaroni ocantiri isanquenareni Moishishi, meeca irineacameetsatena Tasorentsi". Teve, te irimateroji. Tempa irootaque Sanquenarentsi oamejeiteeri ainiro antane.

Yoavisacojeitaqueri Tasorentsi maaroni quemisantajeitaqueriri Quirishito.

²¹Meeca noncamantempi: yora Moishishi aisati yora camantantatsiniri icamantajeitaquee jaoca ancanteari irineacameetsatanteeri Tasorentsi. Te incamanteeji amoncaratero Sanquenarentsi, ²²irooti icamanteeni ariorica aquemisantaqueri Jesoquirishito, ineacameetsajeitaquee Tasorentsi. Aitaque amoncaratavacaajeitaca, arojeitaque jorio aisati itsipapee atiri: ²³ainiro antajeitaqueri

caari cameetsatatsi, maaroni. Te antajeiteroji cameetsayetatsiri icoacaajeitaqueeri Tasorentsi.²⁴ Ariorica aquemisantaajeitaqueri Jesoquirishito, yoavisacojeitaquee Tasorentsi, ineacameetsajeitaquee. Tempa ineshinoncajeitaquee: te inquenqueshireteroji aisati caari cameetsatatsi antajeitaqueri.^{25,26} Itiancaqueri itomi, icamimentaquee, aparajimentiageitaquee iriraja. Meeca, ariorica aquemisantaqueri, moncarataca, eiro iquenqueshiretajirotsi aisati antajeitaqueri. Aisati peerani, tequeratani impoqueni aca quipatsi qui Jesoshi, te iroasanquejeiterini Tasorentsi yora quemisantatsiniri. Iotitani coajica incamimentajeiteri iriori Jesoshi. Irootaque ayojeitancari icameetsatasanotaque Tasorentsi aisati ineacameetsajeitaqueri maaroni quemisantajeitiriri Jesoshi.

Tecatsi ancantajeitea arori ashemete, te amateroji avavisacotaje arosati.

²⁷Tecatsi meeca ancantea ashemete. Tecatsi ancantea aisati avavisacotaje arosati. ¿Paita caari amatantaro? Tempa irinti quemisantatsiri yoameetsatiri Tasorentsi.²⁸Pinequero, ariorica aquemisantaque, yoameetsataquee Tasorentsi. Te incantajeiteeji: “Pimoncarrajeitero isanquenare Moishishi pavisacojeitantajeari”.²⁹¿Apanirompa yoavisacojeitiri Tasorentsi jorio? Tempa aisati yoavisacojeitaqueri pashinipee atiri aisati.³⁰Itimi aparoni Tasorentsi, icavintsaaajeitaquee maaroni. Iotaque amoncaratavacaajeitaca. Ariorica inquemisante jorio, iroavisacoteri. Ariorica inquemisante itsipapee atiri, iroavisacoteri.³¹Ariorica aquemisantaqueri Jesoshi, ¿ocameetsatimpa ajocajero Sanquenarentsi? Teve, eiro ajocajirotsi. Ariorica aquemisantaque, irootaque amatantearori ocamantajeitaqueeri.

**Ineacameetsataqueri
Tasorentsi Avaramani.**

4 ¹Piojeitaque jaoca icantaniri ashanincasanorini Avaramani. Meeca noncamantempi: ²te iroavisacotajeja irisati. Iroavisacoteame irisati, irimaterome irishemeteme, incanteme: “Oshequi nocameetsataque, navisacotantajari”. Iro cantaincha tempa iotaque Tasorentsi te incameetsateji Avaramani.³¿Paita ocantiri Sanquenarentsi? Tempa ocanti: “Iquemisantaqueri Avaramani Tasorentsi, irootaque ineacameetsatantarini”.⁴Noshiacantempiro: intimerica tsameeterine ivatorote, tempa ocameetsati impinateri. ¿Ocameetsatimpa incanteri: “Jeri yoca, nompashitempuri”? Te oncameetsateji: tempa pomerentsitaca itsameetiniri.⁵Irinti Tasorentsi, inashita: eiorica amayetirotsi cameetsayetatsiri, iro cantaincha ashiretearirica, aitaque iroameetsajeitee. Eiro apomerentsiventirtsampinateri.⁶Pinequero, tecatsi antasanote iroameetsatanteeri Tasorentsi, iro cantaincha iriveshireacaajeitee, ariorica anquemisanteri. Tempa irootaque icantaueniri Iravirini:⁷“Iquimoshirejeitaque maaroni atiri yora icavintsairi Avincatsarite. Eiro iquenqueshiretajirotsi aisati caari cameetsatatsi yantayetiri.”⁸Queario, inquimoshiretasanotaque, iotaque eiro iquishimentiritsi yantayetiri”.

⁹Ari, ¿janica iquenquetsatacotiri Iravirini? ¿Apanirompa ajorioririnte? Tempa iquenquetsatacotiri aisati maaroni itsipapee atiri. Tempa ayojeiti iquemisantaque Avaramani, irootaque yoameetsatantariri Tasorentsi.¹⁰Iro cantaincha jaoca icantacari yoameetsatantariri Tasorentsi? Tequerani irijorioteni, tequerani intoyeanteani.¹¹Pinequero, tequerani intoyeanteani ishiretarini Tasorentsi, yoameetsatantariri. Impoiji-

quea itoyeantaca, iojeitantzacari ishaninca ijivataque iquemisantaque. Meeca ayojeitaque aitaque inquempejiteari iriori itsipapee atiri: eiro ijitsi ariorica intoyeantea irineacameetsatanteariri Tasorents, irointiquea inquemisante. Tempa yora Avaramani iriotaque intasanotacarori iquemisanti.¹² Aisati inquempejiteari maaroni ashanicapee arori, ariorica inquemisante. Eiro ijitsi ariorica intoyeantaquea, ari iraviscotaje, irointi ocameetsati inquemisante iraviscotantajeari. Inquempeteari Avaramani, tequerani intoyeanteani peerani.

Jero oca icantiriniri Tasorents Avaramani

¹³ Ari iquemisantaque Avaramani, irosati yoameetsatantariri Tasorents, impoiji icantaqueri: “Nocoaca aquempi coajica pimpincatsaventajeteri maaroni quipatsati. Pincarajeiteri maaroni quempejitempi-neri piquemisanti, pimpincatsariventanta-jeite”. ¿Paita icantantaririn oca? ¿Imoncarayetironimpa isanquenare Moishishi? Teve, tequerani ontimeni. Iro icantantaririn, ishiretaracarini.¹⁴ Irioricame incanteme yora coavetachari irimoncaraterome isanquenare Moishishi, iramataviterime Avaramani. Tecatsime incanterime shiretariri.¹⁵ Iroashinoncaajeiteri Tasorents maaroni caari moncaratiro isanquenare Moishishi, inquisaqueri. Iro cantaincha eioricame otimime isanquenare, tecatsime inquisimenteemerri Tasorents.¹⁶ Ariorica ashiretacari Tasorents, tempa imoncarataquero icantaqueri. Queario, ineshinoncajeitaqueri maaroni quempejitariri Avarama. Te apaniro irineshinoncajeiteri jorio, irointi ineshinoncajeitaqueri maaroni quemisanta-tsiri. Tempa iriotaque Avarama intacarori iquemisantaque; ariorica aquemisantaque, aquempejitejari.¹⁷ Tempa icantaquerin peerani Tasorents: “Avirotaque intasanotacarori, impoijquea inquempejitempi

oshequi itsipapee atiri”. Iriotaque Tasorents quiso oaquerirri Avaramani. Aisati yoaneajiri camayevetainchari, tempa irisati timacaajeitirori maaroni aneajeitaqueri.

¹⁸⁻²⁰ Iotacotaca Avaramani yanteashipa-taque, irotimataints incame. Aamaaca ocarataque irosarints 100. Aisati iotiro ijina, shiravar oni. Te intimeji itomi catsini, iro cantaincha icamantaqueri Tasorents: “Irishequianaje pishanincasano-ni”. Te intseenqueriji Tasorents, irointi iquenqueshiretaquero icantaqueriri, iotaque queario icantaqueriri, irimoncara-taquero maaroni. Tequerani intimeni ishanincani, iveshireimentacari Tasorents, icanti: “Tempa icameetsataque Tasorents”.²¹ Iotasanolini ainiro itasorenca Tasorents, tecatsi pomerents-timotearine; iotasanolini irimatero maaroni icantaqueriri.²² Irootaque icantantacari Tasorents: “Ishiretaquena Avarama, irootaque noneacameetsatanta-riri”.^{23,24} Irootaque icantaquerinir Avaramani, irosati meeca icantajeita-queeri arori; ayojeitaque ariorica ashiretari Tasorents, ineacameetsajeita-quee, iquempetacaantajeitaquee te anteroji caari cameetsatatsi. Tempa iriotaque oitinaajiriri Avincatsarite Jesoshi.²⁵ Otimi antajeitiri caari cameetsatatsi, irootaque icamimentanta-jeitaqueeri Jesoshi. Impoiji itinaanaja aisati, irootaque ayojeitantzacari maaroni ineacameetsajeitaquee, oquempetaca te antapinterojo caari cameetsatatsi.

**Ineacameetsajeitaquee Tasorents
ayojeitantzacari antime inquitequi,
ancantaitatiyempani.**

5 ¹ Ari icamimentajeitaquee Avincatsarite Jesoquirishito, yoavisacojeita-quee. Meeca ashirejeitacaro maaroni icantaqueeri Tasorents, irootaque ineacameetsajeitantzajeri, oquempetaca te anteroji caari cameetsatatsi; meeca

yaacameetsajeitaquee, maaroni.

²Aquemisantaqueri Quirishito, irootaque icavintsantaqueeri Tasorentsi, icantatiani. Oshequi aveshireimentacari, ayojeitaque aneajeitajeri anta ipincatsaritasanotinta. ³Aisati, ariorica aquemaatsicatacaro paitapeerica, cameetsa aveshireimenteari Tasorentsi. Ayojeitaque ariorica aquemaatsicatacaro, yamitacotaquee amavetantarori, eiro ashemantatsi.

^{4,5}Aisati ariorica ayoti amavetiro, yamitacotaquee Tasorentsi aquearioventataquero antaveetiniri Tasorentsi. Ariorica aquearioventiniri paitapeerica, ayotanaque ashiretacaro icantaqueeri, aisati ayotanaque te iramatavijeiteji. Tecatsi incantee iramatavijeitee, tempa quiso oajeitaquee Ishire, irootaque meeca inintasanojeitantaqueeri catsini. Aveshireimentacari.

⁶Peerani ashinoncaasanojeitaca, tecatsi ancantea avavisacotajea arosati. Impoiji omoncaratantacari, ipocaque Quirishito. Te ampincatsaveteariji, iro cantaincha icamimentajeitaquee. ⁷Ari te aneapinitiriji atiri coatsiri incamimenteri itsipapee cameetsatatsiri, iroavisacotanteariri. Iro cantaincha aamaaca itimi aparopee camimentiriri cameetsatatsiri. ⁸Arojeiquea ainti, te ancameetsajeiteji, iro cantaincha itiancaqueri Tasorentsi Itomi icamimentajeitaquee. Tempa irootaque ayojeitacari icavintsaasanojeitaquee, inintasanojeitaquee. ⁹Aparajatimentaquee iriraja, icamimentajeitaquee. Meeca inecameetsataquee Tasorentsi, oquempevetaca te anteroji caari cameetsatatsi. Coajica, inquisheri Tasorentsi maaroni antapinitirori caari cameetsatatsi, irompa ainti, aitaque iroavisacojeitaquee. ¹⁰Peerani aquisaveitarini Tasorentsi, iro cantaincha icamimentajeitaquee Itomi, meeca aneacameetsataqueri Tasorentsi; aisati atiri, inecameetsataquee. Meeca eiro

icamajitsi aisati Jesoshi, irointi yaneasanotaji, imatantarori itasoncaventapinijeitaquee meeca. ¹¹Aisati ayojeitaque ariorica aquemisantaqueri Avincatsarite Jesoquirishito, inecameetsajeitaquee Tasorentsi. Tempa irootaque aveshireimentantariri meeca.

**Yantaqueri Aran aisati
yantaqueri Jesoquirishito.**

¹²Peerani intanacaro caari cameetsatatsi aparoni shirampari, yora Aran; irootaque icamantacari impoiji. Aisati aquempejeitacari arori, aisati iriori maaroni pashimipee atiri; antajeitaquero caari cameetsatatsi: ashi avajeitiro. Irootaque meeca acamanjeitantariri maaroni: ashi airo acamanjeiti maaroni.

¹³Peerani te ontimeni isanquenaren Moishishi. Yantapinjjeitaquero atirini caari cameetsatatsi, iro cantaincha te iriotasanojeteni paita icoacaasaanojeitacari Tasorentsi: pinequiero, te ontimeni irineane. ¹⁴Iro cantaincha icamajiteitaque maaroni atiri: yora Aran, irootaque nijantiquerori, irootaque icamajiteitacari maaroni impoitiriri itimi, irosati itimantacari Moishishi. Oamaajeitacari yantiniri Aran, te iro oamayerine yantayetiri atiri. Yora Aran ishiavetari pashini pocatsiri impoiji, ¹⁵iro cantaincha inashita aisati. Otimi yantaqueri Aran icamajiteitacari atiri. Iro cantaincha icavintsaasanojeitaquee Tasorentsi, te inquisimentasanoteeroji antayetiri, irootaque itiancantacariri yora impoitatsiri ipoqui: yora Jesoquirishito.

^{16,17}Oca yantaqueri Aran oamaajeitaqueri oshequi atiri, irointi oca yantaqueri Quirishito oaneajeitajiri oshequi atiri. Meeca icavintsaasanojeitiri Tasorentsi oshequi atiri, te inquenqueshiretacotajeriji yantajeitaqueri, irointi inecameetsajeitaqueri maaroni quemisantiriri Quirishito. Yoaneajeitaqueri maaroni, incantatitiyempani irisavique inuitequi.

¹⁸Yantaqueri caari cameetsatatsi aparoni shirampari: yora Aran, irootaque

ajajeitanteameri Sharincaveniqui arori. Iro cantaincha ainiro yantaqueri pashini shirampari, yora Quirishito. Yoameetsa-jeitaquee irinti, asavicajeitantaejari inquitequi, ancantaitatiyempani.¹⁹ Te inquemisanteriji Aran Tasorentsi, irootaque caari acameetsajeitanta. Iquemisantaqueri Quirishito iriri, irootaque yoameetsajeitantaqueeri.

²⁰ Isanquenatacaqueri peerani Tasorentsi Moishishi ayojeitancatari te oncameetsa-teji catsini oca antajeitaqueri. Te ancameetsateji catsini, iro cantaincha oshequi catsini icavintsaajeitaquee Tasorentsi.²¹ Ari te ancameetsajeiteji, irootaque acamajeitancatari, iro cantaincha aquemisantajeitaqueri Avincatsarite Jesoquirishito, irootaque icavintsaajeitan-tajeeri Tasorentsi. Te inquishimenterojo antajeitaqueri, irointi yoameetsajeitajee ancantaitatiyempani asaviquimojeitajeri anta inquitequi.

**Ariorica avaotisajeitaja
aquempetacantajeitaca atsipajeitacari
Quirishito acamajeitaque aisati
atinaajeitanaja.**

6 ¹ ¿Paita antajeiteri meeca? ² Antapinije-tajerompa caari cameetsatatsi incavin-tsantapinijeiteeri Tasorentsi? ² Teve. Eiro catsini antapinitajirotsi aisati caari cameetsatatsi. Oquempetetaca acamaque, eiro amatantaro antapinitajero aisati. ³ Paitasa, meeca, antapinitantajarori? ³ Ariorica aquemisantaqueri Quirishito aisati avaotisamentajeitacari, aquempetetaca acarajeitaqueri acamajeitaque. ⁴ Aisati aquempetetaca acarajeitaqueri atijajeitaca, aisati aquempetetaca atinaajeitanaja. Meeca anashijetaja, aquempejeitacari Jesoshi: icamaque, impojiri itasoncasanotajiri Apa Tasorentsi itinaantanajari aisati. Meeca inashitanaja, te inquempetajeoji peerani.

⁵ Ari piquempejeitacari Quirishito. Oquempetetaca picarajeitaqueri picamajei-

taque, aisati oquempetetaca picarajeitaqueri pitinaajeitanaja: paneajeitanaji, iro cantaincha pinashijetanaja maaroni. Te inquempeteoji Quirishito peerani; aisati avirorije, te pinquempejeiteoji peerani. ⁶ Peerani oshequi picoapinijeitini pantapi-nijeitironi caari cameetsatatsi, iro cantaincha oquempetetaca pitsipatacari Quirishito pipajacojeitaca coroshiqui, picamajeitaque: ⁷ paitampa pincoantajeitajeari aisati pampiitajero caari cameetsatatsi? Peerani oquempetetaca avirojei iratiritepee camaari, yantacaapinitaquémpí caari cameetsatatsi; iro cantaincha meeca oquempetetaca picamaque, tecatsi incantea iromperanatajempí aisati. ⁷ Pinequero, ariorica incamaque atiri, eiro itimitsi omperanajeitajearineri. Meeca avirori, eiro pantajirotsi meeca caari cameetsatatsi. ⁸ Ariorica picarajeitaqueri Quirishito picamajeitaque, ayojeiti pincarajeiteri aisati pisaviquimoteri anta isaviquinta iriori. ⁹ Ayojeitaque icamaque, aisati itinaanaja. Eiro icamajitsi aisati: tecatsi incantajea incamaje aisati. ¹⁰ Icamanta-carri Jesoshi, icamimentaqueero caari cameetsatatsi antajeitaqueri. Moncarataca: eiro icamajitsi aisati. Meeca aneanaji: quiso yoajiri meeca Tasorentsi, incantaitatiyempani. ¹¹ Aisati aviroripee, piquempejeitaca picamasanojeitaque, eiro pantantajarotsi caari cameetsatatsi; iro cantaincha yoaneajeitajimpi aisati Jesoquirishito, piojeitantajariri Tasorentsi.

**Iquenquetsatacotiri pincatsatiriri camaari
aisati pincatsatiriri Tasorentsi.**

¹² Tempa oquempetetaca picamaque: eiro meeca pantapinitajirotsi caari cameetsatatsi, eiro piquenqueshiretajirotsi. ¹³ Ari oquempetetaca picamaque, eiro pishinetantajaritsi meeca camaari irantacaapini-tempiro caari cameetsatatsi. Aisati oquempetetaca yoaneajimpi Tasorentsi,

irootaque pishinetanteariri irantacaye-tempiro cameetsayetatsiri.¹⁴Eiro meeca pantajirotsi caari cameetsatatsi. Te aneeroji peranatempine pantero paitapee-rica, irointi icavintsaajeitaquempi Tasorentsi, ineshinoncajeitaquempi.
¹⁵¿Paita anteri meeca? Ayojeitaque te ontameji peranajeiteene aisati ayojeitaque icavintsaapinijeitaquee Tasorentsi.
 ¿Ocameetsatimpa antashitapinitearo caari cameetsatatsi? Teve, te oncameetsateji.¹⁶¿Janicampa pimpincatsatasanoteri? Ariorica pimpincatsateri camaari, irantacaapinitempiro caari cameetsatatsi, iro cantaincha impoiji pijate Sharincaveniqui. Iro cantaincha ariorica pimpincatsateri Tasorentsi, irantacaapinitempiro cameetsayetatsiri.^{17,18}Peerani pipincatsaveitarini camaari, meeca pipincatsatajiri Tasorentsi. Piquemisantajiro maaroni yoamejeitajimpri iriori, irootaque nopasonquitantariri meeca. Pantapiniveitaroni caari cameetsatatsi, meeca pantapinitiro cameetsayetatsiri.

¹⁹Noncamantempiro piojeitanteearori, pinquemajeitanteearori. Oquempetaca peerani pipincatsaveitarini camaari pantantaroniri caari cameetsatatsi, ocameetsati meeca pimpincatsajeiteri Tasorentsi pantajeitanteearori cameetsayetatsiri, pincameetsatasanojeitanteeari.
²⁰Peerani, pipincatsajeiveitarini camaari, te pimpincatsajeiterini Tasorentsi.²¹Iro cantaincha oshequi meeca pipashiventacaajaro pantajeiveitaniri: ¿paita impinatempimeri camaari? Pantajeiveitanini, irootaque pijatanteameri Sharincaveniqui.²²Meeca tecatsi incante camaari iromperanajeitajempi aisati: tempa meeca pipincatsajeitajiri Tasorentsi. Iroameetsajeittempi irinti, irisavicaaajeittempi inquitequi: pincantaitiyempani.²³Pantapinijeivetaclaro caari cameetsatatsi, pijajeitanteameri Sharincaveniqui. Iro cantaincha piquemisanta-

queri Jesoquirishito, irootaque icavintsaquempi Tasorentsi, irisavicaaajeittempi inquitequi, pincantaitatiyempani.

Ariorica aquemisanti, te omperanajeiteejisanquenare Moishishi.

7 ¹Tequerarica, noyemisantaririnte, pinquemasanojeite. Avirojeitaque nojorioririnte, noquenquetsatacajeitiri. Ariorica incame asháninca, tecatsi incantea inquemisantero icantavetacari Moishishini.²Noshiacantempiro oca. Ocanti Sanquenrents: “Ariorica aye tsinane ojime, quiso oanaqueri, irosati incamanteari. Te oncameetsateji ojocashitajeari”. Iro cantaincha ariorica incamaque, te aneajeriji ojime.³Iro cantaincha ainirorica ojime, te oncameetsateji aimenteari. Ariorica incamaque ojime, ari ocameetsati aaje aisati pashini ojime, meeca quea te aimenteariji ojimeni. Tecatsi tsaneajearone aaje.⁴Aisati, noyemisantaririnte, icamaque Quirishito: aisati oquempetaca picarajeitaqueri, picamajeitaque. Meeca eiro operanatajimpitsi isanquenare Moishishi, tempa oquempetaca picamaque. Irointi yoaneajeitajimpri aisati Tasorentsi pimajeitanteearori maaroni icoacaajeitaquempi.⁵Peerani aquemisanta-veitarini camaari. Acoapiniveitaroni antapinitironi caari cameetsayetatsi, ora itsaneapitsavetaqueeri Tasorentsi. Aitaque acantajeitaniri, antapinijeitironi, irootaque ajajeitanteameri Sharincaveniqui.⁶Iro cantaincha oquempetaca acamajeitaque. Eiro meeca aquenqueshirejeitajirotsi icantajeitiri jorio, yamejitarí iriori. Meeca te antapinterojo ocantiniri isanquenatiniri peerani, irointiquea antapinite ocoacaajeitaqueeri Ishire Tasorentsi.

**Iquenquetsatacotaquero
isanquenare Moishishi.**

⁷¿Paita nocantajeitimpri? ¿Nocantimpima te oncameetsateji isanquenarenip

Moishishi? Teve, te noncantempiji. Eirome otimime, eiro niotime te oncameetsateji nantayetiri. Eirome ocantime: "Eiro pinevetarotsi yashiyetari itsipapee", eiro niotime te oncameetsateji.⁸ Oamevetaquena te oncameetsateji nonevetearo paitapeerica, niovetaro; iro cantaincha aiquero nojatati nonevetas-notanacaro paitapeerica. Eirome otimime Sanquenarentsi, eiro niotime te oncameetsateji nonevetearo.⁹ Peerani, tequerani nioteroni Sanquenarentsi, noquimoshire-tashiveitani. Iro cantaincha impoiji oametaquena otimi nantane, irootaque noashiretacari. Niotanaque nojatemе Sharincaveniqui.¹⁰ Nojivetaca ariorica nanterome maaroni ocantiri Sanquenarentsi noncantaitatiyempani nontimeme inquitequi, iro cantaincha tecatsi noncantea nomatero. Oametaquena meeca otimi nantane, irootaque nojatantameri Sharincaveniqui.¹¹ Oshequi noquenqueshiretaquero caari cameetsatatsi, namavitanajari narosati, irootaque caari nantantaro ocantiri Sanquenarentsi. Impoiji niotaque nojate Sharincaveniqui.¹² Pinequero, onameetsataque isanquenareni Moishishi: irootaque irineane Tasorents, onameetsatasanotaque.

Icantiri paita antapinitantarori caari cameetsatatsi.

¹³Ari onameetsati Sanquenarentsi, iro cantaincha *¿paita nojatantameri Sharincaveniqui?* *¿Irrompa Sanquenarentsi jatacayenaneme?* Teve, irointi nantaquero caari cameetsatatsi, irootaque nojatantameri Sharincaveniqui. Tempa oametajana Sanquenarentsi te oncameetsateji catsini oca nantayetaqueri.

¹⁴Oameetsataque irointi, tempa irio sanquenatacaantirori Tasorents; narori, te noncameetsateji nainti, catsini.¹⁵ Te niotacoteoji narosati: nocoaveta nontimeme cameetsa, iro cantaincha, te

nomateroji. Nantapinitiro caari nocoasa-noveta.¹⁶ Niotaque te oncameetsateji oca nantayetaqueri, niotaque onameetsati oca oametantiri Sanquenarentsi.¹⁷ Te noncoaveteoji nantero paitapeerica, iro cantaincha nashi noiro te noncameetsateji, irootaque nantashitantarori.¹⁸ Niotaque te noncameetsateji catsini. Ariorica nocoaveta nanterome cameetsayetatsiri, iro cantaincha te nomateroji.¹⁹ Te nantapiniteroji cameetsatatsiri nocoavetari nantemerri, irointi nantapinitiro caari cameetsatatsi caari nocoaveta nantero.²⁰ *¿Paita nantashitantarori caari nocoaveta nantero?* Aitaque nashi noiro te noncameetsateji, irootaque nantashitantarori.

²¹Aitaque nocantani: nocoavetaca nosaviqueme cameetsa, iro cantaincha omapocaquena nantaquero caari cameetsatatsi.²² Noquenqueshiretasanovetacaro irineane Tasorents, nocoasano-vetaca nanterome icoacaaquenari.

²³Oshequi noashiretasanovetaca catsini. Oshequi noquenqueshirevetacari Tasorents, nocoavetaca nanterome icoacaaquenari. Iro cantaincha tecatsi noncantea nantero, irointi omapocaquena nantaquero caari cameetsatatsi.

^{24,25}Oshequi nashinoncaavetaca. Noquenqueshirevetaca nanterome icantauenari Tasorents, iro cantaincha nashi noiro te noncameetsateji. *¿Janica amitacotenaneri eiro nantapinitantajarotsi aisati caari cameetsatatsi?* Irootaque Avincatsarite Jesoquirishito amitacotenaneri. Irootaque meeca oshequi nopasonquitantariri Tasorents.

Amitacojeitaquee Ishire Tasorents.

8 ¹Ariorica anquemisantajeiteri Jesoquirishito, aisati antapinitero icoacaaqueeri Tasorents, eiro yoasanque-taajeiteetsi. Eiro meeca antapinijeitirotsi caari cameetsatatsi acoiri arori.² Ari

peerani nashi noironi nantapinitironi caari cameetsatatsi, nojateme Sharincaveneiqui. Iro cantaincha noquemisantaqueri Jesoquirishito, oavisacotantajanari Ishire Tasorentsi, oaneantajanari. Osavicacaajena coajica anta inquitequi, noncantaitiyempani.³ Pinequero, tecatsi oncantea oavisacojeitee isanquenare Moishishi: ashi airo te ancameetsateji. Te amajeiteroji ocantaqueeri. Iro cantaincha yoavisa-cojeitaquee Tasorentsi, irinti. Itiancaqueri Itomi aca quipatsiqui, yatiritapaaque, iquempetasanotapaaquee arori, iro cantaincha te iranteroji caari cameetsatatsi. Icamimentaquee arori, ipashinitacajee eiro aquempetantajatsi peerani.

⁴Meeca, ariorica anquemisantero Ishire Tasorentsi, ari amataquero ocantaqueeri Sanquenarentsi. Peerani ashi aironi te ancameetsateji, te amateroni ocantaqueeri.⁵ Yora caari cameetsajeitatsi iquenqueshiretapiinitiro irantero caari cameetsatatsi. Irinti iotirori Ishire Tasorentsi icoaque irantero ocoacaaque-riri iroori.⁶ Ariorica anquenqueshiretero acoashiyetari arori, ajate Sharincaveniqui. Ariorica anquenqueshiretero Ishire Tasorentsi, ari cameetsa ancantaitiyempani asaviquimojeiteri Tasorentsi.

⁷Ariorica antayetero acoaqueri arori, atseencaqueri Tasorentsi: te ancoyeji antayetero icoacaajeivetaqueeri. Eiro amatirotsi.

Jaoca icanta yora caari cameetsayetatsi.

⁸Te irineacameetsateriji Tasorentsi maaroni antayetirori caari cameetsatatsi.⁹ Iro cantaincha avirojei avinti, te pinquempejeiteariji iorori. Quiso oajeitaquempi avirori Ishire Tasorentsi. Yora caari quiso oi Ishire, te icroteriji Quirishito.¹⁰ Oshequi pantaquero caari cameetsatatsi, irootaque pincamajeitareti, iro cantaincha pishanincatacaririca Quirishito, yoameetsataquempi Tasoren-

tsi, pincantaitatiyempani pisaviquimoteri.

¹¹Tempa yoitinaajiri Jesoshi. Meeca ariorica quiso oaquempi Ishire, irointinaajejitajempi aisati, iroaneajeita-jempi aisati. Iro irimatantajempiri pishiretacaro Ishire.¹² Meeca, noyemisan-taririnte, atsipetashitacaro aquemisanteri camaari, atsipetashitaro antiro caari cameetsatatsi.¹³ Ariorica pantapinitero aisati, pijate Sharincaveniqui. Iro cantaincha ariorica pinquemisantero Ishire Tasorentsi, eiro pantajirotsi aisati caari cameetsatatsi, impoijiquea pisavique inquitequi, pincantaitatiyempani.

Itomintajeitari Tasorentsi maaroni quemisanteriri.

¹⁴Maaroni quemisanteriri Ishire Tasorentsi, iriojeitaque itomipee Tasorentsi.¹⁵ Pamene, ariorica quiso oajeitaquee Ishire, arojeitaque Itomi. Te anquempe-teariji iratiritepee, aisati eiro atsaroacaaritsi. Eiro aquempetajatsi peerani atsaroacaajeivatarini. Tempa queario, acantiri meeca: "Apa".¹⁶ Ariorica ayotaque quiso oajeitaquee Ishire Tasorentsi, aisati oamejeitaquee, irootaque ayojeitancari itomintajeitaquee Tasorentsi.¹⁷ Arojeita-querica itomipee, ari impajeitaquee Tasorentsi maaroni icoacaaqueeri ontimimojeitee coajicani, anquempejeiteariji Quirishito. Meeca aitaque anquempejeiteariji aneacatsitaquearo paitapeerica, iro cantaincha coajica anquempejeitarejari cameetsa asaviquimojeiteri Tasorentsi, aveshireimentajeiteariji.

Coajica eiro aquenqueshiretajirotsi paitapeerica aquematsicavetacari meeca.

¹⁸Coajica cameetsa catsini irisavicasa-jeitee anta inampiqui, impoiji eiro aquenqueshiretajirotsi paitapeerica aquematsicavetacari meeca.¹⁹ Ayojeitaque maaroni catsini yovetsicajeitaquee Tasorentsi irisavicasacaasanojeitaquee

cameetsa, aisati impeajeitajee pincatsaritajantsineri. Yaamaajeitacari maaroni catsini: “¿Jaoca oncarate intasoncaventajeitajeri maaroni itomipee?”^{20,21} Yatsipetashita itimayetaque maaroni yovetsica-jeitiri Tasorentsi: icamapinijetaque iriori poshiniripee, panquirentsipee, maaroni; eiro anejiritsi aisati coajicani. Tecatsi irantajeivetea icamajeitancari, irointi icamajeitancari otimi yantaqueri peerani Aran. Iotaque Tasorentsi coajica eiro oquempetajatsi meeca, irointi iroameetsatasanojeitajeri aisati, oquempetaca iroameetsatasanojeitajee arori: tempa arojeitaque itomipee maaroni.²² Ayojeitaque icatsinatapinijetini maaroni yovetsicane Tasorentsi, aisati icamajeitini: icantani, irosati meeca.²³ Aisati arorijei quemisantatsiri, ashinoncajeivetaca, ainiro aquemaatsi-cajeitacari. Timatsi Ishire Tasorentsi, quiso oajeitaquee, amitacojeitaquee; iro cantaincha acoajeitaquee inquempetacaanasanojeitee Tasorentsi itomi. Impoiji eiro aquematsicatajarotsi paitapeerica, eiro acamajitsi.²⁴ Ariorica ayotaque irimatero Tasorentsi icantaqueeri, aquemisanta-queri avavisacotantajari. Iro cantaincha tequera irimateroji, tequera irimoncarajeiteroji maaroni icantaqueeri arori. Omونcarataquearica, ɿarimpa ayeacotajero irimateero icantaqueeri?²⁵ Ariorica ayotasanoquee irimoncarateero icantaqueeri, cameetsa ayeacotero, eiro ashematsi.

Amitacojeitaquee Ishire Tasorentsi, ocantiri Tasorentsi iramitacojeitee.

²⁶ Te ayotasanojeiteji arori, iro cantaincha amitacojeitaquee Ishire Tasorentsi. Te ayotasanojeiteji anquenquetsatacayeri Tasorentsi cameetsa, iro cantaincha ioti irointi Ishire, ocantacoventajeitaquee; cameetsa catsini oquenquetsatacairy, eiro amatirotsi anquempetearo.²⁷ Iotasano-

quee Tasorentsi, aisati iotaquero paitarica ocantiriri Ishire. Ariorica ocantacoventaquee, iotaque maaroni icoacaqueeri Tasorentsi.

Icoacaqueeri Tasorentsi.

²⁸ Ayojeitaque ariorica anintaqueri Tasorentsi, aisati ariorica antapinitaquero icoacaajeitaqueeri, irosati incanteani intasoncacoventajeitee. Ariorica ompomerentsitimovetaquee, iro cantaincha eiro ishineteetsi avashinoncaya.

²⁹ Peerani catsini iotiteeni anquemisanteri, irootaque icantitantaniri: “Incameetsatanaque quemisantenneri, inquempejeiteari Notomi”. Tempa iriotaque Itomi Tasorentsi yora Jesoquirishito. Iriotaque itomisanori peerani catsini, itimitani; impoijeitajee itomintajeitajee arori, ashanincatavacaajeitajari.³⁰ Peerani icantitani: “Nontomintajeiteari”, impoiji itomintasanotaquee; impoiji aisati yoameetsataquee, iquempetacaantajee te anteroji caari cameetsatatsi. Aisati icanti: “Coajica cameetsa irisaviquimojeitena aca inquitequi”.

³¹ Tempa ocameetsajeitaque oca. Pinequero, itasoncaventasanojeitaquee Tasorentsi: ɿjanica meeca oashinoncaajeitajene? Tecatsi catsini.³² Te intsaneem-pariji Itomi, irointi itiancaqueri aca quipatsiqui icamimentajeitaquee. Tempa ayojeitaquee aisati coajica impapinijeitee maaroni coiteimojeitaqueeri.³³ Tempa icoyeajeitaquee Tasorentsi, iquempetacaantaquee te anteroji caari cameetsatatsi: ɿjanica meeca cantatsine ainiro antane?³⁴ ɿJanicampa oashinoncaajeiteeneri? Tecatsi: tempa icamimentajeitaquee Jesoquirishito yoavisacojeitajee. Aisati itinaanaja, isaviquimotiri Iriri, icaratiri ipincatsariventajeitaquee, aisati icantacoventajeitaquee.³⁵ ɿJanicampa jocacayerineri Quirishito inintajeitee? Tecatsi catsini. Intimerica oashinoncaajeiteeneri,

quisajeiteeneri; ariorica ompomerentsiti-mojeitee paitapeerica, ariorica ayee atashe, eirorica otimitsi anquitsaateari, ariorica antsaroacayearo paitapeerica, intimerica oayeteeneri; iro cantaincha icantani Quirishito, inintasanojeitaquee.³⁶ Onquempetajea isanquenataqueroni peerani: “Noquemisantaquempi, Tasorents, irootaque isareantapiniyeetaquenari iroyeetena. Inquempetacaantena ovisha yoapinijetiri”.³⁷ Queario oshequi inintajeitaquee Quirishito, icantani: itasoncaventajeitaquee, irootaque aveshireimentasanojeitancariri.

^{38,39} Queario, te intimeji jocacayerineri inintajeitaquee: eiro imatirotsi inampiree Tasorents, camaaripee, pincatsariee, jenoquisati, quipatsisati, maaroni yovetsicajeitaqueri Tasorents, eiro imatirotsi. Ariorica ancamaque, ariorica aneanaje, eiro imajeitirotsi meeca, aisati eiro imatirotsi coajica. Aquemisantaqueri Avincatsarite Jesoquirishito, meeca inintasanojeitaquee, aisati quiso yoajeitaquee maaroni.

**Oshequi icavintsaajeitaqueri
Pavoro ijorioririnte.**

9 ¹⁻³ Oshequi noquenqueshireacota- queri maaroni noshanincasanori, yora nojorioririnte. Queariotaque oca nocantaqueri, iotaque Quirishito te nontseeyaji. Aisati quiso oaquena Ishire, iotacaquena queario nocantaque. Noashiretacotacari noshaninca, te inquemisanteji. Arioricame nomaterome noavisacoterime noshaninca, nojatetame Sharincaveniqui iravisacotantajeameri; nojatericame anta, eiro noneirime nainti Quirishito; pineaquero, oshequi nocoaque iravisacojeitaje. ⁴Ishanincajeitacari Ishirairini aisati itomintajeivtarini Tasorents. Ineajeitaqueri itasoncantaque, aisati iquemajeivtaroni icantavtariri, ioejivtaro Isanquenare Moishishi,

iojeiveta jaoca incanteameri inquemisanterime, timatsi icashiacaajeitaqueriri, ⁵iriojeitaque ishanincani yora intacaror-niri peerani, iriojeitaque ishaninca Quirishito. Tempa irtiotaque Quirishito Tasorents, ocameetsati ancantaitatiyem-pani aneacameetsajeiteri aisati ampinca-tsatasanojeiteri maaroni. Aitaque ancantajeiteari.

⁶ Ioejivtaro irineane Tasorents, iro cantaincha te inquemisantajeiteji. ⁷Paita caari iquemisantajeitanta? ⁸Yamatavitaque-rimpa Tasorents? Teve, te iramataviteriji. Pamene, maaroni ishanincani Ishirairi te inquempetasanojeiteariji: te inquemisanta-jeiteji maaroni. ⁹Aisati te inquempetasano-jeiteariji Avaramani maaroni ishanincani. Tempa icantaquerini peerani Tasorents: “Irio pishanincatasanojeiteari maaroni ishanincani yora Isaca”. ¹⁰Meeca noncaman-tempiro oca ishiacantiri. Te intominteariji Tasorents maaroni ishanincani Avaramani. Apaniro ishanincajeitacari yora ishanincani Isaca. Tempa icantiri Tasorents: ¹¹“Apaniva-niji osarintsi ontimeri Sara otomi”. ¹⁰Otsipani osarintsi itimaque Isaca. Impoiji yanterioranaque, yaaque ijina, pajitachari Erevecia. Impoiji otsomontetaque, irootaque tsipari. ¹¹⁻¹³Ainiroquera iriori otsomontequei iriniro, tequera iranteroji cameetsatatsi aisati tequera iranteroji caari cameetsatatsi, iro cantaincha otimi icoacaitacariri Tasorents. Ari icantitaro Tasorents: “Yora jivatatsi-neri intime impincatsateri yora oijatapee-rine”. Tempa irootaque oquenquetsatacota-queniri Sanquenarents: “Icanti Tasorents: ‘Nonintasanoteri Jacovo, irinti Esao eiro nonintasanotiritsi’”. Pineaquero, iotitani Tasorents icoacaitacariniri: impoiji imatacaaqueri.

**Jaoca icantiriri Tasorents
jorio aisati itsipapee atiri.**

¹⁴ ¿Arimpa ancante: “Te oncameetsateji oca yantiri Tasorents”? Teve, eiro

acantitsi. ¹⁵Tempa peerani icantirini Moishishi: "Tempa narotaque cantatsine janicarica noneshinoncateri, aisati janicarica noncavintsayeri". ¹⁶Te irio atiri cantatsine, irinti Tasorentsi. Ioti irinti janicarica irineshilononcatasanoteri. ¹⁷Tempa peerani osanquenatacami icantiriri yora ivincatsarite ejipitosati: "Nompeajempi pincatsaritajantsine, iriojeitanteari atiri oshequi notasorentsitaque, aisati oshequi impincatsajeitante-nari maaroni savicajeitatsiri". ¹⁸Pine aquero, tempa irootaque cantatsine janicarica irineshilononcateri. Tempa aisati irootaque cantatsineri janicarica impeajeri tseencantatsineri. ¹⁹Naamaaca meeca pincantena: "¿Arimpa? Queariorica picantaqueri, ¿paita inquishimentantena- rori nantayetiri? Tempa nantayetaquero icoacaquenari iriori".

²⁰Pamene, aviro atiri: te oncameetsateji pimpiatsateari Tasorentsi, oshequi ipincatsariti irinti. Noshiacantempiro coviti. Ocantirompa vitseirori: "¿Paita caari povetsicantana narori cameetsa?"

²¹Ora vitseirori, tempa irootaque coatsiri jaoca oncanterori quipatsi. Tempa ocameetsati ovetsicaque aparo cameetsa- tasanotatsiri, irointi otsipa eiro oameetsantiro. ²²Ariorica incoaque Tasorentsi, tempa ocameetsati iroashinoncaajeiteri iisane. Tempa ocameetsati iriotacaajeiteri atiri ainiro itasorenca. Iro cantaincha te iroashinon- caajeiteriji yora caari cameetsajeitatsi, irointi yamavetiro yantayetiri, icavintsa- queri. ²³Irio icavintsaasanotaqueri yora jatatsineri inquitequi; icoacaqueri iriojeite oshequi icavintsanti, aisati oshequi ipincatsariti. ²⁴Arojeitaque icoyeajeitaqueri, ayojeitajajariri: jorio, aisati caari joriotatsi. ²⁵Tempa peerani isanquenatacojeitaqueeni yora Oseashi: "Icanti Tasorentsi: 'Caari inaveitani noshaninca, iro cantaincha meeca

noshanincatacari. Caari inaveitani nonintasanotiri, iro cantaincha meeca nonintasanotajiri'". ²⁶Jero icantini: "Caari inaveitani noshaninca". Irio iquenquetsatacotaqueri yora peajancha- nerri itomipee Tasorentsi; tempa irio Tasorentsi aneasanotatsiri.

²⁷Jero aisati oca isanquenataqueniri Isayashi. Iquenquetsatacotaqueri joriopoe: "Incarajeitaque ishanincani Ishiraeri oshequi catsini. Oquempetaca eiro amatirotsi iotero jaoca ocaratiri ovane impanequi, aisati iriori joriopoe, eiro amatiritsi ayojeiteri maaroni, jaocarica incara jeiteri. Iro cantaincha eiro yoshequitasanotitsi avisacotajantsine. ²⁸Coajica irimatero Tasorentsi maaroni icantaqueri: irimapocajeiteri maaroni tseencantatsiri, iroashinoncaajeiteri. Intsoteasanojeiteri, maaroni".

²⁹Tempa aisati isanquenatini: "Eirome icavintsaajeiteeme Tasorentsi, eirome ishanincajeiteeme, tempa intsoncajeiteeme maaroni, anquempejeiteearime yora soromasatini aisati yora comorasatini".

Icamantiri paita caari iquemasantanta joriopoe.

³⁰¿Paita aisati noncamantempiro? Yora itsipapee atiri te incoajeiveiteani iroameetsateri Tasorentsi, iro cantaincha meeca iquemasantajejajiri, irootaque yoameetsajeitajajariri. ³¹Irinti yora joriopoe icoajeiveta iriori irimayeterome icantayetiriniri Moishishini incameetsa- tanteameri, iro cantaincha te irimajeite- roji. ³²¿Paita caari yoameetsatantari Tasorentsi? Te inquemasantajejajiri, irointi icoajeiveta irantero paitapeerica. Oshequi icomitacaro, te iriojeiteji inquemisanteri Jesoshi. ³³Peerani isanquenatironi oca icantaqueniri Tasorentsi: "Nontiancaveteanari joriopoe notomi, iro cantaincha eiro iojeitavaque- ritsti. Oquempetaca ariorica intsitin-

quearo mapi, impariaque; te iriojeiteriji Quirishito ini, irootaque iroashiretanteari. Iro cantaincha eiro yoashiretatsi inti quemisanterineri, irointi iriveshireimentasanojeiteari”.

10 ¹Noyemisantarinre, oshequi catsini nocoaque iravisacojeite maaroni nojorioririnte, oshequi nocantapinitiri Tasorentsi: “Pinquemisantacaajeitajeri noshaninca, iravisacojeitajeari”. ²Niotaque oshequi icoajeiveta inquearioventenerime Tasorentsi paitapeerica yantiniriri, irishintsiventeneri maaroni. Iro cantaincha te iriojeiteji paitarica icoacaasanojeitaqueriri. ³Te iriojeiteji jaoca icantajeeri Tasorentsi yoameetsatantajeitejeri. Icoajeiveta iroameetsajeiteame irisati, te incoyeji iroameetsajeiteri Tasorentsi, inti. ⁴Pamene, ipoquaque Quirishito, icamimentajeataquee. Meeca, ariorica anquemisanteri iriori, iroameetsajeitajee. Atsipetashitacaro meeca antayetaquero icantiniri Moishishi avavisacotanteameri.

Jaoca ancanteari avavisacojeitajeari.

⁵Peerani yora Moishishi iquenquetsatacotaqueri yora coatsiri irimoncarayetero Sanquenarentsi: “Intimerica coavetachaneri irimoncarayeterome iroameetsatanteameri, oncameetsateme irimoncarajeterome maaroni, incantaitatiyempani. Eirome icomitarome catsini”. ⁶Iro cantaincha ariorica aquemisantaji irootaque acameetsatantajari, eiro acantis: “Pomerentsitaca avavisacotajea. Tsame ajatashiteri Quirishito anta jenoqui, ameri aca iroavisacojeitajeta”. Teve, eiro acantashitatsi; ⁷aisati eiro acantashitatsi catsini: “Tsame ajate Sharincaveniqui, aintinaajeri Quirishito, iroavisacojeitajeta”. Teve, eiro acantis catsini. Jampa tinaanaja ini peerani. ⁸Ariorica aquemisantaque, aitaque avavisacotaca: eiro acoitsi amayetero

pomerentsiyetatsiri. Tempa timatsiaca irineane Tasorentsi: te ompomerentsiteaji pinquenquetsatacoterai aisati pishiretearo. Irootaque oca nocamantapinitimpiri: pinquemisante paviscotantajeari.

⁹Ariorica pincamanteri itsipapee atiri pipincatsataqueri Jesoshi, aisati ariorica pishiretearo yoitinaajiri Tasorentsi, aitaque paviscotaje. ¹⁰Pineaquero, ariorica ashireteari Tasorentsi, irineameetsajeitee; aisati ariorica ancamanteri itsipapee atiri aquemisantaqueri Jesoquivishito, aitaque avavisacotajea. ¹¹Tempa ocantini Sanquenarentsi: “Eiro ipashiventatsi yora quemisantatsiri”. ¹²Amoncaratavacaajeitaca: jorio aisati itsipapee atiri. Icarati Avincatsarite apaniro. Aventajeitacari, irootaque ipincatsariventajetantaqueeri, ineshinoncajeitantaqueeri maaroni. ¹³Tempa aisati ocantini Sanquenarentsi: “Iravisacojeitaje maaroni aventajeitearineri Avincatsarite”.

Oshequi itseencantajeiti joriopée.

¹⁴Eirorica iquemisantiri Tasorentsi atiri, *čjaoca incanteari iraventanteari?* Eirorica iquemacotiri, *čjaoca incanteari inquemisantanteari?* Eirorica itimitsi camanterine, *čjaoca incanteari inquemacotanteari?*

¹⁵Eirorica itimitsi tianquerine camantantatsineri, *čjaoca incanteari irijatanteari?* Tempa ocantini Sanquenarentsi: “Tempa oshequi aveshireimentacari yora camantajeiteerori irineane Tasorentsi, tempa aneacameetsajeitiri”. ¹⁶Iro cantaincha te inquemisantajeiteji maaroni. Tempa irootaque icantauqueniripeerani Isayashi: “Novincatsarite, nocamantajeivetacari, iro cantaincha icarati oshequi caari quemisantatsi”. ¹⁷Eirorica icamanteeteetsi, eiro amatirotsi anquemisante. Tempa icamanteetaquee icamimentaquee Quirishito, yoavisacotantajeari.

¹⁸Tempa iquemajeitaque maaroni joriopée. Queario, iquemajeivetaca. Jero ocantini Sanquenarentsi: “Ijataque

camantantatsiri maaroni quipatsiqui, iquemajeitaqueri maaroni savicajeita-tsiri".¹⁹ Tempa iojeiveta jorio inquemisantajeite itsipapee atiri iriori. Aitaque icamantaquerini peerani Moishishi: "Icanti Tasorentsi: 'Coajica pinquisaneenteri itsipapee atiri pitseenajeitavacari. Iro pinquisanteariri noavisacojeitajeri'".²⁰ Impoiji aisati isanquenatini Isayashi: "Icanti Tasorentsi: 'Te incoavetenaji yora atiripee, iro cantaincha iojeitaquena meeca: niotacaasanojeitaqueri.²¹ Irinti yora joriopee nocantapinivetacari, iro cantaincha ipiatsataquena, te incoyeji inquemisantena'". Irootaque isanquenatini.

Jaoca incanteari yora joriopee.

11 ¹Naamaaca pisampitena meeca:
"¿Ariompa? ¿Eirompa meeca yaacameetsatiritsi Tasorentsi maaroni joriopee, yora itomintajeivetari?" Teve, eiro. Tempa narotaque narori jorio. Noshanincatacari Avaramani aisati Vejamini.^{2,3} Narojeitaque jorio. Tempa peerani icoyeajeitaquena Tasorentsi, irosati meeca yaacameetsajeitantanjarani. Tempa piojeiti ocantini Sanquenarentsi. Oquenquetsatacotaquerini Iriashi peerani, iquenquetsatacairy Tasorentsi, icantiri: "Novincatsarite, teve incameetsajeiteji yoca nojorioririnte. Yoapinyetiri yora quenquetsatacotimpire. Yojocacaayetajiri ishaninca iquemisantajeivetimpi. Meeca icoajeitaque iroyena narori. Apaniro noquemisantimpi nainti".⁴ Tempa piojeitaquero aisati ora yacanaqueririri, icantirini: "Timatsiquera 7,000 shirampari quemisantasanotanari. Te impincatsajeiteroji iriori ora Vari ijitasorentsiyeevetari".⁵ Aisati oquempe-taca meeca. Timatsi aisati icoyeane Tasorentsi, ineshinoncajeitaqueri.
⁶Pinequero, ineshinoncajeitaqueri, te incanterji irantero paitapeerica. Incante-

rime irantayeterome paitapeerica, te irineshinoncateriji.

⁷Ari, ¿jaoca ocantari meeca? Icoajeive-taca irineacameetsajeiterime Tasorentsi, iro cantaincha, te. Ineacameetsayetaqueri aparopee: yora icoyeayetaqueri. Irintiquea itsipapee, te incoajeiteji inquemisante catsini.⁸ Tempa aisati ocantini Sanquenarentsi: "Ipeaptsata-queri Tasorentsi iquenqueshireantavetari. Ineayevetacaro paitapeerica, iquemaye-vetacaro, iro cantaincha te inquemisan-teji. Aitaque icantajeitani, irosati meeca".⁹ Aisati icantini Iraviri: "Iveshireimenta-vetacaro paitapeerica, iro cantaincha yamatavijeitaja irisati. Impoiji incama-jeite, irineacatsitimentajeitearo yantaye-tiri.¹⁰ Eiro coajica otimitsi iotantari, eiro iojeititsi. Incanteani irashinoncayea".

Jaoca icantari jorio aisati itsipapee atiri.

¹¹Ari itseenajeitaque joriopee: ¿inquisajeiterimpa meeca Tasorentsi? Teve, eiro iquishiritsi. Irointi yoavisaco-jeitaqueri itsipapee atiri incoanteari joriopee inquempejeitajeari iriori, inquemisantaje.¹² Itseenajeitaque, te incoajeiteji inquemisante, iro cantaincha yavisacojeitaji itsipapee. Coajica, ariorica inquemisantasanojeite joriopee iriori, tempa aiquero irijatatiye inquemisantasa-nojeite aisati itsipapee iravisacojeitanta-jeari.¹³ Te avirojei jorio. Piojeiti itiancaquena Tasorentsi noquenquetsata-caajeitaquempi. Nocoasanotaque nomajeitaquero icoacaquetanari.¹⁴ Noco-aque nonquenqueshiretacaajeiteri aisati nojorioririnte, iravisacotaarantantajeari iriori.¹⁵ Itseenajeitaque meeca, irootaque caari yaacameetsajeitantarri Tasorentsi; avintiquea yaacameetsajeita-quempi. Iro cantaincha coajica iraacameetsajeitajeri iriori, tempa oncameetsatasanotanaque. Irabajate-me anta Sharincaveniqui oshequi, iro

cantaincha coajica irijajeite oshequi anta inquitequi.¹⁶ Pamene, ineacameetsataquerini Tasorentsi Avaramani, tempa aisati irineacameetsateri ishanincani. Noshiacantempiro aisati inchato: ariorica ocameetsataque ovaritsa, tempa aisati ocameetsataque ojempequi iroori. Quempetaca icameetsataqueni Avaramani, aisati inquempeteari coajica ishanincani, incameetsajeitanaque.

¹⁷ Meeca noshiacantempiro inchato pajitchari orivo. Ocameetsataque ovaritsa, iro cantaincha te ontimeji oitsoqui ojempequiqui. Irootaque ipesanteetarori, yojoqueetajiro. Yaaque pashini ojempequi, irointi orivoniro. Ipatacaquero, iroitiricampa timatsine oitsoqui. Iro ovaritsa shiocacayeroneri. Ora ojempequini oshiacantiri jorio; ora iroaquera ipatacaqueri oshiacantaquempi avirorije, tempa avirotaque pashinisati atiri.¹⁸ Meeca eiro pishemetsi avirori: "Nocameetsati nainti, te nonquempeteariji yora jorio". Pamene, te pintimashiteaji apaniro, eiro pimatirotsi apaniro.¹⁹ Naamaaca picanti: "Yojocqueri Tasorentsi jorio, quiso noyeri nainti. Tempa nocameetsatasanoti".²⁰ Queario, itseencaqueri, yojocantavetacariri. Piquemisantajeiti avinti, irootaque quiso poajeitantarcariri. Pishematicari, pimpincatsatasanoteri.²¹ Pamene, yojocqueri iriori jivataintsiri, aisati avirori, yojocajimpicari.

²² Piojeitaque icavintsantaque Tasorentsi, iro cantaincha aisati yoasanquetaajeitaqueri yora antirori caari cameetsatsatsi. Ariorica pincanteani pinquemisanteri, ari incanteani incavintsaajeitamperi. Eirorica piquemisantsasanotiri, irojocanajempi avirori.²³ Aisati iriorije: ariorica inquemisantajeite, iraacameetsajeiteri Tasorentsi, tempa irootaque Pincatsarisonori. Irootaque cantacoventerineri jaocarica incantajeiteriri atiri.²⁴ Peerani

te piojeiveitearini, iro cantaincha meeca yaacameetsajeitaquempi. Ariorica inquemisante yora iojeivetariri, tempa aisati iraacameetsajeitajeri iriori.

²⁵ Noyemisantariinte, timatsi noninti noncamantempiro caari piojeiveta. Iro noncamantempiro te nonintej i pishemete. Pamene, itseencajeiveta yora joropee meeca, iro cantaincha eiro icantatiani. Ariorica omونcarataquea inquemisantajeite itsipapee atiri, ari omونcarataquea aisati inquemisantajeitaje aisati jorio.²⁶ Queario iravisacojeitaje coajica, maaroni. Tempa peerani ocantini Sanquenarentsi: "Icanti Tasorentsi: 'Irijorotaque yora oavisacojeiterineri, inquemisantacaajeiteri ishaninca, irojocacaajeiteri itseenca'.²⁷ Nomoncarataquero coajica maaroni nocantitacarinniri ishanincani peerani: noavisacojeiteri, eiro noquishimentirts caari cameetsatsi yantajeitaqueri".

²⁸ Meeca iquisajeitaqueri, aisati itseencajeitaqueri; irootaque meeca yoavisacojeitantaquempi Tasorentsi avinti. Iro cantaincha inintitarini yora intacantacariniri, aisati meeca inintajeitaqueri maaroni.²⁹ Te iramatavitanteji Tasorentsi: eiro yaapitsatajeerotsi paitarica ipajeitaqueeri, eiro yojocajiritsi yora icoyeaqueri.³⁰ Peerani te pinquemisantenri, iro cantaincha itseencajoneitaqueri jorio, irootaque icavintsaajeitantaquempi avinti.³¹ Meeca te inquemisanteji jorio, iro cantaincha coajica inquemisantajeite, iraacameetsajeiteri Tasorentsi, inquempetacaantajeitajempi avirori icavintsaajeitaquempi.³² Icanti Tasorentsi: "Ainiro irantanejei maaroni atiri, iro cantaincha nocooque noncavintsaajeiteri maaroni, noavisacojeiteri".³³ Tempa oshequi icameetsataque catsini. Ainiro iotantari, oshequi ioti. Te amaterojo ayotero iquenqueshiretiri iriori,

te ayoyeteroji yantayetiri. ³⁴Tempa irootaque ocantiri Sanquenarentsi: “¿Timatsimpa iotirori iquenqueshiretiri Avincatsarite? ¿Timatsimpa oametiriri yantayetantarori paitaricapee? ³⁵¿Timatsimpa paqueriri paitaricapee ipinatantari?” ³⁶Pinequiero, irootaque vetsiquirori maaroni. Itasoncaqueri maaroni, itimajeitancacari. Tempa irootaque ashijeitariri maaroni timajeitatsiri. Tsame meeca maaroni ampincatsatasanojeiteri, ancantaitatiyempani. Aitaque ancantajeiteari.

Icantiri: “Pimpashinitanaje”.

12 ¹Noyemisantarinente, tempa oshequi icavintsaasanojeitaquee Tasorentsi. Irootaque nocooacaasanotantaquempi eiro pantashitarotsi avirori paitapeerica, irointi pincanteri intianquempi irinti. Aneatsimpiquera, cameetsa pisavique irveshireimentantempiri: irootaque icoacaajeitaqueriri maaroni quemisantajeitiriri. ²Eiro piquempejeitaritsi tseencantatsiri, irointi pashini pinquenqueshiretapinitaje. Piotasanotero icoacaaqueempiri Tasorentsi: ocameetsatasanotaque. Ariorica pantapinitero oca, moncarataca: irineaca-meetsajeitempi Tasorentsi.

Icantiri: “Eiro pishemetitsi”.

³Icantauena Tasorentsi: “Poamejeiteri oromasati”, irootaque nocamantajeitan-timpipirori oca. Eiro pishemetitsi, eiro pijititsi panaacojeitaqueri itsipapée pipincatsariti. Pinquenqueshirejeitea jaoca picantari, piojeite imatacaasanotimpipirica Tasorentsi piquemisantiri. ⁴Pamene jaoca acantajeitari: otimi aqui amenantari, ayempita aquemantari, avante aneanatantari, aco ajircantari, aiti aniiantari, maaroni. ⁵Aisati aquempejeitacari maaroni quemisantajeitiriri Quirishito: acarajeitaque oshequi,

ashanincatavacaajeitaca. Iro cantaincha onashiyetaca antajeitaqueri. ⁶Tempa oshequi ineshinoncajeitaquee maaroni. Imatacaajeitaquee amayetaquero paitapeerica, iro cantaincha onashiyetaca. Eiro aperaventarotsi amayetero. Ariorica irimatacaaqueempipi quenque-tsatacayeri pishaninca, pinquemisantasa-note cameetsa pinquenquetsatacanteariri pishaninca. ⁷Ariorica irimatacaaqueempipi quinacoteari itsipapée, ari pimatero cameetsa. Ariorica irimatacaaqueempipi poametante, ari poametante cameetsa. ⁸Ariorica irimatacaaqueempipi piveshireacaayeari itsipapée, ari cameetsa piveshireacaajeiteari. Aisati ariorica incantempi pimpassiyeteari ashinoncaina incari paitapeerica, pimpassanoteri: eiro pimashitsatitsi. Ariorica pamitacoteri itsipapée, eiro piperataritsi. Ariorica pincavintsayeri, ari pinquimoshiretasanotanaque.

⁹Pinintasanojeiteri pishaninca, eiro picantashitaritsi: “Nonintaquempi”, irointi pinintasanoteri. Eiro catsini picoirotsi caari cameetsayetatsi, irointi pincoasanotaque pantayetero cameetsatasanotatsiri. ¹⁰Pinintasanotavacaajeitea maaroni: tempa piquempetavacaajeitaca, pinquemisantajeiti. Pincoasanajeite piveshireacaajeiteari itsipapée. ¹¹Eiro piperatatsi, irointi pincoasanajeite pishintiventeneri Avincatsarite maaroni incoacaajeitempi. ¹²Piojeitaque irimatquaempiro Tasorentsi maaroni icantauena: meeca piveshireimentearo. Ariorica ompomerentsitimotempi paitapeerica, eiro pishemarotsi. Pincanteani pincanteri Tasorentsi: “Pamitacotena”. ¹³Pimpapiniteri piyemisantarinente coiteimotariri. Pincavintsaapiniteri neajeitimpipi. ¹⁴Pincanteri Tasorentsi incavintsaajeitei quisajeitaquempi, eiro pipiataritsi. ¹⁵Ariorica inquimoshiretanaque

pishaninca, pinquimoshiretasanotanaque avirori. Ariorica iroashiretea pishaninca, pinquenqueshireacoteri.

¹⁶Paacameetsatavacaajeitea, maaroni. Eiro pitseencayetiritsi pishaninca. Eiro pipinquiritsi ashinoncaincari, irointi paacameetsateri. ¹⁷Ariorica irantimotempi pishaninca caari pinintacairi, eiro piquishiritsi. Cameetsa pisavique iriojeitantempiri atiri picameetsataque. ¹⁸Pincoasanojeite paacameetsajeiteri itsipapee, maaroni. ¹⁹Noshaninca, oshequi nonintajeitaquempi. Eiro pipiataritsi antanajeitaquempi. Irioquea irinti Tasorentsi oasanquetaajeiterineri. Tempa peerani icantini: "Noasanquetaajeiteri nainti, nompiateari. Tempa naro pivincatsarite. ²⁰Ariorica ayeri quisauquempi itashe, pimperi iroyea. Ariorica ayeri imire, pimpacoteri irire. Impoiji ariorica impashiventanaquea, eiroquea iquisantajimpitsi aisati". ²¹Eiro pishinetaritsi caari cameetsayetatsi irantacayempiro paitapeerica, irointiquea pincavintsayeri, ponijayeri cameetsayetasiri.

Ocameetsati ampincatsajeiteri pincatsariventajeiteeri.

13 ¹Pinquemisantajeiteri pincatsariventajeitiriri pishanincapee: tempa irio Tasorentsi nintacaaqueriri ipincatsaritantacari. Eirome inintacairime, eirome ipincatsariventantime. ²Yora piatariri ivincatsarite, aisati iquempetaqueri Tasorentsi, ipiatacarri iringi. Tempa iringotaque nintacairiri ipincatsariventanti. Coajica iroasanquetaajeiteri maaroni piajeteacarri. ³Yora savicatsiri cameetsa te intsaroacayeariji pincatsari, irintiquea yora antapinitirori caari cameetsatatsi. Ari, eiorica picoitsi pintsaroacayeari pincatsari, pintime cameetsa; impoiji irineacameetsatemp. ⁴Queario, inintacairi Tasorentsi ipincatsa-

riventanti ontimanteari pisavicejitan-teari cameetsa. Iro cantaincha terica oncameetsateji pantayetiri, ari pintsaro-caaqueri. Te irantsipetashiteaji ipincatsariventanti. Inintacairi Tasorentsi iroasanquetaajeiteri maaroni antirori caari cameetsatatsi. ⁵Te ancoyeji iroasanquetaajeitee Tasorentsi, aisati te ancoyeji anquenqueshirete, irootaque ocameetsantari ampincatsateri avincatsarite.

⁶Irootaque aisati pipaarrantarari pincatsaripee piirequite. Pipinataqueri irimatantearori inintacairiri Tasorentsi: ipincatsariventajeitaquempi. ⁷Pimpajeteri maaroni coiteimotacariri: pimperi quirequi, paitapeerica. Pinquemisantajeiteri aisati pimpincatsajeiteri.

Cameetsa anintavacaasanojeitea, maaroni.

⁸Eiro pirevyetiritsi pishaninca paitapeerica, irointi pinintavacaajeitea. Ariorica anintavacaajeitea, ari amoncaratero isanquenayetiniri Moishishini, maaroni. ⁹Icantini: "Eiro painmentarotsi pijina, eiro painmentarotsi pijime, eiro poantitsi, eiro picoshitsi, eiro pinevetrotsi yashiyetari pishaninca". Oshequi aisati icantiniri. Impoiji aisati icantini: "Oquempetaca picavintsaja avisati, pincavintsajeiteri itsipapee, pinintajeiteri". Ariorica amajeitaquero oca, tempa amoncarataquero maaroni icantiniri. ¹⁰Ariorica aninteri ashanincapee, tecatsi ancantea ancantimajeiteri, amoncaratan-tearori maaroni icantiniri Moishishi.

Eiro osamanititsi impocashijeitajee Avincatsarite.

¹¹Eiro osamanititsi impocashijeitajee Avincatsarite iraajeitanajee antsipajeitan-teariri. Peerani aquemisantantacari, ajitashijeivetaca ari osamanitanaque. Meeca aamaajeitacari, irootaque ocameetsatantari antime cameetsa. ¹²Ariorica antapinitiro caari cameetsatatsi,

oquempetaca ariorica atimaque tsiteniri-qui, amanantarori antayetiri. Ariorica atimi cameetsa, oquempetaca atimaque quitaiteriqui, te ampashiventacayearoji antayetiri. Ari meeca oshiyavetacaro irootajantsi quitaiteri, tempa irotantsi-rica impocaje Avincatsarite iriori. Eiro antapinitirotsi meeca caari cameetsayeta-tsi, irointi tsame antimajeite cameetsa.

¹³Tsame meeca cameetsa antimajeite.

Eiro antayetajirotsi caari cameetsayetatsi, eiro ashinquiyejtajatsi, eiro antirotsi caari ai, eiro antiritsi caari ai, eiro aquisava-caajatsi, eiro anevetasanotarotsi vaararontsi, ¹⁴eiro antayetirotsi caari cameetsatatsi acoayetiri aisati aquenque-shireyetiri. Irointiquea tsame ancanteri Avincatsarite Jesoquirishito intasonca-ventajeitanteeri cameetsa asavicajeitan-teari.

**Ocameetsati iraacameetsatavacajieitea
maaroni quemisantatsiri aisati caari
quemisantajeitatsi.**

14 ¹Incoaquerica itsipapee quemisantatsiri incarajeitempi pinquemisantajeite, ari paacameetsajeita-vaqueri. Tequerarica iriotasanoyetero maaroni icoacaajeitaqueeri Avincatsarite, iro cantaincha eiro picantavacaimentaro-ksi ioyevetari iriori. ²Oquempetaca timatsi cantatsiri ocameetsati avajeiteari paitapeerica: ivatsa, maaroni. Iro cantain-cha itimi caari iotasanolatsi: jivetachari te oncameetsateji ayeari ivatsa. ³Ariorica pametari poapinitari ivatsa, eiro picantimatisritsi yora caari oari. Aisati, terica poapiniteari ivatsa, eiro picantitsi: “Te incameetsateji yora oariri ivatsa”. Tempa iriojeitaque itomipee Tasorentsi, yaacameetsajeitaqueri iriori. ⁴Tempa iriotaque Tasorentsi ivincatsarite. ¿Ocameetsatimpa pincante avirori: “Te incameetsateji yora, te inquemisanteriji ivincatsarite”? Tempa Tasorentsi cantatsi-

neri irinti ocameetsatirica yantayeta-queri, aisati yamitacotaqueri imayeta-quiero cameetsayetatsiri. ⁵Aisati itimi pashini cantatsiri: “Te omoncaratavacaa-jeiteaji quitaiteripee, anashitacaajeitearo aparopee quitaiteri anquemisantasano-tanteariri Tasorentsi”. Irio itsipa icanti: “Ocameetsajeiti maaroni quitaiteripee anquemisantanteariri, te onashiyeteaji”. Ari ocameetsati piojeite paitarica picoiri avirori, iro cantaincha eiro picantavacai-mentarotsi quitaiteripee. ⁶Yora cantatsiri: “Nonashitacaajaro aparopee quitaiteri noquemisantantajari”, tempa icoaque impincatsateri Avincatsarite. ¿Paita antsaneacotanteariri? Yora pashini, yoari ivatsa, ipasonquitiri Avincatsarite, aisati ipincatsatiri. ¿Paita antsaneacotanteariri? Aisati yora caari oari ivatsa, ipasonquitiri Avincatsarite aisati ipincatsatiri iriori. Tempa aisati ocameetsati.

⁷Te antimashijeiteaji, eiro apincatsata-jatsi arosati. Eiro acantitsi paitarica antayeteri meeca, aisati jaocarica oncarate ancame. ⁸Meeca aneajeitatsee arori, cameetsa ampincatsajeiteri Avincatsarite, anteneri iriori maaroni icoacaajeitaqueeri. Iriotaque nintacayee-neri jaocarica oncarate ancame, iro cantaincha ancanteani ampincatsajeiteri. Icantani ipincatsariventajeitiri aneatsiri aisati camaintsiri, maaroni. ⁹Icoaque Quirishito impincatsariventajeiteri aneajeitatsiri aisati camajeitatsiri, irootaque icamantacari aisati itinaanta-jari. ¹⁰¿Paita picantacotantacariri piyemisantarinre: “Te incameetsateji”? ¿Paita pitseencantayetacariri? Eiro pipeacotarotsi oca: coajica aneajeiteri Tasorentsi, impoiji incante irinti ocamee-tsatirica antajeitaqueri arori. ¹¹Jeroca ocantiniri Sanquenarentsi: “Icanti Avincatsarite: ‘Nocantani naneasanoti nainti, queariotaque oca noncamantem-piri. Coajica intiyeroashijeitena atiri

impincatsajeitena. Incantajeitena: Picameetsataque’”. ¹²Queario, coajica aneajeiteri, aisati ancamantajeiteri maaroni antayetaqueri aca quipatsiqui, impoiji incantacojeitee ocameetsatirica antayetaqueri.

¹³Ari meeca te oncameetsateji ancanta-cotashiteari ayemisantaririnte: “Te oncameetsateji yantayetiri iriori”. Queariompia, pantacairicari caari cameetsatatsi. ¹⁴Yoametaquena Avincatsarite Jesoshi, irootaque niotanta-cari ocameetsataque maaroni yoyeeye-tari. Ocameetsati ayeari ivatsa. Iro cantaincha yora jitashitachari te oncameetsateji ayeari, ari eiro yoaritsi irinti; te oncameetsateji iroyeari. ¹⁵Aisati avirori, ariorica poimoteari piyemisanta-ririnte ipinquiri iriori, aitaque poashireta-caaqueari: te oncameetsateji. Ariorica pinquenqueshiretacayeri, te pinintasanoteriji. Tempa icamimentaqueri Quirishito iriori, meeca eiro pitseencacairitsi.

¹⁶Pijjieveta ocameetsayetaque pantayeta-queri, iro cantaincha queariompia, icantimatimpicari itsipapee. ¹⁷Ariorica apincatsataqueri Tasorentsi, eiro aquenqueshireyetirotsi avayetari aisati irayetiri; irointi anquemisantero Ishire Tasorentsi ancameetsatanteari, asavican-teari cameetsa, anquimoshirejeitanteari. ¹⁸Ariorica cameetsa aquemisantaquero, ari cameetsa antaveeteneri Quirishito. Impoiji irineacameetsajeitee Tasorentsi aisati ashanicapee. ¹⁹Tsame meeca aacameetsajeiteri ayemisantaririnte, maaroni; aisati inquempetee iriori, iraacameetsajeitee. Aisati avametavaca-jeitea cameetsa anquemisantsanojeitan-teari.

²⁰Pioterica ari pojocacayeri pishaninca iquemisanti, eiro poimotashitaritsi ivatsa. Queario ocameetsati ayeari paitapeerica, iro cantaincha te oncameetsateji ajocaca-yeri ashanicina iquemisanti. ²¹Te

oncameetsateji pantero paitapeerica pojocacanteariri pishaninca iquemisanti: eiro poashitaritsi ivatsa, eiro pirashitarotsi cachojarí, paitapeerica, maaroni.

²²Ariorica piotaque ishinetaquempi Tasorentsi paitapeerica, eiro picantapini-jeitiritsi yora caari ametaro, eiro picanta-vacaimentarotsi. Ariorica piotasano-taque ocameetsataque pantayetaqueri, tempa pinquimoshiretasanotanaque. ²³Iro cantaincha pijiterica te oncameetsateji paitapeerica yantayetiri piyemisantaririnte, eiro pantashitarotsi, otimicari pantane. Terica piote intacaaquempiro Tasorentsi pantero, te oncameetsateji pantashitearo.

15 ¹Pineaquero, ariorica aquemisan-tasanotaque aisati ayojeitaque ocameetsayetaque oca noquenquetsataco-taqueri, iro cantaincha ocameetsati anquenqueshiretacajeiteri yora caari quemisantasano-tatsi, caari iotasano-tatsi. Eiro antashitarotsi acoayevetari arori, ²irointi anquenqueshireacojeiteri ayemisantaririnte, inquimoshirejeitan-teari iriori. Aisati amitacojeiteri iriotasa-notanteari, inquemisantasano-tanteari.

³Tempa aisati iriori Quirishito, te irantashitearoji icoavetari iriori. Tempa isanquenatacotirini peerani: “Yora Quirishito icantiri iriri: ‘Iquisajeitaquena maaroni quisajeitaquempiro avironi’”.

⁴Itimacaaqueero Tasorentsi maaroni isanquenarení peeraninri ayojeitante-rori cameetsayetatsiri antayeteri, amavetantearori anquematsicayetearo paitapeerica, aveshireimentanteariri Tasorentsi, aisati ayotasano-tanteari coajica antime cameetsa anta inampiqui.

⁵Tempa yamitacotapinijeitaquee amavetantearori aquematsicayetacari paitapeerica, aisati yoveshireacaajeita-quee. Nocoaque meeca iramatacojeitempi paacameetsatavacaajeitea. Irootaque icoacaajeitaquempiro aisati Jesoquiri-

shito. ⁶Impoiji amoncaratavacaajeitea ancantajeite: "Tempa icameetsataque Apa Tasorentsi aisati Avincatsarite Jesoquirishito". ⁷Tempa yaacameetsajeitaquee Quirishito. Meeca pinquempejeiteari, paacameetsatavacaajeitea maaroni, impoiji irineacameetsajeiteri atiri Tasorentsi.

⁸Peerani ipocantacari Quirishito aca quipatsiqui, intacojeitacari ijorioririntep ee iojeitancatari te iramatavijeiteriji Tasorentsi. Aisati iotacaajeitaqueri irimoncarajeitero maaroni icantaqueriniri ishanincani. ⁹Aisati icoaque iriojeite itsipapee atiri ineshinoncaajeitaqueri, incantanteari iriori: "Tempa icameetsataque Tasorentsi". Irootaque ocantiniri Sanquenarentsi: "Noncamantajeiteri itsipapee atiri: 'Icameetsataque Tasorentsi, tsame ampampoyeaventajeiteri'".

¹⁰Otimi pashini Sanquenarentsi cantatsiri: "Caarimpi pinajeveta jorio, iro cantaincha pincarajeiteri iriori piveshireimentajeiteari Tasorentsi". ¹¹Pashini aisati osanquenataca, ocanti: "Maaroni caari joriotatsi incantajeite: 'Tempa icameetsati Tasorentsi'. Irineacameetsajeiteri maaroni". ¹²Aisati yora Isayashini icantini: "Intime ishanincani Jese, impoque impincatsariventajeiteri itsipapee atiri, iriojeitanaque iroavisacajeiteri". ¹³Tempa ayojeitaque irimoncarateenero Tasorentsi maaroni icantajequeri. Piquemisantajeitaqueri, irootaque nocoantacari iroimoshirencajeitempi, cameetsa irisavicacaajeitempi. Impoiji ontasoncaventajeitempi Ishire Tasorentsi piotasanolanteari eiro yamatavitimpitsi Tasorentsi, intsoeteaquempi maaroni icantajeempiri.

Icantiri Pavoro: "Oshequi nocoaque nonquenquetsate".

¹⁴Meeca, noyemisantaririnte, niotaque piacameetsajeitaque, aisati piotasanojeita-

quero irineane Tasorentsi pimajeitatorri poametavacaajeitaca. ¹⁵Meeca oshequi nosanquenajeitaquempiro, noquenqueshiretacaaquequempiro maaroni oca eiro pipeacotantarotsi. Queario, ineshinoncataquena Tasorentsi, ¹⁶irootaque itiancantaqueunari nonquenquetsatacaajeiteri yora caari joriotatsi. Nocaman-tajetaqueri atiri jaoca icanta Jesoquirishito yoavisacojeitantaqueeri. Impoiji oameetsatasanojeitaqueri Ishire Tasorentsi maaroni, aisati yaacameetsajeitaqueri Tasorentsi. ¹⁷Irootaque noveshireimentantaquempi: icoyeaquena Jesoquirishito nocamantajeitaquempi jaoca icanta Tasorentsi. ¹⁸Eiro noquenquetsatacotoshi-yetatsi paitapeerica, iotaquea nonquenquetsatacoteri imatacaquenari. Ineajeitaquena itsipapee atiri, aisati iquemajeitaquena, irootaque iquemisan-tayetariri Tasorentsi. ¹⁹Otasoncaca-aquena Ishire Tasorentsi, nomayetantarori paitapeerica caari ineapiniti atiripee.

Ari noquenquetsatacaajeitaqueri atiripee anta Jerosarequi, osamani anta Iririaqui, maaroni nampitsipeequi. Nocamantajeitaqueri jaoca icanta Quirishito yoavisacotanti. ²⁰Nocoasanotaque nonquenquetsatacaajeiteri yora caari iojeitiri Quirishito. Te noncoyeji nimpotapeeri narori jivatatsiri iquenquetsatacairi. ²¹Tempa ocanti Sanquenarentsi: "Inquemero yora caari quemaveitaroni; iriotajeri yora caari ioveitarini". ²²Ari oshequi noquenquetsatacaajeitaqueri caari iotatsi, irootaque caari nareetanta aviroriqui. ²³Iro cantaincha notsoteajeitaquero nampitsipee aca, noquenquetsatacaajeitaqueri savicayetatsiri, aisati oshequi osarintsi nocoaveta noneempime, ²⁴irootaque nojatanteari coajica pinampiqui. Jaocarica oncarate nosaviquimojeitempi, impoiji nocoaque navisanaque anta Eshipaneaqui. Nocoaque aisati ponjayenaro jaocarica nonquenanteari.

²⁵Iro cantaincha nintapaintearota nojatapainte Jerosarequi, naajeitajeneri ayemisantairinte ²⁶iirequite ipacantiriri yora maseroniasati aisati yora acayasati. Yapatojeitiniriri ashinoncaincarí quirequi. ²⁷Aitaque icoaque irineshinnoncajeiteri joriopee anta Jerosarequi. Te irishanincaveteariji, iro cantaincha tempa iriojeitaque intacariri icamantajeitaqueri jaoca incanteari iravisacotantajeari. Icantajeiti: "Tempa irio quemisantacaajeiteri joriopee, irootaque ocameetsatantari meeca ancavintsaajeiteri iriori. Ampajeteri quirequi iramanantantearori coiteimotacariri". ²⁸Ariorica nompapaaqueri quirequi yapatojeitiniriri, ari nojate pinampiqui. Impoiji novaanajea, irosati Eshipaneaqui. ²⁹Niotaque ariorica nareetapaaquempi nonquenquetsatacaa-paaquempi piveshireimentasanotanteariri Quirishito.

³⁰Meeca, noyemisantairinte, tempa aquempetavacaajeitaca aquemisantaqueri Avincatsarite Jesoquirishito, aisati oamejeitaquee Ishire Tasorentsi anintava-caajeitaca. Nocoaque meeca pincantajeiteri Tasorentsi intasoncacoventantenari, ³¹eiro yaantanatsi yora tseencantatsiri anta Joreaqui. Aisati pincanteri iroamejeiteri yora jerosaresati inquimoshireimentanteariri quirequi ipacantiriri iyemisantairinte. ³²Impoiji ariorica irinintacyena Tasorentsi, nareejitapaaquempi, oshequi nonquimoshiretapaaque. Impoiji oshequi aveshireacotavacaajeitea maaroni. ³³Tempa isavacacaajeitaquee cameetsa Tasorentsi, maaroni. Nocoaque quiso iroajeitanaquempi. Aitaque incanteari.

Ivetsajeitari oromasati.

16 ¹Meeca noncamantempi: coajica ojatashitempi oneempi ayemisantaronte Jeve. Oponeaca Senquereshi-qui, anta oshequi intacojeitacari maaroni

quemisantatsiri. ²Paacameetsajeitava-quero, tempa irootaque quemisantiriri Avincatsarite. Pintacojeitearo, pimpayetero maaroni coiteimotearoneri. Tempa intacojeitacari oshequi ayemisantairinte; aisati narori, intacotapinitaquaena. ³Novetsajeitaro Pirishira aisati Aquira. Oshequi yamitacojeitaquena iriori nantaveejeitiniri Jesoquirishito. ⁴Peerani irotaintsi iroyeetename, iro cantaincha oavisacotaquena Pirishira aisati iriori Aquira. Oavisacotantaquenari, irotaintsi iroyeeterome iroori, aisati ojime. Oshequi nopasonquijeitaquero: narori aisati maaroni ayemisantairinte, yora caari joriojeitatsi. ⁵Novetsajeitari maaroni quemisantapinitatsiri ara ovancoqui. Novetsatari aisati Epeneto, nonintasano-taqueri iriori. Peerani noquenquetsata-cantariri yora acayasati, iriotaque jivataintsiri iquemisantaqueri Quirishito.

⁶Novetsataro Maria, tempa oshequi intacojeitaquempi iroori. ⁷Novetsajeitari noshaninca Antoronicó aisati Joniashi. Peerani notsipajeitacari yoiminqueeta-quena caravosoqui. Oshequi ineacameetsajeitaqueri yora itiancanepée Quirishito. Ijivajeitaquena narori, iquemi-santitacani irinti peerani. ⁸Novetsatari Ampiriashi, iquemisantaqueri Avincatsarite, oshequi nonintaqueri iriori. ⁹Novetsatari Orovano, oshequi icarajeitaquena noquenquetsatacotaqueri Jesoquirishito. Aisati iriori Eshitaquishi, novetsatari; oshequi nonintaqueri. ¹⁰Aisati novetsatari Apereshi; yora Quirishito, oshequi ineacameetsataqueri. Novetsatari Arishitovoro, aisati ishaninca, maaroni. ¹¹Novetsatari noshaninca Erorio. Novetsajeitari ishaninca Narishiso, yora quemisantiriri Avincatsarite.

¹²Novetsajeitari Tirijena, jeri Tirijosa, tempa irisati antaveetiniriri Avincatsarite. Aisati oquempetaca Pereshira, novetsataro. Oshequi nonintaqueri. ¹³Novets-

tari Irojo, yora quemisantasanotiriri Avincatsarite. Aisati novetsataro iriniro, oshequi intacotaquena noquempetacaantaquero iro ina.¹⁴ Novetsajeitari Ashinquirito, Jereconte, Eremashi, Patorovashi, Eremeshi, jeri maaroni ayemisantarinre tsipajeitariri.¹⁵ Aisati novetsajeitari Jiroroco, Joria, Nereo, aisati iritsiro, ora Orimpashi, aisati maaroni quemisantajeitatsiri tsipajeitari, maaroni.¹⁶ Ariorica pineavacaajeitea, paacameetsatavacaajeitea, pinintavacaajeitea. Ivetsajeitimpri maaroni quemisantajeitiriri Quirishito savicajeitatsiri otsipapeequi nampitsi.

¹⁷ Meeca noncantempi, noyemisantari-rinte: piojeiteri yora oamejeitiriri ayemisantarinre icantavacaajeita, aisati piojeiteri antacairiri caari cameetsatatsi, jeri aisati cantimpiri: “Te oncameetsateji pinquemisantero oca yoamejeitaquem-piri”. Eiro pitsipajeitaritsi, eiro pojajeiti-ritsi.¹⁸ Te iranteneriji irinti icoacaajeive-tariri Avincatsarite Quirishito, iointi yantashijeitaro icoayetiri iriori. Cameetsa ineanaveta, iro cantaincha icoaque iramatavijeiteri caari timatsine iotantari.

¹⁹ Iojieiti atiri piquemisantasanotaque, irootaque noveshireimentantaquem-piri. Iro cantaincha nocoaque piotasanojeite pantero maaroni cameetsayetatsiri; iointi caari cameetsatatsi, eiro pantimatirotsi catsini.²⁰ Tempa Tasorentsi savicacaajeitimpri cameetsa. Eiro osamanititsi iranaacotasanotaqueri Satanashi eiro yantacantajimprotsi aisati caari cameetsatatsi. Nocoaque meeca irineshiloncaajeitimpri Avincatsarite Jeso quirishito.²¹ Ivetsajeitimpri Timoteo;

itsipataquena nantaveejeitiniri Jesoshi. Aisati ivetsajeitimpri noshaninca Iroshio, Jaso, jeri Soshipatere.²² Narotaque nainti Tereshio sanquenatiniriri Pavoro oca. Aisati narori, noquemisantiri Avincatsa-rite. Novetsajeitimpri narori.²³ Aisati ivetsajeitaquempi iriori Cayo. Nosaviqui-motiri aca ivancoqui. Aisati ipocapiniti quemisantayetatsiri aca ivancoqui, oshequi yaacameetsajeitaquena, ineshiloncajeitaquena.²⁴ Ivetsajeitimpri Erashito, yora quempoyeajeitiniriri iirequite savicajeitatsiri aca. Aisati ivetsajeitimpri ayemisantarinre pajitachari Coarato.

Ivecarataquero isanquenare.

²⁵ Tsame meeca ampincatsajeiteri Tasorentsi. Iriotaque matacaaqueeri aquemisantasanotantacariri, ariorica ashiretasanajeitacaro oca noquenquetsatotaqueriri Jeso quirishito. Peerani catsini te iriojeiteni yora intacarori impoque Quirishito iroavisacojeitee. Te incamanterini Tasorentsi,²⁶ iro cantaincha meeca iotacaajeitaquee. Isanquenata-aaqueri yora camantantatsiniri peerani, aisati itianajeitaquena narori nocaman-tajeitaqueri maaroni atiripee: “Ocameetsati pinquemisantajeiteri Tasorentsi”. Tempa ocameetsati anquemisanteri iriori, te incamaneteji irinti, icantatiani yanei.²⁷ Oshequi ioti catsini irinti, apaniro ini. Tsame, maaroni quemisantajeitiriri Jeso quirishito, ancantajeite: “Tempa icameetsatasanotaque Tasorentsi”. Aitaque ancantajeiteari, maaroni.

Narotaque sanquenajeitimpirori:
Pavoro

IJIVATAQUE PAVORO ISANQUENAJEITAQUENERI CORINTOSATI

Yovetsajeitari Pavoro corintosati.

1 ^{1,2}¿Ainirompi, corintosati?
¿Tecatsimpa oajeitempine? Narota-
que Pavoro sanquenajeitimpiori oca.
Tempa icoyeaquena Tasorentsi, irootaque
itiancantaqueunari Jesoquirishito, icoaca-
quena nonquenquetsetsacoteri. Nocarata-
queri aca Soshiteneshi nosanquenajeitimi-
piro maaroni quemisantajeitatsiri ara.
Piquemisantaqueri Jesoquirishito,
irootaque yoameetsajeitantaquemppi;
meeca pishanincatacari Tasorentsi.
Piquempejeitacari maaroni aventajeitac-
riri Avincatsarite Jesoquirishito,
irootaque yoavisacotantacariri. Tempa
meeca ashanicajetacari maaroni
quemisantajeitiriri, jaocarica isavicajei-
tiri. ³Nocoaque ireshinoncajeitempi
Apa Tasorentsi, aisati nocoaque cameetsa
irisavicacaajeitempi. Aisati inquempeje-
tempi iriori Avincatsarite Jesoquirishito.

Iveshireimentajeitari Pavoro corintosati.

⁴Piquemisantaqueri Jesoquirishito,
irootaque ineshinoncajeitantaquemppi
Tasorentsi, irootaque meeca nocantanta-
riri: “Ariove pimatacaajeitaqueri corinto-
sati”. ⁵Oshequi itasoncacotentajeita-
quempi, cameetsa isavicacaajeitaquempi,
iotacaasanojeitaquemppi paitapeerica
icoacaajeitaquemppi. ⁶Tempa moncar-
taca nocantajeitaquemppi peerani:
imajeitaquemppi Jesoquirishito maaroni.

⁷Tempa iriotaque Avincatsarite:
paamayeari, irosati impocantajeari.
Tempa itasoncacotentaqueempi pimatan-
tarorori pantiniri paitarica icoacaajeita-
quemppi, tecatsi coiteimotempine aisati.
⁸Incantaitatiyempani intasoncacotentasa-
nojeitempi; impoiji, ariorica impocaje,
irineacameetsajeitapajempi. Eiro
iquishimentapaimpirotsi pantayevetari.
⁹Eiro yamatavijeitimpitsi Tasorentsi,
tempa icoyeajeitaquemppi pishanincat-
teariri Itomí: tempa iriotaque Avincatsa-
rite Jesoquirishito.

Icantiri: “Pinintavacaajeitea”.

¹⁰Noyemisantaririnte, tempa apincatsa-
jeitiri Jesoquirishito. Irootaque meeca
nocantajeitantiempiri cameetsa pinintava-
caajeitea, eiroque piquisavacaajeitatsi.
Pinquempetavacaajeitea, eiro picantava-
caimentajeitarotsi paitapeerica. ¹¹Iroota-
que nocantantiempiri oca icamantapaa-
quena atrite Coroe oshequi picantava-
caajeitaca. ¹²Ainiro cantayetaintsiri:
“Noquemisantiri narori Pavoro”. Pashini
cantajeitantsi: “Irio noquemisantiri
Aporo”. Pashini cantajeitantsi: “Irio
noquemisantiri Sejashi”. Pashini cantajei-
tantsi aisati: “Noquemisantaqueri nainti
Quirishito”. Irootaque nocantantiempiri:
“Eiro picantavacaajeitatsi”. ¹³¿Itsipare-
campa Quirishito? Te, apaniro ini.
¿Nopajacotimentaqueempimpa narori?
¿Pivaotisatimentaqueunampa narori? Teve.

¹⁴Meeca nopasonquitiri Tasorentsi te novaotisajeitempiji. Irinti apaniro novaotisataqueri Quirishipo, aisati Cayo. ¹⁵Meeca tecatsi incantashiyeeetea: “Novaotisatimentacari Pavoro”. ¹⁶Aisati novaotisataqueri Eshitejana, aisati ishaninca. Te nonquenqueshireteri pashini novaotisataqueririca.

Iovetari atiri aisati ioyetiri Tasorentsi.

¹⁷Te iro intiancantena Quirishito novaotisatante, irootiquea itiancantana nocamantacotiro cameetsatatsiri. Nocamantantirica, te noshemetsatacyeroji noneane. Noshemetsatacyerome, eiro ocameetsatime. Pijijeiticari icoacaquempi Tasorentsi piojeite oshequi paviscacotantajeari. Tempa irootaque Quirishito camimentajeitaqueeri, irootaque yoavisacojeitajatejeri: irootaque irointi nocoaque niotacaajeitempi. ¹⁸Ariorica acamantavetari yora jatatsineri Sharincaveniqui: “Icamimentaquempi Quirishito coroschiqui, icoaveta iroavisacojeitajempime”, tempa ishirontimentajeitaquee. Iro cantaincha ainti, avavisacojeitaca, ayojeiti ainti ainiro itasorenca Tasorentsi imatantarori yoavisacojeitaquee. ¹⁹Aitaque isanquenayetini: “Icanti Tasorentsi: ‘Nompeitajeri iotantavetari yora ioyevetachari. Nompeapitsatajeri quenqueshireavetchari ora iquenqueshireantavetari’”.

Itsarojeitaqueri yora corintosati.

²⁰¿Jaoca incanteari meeca iotincari? ¿Jaoca incanteari meeca oametantirori Sanquenarentsi? ¿Jaoca incanteari aisati yora oametavacainchari? Tempa itseencaquero Tasorentsi maaroni iojeivetari atiripee. ²¹Yatsipetashita atiri iojeivetaro paitapeerica: te iriojeiteriji Tasorentsi. Ioti irinti, irootaque icoantacari iroavisacojeiteri maaroni quemansirori nocamantajeitaqueriri. Iro cantain-

cha ishirontimentashitaquena tseencanta-tsiri. ²²Icoaque jorio antasonqueneri paitapeerica irotanteari itsipataquee Tasorentsi. Yora caari joriotatsi yoametashtavacaapinitaro paitapeerica. ²³Iro cantaincha nocamantiri atiri: “Icamimentaquee Quirishito coroschiqui yoavisacojeitaquee”, irootaque iquisantaquenari jorio. Irinti caari joriotatsi, ishirontimentajeitaquena. ²⁴Iro cantaincha itimi icoyeajeitaqueri Tasorentsi iroavisacoteri: jorio, aisati caari joriotatsi. Iotacaajeitaqueri iriori ainiro itasorenca Quirishito, iroavisacotanteariri. ²⁵¿Paita itseencajetantariri Tasorentsi? Tempa iro anaacotasanolantatsiri ioti. Tempa irisati anaacotasanolantatsiri ishinstiti. Te aneeriji atiri quempetearine.

²⁶Pinquenqueshireempa, noyemisanta-ririnte, jaoca picantajeitari. Oshequi itseencajeitaquempi pishaninca, icantajeiti: “Te iriojeiti quemisantatsiri”. Queario, te pimpincatsarijeiteji, aisati te pashtaaaranteaji, irootaque itseencajeitampiri. ²⁷Ishirontimentajeivetaquempi atiri, te impincatsajeivetempiji, iro cantaincha icoyeaquempi Tasorentsi iroavisacojeitempi. Iriotacaasanajojeitempi, impeajeitempi pincatsaritatsineri. Impojiquea impashiventajeitanaquea shirontimentajeivetimpiniri, tseencajeive-timpiniri. ²⁸Icoyeasanotaqueri Tasorentsi yora caari pincatsatachane, yora ipiincayeevetari atiri, yora itseencajanayeevetari: irio itomintasanajojeitari. Irintiquea yora pincatsarivetachari aisati iojeivetachari iroashinoncajeiteri. ²⁹Tecatsi meeca incantea atiri irishemetimoteari Tasorentsi. ³⁰Piquemisantaqueri Jesoquivirishito, irootaque yoaneajeitantaquempi Tasorentsi, irisavicacaajeitempi inampiqui. Tempa iriotaque Jesoshi iotacaajeitaqueeri, oameetsajeitaqueeri, shanincajeitaqueeri, oavisacojeitaqueeri. ³¹Tempa aitaque isanquenayetironi:

“Eiro ashemetitsi, irointi aneacameetsata-sanoteri Avincatsarite irinti”.

Jaoca icantari Pavoro icamantantapiniti.

2 ¹Nareetantapaaquempi, noyemisan-taririnte, nocamantacotapaaqueri Tasorentsi. Te noshemetsatapeeroji noneane, te noametashiyetapeempiroji nioyeriti; apatiro noametapaimpilo icantiri Tasorentsi. ²Iotaca noquenquetsatacotapaaqueri Jesoquirishito, icamimen-tajeitaquee coroshiqui. Tecatsi pashini nonquenquetsatacote. ³Nopashiventashi-reavetapaaca, notsaroashireavetapaaca, nopioncapaaca. ⁴Pamene, noquenquetsatacaapaaquempi aisati nocamantapaa-quempiro irineane Tasorentsi, iro cantaincha te noametashiteempiroji nioyeriti. Iotacaasanotaquempi Ishire Tasorentsi queariotaque irineane, aisati itasoncacoventajeitaquempi piotantarori queario noametaquempi. ⁵Ora iojeitiri atiri, tecatsi oncantea oavisacojeitempi, irointi itasoncacoventaquequempi Tasorentsi pavisacojeitancari.

⁶Ariorica noametapinitiri quemisanta-sanotatsiri, queario notsoteaqueneri irinti noametasanojeitiri, niotaque iquemava-quero nocantaqueriri. Iro cantaincha te noametashiteariji ioyeriti atiripee aisati ivincatsaritepee. Eiro oavisacojeitritsi ora yoametavacaashiyetari. ⁷Irointiquea noquenquetsatacoti ioyeriti Tasorentsi. Peerani imanavetacaro, te ayojeiveite-roni. Peerani, tequerani irovetsiqueroni paitapeerica, icantitani: “Nosavicacajai-teri cameetsa aca nonampiqui maaroni yora pincatsajeitenaneri, coajica”. ⁸Te iriojeiteroji peerani yora pincatsaripee. Iriojeitaquerome, eirome ipajacotirime Avincatsarite, yora cameetsatasanotatsiri. ⁹Irootaque isanquenatacotitaqueeniri: “Timatsi yovetsicaqueri Tasorentsi. Te irineapiniteroji atiri, te inquemacotapini-teroji, te inquenqueshiretapiñeroji. Iro

cantaincha yovetsiquiniri maaroni nintasanotiriri”.

¹⁰Irootaque iotacaajeitaqueeri Tasoren-tsi ainti, iro vaajeerori Ishire. Iotasanojei-taqueri maaroni Ishire, otsoteaquero maaroni iquenqueshiretaqueri Tasorentsi.

¹¹¿Janica iotirori iquenqueshiretiri ashaninca? Tempa apapiro iotiro irinti. Aisati oquempetaca, tecatsi ioterone iquenqueshiretiri Tasorentsi: apapiro ioti Ishire irointi. ¹²Pamene, te anquemisanta-shitearoji ioyeriti atiripee, irointi aquemi-santaqueri Ishire Tasorentsi. Irootaque ayotantacarori icoaque Tasorentsi irineshinoncajeitee, irisavicacajaeitee cameetsa. ¹³¿Piquemaquerompa nocanta-quempi? Te irioteroji atiripee, aisati te iroamejeiteeroji, irointi oamejeiteerori Ishire Tasorentsi. Oamejeitaqueri yora otimantashiretari, iquemajeitantarori irinti. ¹⁴Yora caari otimantashireta Ishire Tasorentsi, te inquemavaqueroji ocantayetiri, irointi ishirontimentacaro. Tecatsi incantea inquemero. Iro caari iquemantaro, te ontimantashireteariji. Apaniro iquemajeitiro otimantashiretasa-notari, irinti. ¹⁵Iquemajeitaqueri oriori maaroni, iro cantaincha yora tseencanta-tsiri, tecatsi inquemasanote irinti.

¹⁶Pamene, ¿timatsimpa iotirori iquenqueshiretiri Avincatsarite? ¿Timatsimpa materone iroameteri Tasorentsi? Te intimeji catsini. Iro cantaincha niotiro nainti iquenqueshiretiri Quirishito, tempa yoametaquena.

Iquisavacaajeitaca corintosati.

3 ¹Noyemisantirinte, te noncantem-piji quemisantirori Ishire Tasorentsi, ainti nocantaquempi caari quemisantiro. Piquempetaca iroaquera piquemisanta-queri Quirishito, piquempejeitaca jananequi. ²Irootaque noamejeitanti-mipori peerani caari pomerentsitsati: oquempetaca niraacaquempi tsomitsi;

te nompempiji ivatsa, tequera pimateroni. Irosati picanta meeca, te pimateroji.³ Tequera pinquemisanterojo Ishire Tasorentsi. Ariorica pininatavacaajeitaca, aisati piquisavacaajeitaca, tequera pinquemisanterojo. Piquempeta-cari caari quemisantayetatsi.⁴ Jero icanti aparo: "Noquemisantiri Pavoro". Icanti pashini: "Noquemisantiri Aporo". Tempa piquempejeitari caari quemisantatsi.⁵ Pamene, ¿jaoca icantari Aporo? Aisati ¿jaoca nocantari narori picantavacaimentanari? Narojeitaque iveranaro Tasorentsi, quemisantacaaqueMPI. Nantiniri Avincatsarite icoacaquenari.⁶ Oquempetaca nopenquitaquero narori oitsoqui. Irio saitacotirori Aporo. Irintiquea Tasorentsi shiocacaquerori.⁷ Notsataaca nopenquitashitaro: tempa noquenquetsatacaajeitaquempi. Impoiji Aporo isaitacotashitaro: yoamejeitaquempi. Apaniro irinti Tasorentsi shiocacairo: irio quemisantacaasanojeitaquempi. ⁸Aisati imoncararatavacaaca yora panquitirori aisati yora saitacotirori. Imoncaratiniri yora ashitarori panqurentsi ipinajeitiri.⁹ Aisati oquempetaca, nomoncaratacari Aporo nantiniri Tasorentsi icoacaajeitaquenari. Avirojei pishiajeitaquero iroane Tasorentsi.

Aisati pishiacantaquero ivanco yovetsicaqueri.¹⁰ Noshiacantaqueri iotasanoltsiri yovetsiqui pancotsi. Ineshinoncataquena Tasorentsi, irootaque ishinetantaquenari noatiaqueri otincami. Ainiro pashini, ovaavaquerori. Ariorica yovaavaqueri, iraamayearoyea, icomitarocari.¹¹ Iro otincami pancotsi oshiacantaqueri Quirishito, irio shiaquerori otincamisonri. Te intimeji pashini shiyerone otincami.¹² Yora ovaavaquerori, ¿paita irovetsicantearori? Iroorica oro, iroorica perata, iroorica mapi marereatatsiri; iroorica inchato, iroorica saveshi, iroorica compiroshi. ¿Ariompa onquisota-

que? ¿Eirompa oquisotitsi?¹³ Onconijanaque coajicani yovetsicayetiri. Iriotaquero Tasorentsi, iriotasanoter. Ariorica ovetsicaquea pancotsi cameetsatasanotatsiri, eiro otaatsi; irompa ariorica ovetsicavetaquea caari quisotatsi, ario ontaaquea. Irineantearo Tasorentsi aisati maaroni antajeitaqueri, iriotanteari ocameetsatasanotirica.¹⁴ Ariorica oncameetsatasanote antajeiteneriri, oshiaquero quisoyetatsiri avetsicantayetarori; ari cameetsa impinajeitee.¹⁵ Terica oncameetsateji antayeteri, onquempe-tearo avetsicantaro caari quisotatsi; ontayea irointi, oshiaquero tecatsi amatasanote. Ariorica avavisacotajea, iro cantaincha tecatsi timimoteeneri, onquempetimotaquee otaacojeitaque maaroni timimojeiteeri: apaniro ainti avavisacotajea.

¹⁶Tempa arojeitaque shiaquerori pancotsi isavanticari Tasorentsi. Tempa aisati oquempetaca osavanticajeitaquee Ishire.¹⁷ Eiorica picavintsairo isavanticari Tasorentsi, eiro aisati icavintsaimptsi avirori. Ocameetsatasanoti isavanticari Tasorentsi: tempa avirojeitaque isavanticari.¹⁸ Eiro pamatavitajatsi avisati. Ari picarajeitiri jivetachari iotasanoltsiri paitapeerica. Te oncameetsateji irishemete. Ariorica irishemeventero ioyetiri, eiro iotacairitsi Tasorentsi. Iro cantaincha incanteririca: "Te nioteji, poametena", ari iroametasanoteri.¹⁹ Itseencaqueri Tasorentsi maaroni ioyevetari atiripee. Tempa aitaque isanquenayeetini: "Yora tsimeripee ijivetaca tecatsi ayerineri, iro cantaincha omapocaqueri oashirentsi aavaqueri, oamaaqueri. Aisati iquempejeitaca maaroni shemetimentarori ioyetiri: irimapoqueri Tasorentsi, iroashinoncajeiteri".²⁰ Aisati isanquenayeetini: "Ioti Avincatsarite te oncameetsateji iquenque-shireyetaqueri iotasanolvetachari".²¹ Eiro

pishemetimentirtsí atiri, te oncameetsateji. Yovetsicajeitaquempiro Tasorentsi maaroni timayetatsiri poveshireimentanteorori iroori. Irootaque nocantantimpiri:²² itiancaquena Tasorentsi namitacojeitanempiri, aisati itiancaqueri Aporo, aisati Sejashi iriori, iramitacojeitantempiri. Yovetsicajeitaquempiro maaroni timayetatsiri quipatsiqui, piveshireimentanteorori. Aneatsimpirica, piveshireempa. Pincamaquerica, aisati piveshireanaquea. Piveshireimentearo timayetasiri meeca, aisati timayetatsineri coajica.²³ Aisati oquempetaca, pamitacojeitiri Quirishito, iveshireimentaqueMPI. Yamitacotiri iriori Tasorentsi, iveshireimentacari iriori.

4 ¹Meeca piojeitaquena narojeitaque iveranaro Quirishito. Itiancajeitaquena Tasorentsi nova aqueneri atiripee oca imanapitsaveitariniri peerani. ²Aitaque icoasanotaque ariorica novayempiro, eiro namatavijeitimpitsi. ³Te oncanticoneentimate naji paitarica pincantacotashijeitenari, ainiroricannantane; aisati te oncanticoneentimate naji paitarica incantacotashijeitenari atiripee. Tecatsi noncantea noncantacotaja narosati: “Nocameetsati”. ⁴Noquenqueshiretaca narori tecatsi nantane, iro cantaincha eiro nocantashitsati: “Nocameetsataque”. Irintiquea Avincatsarite cantacotenaneri irinti, nocameetsatrica. ⁵Irootaque meeca noncamantantempiro: meeca te oncameetsateji ancantacotashiteari itsipapee: “Ainiro irantane”; coajicaquea ari ayotasanojeitanaque. Tempa impocaje Avincatsarite, inquitatetacojeitapajero maaroni manavetachari meeca tsiteniriqui. Ironijayero paitarica acoasanojeitiri maaroni. Acameetsatrica, ari incantajeitee Tasorentsi: “Picameetsati”.

⁶Pamene, noyemisantarisrinte. Narosati quenquetstacotacha, aisati noquenquetsata-

cotiri Aporo piojeitanteari eiro pipincatsasshitantaritsi atiri. Ariorica pincante: “Nonintasanotiri aparo”, pitseenquiricari itsipa.⁷ ¿Paita pishemetimentiri? Tempa Tasorentsi pashijeitimpiori maaroni timimojeitaquempiro. Meeca ¿paita pishemetantacari, oquempetaca te impashitempiro?⁸ Piquempetacari ashitaarantachari: pijivetaca tecatsi coiteimotempine. Pijitashijeivetaca piotasanojeiti: te pincoyeji oamejeitempineri. Pijitashijeivetaca pipincatsatasanotaque, pitseencaquena narori, piquempetacantaquena naro patirite. Ja, nocoavetaca pimpincatsaritasanojeiteme, antsipatavacyeame ampincatsariventanta-jeiteme.⁹ Ari nocarajeitaqueri itsipapee itiancane Tasorentsi, oquempetimotaquena ipeajeitaquena nampirents: itseencajeitaquena atiripee. Aisati oquempetaca isareetaquena iroyeetena; yamenashejeitaquena maaroni: inampirepee Tasorentsi, aisati atiripee.¹⁰ Nopincatsataqueri Quirishito, irootaque picantajeitananari: “Te piojeji”. Iro cantaincha piquemisantajeitaqueri avirori Quirishito, irootaque picantantari: “Niojeitaque narori”. Picantajeiti: “Tecatsi irimatimate iriori Pavoro, oshequi amajeitaque ainti”. Oshequi pineapincatsatashitaja avisati, nainti pitseencajeitaquena.¹¹ Ari notasheapinitaqui, nomiretapinitaqui, noquitsaatsaratani nomaatsara, ipasanatapiniyeetanani, noquenaquenatapinitaqui; irosati meeca.¹² Nocantatiani nopolerentsitapinitacaro nantaveeti. Ariorica iquisasyeetaquena, nocantiri Tasorentsi: “Pineshi-nocatacheri yora quisauenari”. Ariorica iquisasanoyeetana, te nompiateariji.¹³ Ariorica itseeyacoyeetaquena, cameetsa noneanatavaqueri. Queario, ipinqueetaquena, iquempetacanteetaquena cajara, icanteeti: “Te incameetsateji Pavoro”.

¹⁴Te iro nosanquenatantempiro oca novashiventaa jeitempi, irointi noshiacantimpi notomipee nonintasanotiri; nocoaque noncavintsayempi, nonquen-

queshiretacayempi.¹⁵ Timatsi oshequi oamejeitimpire piquemisantiri Quirishito, iro cantaincha te intimeji oshequi ashitempineri. Pamene, nocamantajeitaquempiro oca cameetsatatsiri piquemisantacariri Jeso quirishito, irootaque apaniro nainti noshiacantantimpiri notomipee, nishintopee.¹⁶ Irootaque nocantasanojeitantimpiri: "Pishiasanojetena".

¹⁷ Notiancaquempi Timoteo, noshia-
cantaqueri iriori notomi nonintasanotiri.
Iquearioventiniri Avincatsarite paitarica
yantiniriri. Inquenqueshiretacayempiro
jaoca ocantari nocamantacotapinitiri
Quirishito, jaocarica anta yapatotimenta-
riri.¹⁸ Pishemetaarantaque, pijitaaranta-
vetaca eiro nojatashitimpitsi narori.
¹⁹ Ariorica inintacaquena Avincatsarite,
nocoaque intsipaite nojatashijeitimpri.
Eiro noquemisantashitapaarotsi irineane
yora shemetatsiri, irointi niotapaaque
otimirica imatacaquerir Tasorentsi.
²⁰ Ariorica ipincatsariventaquee Tasoren-
tsi, eiro aneanatashiveeta, irointi
amayetero icoacaqueeri.²¹ ¿Paita
picoajeitaqueri? ¿Picoajeitaquempa
nonquisatsajeitapeempi? ¿Irompa
picoajeitiri nonintajeitapeempi, cameetsa
noneshinoncajeitapeempi?

Iconoayetacari quemisantatsiri caari cameetsatatsi.

5 ¹ Icamanteetana picarajeitaqueri
airori iashiane. Yaanirotajiro shiram-
pari irinirotsori yaavetari iriri. Tecatsi
quempetearineri: yora caari ioterine
Tasorentsi te iraapiniteroji yaavetari iriri.
² Avintiquea pishemenirojeitaque. ¿Paita
caari poashirejeitanta? Ariorica pampato-
timentapinitireti Tasorentsi, eiro pishine-
tiritsi impocanirotapee iriori.³ Te
noncarajeivetempiji, iro cantaincha
noquenqueshireacojeitaquempi. Oquem-
petimotaquena ariorica nosaviquimojeita-

quempime, nocantantimpiri te oncamee-
tsateji⁴ irantero iashiane. Itasorentsitaque
Avincatsarite Jesoshi, iro mataca aquena-
rori nocantacoventantariri yoranqui.
Ariorica pampatojeitea, piojeite noquen-
queshirejeitaquempi narori.⁵ Pishineteri
Satanashi iraanrotanajeri, iroasanqueta-
yerita. Impoiji ariorica inquenqueshireta-
jea, ari iravisacotaje coajica impocajerica
Avincatsarite Jeso quirishito.

⁶ ¿Paita pishemenirojeitantzacari?
Tempa piojeiti otimirica tapiacaarori
tanta capichaji, omatasanotaquero
maaroni tanta, otapiacaajeitacaro.
⁷ Pojocajeri yora noshiacantantimpiri
tapiacaarori tanta, pinquempejeitantea-
rori tanta iroquerari, caari tapiacha.
Eirorica pojoquiri, iquempejeitaricari
iriori itsipapee quemisantatsiri.
Pinequero, yoyetaqueri Quirishito,
ishiaqueri ovisha yoantapiniyeetariri ora
quitaiteri Yavisantaniri.⁸ Meeca, ariorica
aveshireimenteari, tsame ancameetsata-
naque: eiro amatavitantsi. Eiro
aquisatsi, eiro antapinitirotsi caari
cameetsatatsi.

⁹ Nosanquenatantimpirori peerani,
nocantajeivetaquempi eiro piconoaritsi
antirori tsinane caari yai.¹⁰ Te nonquen-
quetsatacoteriji caari quemisantatsi
antirori caari yai, yora coasanotirori
yashiyetari ishaninca, amatavitantsiri
incoshite, quenquetsatacavetarori
yovetsicashiyetari. Te noncantempiji:
"Eiro pitsipataritsi caari quemisantatsi".
Tecatsi pincantajeite pojocavacyea,
tempa pincanteani pineapiniteri
irisavique.¹¹ Iro cantaincha nosanquena-
tacotiri yora cantatsiri: "Narotaque
piyemisantarinre". Ariorica yantiro
tsinane caari yai, eiro quiso poajeitiritsi.
Aisati pinquempejeiteri yora coasanotirori
yashiyetari itsipapee, aisati quenque-
tsatacavetarori yovetsicashiyetari
impeemerri itasorentsite, quisatsatashita-

riri ishaninca, aisati shinquitachari, aisati coshitantatsiri. Aitaque nocantaquempi, eiro poimotaritsi quempetariri nocantaquempi. ¹²¿Arimpa pincante jaoca incanteari caari quemisantatsi? Eiro. Tempa irinti pincante yora piyemisantari-rinte. ¹³Irintiquea Tasorentsi oasanqueta-yerineri caari quemisantatsi. Meeca pojocajeitajeri yora caari cameetsatatsi picarajeivetari: eiro pijitashitaritsi quemisantatsiri.

6 ¹Ariorica pinquisakeri piyemisantari-rinte, ¿ocameetsatimotimpampa paventapeempari caari quemisantatsi incantantempiri jaocarica pincantajeiteari? Tempa oncameetsateme paventapeempa-riime piyemisantaririnte irinti. ²Tempa pioti yora quemisantatsiri yoameetsantiri Tasorentsi irimatero incantacoventajeiteri maaroni atiri, jaocarica incantajeiteari. Ariorica pincantacoventajeiteri coajica maaroni atiri, ¿paitaquea caari pimatantaro meeca pincantacoventajeiteri piyemisantari-rinte? ³Tempa pioti pincantajeiteri coajicani inampire Tasorentsi jaocarica incantajeiteari. Pincantacoventajeiteririca iriori, ¿eirompa pimatiri pincantacoventajeiteri meeca pishaninca avirori? ⁴Otimirica meeca piquisavacaimentari, ¿paita paventantariri yora caari quemisantatsi incantantempiri jaocarica pincantajeiteari? ¿Paita incantem-piri iriori? ⁵Iro nocantantimpiri, nocoaque pimpashiventanaquea. ¿Tecatsimpa quemisantatsiri ioterone incanteri itsipapee jaocarica incanteari? ⁶Iro cantaincha pinquisakeri piyemisantaririnte, aisati paventacari caari quemisantatsi. ⁷Patsipeta-shijieitacaro paventajeitacari joeshi, tecatsi incantea iramitacojeitempi. Te oncameetsa-teji paventeari. Iro cameetsavetachari pishineteri incoshiyeetempita.

⁸Te oncameetsateji pantavacaajeitea. Jero aisati picoshitavacaajeita. Pantapini-jeitiri piyemisantaririnte. ^{9,10}Yora caari cameetsatatsi eiro yareetatsi anta

ipincatsaritinta Tasorentsi. Tempa piotiro, eiro picomitarotsi. Eiro ijatitsi anta ipincatsaritinta yora antirori tsinane caari yai, aisati yora quenquetsatacaashitarori yovetsicashiyetari, aisati aimentarori ijina, aisati tsinampairiri ishirampari-rinte, aisati coshitantatsiri, aisati coasanotirori yashiyetari itsipapee, aisati shinquitachari, quisatsatiriri ishaninca, aisati amatavitiriri ishaninca icoshitanta-ri. Tecatsi catsini incantajeitea iriori irareetajea anta ipincatsaritinta Tasoren-ts. ¹¹Aitaque piquempejeiveitaniri. Iro cantaincha yoameetsajeitaquempi Avincatsarite Jesoquirishito, aisati Ishire Tasorentsi: yaacameetsataquempi, ipeaqueMPI itomi Tasorentsi.

¹²Icanteeti: “Ocameetsati nantero paitapeerica caari itsaneacotee Jesoshi”, iro cantaincha ariorica antashitearo paitapeerica, tecatsi amate: tempa antsipetashaquearo. Te ancoyeji ametasanotearo caari ineacameetsata itsipapee quemisantatsiri. ¹³Otmi avari aquemari. Aisati otmi asheito onantari avari. Iro cantaincha coajica eiro otimajisti ayeari aisati asheito iroori. Impeajero Tasorentsi, eiro otimitsi inquitequi. Tempa atsipetashitaro anvetaro paitapeerica. Te iro irovetsicantee antero caari ai, irointi yovetsiquimentee Avincatsarite anquenqueshirejeitanteeariri iriori. Aisati iquempeta, iquenqueshireta-pinijeitaquee arori. ¹⁴Otmi itasorencia Tasorentsi, irootaque imatantarori yoitinaajiri Avincatsarite, aisati irimatan-tajeitajeri aroripee.

¹⁵Avatsapee arori irootaque iraco Quirishito iriori: iyempita, iroqui, iiti, maaroni. Tempa piotiro oca. Arojeitaque-rica ivatsa Jesoshi, ¿ocameetsatimpa antero tsinane neayetiriri itsipapee shirampari? Tempa oquempevetaca antacaakeri Jesoshi tsinane. Teve, te oncameetsateji. ¹⁶Ariorica yaniro

shirampari tsinane, oquempetimotacari Tasorentsi yaasanotaquero. Tempa piotiro. Isanquenayeeti: "Apite inaveitani shirampari aisati tsinane, iro cantaincha ariorica iraavacayea irampanirojeitanaque, te oncameetsateji irijocavacayea".¹⁷ Iro cantaincha ariorica quiso airi Avincatsarite, oquempetacari riiori.

¹⁸Eiro pantirotsi catsini caari pai, eiro pantiritsi catsini caari pai. Paitapeerica pashini pantayetaqueri, poashinoncaaqueri itsipapee pishaninca; iro cantaincha yora antirori otsipapee tsinane, yashinoncaja irisati.¹⁹ Tempa pioi otimantacaro pivatsa Ishire Tasorentsi. Itiancaquempiro Tasorentsi quiso oantaquempiro. Te meeca aviro pincatsariventachane avisati, irinti Tasorentsi pincatsariventimpiri.²⁰ Yoavisacotantajimpipi, oshequi opomerentsitimovetacari: tempa itianquiri itomi icamimentaquee. Meeca, paitapeerica pantayetaqueri, pimataqueri Tasorentsi, irineacameetsatanteeteeari.

Iquenquetsacotiri aatsinemeri ijina.

7 ¹Ari chapinqui pisanquenatantaque-nari, timatsi pisampitaquenari. Meeca nancanaquempi. Queario ocameetsatasanoti eiro paitsi pijina. ²Iro cantaincha ariorica pintimashitea, pantirocari tsinane caari pai; aisati tsinane, antiricari shirampari caari ai. Irootaque ocameetsantari paasanoteta pijina, aisati aasanoteta tsinane ojime. ³Cameetsa irishinetearo ijina oneeri, aisati onquem-peteri iroori, oshineteari irineero. ⁴Ijina eiro opincatsatajatsi irosati, irointi ocameetsati ompincatsateri ojime. Aisati inquempetea riiori ojime, eiro ipincatsatashitajatsi irisati, irointi impincatsatero ijina. ⁵Eiro pitsaneapitsatarotsi pijina; aisati tsinane, eiro pitsaneapitsataritsi pijime. Ariorica pincantavacayea: "Eirotsita aneavintsatavacaajatsi

aparopee quitaiteri; iotea anquenquetsa-tacayeri Tasorentsi", ari cameetsa. Iro cantaincha impoiji pineavintsatavacayea aisati. Pamene, terica pimatero pimaashi-tea, yantacaimpicari Satanashi caari cameetsatatsi. ⁶Te noncantasanovetem-piji: "Payero pijina", iro cantaincha pincoaquerica paye, ocameetsati paye.

⁷Nocoavetaca pinquempejeitenename narori, iro cantaincha inashitacaajeita-quee Tasorentsi, te amoncaratavacaajei-teji. Jeri aparo, timatsi imatacaaquejeri. Jeri itsipa, onashita imatacaaquejeri riiori. ⁸Yora caari aatsi ijina, aisati camajinantachari, noncamantajeitempi: cameetsa pinquempejeitenena narori, pintimashijeitea. Aisati onquempejeitea tsinane, cameetsa ontimashijeitea iroori. ⁹Iro cantaincha eirorica pimatirotsi pintimashitea, cameetsa paajeta aisati. Cameetsa paye, te oncameetsateji pincoashiveetea paye. Aisati oquempeta tsinane, te oncameetsateji oncoashiveetea ayeta. ¹⁰Meeca noncamantasanoter-ri aatsiri ojime. Te naro camantasanote-rone, irintiquea Avincatsarite camantasanoterone: te oncameetsateji pojoqueri pijime. ¹¹Ariorica pojoqueri, ari pintimashitasanotanaquea. Eirorica pitimashita-tsi, pampiitajeri paajeri aisati pijimenta-vetacari. Aisati, te oncameetsateji irojocajero shirampari ijina. ¹²Meeca noncamanteri itsipapee, te irio Avincatsarite camanterineri: otimirica ayemisanta-ririnte ijina caari quemisantatsi, ariorica ocoaque aasanoteri, te oncameetsateji irojocajero. ¹³Aisati, tsinane, riotorica pijime caari quemisantatsi, ariorica icoaque quiso iroasanotempi, te oncameetsateji pojocajeri.

¹⁴Otimirica tsinane quemisantatsiri, irinti ojime te inquemisante. Iro cantaincha te inquempeteariji itseencaririnte; inashitacaari Tasorentsi, icanti: "Iriotaque ojime quemisantanari.

Iriotaque iriri otomipee. Nocoacaasano-jeitaqueri inquemisantajeitajena maaroni". Aisati oquempetaca ijina quemisantatsiri, terica onquemisante. Te onquempetajearojoj otseencaroronte; inashitacaacaro Tasorents, icanti: "Irootaque ijina quemisantanari. Irootaque iriniro itomipee. Nocoacaasa-notaquero onquemisantajena, aisati nocoasanotaque inquemisantajeite itomipee quemisantanari".¹⁵ Terica onquemisante ijina ayemisantarinte, oncoaquerica ojocajeri, ari ojocajerita. Aisati ojime ayemisantarinte, terica inquemisante iriori: incoaquerica irojocajero, ari irojocajerota. Tecatsi meeca canterine yora quemisantatsiri quiso iroantearori ora coatsiri ojocajeri. Aisati onquempeteari quemisantatsiri tsinane. Ariorica icoaque ojime irojocajero, tecatsi canterine quiso oanteariri. Te incoyeji Tasorents anquisavacaajeitea.¹⁶ Tsinane, ariorica quiso poyerijijime caari quemisantatsi, tempa ariorica poavisacotacantajeri. Aisati oquempetaca avirori, shirampari: ariorica quiso poyerijijime caari quemisantatsi, tempa ariorica poavisacotacantero?

¹⁷Aitaque icoyeajeitaquempi Tasorents. Cameetsa pantajeiteeneri Avincatsarite paitarica icoacaimpiri avirori. Irootaque nocantajeitaqueriri quemisantatsiri jaocarica yapatojeitacari.¹⁸ Peerani icoyeajeitaquempi Tasorents. ¿Pijivataquempa pitoyeantaca? Aitanaji, eiro pipeajirotsi. Avirori pashini, terica pintoyeantea, eiro picoitsi meeca pintoyeantea, aitanaji.¹⁹ Ariorica pitoyeantani, tecatsi oncantempi oavisacotempi. Aisati oquempetaca, terica pintoyeantea, tecatsi oncantempi. Iro cameetsatasanotatsiri anquemisantero icantajeiteeri Tasorents.²⁰ Jaocarica picantajeitaniri peerani icoyeantaquem-

piri, aitaque pincanteari.²¹ Icocyanta-quempi Tasorents, ɿavirorica pimantaari? Eiro piquenqueshiretirotsi. Iro cantaincha iroimpacajempirica amanantimpire, cameetsa pisoquijanaje.²² Icocyantaquempi Avincatsarite, avirorica pimantaari pinaveitani, ari oquempetaca yoimpacacoventajimpi: eiro meeca iperanatimpitsi camaari. Avirorica caari pimantaari pinaveitani, meeca oquempetaca yamanantimpi Quirishito, meeca incantempi iriori paitapeerica pantayeteneriri.²³ Oquempetaca yamanantaquempi iriori, oshequi pivinaro: tempa oshequi ipomerentsiven-taquempi yoavisacotaquempi. Eiro pipeajatsi meeca ivimantane atiri.²⁴ Irootaque, noyemisantaririnte, noncamantantempiro oca: jaocarica picantajeitaniri peerani icoyeantaquem-piri, aitaque pincanteari; iro cantaincha, quiso poanajeri Tasorents.

²⁵Meeca nonquenquetsatacoter caari neavintsatiri shirampari. Tecatsi incanta-sanotena Avincatsarite, iro cantaincha noncamantempi noquenqueshiretirinari. Ineshinoncataquena, irootaque caari namatavitantimpi. Piojeitiro oca.²⁶ Irotaintsi ompomerentsitimotasanojeitee, irootaque noquenqueshiretanticarori oca. Jaocarica picantajeitari meeca, aitaque pincanteari.²⁷ Paaquerica pijina, eiro pojocajirotsi. Pitimashitarica meeca, eiro picoitsi paye pijina.²⁸ Ariorica paye pijina, cameetsa. Aisati ariorica aye ojime ora caari neavintsatiri shirampari, cameetsa; iro cantaincha oshequi pinquematsicajeitaquearo. Ariorica paye, oshequi ompomerentsitimotasanojeita-quempi. Te nonintejji ompomerentsitimotempi, irootaque nocantantimpire: "Eiro pai meeca".

²⁹Meeca noncamantempi, noyemisanta-ririnte: eiro osamanititsi irojocacaashi-yettempiro pantayevetanariri Avincatsa-

rite icoacaimpiri. Otimirica pijina, iro cantaincha pinquearioventeneri iriori Tasorentsi icoacaimpiri.³⁰ Ariorica poashiretaquea, ariorica pinquimoshiretaque; iro cantaincha eiro piquenqueshiretirotsi, irointi pinquearioventero pantaveeteneri. Ariorica pamanantayete, iro cantaincha eirorica osamanititsi pineero pamanantayeveteari.³¹ Eiro osamanititsi piveshireimentearo timayetatsiri quipatsiqui, impoiji eiro pimatirotsi piveshireimentearo. Cameetsa pisavicajeiveta meeca, ainiro pamejeitacari, iro cantaincha opashinijetanaque maaroni aneayetiri quipatsiqui; coajica ompomerentsitimojeitempi.³² Nocoaque eiro picantashiretapinitanaque. Yora timashitachari, iquenqueshiretapinitiro icoayetiri Avincatsarite, icoaque inquimoshiretacayeri.³³ Irintquea yora aatsiri ijina, iquenqueshiretapinitiro maaroni yantapiniyetiri ishaninca: icoaque inquimoshiretacayero ijina,³⁴ oshequi iquenqueshiretaque paitapeerica. Ora tsinane timashitachari aisati caari neavintsatiri shirampari: oshequi oquenqueshirejeitiro icoayetiri Avincatsarite, ocamantaqueri: "Pitarica pincoacayenari, ari nomataquempiro. Pitarica pincoacayenari nonquenqueshireteri, ari nonquenqueshiretero". Iro cantaincha ora aatsiri ojime oquenqueshiretiro maaroni yantapinijeitiri atiri, ocoaque onquimoshiretacayeri ojime.³⁵ Iro nocamantajeitantiempirio oca, nocoaque namitacojeitempi, te noninteji nompomerentsitacayempi. Noninti cameetsa pisavicajeite, aisati piojeite pantasanojeiteneri Avincatsarite paitapeerica incoacayempi.

³⁶Pamene, otimirica pishinto caari neavintsatiri shirampari. Ariorica pinequero antearoataque, picoaque meeca paacayero; ari cameetsa. Ayeta, eiro otimitsi pantane.³⁷ Ariorica pincoasanote pintsaneemparo, ari

ocameetsatasanoti, eiro piquemisantashitaritsi yora ashereayetimpuri, irointi pantero picoasanotiri avirori, pitarica piquenqueshiretiri.³⁸ Pinequero, ariorica paacayero pishinto, ocameetsati; iro cantaincha ariorica pintsaneemparo, ocameetsatasanoti.³⁹ Ariorica aye tsinane ojime, ari quiso oanaqueri, irosati incamanteari. Ariorica incamaque, ari oshinetantari aajeta pashini ojime onintasanotiri. Iro cantaincha apatiro aaje quemisantiriri Avincatsarite.⁴⁰ Ariorica oncantatiyempani ontimashitea, naamaaca onquimoshiretasanotanaque. Ari naamaaca yoametaquenaro Ishire Tasorentsi oca nocamantaquempiri.

**Iquenquetsatacotiri ivatsa yoyeetinirori
yovetsicashiyetari ijitasorentsitiri.**

8¹Meeca noncamantempiro jaoca pincanteriri ivatsa yoyeetinirori yovetsicashiyetari ijitasorentsitiri. Ijijeiveta atiripee iotasanoti jaoca incanteriri ivatsa. Iro cantaincha, ariorica ayotashitea, ashematicari. Te incoacaasanooteji Tasorentsi ayotashitea, irointi icoacaasanotaquee anintavacaajeitea avametavacaasanotantanaqueari antimantajeitari cameetsa.² Itimirica jivetachari ioti, irisati amatavitajancha: te iriotasanoteji.³ Iro cantaincha ariorica aninteri Tasorentsi, iroamejeitee irinti.⁴ Pisampitacoventaqueri ivatsa yoyeetaquenero ijitasorentsitiri yovetsiqueetiri. Ari ayojeiti te ontasorentsiteji yovetsicashiyeetari. Itimi apaniro Tasorentsisanori, te intimeji itsipa.⁵ Ainiro timayetatsiri anta inquitequi aisati aca quipatsiqui ijitasorentsitashtari atiri. Ainiro onaveta oshequi ijitasorentsitashiyetari, oshequi ivincatsaritepee.⁶ Ayojeiti ainti itimi apaniro Tasorentsi, yora Apa. Iriotaque timacaquieror maaroni aneayetiri, aisati yovetsicasheitaquee arori. Irisati

vetsicanontaincha. Timatsi aisati Avincatsarite apaniro: yora Jesoquiri-shito, vetsicajeitirori maaroni timayeta-tsiri, vetsicajeitaqueeri aisati arori.

⁷Iro cantaincha ainiro ayemisantarinre caari iojeitiro oca nocamantaquempi. Peerani yameyetaroni aparopee iquenque-tsatacapiniveitaroni yovetscashiyyetari atiripee. Ariorica yoarini ivatsa yoyeetinirori, ijivetacarini ashisanori yora ijitasorentsyeetiri. Te irioveteajji; ariorica iroashiteari meeca ivatsa yoyeetinirori yovetsiqueetiri, oshequi inquenqueshireanaquea, irijivetea te oncameetsateji iroyeari. ⁸Ariorica ayeari ivatsa, tecatsi oncanticoneenteari Tasorentsi. Ayearirica, tecatsi incantee ivatsa. Antitearirica, eiro yoameetsashireteetsi.

⁹Cameetsani poyeari, iro cantaincha pantacairicari caari cameetsatatsi yora caari iotatsi. ¹⁰Irineempirica caari iotatsi poaca anta ovancoqui ijitasorentsyeetiri, icanticari: “Ioti irinti. Nonquempeteari, noyeari ivatsa yoyeetinirori ijitasorentsyeetiri”. ¹¹Piotasanoti, ocameetsatantari poari. Irintiquea, te iriojeiji. Ariorica iroashiteari, oshequi inquenqueshiretanaquea: “Terica oncameetsateji nantaquerica. Otimi meeca nantane”. Irotaque piyemisantarinre, icamimentaqueri Quirishito. ¹²Te oncameetsateji pantacayeri caari cameetsatatsi. Te irioveteajji, piquenqueshiretacairicari. Aisati irineacotaquempi Quirishito, te oncameetsateji pantaqueri. Tempa icantaquee: “Pinintajeiteri pishaninca, eiro pantacairitsi caari cameetsatatsi”. ¹³Irotaque nocantantimpiri: ariorica noaqueari ivatsa, irosati nantacanteariri noyemisantarinre caari cameetsatatsi, eiro catsini noajaritsi ivatsa aisati. Nantacairicari caari cameetsatatsi.

Icantiri Pavoro: “Pinquempejiten”.¹

9 ¹Tempa ishinetaquena Tasorentsi paitapeerica. Tempa itiancana. Tempa noneasanotaqueri Avincatsarite Jesoshi. Tempa iriotaque matacaquena-

rori noquemisantacaquempi. ²Terica iriojeiteji itsipapee itiancaquena Tasorentsi, iro cantaincha piotasanojeitaque avinti itiancaquena. Avirojei iotaacajeiterine atiripee itiancana Avincatsarite. ³Ainiro tseencaquenari, cantanari: “Te intianquempiji Tasorentsi”. Jero oca nocantavaquerir: ⁴“Tempa ocameetsati ayea aisati ire. ⁵Ariorica nonquenayetanaque nonquenquetsatacayeteri asháninca; ontimeme nojina, tempa oncameetsateme nontsipatanaquearome. Aitaque imatapiniyetiro itsipapee itiancane Avincatsarite, aisati irintipee, aisati Sejashi. ⁶¿Apanirompa nompomrentsiventero nompinatero noyeari? Aisati iquempetana Verenave, ipomerentisventaro iriori yoari. ⁷Noshiacantempiro: tempa ipinatapiniyetiri soraro. Ariorica apomerentsitaro apanquitiro ova, tempa aisati avaquearo. Ariorica ashentapinitiri avirapee, tempa irapinitiro otsomi”. Irootaque nocantaverir yora tseencaquenari.

⁸Noquenquetsatacotaquero anepinijeitaqueri, iro cantaincha ɿpaita ocantiri isanquenatiniri Moishishi? ⁹Jero oca ocantiri: “Eiro pipashicavantetiritsi vaca aticaitirori tirico itaquireantarori”.

¿Apanirompa vaca iquenqueshiretiri Tasorentsi? Teve. ¹⁰Tempa aisati arori oshiacantaquee isanquenaren. Oamejetaquee paitarica antajeitaqueri. Ariorica inquivanetaquero quipatsi impanquitan-tearori, icoaque yora quiavaneteroneri iraaranayetajero oitsoqui, coajica. Aisati iquempetaca yora taquireeroneri, icoaque iraaranayetajero oitsoqui iriori.

¹¹Pamene, oshiacantaca nopalquitiro pishirequi irineane Tasorentsi. ¿Opomrentsitimotimpimpa meeca pimpaarante-naro noyeari, noitsaare, paitapeerica?

¹²Ariorica pipaarantashiyetari itsipapee, tempa oncameetsateme pimpaarantaque-name narori. Iro cantaincha tecatsi

pimpema. Piquemisantaquero peerani oca cameetsatatsiri nocamantacotiriri Quirishito. Oshequi opomerentsitimatiquenani, iro cantaincha te noncoyeniji nojocacayempiro piquemisantaqueni, irootaque caari nocacoacotantimpini paitapeerica.¹³ Pamene. Yora antaveetasiri ivancoquii Tasorentsi yaapinitiro yoari anta, yoaro. Aisati yora oaquereriri Tasorentsi virantsipee anta yoapinitinirinta, yoarantari ivatsa. Tempa piotiro.¹⁴ Aisati oquempetaca, icanti Avincatsarite: “Cameetsa impaaranteeteri coiteimtariri yora quenquetsatirori oca cameetsatatsiri”.

¹⁵Oncameetsateme naaranitempirome paitapeerica, iro cantaincha tecatsi naitempi. Aisati te iro nosanquenatimentipi pimpartenari paitapeerica. Noquimoshiretaque tecatsi noncoacotem-pini; arioricame ayename notashe, eiro nocantimpitsi: “Pimpema noyeari”. Ayenata, noncameta.¹⁶ Ariorica nocamantacotiro oca cameetsatatsiri, tecatsi noncantea noshemete. Tecatsi noncantea nomajere, aisati nonquenqueshirete: “Te nomateneri Novincatsarite icoacaavetaquenari”.¹⁷ Noncoasano-tericame nocamantanti, impinatename Tasorentsi. Iro cantaincha te noncoave-teji, tempa iperanataquena.¹⁸ ¿Paita meeca impinatenari? Oncameetsataqueme noncoacojeitempime, iro cantaincha te noncoyeji. Apatiro noveshireimentaqueempri piquemisantajeiti.

¹⁹Impinayeetename, nompeaqueame iratirite pinatenanemer, incantapinitename paitapeerica nantapinitenerimeri. Iro cantaincha nopomerentsiventashijetacari oshequi atiri noquemisantacotajariri.²⁰ Ariorica nocarajeitaqueri jorio, noquempejeitacari iriori, noquemisantacotajariri. Ariorica nocarajeitaqueri quemisantirori isanquenare Moishishi, noquempejeitacari iriori, noquemisanta-

cotajariri. Iro cantaincha te nompinac-tsatearoji meeca isanquenare Moishishi, te nompomerentsiventearoji.²¹ Ariorica nocarajeitaqueri caari quemisantiro isanquenare Moishishi, noquempejeita-cari iriori, noquemisantacotajariri. Te noavisajeroji icantiri Tasorentsi; noquemisantajeitaquero icantiri Quirishito.²² Aisati, ariorica nocarajeitaqueri caari matasanotiro inquemisante, noquempejeivetacari iriori, noquemisan-tacantasancotacariri. Aitaque noquempejeivetacari maaroni atiripee noquemisantacotajeitacariri.²³ Iro noquempetapini-jeitantariri irioripee inquemisantajeitan-tearori oca cameetsatatsiri nocamantajeitiriri. Aisati narori, noveshireimentearo oca cameetsatatsiri.

²⁴Pamene, tempa piojeiti ishiajeitanaca oshequi shirampari irijojeitanteari janicarica anaacotantaintsineri. Iranaac-tantaque apaniro yora shiasanotanain-chari, ari impeeteri icanteetiro premio. Aisati pishiyeri avirori, pishiasanotana-que, paantearori premio. Ariorica pishintsiventero icoacaimpire Tasorentsi, ari paaque.²⁵ Irisati cavintsaajancha maaroni coatsiri iranaacotante ariorica irishiye. Irootaque icavintsanari irisati irimatantearori irishiasanote iraantearori amatseerentsi. Oshintsiti opatsai, iro cantaincha oca amatseerentsi ayeri arori, eiro opatsaisi irointi, irootaque ocameetsatantari ashintsiventsanoter. ²⁶ Te nontipitipiyetanaque noshianaca, irointi catinca noshianaca nomatanteorori nanaacotante. Pashini noshiacantempiri capojavacaachari. Icapojavacaasanotaca iriotanteari janicarica anaacotantaintsineri. Oquempevetaca aisati nocapojasanotiri itsipa, te noncapojaiteashiteaji; noquearioventiniri Tasorentsi icoacaanari,²⁷ noshintsiventsanotaqueneri; noperanataja narosati. Oshequi noquen-quetsatacaajeitirori itsipapee, te noncoyeji

incantena Tasorentsi coajica: “Te pimatasanoteneroji nocacaavetimpiri”.

Iquenquetsatacotiri jorioni, peerani; aisati yoametaqueri quemisantatsiri.

10 ¹Meeca, noyemisantaririnte, noncamantempi piotanteari jaoca icantajeitari jorioni anta caaraiteriqui, peerani. Otsimancapinijeitanaquerini mencori; aisati otencareajataqueneri incajare, nianqui yaniijeitanaque pirijapatsariqui. ²Anta mencoriqui aisati incajarequi yoamejeitiri Tasorentsi iojeitancatari iquemisantajeitaqueri peerani Moishishi. ³Yoapinijeitacaro yoari ipapinijeitaqueriri Tasorentsi. ⁴Irapinijeitanaquero nije ipapinitiriri, ora soquijatatsiri mapiqui. Yoagueneri Tasorentsi ora mapi, oshiaacaaventiri Quirishito, ojajaeitanaqueriri. ⁵Iro cantaincha te iriveshireempaji Tasorentsi. Te iriveshireimentajeiteariji oshequi yora atiripee, irootaque icamajeitancatari anta caaraiteriqui. ⁶Pinquenqueshirejeitero oca piojeitanteari icoacaimpiri Tasorentsi. Piquempejeitaricari jorioni: picocircari caari cameetsatatsi. ⁷Eiro piquemantisantirotsi ijitasorentsitsahiyetari. Aitaque imataarantaquero peerani. Osanquenatacani: “Isavicajeitaque atiri, yoajeitaca aisati irajaiteaque. Impoiji icatiaeitanaaca, imaticajeitanaque, omaninquejeitanaque”. ⁸Queariyea, aquempejeitaricari arori: ineavintsataaarantavacaaca caari yai, irootaque icamaarantantacari 23,000 atiri aparoni quitaiteri. ⁹Ineantaarantacari Avincatsarite, iritanteari inquisheririca, irosati itiancantacanari oshequi maranque. Ari yatsicajeitaqueri, icamajeitaque. Queariya, ashiiircari arori, aneantaricari Tasorentsi. ¹⁰Aisati icantimataaarantanaqueri, irootaque ipoyerearantantacariri yora inampire Tasorentsi. Queariya, aquempejeitaricari arori.

¹¹Iro imatantayetacarori oca, anqueneshireanteari. Isanquenayeetironi, ayojeitantajari meeca. Irovetainchamoncaratajea impocantajeari Jesoquirishito. ¹²Meeca, ariorica picanti: “Noncantatiyempani nainti nonquearioventero nonquemisante”, nocantimpi narori: “Paamaventea, pantirocari caari cameetsatatsi”. ¹³Ainiro aquenqueshirejeitiro antero caari cameetsatatsi: ashi avajeitiro maaroni atiri. Iro cantaincha ariorica aventeari Tasorentsi, iramatacajeitee eiro antantarotsi. Eiro yamatavitesi, iramatacotasanojeitee eiroquea antantarotsi caari cameetsatatsi aquenqueshirerevetacari.

¹⁴Irootaque, nonintane, noncamantantempiro oca: “Eiro catsini piquemantisantirotsi yovetsicashiyetari ijitasorentsitiri”.

¹⁵Ainiro piotantari, meeca pinquenqueshirejeitero oca nocantimpi. ¹⁶Ariorica ancanteri Tasorentsi: “Irove, Apa, aviro panarori oca nireri”, tempa aquempetavacaapinijeitaca, aveshireimentajeitaro iriraja Quirishito yaparajatimentaquee. Aisati, ariorica acarajapinitiro tanta, tempa aquempetavacaapinijeitaca, aveshireimentajeitaro ivatsa, aquenqueshirejeitiri icamimentajeitaquee. ¹⁷Ari ocarati avapinijeitari tanta aparo. Aisati oquempeveta, oshequi anajeiveta, iro cantaincha amoncaratavacaajeitaca, ashanincajeitacari Quirishito: tempa apaniro ini intiri.

¹⁸Pinquenqueshirejeitero yamejeitacari joriopee. Ariorica yoajeitacari ivatsa yoiniriri Tasorentsi, tempa ishanincatava- caajeitaca intiri. ¹⁹Jero oca nosampitempiri: ¿Tasorentsampa oca yovetsiqueeyetiri? Tempa yatsipetashita yoapinitiniro ivatsa. ²⁰Jero oca noncamantasanotempi. Ainiro yoagueneri ivira. Iro cantaincha caari oni Tasorentsi yoagueneri, intiri camaari. Te nonintacayempiji pishanincteari camaari. ²¹Ariorica pirimenteri

Avincatsarite, eiro pimatirotsi pirimenteri camaari aisati. Ariorica poimenteari Avincatsarite, eiro pimatirotsi poimenteari camaari aisati.²² ¿Arimpa picoaque inquisaquémpiri Avincatsarite? ¿Panaacojeitirimpia pishintsitasanotí?

²³Icanteeti: “Ocameetsati nantero paitapeerica caari itsaneacotee Jesoshi”, iro cantaincha ariorica antashitearo paitapeerica, tecatsi amate, tempa antsipetashitearo. Eiro amitacojeiteetsi paitapeerica antashiyeveteari.²⁴Eiro piquenqueshireacotapinitirotsi picoayevetari avirori, irointi pinquenqueshireacotapinitirotsi icoayetiri itsipapee.²⁵Ariorica ipimantayeti ivatsa, poyeari. Eiro pisampitacoventiritsi: “¿Jaoca pairiri? ¿Irimpa yoyeetinirori ijitasorentsiiyetiri?” Ariorica pamananteri ivatsa, eiro pisampitacoventiritsi, pijiticari ariorica poyeari eiro picameetsashiretanajitsi.²⁶Ocantini Sanquenarentsi: “Irio Avincatsarite ashiyetarori quipatsi aisati maaroni timantajeitarori”.

²⁷Ariorica incajemempi caari quemisantatsi iroacayempi. Ariorica picoaque pijate, poajeiteariyea maaroni impajeitavaquempi. Eiro pisampitacoventiritsi ivatsa, eiro pijititsi ariorica poyeari, eiro picameetsashiretanajitsi.^{28,29}Iro cantaincha incanteetempirica: “Jeri yoca ivatsa, yoyeetinirori ijitasorentsiiyetiri”. Ari pinquenqueshireteri yora camantaquempi: yaamaacari ariorica iroyeari, eiro icameetsashiretanajitsi. Irijiterica te oncameetsateji iroyeari, eiro poaritsi avirori. Avinti piovetaca tecatsi incantempi ivatsa, iro cantaincha pincavintsayeri yora caari iotatsi.

Naamaaca intime cantatsineri: “Ishinentana Tasorentsi noyeari paitapeerica, ¿paita itsaneacotashitantanariri yora caari iotatsi?³⁰Ariorica avapinijeitari, acantapinijeitiri: ‘Iriove, Apa, aviro panariri noayetari’. Ariorica ampasonqui-

teri, ¿paita icantimentanteeriri ayearirica?”³¹Ari noncamantempi. Ariorica poajeitea, aisati ariorica pirajeite; iro cantaincha paitapeerica pantayeteri, panteneri Tasorentsi icoacaimpiri, iriveshireimentantempiri. Impoijiquea incantajeite atiri: “Tempa icameetsati Tasorentsi. Cameetsa isavacacaajeitiri quemisantajeitiriri”.³²Pantacairicari caari cameetsatatsi yora jorio, yora caari joriotatsi, aisati yora quemisantajeitiriri Tasorentsi.³³Paitapeerica nantayetiri, noninti namitacojeiteri atiri. Te naro intacotajanchane narosati, irointi nintacotapinijeitari iriori itsipapee atiri. Iro nomatapinijeitantanariri iraviscacojeitantanariri.

Antayetiri tsinane quemisantayetatsiri.

11 ¹Pimoncarajeitaquena, noquem-petaca narori nomoncaratacari Quirishito.²Piquenqueshiretapinita-quena, aisati piquenqueshiretiro maaroni noametaquempi, irootaque noneacameetsatantaquempi. ³Jero oca, pioterio: irio Quirishito cantajeitiriri atiri paitarica irantajeiteri; irio shirampari cantajeitirori ijina; aisati irio Tasorentsi cantiriri Quirishito.⁴Pamene yora shirampari, ariorica iquenquetsatacairyi Tasorentsi, aisati ariorica icamantanti, te irameteaji impashicainatea. Ariorica impashicaina-taquea, te impincatsateriji Quirishito.⁵Irointquea tsinane, ariorica oquenquetsatacairyi Tasorentsi, aisati ariorica ocamantanti, opashicainatapinitaca. Terica ompashicainatea, te ompincatsateriji ojime: oquempetimotacaro ameetiro oishi.⁶Terica oncoyeji tsinane ompashicainatea, ari ocameetsati aisati ameetero rota oishi. Iro cantaincha ariorica opashiventaca ameetero, cameetsa ompashicainatea.

⁷Te oncameetsateji impashicainatea shirampari: iquempivetacari Tasorentsi,

aisati ipincatsatiri. Aisati oquempetaca tsinane, opincatsatiri shirampari. ⁸Ijivataqueri yovetsiqueetiri shirampari. Iro imerequi yovetsiqueeti tsinane; irointi omerequi tsinane, te irovetsiqueeteroji shirampari. ⁹Yovetsiqueetiri peerani shirampari, impoiji yovetsiqueetiniri tsinane. Irointi tsinane, tecatsi irovetsiqueetene.

¹⁰Ocameetsati ompashicainatea tsinane iriotantajeiteari inampire Tasorentsi opincatsatiri ojime. ¹¹Pamene, te ontimashiteaji tsinane, te intimashiteaji shirampari. Icoaque Avincatsarite ancoiteavacayea. ¹²Iro imerequi shirampari yovetsicaqueri tsinane, aisati meeca otimapinitiri tsinane otomi. Iranti Tasorentsi vetcijkeitirir maaroni. ¹³¿Paita piquenqueshiretiri avirori? Ariorica onquenquetsatacayeri tsinane Tasorentsi, ¿cameetsampa ompashicaina-reajea? ¹⁴Te amejeiteaji anquishipejeite arori shirampari. Eirome apashiventame intimeme quishipenti. ¹⁵Irointi tsinane, tempa aneacameetsajeitiro oquishipetrica oishi: irootaque opashicainatari. ¹⁶¿Timatsimpa coatsiri impiatsatena? Noncamantempi: nametacaro oca nocamantaquemppiri, aisati yamejeitacaro maaroni quemasantajeitiriri Tasorentsi.

Yoametantiro yoimentapinijeitari Jesoshi.

¹⁷Timatsi pashini noncamantemppiri. Te noneacameetsateroji oca pantajeitiri ariorica papatojeita: te oncameetsateji, te oameetsashirejeitimpipi. ¹⁸Nojivate noncamantempiro oca. Icamanteetana ariorica papatojeita piquemisantantapinittari, picantavacaajeita. Naamaavetaca queario icamanteetana. ¹⁹Picantavaca-jeitaca piojetantacariri janicarica quearioventasanotirori iquemisanti. ²⁰Ariorica papatojeita, poajeiveta, iro cantaincha te poimentajeiteariji Avincatsarite. ²¹Ariorica poapinijeita,

paanontajeitanaca poari avirori, poapitsajeitacari itsipapee. Te poyeavacaava-queaji. Itasheanaque aparopee, ishinqui-tanaca itsipapee. ²²¿Paitasa pantajeitiri? Tempa otimi pivanco poanteari, piranteari. ¿Pipincaquerimpa yora pocashitiriri inquemisanteri Tasorentsi? ¿Pishirontimentarimpa yora caari ashitaarantacha? ¿Jaocampa noncamantemppiri? ¿Ariompa noneacameetsatemp? Teve.

²³⁻²⁵Irio Avincatsarite oametanarori oca novaaquemppirica. Peerani, tsiteniriqui, ari yaquiero Avincatsarite Jesoshi tanta. Icantiri Iriri: "Irove, Apa, aviro panarori oca noyeari", impoiji icarajaquero. Icanti: "Jero oca tantaca: ariorica poapinitearo, pinquen-queshiretapinijeitena. Tempa narotaque camimentajeitimpineri". Ari yoajeitaca. Impoiji yaquiero aisati iramento. Icantajeitiri: "Jero oca oja, ariorica pirapinijeitero, pinquenqueshirejeitena, piotasanojeite amparajatimentajeitimpি niraja pavisacojeitajeari. Ariorica noncamimentempi, piotanaque eiro namatavitimpitsi, nomatem-piro maaroni nocamantaquemppiri". Irosati yanancantanaja tsiteniriqui, irosati yaanteetacari. ²⁶Ari meeca poapinijeiteto, pirapinijeitero, poametantapinieteari atiri icamimentajeitaquee Avincatsarite. Pimatapinijeitero, irosati impocantajejari. ²⁷Ariorica poimenteari, ariorica pirimenteri, pinquenqueshireempa: eiro pantashitarotsi. Ainiro irantane yora antashitarori: itseenquiero ivatsa Avincatsarite, itseenquiero iriraja. ²⁸Pijivate piotacotea avisati, otimirica pantane. Piotacotearica te aneeroji pantane, ari poyearo, aisati pirero. ²⁹Te oncameetsateji avashiveetearo, aisati irashiveetearo. Terica anquenqueshiretasa-noteri Avincatsarite, tempa avamempeacaro, iramempeacaro: ontine antane.

³⁰Irootaque pojoquiitaarantantacari, aisati caari pishintsiyetanta. Irootaque aisati icamaarantantacari pishanincapée.

³¹Ariorica ayotacotea arosati otimirica antane, ocameetsati ajivate anquenque-shireempa ancameetsatantajeari; impoijiquea, ariorica avajeitimenteari Quirishito, eiro yoasanqueteetsi Tasorentsi. ³²Tempa aisati ocameetsati incantacoventee Avincatsarite, aisati iroasanquete, oncanteataquea eiro ajatantatsi Sharincaveniqui. Te incoacaajeiteeji antsipajeiteari maaroni yora tseencantsiri. ³³Meeca, noyemisantaririnte, ariorica pampatojeitea poimentajeiteari Avincatsarite, poyeavacaavaqueatsita. ³⁴Ariorica pintasheasanotaque, pijivate poyea anta pivancoqui. Eiro papatotashijeitatsi pinquemantearori poyeari: otimicari pantane. Ariorica nareetempi nontsoteapeempiro, noameyetempiro pashini.

**Iquenquetsatacotiro omatacaaajeitaqueeri
Ishire Tasorentsi.**

12 ¹Meeca, noyemisantaririnte, noamejeitempiro maaroni omatacaaajeitaquempiro Ishire Tasorentsi. Te noncoyeji pincomijeitearo, irointi nocoaque piojeitavaquero. ²Piojeiti peerani te pinquemisantajeiveiteani. Piquemisantashiyeveitaroni povetsicashiyetari, pijitasorentsivetari. Tempa omasontijeitaque iroori. ³Nocoaque piojeitavaquero oca. Ariorica oneaveeta-caaqueri Ishire Tasorentsi atiri, eiro icantiszi: “Te incameetsateji Jesoshi”. Aisati oquempetaca, eirome oametirime, eiro icantime: “Irio novincatsarite Jesoshi”.

⁴Onashiyetaca omatacaaajeitaqueeri, iro cantaincha apaniro oni Ishire Tasorentsi. ⁵Onashiyetanaca oca antajeitiniriri Avincatsarite, iro cantaincha apaniro ini irinti. ⁶Onashiyetaca antajeitaqueneriri, iro cantaincha apaniro ini irinti Tasorentsi. Tempa irotaque matacaajeiteerori maaroni. ⁷Oamejeitaquee Ishire intacota-

vacantajeitacari. ⁸Iotacaayetaqueri aparopee, cameetsa iquenquetsatantacari; irio itsipapee oametaqueri, cameetsa yoametantaqueerori ioyeriri. Ocarati oameyetiriri apaniro: ora Ishire Tasorentsi. ⁹Irosati matacaaayetiriri itsipapee ishirejeitacaro icantayetiri Tasorentsi; itsipapee omatacaaqueri yoavisacoyetiri mantsiaripee. ¹⁰Irosati matacaaayetiriri itsipapee itasoncantayeti. Pashini omatacaaqueri icamantantayeti. Pashinipee iotacaqueri ioyeravaqueri quenquetsatacantatsiri: iriorica quenquetsatacari camaari, irompa terica irio. Pashini, omatacaaayetiri ineantanashiyetaro pashinipee neantsi. Pashini aisati omatacaaayetiri yovaajeenero ora icantaqueeri. ¹¹Onashiyetaca oamejeitaqueri, iro cantaincha aparoni oni oamejeitiriri: irootaque Ishire Tasorentsi. Paitarica onintacaayetiriri, irootaque oameyetiriri, omatacaaqueri.

¹²Pamene: apaniro onaveta avatsa, iro cantaincha ainiro aiti, aco, aqui, ayempita, maaroni. Oshequi onaveta, iro cantaincha apaniro onaveta avatsa. Aisati iquempeta iriori Quirishito. ¹³Apaniro onaveta Ishire Tasorentsi. Otasoncaventajeitaquee, irootaque ashanincatavacaajeitancari, oquempetacaajeitaquee apaniro anajeiti. Acarajeitiri jorio, itsipapee caari joriotatsi; itsipapee pimantaari inaveta, pashinipee te impimanteeteriji. Quiso oajeitaquee Ishire Tasorentsi: apaniro oni.

¹⁴Apaniro oni avatsa, iro cantaincha timatsi aniiitantari, ajiricantari, amenantari, aquemantari, oshequi. ¹⁵Te oncanteji aiti: “Te naro iraco, te naro ivatsa iriori”. Tempa irootaque aiti avatsa, te onashiteaji. ¹⁶Te oncanteji ayempita: “Te naro iroqui, te naro ivatsa iriori”. Pineaquero, tempa irootaque ayempita avatsa, te onashiteaji. ¹⁷Ioteamerica avatsa apajaquironi, jaoca ancanteameri anquemanteameri? Ioteamerica

aquemantari, ¿jaoca ancanteameri anquemeencatanteameri? ¹⁸Iro cantaincha cameetsa yovetsicayetaquero Tasorentsi avatsa: aquemantari, amenantari, anitantari, maaroni. Paitarica icoiri, imayetaquero. ¹⁹Iotaquearicame aqui anaqueme, ¿jaoca ancanteameri? ²⁰Apaniro oni avatsa, iro cantaincha optimi aiti, aqui, ayempita, aco, maaroni. ²¹Tecatsi oncantea aqui oncantero aco: “Te pincanteji”. Aisati aito, te oncantero aiti: “Te nonintempiji”. Teve, te oncante-roji.

²²Timatsi avatsapeequiniri paitapee-rica, ajivetaro otimashita, iro cantaincha ocameetsasanotaque otimayeti. ²³Aisati oquempeta, ainiro apashiventacari, iro cantaincha ocameetsati ontine. Apashiquiro caari acoi onconijate. ²⁴Te ampashiqueroji caari apashiventaca. Iro cantaincha cameetsa yovetsicayetaquero avatsa yora Tasorentsi. Ocameetsati ontimajeite ora caari aneacameetsaveta. ²⁵Imataquero oca oncavintsavacaajeitan-teari aiti, aqui, maaroni. Tecatsi oncanta-jeitea onquisavacaajeitea. ²⁶Ariorica ocatsitaque aparo, ari aquemaquero maaroni avatsapeequi. Tecatsirica oyeron eaparo, tempa aquimoshireven-taquaquero.

²⁷Avirojeitaque ivatsa Quirishito. Avirojeitaque iiti, iraco, iroqui, iyempita, maaroni. ²⁸Ari acarajeiti oshequi quemisantajeitiriri Tasorentsi. Ijivataque Tasorentsi itiancaqueri aparopee iquenquetsati. Pashini itiancaqueri icamantanti. Pashini itiancaqueri yoametanti. Impoiji pashini itiancayeta-queri itasoncantayetaque, pashini yoavisacyetiri mantsiaripee, pashini intacotanta, pashini icantayetiri quemisantatsiri paitarica irantayeteri, pashini ineanatashiyetaro pashinipee neantsi. ²⁹¿Itiancajeitaqueempa anquen-quetsate maaroni? ¿Acamantantajeitimpa

maaroni? ¿Avametantajeitimpa maaroni? ¿Atasoncantajeitimpa maaroni? ³⁰¿Avavi-sacojeitirimpma maaroni mantsiaripee? ¿Amajeitaquerompa maaroni aneanata-shiyetaro otsipapee neantsi? ¿Amajeita-querompa maaroni avaquaeneri asháninca oca icantiriri? ³¹Iro cantaincha cameetsa pincoacotasanofteri Tasorentsi irimatacayempiro cameetsatsatsiri. Meeca noametasanotempiro cameetsatasanota-tsiri.

Cameetsa anintavacaajeitea.

13 ¹Ariorica amatero aneanatashi-tearo otsipapee neantsi, ariorica amatero anquemero irineane inampireepe Tasorentsi, iro cantaincha eiorica anintajeitiri itsipapee, tempa antsipeta-shijeitaquearo, ayotashiyevetearo aneaveete. Aquempetarocari campana, ocantashita, teein, teein. Aquempetarocari tamtempo ocantashita, tin, tin, tin. ²Ariorica ayotitayetearo caariquera ineeti, ariorica ayotitayetearo maaroni imanayevetacari Tasorentsi, ariorica amayetero maaroni ioyetiri atiri, ariorica anquearioventero anquemisantanoteri Tasorentsi, irootaque amatantearori avaayetajero toncaripee: iro cantaincha eiorica anintasanotiri itsipapee, antsipetashijeitearo ayotashiyevetearo maaroni, eiro acameetsatitsi. ³Ariorica ampashiyeteari ashinoncaincari maaroni timimojei-teeri, ariorica anquearioventeneri Tasorentsi anquenquetsatacoteri, irootaque inquisanteeri atiri, intaimentee-tanteerori; iro cantaincha eiorica anintasanotiri itsipapee, antsipetashijeitearo maaroni, tecatsi amatimateneri Tasorentsi.

⁴Ariorica anintasanojeiteri itsipapee, eiro ashintsitsi anquisheri, irointi aneshinoncateri, eiro aquishimentiritsi imayetaqueri iriori, eiro ashemetitsi.

⁵Ariorica anintasanoteri itsipapee, eiro

antirotsi caari cameetsayetatsi apashivencacari, eiro antirotsi acoasanotiri arori, irointi anteneri inintacayeeeri iriori; eiro ashemaritsi, eiro aquenqueshiretapiinitrotsi caari cameetsatatsi yantayetiri.

⁶Ariorica aninteri itsipapee, eiro aveshireimentarotsi caari cameetsatatsi, irointi aveshireimentea queariotasanota-tsiri, ⁷eiro aperataritsi, eiro aamaaritsi, eiro atseenquiritsi, irointi ancavintsayeri aisati intacoteari.

⁸Eiro acantatiani ancamantante, eiro acantatiani aneaveetashitearo otsipapee neantsi. Eiro acantatiani ayotashivetearo paitapeerica, irointiquea ancantatatiyempani anintavacaajeitea. ⁹Te ayotasanojeiveteoji, te ancamantantasanojeive-teoji. ¹⁰Coajica omونcarataquearica cameetsatasanotatsiri, eiro acoajirotsi oca cameetsayevetachari. ¹¹Peerani ajananequivetani, aquempeveitani jananequi aneaveetashita, ayotashiveta capichaji, aquenqueshireaveta capichaji. Anteariantapaaacari, ajocanaquero ajananequivetani. ¹²Meeca oquempetaca amenaatacotaqueri Tasorentsi amenaarontsiqui, te inconijatasanoteji. Coajica amenavorotasnotapeeri inquitequi. Meeca ayojeivertari capichaji, coajica ayotasanojeitapajeri, oquempetaca iotasanoquee meeca. ¹³Meeca acantatiani aquemisantajeitaqueri Tasorentsi, ayojeiti eiro yamataviteetsi, anintavacaajeitaca. Iro cameetsatasoantantsiri anintavacaajeitaca.

Iquenquetsatacotiri neanatashiyetarori otsipapee neantsi, aisati camantantatsiri.

14 ¹Pincoasanojeite pinintajeiteri itsipapee. Aisati pincoasanotero pimatero maaroni omatacaaqueri Ishire Tasorentsi, pincamantantajeiteariri itsipapee. ²Ainiro atiri omapocashitacari ineanatashitanacaro otsipapee neantsi. Te inquemavaqueriji atiri, irintiquea Tasorentsi. Tecatsi quemavaquerone

icantiriri. Omanavetaca oca oneanatacacairi Ishire Tasorentsi. ³Iro cantaincha yora oametantirori irineane Tasorentsi, yoametaqueri atiri, iveshireacaacari, iquimoshiretacaqueri. ⁴Yora neanatashitarori pashinipee neantsi yoametaja irisati, iro cantaincha yora camantantsiri yoamejeitiri maaroni iyemisantari-rinte. ⁵Nocoaveta pineanatero otsipapee neantsi, iro cantaincha nocoasanotaque poametantero irineane Tasorentsi. Oshequi imataque irinti camantantatsiri: iotacaajeitiri iyemisantaririnte. Intimerica ovaayeeroneri irineane yora neanatashitchari, ocameetsati aisati. Iriojeitavaquero quemisantatsiri, inquemavaquero.

⁶Pamene, noyemisantaririnte: noneanatashitapeempirome otsipasato neantsi, tempa nantsipetashitakearome. Nocoapinitaque namitacojeitimpi, tempa irootaque nocamantantimpiori caari pioti, irootaque niotacaantaquempiorori. Tempa nocamantimpido irineane Tasorentsi. Tempa noametaquempi. ⁷Te aneeji shiovrentsi, jaavuirents, caari oni atiri. Ariorica osamejencataque, joa, joa, joa, te ayoteji pitarica oncantemer. ⁸Pamene, itioyeetiniri soraro iriotanteari irimanatea, tiii, tiii. Iro cantaincha ariorica osamejencataque, ɿariompa iriojeitaque irovetsicajeitaquea irimananteari? ⁹Aisati piquempetacaro. Ariorica pineanatashitearo caari iquemeetavaque, vero, vero, ɿjaoca incanteari inquemanteetavaquearori pincanterimeri? Tempa ari pantsipetashitakearome pineaveeteme. ¹⁰Aca quipatsiqui ainiro oshequi neantsipee. Onashiyetanaca, iro cantaincha te incomijencatearoji yora ashitarori irineane. ¹¹Iro cantaincha terica anquemavaquero irineane neanavetchari, te irishaninateeji, aisati te ashaninateariji iriori.

¹²Tempa picoajeitaque omatacaajei-tempi Ishire Tasorentsi, ari pincoasanota-que meeca omatacayempi poametasano-teri piyemisantaririnte. ¹³Irootaque noncamantantempiori oca: ariorica pineanatero neantsi caari ioejiti, iro cantaincha pincanteri Tasorentsi iramita-cotempi pimatantearori povaayeneri piyemisantaririnte picantavetacariri. ¹⁴Ariorica noneanatantari Tasorentsi neantsi caari noneanatapiniti, noquen-quetsatacavetacari noshirequi, iro cantaincha te nioteroji noncantayeteri-meri. ¹⁵¿Paita nanteri naror? Ariorica nonquenquetsatacayeri Tasorentsi, nonquenquetsatacayeri noshirequi, iro cantaincha oncameetsate aisati nonquen-queshiretero paitarica noncanteriri. Ariorica nompampoyeaventeri Tasorentsi, nompampoyeaventeri noshirequi, iro cantaincha ocameetsati aisati nonquen-queshiretero paitarica nompampoyeaven-taqueriri.

¹⁶Pamene, ariorica pinquenqueshireta-quea: “Icameetsatasanoti Tasorentsi”, iro cantaincha pincomitsatearorica pineane, ¿jaoca incanteari inquemantajeitearori yora iroquera tsipajeitimp? Eiro iotavaquerotsi paitapeerica pincanteri-meri. ¹⁷Ariorica pimpasonquitasanoteri Tasorentsi, iro cantaincha terica onconijateji, tecatsi pincantea poameteri itsipapee. ¹⁸Nanaacojeitaquempi noneanatashitaro neantsi caari ioyeeti, irootaque nopasonquitantariri Tasorentsi. ¹⁹Iro cantaincha ariorica ampatotimenta-jeiteari Tasorentsi, nonintasanotaque noneanatantearo noquemasanotaqueri, noametanteariri itsipapee. Ariorica noneanatashitearome oshequi neantsi caari iquemeeti, eiro ocameetsatime. Nantsipetashitearome, vero, vero. Cameetsataque noneanatero aparopee neantsi iquemajeitaqueri. ²⁰Meeca, noyemisantaririnte, eiro pishiiritsi

jananequi: pinquenqueshiretasanotana-quea. Eiro catsini piquenqueshiretirotsi caari cameetsatatsi: pinquempetajeari iroquera timatsi, te inquenqueshiretreteroji iriori. Iro cantaincha ariorica pinquen-queshiretasanotanaquea, cameetsa pinquempeteari antearipee, timatsiri iotantari. ²¹Jero oca ocantiniri Sanquena-rentsi: “Icanti Avincatsarite: ‘Nocantave-tacari joriopee, iro cantaincha te inquemisantenaji. Coajica nontianqueneri itsipapee atiri, nashitarori irineane, incamantaveteari, iro cantaincha aisati iriori, eiro iquemisantavaquenatsi’”.

²²Irootaque noncamantantempiori oca: ineanatashiyetacaro otsipapee neantsi iriojeitanteari caariqueru quenisantatsi yoametaquee Tasorentsi. Te irineanata-shiyeteneri quenisantatsiri iroameteri. Ocameetsati avameteri quenisantatsiri irineane Tasorentsi. Tequera avameteriji irinti caari quenisantatsi: tequera inquemeroji.

²³Pamene, noncamantempiro: pampa-totimentajeitearirica Tasorentsi, ariorica pineanatashijeitaquearo otsipapee neantsi caari ioejiti: vero, vero. Jeri inqueapee itsipapee atiri, caari quenisantatsi; tempa incantapaaque: “Jo, pamenerite yoca, itsaviataque”. ²⁴Iro cantaincha ariorica poametante aneanequi, ari inquemapaa-quero caari quenisantatsi, ariorica itsipapee atiri. Inquemapaaquempi, iriotanteari te incameetsateji, otimi irantane. Onquenqueshiretacayeri maaroni iquemajeitapaaqueri. ²⁵Inquen-queshiretanajero maaroni imanavetacari ishirequi. Intiyeroashiteari Tasorentsi, impincatsateri. Incantempi: “Queario, itsipatasanojeitaquempi Tasorentsi”.

²⁶Pineaquero, noyemisantaririnte. Ariorica pampatojeitea, cameetsa impampoyee aparo, iroametante itsipa, incamantante pashini, itsipa irineanatero neantsi caari piquemajeiti, pashini

irovaajeneri quemisantatsiri icantaque-riri. Iro cantaincha, paitapeerica pantajei-teri, pantero poamejeitanteeariri piyemisantarinre. ²⁷Intimerica neanatantearoneri neantsi caari iquemeeti, cameetsa irineanate ariorica apite, ariorica mava: eiroquea oshequi. Eiro itsipatavacaajeitatsi irineanajeite. Irijivate aparo, impoiteri itsipa. Cameetsa intime ovaajenerine pishaninca icantqueriri. ²⁸Terica intime ovaajene-rine icantiriri, cameetsa irimajeretana-que, eiro ineanatashijeitatsi apatojeitain-chari, irointi cameetsa irineanashirete ishirequi, aisati irineanateri Tasorentsi ishirequi. ²⁹Cameetsa iroametantero irineane Tasorentsi, incarataque camantantatsineri apite, ariorica mava. Irintiquea itsipapée, inquenqueshires-tanojeitero icamantayetaqueriri. ³⁰Ariorica iroameteri Tasorentsi pashini savicatsiri caari iojeiveta, ocameetsati irimajereta-naque. Ariorica irivecarataquero yora jivatatsiri iquenquetsati, ari impoiji iriori iroametante. ³¹Cameetsa incamantaco-tero irineane Tasorentsi apaniro, impoiji aparo pashini, iriojeitanteari maaroni, inquimoshirejeitanteari. ³²Yora camantantirori irineane Tasorentsi, cameetsa irimajerete, ariorica ijivataque ineanataque itsipa. ³³Te incoyeji Tasoren-ksi onconoanatavacaayea ananepeee tecatsi anquemantavaquearori, irointi icoaque amajerejeitanaque anquemajei-tantearori.

Ariorica yapatotimentapinitari Tasoren-ksi maaroni yoameetsajeitiri, amejeitaca ³⁴tsinane omajerejeitaque. Te oshinetan-teaji oneanate. Cameetsa onquemisante, tempa aitaque ocanti Sanquenarentsi. ³⁵Ocoirica iote paitapeerica, cameetsa osampiteri ojime anta ovancoqui. Te oncameetsateji oneanate pampatotimen-tajeitaririca Tasorentsi. ³⁶Pamene, te avirojei intearone poametantajeitero

irineane Tasorentsi. ¿Pijitaquempa apaniro piotiro? ³⁷¿Picarajeitrimpa camantantatsiri? ¿Picarajeitrimpa quemisantirori Ishire Tasorentsi? Nocoaque iriotavaquero iriori oca: oca nosanquenatimpiri, irootaque irineane Avincatsarite. ³⁸Eirorica iquemisantirosi pishaninca oca, eiro piquemisantajeitirts ioriori. ³⁹Meeca, noyemisantarinre, pincoasanojeite pincamanteri itsipapée irineane Tasorentsi. Iro cantaincha eiro pitsaneacotaritsi irineanayeetero neantsi caari piquemajeiti. ⁴⁰Poameetsatero paitapeerica pantayeteri. Te oncameetsa-teji pineanaveete: pimajerejeite maaroni, pinquemisanteri aparo neanatatsineri.

Iquenquetsatacotaqueri Jesoshi, itinaantajari, aisati antinaantajeari arori.

15 ¹Meeca, noyemisantarinre, nonquenqueshires-tacaajempiro aisati nocamantitaquempi: tempa ocameetsata-que, piquemisantitavacaro; irosati meeca picanta piotasanoloti queariotaque, te ontseeyantsiteaji. ²Irootaque oavisacoitem-pineri, ariorica pincantatiyempani pinquemisantasanoter. Iro cantaincha ariorica pinquemisantamempeashitearo, eiro oavisacotimpitsi. ³Nojivati novaaquempiro oca icamantiteetaquenari: aimiro antajeita-queri caari cameetsatsati, irootaque icamimentantajeitaqueeri Quirishito. Imoncarataquero ocamantacotitariniri Sanquenarentsi. ⁴Yoiminqueetaqueri omoroqui. Ocarataque mava quitaiteri itinaantajari aisati. Imoncarataquero aisati ocamantacotitariniri Sanquenarentsi. ⁵Inijaacari Sejashi, aisati inijaajeitajari yora iroamereni, icarataque 12. ⁶Impoiji inijaajei-tajari oshequi ayemisantarinre, yapatotava-caajeita. Yanaaquiero 500 neajeitaqueriri. Aneatsiquera oshequi, iro cantaincha icamaarantaque aparopee.

⁷Impoiji inijaajari Santiago, aisati inijaajari maaroni itiancanepee. ⁸Impoita-

jana narori, inijaja jana. Oquempevetaca impoiji notimaque. ⁹Itiancaquena, iro cantaincha te nonquempeteariji itsipapee itiancane, te noncameetsateji: tempa noquisaveitarini maaroni quemisantiriri Tasorentsi. ¹⁰Ineshinoncataquena Tasorentsi, irootaque noquempetantajari meeca. Te irantsipetashiteaji ineshinoncataquena. Ipomerentsiventajari Tasorentsi itsipapee yora itianquiri, iro cantaincha nanaacojeitajiri nainti, nopomerentsiven-tasanotajari. Te nomatashitearoji narori, irointi ineshinoncataquena, nomatantacarori. ¹¹Ariorica noquenquetsatacaciajei-timpi, iriorica itsipapee itiancane quenquetsatacaciajeitimpire: te ompashini-teji. Aitaque omoncaratavacaaca nocamantajeitimpire: ariorica piquemi-santaquero, aitaque paviscotaje.

¹²Pamene, nocamantajeitaquempi: “Icamaque Quirishito, itinaanaja aisati”. Piquemisantajeitaquena. ¿Paitasa picantaarantantacari te intinaayeji camayetaintsiri? ¹³Eirome itinaajame camaintsiri, eirome itinaajame iriori Quirishito. ¹⁴Eiroricame itinaajame, natsipetashitacarome nocamantantayeti, patsipetashitacarome avirori piquemisantajeitaque. ¹⁵Aisati piotaqueme notseeya-cotacari Tasorentsi. Pinequero, tempa nocamantacotaqueri: “Yoitinaajiri Quirishito”, iro cantaincha eirome itinaajame camayetaintsiri, eirome yoitinaajirime iriori. ¹⁶Eirome itinaajame camaintsiri, eirome itinaajame Quirishito iriori. ¹⁷Eirome itinaajame, patsipetashitacarome piquemisantajeitaque; ainirome ontimimotempime caari cameetsatatsi, ¹⁸aisati incanteanime irijatapiniteme Sharincaveniqui camajeitatsiri, aisatime iriori yora quemisantajei-vetariri Quirishito. ¹⁹Aisati arori, eirome atinaajame, atsipetashitacarome aquemisantavetacari meeca Quirishito, avashinoncaasanotaqueame, anaacojeita-

querime maaroni atiri ashinoncaajeita-chaneri.

²⁰Iro cantaincha itinaasanotaja Quirishito, ijivajeitaqueri maaroni pashini camajeitatsiri. ²¹Timatsi yantaqueri yora Aran, irootaque acamajeitancacari meeca. Aisati iquempe-tacari, timatsi yantaqueri iriori itsipa shirampari, yora Quirishito, irootaque antinaajeitajeari. ²²Ashanincajeitacari Aran, irootaque acamajeitancacari. Aisati oquempetaca, ashanincajeitacari Quirishito, irootaque iroeaneajeitajeari.

²³Ijivajeitaquee iriori. Impoiji, ariorica impocaje, intinaajeitanaje maaroni quemisantajeitiriri. Aitaque oncanteari: ariorica omoncarataquea, antinaajeita-naje, maaroni. ²⁴Impoiji irivecarayero maaroni, impoyereajeri Quirishito maaroni caari pincatsatiri: pincatsarije-vetachari, jivatacantantavetachari, savicacaantatsiri, maaroni. Incanteri Tasorentsi: “Meeca, Apa, pimpincatsariventeri avinti maaroni timajeitatsiri”.

²⁵Impincatsariventante Quirishito irosati intsoncajeitajeari maaroni quisajeive-tacariri. ²⁶Impoiji eiro icamajitsi aisati atiri. ²⁷Ocantini Sanquenarents: “Ipeaqueri Tasorentsi Quirishito pincatsariventiriri maaroni timajeitatsiri”. Tempa ocanti: “Maaroni timajeitatsiri”, iro cantaincha eiro ipincatsariventiritsi Iriri: tempa irootaque peaqueriri pincatsari.

²⁸Coajica aitaque iranaacojeiteri Quirishito maaroni timajeitatsiri, impincatsariventajeteri maaroni. Apaniro irinti Iriri, tecatsi incanteri impincatsariventeri irinti. Incanteri: “Apa, aviro nopincatsati, panaacojeitana maaroni, pipincatsaritasanotaque avinti”. Queario, Tasorentisanori ini irinti, pincatsarisanori ini.

²⁹Pamene, timatsi vaotisatimentariri camaintsiri. Eirome itinaajame camain-tsiri, tempa irantsipejeitearome. ³⁰Aisati,

eirome atinaajame, tempa nantsipetashi-tearome nopolerentsiventapinitaro noquenquetsati. ³¹Piquemisantajeitaqueri Avincatsarite Jesoquirishito, irootaque noveshireimentantajeitaquempiri: queario oca nocantaquempiri. Aisati oquempetaca, queario oca noncamantem-piri: te nioteji jaocarica oncarate iroimen-teetenaro noquenquetsati. Maaroni quitafteri timatsi coavetachari iroimente-naro. ³²Anta Ejesoqui iquisasanotaquena savicayetatsiri, oshequi opomerentsitimo-taquena. Oquempetimovetaquena noipiavajiri maniti oyenanemer. Oshequi opomerentsitaca. Pamene, eirome atinaajame, tempa nantsipetashitaquea-rome. Eirome atinaajame, eiro aquenque-shiretirime Tasorentsi: tsame avajeitea, tsame ashinquijeitea; impoiji ancamaque, ari acarati. ³³Eiro pishinetiritsi tseencan-tatsiri iramatavitempi. Tempa queario icanteeti: “Eiro quiso poiritsi tseencantsiri: yantacaimpirocari caari cameetsatatsi”. ³⁴Pinquenqueshireempa, eiro papiitajirotsi aisati caari cameetsatatsi. Picaratapinijeitiri caari iojeitiri Tasoren-ksi: ¿paita caari pipashiventanta?

³⁵Ariorica irisampitee tseencantsiri: “¿Jaoca incanteari intinaantanajeari camaintsiri? ¿Jaoca oncanteari ivatsa, ariorica intinaaje?” ³⁶Te inquenqueshireempa. Eiorica opanquitatsi oitsoqui quipatsi-qui, eiro oshioquitsi. ³⁷Ariorica ampanqui-tero oitsoqui, te ampanquitacoterji ovatsa, ominca, oshi, maaroni: atsatairo apanquitiro oitsoqui. Ariorica ampanquitero arori tirico, ariorica pashini oitsoqui, ³⁸iro cantaincha itimacaquero Tasorentsi ovatsa, ominca, oshi, maaroni; imataquero inintacaqueror. Tirico oitsoquitacairo oitsoquisanori iroori. Caniri ottimi ovatsasanori iroori. Aisati oquempejeitaca maaroni shiocayetatsiri. ³⁹Te irimoncaratavacaajeiteaji maaroni timajeitatsiri. Ainiro atiri, inashita iriori poshiniri. Inashita aisati vanquitachari.

Inashita aisati shima. ⁴⁰Ainiro timatsiri quipatsi qui, aisati timatsiri inquitequi. Icameetsajeitaque, iro cantaincha inashiyeta, te irimoncaratavacaajeiteaji. ⁴¹Iporei catsirinaciteri. Inashita yora cashiri, iquitasanteti irinti. Inashita aisati yora impoquiro, iquitaporoponqui. Aisati inashijeta, impoquiropee: aparo quitasanteveta-chari, yorari pashini, te.

⁴²Aisati ashiaquero arori, ariorica antinaanaje: eiro aquempetajatsi meeca. Intijeetee, ari ampatsaajeitanaque. Antinaajerica, eiro apatsaajitsi aisati.

⁴³Te oncameetsateji oca intijeeterica, iro cantaincha oncameetsatasanotaque tinaajanchaneri. Meeca te ashintsiteji, irompa antinaanajerica, ashintsitasanota-naje. ⁴⁴Oca avatsa itijeetiri, tempa ametacaro quipatsi atimajeitantar. Ariorica antinaanaje, onashitanajea avatsa, ametantapajearori asavicajeita-paaje anta inquitequi. Ottimi avatsa quipatsiquiniri, ontimaje coajica aisati savicajantsineri inquitequi. ⁴⁵Ocanti Sanquenarentsi: “Aneatsiri inaveitani yora jivataintsiri shirampari, yora Aran”. Irinti yora impoitiriri, yora Quirishito, oaneantasanotatsiri ini, ainiro itasorencia irinti. ⁴⁶Tempa ojivataque meeca oca avatsa asavicanacari aca quipatsiqui; coajica ontimaje avatsa iroqueratajantsi-neri, savicajantsineri inquitequi, irointi.

⁴⁷Iponeaca yora jivataintsiri Aran quipatsiqui, oshanincataro ivatsa quipatsi. Yora apitetapaintsiri iponeaca inquitequi. ⁴⁸Isavicaveitani quipatsiqui Aran, aisati aquempejeitacari maaroni timajeitatsiri aca quipatsiqui. Isaviqui inquitequi itsipa, aisati anquempejeiteari maaroni jatatsineri inquitequi. ⁴⁹Aisati oquempetaca: ashiajeitaquero meeca ivatsa yora quipatsisati, coajica ashiaapa-jero ivatsa yora inquitesati.

⁵⁰Irootaque, noyemisantarinre, noncamantantempirori oca: tecatsi oncantea

oca avatsaca ojate anta ipincatsaritinta Tasorentsi, tempa ompatsaye. Tecatsi oncantea ojate anta te impatsaajeitenta savicajeitatsiri. ⁵¹Pamene, noncamantempiro oca manavetachari: eiro acamajeititsi maaroni, iro cantaincha ampashinijeitanaje maaroni. ⁵²Ari intioyete, ayojeitanteari omoncarataca. Intsipaita ampashinijeitanaque, oquempetaca amatsioqui aparo, ari omataca, matsio. Intioyete, irosati irointinaantajeitajeari Tasorentsi maaroni camajeivetainchari; eiro ipatsaajeitajitsi aisati. Aitaque, ampashinijeitanaque maaroni. ⁵³Ashi airo apatsaajeiti, iro cantaincha eiro apatsaajeitajitsi aisati. Ashi airo acamajeiti, iro cantaincha eiro acamajeitajitsi aisati. ⁵⁴Ompatsaajeitanaque oca avatsaca maaroni, iro cantaincha ontimaje avatsa caari patsaanetajantsine. Ancamajeitanaque maaroni, irompa coajica, eiro acamanejeitajitsi. Impoiji omoncarataquea oca isanquenayetiri: ⁵⁵“Ariove. Eiro apiitajatsi ancamajeitaje aisati. Eiro aquenqueshiretajtsi ancame. Cameetsave. Meeca eiro atsaroacaajeitajarotsi ancame”.

⁵⁶Ariorica antayetero caari cameetsatatsi, ari antsaroacaquearo ancame. Timatsi aisati isanquenare Moishishi, camantaqueeri: “Ainiro pantane”. ⁵⁷Irio oavisaacojetaqueeri Avincatsarite Jesoquirishito. Ariove. Cameetsa ini Tasorentsi. Eiro atsaroacaajeitarotsi ancame. ⁵⁸Irootaque, noyemisantaririnte nonintasanotiri, noncamantantempiroi oca: pinquearioventeneri Avincatsarite paitapeerica panteneriri, eiro piperashiretsi, pincantatiyempani pinquearioventero. Piojeitaque eiro patsipetashitarotsi pimpomerentsiventeari.

Yapatotiniri quemisantatsiri jerosaresati iirequite.

16 ¹Meeca nonquenquetsatacoteri quirequi pampatoteneri ayemisantaririnte ashinoncaajeitachari anta Jerosarequi. Oca nocamantimpiri,

nocamantaqueri aisati quemisantatsiri anta Carashiaqui. ²Maaroni tomincoqui ocameetsati pampatotapiniteneri jerosaresati piirequite, pinquempoyeneri. Jaocarica incarate piirequite, pinquempo yearanteneri. Pintearo pampatotiteanari meeca, opomerentsitomotimpicari ariorica nareetapaaquea. ³Aisati nocoaque pincoyeitea aanajenerine. Ariorica nareetapeempa, nosanquenateri jerosaresati, iriotantavaqueariri. Irosati antiancanteari Jerosarequi. ⁴Pincoajeiterica nojate narori, ari nontsipajeitanaqueari.

⁵Coajica nojate noneajeitempi, iro cantaincha nocoaque nojatapainte Maseroniaqui. ⁶Ariorica osamani nosaviquimojeitempi, ariorica nosarintstacotaque. Impoiji pincavintsaajeitavaquena, jaocarica nojateri aisati. ⁷Ariorica noneapajempi, te noninteqi noshintsitanaque navisanaquempi. Nocoaque osamani nosaviquimotanaquempi, irishinetenarica Avincatsarite. ⁸Nosavicanaquetsita aca Ejesoqui, irosati omoncaratanteari Pentecoshiteshi. ⁹Icoacaajeitavaquena oshequi nonquenquetsatacajeitanaqueri. Oshequi iquemisantajeiti. Itimi aisati oshequi quisajeitaquenari.

Ivetsajeitacari iyemisantaririnte.

¹⁰Irareetapeempirica Timoteo, pineshi noncajeitavaqueri. Tempa iquempeta quena narori, oshequi yantaveetiniri Avincatsarite. ¹¹Eiro pitseencavaqueritsi. Ariorica omoncaratapaaquea impiaje aca, aisati cameetsa pineshinoncatavajeri, cameetsa irareetitajeari aca. Noyeaqueri, aisati itsipapee ayemisantaririnte. ¹²Aisati nocantavetacari ayemisantaririnte, Aporo. Nocantasanovetacari irijateme irineempime, intspatearime itsipapee quemisantatsiri. Te incoyeji irijate meeca. Ariorica coajica irijatanaque.

¹³Paamayeariyea, yamatavitimpicari. Pinquearioventajeitero pinquemisantasa-nojeite. Eiro pitsaroajeititsi. Pishintsiven-teneri Tasorentsi maaroni. ¹⁴Tsame anintajeiteri ashanincapee, paitapeerica anteneriri. ¹⁵Piojeitiri, noyemisantari-rinte, yora Eshitejana aisati ishaninca iriori. Ijivajeitiri Acayasati iquemisanta-jeiti. Iquearioventaquero icavintsaaajeitiri maaroni ayemisantaririnte yoameetsan-tiri Tasorentsi. Tecatsi canterine, iotashitaca icavintsavacaajeitaca.

¹⁶Ipomerentsitaca yamitacotasanojei-timpi, paitapeerica yantayetimpiri. Nocoaque pinquemisantajeitavaqueri iriori, aisati pinquemisantajeitavaqueri maaroni quempejeitacariri. ¹⁷Noveshirei-mentavacari yora areejeitachari: yora Eshitejana, Jorotonato, aisati Acaico. Ainirojeitatsi aca, oquempetimotaquena avirojeitaquerica tsipajeitaquenari aca.

¹⁸IquimoshiretacaaqueMPI chapinqui, meeca iquimoshiretacaapaaquena narori.

Cameetsa pineacameetsajeitavaqueri iriori.

¹⁹Yovetsatasanojeitaquempi maaroni apatotimentariri Tasorentsi aca Ashiaqui. Aisati yovetsajeitimpri Aquira aisati iroori Pirishira, aisati maaroni apatotapinijeitachari anta ivancoqui. Tempa iriojeitaque quemisantajeitiriri Avincatsarite. ²⁰Yovetsajeitaquempi maaroni ayemisantaririnte. Ariorica povetsatavacaaquea, cameetsa paacameetsatavacaajeitea. ²¹Narotaque Pavoro vetsajeitimpiri. Narotaque sanquenajeitimpirori. ²²Irijateta Sharincaveniqui maaroni caari ninterine Avincatsarite. Pishintsite, Novincatsarite, pimpocaje. ²³Cameetsa irineshiloncajeitimpri Avincatsarite Jesoshi. ²⁴Tempa aquemisantajeitiri Jesoquirishito, irootaque meeca nonintasanojeitantimpiri.

Narotaque sanquenajeitimpirori oca:
Pavoro

YORA PAVORO YAPIITAJINIRI AISATI ISANQUENATAJINIRI CORINTOSATI

Yovetsajeitacari.

1 ¹¿Ainirompi corintosati? Narotaque aca Pavoro sanquenajeitimpipirori. Peerani itiancaquena Jesoquirishito noquenquetsatacotaqueri, irootaque inintacaquenari Tasorentsi. Notsipatari aca ayemisantaririnte Timoteo nosanquenajeitimpipirori. Nosanquenajeitimpipirori maaroni quemisantajeitatsiri ara corintoqui aisati Acayaqui. ²Nocoaque irineshinoncajeittempi Apa Tasorentsi, aisati cameetsa irisavicaajaeitempi. Nocoaque aisati inquempetaquempi iriori Avincatsarite Jesoquirishito.

Tsame aveshireimentajeitacari Tasorentsi.

³Tempa icameetsatasanotaque Tasorentsi, yora iriri Avincatsarite Jesoquirishito. Iriotaque neshinoncajeitaqueeri, veshirecaajaeitaqueeri. ⁴Ariorica ashinoncaajaeiveta tempa yoveshirecaajaeitaquee. Pamene, intacaro yoveshirecaajaeitaquee arori, ayojeitantaacari aveshirecaajaeitacari yora itsipapee ayemisantaririnte, ariorica irashinoncayea iriori. ⁵Ariorica oshequi anquematsicatimenteari Quirishito, oshequi aisati iroveshirecaajaeitaquee. ⁶Iro noquemaatsicatantacarori nocoaque oshequi piveshireimentajeitacari Tasorentsi, aisati poavisacojeitanteacari. Ariorica noveshireimenteari, nocoaque aisati piveshireimenteari avirori: piojeitaque ariorica pinquematsicatearo paitapeerica,

iroveshirecaajaeitempi pamavetantearori. ⁷Niotasanotaque ariorica pinquempejeitenapinquematsicatearo avirori paitapeerica, aisati pinquempejeitenapiveshireimentajeitacari Tasorentsi.

⁸Nocoaque piojeite, noyemisantaririnte, oshequi catsini noquematsicayetacaro anta Ashiaqui. Oshequi nashinoncaaca, te capichaji. Nojivetaca ari noncamaque. ⁹Queario, niotaque tecatsi noncantea noavisacotacea narosati, irootaque naventantacariri Tasorentsi. Apaniro irinti imataquero yoavisacotaquena: tempa aisati imatiro yoitinairi camaintsiri. ¹⁰Ari yoavisacotaquena, caari nocamanta; aitaque iroavisacotajena aisati, niotaque incanteani iroavisacotapinitena. ¹¹Pamitacojeitena, pincanteri Tasorentsi iramatacotena. Impoiji, ariorica iriojeite itsipapee iquemisantaquempi Tasorentsi, yoavisacotaquena, oshequi iriveshireimentajeitacari Tasorentsi iriori.

Yora Pavoro icantiri corintosati: “Tsame aveshireimentavacaajaeitea”.

¹²Ari yamitacotaquena Tasorentsi, ineshinoncataquena, irootaque noquearioventantanariri nantaveetiniri. Te niotashiteaji pitarica nantiniriri, iro cantaincha yoametaquena iriori ocameetsatantari nomayetaqueneri. Niotaque pineacameetsataquero nantayetaqueri, aisati iquempetaca itsipapee atiri,

irootaque noquimoshiretantacari.¹³ Te ompomerentsiteaji pineanatero oca nosanquenatimpiri, aisati te ompomerentsiteaji piojeitavaquero. Nocoaque piotasanojeitavaquero.¹⁴ Capichaji piquemavetacaro nocamantauquempi peerani, aisati capichaji piquemisantavetaquena. Ariorica impiapaaaje Avincatsarite Jesoshi, noveshireimentajeitempi, iro cantaincha nocoaque pinquemasanotero nocamantauquempi piveshireimentajeitantenari meeca.

Irijateme Pavoro irineerime corintosati.

^{15,16} Ari niotaque piveshireimentavetaquena, pineacameetsavetaquena, irootaque noquenqueshireantavetacari noneajantempime. Nojivajeitempime noneajeitanajempime, impoiji novaanaqueame anta Maseroniaqui. Impoiji noneapajempime aisati, impoijiquea novaanajeame Joreaqui. Apite aveshireimentavacaajeiteame.¹⁷ ¿Ariompa nocoaque namatavitempi? ¿Noquempeta-carimpa amatavitantsiri cantashita-chari: “Ari”, aisati: “Eiro”? Te nonquempeteariji. Te noncoyeji nainti namatavitempi.¹⁸ Tempa queariotaque icantiri Tasorentsi, te iramatavitanteji. Aisati narori, te noncantapinitempi: “Ari nomataquero”, impoiji: “Eiro nomatirotsi”.¹⁹ Ari nocarataqueri Shirivano, jeri Timoteo nocamantajeitaquempi jaoca icantari Jesoquirishito, yora Itomi Tasorentsi. Te incanteji iriori: “Ari nomataquero”, impoiji: “Eiro nomatirotsi”. Apatiro icantapiniti: “Ari nomatasanotero”, impoiji imataquero.²⁰ Queario imajeitaqueenero maaroni icantaqueeri Tasorentsi. Irootaque nocantajeitantaririar maaroni atiri icameetsataque, impinca-tsajeitanteiariri iriori.²¹ Aquemisantajeitaqueri Quirishito, irootaque itasoncaventantaqueeri Tasorentsi ashanincatavacaajeitancacari. Aisati timatsi icoacaajeita-

queeri antajeiteri, maaroni.²² Itasoncaventajeitaquee maaroni, aisati itiancaqueero Ishire quiso oajeitanta-queeri. Meeca ayojeitaque eiro yojocajeiteetsi.

Icamantajiri paita caari ijtanta irineajeri.

²³ Iro caari nojatanta noneajempi peerani, te noncoyeji nonquenquejaimentipro pantajeitvetacari, te noncoyeji noashiretacaaajeitempi. Ioti Tasorentsi te nontseeyaji. ²⁴ Te noncoyeji noncantapini-jeitempi pinquemisantajeitena, tempa piquemisantasanojeitaqueri Tasorentsi. Irointi nocoaque noveshireacaajeitempi, maaroni.

2 ¹Noquenqueshiretaque: “Eiro meeca nojatitsi noneeri yora corintosati. Napiitacajircari noashiretacaajejeari, aisati noashiretacotaricari narori”.² Ariorica noashiretacayempi, tempa aisati narori noashiretacojeitempi. Impoiji, ¿janica veshireacaajeitenaneri? Ariorica noneajeitajempi piveshireajeitanajea, ari noveshireanajea narori. Irompa eivorica piveshireajatsi, eiro noveshireajatsi narori. ³Peerani nosanquenatantimpiori noshintsitsajeitaquempi pojocajeitanteorori caari cameetsatatsi pantajeitaqueri. Te noncoyeji noashiretacojeitempi, irointi ocameetsati noveshireacojeitempi. Niotaque ariorica pineajeitavaquena nonquimoshiretapaaque, ari piveshireimentajeitavaquena avirori. ⁴Peerani nosanquenajeitantaquempi ronirori, oshequi noashiretacojeitaquempi catsini, oshequi niracojeitaquempi. Iro cantaincha te noninteji noashiretacaaajeitempi, irointi nocoaqueeni piojeite oshequi nocavintsaajeitaquempi catsini.

Icantiri Pavoro: “Pincavintsaajeri yora antaveitaroniri caari cameetsatatsi”.

⁵Queario noashiretacovetacari yora aavetarori iashiane, iro cantaincha tempa

avirojeitaque oashiretasanotainchari. ⁶Ari poasanquetaajeitaqueri yora aavetarori iashiane, irootaque yojocantajjarori yantaveitaniri, meeca moncarataca. ⁷Meeca eiro piquisajiritsi aisati, irootinti pincavintsaajeiteri. Piveshireacaajeiteari, te aninteji aiquero irijatatiyi eiroashiretasanotanaquea catsini. ⁸Nocoaque meeca piotacayeri queario picavintsaasanojeitaqueri. ⁹Irootaque nosanquenatantimpiori peerani: nocoqueni noneantajeitaquempi. Nocoqueni niote queariorica piquemisantsanotaquena. ¹⁰Janicarica picavintsaajeitiri, aisati narori noncavintssayeri. Ariorica irantimojeitaquee ashaninca caari cameetsatsatsi, icoaque Quirishito eiro aquishimentiritsi, aisati icoaque ancavintsaajeiteri. Irootaque nocavintsaancariri. Aisati avirori, nocoaque paacameetsatavacaajeitea. ¹¹Aisati te noncoyeji irantacaajeiteero Satanashi caari cameetsatsatsi. Niotaque oshequi icoaveta iramatavijeiteeme.

**Icamantaquee Pavoro paita
ipasonquitantariri Tasorentsi.**

¹²Ari chapinqui nareetaca Toroashiqui, nocamantajeitaqueri savicayetatsiri jaoca icanta Quirishito yoavisacotanti. Oshequi yamitacotaquena Avincatsarite, oshequi yaacameetsajeitaquena savicajeitatsiri, oshequi iquemisantajeiti. ¹³Nocoavetapaacari Tito, iro cantaincha te noneeriji. Oshequi noquenqueshiretaqueri, irootaque novaantanajari Maseroniaqui. ¹⁴Ari nocantani narori nopasonquitapinitiri Tasorentsi. Aquemisantaqueri Quirishito, irootaque itasoncacoventajetantaqueeri, imatacaaajeitantaqueerori maaroni icoacaajeitaqueeri. Meeca iotacojeitaqueri maaroni savicajeitatsiri. ¹⁵Ari aquemisantajeitaqueri Quirishito, aisati ashinancajeitacari, irootaque ineacameetsajeitantaqueeri Tasorentsi. Acarajeitaqueri savicatsineri inquitequi,

aisati jatatsineri Sharincaveniqui.

¹⁶Avamejeivetari aparopee, iro cantaincha itseenajeitaquee, irootaque irijatanteari iriori Sharincaveniqui. Yora itsipapee avamejeitaqueri, ari iquemisantajeitaquee irinti, irootaque irijajeitanteari inquitequi. Incantaitatiyempani irisavicajeite cameetsa. Oshequi noquenqueshiretasanotaquerove: ashinetiricari irijajeite Sharincaveniqui. Eirome yamitacotaname Tasorentsi, eiro nomatirome nonquemisantacaajeiteri itsipapee. ¹⁷Ainiro oshequi oametantashijeivetarori irineane Tasorentsi iraanteariri quirequi. Te nonquempeteariji nainti. Itiancaquena Tasorentsi noametantero irineane, iotaque nocoasanotaque noametantero. Aisati yamitacotaquena Quirishito.

**Iquenquetsacotiri iotacairiri atiri
cameetsa yoametanti.**

3 ¹Ari pineanatavaquero nojivataquempi nosanquenataquempi. ¿Pijitaquempa meeca oshequi noshemeti narori? ¿Picoaqueempa intime pashini sanquenatacotonaneri camantempineri nocameetsatirica? Aisati narori, te noncoacyempiji pisanquenatacotena, pincamanteri pashini ashaninca nocameetsataque. ²¿Paita noncoantearori? Ijojeitaque atiri oshequi noquenqueshirejeitaquempi, oshequi nocavintsaajeitaquempi. Ijojeitaque iriori te namatavjetempiji. ³Te pisanquenatacotenajipaperiqui, iro cantaincha noquemisantacaajeitaquempi, aisati oameetsataquempi Ishire Tasorentsi, yora aneasanotatsiri. Meeca ioshirejeitaquena atiripee queario itiancaquena Quirishito, te namatavitan-teji.

**Yamitacotaqueri Tasorentsi Pavoro
imayetaquero icantaqueriri.**

⁴Niotaque queario oca nocamantajeitaquempi. Noquemisantaqueri Quirishito,

irootaque yamitacotantanari Tasorentsi nomayetaquero nocantaquempi. ⁵Te nomatashitearoji apaniro, irinti Tasorentsi matacaquenarori. ⁶Irootaque iotacanari jaoca icanta meeca yoavisacotanti. Peerani otimini isanquenare Moishishi camantajeiteeri paita icoacaqueeri. Iro cantaincha eirorica amoncarajeitirotsi, ajate Sharincaveniqui. Iro cantaincha iroquaera meeca itianajeiteero Tasorentsi Ishire, aajeitanajeeneri asavicantajeari anta inquitequi. ⁷Peerani intacaro Tasorentsi, isanquenataquero mapi. Ineantacariri Moishishi, oshipaquireanaque ivoro, shipaquirerere; impoiji yoirincapaaja. Ari ineantajeitavajariri ishaninca opeavetanaja ishipaquirei, iro cantaincha te irimajeiteroji iramenavorojeitajeri: irosati icanta yatsioquintaqueri. Ari maaroni caari moncaratiro ocantiri isanquenare ijajeitaque Sharincaveniqui. ⁸Ari isanquenatantarori Tasorentsi mapi, oshipaquireanaque ivoro Moishishini, yoanaque cavaco, aisati yoajetanaque cavaco maaroni ishaninca. Meeca ainiro Ishire Tasorentsi, quiso oajeitaquee, aisati coajica osavicacaajeitajeri anta inquitequi. Tempa aitaque avasanojeitapaaque cavaco, sorerer. ⁹Yora caari moncaratiro ora sanquenarentsi yamaqueri Moishishi irijajeite irinti Sharincaveniqui, iro cantaincha ishipaquireacaquero Tasorentsi ivoro Moishishi. Iro cantaincha ayojeitaque meeca yoameetsajeitaqueri Tasorentsi maaroni quemisantajeitiriri, ayojeitaque corajica aneajeitajeri anta inquitequi irishipaquireacotasanojetajee. ¹⁰Peerani aneacameetsajeivetaro isanquenare Moishishi, iro cantaincha meeca te aneacameetsatasanotajearo. Timatsi meeca cameetsatasanotatsiri catsini: yoameetsajeitaquee Tasorentsi, asaviquimojeitapaajeri anta ocameetsaite-tinta catsini. ¹¹Ocameetsavetaca isanquenatiniri Moishishi, iro cantaincha eiro

ocantaitatiani ontive. Irisavicacaasano-jeitajee Tasorentsi inquitequi, ancantaita-tyempani: tempa ocameetsatasanotaque irointi, catsini.

Iotacaaajeitaquee Avincatsarite, te incoyeji intime amatavijeiteeneri.

¹²Ari ayojeitaque queario asaviquimo-jeiteri Tasorentsi, irootaque caari apashiventanta aquenquetsatacaajeita-queri atiri. ¹³Te anquempejeiteariji Moishishini, ipashicavortaca irinti: te incoyeji irineajeiteri ishaninca ompeana-jea ishipaquireavorovetaca. ¹⁴Iro cantain-cha te inquenqueshireajeiteaji joriopee. Icantani ineanatapinivetaro isanquenare Moishishi, iro cantaincha te iriotacoterji. Apatiro Quirishito matirori iriotacaej-teri. ¹⁵Queario, irosati icantajeita meeca. Ariorica irineanatero isanquenare, te iriotacoterji: tecatsi incantea inquemero. ¹⁶Iro cantaincha ariorica iraventeari Avincatsarite, iriotacayeri eiro yamatavi-tantajatsi irisati; irointi irotasanotana-que. ¹⁷Ainiro Avincatsarite Ishire, oamejeitaquee eiro apomerentsiventiro isanquenare Moishishi. ¹⁸Meeca tecatsi amatavijeiteeneri, irointi timatsi ayojeitiri. Ayojeitaque icameetsatasanota-que Avincatsarite. Otasoncaventajeita-quee Ishire anquempejeitanteeariri. Meeca aquempejeivetacari capichaji. Acantani apashinitapinitanaque. Coajica anquem-petasanojeitapaajeri, ancameetsatasano-jeitapaaje.

Cameetsa iquenquetsatacotiyo Pavoro irineane Tasorentsi.

4 ¹Tempa icavintsaajeitaquee Tasoren-
tsi, irootaque itiancantanari nonquenquetsatacayeri atiripee. Meeca eiro nojocajirotsi. ²Te noninteji namata-viteri ashanincapée: te incameetsateji yora pashini amatavijeitiriri. Te nompashiniteroji irineane Tasorentsi,

aisati te noncamantashiteariji atiri
ocameetsayetaque icoayetiri riori:
namatavitiricari. Irointi queario
noamejeitaqueri atiri. Piojeitaque, aisati
iotaque Tasorentsi queario oca nocanta-
quempi. ³Intimerica caari iotatsi jaoca
incanteari iravisacotantajeari, iriojeitaque
jatatsineri anta Sharincaveniqui.

⁴Yamatavitaqueri Satanashi caari
imatantaro iringote. Tempa iringotaque
ivincatsarite maaroni tseencantsir. Te
incoacayeriji iringote jaoca incanteari
iravisacotaje; te irinintacayeriji iriojeite
oshequi ipincatsariti Quirishito, Tasorentsi
ini. ⁵Te naro quenquetsatacachane,
irinti Avincatsarite Jeso quirishito
noquenquetsatacotiri. Noquemisantaqueri
irinti, iringotaque noocoantacari nintacojei-
tempi. ⁶Peerani, yovetsicantarori
Tasorentsi quipatsi, otsiteniveitani, iro
cantaincha icanti: “Onquitaitetanaque”.
Ari oquitaitetanaque, iringotaque meeca
amenajeitancari paitapeerica. Aisati
meeca iotacaajeitaquee jaoca icantari
Quirishito, ayotantacari oshequi
ipincatsaritaque Tasorentsi.

Irio Tasorentsi matacaaqueeri aquenquetsati.

⁷Te noshintsivatsateji narori, aisati
nojouquitapinitaca piojeitancari tecatsi
catsini nomate apaniro, irinti Tasorentsi
matacaaquenarori noquenquetsatacotiri.
Irootaque ocameetsatantari pimpincatsa-
jeiteri, eiroquea pipincatsatashitanatsi
narori. ⁸Oshequi yoashinonqueitaquena,
iro cantaincha te irojocacayeetenaroji
noquenquetsati; oshequi noquenqueshire-
taque, iro cantaincha te noashireteaji.
⁹Oshequi iquisheetaquena, iro cantaincha
te iroquenaji Tasorentsi; ipasanatapini-
yeetaquena, iro cantaincha te iroyenaji.
¹⁰Oquempetaca peerani itimi oshequi
coapinivetainchari iroyerime Jesoshi,
aisati itimi oshequi coapinivetachari

iroyenename narori. Apaniro Jesoshi
yoavisacotapinitaquena, iojeitancari
atiri aneanaji ini. ¹¹Queario, ari orica
anquemisanteri Jesoshi, aitaque incanta-
jeiteari, incoajeite iroajeitee. Coajica, ari
ancamajeitaque, iro cantaincha maaroni
neajeitaqueri meeca iojeiti aneasanotaji
ini Jesoshi. ¹²Noquenquetsati, iringotaque
icoanteetacari iroyena; iro cantaincha
piquemisantajetaque, iringotaque pintima-
jeitancari anta inquitequi, pincantaitati-
yempani.

¹³Tempa isanquenatini peerani yora
ayemisantairinteni: “Noquemisantaque,
iringotaque noquenquetsatacantariri
nosharinca irineane Tasorentsi”. Aisati
noquempejeitacari narori: noquemisanta-
que, iringotaque noquenquetsatacantajeta-
quempi. ¹⁴Ayojeitaque ainiro yora
oitinaajiriri Avincatsarite Jesoshi. Coajica
irointinaasanojeitajee arori, antsipajei-
teari Jesoshi. Impoiji quiso avajeitanajeri
riori. ¹⁵Oshequi noquematsicatimentajei-
taquempi, ineshinoncajeitajimpipi
Tasorentsi: aisati irineshinoncajeiteri
itsipapee atiri. Impoiji pimpasonquijeiteri
maaroni, pincantajeite: “Tempa
icameetsati Tasorentsi”. ¹⁶Meecari,
meeca, oshequi amaojeitaque, coajica
anteashipajeitanaque, ancamajeitanaque;
iro cantaincha eiro aquenqueshireajeitiro-
tsi. Tempa icantani Tasorentsi iveshirea-
cajeitaquee maaroni quitaiteiqui.

¹⁷Meeca capichaji yoashinoncajeitaquee
tseencantsir, iro cantaincha te antsipe-
tashiteaji ashinoncaaca. Capichaji
anequiero meeca, iro cantaincha ioti
Tasorentsi, impojijquea cameetsa
irisavacacaajeitajee anta inampiqui.
Ancantaitatiyempani asavique cameetsa,
eiro oquempetajtsi aca. ¹⁸Eiro
aquinqueshiretasanojeitirotsi pomerentsi-
yetachari aisati timayetatsir aca quipatsi-
qui. Coajica tempa ompeajeitanajea
maaroni aneajeitaqueri aca. Irointi

anquenqueshiretasanotero caari
aneapiniti meeca: ora timajeitatsiri
inquitequi. Eiro opeajatsi irointi.

**Iquenquetsatacotiro
aquimoshirejeitantzari.**

5 ¹Ayojeitaque ariorica ancamajeite aca,
antimajeite inquitequi. Ontime avatsa
cameetsari irovetsicajeeneri Tasorentsi, te
irio atiri vetsicajeerone. Ancantaitatiyem-
pani asavique anta. ²Aca quipatsiqui
oshequi meeca ashinoncaapinijeitaca aisati
oshequi aquenqueshirejeitaque; oshequi
acoajeitaque ontine avatsa iroquerarri anta
inquitequi. ³Eiro apatiro ontine ashire,
irointi ontine aisati avatsa. ⁴Meeca oshequi
aquinqueshirejeitaque: te ancoajeiveteaji
ajocajero oca avatsa, iro cantaincha
acoasanotaque avatsa iroqueratajantsineri.
Acoaque ampashinitanaje ontimanteari
avatsa caari tsoncanetajanchane. ⁵Iriotaque
Tasorentsi tasoncaventajeitajeeneri ontiman-
teari pashini avatsa iroqueratajantsineri.
Quiso oajeitaquee Ishire ayojeitantzari
queario intasoncaventaquee, ⁶irootaque
aquimoshirejeitantzari. Ayojeitaque
atimajeiti aca quipatsiqui, tequeratsita
antsipatasanoteari Avincatsarite. ⁷Tequera
aneajeitero inampi, iro cantaincha
aquemisantaque, ayojeitantzari anejero
coajica. ⁸Aveshireimentajeivetari Avincatsa-
rite aca quipatsiqui, iro cantaincha
acoasanoveta antsipatasanoteari anta
jenoqui, anampitasanotearo. ⁹Ainirotatsi-
quera asaviqui aca, acoasanotaque
iriveshireimentajeitee. Aisati, ajaterica anta
ancoaque iriveshireimentajeitee. ¹⁰Coajica
incantacoventajeitee Quirishito. Ariorica
meeca antayetero cameetsatatsiri,
incavintsaajeitee; ariorica antayetero meeca
caari cameetsatatsi, iroasanquetaajeitee.

Iquenquetsatacota irisati Pavoro.

¹¹Oshequi apincatsajeitaqueri Avinca-
tsarite, irootaque aquemisantacaantajei-

tacariri atiri. Ioti Tasorentsi nopincatsata-
sanotaqueri, nocoaque piojeitero aisati
avirori. ¹²Te noncoyeji noneatsatajea
narosati, iro cantaincha te aisati
noncoyeji pimpashiventacotena. Yora
cantimataquenari, oshequi ishemetaque
irinti, ishemetimentayetaquero yantaye-
tiri, iro cantaincha te incameetsashireteji.
Icantimataquena iriori, iro cantaincha
nocoaque pimpiaateari. ¹³Icanti: “Te
iriotacoteji Pavoro”, iro cantaincha
apatiro nantiniri Tasorentsi icoacaaque-
nari. Otimi niotantari nintacotantaquem-
piri. ^{14,15}Oshequi inintaquena Quirishito,
icavintsaasanotaquena. Niotaque
icamimentajeitaquee maaroni: meeca
oquempevetaca acamajeitaque maaroni,
eiro amatapinitantajarotsi aisati caari
cameetsatatsi. Aisati icoacaaquee eiro
antanontajatsi arosati, irointi anteneri
iriori icoacaaqueeri: tempa icamimenta-
jeitaquee arori, itinaanaja aisati.

¹⁶Peerani nojivetacari Quirishito atiri
ini, te niovetearini Tasorentsi ini. Iro
cantaincha meeca niotasanoquera,
niotaque jaoca icanta. Aisati yora
ayemisantaririnte, eiro atseenquiritsi:
tempa ineacameetsajeitaqueri Tasorentsi.
¹⁷Ariorica iquemisantaqueri ashaninca
Quirishito, ari inashitacaacari iriori; eiro
yantapinitirotsi yantaveitaniri, irointi
impashinitanaje. ¹⁸Iriotaque intacarori
Tasorentsi. Itiancaqueri Quirishito
icamimentajeitaquee, yoameetsajeita-
quee, yaacameetsatantaqueeri iriori.
Meeca icoaque ancamanteri itsipapee
atiri inquemisante, iraacameetsatanteariri
iriori. ¹⁹Pinequiero, itiancaqueri
Quirishito iroameetsajeitee arori,
irineacameetsajeitantzari. Eiro
iquenqueshiretajirotsi aisati caari
cameetsatatsi antajeivetaniri. Meeca
itiancajeitaquee arori ancamantajeiteri
itsipapee icoaque Tasorentsi iraacamee-
tsajeiteri, maaroni. ²⁰Queario,

itiancaquena Quirishito: novaajimpido irineane Tasorentsi. Aisati iriori Quirishito icoacaaquempi pinquemisanteri iraacameetsatantempiri Tasorentsi.
²¹Tecatsi irante Quirishito caari cameetsatatsi, iro cantaincha itiancaqueri iriri icamimentajeitaquee. Oquempetimovetacari yantaquero iriori caari cameetsatatsi. Irootaque meeca yoameetsatantajeitajeeri Tasorentsi.

Jaoca icantapinita Pavoro.

6 ¹Meeca nantiniri Tasorentsi icoacaaquenari, irootaque nocantantimpiri: icavintsaasanojeitaquempi. Eiro meeca pitseenquiritsi. ²Jero oca ocantiri irineane: “Picantaquena, aisati noquemisantaquempi; moncarataca pavisacotanta jari, irootaque nintacotantaquempi”. Meeca aisati narori noncamantempi: moncarataca meeca pinquemisante, pavisacotantajeari. ³Tecatsi nante, tecatsi pinquisantenari; cameetsa noamejeitaquempi piojeitancacari pavisacojeitaje. ⁴Nocantani nantaveetiniri Tasorentsi, noquearioventaquero, piojeitancacari queario nopincatsatasanotaqueri. Nocantani nantaveetiniri, iro cantaincha oshequi noquematsicatimentacari, nashinoncaapinitaca, maaroni. ⁵Ipasantaquena soraro, yoimunqueapinitaquena. Iquisapinijeitaquena atiripee. Oshequi opomerentsitimatiquena noquenquetsatacacjeitiri atiripee. Nosaquitapiniti tsiteniriqui. Noquemapinitaquero notasheni. ⁶Iro cantaincha cameetsa nosaviqui, niotasanoquero irineane Tasorentsi, oshequi namavetaquero iquisaquena caari quemisantatsi, piojeitancacari queario nantaveetiniri Tasorentsi. Amitacotapinitaquena Ishire Tasorentsi, nocavintsantapiniti, ⁷queario oni oca noametantapinitiri, te nontseyaji. Itasoncacoventapinitaquena Tasorentsi, yojocacoventaquena, aisati

imatacaquena noquemisantacaqueri itsipapee atiri icameetsatantajari. ⁸Ainiro pincatsataquenari aisati shirontimenta quenari. Ainiro neacameetsataquenari aisati cantimataquenari. Ainiro quemisantaquenari aisati tseencaquenari. ⁹Te iriojeitenají atiripee, iro cantaincha iotaquena Tasorentsi. Isareajeivetaquena atiri iroyename, iro cantaincha aneatsina noni. Oshequi noneacatsiyetacaro, iro cantaincha iquempoyeaquena Tasorentsi. ¹⁰Noashiretacojeitacari ashanicapee, iro cantaincha noveshireimentacari Tasorentsi. Nashinoncaavetaca narori, iro cantaincha noamejeitaqueri ashanicapee cameetsa yoveshireimentantajariri Tasorentsi. Tecatsi nashitaarantea, iro cantaincha ipaquena Tasorentsi maaroni coiteimotaquenari.

Oshequi icavintsaajeitaqueri Pavoro yora corintosati.

¹¹Noyemisantaririnte, nocamantasanojeitaquempi maaroni noquenqueshiretaqueri, tecatsi nomanapitsatempi. Oshequi nonintajeitaquempi. ¹²Te nompashiventají narori noquenquetsatacaimpi, iro cantaincha naamaaca ainiro pipashiventajeita avinti. ¹³Ari noquempetacaantajeitaquempi notomipee, nishintopee: oshequi nocavintsaajeitaquempi. Aisati nocoaque pincavintsaajeitena narori.

Icantiri Pavoro: “Te pinquempetasanoteariji tseencantatsiri”.

¹⁴Eiro quiso poiritsi yora caari quemisantatsi. Pamene, ariorica acameetsataque, ¿aquempetacarimpa caari cameetsatatsi? ¿Ashanicajeitacarimpa? Oquempetaca quitateri aisati tsiteniri: te omoncaratavacyeaji, onashita. ¹⁵¿Ishanicatacarimpa Quirishito yora Satanashi? Ariorica aquemisantaque, ¿aquempetacarimpa tseencantatsiri?
¹⁶¿Omoncaratavacaacampa ivanco

Tasorentsi aisati ovanco isheroncayetiri atiri? Pamene, quiso yoajeitaquee Tasorentsi, yora aneasanotatsiri, tempa peerani isanquenayeetironi irineane iriori: "Quiso noajeitaqueri maaroni quemisantanari, eiro nojocajeitiritsi. Nontasoncaventajeiteri, aisati impincatsajeiteina. ¹⁷Pinijantareajeri tseencantatsiri, eiro quiso poajeitiritsi, eiro pantayetirotsi caari cameetsatatsi. Impoiji naacameetsatasanojeitempi maaroni, ¹⁸nontomintajetajempi, nishintojeitajempi, pincantajeitena: 'Apa'. Irootaque icantaqueriniri Avincatsarite, yora Tasorentsisanori".

7 ¹Ari, nonintane, ayojeitaquero oca icantaqueeri Tasorentsi. Eiro meeca antayetirotsi caari cameetsatatsi, aisati eiro aquenqueshiretirotsi. Tsame cameetsa ampincatsatasanojeiteri Tasorentsi, anquearioventajeiteneri icoacayeeeri.

Yora Pavoro iveshireimentajeitacari corintosati.

²Nocoaque paacameetsajeitena.

Piojeitaque te noashinoncaajeitempiji, te nantacaajeitempiroji caari cameetsatatsi, te namatavijeitempiji. ³Te noncantempiji ainiro pantane, teve. Tempa nocamantaquempi oshequi nocavintsaajeitaquempi, oshequi nonintajeitaquempi. Nocantani noquenqueshirejeitaquempi aca quipatsiqui. Aisati ariorica noncamaque, noncanteani nonquenqueshirejeitapajempi anta inquitequi. ⁴Te nonquenqueshireacotempiji, niotaque piquemisantaquena, irootaque noveshireimentantaquempi, noquimoshireventantaquempi. Oshequi yoashinonqueetaquena, iro cantaincha noveshireimentasanojeitaquempi.

Ineacameetsajeitaqueri Pavoro corintosati.

⁵Peerani, nareetantacari Maseroniaqui, te nomateroji nomaopearee: yoashinoncaapiniyeetaquena. Aisati oshequi

notsaroashiretanaque. ⁶Iro cantaincha tempa iveshireacaapinijeitaquee Tasorentsi. Itiancaquenari yora Tito, irootaque noquimoshiretantacari. ⁷Ari noveshireimentacari Tito iriori, itsipataquena. Aisati icamantapaaquena paacameetsajeitavaqueri chapinqui, aisati iveshireimentaqueimp. Icamantaquena picoiteajeitaquena, aisati piquenqueshiretanaca: eiro papiitajirotsi oca pantaveitaniri peerani. Aisati icamantaquena pinintajeitaquena. Noquemantavacariri icantapaaquena, oshequi noquimoshiretanaque. ^{8,9}Nosanquenatantaquempiroji peerani, noquenqueshiretaaajeitaquempi. Poashirejeivatanaca, iro cantaincha impoiji pojocquero pantaveitaniri, paventajeitari Tasorentsi. Te nantsipetearoji nosanquenajeitaquempiro, te noashinoncaajeitempiji. Peerani aquenqueshirejeitanaca, iro cantaincha meeca aquimoshirejeitaque. ¹⁰Icoaque Tasorentsi avashirentanaquea ajocantearori caari cameetsatatsi antajeitaqueri, ampashinitantajeari. Impoiji ancanteri iroavisacojeitee. Ariorica amatero oca icoacaqueeri, anquimoshirejeitanaque. Yoashirejeivetaca aisati iriori tseencantatsiri, iro cantaincha te iraventajeiteariji irinti Tasorentsi, irootaque ijatantacari Sharincaveniqui. ¹¹Poashirejeivetacani, iro cantaincha meeca piquearioventaquero piquemisantaquempi. Picoajeitaque cameetsa pisavicajeitanaque. Oshequi piquenqueshirejeitaca, aisati pitsaroajeitaque, irootaque picoantacari namitacojeitempi. Piquemisantasanojeitaquena, aisati pojocacaquaqueri yoranqui yantaniroveitaniri. Pitsoteaquero maaroni nocantajeitaquempi, meeca cameetsa pisavicajeiti. ¹²Nosanquenatantaquempiroji nocoacaquaquempi pamitacoteri yoranqui antacotiriri iriri, aisati yora iriri, pamitacoteri. Iro cantaincha nocoacaasanotaquempi piojeitaque

pinintasanojeitaquena. Tempa irootaque icoacaquempi aisati Tasorentsi.

¹³Ari meeca noveshireimentajeitaquempi, aisati noveshireimentavajari Tito. Oshequi iquimoshiretapaaque, icamantapajana: "Cameetsa isavicacaa-jeitavaquena". ¹⁴Chapinqui, tequerats-tani irijatashitempi, nocamantavaqueri: "Icameetsajeitaque corintosati, cameetsa iraacameetsatavaquempi". Ari yareetan-taquempi iotaque queario nocantaque-riri, te nontseeyaji. Aisati oquempetaca, te namatavijeitempiji avirojei. ¹⁵Oshequi inintajeitaquempi: iotaque piquemisanta-jeitavaqueri aisati pipincatsajeitavaqueri. ¹⁶Aisati narori, noveshireimentajeitaquempi: niotaque pantapinitaquero icoacaquempi Tasorentsi.

Oshequi icavintsanti yora maseroniasati.

8 ¹Meeca, noyemisantaririnte, ineshinoncajeitaqueri Tasorentsi maaroni yora ayemisantaririnte anta Maseronia-qui. ²Oshequi yoashinoncaajeivetahari ishanincabee, iro cantaincha oshequi iveshireimentajeitacari Tasorentsi. Aisati te irashitaarantasanoveteoji, iro cantain-chia oshequi yapatojeitiniri quemisanta-tsiri quirequi, ipiriri. Ijeitaque yashinon-caajeitaca ayemisantaririnte anta Jerosarequi. ³Te capichaji imperi, oshequi ipaqueri. Te iriojeiteji intsaneem-pari iirequite. Tecatsi canterine: "Pincavintsayeri piyemisantaririnte". Irisati iotashitacha icavintsairi. ⁴Icantasa-notaquina: "Nocoaque namitacojeiteri noyemisantaririnte". ⁵Ari niovetaca imperi quirequi, iro cantaincha imapoca-quena icantajeitaquena: "Nanteneri Tasorentsi paitarica icoacaanari, aisati nantempiro paitarica pincantaquenari. Pincamantena paitarica icoacaquenari Tasorentsi". ⁶Ari chapinqui intanacaro Tito icantaquempi: "Pampatoteneri

jerosaresati piirequite". Ari cameetsa papatojeitaqueneri. Meeca nontiancajempiri aisati incantajempi pampatotasano-jeiteneri aisati piirequite, pincavintsaasa-nojeiteri piyemisantaririnte.

Icantiri Pavoro corintosati: "Pintacoteari ashinoncaincari anta Jerosarequi".

⁷Oshequi panaacojeitaqueri pashinipee piyemisantaririnte: panaacotaqueri piquemisantsanojeiti, piquenquetsatsasa-nojeiti, piotasanojeiti, piquearioventasta-notiniri Avincatsarite icoacaimpiri, aisati pinintasanojeitaquena. Meeca nocoaque panaacojeiteri pineshinoncatasanojeiteri ashinoncaincari. ⁸Te noncoyeji nompera-natempi pimpajeiteri ashinoncaincari, iro cantaincha ariorica pampasanoteri, piotacaajeiteri itsipapee queario pininta-sanojeitaqueri piyemisantaririnte.

⁹Tempa aisati oshequi ineshinoncajeita-quee Avincatsarite Jesoquirishito. Oshequi yashitaarantaca anta inquitequi, aisati oshequi catsini ipincatsaritini, iro cantaincha ipocantacari aca quipatsiqui, yojocanaquero maaroni cameetsayeta-tsiri. Yashinoncaavetapaaca: tecatsi timotajerine, itseencajeitaqueri ishaninca, maaroni. Yashinoncaimenta-quee arori, oncateata cameetsa irisavica-jaajeitajee anta inquitequi. ¹⁰Nocoaque pintacotasanoteari yora ashinoncajeita-chari anta Jerosarequi: tempa avirojeita-que intasanotacarori peerani. ¹¹Picoajeitaque pintacoteari: meeca, intimerica piirequite pintacotanteariri, jentsite, pampatoteri pimpacantanteariri.

¹²Ocameetsati picoaque pincavintsayeri. Ari itimirica piirequite, tempa ari pimataquero avinti pimperi. Iro cantain-chia terica intimeji piirequite, eiro nocantashitimpitsi pimperi. ¹³Te nonintejji ompomerentsitimojeittempi, aisati eiro opomerentsitimojeitritsi itsipapee. ¹⁴Timatsi pashitaarantajeitaca,

meeca pincavintsayeri yora ashinoncaincari. Coajica ariorica irashitaarantaquea iriori, aisati ariorica pashinoncaajeitaquea avirori, impoijiquea impiatempa incavintsaajeitelpi avirori. ¹⁵Tempa ocantini Sanquenarentsi: “Yora piotasa-novetacarori mana, te ontimimotajeriji aisati timaarantajantsine. Irintiquea yora aatsiri capichaji, te irashinoncayeaji irinti. Aitaque, imoncaratavacaajeitaca maaroni”.

Intianqueri Tito irineajeri aisati corintosati.

¹⁶Ari iquempetaquena Tito, oshequi inintajeitaquempi, irootaque nopasonquintacariri Tasorentsi. ¹⁷Nocantaqueri: “Pijatashitajeri aisati corintosati, pineeri”. Iro cantaincha te apaniro narori noncoacayeri, irisati coashitacha irineajempi aisati. ¹⁸Nontianquempi itsipa ayemisantariinte intspatanaqueari. Oshequi iquenquetsatapinitiro irineane Tasorentsi, irootaque iojeitancariri maaroni quemisantatsiri. Aisati avirori, piquemacojeitaqueri. ¹⁹Aisati intiancajeitaqueri ayemisantariinte intspatanaquena narori anta Jerosarequi, iramitacotena naanajeneri ashinoncaincari quirequi. Oshequi icavintsaajeitaqueri ayemisantariinte, irootaque incantanteari jerosaresati: “Icameetsataque Tasorentsi”. Aisati irojeitanaque oshequi acavintsaajeitaqueri. ²⁰Ari icarataque oshequi quirequi pintianqueneriri, oshequi picavintsaajeitaqueri. Irootaque nocantacari intime tsipatenaneri naanajeneri. Icantetanacari: “Picoshitaqueri”. ²¹Te apaniro noncoaque irineacameetsatena Tasorentsi, aisati nocoaque irineacameetsajeitena ashanincapee. ²²Aisati pineavajeri pashini ayemisantariinte nontianqueri. Niotaqueri, iquearioventaquero iquemisantaque. Nocamantaqueri oshequi piquemisantajeitaque aisati oshequi

picavintsaajeitaque, irootaque icoasanotantacari irijate irineempi. ²³Yora Tito, quiso yoapinitaquena, yamitacotapinitaquena nintacojeitaquempi. Aisati yora intspajiteeari irineempi, irojeitaque itiancaneppee ayemisantaririnte aca. Cameetsa inajeiti, quemisantasanotiriri Quirishito. ²⁴Ari oshequi nocantapinijeitaqueri quemisan-tatsiri aca: “Icameetsajeitaque corintosati”. Ariorica pineavaqueri yoca, paacameetsatasanotavaqueri irojeitan-teari queario oca nocantaqueri.

Icamantaqueri paita icoacantariri irineshiloncajeiteri jerosaresati.

9 ^{1,2}Jero oca nocantaquempi: “Pintacoteari piyemisantaririnte”. Iro cantaincha tempa piotasanotaque picavintsaajeitaqueri. Niotaque te pintsaneempariji piirequite, irootaque nocamantanariri maseroniasati: “Ocarataque meeca aparoni osarintsi icoantacari corintosati intianqueneri jerosaresati quirequi”. Iotacojeitaquempi, irootaque icoasanojeitancariri inquempejitempi, irintacojeitantea iriori. ^{3,4}Ari nocantajeitaqueri: “Icoaque corintosati intianqueneri jerosaresati iirequite”. Meeca nontianqueri yoca irijivatanaquena, incantempi pimpiotasnotanteariri. Nimpotanaje narori noneajeitelpi, ariorica intspatanaquena itsipapee maseroniasati. Ariorica irineapaaquempi pivioncaqueneri jerosaresati piirequite, irojeitapaaque queario nocantaqueri, aisati eiro nopashiventatsi narori. ⁵Ari nocantaqueri yoca ayemisantariinte irijivatanaquena, pampatojeitanteeariri piirequite. Avirojei cantashitachari peerani: “Nintacoteari ashinoncaincari”, te naro cantasanotempie.

⁶Ariorica pampatoteri piirequite, piquem-pivetacari panquiveetatsiri: ariorica impanquitero oshequi oitsoqui, irayero

coajica oshequi, impiotero. Iro cantaincha impanquierorica capichaji, ari capichaji iraye.⁷ Piojeitaque jaoca incarate quirequi picoqueri pimperiri. Aitaque incarataque pimperiri. Eiro pitsaneashiretaritsi, aisati eiro piperanataritsi itsipapee. Iro icoaqueri Tasorentsi ariorica pintacoteari, pinquimoshiretanaque.⁸ Tempa ioti Tasorentsi icavintsaasanotaquempi catsini, eiro ishinetajimpitsi pushononcajeitea. Intimacayempi maaroni coiteimotaquempi, impasanotempi ontimanteari pintacotanteeari aisati itsipapee.⁹ Tempa aitaque ocantini Sanquenarentsi: "Te pantsipetashi-teaji pintacojeitari ashinoncaincari, eiro catsini ipeacotarotsi Tasorentsi picavintsanti".¹⁰ Yora Tasorentsi ipapinitiri panquiveetatsiri oitsoqui impanquitanterori, aisati ipapiniyeitaquee avajeitari. Tempa aisati irishequianaquempi timimojeitimpineri ontimanteari pincavintsaajeitanteeariri ashinoncaincari.¹¹ Aiquero irovanaaqueMPIro Tasorentsi, pintacotasanotanteeariri itsipapee. Impoiji impasonquijeiteri iriori Tasorentsi, irineacameetsatasanojeiteri.¹² Ariorica intacotantea arori, ampasanoteri ashinoncaincari coiteimotacariri. Iro cantaincha aisati avamejeiteri impasonquijeiteri Tasorentsi.¹³ Ariorica pincavintsaajeiteri piyemisantaririnte, iriojeitanaque iriori queario avirojeitaque quemisantasanojeitiriri Quirishito. Aisati iriojeitanaque te pintsaneempariji piirequite, irointi oshequi pintacotantaca, impoiji irineacameetsajeiteri Tasorentsi.¹⁴ Oshequi iquenqueshirejeitaquempi, aisati oshequi icantapinitiri Tasorentsi iramitacojeitempi. Ijojeitaque oshequi catsini ineshinoncajeitaquempi Tasorentsi.¹⁵ Tsame ampasonquijeiteri, tempa icavintsaasanajeitaquee catsini.

Icamantacoventaja irisati Pavoro.

10¹ Ari itimi quisaqueñari, cantajeitaquempi: "Ariorica itsipajeitaquempi Pavoro, itsaroacaajeitaquempi.

Ariorica itimi arejiqui ipacantaquempi sanquenarentsi, iquisatsataquempi". Ari timatsi noninti noncamantempiri. Tempa ineshinoncajeitaquee Quirishito, te irishintsitsateejii: aisati noninti nonquempetempi narori.² Timatsi yora cantimpiri: "Te iranteroji Pavoro icoacaavetariri Tasorentsi, irointi yantashitacaro icoayetiri iriori". Terica irimajerete iriori, pamenvaquetayea eiro nontsaroacaapaaritsi, irointi nonquisatsatapaaqueri. Iro cantaincha te noncoyeji nonquisatsajeitapeempi, irointi nocooque aacameetsatavacaajeitea maaroni.³ Aca quipatsi qui timatsi camaari quisajeitaqueeri: tecatsi ancantea amanateri; te inquempejeiteariji atiripee amanajeitanteeariri.⁴ Te ontameji amanatanteeariri, iro cantaincha timatsi irinti Tasorentsi tasoncacoventajeitaqueeri ampiajeitanteeariri camaari.⁵ Timatsi yora piatsatacariri Tasorentsi, aisati cantiriri ashaninca: "Eiro piquemisantiritsi Tasorentsi". Iro cantaincha itasoncacoventajeitaquee Tasorentsi aimajerentajeitanteeariri maaroni piatsajeivetacariri, aisati anquemisantacanteariri, irishiretasanotanteeariri Quirishito.⁶ Aisati anta pinampiqui, niotaque piquemisantajeitaquena, iro cantaincha naamaaca itimaarantaque aparopee piatsataquenari. Irintuea yora piatsataquenari, noncanteri Tasorentsi iroasanquejeiteri.

Icantiri Pavoro:

"Narotaque itiancane Quirishito".

⁷ Ainiro caveaqueñari, aisati tseenacuquenari. Ijivetaquena te naro itiancane Quirishito. Icantacotashitaca irisati: "Naro itiancane Quirishito", iro cantaincha noncantempi nainti: narosanotaque nainti itiancane.⁸ Nocantapinitaquempi itiancaquena, iro cantaincha queariotaque oca nocantimpiri. Icoacaquena Avincatsarite nonquemisantacaasanajei-

tempi: te incoacayenaji nontseencacaajeitempi. Nantiniri icantaquenari, irootaque caari nopashiventanta. ⁹Eiro pijititsi notsaroacaajeitimpি, irootaque noquisatsatantaquempi nosanquenatitaquempi peerani. ¹⁰Timatsi cantimpiri: “Isanquenatashita Pavoro, te irioteji. Iquisatsatashitaquempi. Ariorica impoque aca, pineavaqueri tecatsi pimpincatsatimente-riri. Te irioteji inquenquetsatacasanojeitempi”. ¹¹Pincamanteri iriori: “Ariorica irareejitempi Pavoro, incamantasanota-pajempiro oca isanquenajeitimpri. Eiro ipashinitiroti irineane”.

Te oncameetsateji ashemeti, irointi aveshireimenteari Avincatsarite.

¹²Ari ineacameetsajeitashita irisati yora tseenajeitanari. ¿Paita noncoanteari nonquempejeiteari iriori? Icantajeitaque: “Nomoncaratavacaajeitaca nainti, nocameetsatasanojeitaque”. Queario, imoncaratavacaajeitaca, iro cantaincha te iriojeiteji, te aneeroji iojeitantari. ¹³Te nonintejí noneacameetsatashitea narosati: apatiro nocoaque nomataqueneri Tasorentsi maaroni icoacaquenari. Niotaque icoacaquena nonquemisanta-caasanojeitempi avirori. ¹⁴Te nanteroji caari icoacaana, iro cantaincha tempa narotaque intasanotacarori noquenquetsatacaajeitaquempi peerani. Narotaque nainti camantajeitaquempi ariorica pinquemisantajeiteri Quirishito, iroavisacojeitempi. ¹⁵Te nonintejí noncantashitea nomataquero nainti imataqueri iriori: tempa onashiyetaca. Nocoaque aiquero pijajeitatiye avirori pinquemisantasanojeitanaque. Impoiji novaanajea narori, ¹⁶nonquenquetsatacaajeiteri itsipapee atiri aisati, yora caariqueria iojeitatsi. Eiro nompoitiritsi itsipapee quenquetsatacantsiri, eiro nocantashitatsi naro quemisantacairiri yora iquemisantacairi iriori. ¹⁷Te oncameetsateji ashemetimen-

tero amataqueri arori, irointi ocameetsati aveshireimentearo imatacaaajeitaqueeri Avincatsarite. ¹⁸Te incameetsateji neacameetsatashitachari irisati, irintiquea cameetsatsatsiri yora ineacameetsatiri Avincatsarite.

Yora Pavoro iquenquetsatacotaja irisati, aisati iquenquetsatacotiri quisaqueriri.

11 ¹Nocoaque nonquenquetsatacotaja aisati. Terica aneeroji niotantari, iro cantaincha, eiro pishemanatsi. ²Pamene, tempa icoasanotapiniti shirampari irayero caari neiri shirampari. Ariorica oneakeri pashini shirampari impiincaquero, irojocajero. Aisati noquempetaca narori, nocoaque nonquemisantacaasanotempi irineacameetsatasanotantempi Tasorentsi, eiro yojocantimpitsi. ³Peerani yora maranque yamatavitaquero Eva. Queariya, iquempetacantimpicari yoranqui: yamatavijeitimpicari. Piquemisantasanojeivetacari Avincatsarite, pipincatsatasanojeivetacari. Yojocacaimpirocari amatavitantsiri. ⁴Te pinquenqueshiretimateaji. Piquemisantashijetavacari maaroni jatashijetimpirci. Onashita oca iquenquetsatacotqueri Jesoshi. Nocoacaquempi oamejeitempi Ishire Tasorentsi, icoacaquempi iriori iroamejeitempi camaari. Nocamantajeitaquempi pinquemisanteri Jesoshi paviscojeitajeari, onashita yoamejeitaquempi iriori amatavijeitimpirci. ¿Paita piquemisantajeitantariri? ⁵Itseenajeivetana iriori, iro cantaincha ¿paita noncoanteari nompincatsateri iriori? ⁶Yaamaavetaquena te nonquenquetsate cameetsa, iro cantaincha timatsi nioyetiri. Piojeitaquena, piojeiti timatsi nioyetiri.

⁷Pamene, peerani iroaqera noquemisantacantaquempi, tecatsi noncoacotimajeitempi, iro cantaincha naamaaca oncameetsaveta noncoacotempime.

⁸Naaque iirequite ipaquetari itsipapee quemisantatsiri nomatantarori noamejetaquempi. ⁹Nosaviquimojeitamimpri, nashinoncaavetaca, iro cantaincha te noncamantempiji. Impoiji iponeaca Maseroniaqui quemisantatsiri, ipapaaquenari aisati quirequi. Tecatsi catsini noncoacojeitempi avirori. ¹⁰Niotaque irootaque icoacaaquenari Quirishito. Meeca noncamantajeiteri maaroni acayasati tecatsi noncoacojeitempini peerani. ¹¹¿Paita noncamantanteariri? ¿Pijitimpia te nonintajeitempi? Ioti Tasorentsi queario nonintasanojeitaquempi. ¹²Iro cantaincha nocoaque niotacaasanojeitempi te nonquempeteareji yora itsipapee oamejeivetimpri, amatavijeitimpri. Pipinatiri, irootaque yoamejeitantaquempi iriori. Naroquea nanti, tecatsi noncoacotempi. ¹³Te intianqueriji irinti Tasorentsi. Yamatavijeitaquempi. Ishiacantashitaca itiancane Quirishito. ¹⁴Aitaque icanta, yamatavianti, iquempetacari Satanashi, yamatavianti iriori. Ishiacantashitacari iriori inampire Tasorentsi. ¹⁵Aitaque icantari quemisantiriri camaari: ishiacantashitaca iquemisantiriri Tasorentsi. Iro cantaincha coajica impiateari Tasorentsi, iroasanque-taajeiteri.

Yora Pavoro yanaacojeitiri quisaqueriri, iotasanol.

¹⁶Nampiitajempiro: eiro pijitashitanatsi te aneeroji niotantari. Pijitenarica caari iotatsi, pinquenqueshiretero oca: capichaji nonquenquetsatacotaja narosati. ¹⁷Te incamantenaji Avincatsarite nonquenquetsatacotaea, te incoacayenaji noshemetashitea. ¹⁸Iro cantaincha ishemejeiti irinti yora quisajeitaquenari: meeca nonquempeteteari narori, noshemete. ¹⁹Pijijeiveta piojeitaque avinti, pitseencaquena, iro cantaincha piquemisantashitaquena. ²⁰Irintuea

yora amatavijeitimpri, te pintseenqueriji irinti. Oshequi iperanajeitaquempi, yaapitsajeitaquempi piirequite, ishemetimojeitaquempi, aisati ipasavoronirojeitaquempi. ¿Paitaquea? ²¹Queario, te nioteji nonquempeteari.

Ari ainiro oshequi ishemetimentiri: meeca nonquempeteari, oshequi noshemetimentaquero narori, onquempe-teame te aneeroji niotantari. ²²Ishementimentaquero ijoriotaque. Tempa narotaque narori jorio. Ishanincatacari Ishiraeri, yora icoyeane Tasorentsi. Aisati noquempetacari narori. Icant: "Noshannincatacari Avaramani". Aisati narori, noshannincatacari. ²³Icantashiveta: "Nantiniri Quirishito icoacaaquenari". Oshequi nainti nanaacotaqueri. ¿Paitaquea noshemetantacari? Oshequi noquearioventaquero nantiniri Quirishito icoacaaquenari, irootaque yoiminqueanteetapinivetaquenari caravosoqui, ipasatantapiniyeetaquenari. Oshequi nocamapinivetaca. ²⁴Yora nojorioririnte ipasatapinitaquena, tac, tac, tac, tac, ocarataque 39 ipasataquena. Pashini quitaiteri aisati 39 ipasanatajana, tac, tac, tac. Aisati iquempetajana pashini quitaiteri, ocarataque quitaiteri apapacroni. ²⁵Pashini quitaiteri ipasanatapinitaquena, tac, tac, tac. Impoijini aisati ipasatajana, tac, tac, tac. Iro aisati ipasatajana. Iro ipasatantanari inchaquipee. Pashini aisati ipchanayetaquena mapi, pitsec, pitsec, pitsec. Aisati noquenavetanaja pitotsiqui antearojaqui incajare. Jero otsitianaque, irovetainchamnopiinqueme. Impoiji aisati noquempetapinitaca, nombiinqueme. Aparoni quitaiteri notsatajataca nianquiaqui, noquitaitetacotaque. ²⁶Oshequi noquenauquenayetanaque noquenquetsatantacari. Oshequi nombiinqueme eniqui. Oshequi icoshitapinitaquena coshitantatsiri, yoashinoncaapinitaquena. Iroyename

noshaninca, aisati itsipapee atiri. Iroyename savicatsiri nampitsiqui. Notimpinacavetaca inchatoshiqui, nashinoncaavetaca anta. Irovetailancha nompiinqueme antearojaqui incajare. Yoashinoncaaquaena shiavetachari iquemisanti.²⁷ Oshequi opomerentsitimo-taquena, oshequi nashinoncaapinitaca. Oshequi te nomateroji nomaye tsiteniriqui. Noquemapinitaqueru notashe aisati nomire. Oshequi quitateri te ontameji noyeari. Noquemaqueru noatsincare, te ontameji noicoro.

²⁸Aisati nocantani noquenqueshiretapi-nitaqueri ayemisantaririnte, noocoacaasa-notaqueri inquemisantasanojeite.

²⁹Ariorica yoashiretaca ayemisantaririnte, noashiretaca narori. Itimirica oashinoncairyiri, noquisacotacari narori.

³⁰Ari noshemevetaca, iro cantaincha nocamantajeitaquempiro oca piojeitan-teari te naro matashitearone, irinti Tasorentsi matacaanarori paitapeerica.

³¹Iriotaque Iriri Avincatsarite Jesoquirishito, tsame ancantaitatiyempani ampincatsajeiteri maaroni. Iotaque iriori te nontseeyaji.³²Peerani ipincatsariventantini yora Aretashi. Itianquiri ivincatsaririnte ipincatsariventanti anta Tamashicoqui. Iriotaque aacantenanemerri. Icoacoajeivetaquena soraropee,³³iro cantaincha yaanaquena ayemisantaririnte anta tantotsiqui shoncarori nampitsi. Yataitacaanaquaena irosati omoroquinta, impoini yoaniitacajana quipatsiqui. Irootaque nomatantarori noshiapitsacari pincatsari aacantenanemerri.

12 ¹Pamene, te oncameetsaveteji nonquenquesatacotapinita narosati, iro cantaincha nocoaque noncamantempi noneaqueri narori. Aisati noncamantempi icamantaquenari Avincatsarite.^{2,3}Ocarataque meeca 14 osarintsi yaanaquena Avincatsarite anta inquitequi jenoqui, anta ocameetsaiteta-

sanoti catsini. Ojataquerica novatsa, te nioteji: apanirorica ojataque noshire. Ioti Tasorentsi irinti.⁴Tecatsi noncantea noncamantempiro maaroni noquemaqueri anta. Arioricame nomavetaquearome, eiro icoacaanarotsi Tasorentsi noncamantempiro.⁵Oshequi noveshireimentayetacaro noneayetaqueri, iro cantaincha tecatsi noncantea noshemetimentearo. Irointi noncamantempi te noncameetsateji narori. Tecatsi nomate narori: iriotaque Tasorentsi matacaanarori paitapeerica, irootaque noveshireimentantacariri.⁶Noveshireimentaquearome nantaqueri narori, eirome otimime niotantari. Aisati nontseeyame: pineaqueru, tecatsi nomate apaniro. Te noninteji noncamantempiro nomayetirica narori. Timatsi pineacotaquenari aisati piquemacotaquenari: moncarataca, eiro novaimpirotsi aisati.

⁷Timatsi oshequi iotacaquenari Tasorentsi, iro cantaincha te incoacayenaji noshemetimentearo. Irootaque ishinetantacariri Satanashi yoashinoncaaquaena, noquematsicata-tacarori nojoquitaca.⁸Ocarataque mava nocantavetacari Avincatsarite: "Poavisacota-jena",⁹iro cantaincha icantaquena: "Noncavintsayempi, moncarataca. Eiro noavisacotimpitsi, iro cantaincha nontasonacoventempi pamavetantearori". Meeca noveshireimentacaro oca noquematsicatacarri: niotaque meeca itasoncacovaentacuena Quirishito.¹⁰Iriotaque noveshireimentasanota-cari. Te noshintsiteji, ishirontimentajeitaquena itsipapee, noquematsicayetacaro paitapeerica, iquisheetapinitaquena, nashinoncaapinitaca, iro cantaincha noveshireimentacari Quirishito. Iotaque te noshintsiteji, iro cantaincha ishinstitacaaquaena.

Cameetsa isavicaque Pavoro anta Corintoqui.

¹¹Pineaqueru, oshequi noquenquesataco-taja narosati. Oncameetsateme pineacamee-

tsatename, pinquenquetsatacename, iro cantaincha, te. Irootaque noquenquetsatacantajari narosati. Te noncameetsateji narori, tecatsi nomatasanote. Iro cantaincha te iranaacojeitenaji yora oamejeivetimpri pineacameetsajeivetari.¹²Peerani, notsipatantakuempi, jentsiquero noamejeitaquempi, niotacaasanojeitaquempi queario itiancasanotaquena Tasorentsi. Pineacoejitaquena imatacaaaquena notasoncantayetaque, nomayetaquero caari pineapiniti.¹³Nintacojeitaquempi, maaroni. Noquempetacaanta-jeitaquempi maaroni quemisantatsiri anta otsipapeequi nampitsi. Apatiro avinti, te noncantajeitempii: "Pimpema coiteimotauenari". Ocameetsaveta noncantajeitempime piojeitanteameri. Eiro piquishimentnarotsi te noncamantemppiji peerani.

¹⁴Irotaintsi meeca nojate noneajantempi aisati. Eiro opomerentsitimojeitimpitsi, tecatsi noncoacojeitempi. Apatiro nocooque pinquemisantajeitena. Noquempetacaajeitaquempi notomipee. Atomipee te impapini-teeji coiteimoteeri, ainti apapinitiricoiteimotariri irinti.¹⁵Nocoaque nainti nonquearioventasanotempi maaroni nantaqueri pinquemisantasanajeitanteari. Oshequi catsini nonintasanajeivetaquempi avinti, iro cantaincha avirori, te pimpiaje-naji pincavintsayena.¹⁶Ari picantajeiti: "Queario, tecatsi incoacojeitee Pavoro, iro cantaincha timatsi ionirotantari iriori. Aamaaca yamatavijeitaquee, yaantarori paitapeerica".¹⁷¿Timatsimpa yaitaquempi yora notiancaquempi?¹⁸Chapinqui notiancaquempi Tito aisati notiancaqueri itsipa ayemisantarininte. ¿Timatsimpa yaitaquempi iriori? Tempa iquempeta-quena narori: tecatsi incoacojeitempi.

Oshequi iquenqueshiretaque Pavoro.

¹⁹Pijitashijeivetaca apatiro nocooque pineacameetsajeitena. Noquemisanta-queri Quirishito, noshaninca, irootaque nocointacari nonquemisantacaajeitempi.

Iotaque Tasorentsi queario nocantaquem-piri.²⁰Oshequi noquenqueshiretaca meeca. Naamaaca ariorica noneajeitapa-quempi eiro noneacameetsatasanojeita-paimpitsi. Aisati naamaaca eiro pineaca-meetsatavaquenatsi narori. Naamaaca noneapaaquempi p quisatsatavaacaaca, p quisavacaaca, picantimatavacaajeitaca, otimi oshequi cantaantsi, pishemejeita-que, maaroni; te pisavicajeite cameetsa.²¹Naamaaca ariorica nareetajempi aisati noashiretacopeempi. Iro noashiretac-tantempiri, yoametaquena Tasorentsi te oncameetsateji pantajeitaqueri. Nom-pashiventacayeari yora caari jocajiro caari cameetsatatsi yantapinyetaqueri: yora mayempiyetirori tsinane, aimentarori ijina, airori iyashiane, maaroni.

Icoaque Pavoro inquemisantacaasanojeiteri corintosati.

13 ¹Ari ocarataque apite noneanta-jantimpri peerani, meeca noneanta-jantempi aisati. Ari ocantini Sanquen-rentsi: "Intimerica apite, ariorica mava neacoterineri ashandinca irantero caari cameetsatatsi, piotasanotaque queario yantasanotaquero, oncameetsatanteari poasanquetaajeiteri".²Peerani apitetaque nocantajeivetacari yora antirori caari cameetsatatsi, aisati meeca nosanquena-jeitaqueneri iroimpacantajearori oca yantayetaqueri. Eirorica yoipacajirotsi eiro nocavintsaajiritsi aisati.³Impoiji piojeitanaque queario novaajeitimpri irineane Quirishito. Te intsaroacaajeitem-piji iriori, irointi oshequi ipincatsariven-tajeitaquempi, itasorentsitasanotaque.⁴Ipajacotanteevetacariri peerani Jesoshi, te irishintsiveteoji, iro cantaincha itasoncacovertaqueri Tasorentsi, yaneantajari meeca. Te noshintsijeiteji narori, noquempetacari Quirishito peerani. Iro cantaincha itasoncaventaquena, nomatantarori nopincatsariventajeita-

quempi.⁵Piotacojeitea avisati, piojeite queariorica piquemisantasananojeitaque. Tempa pioti quiso yoajeitaqueMPI Quirishito, itasoncaventajeitaqueMPI. Terica quiso iroyempi, te pinquemisan-teji.

⁶Nocoaque piojeitaque avirori noquemisantasanotaque nainti.⁷Nocantapinitiri Tasorentsi iramatacojeitempi eiro pantantarotsi caari cameetsatatsi. Te noncoaveteaji pineacameetsatashitena, irointi nocoasanotaque pincameetsatasanojeitanaque. Irompa nainti, eirorica pineacameetsatana.⁸Tecatsi noncantea nompashinitero irineane Tasorentsi: tempa oqueariotasanojaque; nocoaque pinquemisantasananojeitero, maaroni.⁹Iro nocoacaasanojeitaquempi pinquemisantasanojeite. Ariorica pinquemisantasanojeite, moncarataca, eiro ocantimoneentanatsi pitseencanarica. Aitaque nocantiri Tasorentsi iramatacojeitempi pinquemisantasanojeitanteari.¹⁰Noshintsitsajeitaquempi meeca, oncateata ariorica nareejeitempi tecatsiquea noshintsitsati-

mentapeempiri aisati. Icoacaquena Tasorentsi nompincatsariventante, iro cantaincha te noncoyeji noasanquejetempi, irointi namitacojeitempi pinquemisantasanotanteari.

Ivetsajeitari.

¹¹Ari, noyemisantaririnte, piveshireimentajeiteari Quirishito. Pinquenque-shirejeitea, eiro papiitajirotsi aisati caari cameetsatatsi. Poveshireacaava-aaajeitea, paacameetsatavacaajeitea, impoiji quiso iroajeitempi Tasorentsi. Tempa oshequi inintajeitaquee, cameetsa isavicacaajeitaquee.¹²Pique-misantasananojeitirica, paacameetsatasanotavacaajeitea: eiro piquisavacaajeitajatsi aisati.¹³Ivetsajeitimpi maaroni ayemisantaririnte aca.¹⁴Nocoaque meeca irineshinoncajeitempi Avinca-tsarite Jesoquirishito, irinintajeitempi Tasorentsi, aisati quiso oajeitempi Ishire.

Ari ocarati nosanquenajeitimpri:
Pavoro

YORA PAVORO ISANQUENATINIRI CARASHIASATI

Ivetsatari Pavoro carashiasati.

1 ¹⁻²¿Savicajeitatsimpi, carashiasati? ¿Tecatsimpa oajeitempina? Narotaque aca Pavoro sanquenatimpiori oca. Te naro itiancane atiri, te incantenaji atiri: “Pinquenquetsate”. Irintiquea tiancana yora Jesoquirishito noquenquetatacaapinitiri atiri. Aisati iriri iringi itiancaquena: yora oitinaajiriri. Nocarajeitaqueri aca quemisantajeitatsiri, nosanquenajeitaquempiro noyemisantariinte, maaroni. ³Nocantapinitiri Apa Tasorentsi: “Pineshinoncajeiteri carashiasati, cameetsa pisavicasaajeiteri”; aisati iringi nocantiri Avincatsarite Jesoquirishito. ⁴Tempa irisati shinetainchapeerani ipajacotanteetacariri, irootaque intintacaquerir Apa Tasorentsi. Te ancameetsajeiveiteani, irootaque ipajacotimentantaqueeri, aisati yoavisacojeitatajeeri, maaroni. Te incoacayeriji tseencantatsiri irantacaajeitajeero caari cameetsatatsi. ⁵Tsame aneacameetsatasanojeiteri Tasorentsi, ancantaitatiyempani. Aitaque ancantajeiteari.

Itimi aparo oavisacotantatsiri: yora Jesoquirishito.

⁶Noquenqueshireacotaquempi, jaoca pincantajeitacari. Icoyeaquempi Tasorentsi, irootaque ineshinoncatantaquempiro Quirishito. ¿Picatimaitacampa pojocajerome piquemisantiri? ¿Pijitimpia eiro imatirotsi iroavisacotajempi?

¿Picoaquempa pashini oavisacotemperi? ⁷Queario nocamantajeivetaquempi jaoca pincanteari pavisacontajeari. Eirorica piquemisantana, eiro pavisacontajitsi. Iro cantaincha timatsi pashini, comitacaajeitaquempi. Icoaque pashini irantacaajeitempime, icantavetimp: “Eiro imatirotsi Quirishito iroavisacotempi”. ⁸Ariorica nompashiniterome oca nocamantitaquempi, oncameetsateme iroasanquetaquename Tasorentsi, intianquename Sharincaveniqui. Aisati inquempetea iringi, ariorica impashiniterome inampire Tasorentsi, oncameetsateme aisati iroasanquejeiterime Tasorentsi. ⁹Aitaque nocamantitaquempi, meeca nampiitajempiro: intimerica pashiniteroneci nocamantitaquempi, aitaque iroasanquetaqueri Tasorentsi. ¹⁰¿Janicampa nocoaqueri nonquimoshiretacayeri? ¿Iriompa atiripee? Teve, tempa irinti Tasorentsi. ¹¹Iriompa atiri nocoaque noveshireacayeari? Noncoaqueme noveshireacayeari atiri, tecatsi noncanteamete nantenerime Quirishito.

Jero oca icamantapinitiriri Pavoro.

¹¹Meeca, noyemisantariinte, piojeitaque nocamantajeitaquempi jaoca acantajeitajari avavisacojeitajari. Te irio atiri ashitearone irineane. ¹²Caari ini atiri iotaacaanarori oca, te irio oametenarone atiri. Irinti Jesoquirishito iotaacaanarori maaroni. ¹³Piojeitaque jaoca nocantaveitaniri peerani: naro jorio,

nomoncaratasanoveitaroni maaroni yamejeitari noshanincapée. Piojeitaque aisati noquisaveitarini maaroni quemisantajeitiriri Tasorentsi. Nocantirive, nocoaveitaní nojocacaajeiterime iquemisantajeiti. ¹⁴Queario, nomoncaratasanovetacaro maaroni yamejeitacari noshaninca: nanaacojeitaqueri maaroni noshiramparirinte. Aitaque, nomatasanoveitaroni maaroni yamejeitaniri noshanincani peeraniniri. ¹⁵Iro cantaincha peerani, tequeratsitani nontimeni, iotitanani Tasorentsi. Ineshinoncatitana, irootaque icoyeantajanari yoavisa-cotajana. ¹⁶Inijaaquenari itomi, noneasanotantajariri: nioti jaoca icantari. Caari pinajeiveta noshaninca, iro cantaincha icoacaquena nocamantajeitajimpiri jaoca icantajeitaqueeri yoavisacojeitanta-queeri. Te nosampitashiteariji itsipapee atiri: “¿Paita nanteri?” ¹⁷Tempa itiancaquena Tasorentsi irinti noquenque-tsati. Te nojateji Jerosarequi nosampiteri itsipa itiancane: yora ijivataqueri itiancaqueri, ainti nojataque Araviaqui. Impoiji nopianaja aisati Tamashicoqui.

¹⁸Ari mava osarintsi nosavicanaque, impoiji nojatanaque Jerosarequi, irosati noneantapaacari Sejashi. Ocarataque quitaiteri 15 nosaviquimotaqueri. ¹⁹Aisati noneaqueri Santiaco, yora irirenti Avincatsarite. Te noneeriji itsipapee iroamereni Jesoshi. ²⁰Ineaquena Tasorentsi, iotaque te nontseyají. Queariotaque oca nosanquenataquemperi. ²¹Impoiji aisati noquenayetanaque anta Shiriaqui aisati Shirishiaqui. ²²Tequerani iriojeiteni quenisantajeitiriri Quirishito anta Joreaquí, ²³iointi iquemacotashitaquena noquemisantaji. Icantajeitaque: “Iquisajeiveiteeni maaroni, icoaveitaní impoye-reajeiteeme, iro cantaincha meeca icamantajeitaqueri atiri: ‘Pinquemisanta-jeiteri Quirishito’”. ²⁴Iveshireimenta-quena quenisantajeitatsiri anta,

icantajeiti: “Tempa icameetsati Tasorentsi, yoavisacotaqueri Pavoro”.

Ipianaja aisati Pavoro Jerosarequi.

2 ¹Ari opearaniiitanaque, ocarataque 14 osarintsi, ari nopianaja Jerosarequi. Notsipatanacari Verenave aisati naanajiri iriori Tito. ²Iotacaquena Tasorentsi ocameetsati nojataque. Apaniro nojatashijeivetacari yora jivatacaajeitiriri ayemisantaririnte, te nojatashijeiveteariji maaroni quenisanta-jeitatsiri. Nocamantasanotaqueri oca nocamantapinijeitimpiri. Nosampijeitir: “¿Ocameetsatimpa oca nocamantajeitiriri yora itsipapee atiri? ¿Natsipetashita-rompa?” Icantajeitana: “Je, cameetsa; te pantsipetashitearoji”. ³Pamene, notspatacarí iriori Tito. Caari ini jorio, iro cantaincha te incantajeiteriji: “Pintoyean-tea”. ⁴Aisati itimi iriori cantavetachari: “Naro piyemisantaririnte”, iro cantaincha caari ini. Te noncajemeriji: iqueashita-paaca anta noametavacaajeitanta. Iro iqueantacari, icoaque iriote nomoncarajeitirorica isanquenare Moishishi, icoajeiveta intoyeantacaajeiteeme. Te irioteji avavisacojeitaja maaroni quenisantajeitaqueriri Jesoquirishito, te imperanajeiteji Quirishito amajeitero yamejeitacari joriopée. ⁵Te nonquemisantimateriji yora amatavitenanemerí. Nocoasanotaque piotasanoltero jaoca acantajeitajari avavisacotantajari.

⁶Tecatsi pashini incantena yora jivatacaajeitantsiri. Te incantenaji: “Impeajeitacea itsipapee atiri jorio iravisacotantajeari”. Pamene, peerani iroamereni Jesoshi inaveitani, iro cantaincha te nompincatsatashteariji. Tempa iquempejeitaque arori: ioti icomijkeita iriori. Aisati iriori Tasorentsi, te impincatsateariji: iotiri icomijeita, tempa atiri ini. ⁷Tecatsi imperanatená, iointi icantaque: “Queario, itiancaqueri

Tasorentsi Pavoro iquenquetsatacari itsipapee atiri, icamantajeitiri jaoca incanteari iraviscotantajeari. Iquempe-taca itiancaqueri Petero icamantajeitiri ashanincasanori arori”.⁸Queario, yora Tasorentsi itiancaqueri Petero iquenquetsatacaciajeitiri joriopee. Naroquea nainti, itiancaquena noquenquetsatacaciajeitiri itsipapee atiri.⁹Pinequiero, ijivatanci Santiaco, Sejashi, aisati Joa. Ari iojeitaque iriori itasoncacoventajana Tasorentsi. Yaacameetsajeitavaquena, aisati yaacameetsajeitavaqueri Verenave; icantajeitaquena: “Queario, aquempeta-vacaajeitaca. Oquempetaca noquenquetsatacaciajeitiri narori ajorioririnte, pijajeite avinti pinquenquetsatacaciajeiteri itsipapee atiri”.¹⁰Apatiro aisati icantaquena: “Pincavintsaajeiteri ashinoncaincari”. Tempa aitaque nametacaro nocavintsaapinitiri.

Yantiri Sejashi anta Antioquiaqui.

¹¹Iro cantaincha ijatantacari Sejashi Antioquiaqui, yantaquero caari cameetsatsati, irootaque nocantantacariri. Meeca noncamantempiro jaoca ocantari.¹²Yareetantapaacari yoacotapinivetacari caari joriotatsi. Ocameetsataque oca, iro cantaincha impoiji yareejeitapaaca itiancane Santiaco. Yora Sejashi itsaroacaavacari yora cantatsiri ocameetsati amoncarajeitero isanquenaren Moishishi avavisacotantajeari, irootaque intentareantanacariri yora yoacojeivetacari. Irointiquea oca, te oncameetsateji.¹³Impoiji ineacojeitaqueri yora itsipapee jorio yantaqueri Sejashi, iquempejeita-cri: intentareashitanajari iyemisantari-rinte, ipashiventacaajeitacari intsipajeita-jeari. Iajeivetaca te oncameetsateji intentareeri, iro cantaincha aisati iquempejeitacari Verenave.¹⁴Ari impoiji nareetapaaja narori. Noneantapaacariri Sejashi te intsipajeiteariji itsipapee atiri,

niotaque te irimoncarateroji oca queario-tatsiri acamantajeitiriri atiri: “Yoavisaco-tashijeitee Jesoquirishito, te incantajei-teeji amoncaratero isanquenare Moishishi avavisacotanteari”. Ari napatojeitaca maaroni quemisantajeitatsiri. Nocanta-queri Sejashi: “Tempa aviro jorio, iro cantaincha te pinquempetasanotajeari ashanincasanori, irinti piquempetaca itsipapee ashaninca. Pamene, ¿paitasa picoacaantacariri yora itsipapee atiri inquempejeitee arori?¹⁵Arojeitaque jorio, ashi airo ajoriojeiti. Te anquempeteariji itsipapee atiri: te iriojeiterini peerani irinti Tasorentsi.¹⁶Iro cantaincha piojeitaque ariorica amoncarajeitaque-rome maaroni isanquenaren Moishishini, eirome ineacameetsateeme Tasorentsi, ioti antajeitaquero caari cameetsatatsi. Ariorica ashireteari Jesoshi, anquemisant-eririca, ari incavintsaasanojeitaquee Tasorentsi, eiro iquenqueshiretajirotsi aisati caari cameetsatatsi antajeitaqueri. Ari ashirejeitacari Jesoshi, aquemisanta-queri, irootaque ineacameetsajeitanta-jeeri Tasorentsi, iquempetacantaquee te antajeiteroji caari cameetsatatsi. Te inquenqueshireteroji amoncarataquero-rica isanquenare Moishishi. Te irineaca-meetsatashiteariji yora moncarajeiterone-meri maaroni ocantiri isanquenare Moishishi”. Irootaque nocantaquerir Sejashi aisati maaroni nojorioririnte.

Eiro oavisacoteetsi isanquenare Moishishi.

¹⁷Pamene, ¿paita aventantacariri Quirishito? Tempa acoaque iroameetsa-jeitajee. Tempa oamejeitaquee isanquenaren Moishishi ainiro antane, irootaque aventantacariri Quirishito. ¿Yantacaajei-taqueempa Quirishito caari cameetsatsi? Teve, te irantacaajeiteeroji.¹⁸Ari notseencaquero isanquenare Moishishi, eiro oavisacojeiteetsi. Noncantempi-came meeca: “Tsame amoncaratero

isanquenare Moishishi avavisacotanta-jeari", tempa ontimeme nantane.¹⁹ Pine-a-quero, te noncanteji narori: "Nomoncar-yetaquero isanquenayetiniri Moishishi". Oquempetaca nocamaque, te nonquen-queshiretajeroji. Oametaquena eiro nomatirotsi maaroni ocantiri, aisati oametaquena noquemisantaqueri Tasorentsi. Iriotaque irinti oaneaqueunari, naneantacari meeca; irootaque noquemi-santacariri narori. Ipajacotaca Quirishito coroshiqui, icamaque, torein. Oquempetaca notsipatacari narori coroshiqui, nocamaque, torein,²⁰ iroota-que caari noquemisantantari cantaveta-nari: "Pinquemisantero isanquenare Moishishi pavisacotantajeari". Queario, aneatsiquera noni, iro cantaincha te naro aneashitachane apaniro, irinti quiso yoana Quirishito. Iriotaque itomi Tasorentsi noquemisantaqueri, mataca-anarori maaroni cameetsatatsiri nantaye-tiri. Inintasanotaquena, ishinetacotaca yoyetaqueri, icamimentaqueuna irootaque yoameetsatantaquenari.²¹ Te irantsipetashitearoji Tasorentsi ineshinoncajeitaquee. Iro cantaincha, pijiticari ariorica pimoncarajeitaquero isanquenare Moishishi ari pavisacojeita-que. Paventaquearoricame isanquenare, tecatsi pincantea pinquemisanteri Quirishito. Eiroricam piquemisantiritsi, tempa yatsipetashitaca icamimentajeita-quempi.

**Ariorica aquemisanti,
quiso oajeitaquee Ishire Tasorentsi.**

3 ¹Meeca, carashiasati, te aneeroji piotantari. ²Janicampa amatavije-timpiri? Peerani nocamantajeitaquempini ipajacotimentajeitaquee Jesoquirishito yoavisacotantajeari. Piotasanojeivetac-roni, meeca picomitanajaro. ²Aparo nosampijeitempi: ora Ishire Tasorentsi, ³paita quiso oajeitantaquempiri? ⁴Irompa

pimoncarajeitaquero isanquenare Moishishi quiso oajeitantaquempiri? Tempa iro quiso oantaquempi pishireta-caro nocamantitaquempi. Tempa pinquenqueshireempa. ³Piquemisantanta-cari peerani, ⁴paita oavisacojeitaquem-piri? Tempa iro Ishire Tasorentsi. ⁵Paitasa picoantacari meeca pimoncar-jeitero isanquenare Moishishi? ⁶Arimpa omatacaajeitaquempi icoacaajeitaquem-piri Tasorentsi? ⁴Oshequi pineacatsiti-mentari Jesoquirishito. ⁷Patsipetashita-rompa? ⁸Ariompa pintseencanajeri meeca? ⁵Pamene: tempa itiancaquempiro Tasorentsi Ishire. Tempa itasoncacoven-tapinitaquempi. ⁹Paita itasoncacoventan-taquempi? ¹⁰Irompa pimoncararatapinita-queri isanquenare Moishishi? Teve. Tempa pishiretacari, irootaque itasonca-coventantaquempi.

**Ishiretacari Avarama Tasorentsi,
irootaque ineacameetsatantacariri.**

⁶Tempa aisati piquempetacari Avaramani. Ishiretacaroni peerani maaroni icantaqueriri Tasorentsi, irootaque ineacameetsatantacariri, oquempetaca te iranteroji caari cameetsatatsi. ⁷Janica meeca shaninca-tasanotajariri Avaramani? Tempa yora quempetasanotajariri: yora shiretsanota-riri Tasorentsi, quemisantasanoiriri. ⁸Ora irineane Tasorentsi oquenquetsata-cotiri itsipasatipee atiri. Ocantitani coajica inquemisantajeitaje atiri iravisacotantajeari. Yora Tasorentsi peerani icamantaquerini Avaramani, icantiri: "Pishiretaquena, irootaque notasoncacoventantaquempi. Aisati nonquempetaqueri yora itsipapee atiri: ariorica irishiretena, nontasoncacoventa-queri". ⁹Aitaque icanta, itasoncacoventa-jeitiri maaroni quemisantatsiri, iquempe-tacantajeitaqueriri Avarama. ¹⁰Ainiro inaveta coatsiri irimoncarajeiterome

maaroni isanquenareni Moishishi, iravisacotantajeameri. Te irimateroji, irootaque iroasanquetantajeiteariri Tasorentsi, intiancajeiteri Sharincaveniqui. Pineaquero, ocanti Sanquenarentsi: "Iroasanquejeiteri Tasorentsi yora caari moncaratasanojeitiro maaroni isanquenatiniri Moishishi".¹¹ Pineaquero, tecatsi ancantero amoncarajeitero ora sanquenarentsi. Eiro ajititsi amoncaratasanojeitiro avavisacotantajeari. Eiro ineacameetsashijeiteetsi Tasorentsi, irointi icantaquee: "Ariorica pishiretena, ari noneacameetsa-jeitaquempi, impoiji pincantaitiyempani paneajeitanaje inquitequi".¹² Aisati isanquenareni Moishishi, te oamejeiteeji ashireteari Tasorentsi avavisacotantajeari, irointi oamejeitaquee ancantatiyempani amoncaratasanotero ocantayeteeri, avavisacotantajeari.

Yantaqueeneri Quirishito.

¹³Te amoncaratapinteroji isanquenareni Moishishi, irootaque incantanteemerri Tasorentsi: "Pijate Sharincaveniqui". Te amoncarajeiteroji, iro cantaincha icamimentaquee Jesoquirishito, yoavisacojeitaquee. Tempa ocantitani Sanquenarentsi: "Yora pajacotachaneri inchatoqui incamimenteri maaroni antirori caari cameetsatatsi".¹⁴ Ari icamimentajeitaqueri pashinisatipee atiri, yoavisacojetantajariri maaroni quemisantajeitiriri. Aisati iquempejeitani iriori yora Avaramani, iquemisantini, irootaque yavisacotantajari. Aisati Ishire Tasorentsi, quiso oajeitaquee maaroni arori quemisantajeitiriri. Irootaque icashiacaicatariniri Avaramani peerani.

Icashiacaicatariniri Tasorentsi Avaramani.

¹⁵Pinquenqueshiretero, noyemisantariinte, oca amejeitacari. Ariorica acoaque ancashiacyayeri ashaninca amperi paitapeerica, asanquenateneri acashia-

caaqueriri, iriotasanotantearori. Aisati asanquenatero avajiro. Impoiji tecatsi ancantea ampashinitapintero, eiro amatirotsi amataviteri yora acashiacaqueri paitapeerica.¹⁶ Aisati iriori Tasorentsi, icantiri Avarama: "Ariorica pinquemasantena, ari noavisacotajempi". Aisati icantaqueri: "Nontianqueri pishaninca, coajicani, iroavisacojeitajeri maaroni quemisanterineri". Pamene, te incanteriji: "Nontiancajeiteri oshequi oavisacojeitempine". Teve. Iranti iquenquetsatacotaqueri aparoni ishaninca, oavisacotantatsineri: yora Quirishito.¹⁷ Pineaquero, otimi icantaqueriniri Tasorentsi Avaramani peerani. Icantantacariniri, tequerani ontimeni isanquenareni Moishishi. Impoiji ocarataque osarintsi 430, ari isanquenatacaaqueri Tasorentsi Moishishi. Te impashinteroji oca icamantitariniri yora Avarama, te iramataviteriji.¹⁸ Incoaque me Tasorentsi amoncaraterome isanquenare Moishishi avavisacotanteameri, eiro aquempetarime Avarama. Te ontimeniji irimoncaratan-tearomeri. Te iranteroni iriori ocantiri isanquenare Moishishi, irointi iquemisantaqueri Tasorentsi, irootaque icantantacariri: "Noavisacotempi".

¹⁹Ari, ¿paita otimantacari isanquenare Moishishi? Iotacaajeitaquee ainiro antane, irootaque acoajeitancarri oavisacojeiteeneri. Ipocaque Quirishito, te meeca ancoajeroji isanquenare Moishishi. Tempa iriotaque Quirishito ishanincani Avarama: yora icamantitaniri peerani Tasorentsi: "Nontiaquemperi coajica oavisacotempineri". Aisati noncamantempiro oca: yora Tasorentsi icantiri inampire: "Pincamantaiteri Moishishi noneane". Impoiji iriori Moishishi yovaqueneri atiripee irineane Tasorentsi.²⁰ Irintiquea Avarama iriotasanotaque neanatasanotaqueriri Tasorentsi, tecatsi ovayenerine irineane. Apaniro

icamantaqueri, apaniro ini.²¹Peerani icantiri Tasorentsi Avarama: "Ariorica pinquemisantena, noavisacotempi". Ari impoiji isanquenatacari Moishishi, otimantacari isanquenare. ¿Onashitampa oca icantaqueriri Moishishi? Teve. Meeca ayojeiti te oavisacojeiteeji isanquenare Moishishi, tecatsi oncantre oameetsatasanojeitee.²²Oamejeitaquee sanquenarentsi ainiro antanepee maaroni. Te amajeite-roji icoacaqueerri Tasorentsi. Iro cantain-cha timatsi icantajeitaqueerri maaroni arori shirejeitariri: ariorica anquemisanteri Jesoquirishito, aitaque iroavisacojeitaquee.

²³Peerani, oshequi operanajeitaquee isanquenare Moishishi, oquempetacari variria, ariorica iroiminqueaquee caravosoqui. Oquempetacantaquee oquempoyeajeitaquee irosati ipocantacari yora aquemisantajeitaqueri.²⁴Aisati isanquenare Moishishi oshiaqueri oametantatsiri: oamejeitaquee ainiro antane, acoantacari anquemisantajeiteri Quirishito, iroameetsajeitajee, inquempetacantajeet te anteroji caari cameetsatatsi.²⁵Meeca ayojeitaqueri Quirishito, aquemisantaqueri. Aitapaji. Te ancoajeji meeca oametajeeneri anquemisanteri: tempa moncarataca.

**Arojei quemisantatsiri,
aquempejeitacari Avaramani.**

²⁶Aquemisantajeitaqueri Jesoquirishito, irootaque itomintantajeitaqueerri Tasorentsi.²⁷Pamene, aisati avaotisatimentari, iojeitancari atiri aquemisantaqueri, aisati ashancajeitacari.²⁸Meeca acarajeitaqueri jorio, caari joriotatsi, aisati acarajeitaqueri pimantaari, caari pimantacha, shirampari, tsinane, maaroni: amoncaratavacaajeitaca aquemisantajeitaque. Iro cantaincha jaocarica acantajeitari, eiro aquenqueshi-retirotsi. Pinequero, ariorica ashancina-

tacari Jesoquirishito, ashancatavaca-jeitaca.²⁹Aisati oquempetaca, ariorica aquemisantaqueri Quirishito, aquempe-jeitajari Avarama. Tempa icantirini peerani Tasorentsi: "Pinquemisantena-rica, aitaque nontasoncacoventaquempi". Irootaque icantajeitaqueerri meeca arori, eiro yamataviteetsi, irootaque aquempe-jeitajajariri Avaramani arori.

**Jaoca acantaveitaniri peerani, tequerani
impoqueni Quirishito.**

4 ¹Piotacotiri yameyetacari ashitaaran-tachari. Itimirica itomi, icoaque imperi maaroni yashiyetari. Aisati icantiri ishaninca: "Ariorica noncamaque, pinquempoyejeneriya notomjaniqui maaroni nashiyetari. Ariorica irantearitanaje, ari pimpajeri maaroni". Ari icoaque imperi maaroni; tempa irootaque ashijeivtariri itomi maaroni, iro cantain-cha ainiroquera ijanaequiti, tequeratsita impincatsateaji. Oquempetaca te irishineteriji nampirentsipee impimantayetero iroaararo nampitariri, aisati tequera irishineteri itomi impimantayetero iroaararo.²Itimi quempoyejiririri, aisati quempoyejiniriri yashiyetari. Ariorica omونcarataapeempa icantajeitacari iririni, aitaque irishineteri paitapeerica.³Aitaque aquempevetaniri peerani arori, tequerani impoqueni Quirishito. Oquempoyeavei-teeni isanquenare Moishishi, oamejeivei-teeni antapinjjeitironi pomerentsiyeta-chari. Aquemisantashiyyetaroni icantayetiri atiri, iperanajeiteeni.⁴Impoiji omونcarataaca icantajeitacari Tasorentsi. Itiancaqueri itomi, otimaqueri tsinane, jorio inavetapaaca, ipomerentsitimenta-quero isanquenare Moishishi.⁵Ayojeitaque opomerentsitsaca amajeitero ocantayetiri isanquenare Moishishi. Aquempevitarini pimantaari, iro cantaincha yoavisacojeitajee, irootaque itomintasanojeitajee Tasorentsi.

⁶Tempa meeca arojeitaque itomipee, irootaque itiancantajeitaqueerori Ishire Itomi, quiso oajeitaquee. Irootaque meeca acantajeitajariri: “Apa Tasorentsi”. ⁷Te arojei meeca pimantaari, meeca arojeitaque itomipee Tasorentsi. Ineshinonajeitaquee, timatsi icashiacaajeitaqueeri maaroni.

**Ariorica apomerentsiventajaro
isanquenatiniriri Moishishi joriopee,
aquempetacari pimantaari.**

⁸Peerani, te piojeiveitearini Tasorentsi, pijitasorentsijeiveitarini irovetscane Tasorentsi. Tecatsi incantajeitea intasorentsite. ⁹Iro cantaincha meeca piojeitaqueri Tasorentsisanori, tempa aisati iriotaque iojeitaquemperi. ¿Paita picoajeitancari pinquempetajea peerani? ¿Picoaquempa pinquempetajea aisati pimantaari? ¿Paita pinquemisantsshitanteariri caari tasorentsitsati? Eiro imatirotsi iroavisacotempi. ¹⁰Pinashita-caapinyetaro quitateripee, cashiripee, osarintsipee, paitapeerica. Iro pinashita-caapinyetantarori picoajeiveta irineacameetsatempime Tasorentsi. ¹¹Oshequi nocantashireti meeca. ¿Natsipetashitampa nopolerentsiventimpi noamejetimpis?

Iquenqueshireyetiri Pavoro.

¹²Meeca, noyemisantairinte, pinquemejeitea: eiro pipomerentsiventajarotsi isanquenare Moishishi. Tempa nojocajironarori, meeca noquempejeitajimpi avirori, te pimpomerentsiventearoni peerani, te pioveitearomi. Nojatashtan-timpiniri peerani, te pintseencajeitava-queñaji. ¹³Aisati piojeitaque nocamantan-tapaquempiniri jaoca pincanteari poavisacotea, nojouquitapaaca narori. ¹⁴Pipincayevetari mantsiyetatsiri, iro cantaincha te pimpincavaqueñaji nainti, cameetsa poisavicavaquena. Impoqueri-

came inampire Tasorentsi, pincavintsayerime; aisati impoquericame Jesoquirishito, pincavintsayerime iriori. Iro cantaincha narotaque nainti areetaquempiri. Oquempetaca pincavintsavaquemperime iriori, picavintsaasanotavaquena narori. ¹⁵Peerani piquimoshireimentavaquena, ¿paita caari piquimoshirejeitanta meeca? Peerani picavintsaajeitaquena catsini. Arioricame noncontempime: “Pinquitsoreajenaro poqui, pimpenaro”, ari pimpaquenarome, arioricame pimataquerome. Niotaque oshequi pinintasanojeitaquena. ¹⁶Ari queariosanataque oca noamejeitaquempiniri, ¿meecampame piquishimentaqueñaro?

¹⁷Queariompia: icoaque iroveshireacayempi yora amatavitimpiri, ire cantaincha eiro yamitacotasanolimpitsi. Icoaque pintseencajeitea, pinquemisantanteariri irinti, piveshireimentanteariri irinti.

¹⁸Pamene, ocameetsati ancoaque ancavintsaavacaajeitea, eiro amatavitava-caleitatsi. Ariorica nontsipatempni, ocameetsati ancavintsaavacaajeitea, aisati ariorica nonteentareanajempi, ancavintsaavacayeani aisati. ¹⁹Aisati, nosharinca, noquempetaca: oshequi noquenqueshireacotaquempi catsini, tequera pimoncarateroji icoacaquemperi Quirishito, tequera pinquempeteari iriori. Nonquenqueshireacotempini, noncanteari, irosati pinquempetanteariri.

²⁰Nocoasanovetaca nontimimotanajempime, cameetsa nonquenquetsatacana-jempime. Te niotacotempiji pitarica noncontempiri ontimanteari piotanteari.

**Ariorica aquemisantaque, avavisacojeitaca;
eiro amoncaratajirotsi isanquenare
Moishishi avavisacotantajeari.**

²¹Ariorica pijivetaca pimoncarataquero isanquenare Moishishi paviscotantajeari, pincamantena: ¿piotasanotirompa ocatiri isanquenare? ²²Ocanti itimini

itomi Avarama apite. Aparo ashinampire yamanantiri. Irio pashini ashinijinasanori, te iramananteroji irointi.
²³Yora otomi inampire iquempetasanojetacari itsipapee jananequipee. Iro cantaincha inashita irinti otomi ijina. Icantitacaroni Tasorentsi: "Intime pitomi". Impoiji omoncarataca icantaque-rori, itimaque.^{24,25}Aniro oshiacanta-queri oca tsinane apite. Opajita nampirentsi Acara. Oshiacantaqueri iroori pomerentsiventirori isanquenare Moishishi. Isanquenataquero iriori icantaqueirir Tasorentsi anta toncaariqui timatsiri anta Araviaqui, pajitachari Shinai. Otomi ora nampirentsi, iquempetajaro iriniro: nampirentsi ini iriori, ainiro peranatariri. Aisati oshiacantaqueri nampirentsi joropee timayetsiri meeca Jerosarequi: yatsipetashitacaro ipomerentsiventajeitacaro isanquenare Moishishi, maaroni.²⁶Iro cantaincha ainiro pashini tsinane: ijinasanori Avarama. Oshiacantaqueri iroori savicatsineri pashiniqui Jerosare, timatsiri anta jenoqui. Arojei savicatsineri anta, anampijeitearo irointi. Te arojei nampirentsi, te ampomerentsiventearoji isanquenare Moishishi, eiro apomerentsiventarotsi catsini.²⁷Irootaque isanquenataqueniri Isayashini: "Pishiravarovetaca, iro cantaincha piveshireanaquea. Tequera pintimeri pitomi, iro cantaincha pinquimoshiretasanotanaque, irishequiasanotanaque pisaripee, eiro ishequititsi osaripee pinampire".

²⁸Meeca, noyemisantaririnte, aquempe-jeitacari ainti Isaca. Ainiro icashiaca-queriri Tasorentsi Isaca, aisati ainiro icashiacaajeitaqueeri arori. ²⁹Peerani, yora Ishimairi, yora otomi nampirentsi, iquisapinitaqueri irirenti: yora Isaca. Aisati oquempetaca, yora coatsiri amoncarajeitero isanquenare Moishishi iquisapinjeitaquee arori: tempa arojeita-

que quiso oajeitaquerori Ishire Tasoren-tsi.³⁰Jero oca ocantiri isanquenatiniri Moishishi: "Icantiri Tasorentsi Avarama: 'Pintiancadero ora pinampire aisati otomi. Yora Ishimairi, eiro iquempetasanotaritsi otomi pijinasanori. Yora Isaca irashitas-notajearo maaroni timimojeitimpiri'".³¹Pinequero, noyemisantaririnte, te ashanincajeitearoji ora nampirentsi, eiro apomerentsiventarotsi isanquenare Moishishi. Irootiquea ashanincajeitacari itomisanori Avarama: yora Isaca. Aquemisantaque, irootaque itomintanta-queeri Tasorentsi.

**Pincoyeanontea: terica pininte pimpeajea
jorio, ari pinquemisanteri Quirishito.**

5 ¹Tempa peerani yoavisacotajee Quirishito, irootaque meeca ocameetsa-tantari aijatasanojeiteri. Te incoyeji anquem-petajeari pimantaari. Eiro picoitsi imperana-yeetempi pimayetero paitapeerica paviscotantajeari. ²Pinquemisantasanozena. Narotaque Pavoro camantimpiori oca. Ariorica pintoyeantea, pijiticari oavisaco-tempi; patsipetashitarocari paventavetacarini Quirishito, eiro imatirotsi iroavisaco-tempi. ³Noncamantajempi aisati: ariorica pintoyeantea paviscotantajeari, ocamee-tsati pimoncarajeitero isanquenare Moishishi, pintsoteaquero maaroni catsini. Eiroric a pimoncarajeitirotsi maaroni, eiro paviscotajitsi. ⁴Ariorica pininti pimoncarajeitero sanquenarentsi irineacameetsatan-tempiri Tasorentsi, te pincoyeji irineshion-catemp. Pitseenquiricari Quirishito. ⁵Iro cantaincha ariorica ashinetero Ishire Tasorentsi oamejeitee anquemisante, ayojeitaque irimoncaratero Tasorentsi maaroni icantaqueeri. Aitaquequea ayojeita-que iroameetsatasanojeitee. ⁶Ariorica aquemisantasanoqueri Jeso quirishito, eiro isampiteetsi Tasorentsi: "¿Pitoyeantampa?" Teve. Te inquenqueshireterojo. Ariorica

anquemisante, ari anintajeiteri itsipapee atiri. Irootaque icoacaajeeri Tasorentsi.

⁷Peerani cameetsa piquemisantajeiteitani. Pishiretasanojeivetacaroni quearioyetatsiri. ⁸Janicampa jocacaquempirori piquemisanti? ⁹Te irijocacyempiro irinti Tasorentsi. Irootaque coyeaquempiro iroavisacotempi. ¹⁰Otimirica tapiacaarori tanta capichaji, ari otapiacaacaro oshequi tanta, otsoteana-quero, maaroni. Aisati oquempetaca, aparoni amatavitantatsiri yamatavijeitiri oshequi atiri. ¹¹Noshiretacari Tasorentsi, niotaque inquenqueshiretacajempi, pinquempejitetanjenari. Te nioteji janicarica ashereaquempiro, iro cantaincha coajica iroasanqueteri Tasorentsi. ¹²Timatsi cantanirotatsiri nocamanitiri atiri irimoncaratero isanquenare Moishishi. Noncantem-pime: “Pintoyeantea pavisacojeitajeari”, eiro nocamantimpime: “Icamimentaquee Quirishito coroshiphi yoavisacojeitaje”. Impoiji eirome iquisaname joriopee.

¹²Timatsi yora cantanirovetimpri pintoyeantea, oshequi yashereajeitaquempi. Nocoaveta narori iraitsoquireempame iriori.

**Ariorica pinintavacaajeitea,
ari moncarataca.**

¹³Meeca, noyemisantaririnte, noncamantempi. Icoyeaquempi Tasorentsi iroavisacojeitempi, te irinintacayempiji pimpomerent-siventearo isanquenareni Moishishi. Yoavisacojeitaquempi, iro cantaincha te irishinetempiji pantero paitapeerica picoiri. Icoaque pinintavacaajeitacea maaroni, aisati pincavintsavacaajeitacea. ¹⁴Jero oca isanquenatiniri Moishishi: “Oquempetaca avisati cavintsaajancha, aisati pinquempejeteri itsipapee, pincavintsasanojeiteri, pinintasanojeiteri”. Ariorica amajeitaquero oca, cameetsa. Moncarataca. ¹⁵Iro cantaincha piquisavacaajeitaca, oshequi picatsimajeitaque: oquempetaca patsicavacaajeitaca, aisati oquempetaca pipatsareava-caleitaca, patsare. Ariorica pincatsimajeite,

aitaque pimpo yereavacaajeitacea; eiro pimajeitirotsi pinquemisantajeite.

**Acoajeivetari arori, aisati
ocoacaajeitaqueeri Ishire Tasorentsi.**

¹⁶Noncamantanotempi: pincantero Ishire Tasorentsi oamejeitempi paitapeerica panteri. Eiro pantirotsi caari cameetsatatsi picoayevetari avirori pantajeitemeri.

¹⁷Timatsi caari cameetsatatsi acoayevetari antajeiteri arori, aisati timatsi ocoacaaveta-queeri Ishire Tasorentsi antacayeemer. Te omoncaratavacayeaji. Onashiyetaca, irootaque caari amajeitanton cameetsayetasiri antemer. ¹⁸Ariorica anquemisantero Ishire Tasorentsi paitarica antacayeeri, eiro aquenqueshiretirotsi amoncaratero isanque-nare Moishishi.

¹⁹Ayojeitaquero caari cameetsatatsi antapinjejiti: ineavintsatiro shirampari caari yai, oneavintsatiri tsinane caari ai, antavintsa-tavacaajeita: acantirove, te ampashiventaeji.

²⁰Aisati ashiacantiqueri paitapeerica ajitasorentsitashiyetari, amatsitanti, aquisava-caleita, aquisatsatavacaajeita, anevetaro paitapeerica yashiyetari ashanincabee, atsimajencata, te ancavintsaavacayeaji, te aacameetsatavacaajeiteaji, irointi aquisashire-vacaajeita. ²¹Aisati anintitaqueri aitayeteri irovaararo ashaninca, avanti, ashinuijeita, maaroni. Peerani nocamantitimpini:

“Queariompiya. Ariorica antapinitero maaroni ocabee, eiro amatirotsi ajate anta ipincatsar-tinta Tasorentsi”. Meeca nampiitajempiro: “Queariompiya. Pantirocari caari cameetsatatsi”.

²²Iro cantaincha Ishire Tasorentsi oamejei-taquee anintavacaajeitaca, aquimoshirejeita-que, aveshireajeitaca, eiro aquisavacaatsi, acavintsavacaaca, acameetsataque, eiro amatavitantitsi, ²³aneshinoncatavacaaca, eiro antayetirotsi caari cameetsatatsi acoavetari antemer. Te ontsaneapitsateeroji isanquenare Moishishi maaroni oca. ²⁴Yora pajacojeitachari coroshiphi icamajeitaque,

torein: tecatsi irantaje aisati. Ariorica aquemisantaqueri Jesoquirishito, oquempe-taca arosati pajacotajancha, oshiacantaca acamaque, tecatsi ancantea ancoajeitaje antajero caari cameetsatatsi.²⁵ Iro cantaincha oshiacantaca oaneajee aisati Ishire Tasorentsi, iotacaajeitjee aisati. Tsame ancantero oamejeitee paitapeerica antayeteri.²⁶ Eiro ashemetitsi, aquisacaari-cari itsipapee. Eiro anintashireitirts ioyetiri oriori.

Jero oca pashini yoameyetiriri Pavoro.

6 ¹Noyemisantaririnte, ariorica pineeri pishaninca yantiro caari cameetsatatsi, pincantero Ishire Tasorentsi oametempi pincavintsayeri. Queariya, piquishiricari, jentsiquero pineanateri. Queariompiya pantirocari avirori caari cameetsatatsi.² Pincavintaavacaajeitea. Ariorica pincavint-sante, pimataquero yoamejeiteeri Quirishito.³ Itimirica shemetatsiri, yamatavita irisati. Te incameetsateji oriori.⁴ Pinquenqueshireempa: piole ocameetsati-rica pantayetiri. Ariorica ocameetsati pantayetiri, pinquimoshiretanaque. Eiro pishehemetitsi, eiro pitseenquiritsi itsipapee,⁵ tempa ainiro antajeitiri maaroni.

⁶Ocameetsati ampapiniteri oamejeiteerori irineane Tasorentsi maaroni coiteimojeitacariri. Te ancoyeji incoiteayetearo paitapeerica. Iranti quemisantajeitiriri pajeiterineri.⁷ Queariompiya, eiro pamatavijetajatsi avisati, te incoacyeeji Tasorentsi antseen-jeiteri. Paitapeerica apanquiyetiri, aayetajero oitsoquipee oshanincasanori iroori.⁸ Oshiaquero ariorica antapinitero caari cameetsatatsi acoajeivetari, ari ajate Sharincaveniqui. Ariorica antapinitero ocoacaqueeri Ishire Tasorentsi, ari ancantaitatiyempani asavique inquitequi.⁹ Eiro aperatarotsi antapinitero cameetsatatsiri. Ariorica ancantatiyempani antapinitero, ari impinajeitaquee coajicani Tasorentsi.¹⁰ Ari ocameetsati ancavintsaajeiteri

itsipapee atiri, aiquero ajatatiye ancavintsa-sanojeiteri ayemisantaririnte.

Ari yovecarataquerori isanquenare.

¹¹Narotaque Pavoro sanquenatimpiori oca: pinequero, antearo nosanquenata-quero.¹² Yora coanirovetachari pintoyean-tea, icoaque yora ijorioririnte irineacamee-tsapirojeiteri. Te irinintaniroteji inquisajie-teri. Incantempime: “Icamimentaquempi Quirishito coroschiqui yoavisacojeitajimpi”, ari inquisajeiterime ishaninca.¹³ Maaroni yora toyentachari te irimoncarateroji isanquenare Moishishi, iro cantaincha icoanirovetaca pintoyeantea avirori irishemetanteari. Irishemetimentempime, incanterime ishaninca: “Pinequero, notoyeantacaacari. Iquemisantajeitaquena”.¹⁴ Iro cantaincha te oncameetsateji noshemete nainti, irointi nocoaque noveshi-reimenteari yora Avincatsarite Jesoquirishito: yora pajacotimenteeri coroschiqui. Meeca oquempetimotaquena nopajacotaca narori. Nocamaque, te meeca noncoayetaje-roji caari cameetsatatsi icoayetiri atiri, te nonquenqueshiretajeroji caari cameetsatatsi.¹⁵ Eiro yavisacotashitatsi maaroni toyentachari, aisi eiro yavisacotashitatsi caari toyentachira. Iro cantaincha ariorica impashinitacaajei Tasorentsi, ari avavisacotajea.¹⁶ Ariorica piquemisantaqueri oca, ari ishanincataquempi Tasorentsi, aisi nocoaque cameetsa irisavacacayempi, aisi nocoaque incavintsayempi.

¹⁷Meeca eiro pashereanatsi, eiro pipiatsatanatsi. Narotaque antaveetiniriri Jesoshi, irootaque iquishimentantanarori tseencantatsiri, irootaque namashiyetan-tacari novatsapeequi.

¹⁸Meeca, noyemisantaririnte, nocoaque irineshiloncajeitajempi aisi Avincatsarite Jesoquirishito. Tempa aitaque icantapinijeitimpiri.

Ari ocarati. Narotaque sanquenatirori oca: *Pavoro*

YORA PAVORO ISANQUENAJEITINIRI EJESOSATI

Ivetsajeitari Pavoro ejesosati.

1 ¹¿Savicajeitatsimpi, ejesosati?
¿Tecatsimpa oajeitempíne? Narota-
que Pavoro sanquenajeitimpíri oca.
Itiancaquena Jesoquirishito noquenque-
tsatacotori, irootaque icoacaquetunari
Tasorentsi. Meeca nosanquenajeitimpíro
maaroni quemisantajeitatsiri, maaroni
quearioventiniriri Jesoquirishito icoaca-
jeitaquempíri. ²Nocoaque irineshilonca-
jeitempi Apa Tasorentsi, cameetsa
irisavicasaajeitempi. Aisati irori
Avincatsarite Jesoquirishito: irineshilon-
cajeitempi, aisati cameetsa irisavicasa-
jeitempi.

Icoacaque Tasorentsi ayojeiteri.

³Tsame ancamantajeiteri atiri icamee-
stsatasanoti catsini Tasorentsi: yora iriri
Avincatsarite Jesoquirishito. Aquemisan-
taqueri Quirishito, meeca icantajeitaquee
Tasorentsi: “Pisaviquimojeitena coajica
anta inquitequi jenoqui”. Tempa aisati
meeca oshequi icavintsaajeitaquee,
aveshireimentasanotacari catsini,
oquempetaca asaviquimojeitaqueri
inquitequi. ⁴Peerani, tequerani irovetsi-
queroni quipatsi, icoyeajeititaqueeni,
iotitacani iroavisacojeitee Quirishito.
Iquenqueshiretitacani: “Noameetsatasan-
nojeiteri maaroni quemisantajeiterineri
notomi”. Meeca ineacameetsajeitaquee,
i quempetacantajeitaquee te anteroji caari
cameetsatatsi. ⁵Inintasanojeitaquee

catsini, irootaque itiancantacariri
Jesoquirishito icamimentajeitaquee.
Aitaque icantitani peerani: “Nontominta-
jeiteari irori quemisantatsineri”.
Irootaque icoacaajeitaqueeri maaroni.
⁶Meeca ashaincajeitacari Itomi intintasa-
notiri, irootaque ineshiloncajeitanta-
queeri. Icavintsaasanojeitaquee catsini.
Tsame ancantaitatiyempani ancamanta-
jeiteri atiri: “Icameetsatasanotaque
Tasorentsi”. ^{7,8}Ineshiloncatasanojeita-
quee maaroni, intintasanojeitaquee
catsini. Itiancaqueri Itomi icamimentajei-
taquee, aparajatimentajeitaquee iriraja.
Icavintsaasanojeitaquee, meeca te
inquenqueshiretajeroji aisati caari
cameetsatatsi antajeitiri. Tempa aitaque
yoavisacojeitaquee. Iotacaajeitaquee,
otimantacari ayojeitajari. ⁹Aisati
iotacaajeitaquee paita itiancantacariri
Quirishito: te ayojeiveitearoni peerani.
Aitaque, peerani icoitacani intianqueri
iroavisacojeitajee. ¹⁰Jero oca icoacaajei-
taqueeri maaroni: coajica impincatsarita-
sanotanaque catsini Quirishito. Ariorica
omoncarataquea, irampatojeitaquee
maaroni catsini: inquitesati aisati
maaroni quipatsisati. Impoiji impincatsa-
rentajeitaquee, maaroni.

¹¹Ari aquemisantajeitaqueri Quirishito,
meeca timatsi icoacaajeitaqueeri Tasoren-
tsi. Tempa icoyeajeitaquee peerani,
catsini: tequerani irovetsiqueroni
quipatsi. Timatsi aisati icashiacaajeita-
queeri: irimajeitaqueero maaroni

icantaqueeri.¹²Narojeitaque jorio jivajeitatsiri noquemisantajeitaqueri Quirishito, irootaque icoantacari Tasorentsi nompincatsajeiteri, aisati noncamantajeiteri atiri: "Icameetsatasanotaque Tasorents".¹³Aisati avirojei: piquemacojeitaqueri Quirishito. Piquemaque ipocashijeitaquee yoavisacojeitaquee. Queario oni, irosati piquemisantantacari. Peerani icantajeitaquee Tasorents: "Ariorica pinquemisantaquena, quiso oajeitempi Noshire". Meeca quiso oajeitaquempi, ayojeitancacari pishanincatacari Quirishito.¹⁴Ariorica quiso oajeitaquee, ayojeitaque queario, intsoeteajero Tasorents maaroni icantaqueeri. Eiro yamataviteetsi. Tempa queario iraajeitanajee inampiqui antsipajeitanteeariri iriori. Tempa icameetsatasanotaque. Tsame aisati ancamantajeiteri maaroni atiri: "Icameetsataque Tasorents".

Ipasonquitiri Pavoro Tasorents.

¹⁵Noquemacojeitaquempi avirori, piquemisantasanojeitaqueri Avincatsarite Jesoshi, aisati pinintasanojeitaqueri piyemisantaririnte.¹⁶Irootaque nocantatariri Tasorents: "Ariove pimatacaqueri ejesosati". Nocantani nopasonquitacoven-tajeitimp, aisati nocantiri Tasorents iramitacojeitempi.¹⁷Noquenquetsatacaa-pinitiri yora iriri Avincatsarite Jesoquirishito: tempa icameetsatasanotaque. Nocantiri: "Piotacaajeiteri ejesosati, piotacaajeiteri jaoca picanta avirori.¹⁸Piotacaasanojeiteri, iriojeitanteearori jaoca noncantajeiteari, coajica: tempa ocameetsatasanotaque catsini anta inquitequi". Tempa yashijeitaquee, irootaque nocoantacari piojeite ocameetsatasanojeiti maaroni icashiacaajeitaqueri.¹⁹Oshequi catsini itasorentsitasanotaque, te ompeempají itasorenca. Itasoncaventajeitaqueri maaroni

quemisantajeitiriri. Peerani iotaacaajeita-quee itasorentsitasanotaque,²⁰tempa yoitinaajiri Quirishito. Yaanajiri anta inquitequi, aisati isavicasaajiri anta iracosanoriqui icaratajiri ipincatsariven-tantajeiti.²¹Icantaqueri: "Notomi, nocoaque pimpincatsariventajeiteri maaroni pincatsarijeivetachari, savicacantajeivetachari, jivatacaantajei-vetachari, maaroni. Pimpincatsariventajeiteri maaroni timajeitatsiri meeca, aisati pimpincatsariventajeiteri maaroni timajeitajantsineri coajicani". Ari yanaacojeitiri maaroni, ipincatsaritasanotaque catsini.²²Aisati icantaqueri: "Avirotaque cantacanterone jaocarica oncantayeteari paitapeerica, aisati pimpincatsariventajeiteri maaroni quemisantajeitimpri.²³Impincatsajeitimpri iriori. Tempa piquempetasanotaquena narori, pitasorentsitasanotaque catsini, picantani pitasoncacoventajeitaqueri maaroni quemisantajeitimpri".

Itasoncaventajeitiri Tasorents quemisantajeitiriri.

2¹Peerani, avirori, te piojeiveitarini Tasorents, pantapiniveitaroni caari cameetsatatsi, irootaque pijajejanteameri Sharincaveniqui: iro cantaincha yoavisa-cojeitaquempi Tasorents, irootaque pijajejantajeari inquitequi, paneasanajeitapaaje anta.²Piquempejeiveitarini yora itsipapee tseencantatsiri, piquemisanta-veitarini Satanashi, yora pincatsariventiriri iamaaririnte tasoncantavetachari. Iriotaque pincatsariventajeitiriri maaroni piatsajeitariri Tasorents.³Tempa peerani aquempeveitarini yora tseencantatsiri, antapiniveitaroni caari cameetsatatsi acoajeiveitaroni. Acantani, antapiniveitaroni paitapeerica acoaveitaniri, paitapeerica aquenqueshireveitaniri. Irootaque iquishimentantavetaqueerorri Tasorents, iquempetacaantaquee itsipapee atiri.

^{4,5}Peerani, antapiniveitaroni caari cameetsatatsi, ashi aironi: te ayojeiveitearini Tasorentsi, aisati ajajeiteme Sharincaveniqui. Iro cantaincha yashi yoiro icavintsaasanojeitaquee, oshequi inintasanojeitaquee. Peerani yoaneajiri itomi, icantani meeca yaneanaji. Meeca aisati yoavisacojeitaquee arori, ancantaitiyempani asaviquimojeiteri inquitequi. Tempa ineshinoncajeitaquee, irootaque yoavisacojeitantaqueeri.

⁶Icamaque Quirishito, impoiji yoitinaajiri Tasorentsi. Aisati arori aquempetevetacari, ipashinitacaquee Tasorentsi arori, aveshireimentajeitacari meeca Quirishito; aisati ayojeiti ancarajeiteri coajica anta inquitequi. ⁷Incantaitatiyempani iriotacaajeitajee, oshequi catsini ineshinoncatasanojeitaquee, icavintsaasanojeitaquee: yashi yoiro. Iro icavintsaajeitantaqueeri ashanincatacari Jesoquirishito. ⁸Piquemisantaqueri, irootaque yoavisacotantaquempi Tasorentsi: tempa oshequi ineshinoncatasanojeitaquempi. Tecatsi pincantajeitea poavisacojeitaja avisati, irintquea yoavisacotashajeitaquempi. ⁹Arosatime oavisacotajanchaneme, tempa ashemejeiteme. ¹⁰Iro cantaincha itasoncaventajeitaquee Tasorentsi ashanincajeitantaqueri Jesoquirishito, icoaque antayetero cameetsayetatsiri. Peerani, tequerani antimeni, otimini icoacaaajeitaqueeri antayeteri. Icoaque ancantaitatiyempani antapinijeitero.

Ariorica aquemisantajeitaqueri Quirishito, ari aquempetavacaajeitaja maaroni: jorio aisati pashinisatipee atiri.

¹¹Te avirojei jorio. Ipincajeitaquempi iriori, icanti: “Te iriojeiteriji pashinipee atiri Tasorentsi, te intoyeanteji”. Ijijeiveta iotiri irinti Tasorentsi.

¹²Pinquenqueshirejeitero jaoca picantajeitani peerani: te pinquemisantajeivei-

tearini Quirishito, te pishanincajeiteariji joriopee, te piojeiveitearoni icantayetiri Tasorentsi, aisati te piojeiveitearoni icashiacaajeitaqueeri. Te pioveitearini Tasorentsi, aisati te pioveiteani icoaqueuni irineshiloncajeitempi. ¹³Queario, peerani te piojeiveitearini Tasorentsi, oquempetaca pitimini arejiqui catsini. Iro cantaincha icamimentajeitaquempi Quirishito, aparajatimentajeitaquempi iriraja. Meeca piquemisantajeitaqueri, pishanincajeitacari. Irootaque piojeitantaqueri Tasorentsi, quiso poasanojeitantaqueri. ¹⁴Peerani narori, aisati maaroni nojorioririnte, noquisajeiveitimpini: narori aisati iriori maaroni pishanincapeeni, aisati piquisajeiveitanani avirori. Iro cantaincha yoavisacojeitaquee Quirishito, ipeajiro aqisavacaajeiveitani, cameetsa isavicaajeitaquee. Meeca aquempetava-
caajeitaja maaroni. ¹⁵Icamimentaquee, eiroquea apomerentsiventantarotsi isanquenareni Moishishi, tecatsi oncanta-
jeitee. Peerani onashitacaajeiveiteeni, te ashanincatavacajaiveiteani. Iro cantain-
cha meeca ashanincajeitacari Quirishito, aisati ashanincatavacajaiteitaca maaroni, aquempetavacaajeitaja, ¹⁶acatsimareava-
caajeitaja maaroni. Iro acatsimareavacan-
tajeitajari, ashanincajeitajari yora pajacotimentajeitaqueeri coroshipui.
Meeca eiro atsipetashitarotsi anquemi-
santero isanquenareni Moishishi avavisa-
cotantajeari. Meeca aneacameetsajeitiri Tasorentsi maaroni: noshaninca aisati pishaninca.

¹⁷Narojeitaque jorio: niojeivetaca jaoca icantari Tasorentsi, niojeivetaro irineane, iro cantaincha te nonquemisantajeiteriji. Avirojei, avinti, te piojeiveitearini catsini, oquempetaca pitimini avirori arejiqui. Iro cantaincha ipocaque Quirishito, icaman-
tajeitaquee maaroni jaoca acantajari ashanincatavacantajeitajari, aquempeta-
vacantajeitajari. ¹⁸Oshequi imataqueeneri

Quirishito, irootaque amajeitancarori aquenquetsatacaaajeitiri Tasorentsi. Aisati Ishire Tasorentsi oamejeitaquee aquenquetsatacaaajeitiri.¹⁹Peerani te pioveitearini Tasorentsi, te pishanincaveitearini. Iro cantaincha meeca, pinashijetaca; piquempejeitacari itsipapee quemisantatsiri, piojeitaqueri Tasorentsi, pishanincajeitacari.²⁰⁻²²Meeca noshiacantempiro. Ariorica avetsiquero avanco, tempa ajivataque amenero cameetsari quipatsi, impoiji amenero otincamipee cameetsatatsiri, quisotsiri. Impoiji atancotashitaquero maaroni inchaquipee, ashiticaquero oshipee, maaroni. Ariorica antsonquero pancotsi, asavique. Aisati aquempejeitacaro, ariorica aquemisantaque. Ijivataque yora itiancanepee Tasorentsi aisati yora camantantatsiniri icamantajeitaquee jaoca icantari Jesoquirishito: icameetsataque, imataquero yoavisacojeitaquee. Tempa iriotaque meeca Avincatsarite. Impoiji ashequiajeitaque maaroni quemisantatsiri, aisati otasoncaventajetaquee Ishire Tasorentsi aquempetavacaajeitajari: tempa ashanincajeitacari Quirishito, maaroni. Meeca yashijeitaquee Tasorentsi, quiso yojeitaquee.

Yantayetiri Pavoro.

3 ¹Te avirojei jorio, iro cantaincha nonintajeitaquempi. Nocavintsaajeitaquempi, nocamantaquempi: “Ariorica pinquemisantajeiteri Jesoquirishito, ari iroavisacojeitempi”, irootaque yoimagineanteetaquenari caravosoqui.²Tempa ineshinoncataquena Tasorentsi, irootaque nomatantarori noquenquetsatacaajetimpis.³Iotacaquena caari iojeitini itsipapee, tampatica yoametaquena. Aitaque nosanquenajeitaquempiro, novaajimpiro icamantauenari.⁴Ariorica pineanatero oca nosanquenataquempiro, piojeitavaquero oca niotacotaqueri

Quirishito, caari ioyeetini peerani.⁵Te irioveitearoni yora peeraniniri, iro cantaincha Ishire Tasorentsi iotacaajeitaquena: narojeitaque itiancanepee Quirishito aisati quenquetsatacojetiriri.⁶Te avirojei jorio, iro cantaincha iotacaajequa: ariorica pinquemisantajeite, pavisacojeitaque. Pimoncarajeitacari noshanincaphee narori: ainiro cameetsayetatsiri icashiacaajeitaqueeri Tasorentsi. Aisati ashanincatavacaajeitaca: noshaninca aisati pishaninca avirori. Ariorica piquemisantaqueri Quirishito, irimoncarajeitaquempiro maaroni icantajeitaquenari narori.⁷Irootaque oca noquenquetsatacotapinitaqueri. Ineshinoncataquena Tasorentsi, aisati itasoncaventajetaquee, nomatantarori noquenquetsati.

⁸Pamene, noquemisantaveta; iro cantaincha te nonquempeteariji itsipapee quemisantatsiri: tecatsi nomataque narori. Iro cantaincha ineshinoncataquena Tasorentsi, itiancaquena nocaman-tajeitaqueri itsipapee atiri jaoca icantari Quirishito icavintsaasanojeitaquee catsini. Te ayotacotashiteariji, irointi oamejeitaquee Ishire.⁹Aisati itiancaquena nocaman-tajeitaquempi icoaque iroavisacojeitempi avirori, aisati maaroni itsipapee atiri. Aitaque peerani catsini icoaque iroavisacojeitempi, iro cantaincha te irioyeeteni peerani iroavisacojeitempi, iroquera iotacaajeitaquee. Iriotaque vetcijkeitiriri maaroni timajeitatsiri.¹⁰Meeca icoaque iriotacaajeiteri maaroni yora inquitequiniri: yora cantacaantayetatsiri aisati yora pincatsariyetatsiri. Iriojeitanaque inquitequiniri oshequi itasoncaventajetaqueri Tasorentsi quemisantajeitiriri, impoiji iriojeitanaque ainiro iotantari catsini Tasorentsi, yashi yoiro ioti catsini.¹¹Aitaque icoitacani peerani iriojeite maaroni inquitequiniri. Ainiro imayetaqueeneri

Avincatsarite Jesoquirishito, iotantacari yora inquitequiniri oshequi ioti Tasorentsi catsini. Irootaque icoacaquaqueriri.
¹²Aquemisantaqueri Quirishito, irootaque ayotantacari ocameetsataque anquenquettsatacayeri Tasorentsi, inquemisantava-quee. Eiro atsaroacaaritsi. ¹³Piojeitaque noamejeitaquempi, irootaque oshequi yoashinoncanteetaquenari, iro cantaincha eiro poashiretacojeitanatsi, irointi pinquimoshirejeite.

**Yora Pavoro icantiri Tasorentsi:
 “Pamitacojeiteri ejesosati”.**

¹⁴Oshequi ioti Tasorentsi, oshequi imataqueeneri, irootaque nopincatsatantacari, aisati noquenquetsatacapinitantacariri.
¹⁵Irootaque ashijeitaqueeri, maaroni quemisantajeitaqueriri. Asavicejiti arori aca quipatsiquica, ainiro isavivu pashimi inquitequi, iro cantaincha ashanincajeita-cri. ¹⁶Icameetsatasanotaque catsini Apa, itasorentsitasanotaque catsini, irootaque nocantantacariri incantero Ishire ontasonca-ventempi, impoiji ontimasanotanaque piotanteari. ¹⁷Nocantaqueri inquemisanta-kaasanojeitempi, pishiretapinitanteariri Quirishito. Aisati, nocoaque pishirejeita-quearo jaoca icanta Tasorentsi inintasanojeitaquempi, pinquemisantasanojeitaqueriri.
¹⁸Ariorica pishiretasanotaqueari, pinquem-peteari itsipapee quemisantsatsiri, piotasano-jeite oshequi catsini inintasanojeitaquee Quirishito, te capichaji. Yashi yoiro inintasa-nojeitaquee, icantani. ¹⁹Nocoaque piojeite inintasanojeitaquee, iro cantaincha te ayojeiteji paita inintantajeiteeri. Ariorica piojeitaque inintasanojeitaquee, nocoaque aisati pishiretasanojeiteari Tasorentsi aisati nocoaque irimatacasanojeitempiro catsini maaroni icoacaajaquempi.

Tsame ampincatsajeiteri Tasorentsi.

²⁰Ari itasoncaventasanojeitaquee Tasorentsi, oshequi intacojeitaquee,

yoanaaqueero maaroni acoacojeitaque-ri. Tecatsi ancantea antsoteajeitero anquenqueshirejeitero maaroni imajeita-queeneri. ²¹Tsame maaroni quemisanta-jeitiriri Jesoquirishito ampincatsajeiteri Tasorentsi; tsame anciamantapinijeiteri atiripee icameetsatasanoti, ancantaitati-yempani. Aitaque ancantajeiteari.

Tsame anquempetavacaajeitea, maaroni.

4 ¹Noquemisantaqueri Avincatsarite, irootaque yoiminqueanteetaquenari aca caravosoquica. Meeca noncantajei-tempi: cameetsa pisavicejite; icoyeajei-taquempi Avincatsarite, meeca pimajeite-neri maaroni icoacaajaquempi. ²Eiro pischemejeititsi, pincavintsantajeite, eiro pischemejitaritsi pishaninca, irointi pinintajeiteri, eiro piquishiritsi. ³Pincan-tajeitero Ishire Tasorentsi oamejeitempi pinquempetavacaajeitanteari, cameetsa paacameetsatasavacaajeitanteari. ⁴Maaroni quemisantsirsiri ashanincatavacaajeitaca, aisati ainiro Ishire Tasorentsi apaniro, ora quiso oajeitaqueeri. Amoncaratavacaajei-taca: icoyeajeitaquee Tasorentsi, ayojeita-que irimajeitaqueenero maaroni icantajeitaqueeri, irootaque aveshirei-mentasanotantacariri. ⁵Icarataque Avincatsarite apincatsajeitaqueri apaniro, amoncaratavacaajeitaca aquemisantajei-taqueri arori, aisati amoncaratavacaajei-taca avaotisatimentajeitacari. ⁶Itimi aparo Tasorentsi: yora Apasanori arori. Ipincatsariventajeitaquee maaroni arori, itasoncaventajeitaquee, quiso yoajeita-quee maaroni.

**Onashiyetaca imatacaajeitaqueeri
 Quirishito.**

⁷Ineshinoncaajeitaquee Quirishito, iro cantaincha onashiyetaca imatacaajeita-queeri. ⁸Ora irineane Tasorentsi oquenquetsatacotitarini, ocantitani: “Irovancanajearica Quirishito coajica

inquitequi, iranaacojeiteri maaroni camaari quisajeivetacariri; irinti atiripee, irimatacaajeiteri paitapeerica".⁹ Paita ocantantari: "Irovancanajea"? Aitaque iponeanacari peerani inquitequi jenoqui, irosati isavanticapaaacari aca quipatsiquica. Impoiji yovancanaja aisati.¹⁰ Yora aniireatsiri aca quipatsiquica yovanca-naja aisati anta inquitequi jenoqui. Anta ipincatsariventajeitaquee aisati itason-ventajeitaquee maaroni, catsini.

¹¹ Imatacaasanojeitaqueri quemisanta-jeitatsiri yantajeitaquero paitarica icoacaajeitaqueri: itiancanepee, camantantatsiri, quenquetsatacantatsiri, jivatacaantatsiri, oametantsiri, maaroni.¹² Ari imatacaajeitaquee arori, aisati iriori maaroni quemisantajeitiriri, irootaque amajeitantarori antaveetiniri. Aisati imatacaajeitaquee aquemisantaca-sanojeitaqueri maaroni quemisantajeive-tariri Quirishito.¹³ Ari incanteani irimata-caajeitee, irosati amoncaratavacanteari anquemisantasanojeite, aisati ayotasano-jeitanteearirri iriori. Icoaque ayotasanojei-teri anquempetasanojeitanteearirri iriori.

¹⁴ Peerani aquempeveitarini jananequi, te amatasanojeiveiteearoni antajeivetaniri. Aquemisantashijeivetacarini amatavijieitaqueerini, te ayoveiteani. Iro cantaincha te incoyeji Tasorentsi anquempetajeari jananequi, irointi icoaque anquempeteari antearipee, icoaque ontimasanote ayojeitanteeari.¹⁵ Icoasanotaque ancavintsaasanojeiteri itsipapee, cameetsa ancamantajeiteri irineane: tempa queariotasanotaque. Icoaque aiquero ajatatiye anquempetasanojeitanaqueeari Quirishito: yora Avincatsarite.¹⁶ Aquemi-santajeitaqueri, irootaque ashancatava-caajeitancari; aisati yoamejeitaquee amitacotavacaajeitancari, aisati yoamejeitaquee amajeitancanariri maaroni icoacaajeitaqueeri. Aisati yoamejeitaquee anintavacaajeitancari.

Icantiri: "Eiro piquempetajatsi peerani".

¹⁷ Meeca novaajempiro icantaqueri Avincatsarite, noncamantempiro icoaca-queimpiri. Te incoacayempiji pinquem-petajeari caari quemisantatsi: yatsipetashi-jeita iriori yaamaashiyetacaro paitapee-rica, te inquenqueshireempaji.¹⁸ Te iriojeiteriji Tasorentsi, oquempetaca te ontameji ishire. Te irinintajeiteji inquenqueshireteri, te incoajeiteji iritoteri, irootaque caari irimatantearo Tasorentsi iroaneasanojeiteri irisaviquimojeitante-rriri anta inampiqui.¹⁹ Yantapinitashita-caro caari cameetsatsi, iro cantaincha te impashiventajeiteaji. Imayempitapinijeiti, itsinampavacaajeita, maaroni.²⁰ Yora Quirishito, te iroamejeitempiji pinquem-peteari yora tseencantatsiri.²¹ Tempa piquemacotaqueri Jesoshi, queario noamejeitaquempi jaoca icantari.²² Ari meeca eiro piquempetajatsi peerani. Pashi poironi te pincameetsateni. Pininta-sanotironi pantayetironi caari cameetsa-tatsi, irootaque pamatavitantajari avisati.²³ Eiro piquenqueshiretajirotsi piquenque-shireveitaniri peerani, irointi pinquen-queshiretajero cameetsatatsiri.²⁴ Pimpa-shinijeitanaque: eiro pantashitajarotsi caari cameetsatatsi, irinti pinquempejei-taja Tasorentsi, tempa icameetsatasano-taque.

Icamantajeitiri Pavoro irantayeteri.

²⁵ Meeca eiro pamatavitantajitsi aisati, irointi tampatica pineanateri pishaninca. Pamene: ariorica ashanincatacari Quirishito, ashanincatavacaajeitaca, maaroni.²⁶ Ariorica pinquisashireaquea, eiro pantasanotiroti caari cameetsatatsi. Aisati, ariorica pinquisashireaquea, pishintsite pincatsimareajea aisati,²⁷ oncanteataquea eiro catsini imatima-tantimpitsi camaari irantacayempiro caari cameetsatatsi.²⁸ Ariorica picoshivei-

tani, eiro papiitajirotsi pincoshitaje, irointi pintsameete. Pantaveetanontea avisati, aisati pincavintsayeri ashinoncaincari.

²⁹Eiro pineanatantarotsi caari cameetsatatsi, irointi pineanatantearo cameetsayetatsiri. Cameetsa poametavacayea, piveshireacayeari pishaninca. ³⁰Terica pisavique cameetsa, oashiretnaca Ishire Tasorents. Eiro poashiretaaarotsi: tempa irootaque quempoyeajeitaquempi. Oncanteani onquempoyeajeitaquempi irosati pijatanteari inuitequi. Anta inuitequi paviscacotasanotapaaaje catsini. ³¹Meeca eiro piquisatsi, eiro pitsimaajencatatsi, eiro picatsimatanitsi, eiro piquisatsatantitsi, eiro picantimatanitsi. Eiro catsini piquishiritsi itsipapee, ³²irointi pincavintsaajeiteri, pineshinoncajeiteri. Piquemisantaqueri Quirishito, meeca te inquisimentemtempiroji Tasorents pantayetaqueri, irointi icavintsaajeitaquempi: aisati pinquempejeiteri pishaninca iriori, eiro piquishimentiritsi yantayetaqueri, irointi pincavintsayeri.

5 ¹Tempa avirojeitaque itomipee ²Tasorents inintasanotiri: ari meeca pinquempejeiteari. ²Inintajeitaquempi Quirishito, irisati shinetainchia ipajacyeetiri, icamimentajeitaquempi. Ineacameetsatasanotaquero Tasorents oca imataqueri itomi. Oquempetaca inintajeitaquempi Quirishito, aisati pinquempeteri pishaninca, pinintasanojeiteri.

³Eiro pantirotsi caari pai, eiro pitsinam-pantitsi catsini, eiro pinevetarotsi yashijeitari itsipapee: quemisantatsiri te irantapiniteroji oca. ⁴Eiro picantatsatacotirotsi tsinane, eiro pincantatsatacotiritsi shirampari. Ocameetsati pimpashiventacayearo maaroni caari cameetsatatsi. Te oncameetsateji pishineventearo, eiro pishirontimentarotsi. Irointi ocameetsataque ampasonquieri Tasorents: tempa

icavintsaasanojeitaquee. ⁵Jero oca noncamantemperi, piotasanotavaquero: eiro ijatitsi inuitequi yora antapinitirori caari yai, aisati eiro ijatitsi tsinampaantatsiri, aisati nevetitayetariri iroaararo itsipapee. Yora nintasanotirori irashitaa-rantea iquempetacantaaquero irooric Tasorents inintantarori. Pinequero, eiro ijatitsi irinti anta ipincatsarijeitinta Quirishito aisati Tasorents. ⁶Ainiro coavetachari iramatavitempi: oshequi irineanatashivetempi, vero, vero. Incamantashijeittempi ocameetsati pimajeitero oca caari cameetsatatsi, iro cantaincha eiro piquemisantiritsi. Iroasanquejeitaqueri Tasorents maaroni caari quemisantiri. ⁷Eiro catsini piquem-petaritsi.

Icantiri: “Pintimajeite quitaiteriqui”.

⁸Peerani oquempetani pitimini tsiteniriqui: pantapinitironi caari cameetsatatsi. Iro cantaincha yoameetsataquempi Quirishito, oquempetaca itimacaajimpi quitaiteriqui. Meeca cameetsa pisavijke, onquempetanteari pintime quitaiteriqui. ⁹Ariorica antime quitaiteriqui, ancavintsante, antime cameetsa, tampatica aneanate. ¹⁰Piojeitero icoacaquem-piri Avincatsarite, impoiji pimamatero. ¹¹Eiro pantirotsi yantayetiri timajeitatsiri tsiteniriqui, irointi piotacajeiteri te oncameetsateji oca yantajeitaqueri. ¹²Nopashiventacaacaro noquenquetasatacotiyo yantajeitiri, ora imanavetacari. ¹³Ariorica piotacayeri te oncameetsateji yantajeitiri, onconijataque maaroni yantajeitaqueri. Impoiji irotanaque te incameetsateji. Impoiji ariorica incoaque incameetsatanaque, onquempetaje irisavijke iriori quitaiteriqui. ¹⁴Tempa icanteeti: “Ariorica pimaaque, pintinaanaje. Ariorica picamaque, pintinaanaje aisati. Irotacaasano-tempi Quirishito, irisavacayempi quitaiteri-quii”.

¹⁵Pinquenqueshiretasanotero paitapee-rica pantayeteri: eiro piquempetaritsi

caari iotatsi, irointiquea ocameetsati ontimasanote piotanteari.¹⁶ Ariorica ompomerentsitimojeiteMPI, iro cantaincha pinquearioventero pantero cameetsa-yetatsiri.¹⁷ Eiro pantashiyetarotsi paitapeerica, irointi pijivate pinquenque-shiretasanotea. Piojeitero paitapeerica icoacaquempi Avincatsarite: impoiji pimamajeitero irointi.¹⁸ Eiro pishinquita-tsi, te oncameetsateji catsini: irointi pinquemisantsasanoteri Ishire Tasorentsi oamejeitantempiri.¹⁹ Oshequi pincantapi-niteri pishaninca: "Tempa icameetsataque Avincatsarite", aisati pimpampoyeaventa-pinjeiteri Tasorentsi, piveshireimenteari.²⁰ Pipincatsataqueri Avincatsarite Jeso quirishito, irootaque itasoncacoventanta-quempi Apa Tasorentsi. Meeca pimpasonquitapiniteri.²¹ Ariorica pipincatsatiri Quirishito, pimpincatsata-vacaajeitea, paacameetsatavacaajeitea.

**Ocameetsati incavintsaasanoter
shirampari ijina, aisati ocameetsati
ompincatsateri tsinane ojime.**

²²Tsinane, ¿pipincatsatirimpa Avinca-tsarite? Ari, aisati pinquempeteri pijime, pimpincatsateri iringi. ²³Iquempetaca Quirishito ipincatsariventajeitiri quemisantajeitiriri, aisati inquempetea shirampari, impincatsariventero ijina. Tempa oshequi icavintsaajeitaquee Quirishito, irootaque yoavisacojeitante-jeeri.²⁴ Oquempetaca aquemisantajeita-queri Quirishito, ocameetsati tsinane onquemisantapiniteri ojime.²⁵ Iquempeta-aca Quirishito inintasanojeitaquee, irosati icamimentantajeiteeri, avirojei shirampari, cameetsa pinintasanoteri pijina.

²⁶Pinequero, inintajeitaquee Quirishito, icamimentantajeitee, irootaque yoameetsatantajeiteeri. Ariorica anquemisantajeitero irineane Tasorentsi aisati avaotisajeitea, iroamee-

tsatasanojeitee Quirishito anquearioven-tajeteneri maaroni icoacaajeitaqueeri.²⁷ Icoaque irineacameetsajeitee arori, aisati iringi maaroni itsipapee quemisan-tatsiri; eiro otimimojeiteetsi caari cameetsatatsi. Icoaque ancameetsatasano-tanaque, eiro catsini otimi antane. Pinequero, oshequi inintajeitaquee.²⁸ Aisati, shirampari, pinintasanojeitero pijina. Oquempetaca picavintsaaja avisati, pincavintsayero pijina. Yora cavintsaorij ijinai, icavintsaaja irisati.²⁹ Te amatapiniteaji anquisajea arosati, irointi acavintsaaja arosati, aneshinonca-taja arosati. Aisati, iquempetaquee Quirishito arori, ariorica aquemisantajeiti-tiri,³⁰ icavintsaajeitaquee; tempa ishanin-cajeitaquee, quiso yoajeitaquee.³¹ Ocanti Sanquenarentsi: "Ariorica iraque shirampari ijina, irojocanaqueri iriri, aisati iriniro, quiso iroanaquero ijina. Yora shirampari aisati ijina ishiaquero apaniro ivatsa iringi: quiso iroavacayea, te oncameetsateji irojocavacayea".

³²Opomerentsivetaca anquemero oca, iro cantaincha oshiaqueri Quirishito aisati maaroni quemisantajeitiriri, apaniro anajeitaque: iotaca ashanincatavacaajei-taca, aquempeavacaajeitaca.³³ Ari nampiitajempiro: iquempetaca icavintsaaja irisati shirampari, ocameetsati incavintsaasanoteri ijina, incanteani. Aisati ocameetsati ompinca-tsateri tsinane ojime.

**Jaoca ancanteriri atomipee
aisati ashijeiteeri.**

6 ¹Jananequi, ariorica piquemisanta-queri Avincatsarite, icoacaquempi pinquemisantajeiteri aisati ashijeitimpri.^{2,3} Otimini peerani oshequi icantapinive-tacariniri Tasorentsi peeraniniri, iro cantaincha te incantapiniteri: "Ariorica pinquemisantena, ario peerani pintimeni quipatsiqui". Impoijiquea icantirin:

“Ariorica pimpincatsateri piri, aisati pimpincatsatero piniro, cameetsa nosavicacayempi; peerani pintimeni avinti quipatsiqui, eirotsita picamitatsi”.⁴ Shirampari, eiro pishemaritsi pitomipee, iquisacari; irointi poamejeiteri icantayetiri Avincatsarite, aisati poamejeiteri impincatsateri.

Jaoca incanteriri ivatorote aisati iratirite.

⁵ Intimerica amanantimpire, pinquemisanteri, pimpincatsateri. Oquempetaca pantiniri Quirishito maaroni icoacaquaquempi, panteneri amanantimpire maaroni icoacaquaquempi iriori. ⁶Eiro pamatavitiritsi. Eiroric yamenimpitsi, pincanteani pantaveeteneri: tempa aisati pantaveetiniri Quirishito. Pincoasanotaque panteneri Tasorentsi maaroni icoacaquaquempi. ⁷Te irio pantaveetasnotene atiri, irintquea pantaveetini Avincatsarite. ⁸Piojeite ariorica pantapinitero cameetsatatsiri, impinatempi. Impinateri pimantaari, caari pimantacha, maaroni. ⁹Aisati amanantiriri atiri: pincavintsaajeiteri pamanantanepee, tempa nocantaqueri inquemisantempi. Eiro piquisapinitiritsi. Eiro pipeacojeitarotsi: avirojeitaque ipincatsariventajeitiri Quirishito, aisati ipincatsariventajeitiri pamanantane: pimoncaratavacaajeitaca.

Quemisantatsiri ishiaqueri soraro.

¹⁰ Apanivaniji noncamantempi: pincanteri Avincatsarite impincatsariventajeittempi, aisati intasoncacoventajeittempi. ¹¹Iquempetaca yaventapinitaro soraro ashirrotatsiri iitsaare eiro imatantaritsioyerinemeri, paventajeiteari Tasorentsi eiro imatantimpitsi camaari, yoraamatavijeitimpinemer. ¹²Te irio ampiatea atiri aneayetiri, irinti apiataca caari conijayetatsi: yora pincatsariventiriri camaari, jivajeitiriri camaari, pincatsariventiriri maaroni tseencanta-

tsiri, antirori caari cameetsatatsi, maaroni camaari catsini. Iquisajeitaquee iriori. ¹³Oquempetaca yaventayetaro soraro ashiroyetatsiri, paventeari avirori Tasorentsi poimpianteariri camaari. Iroashinoncayempime, iro cantaincha eiro imatasanotimpitsi, panaacotajeri. Pintsoyeyeteneri Tasorentsi maaroni icoacaajeitaquempi; eiro pojoquirosi piquemisanti. ¹⁴Pinquemisantsasanotanaque, pinquenqueshirejeitero queariotasanotatsiri eiro yoashinoncantimpitsi camaari: oquempevetaca yaventaro soraro ishiticatsaquiero eiro imatantari yora quisavetariri. Pincameetsasasanotanaque eiroquea imatantimpitsi camaari: pinquempetanteariri soraro, yaventaro ipashicanejitali. ¹⁵Oquempetaca soraro isapatotanaca cameetsa iquenayetantari, ari pivetsicaquea pinquenayetanaque, pincamanteri atiri jaoca incanteari iravisacotantajeari. ¹⁶Aisati ainiro soraro yojocaari, yojocantarori parashetatsiri chacopi caari iquentanteetari. Aisati avirori, pinquemisanteri Tasorentsi, eiroquea imatantimpitsi camaari irantacayempi caari cameetsatatsi. ¹⁷Aisati, oquempetaca soraro ipashicaina-tacaro ashiryo yavisacotantari, paventeari avirori Tasorentsi pavisacotantajeari: impojii eiro imatimpitsi camaari. Ainiroaisati ivesamento soraro imatantariri iisane: oshiaquero irineane Tasorentsi oamejeitaquee Ishire amatanteariri camaari.

¹⁸Pinquenquetsatacapiniteri Tasorentsi. Paitapeerica oncoacayempi Ishire, pincanteri. Pincamanteri coiteimotaquempi. Eiro piperaventarotsi pinquenquetsatacayeri: pincantapiniteri: “Pincavintsaajeiteri noyemisantariintre”. ¹⁹Aisati pincanteri iramitacotena narori, eiro nopashiventanta nonquenquetsatacaajeiteri atiri. Noncamantajeiteri caari iojeiveitani: iroavisacojeiteri Tasorentsi maaroni quemisantajeiterineri.

²⁰Nocamantapinitaqueri atiri, irootaque yoimqueanteetaquenari aca caravosoquica. Pincanteri iramitacotena cameetsa noncamantapiniteri atiri, eiro nomanirotsi. Tempa irootaque icoacaquaenari Tasorentsi.

²¹Ariorica irareetea Tiquico, incamantapaakuempi jaocarica nocantacari, aisati incamantempi paitarica nantayetaqueri. Iriotaque ayemisantaririnte nonintasanotiri, iquearioventiniri Avincatsarite maaroni icoacaquaqueriri. ²²Irootaque notiancantacariri, nocoaque piojeite jaocarica nocanta-

cari. Aisati nocoaque iriveshireacaajeitempi. ²³Meeca, noyemisantaririnte, nocoaque cameetsa irisavicacayempi Apa Tasorentsi, nocoaque iroamejeitempi pinquemisantasanojeite aisati pinintasanojeiteri pishaninca. Aisati nocoaque inquempetacayempi irlori Avincatsarite Jesoquirishito. ²⁴Ariorica pincanteani pinintasano-teri Jesoquirishito, nocoaque irineshinoncajeitempi Tasorentsi, maaroni.

Narotaque sanquenajeitimpiori:
Pavoro

YORA PAVORO ISANQUENATINIRI JIRIPOSHISATI

Yovetsajeitari Pavoro jiriposhisati.

1 ¹¿Savicajeitatsimpi jiriposhisati? ²¿Tecatsimpa oajeitempina? Narotaque Pavoro sanquenajeitaquempirori, nocarataqueriaca iriori Timoteo. Narotaque antaveetiniriri Jesoquirishito icoacaaquenari. Nosanquenajeitimpido maaroni noyemisantarinire: quenquetsatacantajeitatsiri aisati amitacojeitiriri quemisantatsiri, maaroni. ³Nocoaque irinehanoncajeitempi Tasorentsi, aisati cameetsa irisavicaaajeitempi. Aisati nocoaque inquempetacaajeitempi Avincatsarite Jesoquirishito.

Ipasonquitiri Pavoro Tasorentsi.

³Ariorica noquenqueshirejeitaquempi, nopasonquitapinitiri Tasorentsi. Avirojeitque nopasonquitimentiri. ⁴Aitaque nocantani noquenquetsatacapinitiri Tasorentsi, nocantapinitiri: “Pincavintsaajiteri jiriposhisati”, aisati noveshireimentajeitaquempi. ⁵Picantani pamitacotapinijeitaquena avaraquiero irineane Tasorentsi, acamantajeitiri atiri jaoca icantajari yavisacotantajari. Irootaque nopasonquitimentantimpri. ⁶Ocameetsataque oca pantapinijeitaqueri, tempa irio Tasorentsi antacaaquempirori. Niotaque incantatiyempani, irimatacaapinitempiro, irosati impocantajeari Jesoquirishito. Ariorica impocapaaje iriori, ari moncaratapaaca maaroni pantajeitaqueri. ⁷Tempa ocameetsataque noneacameetsajeitaquempi,

aitaque oshequi nonintasanojeitaquempi. Ariorica nonapiniti caravosoqui, noquenquetatacotori Jesoquirishito, aisati ariorica yoisoquijana, aisati noquenquetsatacotori. Nocamantapinitiri yora pincatsaripee paita noquenquetsatacotantariri Jesoquirishito; aisati nocamantiri oqueariotasanotaque irineane Tasorentsi. Iro cantaincha picantani avirori picavintaasaanojeitaquena, aisati ineshinoncajeitaquee Tasorentsi. ⁸Iotaque iriori oshequi nocoiteajeitaquempi. Oshequi inintasanojeitaquee Jesoquirishito, aisati noquempetaca narori, oshequi nonintasanojeitaquempi. ⁹Aisati nocantiri Tasorentsi iramatacojeitempi, nocoaque aiquero pijatatiye pinitasanojeiteri itsipapee. Aisati nocantiri iroamejeitempi iriori piotasanojetanteariri, aisati ontimimojeitatempiri piotanteari: aiquero pijajeitatiye. ¹⁰Nocoaque piojeite pantero cameetsatsatsiri, eiroquea pantirotsi caari cameetsatsatsi. Nocoaque pincameetsatasanojeitanaque, eiro otimitsi pantane; pincantatatiyempani, irosati impocantajeari Jesoquirishito. ¹¹Tempa yoameetsatasanojeitimpi, meeca nocoaque cameetsa pisavicajeite, iramatacojeitempi iriori. Impoiji maaroni atiri impincatsajeiteri Tasorentsi, incantajeite: “Tempa icameetsatasanoti Tasorentsi”.

Itimi Pavoro caravosoqui, iro cantaincha ovaraanaca irineane Tasorentsi.

^{12,13}Noncamantempi, noyemisantarinire: yoiminqueetaquena, iro cantainchate nantsipetashitearoji nosaviqui aca

caravosoqui. Nocantani nocamantajeitiri atiripee jaoca incanteari iravisacojeitajeari. Iquemajeitaquena maaroni soraropee: yora shentajeitirori ivanco pincatsari. Aisati pashinipee atiri, iquemajeitaquena. Iajeiti tecatsi nante, irointi yoiminqueashiyeetaquena; apatiro noquenquetsatacotiri Quirishito. Eirome notimime aca, eirome ijeitajime jaoca incanteari iravisacotantajeari.¹⁴ Ineapaaquena ayemisantairinte jaoca nocantari aca, irootaque iveshireimentajeitantzacarri Avincatsarite. Meeca te intsaroajeiteji, irointi icoasanojeitanaque incamantajeiteri maaroni atiri irineane Tasorentsi.

¹⁵Ainiro oshequi quenquetsatacotiriri Quirishito. Inequena aparopee oshequi noquemisantacaajeitiri atiripee, irootaque iquisaneentantaquenari, aisati ipiatsatantaquenari; icoaque iranaacojeitenia impincatsarite. Iro cantaincha ainiro pashini cavintsaasanotaquenari,

¹⁶oshequi inintajeitaquena irinti.

Iojeitaque iriori notimi aca caravosoqui noncamantajeitantzeariri pincatsaripee paita noquenquetsatacotantariri Jesoquirishito, noncamanteri jaoca incanteari iravisacotantajeari.¹⁷ Yora quisakenari, te incoacyeriji atiri inquemisantajeitena, irintiquea coantsi iranaacotena inquemisantacaajeiteri atiripee. Te irantaveetasanteneri Quirishito, irointi icoaveta iroashinoncayename aca caravosoqui.

¹⁸Ari, oncateata inquishenata. Aparopee iquisaneentantaquena, yora pashini icavintsaakena, iro cantaincha iquenquetsatacojeitaqueri Quirishito, irootaque noquimoshiretantzacari narori. Noncanteani nonquimoshiretasanotanaque.¹⁹ Niotaque ariorica inquenquetsate, ari cameetsa nontime narori. Tempa picantaqueri Tasorentsi, irootaque yamitacotantaquenari, aisati amitacotaquena Ishire Jesoquirishito.

²⁰Te noncoyeji nompashiventea, irointi nocoasanoque narori cameetsa nonquemisantasanoteri Quirishito; nocoaque nonquempetajea peerani, te nontsaroyeji. Arioricampa iroyeetaquena meeca, irompa eirorica yoyeetanatsi, iro cantaincha paitapeerica nanteneriri, nocoasanoque incantajeite atiri: "Tempa icameetsatasanoti Quirishito".²¹ Eirotsitarica yoyeetanatsi meeca, irosati noncanteani nonquemisantasanoteri Quirishito. Ariorica noncamaque, ocameetsatasanotaque aisati: tempa noneasanoteri anta inquitequi; irootaque nocoasanotaqueri.²² Eirotsitarica nocami, ari noncanteani nomateneri Avincatsarite paitapeerica icoacaquenari. Tempa ocameetsataque. Aisati, ariorica noncamaque, ocameetsataque. Te nioteji paitarica nocoasanotaqueri.²³ Nocoasanovetacaro apite. Nocoaque noncame, nojatashitantzeariri Quirishito, quiso noanteariri. Tempa ocameetsatasanotaque.²⁴ Iro cantaincha aisati ocameetsatasanotaque noncanteani nanee, namitacojeitantzempiri avirori.²⁵ Naamaaca meeca eirotsita yoyeetanatsi, eirotsitarica nojatitsi inquitequi. Nosaviquimojeitempi namitacojeitempi pinquemisantasanajeite, aisati piveshireimentajeiteari yora piquemisantaqueri.²⁶ Ariorica nojatashijitejempis aisati, piveshireimentavajena, aisati piojeitanaque icameetsatasanotaque Jesoquirishito.

Icantiri: "Cameetsa pisavicajeite".

²⁷Jero oca pinquenqueshiretasanoteri: piquemisantaqueri Quirishito paviscotantajari, meeca icoaque cameetsa pisavicajeite, pantapinijeitero maaroni icoacaquemperi. Ariorica nojatashijitempi nocoaque noneajeitapeempi piquearioventajeitaquero piquemisantajeiti maaroni. Eiroricampa nojatashijetimpitsi, iro cantaincha nocoaque nonquemacojeitempi pincaratavacaajei-

tea, pimpomerentsiventearo pincamanta-jeiteri atiri: "Ariorica pinquemisanteri Quirishito, iroavisacotempi".²⁸Eiro pitsaroacaajeitaritsi yora quisajeitempnie: impoiji inquenqueshirejeitanaquea: "¿Paita caari itsaroacantana?" Iriojeite iriori irijajeite Sharincaveniqui, irojeite aisati yoavisacojeitaquempi Tasorents. ²⁹Icavintsaajeitaquempi Tasorents, inintacaajeitaquempi pinquemisantajeiteri Quirishito. Iro cantaincha aisati inintacaajeitaquempi pineacatsitimentajeiteari.³⁰Aitaque amoncaratavacaajeitaca apomerentsiventajeitini. Peerani pineajeitaquena nopolomerentsiventini. Meeca aisati piquemacojeitaquena, oshequi nopolomerentsiventini.

**Eiro picavintsaatsi avisati, irointi
pincavintsaajeiteri itsipapee.**

2 ¹Tempa ocameetsati piveshireimentreiteari Quirishito. Inintajeitaquempi, irootaque ocameetsatantari piveshireimenteari. Tempa quiso oajeitaquempi Ishire Tasorents. Tempa piojeiti picavintsanti. Tempa piojeiti pineshinoncatanti. ²Ari meeca nocoaque cameetsa pisavicajeite, paacameetsatava-aaajeitea, pinintavacaajeitea. Cameetsa omoncaratavacaajeitea paitapeerica pincoajeiteri aisati paitapeerica pinquenqueshirejeiteri. Ariorica pantajeitero oca, ari nonquimoshiretanaque. ³Paitapeerica pantajeiteri, eiro piquisavacaajeitasi, eiro pishemejeititsi. Eiro pijijeititsi picameetsatasanoti, eiro pijijeititsi panaacojeitaqueri itsipapee, irointi pinquenqueshirejeite: "Icameetsatasanojeiti itsipapee, yanaacojeitaquena icameetsati". ⁴Ocameetsaveta pincavintsayea avisati, iro cantaincha ocameetsatasanoti aisati pincavintsaajeiteri itsipapee.

⁵Pinquempejeiteari Jesoquirishito: te incavintsayeaaji irisati, irointi icavintsa-

jeitaquee arori. ⁶Irivotetaca Tasorentsisanori inaveta, iro cantaincha icantiri iriri: "Apa, nioti aquempetavacaajeitaca, Tasorents anajeiti, ⁷iro cantaincha nocoaque nompeapeempa atiri, nantempiro maaroni picoacaquenari". Ari yojocanaquero ipincatsaritantaniri, itasorentsitananiri. Ari itimantapaacari peerani quipatsiqui, yatiritasanotapaaque: ⁸iquempejeitapaaquee arori. Te impincatsarivetapeempaji, irointi ipincatsataqueri iriri. Irisati coaintsi ipajacoyeetaqueri coroshiqui, icamimentajeitaquee arori. Irootaque inintacaaque-riri iriri. ⁹Iro cantaincha impoiji yaajiri jenoqui, cameetsa isavicacaajiri catsini. Ipeavajiri aisati pincatsarisanori, yanaacojeitapaaqueri maaroni timajeitatsiri. ¹⁰Icoaque Tasorents ampincatsajeiteri Jesoshi, catsini: yora jenoquiniri, arori quipatsiquiniri, yora ishaavijiniri, maaroni. Aiquero ajatatiye, ampincatsatasanojeiteri catsini. ¹¹Aisati ancantasa-nojeite: "Irootaque Jesoquirishito Pincatsarisanori", impoiji aacameetsatasanojeitanteeariri catsini yora Apa Tasorents.

¹²Ari, nosharinca, picantani piquemisantapinijeitaquenani. Notsipatantimpiniri piquemisantajeitaquenani. Meeca te nontsipajeitimpipi, iro cantaincha nocoaque pinquemisantasanojeitenia aisati. Tempa yoavisacojeitaquempi Tasorents: meeca pimpincatsatasanojeiteri, panteneri maaroni icoacaajeitaquempi. ¹³Tempa itasoncacoventapinita-quempi, picoajeitancacari pimayetaquero cameetsayetatsiri. Tempa ocameetsataque maaroni icoacaajeitaquempi, aitaque yamitacotapinijeitaquempi pimataquero. ¹⁴Pimatasanojeitero maaroni icoaca-queMPI: eiro pishemarotsi, eiro pipiatsataritsi iriori.

¹⁵Ariorica panteneri Tasorents maaroni icoacaquaempi, eiro otimitsi pantane,

irointi pincameetsashiretanaque. Tempa itomintajeitaquempi, ishintojeitaquempi. Yoameetsatasanojeitaquempi. Ara pinampiqui picarajeitaqueri oshequi tseencantatsiri: te incameetsateji, te irioteriji Tasorentsi. Oquempetaca tsiomentotsi otsiotaca amenantari, ari cameetsa pisavicafeite piotacaajeitante- riri yora tseencantatsiri.¹⁶ Oquempetaca pitsiotacaro tsiomentotsi pamenantari tsiteniriqui, aisati poamejeiteri pishaninca irineane Tasorentsi irineanta- paajearori iriori inquite, incantaitatiyem- pan i raneapaaje anta. Ari pimamajeitero oca; impoiji, impocajerica Quirishito, nonquimoshireimentajeitaquempi. Niotanaque te nantsipetashitearoji noamejeitaquempi.¹⁷ Meeca piquemisan- tajeitaque. Tempa narotaque quemisanta- caajeitaquempi, irootaque icoanteeta- cari iroyeetena. Arioricampa iroyeetena meeca, iro cantaincha niotaque aiquero pijatatiyie pimpincatsatasanotanaqueri Tasorentsi. Irootaque noquimoshiretanta- cari, aisati nocoaque pinquimoshireven- tena avirori.¹⁸ Queario, ocameetsati pinquimoshirejeitanaque, anquempetava- caajeitanteari, anquimoshiretasanojeitan- teari, maaroni.

Itianquiri Pavoro Timoteo.

¹⁹ Ariorica incoacayena Avincatsarite Jesoshi, nocoaque intsipaite nontian- quempi Timoteo. Ariorica impiaje aisati aca, incamantapajena jaoca picantajei- tari, nonquimoshiretanteari.²⁰ Te noncarateriji itsipa quempetearine iriori: oshequi icoaque incavintsaajeitemi cameetsa pisavicafeitanteari.²¹ Ainiro pashinipee: iquenqueshirejeitaquero paitapeerica icoayetiri iriori, te inquenqueshiretapiniteroji icoaqueri Jeso quirishito.²² Iro cantaincha piojeita- que icameetsataque Timoteo, iqueario- ventiro yamitacotaquena noquenquetsa-

tacaqueri atiri: nocamantajeitiri jaoca incanteari iravisacotanteari. Oshequi yamitacotaquena, iquempetacantaquena narorica iriri.²³ Irootaque nocoantacari nontianquempi. Ariorica niotasanoque iroyeetena, irompa eirorica, ari intsipaite nontianqueri Timoteo incamantapeempi.²⁴ Aisati naamaaca irishinetena Avincatsa- rite nojatashijeitemi. Eiro osamanititsi, ari nareetapajempi.

Iquenquetsatacotiri Epajororito.

²⁵ Chapinqui pitiancaquenari ayemisan- tarinte Epajororito, oshequi intacota- quena. Icarataquena, nantaveejeitiniri Avincatsarite. Oquempetaca soraropee iquearioventiniri iyapitanote paitapeerica yantiniriri, nocarataqueri Epajororito noquearioventiniri Avincatsarite maaroni nantiniriri; te nomperaventearoj icoaca- quenari.²⁶ Oshequi icoiteajeitaquempi. Piquemacojeivetacari yojoquitaca, oshequi poashiretacovetacari. Meeca iquenqueshiretaquempi, te incoyeji poashiretacoteari.²⁷ Queario, yojoquita- sanovetaca, irovetailcha incameme, iro cantaincha ineshinoncatajiri Tasorentsi, yoavisacotajiri. Aisati narori, ineshinon- catabana, te incoacayenaji incamimotena. Ioti nashinoncaavetaca, te incoacayenaji noashiretacoteari.²⁸ Meeca nocoasanota- que nontiancajempri. Ariorica pineajeita- vajeri, pinquimoshireventajeitavajeri, impoiji eiro noashiretacotimpitsi.²⁹ Paacameetsatavajeri, pinquimoshire- ventavajeri; tempa irio quemisantirri Avincatsarite. Pimpincatsatavaqueri, aisati pimpincatsajeiteri iriori maaroni quempejeitariri.³⁰ Tempa yantaveeti- niri Quirishito, irootaque yojoquittanta- cari, irovetailcha incameme. Oshequi intacotapinitaquena: iquempetaquempi pintacotapinijeitename, pintimeme aca. Te incavintsayeaji irisati, irootaque incamanteameri.

**Paamayeariyea yora coatsiri
impeacaajeitempi jorio.**

3 ¹Aisati, noyemisantarinte, noncantajeitempi: pinquimoshireventajeteari Avincatsarite. Te noshemearoji oca nosanquenatapinitimpiri, tempa ocameetsati pinquemapinitero. ²Paamayeariyea yora coatsiri impeacaajeitempi jorio: te incameetsateji. Paamayeariyea, yoashinoncaimpicari, icoaveta intotacayempime. ³Atsipetashita atotiro ameshina, eiro oameetsateetsi, eiro oavisacoteetsi. Iro cantaincha Ishire Tasorentsi oamejeitaquee apincatsatasanojeitiri Tasorentsi, irootaque yoameetsajitanteeri, yoavisacojeitanteeri. Aveshireimentajeitacari Jesoquirishito, ayojeitaque tecatsi ancantajeitea avaviscotajea arosati.

⁴Arioricame amaterome avaviscoteame arosati, tempa narosati oavisacota-janchaneme. Oshequi nomayevetaca, nanaacojeivetacari itsipapee. ⁵Iroaquera notimapaaqueni, ⁷7 nomaacotapaaque, ari itoyeanteetaquena. Narotaque ishanin-canii Ishiraerini. Aisati noshanincatacari Vejamini. Narotaque joriosanori, nashi noiro. Nomoncaratasanotaquero isanquenare Moishishi, tempa naro variseo. ⁶Nocoasanoveitani catsini nonquemisantemerime Tasorentsi, irootaque noquisajeitancariri yora quemisantajeitiriri: nojijeiveitarini yamatavijeitiri atiri. Cameetsa nomoncarataquero isanquenare Moishishi, tecatsi incanteetenani: "Ainiro pantane". ^{7,8}Noveshireimentaveitaroni maaroni nantiniri, noshemeveitani, iro cantaincha meeca niotaque natsipetashitacaroni. Queario, natsipetashijeitacaroni maaroni. Meeca eiro noquenqueshiretajrotsi nantaveitaniri, irintiquea Jesoquirishito nompincatsate. Niotaque ipincatsariventasanotaquena, noveshireimentasnotaci, icameetsatasanotaque. Te

nonquenqueshiretajeroji maaroni nantaveitaniri peerani: te oncameetsateji, nojocanaquero nantaveitaniri, oquempetaca ajocapinitiro cajara. Te nonquenqueshiretajeroji jaoca nocantaveitaniri, notseencaja narosati; meeca nopincatsataqueri Quirishito irinti, noquemisantaqueri. Nocoasanotaque nompincatsatanaqueri, irootaque nojocajeitantarori maaroni nantaveitaniri. ⁹Nocoaque noshanincatasanotaqueari. Te noncameetsatashiteaji narori: nomoncarayevetaro isanquenare Moishishi, iro cantaincha te oameetsantenaji. Irointiquea noquemisantaqueri Quirishito, irootaque yoameetsatantaquenari irinti. Aitaque, yoameetsajitiri Tasorentsi maaroni quemisantajeitiriri. ¹⁰Nocoaque niotasanoteri Quirishito. Oquempetaca itasoncacoven-tajiri Tasorentsi yoitinaantajariri, nocoaque intasoncacoventapinitena narori. Aisati, oquempetaca oshequi icatsitimentajeitaquee, nocoaque noncatsitimentieneri narori; oquempetaca icamimentajeitaquee, nocoaque nantaveeteneri narori irosati iroimentanteetenarori. ¹¹Impoji ariorica intinaajeitanaje maaroni camaintsiri, nocoasanotaque nontinaaanaje narori, nontsipatanteairi Tasorentsi.

Icamantacotaja irisati Pavoro.

¹²Tequeratsita nomayetero oca noquen-quetsatacoqueri, tequeratsita noncameetsatasanote. Iro cantaincha nocoasanotaque nomamateneri catsini, tempa yoavisacota-jana Jesoquirishito nomatantearori.

¹³Pineaquero, noyemisantarinte: te noncantempiji nomatasanoyetaquero maaroni nocoqueri nomateri. Te nonquenqueshiretajeroji maaroni nantayeveitaniri, irointiquea iotaca noquenqueshiretasanotiro maaroni nanteneriri Quirishito, aisati nocoasanotaque catsini quiso noanaqueri iriori. ¹⁴Noquemisantaqueri, irootaque

icoantacari Tasorentsi nojate inquitequi, nosaviquimotapaajeri iriori. Meeca noquearioventiro nantaveetasanotiniri impinatantenari coajica anta jenoqui.

¹⁵Nocoaque pinquempejeitena, maaroni quemisantasanoatsiri. Terica pinquempejeitenaji, iriotacaajeitempi Tasorentsi tequerata omoncarateji pinquemisantasanojeite.

¹⁶Iro cantaincha pinquempejeitena, maaroni icoacaquempiri. Tempa aitaque iotacaaqueimpire maaroni.

Icoaque Pavoro anquempejeiteari iriori.

¹⁷Noyemisantaririnte, pinquempejeitena. Aisati piotacojeiteri itsipapee, iquempejeitanrica. Impoiji pinquempejeitena maaroni: pinquemisantasanojeiteri Quirishito.

^{18,19}Peerani nocamantaquempi ainiro oshequi quishiriri Quirishito: yora pajacotimenteeri coroshiqui. Meeca napiitajimpilo: queario icarati oshequi quishiriri. Te impincatsajeiteri Tasorentsi, irointi iveshireimentaro yoari: oquempetaca ipeajiro yoari itasorentsate. Oncameetsateme impashiventajeiteame, iro cantaincha ishemetashijeitaca. Iotaca iquenqueshirejeti tiro jaoca icantajeitari aca quipatsiqui. Coajica irijajeitanaque Sharincaveniqui. Niraacojeitaqueri narori.

²⁰Iro cantaincha acoaque anampitasanotearo ainti inquitequi. Coajica imponeaquea inquitequi yora oavisacojeiteri: yora Avincatsarite Jesoquirishito.

²¹Yashi yoiro itasoncanti, imatantarori paitapeerica icoaqueri. Intasoncacoventapaajee arori, impashinitappaajeenero avatsa, anquempetanteariri iriori. Meeca ashi airo apatsaajeiti, acamajeti; iro cantaincha coajica anquempejeiteari iriori, oncameetsatasanotanaque avatsa, catsini: eiro apatsaajeitajitsi, eiro acamajitsi.

4 ¹Ari, noyemisantaririnte, oshequi nonintajeitaquempi, oshequi nocoiteajeitaquempi, oshequi noquimoshireventaqueMPI, oshequi noveshirei-

mentajeitaquempi. Quiso poajeiteri Avincatsarite, pojatasanojeiteri. Queario, oshequi nonintajeitaquempi.

²Meeca noncamantero Evoria aisati Shintique eiro oquisavacaatsi. Cameetsa oncanteri Avincatsarite iramatacotero aacameetsatavacayea.

³Meeca noncamantempi, noshaninca, tempa atsipatavacaaca antaveetiniri Avincatsarite: nocoaque pamitacotero ora tsinane aacameetsatavacaaja aisati. Peerani opomerentsivenetavetaroni ocamantajeivetari atiri jaoca incanteari iroavisacotantajeari: ocarajei vetaquenani, aisati iriori Queremente, aisati pashini amitacojeitanari. Osanquenajejitaca ivajiropee yora amitacojeitanari anta jenoqui, isanquenatacota maaroni savigatsineri inquitequi.

Pinquimoshireventeri Tasorentsi.

⁴Pincantaitatiyempani pinquimoshireventajeiteri Avincatsarite. Nampiitajempiro: pinquimoshireventasanojeiteri, maaroni.

⁵Nocoaque iriojeite atiri picavintsantasanojeiti. Eiro pipeacotartosi: irotaintsi impocaje Avincatsarite.

⁶Eiro picantashirejeititsi. Pincantaitatiyempani pinquenquetsatacayeri Tasorentsi, pincanteri paitarica picoiri. Paitapeericapincoajeiteriri, ari pincamanteri. Aisati pimpasonquitapinijeiteri.

⁷Impoiji inquimoshiretacaasanojeitempi Tasorentsi catsini. Yanaacotasanojeitaquee arori, te amateroji anquimoshiretacaasanojeiteri itsipapee, te ayoteroji. Ariorica pinquemisanteri Jesoquirishito, incanteani Tasorentsi inquimoshiretacaajeitempi, iriveshireacaajeitempi.

⁸Apavaniiji, noyemisantaririnte, noncamantempiro oca. Pincoasanojeite eiro pamatavitanti, irointi tampatica pineanjeite, pincameetsate, pineshinoncatante, pintacotantea, pincavintsante, pinintava caajeitea. Queario, pincanteani pinquenqueshiretasanotero maaroni cameetsaye-

tatsiri, irootaque pinquenqueshirejeiteri maaroni ineacameetsajeitiri Tasorentsi. ⁹Pantapinijeitero maaroni noamejeita-quempi, maaroni nocamantajeitaquem-pi, maaroni piquemajeitavaquenari. Paitapeerica pineaqueri nantaqueri narori, ari pantajeitero avirori. Impoiji quiso iroajeitimpesi Tasorentsi: yora veshireacaajeitimpiri.

**Yora jiriposhisati oshequi
ineshiloncajeitaqueri Pavoro.**

¹⁰Peerani piquenqueshirejeivetaquena, impoiji pipeacovetajana; iro cantaincha meeca piquenqueshirejeitajana aisati, picavintsaajeitaquena, irootaque noquimoshiretasanotantacari. Tempa icameetsataque Avincatsarite. Te pimpeacotasanotenaji, iro cantaincha te pimaveitearoni pincavintsaajeitena. ¹¹Te noncamantempiji ainiro coiteimotaquenari paitapeerica: teve. Te oshequiteji timimojeitanari, iro cantaincha niotaque meeca noquimoshiretashita. ¹²Nametacaro te nashitaaranteaji, aisati nametacaro ariorica nashiyetearo paitapeerica. Niyetaquero maaroni: niotaque noquemacaro noanaro, aisati niotaquero notasheaque. Niotaque nashitaarantaca, aisati niotaque nashinoncaaca. ¹³Tempa quiso yoana Quirishito, imatacaaquena, irootaque nomatantarori paitapeerica icoacaquenari Tasorentsi. ¹⁴Iro cantaincha pineshiloncajeitaquena. Piojeitaque nashinoncaavetaca, irootaque picavin-tsaajeitantaquenari.

¹⁵Aisati piojeiti jaoca ocantani peerani, iroqueran iroquenquetsatacantaquem-pini ara pinampiqui, nintacojeitaquempi. Nojatantajari aisati, noponeanaja Maseron-niaqui, nojayetaque pashinipeequi

nampitsi. Avirojei pintacojeitavaquena, pipashijeitavaquenaro coiteimojeitaque-nari. Te inquempejeitimpiji yora quemisantajeitatsiri anta pashinipeequi nampitsi. ¹⁶Aisati, nosavicantacari anta Tesaronicaqui, pitiancajeitaquenaro coiteimotaquenari. Impoiji pashini pipacantajana aisati. ¹⁷Te noncoacaave-tempiji pimpapinitena paitapeerica, irointi nocoasanotaque pimayetero cameetsatatsiri, cameetsa impinatasano-jeitantempiri Tasorentsi. ¹⁸Ipapaaque-naro Epajororito maaroni pipacantajana. Ocamenteatsasanoti oca pantaqueri, oquempetaca irio pipaqueri Tasorentsi maaroni. Ineacameetsataquero, iveshirei-mentaqueMPI. Meeca otimimotasanota-quena paitapeerica, tecatsi pashini coiteimotenane; moncarataca. ¹⁹Piquemi-santasanotaqueri Jesoquirishito, irootaque irintacojeitantempiri Tasoren-tsi, impajeitimpesi maaroni coiteimojeita-quempi. Ashitaarantincari ini iriori, te irimashitsateji. Tempa ipincatsaritasanoti, icameetsatasanoti.

Ivecarataquero Pavoro isanquenare.

²⁰Tsame ampincatsatasanojeiteri Apa Tasorentsi, ancantaitatiyempani.

Aitaque ancantasanojeiteari. ²¹Nove-tsajeitimpesi, aisati novetsajeitar maaroni iriori quemisantiriri Jesoquiri-shito. Ivetsajeitaquempi aisati maaroni ayemisantaririnte aca. ²²Aisati ivetsajeitaquempi maaroni quemisanta-tsiri: yora iratiritipee Sesari, maaroni.

²³Nocoaque irineshiloncasanajojeitimpesi Avincatsarite Jesoquirishito. Piveshireimentajeiteari, maaroni.

Narotaque sanquenataquempirori oca:
Pavoro

YORA PAVORO ISANQUENATINIRI COROSASHISATI

Ivetsajeitari Pavoro corosashisati.

1 ^{1,2}¿Savicajeitatsimpi, corosashisati? ³Tecatsimpa oyempine? Narotaque Pavoro sanquenatimpiori oca. Narotaque itiancane Quirishito, irootaque noquen-quetsatantari: irootaque inintacaquenari Tasorentsi. Nocarataqueri aca ayemisan-taririnte Timoteo. Nosanquenajeitimpido maaroni quemisantasanoetiriri Tasorentsi ara pinampiqui: avirojeitaque noyemisan-taririnte quemisantasanojeitiriri Quirishito. Nocoaque irinoshinoncajei-tempi Apa Tasorentsi, aisati nocoaque cameetsa irisavicasaajeittempi.

Ipasonquitacoventiri Pavoro corosashisati.

⁴Nocantani nocantapinitiri Tasorentsi iramitacojeittempi, aisati nopasonquitapi-nitiri Tasorentsi: yora iriri Avincatsarite Jesoquirishito. Avirojeitaque nopasonqui-tacoventiri. ⁵Oshequi noquemacota-quempi, piquemisantasanoetiriri Avincatsarite, aisati oshequi pinintasanojeitiriri ayemisantaririnte. ⁶Peerani piquemaque-roni ariorica pinquemisante, paviscotaje. Queario oca piquemaqueri. Aisati piojeitavaqueroni cameetsa irisavicasa-yempi Tasorentsi anta inquitequi. ⁷Oca piquemaqueri ojatacayedanaque maaroni nampitsipeequi. Piquemantacarori avirori, piojeitavaquero queario ineshinoncajeitaquee Tasorentsi. Ari piquemisantaquero, irootaque pipashini-

tantajari. Aisati iquempejeitaquempi pashinipee atiri, ipashinijeitaji irlori. ⁸Tempa irio Epajarashi quenquetsata-caimpiniri peerani. Iquempetaquena, icantani yantaveetiniri Quirishito. Cameetsa yantaveetiniri, irootaque notiancantacariri peerani iquenquetsata-caimpi. ⁹Icamantaquena piquemisanta-quero Ishire Tasorentsi, irootaque pinintasanojeitancatariri itsipapee atiri, ¹⁰irosati nocantantacariri Tasorentsi: “Pamitacojeiteri noyemisantaririnte anta Corosashiqui”.

Icantiri Pavoro Tasorentsi: “Pamitacojeiteri quemisantajeitimpri anta Corosashiqui”.

Ari nocantani nocantapinitiri Tasoren-tsi: “Piotacayeri corosashisati maaroni picoacaqueriri”. Aisati nocantiri: “Nocoaque pintianqueneri Pishire oametasanojeiteri, iotacaasanojeiteri”. ¹¹Aisati nocantiri iramitacotempi cameetsa pisavique, piveshireacaasanojei-tanteariri, pimayetantearori cameetsaye-tatsiri. Tempa irio Avincatsarite, irootaque ocameetsatantari amajeiteneri oca. Aisati nocantiri iramitacotempi piotanteariri, aiquero pijatatiye. ¹²Pashini aisati nocantiri irimatacantempirori: tempa irio Tasorentsisanori, icameetsata-sanoti. Irimatacayempiro pimatapinitan-tearori cameetsayetatsiri: eiro pishemarotsi, irointi pinquimoshireventero. ¹³Aisati nocantiri Apa iramitacotempi pimpason-

quitanteariri. Tempa yoameetsajeitaquee, ivetsicashireajeitaquee ajajbeitantajeari anta icashiacaajeitaqueenta. Ancarajeita-pajjeri maaroni ayemisantaririnte anta oquitaitetasanotinta catsini.

Iquenquetsatacotaqueri Jeso quirishito.

¹³Peerani oquempetaveta atimaveitani anta otsitenitasanotinta: apincatsaveitari camaari. Iro cantaincha yoavisacojeitajee Tasorentsi, irootaque apincatsatantan-tajariri Itomi: yora inintasanotiri.

¹⁴Icamimentajeitaquee arori, avavisaco-jeitantajari. Icavintsaasanojeitaquee, meeca eiro iquenqueshireacotajeerotsi caari cameetsatatsi antajeitiniri.

¹⁵Te inconijateji Tasorentsi, iro cantaincha iconijataque itomi, iquempetasanota-cari. Peerani, irio jivatatsiri itimi irinti, tequerata ontimayete oca aneayetaqueri. ¹⁶Tempa irootaque vetsicajeitiriri maaroni: inquitesati, quipatsisati, conijayetatsiri, caari conijayetatsi, maaroni. Ari yovetsicajeitiri caari conijayetatsi: yora pincatsarjeitatsiri, jivatacaajeitantatsiri, savicacaajeitanta-tsiri, maaroni. Irootaque Quirishito vetsicajeitiriri maaroni. Te irovetsicashiteariji, irointi yovetscantari impincatsa-jeiteri iriori. ¹⁷Irootaque Quirishito intasanotacarori itimi, catsini.

Icantaqueri maaroni yovetsicane: "Aitaque pincantajeiteari". ¹⁸Iro aito iotacairori avatsa maaroni. Eirome otimime, eiro aneime. Aisati iquempetaca Quirishito: ipincatsariventajeitaquee arori, aisati maaroni itsipapee quemisan-tiriri; eirome itimime, eiro ayojeitirime Tasorentsi, eiro aquemisantajeitime, eiro avavisacojeitajame. Irio jivatiriri maaroni tinaajeitajanchaneri, yanaacojeitaqueri ipincatsaritasanoti. Queario ipincatsarita-sanoti catsini, ¹⁹itasorentsitasanotaque catsini: irootaque icoacaaqueriri iriri. ²⁰Peerani aquisajeiveitarini Tasorentsi,

iro cantaincha icamimentajeitaquee Quirishito coroshiqui, yaparajatimenta-queero iriraja. Yoameetsajeitaquee, meeca aneacameetsajeitajiri Tasorentsi, aisati ineacameetsajeitaquee arori. Aisati inquitesati, ineacameetsajeitiri Tasoren-tsi; aisati iriori, ineacameetsatari. Ari imataquero Quirishito, cameetsa asavica-jeitantari maaroni.

Iquenquetsatacotiri corosashisati.

²¹Ari, peerani te pinquenqueshiretapi-niterini Tasorentsi, piquisajeiveitarini. Piquenqueshireveitaroni caari cameetsatatsi, aisati pantapiniveitaroni, caari piquenqueshiretantarini Tasorentsi. ²²Iro cantaincha yatiritapaaque Jeso quirishito, impoiji icamimentaqueempi, yoameetsata-quempi, irootaque pineacameetsatantariri Tasorentsi, aisati ineacameetsatantimpiri iriori. Inequempi picameetsatasanota-que, iquempetacaantaquempi te aneajeroji meeca pantane. Meeca eiro icantajimpitsi: "Ainiro pantane". ²³Iro cantaincha icoaque ancantaitatiyempani anquemisanteri. Aiquero ajatatiye, anquemisantasanotanaque. Pamene, ovaraanaca irineane Tasorentsi maaroni nampitsipeequi. Ocamantajeitee jaoca ancanteari avavisacotantajeari. Tempa naro ovaraaquerori, nocarajeitaqueri itsipapee ovaraayetaquerori; aisati icamantaqueimpiro Epajarashi. Pishireta-caro, piotantacari paviscotaji. Meeca eiro piperaventartotsi.

Yoametiri Pavoro caari iojeiveitani.

²⁴Oshequi iquematsicatacaro Quirishito yoavisacojeitantacariri maaroni quemisantajeitiriri, meeca ishiacantaquee arori ivatsasanori iriori. Aisati narori, noquempetacari: ainiro noquematsicati-mentaquempi, noquemisantacantanta-quempi, irootaque noquimoshiretanta-carri. Moncarataca meeca. ²⁵Icantaquena

Tasorentsi: "Pamitacojeiteri maaroni piyemisantarininte, aisati poametasanojeiteri noneane".²⁶ Ari meeca noamejeitempiro caari iojeiveitani inampireepe Tasorentsi, aisati caari iojeiveitani atiripee. Meeca iotacaajeiteero Tasorentsi, aisati iriori maaroni itsipapee quemisantajeitiriri.²⁷ Icoaque meeca piojeitero oca imajeitaquempiri: ocameetsatasanoti catsini. Te avirojei jorio, iro cantaincha quiso yoasanojeitaquempi Quirishito, irootaque piojetantacari cameetsa pisaviquimojeiteri Tasorentsi, coajica.²⁸ Iriotaque Quirishito noquenquetsatacotiri. Nocantajeitiri atiri: "Pantirocari caari cameetsatatsi". Aisati noametasanojeitiri iritasanotanteariri Quirishito, irishiretasanotanteariri. Impoiji iritacojeiteri atiripee, icameetsatasanoti.²⁹ Irootaque nopomerentsitimentantaquempiri, caari noperaventantimpi. Irio Quirishito shintsitacaquenari, itasoncaventaquena nomatantarcarori.

2 ¹Nocoaque piojeite nocantani nopomerentsitacoventimpi noquenquetsatacairy Tasorentsi: nocantapinitiri iramitacotempi, aisati noquempetacoven-tiri yora ayemisantarininte anta Araoriseaqui. Aisati iriori nopomerentsitacoventajeitiri maaroni caari neana. Nocantapinitiri Tasorentsi iramitacotempi² piveshireajeitajeari, pinintava-caajeitajeari. Aisati nocoaque ontimimotasanojtempi piotanteari, nocoaque piotasanoteri yora imanaque-niri Tasorentsi. Meeca iotacaajeitimpipi: piojeitiri, irootaque Quirishito.³ Iotasanojti catsini, otimasanoti catsini iotantari. Te amateroji anquenqueshiretero maaroni iotiri intiri.

Icantiri Pavoro: "Yamataviyeetimpicari".

⁴Queariompa, yamataviyeetimpicari: irootaque noamejeitajantimpipirori maaroni oca. ⁵Queario, te nontsipajeitimpiji, iro

cantaincha oshequi noquenqueshireta-quempi. NoveshireimentaqueMPI: cameetsa pisavicajeiti, aisati piquemisan-tasanojeitaque. ⁶Tempa peerani pishireta-cari Avincatsarite Jesoquirishito, irootaque yoavisacotantaquempiri. Irosati pincanteani: pishireteari maaroni quitaiteriqui, paitapeerica panteri. ⁷Noshiacantempiro: ora panquirents, irootaque ovaritsa shiocacairori, aisati irootaque shintsitacairori. Aisati pinquempeteari avirori, quiso poyer Quirishito iritacantempiro, aisati irishintsitacantempiro. Pincantaitatiyem-pani pinquemisantasanoteri, tempa irootaque yoameyeetimpiri. Aitaque pincantajeitari, pimpasonquijeiteri Quirishito, tempa icavintsaasanojeita-quee.

⁸Queariompa: eiro piquemisantiritsi yora coavetachari iramatavijeitimp. Iroamejeitimpime atiripee maaroni iquenqueshireyetiri, aisati maaroni ioyevetari: oca yoameyevetariri ishanin-can iriori, intasanotacarori itimi, iro cantaincha te ontampaticateji. Yamatavittimpicari. Te incoacayempiji iriori pinquemisantero yoametimpiri Quirishito.

⁹Peerani iquempetaquee Quirishito avatsa arori, iro cantaincha itasorentsisa-notaque catsini, yashi yoiro. ¹⁰Ariorica quiso poyer, intasoncaventapinijetempi, incantaitatiyempani, eiro pashinoncanta-jatsi catsini. Ipincatsaritasanojtaque catsini, yanaacotasanojeitiri maaroni itsipapee pincatsarivetachari. ¹¹Yora joriopee, itoyeantajeita: yojocaguero imeshina. Meeca oquempetetaca pitoyeantaca avirori, iro cantaincha yojocacaquempiro Quirishito caari cameetsatatsi pantiniri. Meeca eiro acoirotsi antapinitero caari cameetsatatsi: tempa ipashinitacaajeitaquee. ¹²Ariorica pivaotisajeitaca, oquempetaca pitsipata-

cari Jesoshi: picamajeitaque, aisati pitijajeitaca. Tecatsi pincantero pincoayetero pantero caari cameetsatatsi: tempa oquempetaca picamaque. Itinaanaja aisati Quirishito, meeca oquempetaca pitinaajeitanaja aisati: meeca pinashijeitaja. Iro pinashijeitajari, pishiretacari yora Tasorentsisanori: yora oitinaajiriri Quirishito.¹³Peerani oquempetimojeitaquempi picamaque, te pinquenqueshireterini Tasorentsni, irointi pantapiniveitroni caari cameetsatatsi. Te pioveitearini Tasorentsni. Meeca quea icavintsaajeitaquempi: te inquenqueshiretajeroji aisati caari cameetsatatsi pantajeiveitaniri. Meeca piquempetacari Quirishito: piojeitiri Tasorentsni, aisati coajica pisaviquimojeiteri anta inquitequi.

¹⁴Pamene: peerani oshequi apomerentsi ventavetaro isanquenarenai Moishishi avavisacotantajeameri, iro cantaincha te amoncarajeiteroji. Ayojeitanaque otimini antane, irootaque ajatanteameri ishaaviji. Iro cantaincha icamimentajeitaquee Quirishito coroshiqui, yoavisacojeitaquee. Meeca eiro apomerentsiventirosi sanquenarentsi avavisacojeitantaquee.

¹⁵Peerani, icamantacari Quirishito coroshiqui, iotacaajeitaquee tecatsi incantajeitee camaari iroashinoncaajeitee. Itsaneacoventaquee, eiro ishinetiritsi camaari irantanatee.

Eiro piquenqueshiretirotsi yoameyevetimpiri atiripee.

¹⁶Te oncameetsateji inquishimentepiro pishaninca poapinitari aisati piraapinitiri. Ainiro quitaiteripee inashitacaari jorioppee, aisati imaoreajeitancari. Irosati yantironi: maaroni osarintsi, maaroni cashiri, aisati maaroni saavarro. Terica pimoncarateari avirori, eiro pishinetiritsi inquishimentempiro.¹⁷Peerani icantani yametapinijeitaro jorioppee, iquenqueshireantariri Tasorentsni, iro cantaincha

meeca yareetaca Quirishito. Irriosanori irinti, ampincatsajeiteri. Moncarataca, ari ocarati: eiro meeca apitapinitajirotsi yamejeitari jorioppee.¹⁸Queariomphia, eiro pishinetiritsi iramatavittempi. Icoacaimpicari pinquempeteari iriori, icantimpicari: “Pimpincatsateri inampire Tasorentsni pavisacotantajeari. Noneaquero caari inepaniyeeti: ‘pineauerompa avirori?’ Ishemetive. Eiro piquenqueshiretirotsi incantavetempiri, itseyani.¹⁹Te inquenqueshireteriji yora Jivajeitaqueeri, te iringoteriji. Aroquea ainti, ariorica anquenqueshireteri Quirishito, iringatacajeitee, iramatacojeitee quiso avavacaajeitea, amatasanotantearori icoacaqueeri Tasorentsni.

²⁰Icamaque Quirishito, aisati oquempevetaca pitsipatacari picamaque avirori. Meeca eiro piquenqueshiretajirotsi yoameyevetimpiri atiripee: eiro oavisacotimpitsi. Paita patsipetashitantarori pantashiyevetacaro icantimpiri iriori?

²¹Icantanirovetimpipi: “Ariorica picoaque poavisacotea, eiro pipamitiritsi yora, eiro poaritsi yora, eiro pantiritsi”.²²Tempa icantashitacaro atiri oca, yoametashitimpilo. Pamene, tempa ashi airo avapinijeitaro avari: ariorica ayearo, poyere; tecatsi oncantero ashire.²³Ariorica antiteari, ajiticari ayoti, ajiticari aquemisantasanoti, ajiticari te ashemetete, ajiticari ashinoncaimentacari Tasorentsni. Iro cantaincha atsipetashitacaro atita. Ariorica antitaquea, acantani acoaquero caari cameetsatatsi, aisati ashemetaque.

Icantiri Pavoro: “Cameetsa pisavicajeite”.

3 ¹Peerani te piojeiveitearini Tasorentsni, pijajeiteme Sharincaveniqui; iro cantaincha icamimentajeitaquempi Quirishito, yoavisacojeitaquempi. Impoiji itinaanaja; irootaque meeca piojeitancari Tasorentsni, eiro pijajeititsi Sharincaveniqui, ainti pijajeite inquitequi: anta

isaviquinta Quirishito iracosanoriqui Tasorentsi, icaratiri ipincatsaritasanotanaque. Meeca pincoasanotanaque pisavica-jeite anta, pintsipajeitanteeariri.²Pinquenqueshirejeitea jaoca pincanteari anta inquitequi, eiro piquenqueshiretapiyetajirotsi jaoca pincantajeiteari aca quipatsiquica.³Oquempetaca picamaque, eiro meeca piquenqueshireyetajirotsi timayetatsiri quipatsiquica, eiro piquem-petajatsi peerani. Iro cantaincha yoaneaja-jeitaquempi Tasorentsi, pintimajeitapaaaje inquitequi. Iquempoyeaquempi, inquem-petacantajempi Quirishito.⁴Coajica impiaje quipatsiquica Quirishito, yora oaneajeitaqueeri. Cameetsa impincatsatapaaque, ancarajeitapaajeri ampincatsa-ritapaaaje arori.

Icanti Pavoro: “Eiro papiitajirotsi caari cameetsatatsi pantaveitaniri peerani”.

⁵Eiro catsini papiitajirotsi caari cameetsatatsi pantaveitaniri peerani. Shirampari, eiro pantirotsi caari pai. Tsinane, eiro pantiritsi caari pai. Eiro pimayempitantapinititsi. Eiro pinevetarotsi tsinane. Eiro pinevetaritsi shirampari. Eiro pinevetasanotarotsi vaararontsi: piquempetacantarocari irio pitasorentsitsi pinintantarori. ⁶Oshequi imayetiro atiripee, irootaque inquisanteariri coajica Tasorentsi. ⁷Peerani pantapiniveitaroni, pashi poironi. ⁸Pojocajeitajero meeca: eiro piquisavacaajeitajatsi, eiro pitsima-jencatavacaajatsi, eiro picatsimatavacaa-jatsi, eiro picantimatavacaajeitajatsi, eiro pineaveetantarotsi caari cameetsatatsi, ⁹eiro pamatavitavacaajeitajatsi. Tempa pinashijeitaja meeca, eiro papiitajirotsi pantaveitaniri. ¹⁰Meeca pimpashinitasa-notanaquea, pincameetsatasanojeitanaque, pinquempejeiteari yora Vetsicanauempiri peerani. ¹¹Te inquenqueshiretroji Tasorentsi jaocarica acantajeitari: ariorica ajorioti, terica; ariorica

atoyeanta, terica. Te inquenqueshiretroji jaocarica aponeacari, paitapeerica ayoyeriri, arorica pimantaari, terica impimanteeteeji. Irointi iquenqueshireta-cotee aquemisantiririca Quirishito.

Jaoca icantajeitari quemisantatsiri.

¹²Pamene, tempa icoyeajeitaquempi Tasorentsi. Icoaque pincameetsatasanotanaque, aisati inintajeitaquempi. Icoaca-jaitaquempi pashi poyerio pincavintsante, pineshimoncatante. Eiro pishemetitsi, eiro pishema, eiro piquisa. ¹³Pintacotavacaaya: eiro pipiataritsi quisavetempineri, irointi pincavintsayeri. Tempa icavintsaimpi Avincatsarite, meeca pishiacoteri, pincavintsajaeiteri itsipapee.

¹⁴Jero oca pimatasanoteri: aiquero pinintavacaasanojeitea catsini, maaroni. Pinequero, ariorica anintavacaajeitea, ari ancameetsatasanojeitanaque maaroni.

¹⁵Nocoaque piveshireimentajeitarei yora Quirishito. Irootaque icoyeajeitantaquem-piri, icoaque piveshireajeitanajea, maaroni. Icoaque anquempetavacaajei-tea, maaroni quemisantsiri. Aisati icoaque ampasonquijeiteri Tasorentsi.

¹⁶Pinquenqueshiretasanotero irineane Quirishito. Pincanteri iriotacaajeitempi cameetsa poametavacaajeitantaquem-piri. Icavintsajaeitaquempi Tasorentsi, meeca pimpasonquijeiteri. Poametavacaajeitea pimpampoyeaventajeiteri. ¹⁷Te ancoajei-teji impashiventacaajeitee Avincatsarite Jesoshi, irootaque nocoacantauquem-piri poameetsayetero maaroni pantayeteri. Ocameetsati anquenqueshiretapiniteri, ampasonquijeitanteeariri Tasorentsi.

Icantiri jaoca ancanteriri ashanincapee.

¹⁸Tsinane, pimpincatsateri pijime, irootaque icoacaquem-piri Avincatsarite.

¹⁹Shirampari, pinintasanotero pijina, eiroquea piquishirotsi. ²⁰Jananequi, pinquemisantapiniteri ashijeitimpiri,

paitapeerica incantempi. Irootaque iveshireimentari Avincatsarite.²¹ Itimirica pitomipee, eiro piquisatsatiritsi: pishemashireacaaricari.²² Pimantaari, pinquemisantasanoteri yora amanantimpiri, paitapeerica incantempi. Eiroquea pamatavitiritsi: eiorica yamenimpitsi, iro cantaincha eiro piperatarotsi pintsameeteneri. Ariorica pipincatsatiri Avincatsarite, ari pishintsiventeneri pivatorote.²³ Paitapeerica panteneriri, pishintsiventeneri. Pinquempetacanteri pishintsiventiniri Avincatsarite, te irio atiri.²⁴ Piotasnotaque pantapinitaqueneri Avincatsarite Quirishito, irootaque pinatempineri coajica, iroaneasanotajempi anta inquitequi.²⁵ Irintiquea yora antapinitirori caari cameetsatatsi: iroashinoncayeri irinti. Paitapeerica antajeitaqueri, timatsi incanteeri arori, tecatsi ancantea amataviteri.

Icantiri Pavoro:

“Pinquenquetsatacapiniteri Tasorentsi”.

4 ¹Itimirica atiri pamanantiri, cameetsa pineshinoncateri, pincavintsayeri. Tempa pioti itimi anta inquitequi pivincatsarite avirori: iotaque maaroni pantajeitaqueri.² Pincantaitatiyempani pinquenquetsatacapiniteri Tasorentsi, pimatasanotero catsini. Queario, ariorica pinquenquetsatacayeri, pimpasonquitapiniteri aisati.³ Tempa nocamantapinitiri atiripee jaoca incanteari iravisacotantajeari, irootaque yoimunqueanteetaquenari meeca caravosoquica. Aisati pincanteri Tasorentsi iramitacotena noncamantajeteri atiripee jaoca icantajeitaqueeri Quirishito yoavisacotantajeari.⁴ Nocoaque cameetsa nontsooteeneri, inquemasanotantearori.⁵ Aisati avirori, ariorica pincarajeiteri caari quemisantayetatsi, cameetsa pisavique, aisati cameetsa poamejeiteri, eiro piperaventarotsi.⁶ Ariorica pinquenquetsatacayeri,

pincavintsayeri. Eiro pashereiritsi: vero, vero, vero. Ariorica irisampitempi pitarica, piote cameetsa panqueri incoanteari iriori inquemisante.

Iquenquetsatacotiri Tiquico.

^{7,8} Meeca nontianquemppiri Tiquico, ayemisantaririnte nonintasanotiri. Iquempejeitaquena, iquearioventiniri Avincatsarite paitapeerica yantiniriri. Incamantapaaquempi jaoca nocantacari nosavicaque. Irootaque nontiancanteariri, piotanteari jaoca nocantajeitari aca. Aisati nocoaque iriveshireacayempi.⁹ Intsipatanaqueari Tiquico pishaninca Oneshimo. Irisati iriori ayemisantaririnte, iquearioventiniri Avincatsarite paitapeerica yantiniriri. Nonintasanotiri. Ari incarate apite camantapeempineri maaroni nantajeitiri aca.

Ivetsajeitari corosashisati.

¹⁰ Ainiro aca yoiminqueetaqueri aisati yora Arishitaraco, ivetsajeitaquempi. Aisati ivetsajeitaquempi Maricoshi, yora iraniri Verenave. Tempa nocamantaqueMPI chapinqui: ariorica irareetempi Maricoshi, pineshinoncatavaqueri.¹¹ Jeri aisati Jesoshi, yora pajitachari aisati Joshito, ivetsajaqueMPI. Jorio inajeiti, iro cantaincha icarajeitaquena noquenquetsatacojeitiri Tasorentsi, jaoca icanta ipincatsariventaquee. Aisati oshequi iveshireacaquena.¹² Ainiro aisati pishaninca Epajarashi, ivetsajeitaquempi. Irisati iriori antaveetiniriri Jesoquirishito. Icantani icantapinitiri Tasorentsi iramitacotempi pincameetsatanteari, aisati pimatantearori maaroni icoacaajeitaquemppiri Tasorentsi.¹³ Noncamantempi: queario, ipomerentsivensanasajitaquempi. Aisati ipomerentsiventiri yora aaroseasati, jeri aisati iyeraporishisati.¹⁴ Aisati ivetsajeitaquempi Irocashi: yora aavintantatsiri nonintasanotiri. Aisati ivetsajeitaquempi yora Temashi.

¹⁵Novetsajeitari maaroni ayemisanta-ririnte anta Araoriseaqui, aisati novetsataro Ninaja, aisati novetsajeitari maaroni quemisantapinijeitatsiri anta ovancoqui. ¹⁶Pineanajiteiteneri nosanquenare maaroni quemisantatsiri aviroriqui. Impoiji pincanteri yora araoriseasati irineanateneri maaroni iyemisantaririnte iriori. Aisati pineana-

jeitero ora nosanquenajeitiriri iriori.

¹⁷Jero oca pincanteriri Ariquipo: “Pimamatero maaroni icoacaquemppiri Avincatsarite”.

¹⁸Ainirona nosaviqui aca caravosoqui, eiro pipeacotanatsi. Nocoaque irineshi-noncajeitempi Tasorentsi.

Ari ocarati. Narotaque sanquenajeitim-pirori: *Pavoro*

IJIVATAQUE PAVORO ISANQUENAJEITINIRI YORA TESARONICASATI

Ivetsajeitari Pavoro tesaronicasati.

1 ¹¿Savicajeitatsimpampa ara, tesaronicasati? ²Tecatsimpa oajeitempime? Narotaque aca Pavoro, nocarajeitiri Shirivano aisati Timoteo. Nosanquenajetaquempiro maaroni noyemisantairintre ara. Tempa avirojeitaque shanincajeitacirri Apa Atasorentsite aisati Avincatsarite Jesoquirishito. ³Nocoaque irineshiloncajeitempi aisati cameetsa irisavicaaajeitempi.

Oshequi iquemisanti tesaronicasati.

Nocantatiani nopasonquitiri Tasorentsi: nopasonquitimentajeitimpisaisati nocantiri iramitacotempi. ⁴Ariorica noquenquetsatacairy, noquenqueshiretappinitimpi, nocantapinitiri: "Pintasoncaventeri tesaronicasati". Oshequi pishirejeitacari aisati pinintajeitaqueri, irootaque pantaveetantacanariri maaroni icoacaajeitaquempi. Aisati noquenqueshiretaquempi, piquearioventiro pishiretacari Avincatsarite Jesoquirishito, piojeitaque eiro yamatavitimpitsi. ⁵Noyemisantairintre, icantani inintaqueMPI Tasorentsi. Niojeitaque icoyeajeitaquempi, irootaque itomintajeitantaquempi. ⁶Piojeitaque peerani nocamantajeitaquempi jaoca pincanteari pavisacojeitantajeari; te noncantashiteaji. Oamejeitaquempi Ishire Tasorentsi, otasoncacoventajeitaquempi, piojeitanta-

carori queariosanotaque nocantaquempi. Aisati ocameetsajeitaque maaroni nantajeitaqueri, irootaque piotantacari queariotasanotaque nocantaqueri.

⁶Paitarica pineacotaquena nantaqueri, ari piquempejeitaquena. Aisati pimataquero paitarica piquemacotaquereiri yantayetiri Avincatsarite Jesoshi. Piquemisantaquero maaroni nocamantauquempi, irosati piquemaatsicatimentancarori, iro cantaincha piveshireimentacaro Ishire Tasorentsi. ⁷Ari cameetsa pisavicajeitaque, irootaque icoantajeitacari inquempejeitimpimaaroni ayemisantairintre anta Maseroniaqui aisati Acayaqui. ⁸Aitaque povaajeitanaquero Irineane Avincatsarite. Te apaniro inquemacotempi yora maseroniasatisaisati acayasati, irointi iquemacojeitaquempi maaroni itsipapee atiri piquemisantasanotaque. Te noncamantajeiterijinorori, ⁹irointi iquenquetsatacotashijeitaquempi maaroni. Iujeitaque peerani nojatashtantaquempi, pojocajeitajiro maaroni povetsicashiyevetari pijitasortivetari. Paventajeitacari Tasorentsniori, yora aneasanotatsiri; meeca pantaveetaqueneri icoacaajeitaquempi iriori. ¹⁰Icamaque peerani Jesoshi, yora Itomi Tasorentsi, impoiji yoitinaajiri aisati. Coajica, inquisajeitaqueri maaroni caari cameetsatatsi, iro cantaincha eiro atsaroacaajeitaritsi ainti: tempa yoavisaajeitaquee. Meeca paamaajeiteari Itomi:

piojeitaque impocaje, imponeaquea inquitequi.

Yantayetiri Pavoro Tesaronicaqui.

2 ^{1,2}Peerani, tequerani nojateni pinampiqui, oshequi noneacatsitacaroni anta Jiriposhiqui, aisati ishirontimenteetaquena. Aisati oshequi opomerentsitimotaquena ara pinampiqui, iro cantaincha te nontsaroapeeji. Aitaque, yamitacotaquena Tasorentsi, nomatantarcarori nocamantajeitaquempiro Irineane. Te nantsipetashitearoji noquivantajeitaquempi. Tempa, noyemisantaririnte, piojeitaquero maaroni oca. ³Noquemisantacantaquempiniri, te noncoyeni namavijeittempi. Tampatica noametaquempini: te nontseeyaji. ⁴Iotitaca Tasorentsi cameetsa novaayempiro irineane, irootaque itiancantanari nocamantimpido. Te nonintasanoveteoji irineacameetsajetenia atiri, irootint nocoasanotaque irineacameetsatena Tasorentsi. Iriotaque iotasnotirori maaroni aquenqueshirejetiri. ⁵Te nonintejiri cameetsa noveshireacaashijeittempi, te noncantashijeittempi: "Picameetsatasanojeitaque". Namatavimticari. Ioti Tasorentsi te irio nonintimentempi pii requisite. ^{6,7}Tempa narojeitaque itiancane Quirishito noquenquetsati, irootaque ocameetsatantavetari noncantempime: "Pimpincatsajeitena". Iro cantaincha te noncoyeli pimpincatsajetenia, aisati te noncoyeli impincatsajetenia itsipapee atiri. Ariorica atsotairi tsinane otomipee, ari ocvaintsairi. Aisati noquempetacantapaaqueempini peerani: nocavintsajaeitapaaquempi, te noshintstacaajeitapeempiji. ⁸Oshequi noneacameetsajaeitapaaquempi, oshequi nonintajaeitapaaquempi, irootaque nocamantatapaaqueempiori irineane Tasorentsi. Meeca, paitapeerica nantayetaqueri, nocantatiani noquenqueshiretapinijeitaquempi.

⁹Piojeiti, noyemisantaririnte, oshequi nopomerentsitacaro nantaveeti quitaiteri qui aisati tsiteniriqui. Te nonintajeiteji pimpomerentsiventeraro avirori pimpashiyetena paitapeerica. Nocaman-tajeitaquempiro Irineane Tasorentsi.

¹⁰Pineajeitaquena noquemisantanotaque, cameetsa nosavicajeitaque, te ontameji nantane. Aisati ineajeitaquena Tasorentsi, cameetsa nosaviquimojeitaquempi, noyemisantaririnte. ¹¹Jero oca noshiacantempiri: tempa cameetsa yoametiri shirampari itomipee. Piojeitaque noquempetacantajeitaquempi notomipee, nocantajeitaquempi pinquemisante, noveshireacaajeitaquempi, aisati noamejeitaquempi ¹²cameetsa pisavicajeite irveshireimenantempiri Tasorentsi. Tempa icoyeajeitaquempi pisavicajeitantzeari anta ipincatsaritinta, anta ishipaquireacojeirinta maaroni.

¹³Peerani, noquenquetsatacantapaa-quempiniri, pishiretasanotavacaro Irineane Tasorentsi. Te pijitavaqueroji iro nashi noneane, irootiquea piotaquero iroosanotaque irineane Tasorentsi, tempa queario oni. Piquemisantaque, irootaque opashinitacantajimpipi, oameetsatanta-jimpipi. Irootaque nocantantacariri Tasorentsi: "Ariove, iquemisantaqueri tesaronicasati pineane". Aitaque nocantani nocantapinitiri. ¹⁴Ari, noyemisantaririnte, piquempejeitacari yora quemisantajeitiriri Jesoquirishito anta Joreaqui. Iquisajeitaqueri jorio ayemisantaririnte anta, aisati iquempejeitaquempi pishaninca ara pinampiqui, iquisajeitaquempi iriori. ¹⁵Yoacantajeitaqueri jorio Jesoquirishito, aisati peerani yoajeitaqueri camantantatsiniri. Aisati iquempejeitaquena narori: iquisajeitaquena, te incoacaajenaji noshanincatajeari. Te onimoteriji Tasorentsi yantanirojeitaqueri: tempa iquisanirojeitaqueri maaroni

itsipapee atiri.¹⁶ Oshequi itsaneacotapini-vetaquena nonquenquetsatacaajeittempi avirorije, maaroni caari joriotatsi. Te incoacaajeivetempiji pavisacojeitaje. Aiquero iyatati yantlsruero caari cameetsatatsi, iro cantaincha meeca iquisaqueri Tasorents, queario iroasan-quetaajeiteri.

Icoaque Pavoro irineajeri aisati tesaronicasatis.

¹⁷Noyemisantarinte, te ancaratavaca-jeivetempaji, meeca oshequi nocoteajeitaquempi. Te aneavacaajeitajeaj, iro cantaincha te nomepacotempiji. Oshequi nocoaque aneavacaajeitajea aisati.
¹⁸Nocoajeivetaca nonquivantajeitajem-pime. Aisati narori nocoapinivetaca nojatashitempime apaniro, iro cantaincha yoipiavajana Satanashi.¹⁹Coajica impocapaaje aisati Avincatsarite Jesoquirishito. Iotaque iriori avirojeitake noquemisantacaajeitaqueri. Ariorica impocaje, nonquimoshireimentajeittempi, noveshireimentajeittempi, oshequi nonquenquetsatacojeittempi.²⁰Queario, noveshireimentasanojeitaquempi meeca, nonquimoshireimentasanojeitaquempi.

3 ¹Oshequi noquenqueshirejeivetaquempi, iro cantaincha tecatsi noncantea nareetajempi narori. Naamaaca ocameetsati nosavique apaniro aca Atenashiqui,² iro cantaincha nocoaque notianquempi irinti Timoteo. Tempa iriotaque ayemisantarinte, tempa iquempejeitaquee antajeitini Tasorents, aquenquetsatacojeitiri Quirishito, acamantajeitiri atiri yoaviscotantaque. Ari yareetapaaquempi Timoteo, yamitacotapaaquempi piquemisantasanotaque, aisati iveshireacaajeitaquempi.³Pamene, timatsi quisajeitaquempi, iro iquisantaquempi piquemisantaqueri Jesoshi. Iro cantaincha eiro picantashiretaquetsi, tempa piotitacani

intime quishempineri.⁴Notsipatanta-quempiniri, nocamantitaquempinii: “Ariorica pinquemisante, inquisaqueri tseencantatsiri”. Aitaque piojeitaque meeca moncarataca nocamantitaquempiniri,⁵ irootaque oshequi noquenqueshi-reantaquempi. Notiancaqueri Timoteo niotanteari irosatirica piquemisantajeiti. Naamaavetaquempi yantacaaquempi camaari caari cameetsatatsi. Ariorica pinquemisanterime camaari, natsipetash-tacarome noquemisantacaajeitaquempi peerani.

⁶Ari meeca yareetapaaaja aisati Timoteo. Ineaitimpi, meeca ocameetsati oca icamantapaaajanari: “Irosati icanta tesaronicasati, iquemisantsanojeitaque, aisati inintasanojeitaqueri itsipapee. Ineacameetsajeitaquempi, icoiteajeitaquempi”. Aisati narori, oshequi nocoteajeitaquempi avirori.⁷Oshequi nashinon-caaca narori aca, iquisheetaquena. Iro cantaincha niotaque picantatiani piquemisantajeitaque, irootaque noveshireimentantajeitaquempi.⁸Meeca nonquimoshirejeitanaque, niojeitaque piquearioventaquero piquemisantaqueri Avincatsarite.⁹Oshequi catsini noveshireimentaqueMPI, irootaque nopasonquitantacariri Apa Tasorents, aisati Avincatsarite Jesoquirishito. Tempa yamenacojeitaquee maaroni.¹⁰Noquenquetsatacapinitiri Tasorents: quitateri-qui aisati tsiteniriqui. Nocantiri: “Nocoaque pintianquena noneajeri aisati tesaronicasati”. Aisati nocoaque intianquena namitacojeittempi pinquemisantsanojeitanteari eiroquea pitseenashiretantajatsi.¹¹Nocoaque irareetacayena ara pinampiqui.¹²Nocoaque iramatacotempi cameetsa pinintasanota-vacaajeitea catsini, aisati pinintasanajo-teri catsini itsipapee. Nocoaque pimonca-rajaeitena, nonintasanojeitaquempi avirori.¹³Nocoaque iroameetsashiretasa-

notempi catsini, pinquempetanteariri iriori. Coajica impocaje Avincatsarite Jesoshi, intspajetaqueari maaroni quemisantajeitiriniri, yora yoameetsajeitiniri. Ari, impocajeiterica, nocoaque irineacameetsajeitempi Tasorentsi: tempa irio Apa arori.

Icantajeitiri: “Cameetsa pisavicajeite, pinintajeiteri itsipapee, panteneri Tasorentsi icoacaquemppiri”.

4 ¹Meeca, noyemisantaririnte, nocoaque pimajeitero oca noncantempiri: irootaque icoacaimppiri Avincatsarite Jesoshi. Noamejeitaquemppiro jaoca pincantajeiteari piveshireacantajeariri Tasorentsi. Ari pimatapinitaquerer peerani: aiquero pijatatiye meeca, pimatasonotero. ²Piojeitaquero icantaquemppiri Avincatsarite Jesoshi, novaajimpiro narori. ³Icoasanotaque Tasorentsi pincameetsatasanojeitanaque. Aisati te incoyeji pineavintsatero tsinane caari pai, ⁴irootiquea icoaque quiso poasanotero pijinasanori. Cameetsa paasanotero, pincavintsayero. ⁵Eiro piquempetaritsi caari quemisantiri Tasorentsi: inevetashitacaro tsinane, iotashitaca icoashitaca irineavintsatero. ⁶Aisati icoaque eiro pimatirotsi itsaneayetacari. Eiro pineavintsatitayetiritsi ijina pishaninca. Ariorica pantacoteri, iroasanquetasanotempi Avincatsarite. Tempa oca nocamantasanotitaquemppiro peerani. ⁷Te incocajaiteeji Tasorentsi anquempeteari otsiti aneavintsayetero tsinane, irointi icoacaajeitaquee ancameetsatanaque.

⁸Yora caari mayeterone oca nocantaquemppiri, te irio impiatsatea atiri, irinti ipiatsataca Tasorentsi: yora tiancaquemppirori Ishire. ⁹Pinintavacaajeitaca: tempa irootaque Tasorentsi oamejeitaquemppirori. Maname nosanquenatajempime aisati: “Pinintajeiteri piyemisantaririnte”,

tempa nantsipetearome. Tempa picantani pinintavacaajeitaca. ¹⁰Queario, pinintajeitaqueri ayemisantaririnte: maaroni yora maseroniasati. Meeca, noshaninca, noncantempi aisati, aiquero pijatatiye pinintasanojeiteri catsini. ¹¹Pincoajeitanaque pisavicajeite cameetsa. Eiro pashereiritsi itsipapee. Eiro paamaacota-ritsi. Pantaveetapinite, paanteari coiteimojeitimpipi. Tempa nocamantitaquemppironi oca. ¹²Ariorica pimajeitero, ari irineacameetsajeitempi maaroni caari quemisantatsi, aisati eiro ocoiteimojetimpitsi paitapeerica.

Intinaajeitanaje camajeitaintsiri, aisati impocaje Quirishito.

¹³Meeca, noyemisantaririnte, noninti noncamantempiro jaoca incantajeiteari yora ayemisantaririnte, camajeitaintsiri. Nocoaque piotasanoltero. Eiro piraacotasanolritsi, eiro piquempetaritsi yora caari iotatsine antinaajeitaje. ¹⁴Ayojeitaque icamaque Jesoshi, aisati itinaanaja. Aisati inquempejeitaqueari maaroni quemisantajeitaqueriri, camajeivetainchari: irootinaajeitajeri Tasorentsi. Ariorica impocapajae aisati Jesoshi, intspajetaqueari. ¹⁵⁻¹⁷Jero oca noncamantempi, irootaque irineane Avincatsarite. Coajica impocaje, aisati intianqueri Tasorentsi inampirepee, incanteri: “Meecaquea pijajeite pampatojeiteri maaroni quemisantajeitanari”. Irosati intiotantaquearo itiore, aisati incajemapaaque yora jivatacajeitiriri. Irosati irisaviincantapaaqueari Avincatsarite, imponeaquea inquitequi jenoqui. Eirositarica acamajeititsi arori, eirotitsa ajivajeitiritsi camajeitaintsiri ajajeite jenoqui. Intinaajeitavajetsita quemisantajeitiriniri Quirishito. Impojiquea ajajeite, antsipajetaqueari camajeivetainchari. Iraayetanaquee anta menceriqui, antonquiotavaqueari Avincatsarite anta

inquitequi. Impoiji ancantaitatiyempani quiso avanaqueri. ¹⁸Pincamantajeiteri maaroni ayemisantaririnte oca nocamantaquempi, piveshireantajeiteari, maaroni.

5 ¹Te nonintacayempiroji nosanquenatempo: tempiro jaoca oncarate impocantajeari Jesoshi. ²Yora coshitantatsiri: ariorica incoshite, irimananaquearo tsiteniri. Aisati iquempetacari Avincatsarite, imanaquero jaoca oncarate impoqe: tempa piojeitaquero oca. ³Ariorica incanteete: "Cameetsa meeca asavacajeite, tecatsi antanateene", ari omapocaqueri irashinoncaquea. Inquempetearo tsinane tsomontetatsiri. Omapocaqueri antsicaneentaqueero, tecatsi oncantero ompeajearo.

⁴Iro cantaincha, noyemisantaririnte, piojeitaque avinti: te onquempetimotemppiji pintime tsiteniriqui. Eiro imapoquimpitsi Avincatsarite, eiro iquempetacaantimpitsi yora coshitantatsiri, imapoquiri ishaninca icoshitiri. ⁵Aitaque piojeitaque, oquempetimotimpi pitimi quitaiteriqui. Te arojei caari iojeitatsi, te antimeji tsiteniriqui. ⁶Te inquenqueshireteaji itsipapee, iro cantaincha eiro aquempejetaritsi arori. Tsame anquenqueshirejeitea ainti, aamaajeitajeari Avincatsarite. Eiro ashinquitatsi, irointi anquenqueshireempa. ⁷Imaapiniyeeti tsiteniriqui, ishinquitapiniyeeta tsiteniriqui, ⁸iro cantaincha aquenapinijeitaque ainti quitaiteriqui, eiro ashinquitatsi. Ariorica imanatapinita soraro, ipashicanejitacaro ashiro, aisati ipashicainatacaro. Yaventacaro, eiro aveantaritsi ivesamentooyerinemeri. Tsame anquempejeiveteari irlori, iro cantaincha aventeari Tasorentsi, irinti: anquemisanteri, aninteri, ayotaque ari iroavisacojeitaquee, impoiji eiro imatanteetsi yora camaari. ⁹Te incoyeji Tasorentsi inquisajeitee, irointi icoaque iroavisacojeitee, ariorica

anquemisanteri Avincatsarite Jesoquirishito. ¹⁰Icamimentajeitaquee maaroni, aneatsiri aisati camaintsiri, antsipajeitan-teariri maaroni. ¹¹Irootaque noncantantempiri: poametavacaajeitea maaroni piveshireajeitanteeari, piotasanojeitan-teari. Tempa aitaque pimajeitaquero meeca.

Jero oca icoacaqueriri Pavoro irantajeiteri.

¹²Noyemisantaririnte, pimpincatsajeiteri maaroni quemisantacaajeitimpipi, tempa ipomerentsiventimpipi maaroni. Tempa irio Avincatsarite tiancaqueriri, irootaque ipincatsariventajeitantaquem-piri aisati yoamejeitantaquempi.

¹³Cameetsa yantaveetapiniti, irootaque ocameetsatantari pimpincatsatasanojeiteri, pinintasanojeiteri. Aisati nonintaque paacameetsatavacaajeitea maaroni.

¹⁴Meeca nocoaque noncamantajeitempi, noyemisantaririnte, nocoaque pincantajeiteri yora peranti eiro iperatatsi. Yora tsaroashenti, piveshireacayeari. Pamitacojeiteri yora caariquera materone inquemisantsasanote. Jentsiquero poamejeiteri maaroni, eiro piquisatsajeitiritsi.

¹⁵Ariorica iroashinoncayeetempi, eiro pipiataritsi, irointi pincavintaavacaapini-jeitea. Aitaque pincanteari, pincavintsa-apinijeiteri maaroni atiri. ¹⁶Piveshireimentapiniteari Tasorentsi, ¹⁷pinquenquetsatacaapiniteri. ¹⁸Jaocarica incanteetempi, pincanteri: "Irove, Apa, iroashinoncayeetenata; aviroquea avinti noveshireimenta-quempi", irootaque icoacaquempi. Tempa avirojeitaque quemisantajeitiriri Jesoquirishito.

¹⁹Pincantasanojeitero Ishire Tasorentsi oamejeitempi, eiro pipiatsajeitarotsi. ²⁰Eiro pitseenquiroti icamantimpipi itiancane Tasorentsi. ²¹Piotasanotavaquero maaroni iroametempimeri itsipapee. Ariorica

ocameetsasasanoti, ari pishiretearo. ²²Paamaaventearo maaroni caari cameetsatatsi.

Ivetsajeitari Pavoro.

²³Yashi yoiro isavicacaajeitaquee Tasorentsi cameetsa. Nocoaque iroameetsashiretasanojeitempi. Nocoaque iramitacotempi poameetsajeitiero maaroni piquenqueshiretapinijeitiri aisati maaroni pantapinijeitiri. Cameetsa inquempoyejempi irosati impocantajeari Avincatsarite Jesoquirishito. ²⁴Icoyeaquempi Tasorentsi,

eiro meeca yamatavijeitimpitsi, aitaque irimataquero maaroni icantajeitaquempi.

²⁵Noyemisantaririnte, nocoaque pincantanijeiteri Tasorentsi: “Pamitacoteri Pavoro”. ²⁶Pincanteri maaroni ayemisantaririnte ara novetsajeitari. ²⁷Aisati nocoacaquempi pineanajeiteneri maaroni pishaninca oca nosanquenajeitaquempi. ²⁸Nocoaque incantaitatiyempani irineshinencajeitempi Avincatsarite Jesoquirishito.

Narotaque sanquenajeitimpiori oca: *Pavoro*

YAPIITAJIRO PAVORO ISANQUENAJEITINIRI TESARONICASATI

**Yovetsajeitajari aisati Pavoro
tesaronicasati.**

1 ¹¿Savicajeitatsimpampa, tesaronicasati? ²Tecatsimpa oajeitempime? Narojeitaque aca Pavoro, Shirivano, aisati Timoteo; nosanquenajeitajimpiro, aisati nosanquenajeitajiniri iriori maaroni noyemisantarinre ara. Tempa avirojeitaque quemisantajeitaquerir Apa Atasorentsitsite aisati Avincatsarite Jeso quirishito. ²Nocoaque irineshinoncajeitempi aisati cameetsa irisavicaajaitempi.

**Iquemisantaque tesaronicasati, aisati
inintavacaajaiteitaca.**

³Ocameetsati nopasonquitacoventapinitimi, noyemisantarinre. Aiquero pijatati piquemisantsanojeitanaque aisati pinintavacaasaanojeitanaca. Irio nopasonquitapinitiri Tasorentsi. ⁴Queario, nocamantajeitiri itsipapee quemisantiriri picantatiani piquemisanta-jeiti. Oshequi iquisheetaqueMPI, aisati oshequi yoashinoncaajaqueMPI, iro cantaincha te pojoqueroji piquemisanti. ⁵Pineaquero, cameetsa ipincatsariventaqueMPI Tasorentsi. IshinetacoventajeitaqueMPI pineacatsijeitacaro maaroni oca, pincameetsashireantajeari, pintsipajeitanteeariri anta ipincatsaritinta.

⁶Iro cantaincha icoaque Tasorentsi impiateari yora oashinoncaajaqueMPI, aitanaquempsa irineashii tetemparota

iriori. ^{7,8}Meeca yoashinonqueevetaqueMPI, iro cantaincha coajica cameetsa irisavicajacayempi Tasorentsi, pincarajeitenarori. Coajica irimapocapaquee Avincatsarite Jesoshi, imponeanaquea inquitequi, intsipatapaaqueeari inampiree shintsitasanotatsiri. Irishipaquireapaaque, inquempejitatapaaqueearo paamari. Cameetsa irisavicaajaitepaaquee, iro cantaincha iroasanquejeitapaaqueri maaroni caari quenqueshireterine: maaroni yora caari quemisanterone icantayevetariri. ⁹Incantaitatiyempani irineacatsitacaqueeari anta Sharincaveniqui, eiro catsini ineiritsi iriori Avincatsarite. Eiro ineiritsi impincatsaritasanote, eiro ineiritsi intasoncantasanoyete.

¹⁰Ariorica impocaje Avincatsarite, impincatsajeitavaqueri maaroni atiri yoameetsajeitiri, aisati iramenasanojeitavaqueri catsini maaroni quemisantajeitiriri. Piquemisantajeitavaqueri peerani maaroni nocamantajeitaquempsiri, irootaque pincarajeitanteeariri ariorica impocaje. ¹¹Ari icoyeajaqueMPI Atasorentsitsite, meeca nocantapinitiri iramatacojeitempi, nocoaque iriveshireimentasanojeitempi. Aisati nocantapinitiri irimatacaajaitempiro maaroni cameetsatsiri icoacaquaempiri panteneriri. Ariorica pinquemisantsanojeiteri, pantajeiteneri icantaqueMPI; aisati nocantapinitiri intasoncaventajeitamtempi pimatasanotantearori. ¹²Irineajeitamtempi

atiri cameetsa pisavicajeitaque, irootaque impincatsajeitanteeariri Avincatsarite Jesoshi. Ioejiti atiri aviro quemisantiriri Jesoshi, irootaque irineacameetsajeitan-tempiri. Tempa oshequi ineshinoncajeita-quee Atasorentsite, aisati Avincatsarite Jesoquirishito.

**Iquenquetsatacotaqueri Jesoshi,
impocantajeari.**

2 ^{1,2}Meeca, noyemisantarinte, piojeitaque impocaje Avincatsarite Jesoquirishito. Impocajerica, ari irampa-tojeitapaajee maaroni, ancarajeitanteeariri iriori. Meeca noninti noncamantempi: eiro picantashirejeititsi, aisati eiro pitsaroajeititsi. Ariorica incanteetempi: "Areetapaaja Avincatsarite", eiro pishiretarotsi incanteetempiri. Ariorica incanteetempi: "Oametaquena Ishire Tasorentsi, ocanti pocaji". Ariorica incanteetempi: "Noneaqueri narori". Ariorica incanteetempi: "Ocanti isanquenare Pavoro areetaja". ³Yamataviyeetim-picari. Eiro pishiretimatarotsi incantem-piri. Tequera omoncarateaji impocanta-jeari Jesoshi. Irijivajeite oshequi atiri inquisajeiteri Tasorentsi, impiajeiteari. Aisati intime yora janirotatsineri Sharincaveniqui, yora jivajeitiriri quisapi-nitiriri Tasorentsi. ⁴Inquisaniroteri Tasorentsisanori, aisati inquisajeitero maaroni ijitasorentsitashivetari atiri. Incantanirote: "Itimayeveta oshequi tasorentsiyevetachari, iro cantaincha nanaacojeitaqueri nainti. Notasorentsita-sanotaque catsini". Irisavicanirotaque anta ivancoqui Tasorentsi, incantanirota-que: "Naro nainti Tasorentsisanori, pinquemisantajeitena". Ari, impoijiquea impocaje Quirishito, irinti.

⁵Peerani notsipajeitantimpiniri, nocamantitaquemppironi maaroni oca. Tempa ainiro piquenqueshiretaqueru.

^{6,7}Impocanirotaqueame yora quisasano-

taqueriri Tasorentsi, iro cantaincha timatsi tsaneacariri. Timatsi yantanirove-tacari meeca, iro cantaincha imanaquero. Te oncameetsateji oca yantanirotaqueri. Ainiroqua tsaneacariri, irootaque caari iconijatanta. Ariorica omoncararatapa-aquea impocantajeari, irijate yora shentiriri tsaneacariri, impoiji impocani-rotasanotapaaque. Piojeitiri yora tsaneacariri: tempa irio Tasorentsi. ⁸⁻¹¹Ari inconijatasanotapaaque yora caari quemisantanirotiro icantiri Tasorentsi. Iro impocanteari intianqueri yora Satanashi. Irimatacayeri paitapeerica, intasoncantayete: incoapaaque avajeita-viqueru cavaco. Aisati incoapaaque iramatavijeitapaqueri atiri, maaroni. Irantanirotapinitero caari cameetsatatsi, iramatavitasanotanteeariri maaroni yora jatatsineri Sharincaveniqui: queario, te incoajeiteji irijojeitero tampaticatatsiri oavisacojeiterinemer. Ari irishineteri Tasorentsi iramatavijeiteri, inquemisanta-jeitero tseyantsi. Iro cantaincha impoita-paaqueri Avincatsarite Jesoshi, intasonca-paaqueri, iroapaaqueri. Irishipaquireaco-tapaaqueri, impoyereapajeri, poyere. ¹²Impoiji iroasanquetaasanoteri Tasoren-tsi maaroni caari quemisantiro queariota-sanotatsiri: yora veshireimentarori caari cameetsatatsi.

¹³Iro cantaincha nopasonquitapinitiri Tasorentsi. Avirojeitaque, noyemisantarinte, nopasonquitacoventajeitiri. Inintajeitaquemppini Avincatsarite.

Peerani catsini icoyeajeititaquemppini Tasorentsi iroavisacojeitempi. Ari oameetsatasanojeitaquemppi Ishire, aisati pishirejeitacaro quearioyetatsiri, irosati yoavisacojeitantimpiri. ¹⁴Narotaque ovaajimpiori oca icamantaquemppi paviscacotantajari. Icoyeajeitaquemppi pinquempeteari Avincatsarite Jesoquiri-shito, pincarajeiteri pimpincatsarijeite.

¹⁵Pincantaitatiyempani pinquemisantasa-

nojeite. Eiro pipeacojeitarotsi maaroni noametitaquempiri peerani notsipatantaquempiri. Aisati eiro pipeacojeitarotsi maaroni nosanquenajeitaquempiri.

¹⁶Oshequi intintajeitaquee Avincatsarite Jesoquirishito, aisati Apa Atasorentsite. Icantatiani iveshireacaajeitaquee. Ineshinoncajeitaquee, irootaque ayojeitantacari irimajeiteero maaroni icantajeitaqueeri. ¹⁷Nocoaque iriveshireacaajeittempi. Aisati, paitarica pantapiniteri, paitarica pincanteri, nocoaque iramatacotapinitempi.

Icantajeitiri Pavoro: “Jero oca pantajeiteri”.

3 ¹Meeca, noyemisantaririnte, noncamantempi. Noninti pincanteri Avincatsarite iramatacotena noshintsita-cantearori novaajero irineane, aisati impincatsajeitanteariri maaroni quemajeitavaqueroneri, inquempejitempi avirori. ²Timatsi caari cameetsajeitatsi coatsiri iroashinoncayena. Pincanteri Tasorensti iroavisacotena. Te meeca inquemisantajeiteji maaroni atiri. ³Eiro yamatavitimpitsi Avincatsarite, cameetsa pishireteari. Iramitacotempi piveshireimentasanotanteariri, aisati irojocacoventempi: eiro ishinetiritsi camaari irantacayempiro paitapeerica. ⁴Iriotaque Avincatsarite iotacaaquenari pimatapinitaqueri maaroni nocantimpiri. Aitaque pincantaitatiyempani pinquemisantena.

⁵Avincatsarite Quirishito icantatiani iquearioventiniri Tasorentsi maaroni. Nocoaque irimatacaaejempiro pinquempeteari oriori. Aisati nocoaque irimatacaaejempiro pinintasanojeiteri.

⁶Meeca, noyemisantaririnte, noncamantempiro oca icoacaquempiri Avincatsarite Jesoquirishito. Ariorica iperataca piyemisantaririnte, eiro piquempejitaritsi. Te nonquempeteariji narori; pineajeitaquena, te nomperateaji

nainti. ⁷Piojeitaque ocameetsatimojeitimpri pinquempejeitenavirori. Peerani, notsipatantaquempiniri, te nomperateaji.

⁸Ariorica pipayetaquenaro noari, nopinataquero. Aitaque nantaveetapinitaque quitaiteriqui aisati tsiteniriqui.

Nopomerentsiventacaro maaroni coiteimojeitaquenari oncanteata tecatsi pimpomerentsiventenari avirori.

⁹Ocameetsavetaca noncoacotempime paitapeerica, iro cantaincha nonintaque nonijayempiro ocameetsati pantaveetapinite, eiro piperatatsi. ¹⁰Notsipatantaquempiro nocamantajeitaquempiro oca: yora caari antaveetatsine, eiro yoatsi.

¹¹Noquemacotaqueri picarajeitaqueri peranti. Te irantaveeteji, irointi iquenayeti yaamaacotashitari ishaninca, ineaveetashita, vero, vero. Te oncameetsateji. ¹²Tempa ineajeitaquee Avincatsarite Jesoquirishito, irootaque nocamantajeitantzimpirori oca. Pincantasanojeiteri irimajerejeite, intsamejeite, impomerentsiventero coiteimojeitacariri.

¹³Noyemisantaririnte, eiro piperatarotsi pintacotantajeitea. ¹⁴Pioteri yora caari quemisantiro oca nosanquenatimpipi. Eiro piquempetacaasanotiritsi piyemisantaririnte, oncanteata iroashiretanteari.

¹⁵Eiro piquishiritsi, irointi cameetsa poametasanoteri: tempa irioveta piyemisantaririnte. ¹⁶Tempa cameetsa isaviqui Avincatsarite, meeca nocoaque cameetsa irisavicacaajeittempi maaroni quitaiteriqui, jaocarica pisavicajeiteri. Nocoaque quiso iroajeittempi.

¹⁷Narotaque nainti Pavoro vetsajeitaquempiro. Pineaquero nosanquenare piotanteari narosanotaque pacantaqueimpirori. Aitaque nametacaro: ariorica nosanquenatapinitiniri ayemisantaririnte, nosanquenajeitiniri novajiro. ¹⁸Nocoaque irineshinoncajeittempi Avincatsarite Jesoquirishito.

Ari ocarati: *Pavoro*

IJIVATAQUE PAVORO ISANQUENATINIRI TIMOTEO

Ivetsatari Pavoro Timoteo.

1 ¹¿Savcatsimpi, Timoteo?
¿Tecatsimpa oyempine? Narotaque
Pavoro sanquenatimpiori oca;
itiancaquena Avincatsarite Jesoquirishito
noquenquetsati, aisati itiancaquena
Tasorents. Iriotaque matirori yoavisaco-
jeitee, ayotasanojeiti te intimeji pashini
oavisacotantsine. ²Noquemisantaca-
quempi peerani, irootaque noshiacantan-
timpiri notomisanori. Nocoaque irineshi-
noncategimi Apa Atasorents, incavin-
tsayempi, cameetsa irisavicacayempi.
Aisati inquempetacayempi Jesoquirishito,
yora Avincatsarite.

Isaviqui Timoteo Ejesoqui.

³Nojatantacari Maseroniaqui, nocanta-
sanotanaquempi: “Pisavicaquetsita aca
Ejesoqui”. Nocoacaquempi pincantimen-
teri amatavitantatsiri; pincantajeiteri:
“Eiro poametantirosi tseyantsi”.
⁴Pincantajeiteri ayemisantaririnte: “Eiro
piquemisantashitarotsi iquenquetsatashi-
yetari”. Pincanteri aisati: “Eiro pishireta-
shitarotsi iquenquetsatacotashiyetari
maaroni peeraniniri. Patsipetashitarocari
paamaashiyetearo paitaperica. Tecatsi
oncantempi ocapee oamejeitempi. Ainiro
icoacaqueeri Tasorents: ariorica
ashireteari inti, ari iroamejeiteero”.
⁵¿Paita nocamantantimpiori oca?
Irootaque nocamantantimpiori nocoaque
pincameetsashiretanaje, nocoaque

pintime cameetsa, eiroquea poashiretan-
tatsi; nocoaque pinquemisantasano-
tanaque. Ariorica pimajetaquero oca, aitaque
pimataquero aisati pinintasanojeiteri
itsipapee. ⁶Ainiro comiyetacarori
aparopee, iquenquetsatacotashiyetaro
rinti caari ioyeti, yatsipetashitaca
icantavacaimentaro. ⁷Icoayeveta
iroametanterome icantacantiniri
Moishishini, iro cantaincha te iriotimate-
roji icantavetari. Te iriotimateroji
paitarica icamantacotasanovetari, vero,
vero: ishiaqueri eroti.

Iquenquetsatacotiro icantacantiniri Moishishini.

⁸Ayojeiti ocameetsati icantacantiniri
Moishishini, iro cantaincha acomitaro-
cari. ⁹Piotasanotavaquero oca noncaman-
tempiri: arojeitaque yoameetsatane
Tasorents, te aro irisanquenateene
Moishishini. Irinti isanquenatinri yora
caari quemisantiro irineane Tasorents:
yora piatsatariri, caari quemisantiri, yora
caari cameetsatatsi, antapinitirori caari
cameetsatatsi, caari quenqueshiretiri
Tasorents, oiriniri iririni, oironiri
irinironi, oantatsiri, ¹⁰neavintsatirori
caari yai, ora neavintsatirori caari ai, yora
tsinampairiri ishiramparirinte, noshican-
tatsiri, tseyayari, maaroni. Aisati isanque-
natiniri maaroni quisayetiriri yora
oametantayetirori cameetsatatsiri. Tempa
irio Tasorents sanquenatacaaqueriniri
Moishishini. ¹¹Cameetsa oni oca

noametantiri. Itiancaquena Tasorentsi noncamantacoteri irinti, ioti nomataqueneri icantaquenari. Cameetsa oca nocamantacotiriri: tempa icameetsatasanoti irinti.

Yantayetiri Pavoro.

¹²Icoyeaquena Avincatsarite Jesoquirishito nanteneri paitapeerica icoacaquaenari. Iotaque nomoncarateneri maaroni icoacaquaenari: iotaque eiro namatavitiritsi. Aisati imatacaquaenaro nantayetiniriri, irootaque nocantantarirari: "Ariove, pimatacaquaenaro". ¹³Peerani nocantimaveitarini, noshemetimoveitarini, aisati noquisajeiveitarini maaroni quemisantiriri. Iro cantaincha tequerani nioveitearini Quirishito, tequerani nonquemisantaveiteani. Te nioveiteani paitarica nantayetiniriri, irootaque icavintsantaquenari. ¹⁴Ineshinoncatasanotaquena catsini Avincatsarite: yoametaquena noquemisantiri Jesoquirishito, aisati nonintasanotiri. ¹⁵Queariotaque oca noncamantempi, cameetsa pinquemisantavaquero. Ipocapaaque aca quipatsiquica Jesoquirishito yoavisacojeitaqueri caari cameetsajeitatsi. Nanaacojeitaquempi maaroni, te noncameetsaveiteani catsini. ¹⁶Irootaque icavintsantaquenari, ijivataquena narori ineshinoncatasanotaquena, te inquishenaji. Irootaque ayotantacari aisati inquempejeiteri iriori maaroni quemisanterineri coajica: irineshiloncajeiteri, incantaitiyempani intimasanojeitajatejari anta inquitequi. ¹⁷Incantaitiyempani Atasorentsi impincatsariventajejatjee arori. Tecatsi incantea incame. Yashi yoiro imana. Apaniro itasorentsiti. Tsame ancantaitiyempani ampincatsatasanojeitanaqueri, ancamatapinijeitanaqueri atiri icameetsatasanoti. Aitaque ancanteari.

Jero oca icantayetiriri Pavoro Timoteo.

¹⁸Piotaque, Timoteo, noshiacantaquempi notomi. Pinquemisantero oca

noncantempi. Tempa peerani Tasorentsi, icantajeitaqueri ayemisantariinte: "Oshequi irimatenaro Timoteo nocooacaqueriri". Irossati yovaajeitantaqueeroriarori. Meeca pimamatero icamantacotaquempiri. Pioti yora soraropee ishinsiventiniri iyapitanote paitapeerica icantiriri. Meeca, pinquempeteari, pishintsiventeneri paitapeerica pantenirri Avincatsarite, ¹⁹pinquemisantasano-tanaqueri. Ariorica pioti ocameetsati pantero paitapeerica, ari pimamatero. Ainiro yora iovetachari te oncameetsateji paitapeerica, iro cantaincha yantashitacaro, impoiji yojocajiro iquemisanti. ²⁰Aitaque imataquero Imeneo aisati Ariantero: yojocajiro iquemisanti. Te oncameetsateji oca, irootaque nocantatarirari iriori: "Iroashinoncayempita Satanashi"; oncateataquea iritanteari pashini asháninca eiro icantimatantaritsi iriori Tasorentsi.

Icantiri: "Pincanteri Tasorentsi iramatacojeiteri maaroni atiri".

2 ¹Ari nojivataque noncamantempiro oca: pinquenquetatsacayeri Tasorentsi, pincanteri iramatacojeiteri maaroni atiri, pimpasonquitacoventeri. ²Aisati pincanteri iramatacojeiteri pincatsaripee aisati maaroni pashini ivincatsaririnte, impoiji cameetsa asavicajeitanteeari, eiro itimitsi ashereajeiteeneri. Aisati cameetsa amatasanotero anquemisantajeiteri Tasorentsi, ampincatsajeiteri. ³Cameetsa ancamatapiniteri Tasorentsi oca, irootaque icoiri; tempa iritotaque oavisacojeitaqueri. ⁴Icoasanotaque iriori avavisacojeitaja maaroni, aisati icoaque ayojeitero queariotatsiri, maaroni. ⁵Maaroni asavicajeiti arori aca quipatsiquica. Ainiro Tasorentsi apaniro, isaviqui irinti inquitequi. Te aneapiniteriji, iro cantaincha ainiro aparoni shirampari vaapiniteerori irineane: yora Jesoquiri-

shito. Aisati apaniro yovaaqueneri Tasorentsi aneane arori, ashaincatacariri. ⁶Yora Quirishito, irisati coashita-chi, icanti: “Nocoaque noncamimentajeiteri maaroni atiri noavisacojeitanteeariri”. Ari imataqueenero ayojeitancariri. ⁷Ipeaquena camantantatsiri, itiancaquena noamejeiteri maaroni atiri inquemisanta-jeitero oca queariotatsiri. Te nontseyaj, queariotaque oca nocantimpri.

**Jaoca incanteari
anquenquetsatacayeri Tasorentsi.**

⁸Ari nocoaque anquenquetsatacayeri Tasorentsi, maaroni. Ariorica anquenquetsatacayeri, cameetsa asavicajeite: te oncameetsateji anquisheri itsipapee, te oncameetsateji antseenqueri Tasorentsi. ⁹Aisati nocoaque onquitsaatea tsinane cameetsa, eiro ocoitsi irineveyeetearo, aisati cameetsa onquenqueshiretea. Te oncameetsateji ontsiricoishitero oishi irineveyeetantearori, aisati te oncameetsateji oaneencashitearo oro, aisati perata. Aisati te oncameetsateji oshemetacayero oitsaare pinatasanotachari: ineveyeetarocari. ¹⁰Irointi ocameetsati oneshinoncatante: ari ocameetsavetari omajeiterome maaroni quemisantajeitiriri Tasorentsi. ¹¹Ocameetsati onquemisantsanoteri tsinane shirampari, aisati omajerete, iotantearori paitapeerica. ¹²Te noshineteroji tsinane oametante, aisati te oncameetsateji omperanateari shirampari, irointi ocameetsati omajerete. ¹³Ijivataqueri Tasorentsi peerani yovetsicaqueri Aran, impoiji iroori yovetsicaqueri Eva. ¹⁴Te iramataviteriji Satanashi Aran, irointi yamatavitaque tsinane, impoiji antaquero caari cameetsatatsi: te onquemisanteriji Tasorentsi. ¹⁵Iro cantaincha ariorica oncavintsayeri tsinane otomipee, oncantatiyempani onquemisanteri Tasorentsi, onintajeiteri oshanincaphee, cameetsa osavique,

cameetsa onquenqueshiretaquea, ari oaviscacotaquea.

**Jaoca incanteari yora jivatacaajeitiriri
iyemisantaririnte.**

3 ¹Queario oca icanteetiri: “Ariorica icoaque shirampari irijivatacaajeiteri iyemisantaririnte, tempa ocameetsati oca icoaqueri”. ²Ariorica irijivatacaajeiteri iyemisantaririnte, te oncameetsateji ontame irantane. Cameetsa iraye ijina aparoni, te oncameetsateji irishinquitea, cameetsa inquenqueshiretanaquea, incameetsashirete, cameetsa irineshinoncatavaqueri quivanterineri, cameetsa iriotasanote iroametante. ³Te oncameetsateji irirapinitero quepishijatasanotsiri, te oncameetsateji inquishea; irointi cameetsa incavintsante, cameetsa irisavique, te oncameetsateji irinintasano-teri quirequi. ⁴Cameetsa iroametapinitero ijina, cameetsa iroametapinijeiteri itomipee, inquemisantajeiteariri iriori, eiroquea ipiatsajeitantaritsi, cameetsa irisavicantajeitari. ⁵Eirorica imatirotsi inquemisantacayeri itomipee, aisati ijina: jaoca incanteari irintacoteari maaroni yora quemisantajeitiriri Tasorentsi? ⁶Te oncameetsateji irijivatacante iroquera quemisantatsi: ishemeticari. Iquempetari-cari camaari, ishemetaque peerani, impoiji yoasanquetaqueri Tasorentsi. ⁷Cameetsa iriojeiteri yora caari quemisantajeitatsi, incantajeite: “Icameetsati yora jivatacaajeitiriri quemisantsi-siri”. Impoiji eiro imatantaritsi incantimajeiteri, aisati eiro imatantaritsi camaari irantacayeri caari cameetsatatsi.

**Iquenquetsatacotiri amitacotapinitiriri
iyemisantaririnte.**

⁸Yora amitacotapinitiriri iyemisantaririnte: cameetsa irishiyeri yora jivatacaajeitiriri, incameetsashiretanaque. Te oncameetsateji iramatavitanite. Aisati te

oncameetsateji irirero oshequi cachojarí. Aisati te oncameetsateji inquenqueshireteri quirequi iroshequiyeri. ⁹Cameetsa inquearioventero inquemisantasanotero maaroni yoameyetiriri Tasorentsi, aisati ocameetsati iriote te aneeroji irantane. ¹⁰Pijivate pamenasanoteri, piotasanoteri icameetsatasanotirica. Ariorica piojeitaque icameetsatasanotí, ari pincanteri iramitacojeiteri quemisantajeitatsiri. ¹¹Aisati onquempeteari ijina, oncameetsashiretanaque: te oncameetsateji oncantimatante, te oncameetsateji oshinquitea, te oncameetsateji amatavítante. ¹²Yora amitacotantsiri, cameetsa iraye ijina aparóni. Cameetsa iriote inquemisantacaasanoteri itomipee: impincatsateri iriori iriri. Aisati cameetsa iriote inquemisantacaajeiteri maaroni saviquimojeitiriri. ¹³Ariorica cameetsa iramitacojeiteri iyemisantaririnte, ari impincatsayeeteri, aisati irimatero inquemisantasanotero Jesoquirishito, eiro itsaroacaaritsi.

Iquenquetsatacotiri quemisantajeitiriri Jesoshi.

^{14,15}Nocoavetaca intsipaite nareetitapeempime, iro cantaincha eirorica nomatirotsi. Irootaque nosanquenatantimpiori oca: nocoaque piote jaoca acantajeitari. Icoyeajeitaquee Tasorentsi: tempa arojeitaque quemisantajeitiriri. Aneatsiri ini. Ayojeitiro oca queariotasanoatsiri: cameetsa anquearioventero avaayetero. ¹⁶Queario, te ayotashiteaji jaoca icantari Tasorentsi, iro cantaincha iotacaajeitaquee Quirishito. Tasorentsi ini, iro cantaincha yatiritapaaque. Ora Ishire, irootaque iotacaajeiteeri itasorentsitaque. Yora inampirepee Tasorentsi yamenacoventajeitqueri Quirishito. Acamantacojeitaqueri arori maaroni nampitsipeequi, iquemisantajeitqueri savicajeitatsiri. Yovancajiri iriri aisati inquitequi, cameetsa isavicapaaaji catsini.

Quearioyea yoameyeetimpircari tseeyantsi.

4 ¹Jero oca ocamantasanajeitee Ishire Tasorentsi. Coajica, irotimataintsi impocantajeari Quirishito, intime jocajeiteroneri oca queariotatsiri aquemisantajeitiri. Inquemisanteri amatavijeiterineri, ovaayetirori yoameyetiriri camaari iriori. ²Iramatavítante yora atiri, iro cantaincha irishiacanteame iquemisanti. Tecatsi incantea iriote te oncameetsateji oca icantayetiri. ³Intsaneapiniteari shirampari iraye ijina, aisati intsaneaquearo tsinane aye ojime. Aisati intsaneapitsataqueeri avajeiteari avari yovetsicaqueeri Tasorentsi. Aquemisantajeitiri Tasorentsi, ayojeiti queariotaque yoamejeitaqueeri irinti. Aitaque icoaque ampasonquitacoteri ayeari, irosati avanteariri. ⁴Ocameetsajeitaque maaroni yovetsicaqueri Tasorentsi. Ariorica ampasonquiteri, cameetsa avajeiteari, eiro apinquiritsi. ⁵Yoameetsantaqueeri Tasorentsi avajeitari. Ariorica ampasonquiteri, aisati anquenqueshiretero irineane, ocameetsati avapinijeitari maaroni.

Pinquearioventeneri Tasorentsi maaroni icantayetimpiri.

⁶Ariorica povaajeiteneri ayemisantariinte oca nocantimpiri, ocameetsati. Tempa pishiretapinitacaro, oametasanataquempi. Ariorica poamejeiteri itsipapee nocamantimpiri, ari incantempi Jesoquirishito: “Cameetsa oca pantaqueñarí”. ⁷Eiro pishiretarotsi oca iquenquetsatashitari tseeyari: te oncameetsateji pinquenqueshiretapinitero. Irointiquea pinquearioventero pinquemisantasanotero Tasorentsi, irinti. ⁸Ocameetsaveta pinquenaveete aisati pintsameete, oshintsitasanotantajeari pivatsa; iro cantaincha ocameetsatasanotí catsini

pinquearioventeneri Tasorentsi paitapee-
rica panteneriri. Eiro patsipetarotsi
irointi: cameetsa pisavique meeca, aisati
cameetsa pisavique coajica anta inquite-
qui.⁹ Queariotasanotaque oca nocamanta-
quempi. Ocameetsataque irishirejei-
tearo maaroni atiri.¹⁰ Apomerentsiventa-
cari atiri, aquematsicatimentacari
inquemisantajeitajeari. Aneatsiri ini
Tasorentsi, ayojeiti eiro yamataviteetsi:
iriotaque oavisacojeitiriri maaroni atiri.
Queario, yoavisacotasanojeitiriri maaroni
quemisantajeitiriri.

¹¹ Pincantajeiteri atiri irimamajeitero oca
nocantimpipi, poametasanojeiteri.¹² Evana-
riquerampi, iro cantaincha eiro pishineyetsi
intseenqueetempi. Paitapeerica
pantayetaqueneriri Tasorentsi, cameetsa
pimayetero, inquempetantempi piyemisan-
taririnte: pineanate cameetsa, pisavique
cameetsa, pinintajeiteri itsipapee, pinquemi-
santeri Tasorentsi, poameetsantero maaroni
pinquenqueshreyeteri.¹³ Coajica noneajan-
tempi. Meeca pineanatapiniteneri ayemisan-
taririnte irineane Tasorentsi, piveshireaca-
piniteari, poametapiniteri. Pincantatiyem-
pani, irosati nareetantapaajeari.¹⁴ Peerani
icamantacotantaquempi, aisati icantanta-
riri jivatacaantatsiri Tasorentsi iramitaco-
tempi, aisati yajiricainataquempi, irosati
imatacaantaquempi Tasorentsi. Meeca eiro
piperaventarotsi oca imatacaaquempi.
¹⁵ Pimatapinitero oca imatacaaquempi,
iriotasanojeitajeari maaroni atiri
pimatasanotaquero.¹⁶ Pinquenqueshretas-
notero paitarica pantayeteri, aisati paitarica
poameyeteriri: pinquearioventajeitero.
Ariorica pimajeitero oca, ari poavisacota-
cantajeiteri maaroni quemajeitempineri,
aisati paviscotaje avirori.

Jaoca pincanteriri itsipapee pishaninca.

5 ¹Eiro piquisatsatiritsi anteashipari;
irointi cameetsa pineanateri,
pinquempetacanteri iro piri avirori,

cameetsa pincavintsayeri. Aisati evancari-
pee, pinquempetacanteri parenti.² Ora
anteashiparo, pinquempetacantero piniro.
Aisati evancaropee, pinquempetacantero
pitsiro: eiro piquenqueshretirotsi
pantero.³ Ariorica ontimashitaja
camajimentaaro, terica intime neshinon-
catajerone, pineshinoncateroyea avinti.
⁴ Iro cantaincha itimirica otomi, oshinto,
iriorica osari, cameetsa irineshinoncatero
iriori. Irootaque icoiri Tasorentsi
cameetsa ayojeite ancaavintsayeri ashanin-
casanori arori. Cameetsa ampaajeiteri
ashijeiteeri coiteimojeitacariri. Tempa
peerani ipajeitaquee maaroni coiteimojei-
taqueeri arori.⁵ Ariorica otimashitasano-
taja camajimentaaro, apaniro oquenque-
shretasanotiri Tasorentsi irinti, te
intimeji pashini neshinoncateroneri.
Ocantani: tsiteniriqui, quitaiteriqui,
oquenquetsatacaapinitiri Tasorentsi,
ocantapinitiri paitarica ocoayetiri.⁶ Iro
cantaincha ainiro pashini, onashita
irointi: ocoaque onquimoshiretashitea.
Aneavetaca, iro cantaincha eiro oneiritsi
Tasorentsi.⁷ Pincamantajeiteri maaroni
quemisantatsiri irimamajeitero oca
nocantimpipi, oncanteata eiro otimitsi
irantane.

⁸ Ocameetsati aneshinoncajeiteri
itsipapee ashaninca, aisati ashanincasa-
nori arori, aneshinoncatasanoteri.
Eirorica aneshinoncatiritsi, eiro acantitsi:
“Noquemisanti narori”. Teve. Te
incameetsateji tseencantatsiri, iro
cantaincha terica aneshinoncateri
ashaninca arori, anaacojeitajiri ainti yora
tseencavetachari, te ancameetsatasanoteji
catsini.⁹ Ariorica omoncarataquero
camajimentaaro 60 osarintsite, ari
pincantero intacojeiteari maaroni
ayemisantairinte. Ocameetsataque aisati
aaveitaniri aparoni ojimeni, te oshequiy-
rini.¹⁰ Ocameetsati pineacojeitaquero
omayetaquero cameetsayetatsiri:

intacojeitacari otomipee, oneshinoncajeitaqueri itsipapee, amitacojeitaqueri maaroni quemisantajeitiriri Tasorents, oca vintsaajeitaqueri ashinoncaincar, oquearioventaquero omayetaquero cameetsayetatsiri. Ariorica pineacojeitaquero omayetaquero oca cameetsayetasiri, ari ocameetsati pincantero intacojeiteari quemisantajeitatsiri ashinoncajeitachari.¹¹ Iro cantaincha eiro picantirotsi ora camajimentaaro caari anteashipatatsi. Ocoircari shirampari antashiteari. Ocoicari aaje aisati, ojocajiricari Quirishito.¹² Ojivavetaca ocantavetacari: "Nonquemisantasanotempi", iro cantaincha impoiji amatavitaqueri. Irootaque iroasanquetantearori.¹³ Aisati operataci, oquenaquenayeticari pancotsipeequi, oneaveetashitacari, vero, vero, oquempetaricari tsiroti. Aamaashitaricari oshaninca, oneanatantarocari caari cameetsatatsi.

¹⁴Irootaque nocoantacari aaje aisati camajimentaaro, tequeratsitarica anteashipote. Cameetsa intime otomipee. Cameetsa oncoteneri ojime iroyeari, aisati otomipee. Cameetsa ontijeneri iitsaare, onquiveneri iitsaarepee, maaroni. Ariorica cameetsa ontine, tecatsiquea incantea atiri incantimajeitee.¹⁵ Jero imayetaquero Satanashi aparopee: yojocacaajiro oquemisantavetacari Quirishito.¹⁶ Itimirica oshanincasanori camajimentaaro, cameetsa iriotashitea incavintsayero iriori. Te oncameetsateji incanteri quemisantajeitatsiri: "Pincavtsaajeiteroyea avinti". Timatsi pashini camajimentaaro, savicatsiri apaniro: tecatsi oshanincasanori cavintsayeroneri. Iroquea irointi, cameetsa incavintsaajeitiero yora quemisantajeitatsiri.

Jaoca ancantajeiteriri yora jivatacaajeiteeri.

¹⁷Cameetsarica ijivatacanti yora jivatacaajeitiriri quemisantatsiri, ocamee-

tsati impinatasanoteri. Cameetsa inquemisantasanoteri aisati. Ariorica ipomerentsiventiquero iquenquetsati aisati yoametanti, cameetsa impinatasanoteri.¹⁸ Aitaque ocanti Sanquenarents: "Eiro pipashicavantetiritsi yora vaca aaticaitirori tirico, pishineteri iroyea. Tempa yaaticaitimpilo paantarori oitsoqui". Aisati ocanti: "Ocameetsati impinayeeteri yora antaveetiniriri".

¹⁹Eiro piquemisantashitaritsi aparo cantacotashitearineri jivatacaajeitimpiri, piquemisantirocari tseyantsi. Iro cantaincha incarataquera neasanoterineri 2, ariorica 3, ari pishiretearo oca incamantempiri.²⁰ Queariorica otimi yantasanotaqueri, ari pincanteri: "Eiro papiitajirotsi aisati oca pantasperu". Cameetsa iriojeitero maaroni quemisantsiri oca pincanterir, inquenqueshirejetanteari, iriojeitanteari eiro yantantarotsi iriori caari cameetsatatsi.²¹ Ayojeitaque icarajeitaquee Atasorents, aisati Jeso quirishito. Aisati icarajeitaquee inampirepee iriori. Irootaque nocantimpipi pimamajeitero pincanteri antirori caari cameetsatatsi. Eiro pipincatsatashitaritsi jivatacaavetimpiri avirori. Ocameetsati pimoncaratavacaajeitea avirori.²² Eiro pipeashitaritsi shirampari jivatacaajeiterineri quemisantatsiri, eiro pipamiinatashitaritsi. Pijivate piotasanteri. Eiro pishinetiritsi itsipa irantero caari cameetsatatsi: ariorica pishineteri, ontine pantane avirori. Pantirocariya avirori caari cameetsatatsi.

²³Eiro apatiro piriro nija, irointi pirero aisati ovaja capichaji. Oameetsatadjempi pamporetsa picatsiti. Aapinitaqueyemi pimaore, iro cantaincha oshintsitacayempi ovaja. Ariorica pirapinitero capichaji, ari oavisacotajempi, aisati oshintsitacajempi.²⁴ Oconijataque caari cameetsatatsi yantaniroyetiri aparopee atiri; iojeitaque incantacoteri Tasorents:

"Ainiro yantane". Ainiro pashini manavetacarori yantayetiri, iro cantaincha coajica onconijate aisati maaroni yantayetiri iriori.²⁵ Aisati, ariorica antayetaquero cameetsayetatsiri, oconijataque aparopee, ineacojeitaqueero atiri. Iro cantaincha tequera onconijateji maaroni cameetsatatsiri antajeitaqueri: coajica onconijatasanotaque maaroni. Aitaque oncanteari.

Jero oca icantajeitiriri pimantaari.

6 ¹Yora amananiriri iveranaro, iperanatasanotacari. Iro cantaincha ariorica iquemisantaque yora pimantaari, ocameetsati impincatsateri yora amananiriri. Impoiji tecatsi incanteete incantimateri Tasorentsi, aisati tecatsi incanteete: "Te oncameetsateji oca yoametiriri quemisantatsiri".² Ariorica iquemisantaque yora amanantajiriri, te oncameetsateji incante yora pimantaari: "Iriotaque meeca noyemisantaririnte, nomoncaratavacaaca. Eiro meeca nopincatsatiritsi". Irointi cameetsa irantaveetasanoteneri: tempa irio iyemisataririnte yantaveetiniri, irootaque inintantariri. Irootaque, Timoteo, poamejiteriri maaroni, pincantajeiteri maaroni irimajeitero.

Iquenquetsatacotiri oametantirori tseeyantsi.

³Ainiro quenacaashitarorri oca noametiriri. Te irishiretearoji ora queariotatsiri yoametiriri Avincatsarite Jesoquirishito. Aisati te irishiretearoji oca oamejeitaqueeri anquemisanteri Tasorentsi.⁴ Oshequi ishemeti, iro cantaincha te aneeroji iotantari. Te irioteji. Isampitacotashitacaro paitapeerica. Ineanatashiniroveetaca, vero, vero. Impoiji iquisashirequeri itsipapee, iquisatsataqueri, icantimataqueri, yaamaacotacari yantiro caari cameetsatatsi.⁵ Iquisavacaajeitaca

yora quenqueshiretirori caari cameetsatatsi, te inquenqueshireteroji queariotatsiri. Iquemisantaniromempeaca, ijitashivetaca ari irayeme paitapeerica.⁶ Iro cantaincha ariorica anquemisantasanofteri Tasorentsi, aisati aveshireimenteari, ari asavicasanojeitanaque cameetsa.

⁷Atimantapaacari peerani, tecatsi amapaaque. Aisati onquempetea, ariorica ancamaque, tecatsi aanajeri aisati.⁸ Iro cantaincha timatsirica avajeitari aisati aquitsajeitari, aitapaaaji, eiro aiquero acoanaitii aisati.⁹ Irintiquea yora coatsiri irashitaarantea yantanirotashiyetacaro paitapeerica irishequiantearori irovaararo. Omapocashitapaacari yantaquero paitapeerica. Te inquenqueshireteaji, icoashitacaro caari cameetsayetatsi, impoiji incamaquerica, irijate Sharincaveniqui.¹⁰ Ariorica ancoasanotaque ashiyetearo paitapeerica, aitaque antaquero caari cameetsatatsi. Oshequi quemisantavetachari yojocajiro iquemisanti. ¿Paita yojocantarori? Tempa icoaque irashiyetearo paitapeerica, iro cantaincha impoiji oshequi inquenqueshiretanaquea, iroashiretasanotanaquea catsini.

Icantiri: "Pinquearioventeneri Tasorentsi pantaveeteneri".

¹¹Iro cantaincha avinti, piquearioventiniri Tasorentsi paitarica icantimpiri. Pinevetarocari avirori paitapeerica. Pincoasanote pincameetsatasanotanaque avinti. Pimpincatsateri Tasorentsi, pinquemisantasanofteri, pinquearioventeneri maaroni icoacaquempiri, pantaveeteneri; pinintasanojeiteri itsipapee, pineshinoncajeiteri.¹² Ariorica opomerentsivetaca piquemisantasanofteri Tasorentsi meeca, iro cantaincha ocameetsatasanotri pimataquero. Pinquearioventeneri icoacaajeitimpipi. Eiro pipeacotarotsi: pincantai-

tatiyempani panee inquitequi. Icoyea-quempi Tasorentsi iroeanteajempiri anta inquitequi. Tempa irootaque picantaqueri avirori, icarajeitaque oshequi quemajeitavaquemppiri. Queariotaque picantaquerir. ¹³Tempa irio Tasorentsi oaneajeiteeneri inquitequi, maaroni. Aisati peerani Jesoquirishito, te intsaroacayeariji Pontsio Pirato, yora oacantaquerir. Icantiri: "Queario, narotaque pincatsari". Meeca icarajeitaquee Tasorentsi aisati Jesoquirishito, yamenacoventajeita-quee. ¹⁴Irootaque noncantantempiori oca: pintsoteaquero maaroni nocantim-piri, eiro picomitarotsi. Pincantatiyem-pani, pimatasanotero irosati impocan-tajeari Avincatsarite Jesoquirishito. ¹⁵Ioti Tasorentsi jaoca oncarate impocantajeari, iriotaque cantatsineri. Iquimoshiretaque iriori. Apaniro ini, itasorentsitasanotaque catsini, ipincatsariventajeitiri maaroni pincatsariventavetariri atiri, ijivatacaa-jeitiri maaroni jivatacaajeivetariri atiripee. ¹⁶Apaniro irinti eiro itsonca-tsi, eiro icamitsi catsini. Anta itiminta otimi quitaiteri catsini, tecatsi ancantea ajatashitero. Te intimeji neerineri Tasorentsi. Tecatsi ancantea aneajeiteri. Ocameetsati ampincatsata-sanojeitanaqueri maaroni. Icantatiani ipincatsariventanti irinti, yashi yoiro. Aitaque icanta.

Jero oca icantiriri ashitaarantincari.

¹⁷Pincanteri ashitaarantincari eiro ishemetitsi. Aisati pincanteri eiro iveshireimentarotsi yashiyevetari, tempa ari ompeajea, coajica. Irintiquea Tasorentsi iriveshireimentea. Ipapini-jeitaquee maaroni coiteimojeitaqueeri aquimoshirejeitantari. ¹⁸Oshequi iroaararo iriori ashitaarantincari. Pincamanteri meeca irineshiloncajei-teri ishanincapee, oshequi irineshilon-cateri. Te oncameetsateji irimashitsate. Cameetsa incavintsante, iointi. ¹⁹Ariorica irimayetaquero oca, cameetsa. Impinateri Tasorentsi coajica anta inquitequi, anta incantatiyempani iraneapaaaje cameetsa.

Ivecarataquero isanquenare.

²⁰Meeca, Timoteo, otimi icantauem-ppiri Tasorentsi pantaqueneri. Ari pimamateneriqueti, eiro pamatavitiri-tsi. Eiro pishiretashitarotsi cantaantsi. Ainiro oametantayevetarori paitapee-rica, ijiveta ioti, iro cantaincha te omoncaratavacayeji icantiri. Eiro pishiretashitarotsi yoametashiyyevetim-piri. ²¹Ijitashivetaca yora ioti, iro cantaincha, te irioteji. Irootaque caari iquemisantanta. Ari, nocoaque irineshiloncatempi Tasorentsi.

Narotaque sanquenatimpiori oca:
Pavoro

YAPIITAJINIRI PAVORO ISANQUENATAJINIRI AISATI TIMOTEO

Ivetsatajari aisati Pavoro Timoteo.

1 ^{1,2} ¿Ainirompi, Timoteo? ¿Tecatsimpa oyempine? Narotaque Pavoro sanquenatajimpiori oca. Itiancaquena Jesoquirishito noncamantajeiteri maaroni atiri ariorica inquemisantajeiteri Jesoquirishito, ari iroaneajejitieri anta inquitequi. Irootaque icoacaquenari Tasorentsi. Notomi, nonintasanotimpi. Nocoaque irineshilonca-tempi Tasorentsi, aisati Avincatsarite Jesoquirishito. Aisati nocoaque incavintaasa-notempi, cameetsa irisavacayempi.

Ipasonquitacoventiri Pavoro Timoteo.

³⁻⁵ Noquenquetsatacapinitiri Tasorentsi maaroni quitariteriqui, aisati tsitemiriqui. Paitaricapee nanteneriri, nocoasanotaque noveshireacayeari. Tempa peerani yantaveetinirini iriori yora noshanincani. Peerani, nojocantanaquempiriranqui, poashiretanaca, piraaca. Oshequi meeca nocoiteaquempi. Nocoaveta noneajempime aisati, noveshireimentasanotajempime. Noquenqueshretajimpi, oshequi piquemisantasanotaque, picantanii. Piquempetacaro pisaro Iroira, aisati piniro Eonise: oquemisantasanojeiti iroori. Nioti ainirotarsi piquemisanti, irootaque nopason-quitacoventantimpiri.

**Eiro pipashiventacaarotsi
piquemisantacayeri atiri.**

⁶ Piquemisantaqueri Tasorentsi, irootaque noncantantempi: peerani, nopamiinatanta-

quempi, aisati nocantantacariri Tasorentsi iramitacotempi, timtsi imatacaaquempi. Meeca pimatasanotero maaroni imatacaa-quempi. ⁷ Te incoyeji antsaroacayeari atiri, irointi icoasanotaque anquearioventeneri maaroni. Icoaque anintajeiteri atiri; aisati icoaque ontimimojeitee ayojeitanteari, cameetsa asavacajeitantaque. ⁸ Eiro pipashiventacaarotsi pinquenquetsatacoteri Avincatsarite. Aisati, eiro pipashiventaca-natsi; noquemisantaqueri Avincatsarite, irootaque yoiminqueanteetaquenari meeca caravosoquica. Oshequi noneacatsitimenta-cari Quirishito, cameetsa pinquempetena avirori. Aitaque irimatacayempiro Tasorentsi maaroni icoacaquempi. ⁹ Peerani, tequerani irovetsiqueroni oca quipatsica, iotitaqueeni anquemisanteri Jesoquirishito. Icoyeajeitataqueeni cameetsa asavacajeitan-teari. Te ancameetsaveiteani, iro cantaincha timtsi icoacaqueeri. Ineshiloncatashijeita-quee, yoavisacojeitaquee. ¹⁰ Ipocapaaque quipatsiquica Jesoquirishito, yora oavisaco-jeitaqueeri. Meeca ayotasanojeitaquero maaroni imataqueeneri Tasorentsi. Eiro meeca atsaroitsi ancame. Ayojeiti ariorica ancamanaque, eiro ajatitsi ainti Sharincave-niqui. Cameetsa oni oca icamantajeiteeri: yoaneasanojeitaquee, ancantaitatiyempani asaviquimojeiteri inampiqui.

¹¹ Itiancaquena Tasorentsi noncamanta-jeiteri atiri oca cameetsatatsiri, aisati noamejeiteri. ¹² Irootaque noneacatsitan-tacarori maaroni aca caravosoquica. Iro

cantaincha te nompashiventeaji. Niotasanotiri yora noquemisanteri: niotaque eiro yamatavitanatsi, irootaque nocantantacarri: “Pinquempoyejena”. Niotasanoti inquempoyejena irosati impocantajeari. ¹³Queariotasanoataque maaroni noametaquempi, te namatavitempiji. Pimoncaratero maaroni nocantaquempi. Pinquemisanteri Jesoquirishito, pinintasanoteri. ¹⁴Quiso oajeitaquee Ishire Tasorentsi. Timatsi omatacaaaquempi, ari pimamayetero cameetsa.

Jaoca icantajeitiriri Pavoro.

¹⁵Pioti yojocajeitaquena ashiasati: Jijero, Eromojeneshi, maaroni. ¹⁶Nocoaque incavintsayeri Avincatsarite Oneshijoro, aisati ishaninca iriori. Intacotapinitaquena Oneshijoro, te impashiventeaji iquivantana aca caravosoquica. ¹⁷Itimantacari aca Oromaqui, icoacoayetaquena, irosati ineantapaquenari aca. ¹⁸Piotasanoti aisati oshequi yamitacotaquena anta Ejesoqui. Coajica, impocajerica Avincatsarite, aitaque incavintsaapaajeri.

Icantiri: “Pincantaitatiyempani pantaveeteneri Tasorentsi”.

2 ¹Meeca, notiom, tempa ineshinoncataquempi Jesoquirishito, irootaque nocantantimpire pishintsiventeneri maaroni pantayeteneriri. ²Timatsi piquemitaquenari, tempa picarajeitaqueri oshequi pashini quemajeitaquenari. Ari poameyeteri pashini ashaninca, inquearioventeneri Tasorentsi iroametante iriori. Irovaajeneri aisati itsipapee oca noametaquempi. ³Yora soraropee cameetsari ineacatsitimentapinitari ivincatsarite. Pinquempeteari avirori, eiro pitsaroitsi pineacatsitimenteari Avincatsarite Jesoquirishito. ⁴Aisati te iriocomparitapinitaeji soraro, te impanquiveeteji, iointi apatiro iqueario-

ventiniri iyapitanote inintacairiri.

⁵Ocameetsati yora aatiquirori perota inquemisanteri yora jivatacainir. Eirorica iquemisantasano, eiro ipashiyeetaritsi oca ipapinitiriri anaacotantatsiri. ⁶Yora panquiveetatsiri, ariorica intsameetacota-sanotero ivanquire, ari irayero oshequi otsoqui, coajica. Te irantsipetearoji itsameetacotiro. ⁷Pinquenqueshiretasantero oca noshiacantimpire, ari iriotacaasa-notempiro Avincatsarite.

Pinquenqueshireteri Jesoquirishito.

⁸Pinquenqueshireteri aisati Jesoquirishito, yora ishanincani Iravirini; yoyeveetacari, iro cantaincha itinaanaja aisati. Irootaque oca nocamantapinjeitiriri atiri, iravisojeitantajeari. ⁹Nocantani noquenquetsatacaaajeitiri atiripee, irootaque noneacatsitantacarori meeca. Yoisoyeetaquena, iquempetacanteetaquena oayeri. Iro cantaincha tecatis incanteetero iroisotero irineane Tasorentsi: tempa ovaraanaca iointi. ¹⁰¿Paita noneacatsititacarori maaroni oca? Irio noneacatsitimentiri maaroni atiri icoyeaqueri Tasorentsi, incantaitatiyempani irisavacanteeari cameetsa anta inquitequi. Iriotaque Jesoquirishito oavisacoterineri. ¹¹Queariotaque oca icanteetiri: “Ariorica ancamimenteri Quirishito, ari antsipatapaaejeari anta inquitequi, asaviquimotapaajeri.

¹²Ariorica ampomerentsiventeneri antayeteneri paitapeerica meeca, iro cantaincha coajica ancorajeiteri ampinca-tsarijeite. Ariorica ancanteri atiri: ‘Te nioteriji Jesoquirishito’, aisati incantacotee iriori: ‘Apa, te nioteriji yoca’.

¹³Ariorica amataviteri, iro cantaincha eiro yamataviteetsi irinti. Irimoncarataroquero maaroni icantaqueeri”.

¹⁴Tempa icarajeitaquee Avincatsarite. Pincantapiniteri atiri eiro icantavacaimentarotsi paitapeerica yoameyetiriri.

Yatsipetashitacaro icantavacaimentaro oca, icomitacaaricari yora quemajeiterineri.¹⁵ Pantasanoyeteneri Tasorentsi, incantantempi: "Cameetsa maaroni pantaquenari", impoiji eiro otimitsi pimpashiventanteari. Piotasanotiro irineane Tasorentsi, meeca poametantero cameetsa; tempa tampatica oametanti irointi.¹⁶ Eiro pishiretarotsi cantaantsi, eiro picantavacaatsi: pojocacaasanotiricari atiri inquemisanterime Tasorentsi.¹⁷ Oshiaquero patsaarontsijenca, ariorica aaquee, ontsoncanaquee maaroni atseempequiqui, ampatsayetanaque. Yatsipetacaro icantavacaanirotaca yora Imeneo aisati Jireto.¹⁸ Icomijeitacaro quearioyetatsiri. Icantaniroti: "Aitanaji. Itinaajeivetaja itsipapee, iro cantaincha eiro atinaajeitajatsi ainti". Iquenqueshiretacaajeitaqueri maaroni quemajeitaqueriri.¹⁹ Piotero ocaocantiri irineane Tasorentsi: "Iotasanoliri Tasorentsi maaroni quemisantajeitiriri". Aisati ocanti: "Intimerica cantatsine: 'Noquemiantiri Avincatsarite', ocameetsati irojoquero caari cameetsatatsi yantayetiri". Aitaque ocantaqueri. Irineane Tasorentsi oshiaquero antearo mapi: te ompashininitapiniteji.

²⁰ Anta ivancoqui ashitaarantincari timatsi oshequi iveratote. Ainiro pinatasanotachari, yovetsiqueetiro oro aisati perata. Ainiro caari pinatacha, yovetsiqueetiro inchato aisati quipatsi. Ora pinatachari, iveshireimentacaro: icoaque irameniteri maaroni ishaninca. Ora caari pinatacha onantari cajara.²¹ Ariorica poameetsataquea avisati, pojocaquerorica caari cameetsatatsi pantapinijeitiri, ari pinquempetearo perato pinatasanotachari; iriveshireimentipi Avincatsarite, incoaque irineajeitajempi maaroni. Impoiji pimataqueneri paitarica incoacaquempiri.²² Eiro catsini piquenqueshiretirotsi caari cameetsayeta-

tsi yantayetiri evancaripee. Irointiquea pincoasanotanaque pincameetsatanaje, pinquemisantsanotanaje, pininteri itsipapee, pincarajeiteri itsipapee cameetsayetatsiri: maaroni yora aventasanotariri Avincatsarite.²³ Eiro picantavacaimentashitarotsi caari ayotasanojeiti: piquisavacaacari.²⁴ Ariorica antaveeteneri Avincatsarite paitapeerica, te oncameetsateji anquisajeiteri ayemisantaririnte; irointi cameetsa ancavintsayeri itsipapee, cameetsa avameteri, eiro ashemaritsi,²⁵ cameetsa avameteri yora quisajeitaqueeri. Cameetsarica avameteri, impoiji ariorica inquenqueshiretanaquea, irojocajero caari cameetsayetatsi inquemisantante-rrori queariotatsiri. Iramitacoteri Tasorentsi.²⁶ Yamatavivetacari camaari: Otimaveta icoacaavetacariri, irootaque yantantavetacanariri iringi; iro cantaincha iroavisacoteri Tasorentsi, ariorica inquemisanteri.

Jaoca incanteari amatavitantatsineri, coajicani.

3 ¹Piotero oca: coajica, ariorica mononcarataquea impocantajeari Jesoshi, oshequi ompomerentsitimoteari quemisantatsiri. ²Irisati nintajanchane atiri, incoasanoteri quirequi, irishemete, irishirontimenteari itsipapee, incantimateri Tasorentsi, impiatsateari ashitariri, eiro ipasonquitiritsi neshinoncaterineri, eiro iquenqueshiretiritsi Tasorentsi. ³Eiro iotirotsi incavintsayeri itsipapee, eiro iotitsi incatsimareajea, incantimatante, eiro ipashiventacaarotsi irantayetero tsinanepée, inquisanaquea, inquisayeteri cameetsayetatsiri, ⁴iramataviyeteri ishanincasanoripee, irantashiyetearo paitapeerica, eiro iquenqueshiretatsi, irishemetasanote, incoanaque inquimoshiretashitea, eiro icoitsi iringoteri Tasorentsi. ⁵Inquemisantamempeashiteari

Tasorentsi, iro cantaincha eiro ipincatsatiritsi. Eiro piquempetaritsi avirori.

⁶Inqueavancoteri itsipapee atiri, iramatavitapeero tsinanepee. Te onquenqueshiretasanoteoji, irootaque irimatantearori iramatavitepeero. Oshequi antaqueru caari cameetsatatsi, ocoasanotaque antayetero. ⁷Oshequi oquemisantashiyetacari pashini oamenirotirori, iro cantaincha te iotasanoteroji queariotatsiri.

⁸Peerani yora Janeshi aisati Jampireshi ipiatsatariniri Moishishini, te incoacyeriji joriopee inquemisantajeiteri. Aisati iquempetacari meeca yora amatavitantsiri: te incoacyeriji atiri inquemisantero queariotasanotatsiri. Te oncameetsateji oca iquenqueshireyetaqueri, iquemisantamempeashitaca. ⁹Eiro icantatiani irimatero oca. Tempa peerani iotacojeitiri yora piatsatariniri Moishishini. Aisati coajica iriojeitanaque atiri queario yamatavitantaque yora amatavitantatsiri.

Pinquemisantanoter queariotasanotatsiri.

¹⁰Piotacotasanotaquena. Piotaquero noameyetimpiri. Piotaquero nantayetiri. Piotaquero nocoaqueri nomayeteri narori nantayeteri. Piotaque aisati noquemisantaqueri Tasorentsi, noquearioventiniri maaroni, nonintaqueri, te noshemearoji nocatsimentaqueri. ¹¹Aisati pioti iquishimentapiniyeetaquenaro noquemisanti. Piotaque aisati noquematsicatapinitacaro anta Antioquiaqui, Iconioqui, aisati Irishitaraqui. Oshequi iquisajeitaquena savicajeitatsiri anta. Iro cantaincha yoavisacatapinitaquena Avincatsarite.

¹²Queario, iquisheetiri maaroni quemisantiriri Jesoquirishito, ariorica icoasanotaque inquemisantanoteri.

¹³Aiquero irijatatiye iramatavitasanotante yora caari cameetsatatsi, aisati oametantirori tseyantsi. Aisati yora camaari iramataviteri iriori. ¹⁴Aviroquea avinti,

pincantaitatiyempani pishiretanaquearo maaroni noamejeitaquempi. Tempa piotaque eiro namatavitimpitsi.

¹⁵Peerani, pijananequiveteitani, yoameyee-taquempiro irineane Tasorentsi.

Irootaque oametaquempirori piquemisantaqueri Jesoquirishito, paviscacantajari.

¹⁶Iriotaque Tasorentsi sanquenatacantaquerori irineane, maaroni. Oamejeitaqueero queariotasanotatsiri, terica oncameetsateji antaqueri, ocamantaquee. Oamejeitaquee jaoca ancanteari avameetsatantajeari arosati, aisati oamejeitaquee ancameetsajeitanaque. ¹⁷Iriotaque otimantacari irineane Tasorentsi, ancameetsatasanotantajeari. Impoiji tecatsi ancantea ancomitea, irointi antasanojeitero maaroni icoacaqueeri Tasorentsi.

Iveshireacaacari Pavoro Timoteo.

4 ¹Coajica impocaje Jesoquirishito impincatsaritapaaque. Ariorica impocaje, ari irinijaajeitapaaqueero yantayetiri maaroni aneajeitatsiri aisati maaroni camajeitaintsiri. Incamantajeitee jaoca incantajeiteeri. Ayojeiti icarajeitaquee meeca, aisati icarajeitaquee Tasorentsi, irootaque meeca nocamantantimpiori oca. ²Pinquenquetatsapinitero irineane Tasorentsi maaroni quitaiteriqui. Jaocarica incarateri catsirinacaiteri, jaocarica pisaviqueru, eiro catsini pimajeretitsi, irointi pinquenquetatsacayeri maaroni atiri. Terica oncameetsateji oca yantaqueri, ari pincanteri, aisati pintaroteri. Pincantajeiteri cameetsa irisavicajeite. Jentsiquero poametasanojeiteri itsipapee, eiroquea piquisatsatiritsi. ³Coajica, ariorica cameetsa avamejeiveteari atiri irineane Tasorentsi, iro cantaincha eirorica iquemisantajeitirotsi. Eiro icoirotsi, irointquea incoasanojeite oamejeiterineri tseyantsi. Irooqua icoasanotaqueri inquemero, irointi. ⁴Eiro

iquemisantiotsi irineane Tasorentsi, irointi inquemisantashitearo iquenquetsatashiyetari atiri.⁵ Aviroquea, avinti, paamaventea: piquempetaricari. Ariorica pincatsitimenteri Avincatsarite, eiro poashiretsati. Pinquemisantacayeri itsipapee. Pimatasanotaqueneri Tasorentsi maaroni icoacaquemperi.

Iquenqueshiretiri Pavoro.

⁶Iro nocamantantimpiori oca, irotaintsi iroyeetena, irotaintsi nojate narori inquitequi. ⁷Nopomerentsiventasanotiniri Avincatsarite, nomataqueneri maaroni icoacaquenari, te namataviteriji. ⁸Coajica, impocajerica Avincatsarite, impashiyetenaro cameetsayetatsiri. Eiro ipanarotsi apaniro narori, irointi impajeteri maaroni atiri, yora yoameetsantaqueri: arojeitaque maaroni aamaajeitacarri. Tempa cameetsa icantacoventajeitaquee maaroni.

Pashini icamantajiriri aisati.

⁹Pishintsite pimpoque pineena. ¹⁰Yora Temashi, icoaque iriveshireimentearo timayetatsiri quipatsiqui. Yojocanaquena, ijatanaque Tesaronicaquai. Yora Queresente, ijatanaque Carashiaqui, yora Tito ijatanaque Taramashiaqui. ¹¹Apanivaniji Irocashi, itsipataquena. Ariorica pimpoque, pamaquenari Maricoshi, oshequi nocoaque iramitacotena. ¹²Aisati ijatanaque yora Tiquico. Notianquiri iriori Ejesoqui. ¹³Aisati pamaquenaro noicoro noanajiri Toroarequi, otimi anta

ivancoqui Caripio. Aisati pamaquenaro maaroni sanquenarentsipee, aisati novaperitepee. ¹⁴Yoashinoncaasanotadena Ariantero, yora vetcicapinitirori ashiero. Coajica iroasanqueteri Avincatsarite. ¹⁵Paamayeariya avirori, yoashinoncaimpicari. Oshequi iquishimentaquenaro nocantajeitaqueriri.

¹⁶Ijivatantacari pincatsari isampita-coventana, te intimeji cantacoventenneri, ishiaptsajeitanaquena. Te noncoyeji iroasanqueteri Avincatsarite. ¹⁷Irintiquea irinti, quiso yoana.

Itasoncaventaquena, nomatantarori noquenquetsatacaaajeitiri itsipasati atiri, maaroni. Iroashinonqueetename, iro cantaincha yoavisacotaquena Avincatsarite. ¹⁸Ariorica iroashinonqueetaquenname aisati, niotaque ari iroavisacotajena aisati; irisavicacayena inquitequi, anta ipincatsaritinta iriori. Tsame ampincatsatasanojeiteri, aitaque ancantaitatiyempani.

¹⁹Novetsataro Pirishira, aisati iriori Aquira. Aisati novetsatari maaroni ishaninca Oneshijoro. ²⁰Ainiroquera Erashito, isaviqui anta Corintoqui. Navisantacarori Miretoqui, noneanajiri Torojimo: ijoquiiitaca. ²¹Pishintsite pimpoque, tequeratsita onquimojate. Ivetsajeitimi Eovoro, Pororente, Irino, Iraoria, jeri maaroni ayemisantaririnte.

²²Nocoaque incavintsayempi Avincatsarite, irineshinoncatasanotempi.

Narotaque sanquenatimpiori oca:
Pavoro

YORA PAVORO ISANQUENATINIRI TITO

Ivetsatari Pavoro Tito.

1 ¹¿Ainirompi Tito? ²Tecatsimpa oyempine? Narotaque Pavoro sanquenatimpiori oca. Nocoasanotaque nanteneri Tasorentsi paitapeerica incoacayenari. Itianacauna Jesoquirishito nonquemisantacaasanojeiteri maaroni atiri, yora icoyeaqueri Tasorents. Aisati niotacaasanoteri queariotasano-tatsiri inquearioventanteearori inquemisante. ²Peerani, tequerani irovetsiqueroni quipatsi, icantitacani Tasorents: “Noaneasanojeiteri maaroni nocoyeajeitaqueri, nosavicacaajeiteri aca inquitequi”. Te iriotimateroji Tasorents iramatavitanter. Ayojeitaque ancantaitatiyempani aneajeitanaje anta inquitequi. ³Meeca omoncarataca iriojeitanteearori maaroni atiri irineane Tasorentsi, yora oavisaco-jeitaqueeri. Irootaque itiancantaqueunari noncamantajeiteri atiripee. ⁴Peerani noquemisantacaquempi, irootaque meeca noquempetacantantaquempi notomisanori. Nocoaque irineshioncam-tempi Tasorentsi, cameetsa irisavicaca-yempi, aisati inquempetacayempi Jesoquirishito, yora oavisacojeitaqueeri.

Jaoca incantajeiteari yora jivatacaaajeitiriri quemisantatsiri.

⁵Peerani nojocanaquempi anta Queretaqui, pamitacotantariri ayemisan-taririnte iquemisantasanolantacari. Aisati nocantaquempi: “Ariorica pinquenayeta-

naque anta maaroni nampitsipeequi, pincoyeajeiteri jivatacaaajeiterineri ayemisantairinte, yora quemisantacaye-rineri”. ⁶Meeca noncamantempi. Te oncameetsateji irijivatacantashitea; irointi ariorica cameetsa isaviqui, aisati otimirica ijina aparoni, aisati ocameetsa-tirica iquemisantajeitaque maaroni itomipee, aisati icantacoyeetiririca itomipee: “Cameetsa iriori, te impiatsatanteaji”, ari iriotaque jivatacaaajeiterineri ayemisantairinte. ⁷Pineaquero, ariorica incoaque irantaveeteneri Tasorents, acoajeitaque arori incameetsatasanote. Te oncameetsateji impiatsatantea, inquishempa, irishinquitempa, irantanya-teri itsipapee, iramataviteri itsipapee iraitanteariri iirequite aisati iroaararo. Te oncameetsateji maaroni oca. ⁸Irontiquea ocameetsati irintacoteari itsipapee, irinintero maaroni cameetsayetatsiri, inquenqueshiretanaquea, inquemisantasano-nanaque, incameetsatasanotaque, iriote iraamaaventea irisati eiro yantantarotsi caari cameetsatatsi. ⁹Cameetsa inqueario-ventero inquemisantasanoltero irineane Tasorents, ora avamejeitaqueriri, irimatantearori iroametantasanoltero iriori queariotsatsiri. Aisati iriotasanote iroameteri yora tseencantatsiri.

¹⁰Ainiro oshequi caari quemisantiri jivatacaaajeivtariri, neaveetashitchari, amatavitantatsiri, maaroni. Aitaque icantajeita yora cantanirojeitashitariri quemisantatsiri: “Pimpeajeitaja jorio,

maaroni".¹¹ Nocoaque poimajerentanirojeiteri. Yojocacaaniroyetaqueri oshequi quemisantatsiri iquemisanti. Te oncameetsateji oca yoametantanirotiri. Apatiroti icoaque iraitashiteari quemisantatsiri iirequite.¹² Ainiro aparo, yora quenquetstacairiri ishaninca, icanti irlori: "Yashi yoiro queretasati yamatavitanti, icatsimantanti. Oashenti ini".¹³ Queariotaque oca icantaqueri. Ari pintsarotasanojeiteri yoranqui, inquemisantasanojeitanteearori queariotatsiri.¹⁴ Te oncameetsateji ashiretashitearo iyenquetsare jorio, aisati icantashiyetari yora tseenquirori queario-tasanotatsiri.¹⁵ Ariorica acameetsati arori, aneacameetsajeiteri maaroni ashanincaphee, eiro aamaajeitaritsi. Iro cantaincha irinti, te incameetsateji, aisati itseencanti, irootaque caari ineacameetsantari ishanincaphee; irointi yaamaashi-jeitarri. Queario, eiro imatirotsi inquenqueshireyetero cameetsayetatsiri.¹⁶ Icantanirojeiveta yoranqui: "Niotiri Tasorentsi", iro cantaincha te irisavique cameetsa, irootaque ayotantacari itseeyani, te irloteriji. Te incameetsateji catsini yoranqui, ipiatsatanta, te irloteji irantero cameetsatatsiri.

Yoameyetiri paitapeerica.

2 ¹Aviroquea, avinti, cameetsa pinquenquetsatero queariotasanotatsiri. ²Poameteri yora antearipee eiro ishinquitatsi, cameetsa irisavique, cameetsa inquenqueshiretanaquea, inquemisantasanojanaque, irinintasanotanaqueri itsipapee, inquearioventeneri Tasorentsi maaroni. ³Aisati pinquempero antearopee, poametero cameetsa osavique, onquemisantasanojote. Te oncameetsateji oncantimatante, aisati te oncameetsateji irapinitero quepishijari. Cameetsa osavique iriojeitanteari itsipapee quemisantatsiri jaoca incanta-jeitarri. ⁴Aisati cameetsa oametero

evancaropee onintasanoteri ojime aisati otomipee.⁵ Oametero aisati onquenqueshireempa, oncameetsate; cameetsa oncoteneri oshaninca, antsiteneri, onquiveneri iitsaare, maaroni oncavinttsante, onquemisantasanojeteri ojime. Impoiji tecatsquea incanteetero intseenqueetero irineane Tasorentsi.

⁶Aisati poameteri evancaripee inquenqueshiretasanojeitanaquea irlori, cameetsa irisavicafeite.⁷ Aisati avirori, cameetsa pisavicanaque, iriojeitanteari atiri jaoca incantajeitari incavinttsante irlori. Cameetsa poametante, tempa piotasanoti yamenacotimpi Tasorentsi.⁸ Cameetsa pinquenquetsatacayeri atiri, oncateata eiro otimitsi inquishimentem-piri. Impoiji impashiventea coavetachari impiatsatempime, eiro otimitsi incantimatantempiri.⁹ Pincamanteri pimantaari inquemisantasanojeteri amanantiriri, irimatasanoteri maaroni icantaqueriri. Te oncameetsateji impiatsateari,¹⁰ te oncameetsateji incoshiteri. Irointi ocameetsati irlotasa-note yora amanantiriri eiro yamatavitirtsí catsini. Impoiji incoasanojeite atiri inquemisanteri yora oavisacojeitaqueeri, incantajeite: "Ocameetsati oca iquenque-tsatacocyetiriri Tasorentsi".

Paita ayojeitancacari ineshinoncajeitaquee Tasorentsi.

¹¹Meeca ayojeitaque ineshinoncajeitaquee Tasorentsi, icoaque iroavisacojeiteri maaroni atiri.¹² Ari ineshinoncajeitaquee, yoametaquee ajocajero atseencanti, aisati ajocajero icoajeitiri tseencantsiri. Ayojeiti ocameetsati maaroni quitaiteri anquenqueshiretanaquea, ancameetsata-naque, anquemisantasanojanaqueri Tasorentsi.¹³ Meeca ayojeitaque aamaajeitajeari Tasorentsi: yora Avincatsarite Jesoquirishito. Tempa irio oavisacojeitaqueeri. Ayojeitaque

impocaje, eiro yamataviteetsi, irootaque aquimoshirejeitajari. Aneajeitavajeri, impincatsaritapaaque.¹⁴ Antapinijeita-quero caari cameetsatatsi, iro cantaincha icamimentajeitaquee yoavisacotantajeita-jeeri, yoameetsatantajeitajeri, ashanicatasanojeitajajariri iriori, acoasanojeitacari antapinitero cameetsayetatsiri irointi.¹⁵ Pincamantasanajeiteri maaroni atiri oca nocamantaquemperi. Tempa itiancaquempi Tasorentsi, ari pincamantasanojeiteri atiri inquemisantasanojeitanaque. Terica oncameetsateji yantayetiri, cameetsa pincamantasanofteri. Eiro pishinetiritsi intseencajeitempi.

Pashini icantayetiriri.

3 ¹Pincamantajeiteri ashanicca impinca-tsajeiteri maaroni jivatacaa jeitiriri aisati pincatsariventajeitiriri, inquemisantajeiteri. Pincanteri ocameetsati incoajeitanaque irantajeitero cameetsayetatsiri. ²Pincantajeiteri eiro icantimatiritsi itsipapee, eiro iquisatsatavacaajeitatsi, eiro iquisatsi, irointi cameetsa incavintaajeiteri maaroni atiri. ³Peerani te anquenqueshireveiteani arori, te anquemisantaveiteani, amatavitantaveitani, antapinitashiveitaroni maaroni acoanirotashjeitaniri, aisati antashiveitaroni maaroni anintashijeivetaniri. Acantani antapiniveitaroni caari cameetsatatsi, aquisatsicaveitarini itsipapee, aquisaveitani, aquisavacaajeitani. ⁴Iro cantaincha iotacaajeitaquee Tasorentsi, yora oavisacojeitaqueeri. Iotacaajeitaquee icavintaajeitaquee, inintasanojeitaquee. ⁵Yoavisacojeitaquee. Te antajeveteoji cameetsatatsiri iroavisacojeitanteeri, iro cantaincha icavintaashijeitaquee. Avaotisajeitaca, yoaneasanojeitaquee, opashinishirejeitaquee Ishire. ⁶Aquemisanta-jeitaqueri Jesoquirishito, yora oavisacojeitaqueeri, irootaque itiancasanojeitantaqueeri Tasorentsi Ishire, te intsaneemparojo.

⁷Ineshinoncageitaquee, irootaque yoameetsatantaqueeri, aisati icanti ancantaitiyem-

pani antimajeite inquitequi. Ayojeitaque eiro yamataviteetsi.⁸ Queariotaque oca icamantaqueeri. Nocoaque pincantajeiteri quemisantajeitiriri Atasorentsire irimajeitero maaroni oca, pincamantasanofteri. Ocamees-ajeitaque maaroni oca: eiro yatsipetashijeitarotsi.

Jero oca pashini icantiriri Pavoro Tito.

⁹Eiro pisampitacoventirotsi caari iotasanyoeteeti, aisati eiro pishiretashitarotsi iquenquetsatacotashitaniri yora intacaroniri. Eiro piquishimentarotsi isanquenareni Moishishi, eiro piquisatsatimentarotsi. Patsipetashitarocari, eiro oametimpitsi.¹⁰ Intimerica amataviyeteri-neri quemisantatsiri inquisavacaajeitanteeri, pincamanteri eiro yamatavitanti. Terica inquemisantempi, aparo pampiitasanofteri. Iro cantaincha terica inquemi-santempi, eiro picantajiritsi: "Noyemisanttarinte".¹¹ Iquemisantiro tseeeyantsi iriori. Te oncameetsateji yantayetiri, ainiro yantane.

¹²Nontianquemperi Aretemashi; tericampa, irioricampa Tiquico. Ariorica pineavaqueri, pishintsite pijate Nicoporisshiqui: aitaque pineavaquenari anta. Nocoaque nonquimojantsitacotanaque anta.¹³ Pintacoteari yora Senashi, aisati Aporo. Yora Senashi ioyetiro icantayetiri pincatsaripee. Pimpavaqueri maaroni coiteimotariri ariorica irovaanajea. Te oncameetsateji oncoiteimoteari paitapee-rica.¹⁴ Ocameetsati iriojeitanaque ashanicapee arori incavintaantajeite. Ocameetsati iramitacoteri yora ashinoncaincarri. Ocameetsati irimayetero maaroni cameetsayetatsiri.¹⁵ Ivetsajeita-queipi maaroni nocarajeitaqueri aca. Novetsajeitari maaroni quemisantatsiri ara, nintajeitanari. Nocoaque irineshinnoncageitempi Tasorentsi.

Narotaque sanquenatimpiori oca:
Pavoro

YORA PAVORO ISANQUENATINIRI IRIORI JIREMONA

Ivetsatari Pavoro Jiremona.

¹¿Savcatsimpi, Jiremona? ¿Tecatsimpa oyempine? Narotaque Pavoro sanquenatimpiori oca. Nosaviqui meeca aca caravosoquica. Noquenquetsatacotaqueri Jesoquirishito, irootaque yoiminqueanteaquenari. Nocaratiri ayemisantari-rinte Timoteo nosanquenatimpido oca. Nonintasanotaquempi. Piquempejeitaquena, antaveejitiniri Tasorentsi paitapeerica. ²Meeca novetsatario Apia, ayemisantaroronte. Aisati novetsatari Ariquipo, yora noshiacantaqueri nosoraroririnte. Yora soraropee iquearioventiniri iyapitanote maaroni icoacairiri. Aisati irori Ariquipo, imoncarataquena, noquearioventajeitiniri Tasorentsi maaroni icoacaajeitaquenari. Aisati novetsajeitari maaroni ayemisantaririnte apatotapinitachari pivancoqui. ³Nocoaque irineshinchoncajeitempi Apa Atasorentsire, cameetsa irisavicacaajeitempi. Aisati inquempetacaajeitempi Avincatsarite Jesoquirishito.

Iveshireimentari Pavoro Jiremona.

^{4,5}Icamantapiniyeetaquena picantani piquemantiri Avincatsarite Jesoshi, aisati pinintajeitiri maaroni quemisantsiri yoameetsantiri Tasorentsi. Irootaque nocantapinitariri Atasorentsire: “Ariove pimatacaqueri Jiremona pamitacotasanofteri catsini”. ⁶Nocantiri

iriotacaasanojeiteri maaroni asháninca piquemisantacaajeitiri. Cameetsa iriotacaasanojeiteri intacotasanojeitee Quirishito. ⁷Meeca niotaque, nonintane, pinintajeitiri itsipapee quemisantatsiri yoameetsantiri Tasorentsi, aisati piveshireacaajeitari, irootaque noquimoshireimentantaquempi, aisati noveshireimentantaquempi.

Icantacoventiri Oneshimo.

⁸Nioti naro itiancane Quirishito: ishinetaquena noncamantempiro paitarica panteri, ⁹iro cantaincha anintavacaaca, irootaque caari nocoanta noncantempi: “Jero oca pantayeteri”. Ari nanteashipataque meeca. Noquenquetsatacotiri Jesoquirishito, irootaque yoiminqueanteaquenari caravosoquica. ¹⁰Timatsi noquemisantacaqueri aca, noshiacantaqueri meeca notomi. Ipajita Oneshimo: iriotaque noncantacoventeri. ¹¹Te iramatacoveitempiniji, iro cantaincha meeca oshequi iramatacotempi avirori, aisati iramatacotena narori.

¹²Nontiancacheri meeca impiashitanajempi aisati. Nonintasanotaqueri catsini. ¹³Nocoasanovetaca quiso iroyename aca, iramatacotasanoftware aca caravosoquica: onquempeteame arime pintimeme aca, pamitacotename avirori. Noquenquetsatiro irineane Tasorentsi, irootaque notimantacari meeca aca. ¹⁴Iro cantaincha te nioteji paitarica picoiri avirori. Te

noninteki noncantasanotempi pintacota-
tena: aviro avinti cantatsine.¹⁵Peerani
ishiapitsavetaquempi, meecaquea
incantaitatiyempani quiso iroajempi.
¹⁶Peerani pamanantane inaveitani. Iro
cantaincha meeca iriotaque piyemisanta-
ririnte pinintasanotajeri. Oshequi
nonintaqueri narori, meeca pinintasanot-
tavajeri avirori. Ocameetsati pininteri
pamanantane, iro cantaincha ocameetsa-
tasanolni pinintasanoteri catsini
piyemisantaririnte.

¹⁷Pamene, tempa aquempeavacaaca
arori. Ari meeca noninti pineshinoncata-
vaqueri, pinquempetacantename pineshi-
noncatavaquenamne naroricame
areetapainchaneme. ¹⁸Ariorica icoshita-
quempi, aisati ariorica irevitaquempi, ari
pincoacotenaro narori maaroni. ¹⁹Narota-
que nainti Pavoro sanquenatimpirori oca.
Nompinaventajeri paitapeerica
irevitaquempi. Pinquenqueshiretero
oshequi nocavintsaakuempi: pioti eirome
notimime, eirome paviscotajime.
²⁰Tempa, nonintane, piquemisantiri

Avincatsarite, meeca nocoaque pincavin-
tsayena narori. Tempa piquemisantiri
Quirishito, meeca nocoaque piveshirea-
caajena.

²¹Niotaque ari pinquemisantena,
irootaque nosanquenatantimpiori oca.
Aitaque niotaque ari pimateno
maaroni nocantaquempi, aitaque
povanaashitavaqueanari maaroni
nocantaquempi. ²²Aisati nocoaque
pivetsiquenaro nosavicantapeempari.
Niotaque ariorica pincanteri Tasoren-
tsi, irishinetena noneajempi aisati.
²³Ainiro nocarataqueri Epajarashi aca
caravosoquica. Iquempetaquena
iquenquetsatacotiri Jesoquirishito,
irootaque yoiminqueanteetacariri
iriori. Ivetsatimpi. ²⁴Aisati ivetsajeita-
quempi Maricoshi, Arishitaraco,
Temashi, Irocashi, maaroni. Icarajeita-
quena nantajeitiniri Atasorentsute
paitapeerica. ²⁵Nocoaque irineshilon-
catempi Avincatsarite Jesoquirishito.

Narotaque sanquenatimpirori oca:
Pavoro

ISANQUENAYEETINIRI IJORIORIRINTE

**Yanaacotaqueri Quirishito itsipapee
itiancanepée Tasorentsi, ipincatsaritasanoti.**

1 ¹Peerani yora Tasorentsi yoamejeitaqueri yora quenquetsatacantayetatsiniri. Aparopee ineasanotiri Tasorentsi, irio itsipa iquemashitacari ineanatiri, irio itsipa ineiri inampire, irio itsipa aisati imishitacaacari, maaroni. Aiquero yovainiri, aiquero yovainiri, yoamejeitaqueri. Impoiji iriori yovaajeitaqueri yora ashanincapenee. ²Meecaquea yoametasanojeitaquee itomisanori iriori Tasorentsi. Tempa iriotaque irinti anaacojeitiri atiri ipincatsariti. Icantiri peerani: “Notiomí, aviro vetsiqueroneri quipatsi, inquite, maaroni; pincantacantayetero maaroni”. Ari imoncarataqueneri icantaque-riri. ³Ishiasanotaqueri iriri, ishipaquireasanotaque, ipincatsaritasanotaque. Tempa yanaacojeitiri atiri ipincatsariti. Ariorica irinintanaque irimayetaquero paitapeerica, intasoncaque. Ari imajeitaquero maaroni icantajeitiri catsini: apatiro ineanataque, mataca. Peerani ainironi antayetironi caari cameetsatatsi, irootaque caari acameetsatantaveitani. Iro cantaincha ipoaque irinti icamimentajeitaquee yoameetsajeitajateeri. Ipiñaja aisati anta inquitequi, isavicapaaaji iracosanoriqui Tasorentsi, icaratiri ipincatsarjeiti.

**Yanaacotaqueri Quirishito inampirepee
Tasorentsi, ipincatsaritasanoti.**

⁴Irisati aisati anaacojeitiriri inampirepee Tasorentsi, ipincatsaritasanoti, tempa icantiri Tasorentsi: “Notomi”. Ishaninca-

tasanotacari. ⁵¿Icantirimpa Tasorentsi inampire: “Aviro notomi, meeca notomin-taquempi”? Te intominteariji inampire-pee, irintueqa irinti Quirishito. ¿Icantirimpa inampirepee: “Narotaque pirintajeitari, notomintajeitaquempi”? Te incanteriji. ⁶Aisati peerani, ipocantacari itomi quipatsiquica, icanti: “Nocoacaajeitaqueri maaroni nonampirepee impinca-tsajeiteri notomi”. ⁷Icantiri Tasorentsi: “Notiancapinitiri nonampirepee yovaaji-niri ashaninca noneane, ishintsitasano-jeiti. Ainiro shiaarantaquerori paamari”. ⁸Iro cantaincha icantiri Itomi irinti: “Oshequi pipincatsariti, oshequi pitasorentsiti: pincantaitiyempani. Ocameetsatasanotaque pineane, oqueariotasanotaque. ⁹Oshequi pininta-caajeitaqueri atiri intime cameetsa; te pinintacaajeiteriji catsini irantero caari cameetsatatsi. Noveshireacaasanota-quempi, panaacojeitaqueri itsipapee piveshireasanotanaca avinti”. ¹⁰Aisati icantiri: “Pincatsari”; tempa icantiri: “Oshequi pipincatsariti avirori. Peerani povetsicaquero quipatsi, inquite, aisati maaroni timantajeitarori. ^{11,12}Coajica ompeajeitanajea, irompa avinti pincantai-tatiyempani pintime. Oquempeta maatsaraantsi yojoqueetiro irantajeari iroquerari, aisati pinquempetacantajero iroori quipatsi: pojocajero povetsicantajeari pashini. Irompa avinti, eiro pipashinatitsi, eiro pipeatsi catsini”. ¹³¿Icantirimpa Tasorentsi inampire: “Pisavique

nacosanoriqui irosati impincatsarijeitan-tempiri quisajeivetimpiri”? Te incanteriji, irinti icanti itomi irinti. ¹⁴Tempa irio inampirepee antayetiniriri icoacaajeitaqueriri: yamenacoventajetaqueri maaroni yora oaviscotajanchaneri.

**Ocameetsati anquemisantasanojeiteri
Itomi Tasorentsi.**

2 ¹Icoacaasanojeitaquee Tasorentsi anquenqueshiretasanotermaaroni icantajeitaqueeri Itomi: tempa oqueario-tasanotaque, te oncameetsateji ampeaco-tearo icantaqueeri. ²Tempa oqueariotasa-notaque maaroni icantajeitiriri inampire-pee, aisati yoasanquetaajeitaqueri Tasorentsi maaroni caari quemisantajei-tavaqueri: ineacarove. ³Meeca oshequi ipomerentsiventajeitaquee Itomi yoavisa-cojeitajeari. Ariorica antseencajeiteri, ⁴ipijitimpaeiro yoasanquetaajeiteetsi iriri? Ijivataque Avincatsarite iriori yoamejeitaqueri iroamerepee jaoca ancantajeiteari avavisacotantajeitajeari; impoijiquea yovaajeitaqueero arori yora quemajeitaqueriri. ⁴Janicarica icoacaapi-niyetiri Tasorentsi itasoncantayeti, imatacaaaqueri; aisati omatacaajeitiri Ishire paitapeerica, caari amati arori. Ari aneajeitaqueri, ayojeitasantacari queariota-que icantiri Tasorentsi.

**Coajica impincatsajeiteri maaroni
atiri Jesoshi.**

⁵Ari meeca nonquenquetsatacoteropashini quipatsi onta inquitequiniri: ora asaviceitantapaaajeari coajica. Eiro anta ipincatsariventajeitajeetsi inampirepee Tasorentsi, ⁶eiro catsini. Tempa peerani icantirini Iravirini Tasorentsi: “Te nonquempetempiji avinti, te nontasoren-tsiteji narori. ⁷Paita piquenqueshiretanta-nari? Tecatsi pinquenqueshireimentenari. Aisati, ⁸janicampa yora poneachaneri inquitequi, yora atiritapaatsineri? ⁹Paita

pineacameetsatantariri iriori? ⁷Ariorica impocapaaque quipatsiqui, eiro imoncaratapaajaritsi pinampire ipincatsariti. Iro cantaincha eiro osamanitasanotitsi iranaacotajeri aisati, impincatsaritasano-taje. Pisavicacaajeri cameetsa, pimpeajeri pincatsarisanori. ⁸Pincanteri: ‘Pincanta-cantajeitero maaroni. Ari impincatsajei-tempi maaroni timajeitajantsineri?’.

Irootaque isanquenatiniri Iravirini. Pineaquero, icantiri: “Pincantacantajeita-jero maaroni, impincatsajeiteimpi maaroni timajeitajantsineri”. Tequera moncarateaji maaroni, iro cantaincha ⁹ayojeitaque peerani iponeanaca Jesoshi inquitequi, ipoquaque quipatsiqui. Te impincatsaritasanotapeeji, te irimoncaratapaajeariji inampire Tasorentsi ipincatsariti. Oshequi yoashinonqueevetacari, icamimentajeitaquee, irootaque caari ajajeitantea Sharincaveniqui. Irio tiancaqueriri Tasorentsi ayojeitasantacari oshequi ineshinoncajeitaquee. Meeca cameetsa isavicipaaji inquitequi, ipincatsaritasanotapaaaji aisati.

Icamantaquee paita icamantacari Jesoshi.

¹⁰Ari yovetsicajeitaquee maaroni, irootaque meeca ampincatsajeitanteeariri maaroni; tempa itasoncaquee atimajeit-tantacari meeca. Oshequi iquematsicati-mentajeitaquee, irootaque ocameetsatan-tari ampincatsajeiteri, avavisacojeitanta-jeari; tempa aitaque icoaque intominta-jeitajee Tasorentsi maaroni, icoaque iraajeitajee inquitequi. ¹¹Ari yoameetsa-jeitaquee Jesoshi, meeca acantajeitiri Iriri iriori: “Apa”. Irootaque caari ipashiventacante Jesoshi icantajeitee: “Iye”, aisati: “Tsio”. ¹²Tempa ocanti Sanquenarentsi: “Icantiri Quirishito Iriri: ‘Noncamantajeiteri iyepree aisati tsiopee jaoca picanta; noncarajeiteri nompampo-yaventajeitempi’”. ¹³Ocanti pashini Sanquenarentsi: “Noncarajeiteri iyepree

aisati tsiopee nonquemisantajeiteri Tasorentsi". Iro pashini ocanti: "Apa, pineaquena aca, nocarajeitiri aisati pitomipee, aisati pishintopee. Irootaque pitimacantacariri noshanincajeitajeari".¹⁴ Arojeitaque atiri itomipee Tasorentsi, irishintopee; caamaneri anajeteaque. Ari iquempejeitapaaquee Jesoshi, icamimentajeitapaaquee. Intsoncajeiteri camaari, coavetachari iroajeiteeme aisati iraajeitanaqueeme Sharincaveniqui.¹⁵ Peerani atsaroacaajeiveitaroni ancamajeiteme, acantatiani; meeca te antsaroajeitanajeji, irointi aveshireajeitanaja.¹⁶ Te irio irintacotapeempa Jesoshi inampireepee Tasorentsi, aintquea intacojeitapaaquee aroripee: maaroni jorioppee.¹⁷ Ari yatirittapaque, irirentijeitapaaquee; iquempejeitapaaquee arori, irootaque iotantacari ineshinoncajeitaaquee aisati icantaqueri Tasorentsi irishinoncajeitee iriori. Aisati imajeitaquero maaroni icoacaajeitaqueri Tasorentsi, icamaque yoameetsajeitancariri maaroni antirori caari cameetsatatsi, meeca yaacameetsajeitaaquee Tasorentsi.¹⁸ Oshequi iquematsicatacaro iriori; aisati ineantavetacari camaari, irantacayerime caari cameetsatatsi. Meeca aroripee, ariorica anquematsicayetearo paitapeerica, aisati ariorica irineantavetaquee camaari, ioti irinti Jesoshi aitaque ocantari. Irootaque iotantacarori intacojeitaaquee.

**Yora Quirishito, yanaacotaqueri
Moishishini ipincatsariri.**

3 ¹Meeca, noyemisantaririnte, noncamantempi te pinquempejeiteariji yora caari quemisantatsi: icoyeajeitaquempi avinti Tasorentsi pintispipajeitan-teariri anta inquitequi. Pinquenqueshirejeitanaqueri Jesoshi, jaoca icanta: iquempejeitacari maaroni itiancanepee Tasorentsi, icamantajeiteero maaroni icoacaaqueeri Tasorentsi. Aisati iquempe-

tacari yora ivincatsarite saserote: yovaajiniri Tasorentsi acoacotiriri arori.² Peerani yora Tasorentsi icantaqueri Moishishih: "Cameetsa poamejeiteri pishanincaphee, piotacaajeiteri maaroni noocoacaajeitae-riri". Ari iquearioventauqueneri Moishishih maaroni icantaqueririri Tasorentsi. Yora Jesoshi yanaacotasanoataqueri Moishishih, iquearioventasanotaqueri Tasorentsi maaroni icantaqueririri, catsini.³ Tempa aneacameetsatasanotiri yora vetsquirori ivanco: te aneacameetsatasanoteroji ivanco irointi. Tempa irio iotatsiri irinti yovetsiqui: te ioteji pancotsi ovetsicajea irosati. Aisati ocameetsati aneacameetsatasanoteri Jesoshi, oshequi ipincatsariti; eiro aneacameetsatasanotirtsii Moishishih irinti, te impincatsaritasanoteji.⁴ Timasti vetsquirori maaroni pancotsipee, iro cantaincha yovetsicajeitaqueri Tasorentsi maaroni timajeitatsiri, catsini.⁵ Ari cameetsa iquearioventiniri Moishishih Tasorentsi maaroni icoacaayetaqueriri, iro cantaincha iquempetacari inampire. Intavetacaro yoamejeitaaquee capichaji yantayetiri Tasorentsi.

**Iquisaqueri Tasorentsi tseenquiriri
aisati piatsatariri.**

⁶Iro cantaincha, Quirishito irinti, iquearioventasanotiniri Tasorentsi maaroni icoacaqueriri. Caari ini inampire, irinti itomisanori. Ariorica ancanteani ashirejeiteari, ayojeitaque iraajeitanaquee anta inquitequi, irootaque ocameetsatantari anquimoshirejeite, impoiji ayojeitaque ashanincajeitacari Tasorentsi.⁷ Jero oca osanquenata-aaqueriniri Ishire Tasorentsi yora Iravirini: "Meeca pinquemajeitavaqueri icantiri Tasorentsi.⁸ Eiro piquishiritsi, eiro pitseenquiritsi: eiro piquempetaritsi yora piatariniri peerani. Ipiavetacari peerani Tasorentsi anta caaraiteriqui, ijivetani eiro yoasanquetairitsi.⁹ Icantini

iriori: 'Queario ipiajeivetaquena narori pishanincani peerani. Ocarataque 40 osarintsi natsipetashita notasoncacoven-tiri.¹⁰ Iro cantaincha ipiajeitaquena, irootaque noquisajeitancatariri narori, nocantaquerini: Oshequi pitseencaquena, te pinquenqueshiretenaji. Te pincoajeiteji piojeite paitarica nocooacaajeitaquempi. ¹¹Noquisaqueri, irootaque nocantasano-tantacariri: Eiro pareejeitatsi anta Canaqui, aisati eiro pareejeitatsi aca ocameetsaitetica". Irootaque isanquena-tiniri peerani Iravirini.

¹²Queariompia, noyemisantarintre, pitseenquiricari Tasorents: te oncame-tsateji. Yanei irinti, icantani. Iro cantain-chaa riorica pintseenqueri, pimpeaco-teari: eiro piquenqueshiretajiritsi aisati. ¹³Irointi ocameetsati meeca pinquemisantacaapiniteri pishaninca maaroni quitaiteri: coajica eirorica pimatirotsi. Eirorica iquemisantajeiti meeca, incanteani irampiitapinitero caari cameetsatatsi, irametearo: impoiji oshequi iramatavitaquea, eiro icoitsi catsini inquemisante. ¹⁴Ariorica ancantai-tatiyempani ashireteari Quirishito, ayojeitanaque ancarajeitejeri ajajeitanaque inquitequi: eiro yamataviteetsi. ¹⁵Iro cantaincha pinquenqueshiretajero isanquenatiniri Iravirini: "Meeca pinquemajeitavaquero icantiri Tasorents. Eiro piquishiritsi, eiro pitseenquiritsi: eiro piquempetaritsi yora piatacariri peerani".

¹⁶Peerani yora ejipitosati oshequi yoashinoncaajeitaqueri maaroni intacan-tajeitaqueeri. Ari icantajeitiri Moishishi: "Tsame, naajeitanajempi pashiniqui quipatsi, cameetsaquea asavacajeitanta-jeari". Icantajeiti: "Cameetsa, tsame ajajeite maaroni". Iro cantaincha tempa iriojeitaque piajeitaracariri Moishishi aisati Tasorents. ¹⁷Irootaque ishemantacariri Tasorents. Ocarataque 40 osarintsi ishemacari. Oshequi yantajeitaquero

iriori caari cameetsatatsi, irootaque ishinetantacariri icamajeitaque anta caaraiteriqui. ¹⁸Te inquemisantajeiteriji, irootaque icantasanotantariri: "Eiro pareejeitatsi anta ocameetsaiteti". ¹⁹Pineaquero, itseencajeitaqueri Tasoren-ts, irootaque caari yareejeitanta iriori anta ocameetsaitetinta.

Icoaque Tasorents aereejeitea anta ocameetsaitetinta.

4 ¹Pamene, icantajeitaquee Tasorents: "Ariorica pinquemisantajeiteni pisaviquimojeiteni aca nonampiqui, aca ocameetsaitetica". Iro cantaincha queariompia, piquempetaricari yora peeraniniri caari areetachani. ²Ocame-tsatasanotini ora icashiacaavetacarinri Tasorents, aisati ocameetsati oca icashiacaajeitaqueeri arori. Iro cantain-chaa te inquemisantajeiteni iriori, irootaque yatsipetashitantacarori icaman-tiri.

³Ariorica aquemisantasanotaqueri Tasorents, ari areetasanotaquea anta ocameetsaitetinta, iro cantaincha eiro yareetatsi yora caari quemisantiri. Tempa icantajeineri Tasorents: "Noquisaqueri, irootaque nocantasano-tantariri: 'Te pinquemisantenaji, irootaque eiro pareetantsi anta ocameetsaitetinta'". Peerani, tequerani irovetsiqueroni quipatsi, yovetsiquitavetanari irisavican-teameri, iro cantaincha te irareejeiteji.

⁴Ayojeitaque yovetsicajeivetacaro maaroni, moncarataca. Tempa ocanti Sanquenarents: "Ocarataque 6 quitaiteri yovetsicajeitancarori Tasorents maaroni; moncarataca. Impoiji, quitaiteri 7 yoipacaquero yovetsicantaque, ari ocarati". ⁵Ari yovetsicavetanari, iro cantaincha te inquemisantajeiteriji irioripee, irootaque icantantari aisati Tasorents: "Eiro catsini yareejeitatsi aca ocameetsaitetasanotica". ⁶Ari ocameetsa-

taque ora icantaqueriniri Tasorentsi, iro cantaincha eiro yareejeitatsi iriori yora icantaqueniri: pineaquero, te inquemisanta jitejeji. Iro cantaincha intimaarantaje areetajanchaneri. ⁷Icanti Tasorentsi: “Meeca quea nocooacaajeitaqueri atiri inquemisanta jitejena irareejeitanta jeari jenoqui”. Irootaque isanquenatacaqueri niri Iravirini: “Meeca, ariorica pinquemavaqueri Tasorentsi inquenquetsatacayempi, eiro piquishiritsi, eiro pitseen quiritsi”.

⁸Arime irareetacaajearte Josoe ishanin capee anta ocameetsaitetinta, carimpa impoiji irisanquenatacaquerime Tasorentsi Iraviri: “Coajica irareejeitea quemisanta jitejari anta ocameetsaitetinta”? ⁹Irootaque ayojeitancatari coajica ajajeitaje maaroni quemisantsiri anta ocameetsaiteti, eiro anta apomerentsitapajatsi antsamejeitaje. ¹⁰Peerani itsoncantacarori Tasorentsi yovetsicayetaque, yoipacaquero, tecatsi irantaje aisati. Aisati arorije, ariorica ajajeite iriori quinta, anquempejeitapajeari, amaoareajeitapajae, tecatsi antajeitapajae. ¹¹Tsame ancoasanojeitajero areejeitajea anta: eiro apiatsataritsi, eiro atseenquiritsi. Eivorica aquemisanta sanotiri, eiro areetajartsi. ¹²Aneatsiri ini Tasorentsi, oshequi itasorentsti; imatasanotaquero maaroni icantajeitiri. Tecatsi ompomerentsitimoteari, ioti jaoca ocantari aquenqueshireantari aisati ashire; ioti catsini jaoca acantari; iotiro maaroni aquenqueshirejeitiri aisati maaroni acoajeitiri. ¹³Tecatsi materone irimanapitsateari: ineasanojeitaquee maaroni; jaocarica asavicajeitiri, ineajeitaquee. Itsoteayetiro quipatsi, maaroni; iquenqueshirejeitaquee maaroni.

Yora Jesoquirishito iquempvetacari ivincatsarite saserote.

¹⁴Ari ijataji Jesoshi anta inquitequi, itsipatapaajari iriri, yora Tasorentsi. Ainiro meeca icantiri Iriri: “Pincavintsa-

jeiteri quemisanta jiteitanari”, iquempvetacari yora ivincatsarite saserotepee, irootaque ocameetsatantari ancantaitatiyempani anquemisanta jiteiteri. ¹⁵Yatiripaquaeni peerani, iquematsicayetacaro paitapeerica, aisati yora caamari iriori irantacayerime caari cameetsatatsi, iro cantaincha tecatsi irante. Iotitanta queerori irinti maaroni aquematsicayetari aisati jaoca icantaqueeri camaari. Ioti opomerentsitimojeitaquee, iro cantaincha icavintsaasanojeitaquee. ¹⁶Eiro meeca atsaroacaajeitaritsi anquenquetsatacayeri Tasorentsi: ayojeitaque irine shinoncajeitaquee, incavintsaasanojeitaquee. Eiro ishineteetsi ashinoncaajeitea.

Icoacaqueriri Tasorentsi yora ivincatsarite saserote.

5 ¹Ari ipeaqueri Tasorentsi atiri ivincatsarite saserote, icoacaapinitiri iramanacoventajitee arori. Irio vaaqueriniri Tasorentsi paitarica apajeitiriri. Antajeitiro caari cameetsatatsi, irootaque maaroni osarintsi yoantanariri saserote Tasorentsi aparoni virantsi cameetsari, itaaqueneri. Impoiji yaacameetsajeitaquee maaroni quemisantsiri, iquempetacantajetaquee te antajeitero ji caari cameetsatatsi. ²Ari iquempetajetaquee arori, atiri ini; te irimatero ji intime cameetsa catsini, irointi timatsi yantiri iriori caari cameetsatatsi. Irootaque iotantacari icavintsaajeitaquee ariorica antero arori caari cameetsatatsi. ³Aisati ariorica yoiniri Tasorentsi ovisha, iquenqueshiretiro antanepee arori, aisati irantane iriori. ⁴Te irisati peashitachane ivincatsarite saserote, irinti peaqueri Tasorentsi; oquempetaca peerani ipeaqueri Aaro isaserotetantacari.

⁵Aisati iquempetaca Quirishito: te irisati peashitachane quempetearine saserote, irinti peaqueri Apa Tasorentsi. Tempa icantiri peerani: “Aviro notomi,

meeca quitaiteri notomintaquempi”.

⁶Pashini aisati icantiri: “Pincantaitati-yempani pisaserotetanaque, pinquempe-teari iriori Merequiserequi”.

⁷Peerani, yatiritantapaintaniri

Quirishito, oshequi iquenquetsatacicapintiri Iriri, iraanasanotacani, aisati ij aquitacani; icantiri: “Apa, ariorica noncame niotaque pimatajena pointinaajena”. Ari oshequi ipincatsataqueri Tasorentsi, irootaque imatantacarori iriori icoacairiri.

⁸Queario, itomi Tasorentsi ini, iro cantaincha iquemisantiri Iriri, irootaque iquematsicatantacarori paitapeerica.

Meeca ariorica anquemisante arori, aisati anquematsicatearo paitapeerica, iotiro irinti jaoca ocantari. ⁹Ari imatasanotaquero maaroni icoacairiri iriri, iquemisantasanotaqueri: irootaque imatantarori aisati yoavisacojeitiri maaroni quemisan-tasanojeitiriri iriori. Meeca eiro ajajeititsi Sharincaveniqui, ainti ajajeite inquitequi, ancantaitatiyempani asavacajeitapaa je.

¹⁰Iriotaque ishiacantaqueri Tasorentsi ivincatsarite saserote, icanti: “Irio iquempetaca notomi Merequiserequi iriori”.

Tequera inquemisantasano note yora isanquenatiniri.

¹¹Nocoavetaca nontsoteajeitempirome maaroni oca, noametasanojeitempirome. Otimaveta piotantavetari, iro cantaincha te pinquemisantavaquenaji, irootaque caari piquemantavacaro. ¹²Oncameetsate-me poamejeiterime meeca itsipapee, iro cantaincha ainirotatsi picoajeiti oamejei-tempineri. Picoajeiti nampiitajempiro caari pomerentsitatsi. Piquempetacari jananequi: coatsimpi pantsomite, te paveeroji pantsiquero poyeari. ¹³Queario, piquempejeitacari jananequi, coatsimpi pantsote: tequera piotasanojeitero Irineane Tasorentsi oamejeiteeri jaoca ancanteari ancameetsajeitantajeari.

¹⁴Piotasanoterime Tasorentsi, pincoajeiteme poyeari pantsicasanoterime. Piotaqueme paita cameetsatatsiri antajeitaqueri, aisati piotaquerome caari cameetsatatsi eiro pantirome.

Icamantiri sanquenatirori paita isanquenatantanariri.

6 ¹Eiro napiitapinitajimpirotsi oca noametacatapinitiriri Quirishito: te ompomerentsiteaji. Eiro meeca picantajansati: “Pampiitapinitajenaro”. Ocameetsati aiquero pijatatiye piotasanolana-quero maaroni icoacaajeitaquempi Tasorentsi. Nocantimpini peerani: “Eiro pantashiyetarotsi paitapeerica, eiro oavisacotimpitsi: tecatsi pincantea poavisacotajea avisati. Ocameetsati pinquemisanteri Quirishito pavisa-cotantajeari. ²Pivaotatisamentajeiteari iriojeitanteari atiri piquemisantiri. Ariorica pincanteri Tasorentsi iramatateri piyemisantarinre, pipamijeitaqueri. Ariorica ancamajeite antinaajeitanaje aisati, impoiji incantacoventajeitee Tasorentsi”. Ari eiro napiitajimpirotsi oca piotitaniri, ³irointi ariorica irinintacyena Tasorentsi, noametempiro iroaque-rari, caari piquemapiniti.

⁴⁻⁶Pamene. Ainiro asháninca quemavetaroniri irineane Tasorentsi, iveshireimentavetacari Tasorentsi, amitacovetacari Ishire iroori. Iovetaca ocameetsati irineane Tasorentsi; iovetaca coajica impincatsariventajeitee Quirishito. Iro cantaincha yojocajiro iquemisantaveitani. Ariorica yojocajiro iquemisantiri Itomi Tasorentsi, oquempetaca icoaque irampiitajerime aisati impajacotacantajeri. Itseencaqueri, icoaque intseencaaajeiteri itsipapee atiri, irishirontimentajeitante-ri Quirishito. Ari tecatsi incantaje inquemisantasano taje yora quemisanta-veitachaniri. Queariyea, piquempetaricariyea avirori. ⁷Ariorica cameetsa oparii

incani quipatsiqui aisati onintiro panqurentsi, otimaque yoajeitari yora panquitirori. Tempa iriotaque Tasorentsi oameetsantirori quipatsi onintantarori panqurentsi. ⁸Iro cantaincha ariorica pineaquero oantsiqui saveshiniro aisati otsipapee totsequishi, tempa picanti: “Te oncameetsateji, tsame anquiacojetero, antaajeitero maaroni”. Queariyea, piquempetarocari avirori, irointi pinquempetearo cameetsari quipatsi.

Iveshireacaacari yora isanquenatiniri.

⁹Ari nocantavetaquempi: “Pitseenquicari”, aisati nocantimpi: “Piquempetarocari quipatsi oshiocantari saveshiniro”. Iro cantaincha, noshaninca, nonintajeitaquempi. Naamaaca cameetsa pisavaciejataque, aisati iroavisacojeitempi Tasorentsi. ¹⁰Tempa icameetsataque, eiro ipeacotarotsi maaroni pantiniriri: ioti piquearioventaquero icoacaimpuri, ioti picavintsaajeitiri piyemisantaririnte, picantani. ¹¹Nocoacaasanojeitaquempi pinquearioventajejitero pinintajeiteri itsipapee, pincanteani, irosati omoncara-tanteari impinatantempi Tasorentsi. ¹²Eiro piperaventarotsi icoacaimpuri Tasorentsi, irointi pinquempejeiteari yora itsipapee quemisantasanoliriri, queario-ventiniriri maaroni icoacaajeitiriri iriori. Queario irineajeitero maaroni icashiaca-jeitaqueriri.

¹³Pamene, ariorica ancoaque ayotaca-sanoteri itsipapee asháninca queario oni acantaqueriri, acantiri: “Ioti Tasorentsi queario oni oca nocantimpire. Yanaacojeitaquee irinti, ipincatsaritasanoti. Ariorica namatavitempi, yoasanquetanacari”. Timatsi meeca icantaqueeri Tasorentsi, iro cantaincha tecatsi anacoterine irinti, tecatsi oasanquetayerine irinti. Apatiro icantiri Avarama: “Queario oca noncamantempire nainti, tempa naro Tasorentsi: eiro nopashiniyetirotsi

noneane”. ¹⁴Impoiji icantiri: “Queario, nontasoncacoventempi, oshequi nintacotempi; aisati noshequiaqueri pishaninca”. ¹⁵Ari yoyeasanotaqueri Avarama, impoiji ineasanotaqueri maaroni icashiacairiri. ¹⁶Tempa ariorica ancoaque ayotacaasano-teri itsipapee asháninca queario oni acantaqueriri, acantiri: “Ioti Tasorentsi queario oni oca nocantimpire. Yanaacojeitaquee irinti ipincatsaritasanoti. Irimata-cayena nontsoteaquempiro maaroni nocantimpire. Ariorica namatavitempi, iroasanquetaquena iriori”. Ariorica ayotaque ipincatsatasanotaque Tasorentsi, ari ashiretasanotearo icantaqueeri. ¹⁷Ari otimini icashiacaajeititacariniri Tasorentsi yora peeraniniri. Icoaquesi iriojeite eiro yamatavijeitiritsi, irootaque icantasanotantariri: “Queario oca noncamantempire nainti, tempa naro Tasorentsi: eiro nopashiniyetirotsi noneane”. ¹⁸Ari oqueariotasanotaque irineane Tasorentsi: te irioteji intseeya. Iro cantaincha aisati icantini: “Queario oca noncamantempire”, ayotasanojeitan-tacari eiro catsini yamatavitantsi. Meeca, ariorica aventeari iroavisacojeita-jee, ayotasanoque irimataqueero oca icantaqueeri: iroavisacotasanojeitee. ¹⁹Ariorica ayojeitaque avavisacotaca, tempa aveshireasanotaca, eiro aquenque-shiretajatsi aisati. Ayojeitaque ocameetsataque anquenquetsatacajeiteri meeca Tasorentsi, aisati coajica arejeeiteari: tecatsi ticavaqueene. ²⁰Ijivajetanaquee Quirishito, icamantacoventaquee: iquempetacari yora Merequiserequi, ivincatsariteni saserote peerani.

Yora Merequiserequi yanaacojeitaqueri isaserotetasanotaque maaroni ishanincani Irevi.

7 ¹Ari meeca nonquenquetsatacoteri yora Merequiserequi: peerani ipinca-tsariventajeaqueri yora saremisati.

Aisati Tasorentsi iriori, yora savicatsiri inquitequi, ipeaqueri saserote, icanti: “Irio saserotetatsine yoca”. Ari itimi pashiniqui nampitsi Avarama. Yaajeitana queri iratiritepee, ijajeitanaque imanajeiti tiri yora iisaneeentane, yora noshiquiriri itomitsori: oshequi inajeiveta, iro cantaincha ipoyereajeitaqueri maaroni, ivincatsaritepee, maaroni. Ari ipianaja Avarama, yoipiajiri itomitsori, aisati yamayetajiro ivararoni yora yovaitiri. Ipiantajari, itonquitavacari Merequiserequi, icantiri Tasorentsi: “Pintasoncacoventer Avaramaca cameetsa irisavican-teari”. ²Impoiji yaarantaji Avarama vaararontsi, ipaarantaqueri, icantiri: “Jeroca irashi Tasorentsi”. Otimirica 10, ari ipaqueri aparoni. Ari ipajita iriori Merequiserequi. Acantiri aneanequi: “Cameetsatatsiri”. Ipincatsariventajetir saremisisati. Ocantiri Saremi aneanequi: “Cameetsa asavajceiti”. ³Ora sanquenarentsi tecatsi onquenquetsatacoteri iriri Merequiserequi. Tecatsi onquenquetsatacoteri iriniro, icharine, tecatsi. Tecatsi onquenquetsatacoteri itimantacari aisati icamantacari. Oquempevetaca icantani itimini, irootaque ishiantacariri itomi Tasorentsi; icantani iriori isaserotetanaque, icantapinitiri Tasorentsi: “Pintasoncaventeri maaroni quemisantanari”.

⁴Pineaquero, oshequi ipincatsaritini Merequiserequi. Intacantajeitaqueeniri peerani Avaramani, iro cantaincha ipincatsatiri, aisati ipaarantaqueri ivaararoni imanatiniri. ⁵Pamene, impoiji catsini itimi ishanincani Avaramani: yora Irevi. Isanquenatacaaqueri Tasorentsi Moishishi, isanquenatantarori: “Icoaque Tasorentsi impeaquea ishanincani Irevi saserotetatsineri. Nocoaque maaroni ijomoririnte impaaranteri iriori ivararo, ivira, maaroni: intimerica 10, ari imperi aparoni”. Pineaquero, ishanincani Avaramani inajeitini: ishanincani Irevi

aisati maaroni ijomoririnte. Ishanincata-vacaajeitaca. ⁶Iro cantaincha peerani yora Merequiserequi te irishanincatearini Avaramani, inashita iriori; iro cantaincha yaavaquero maaroni ipaarantaqueri iriori, aisati icantacoventaqueri yora intacantajeitaqueri: yora icashiacaqueri Tasorentsi. ⁷Pineaquero, yora Merequiserequi anaacotantatsiri ipincatsariti, irootaque icantantariri Tasorentsi: “Apa, pintasoncacoventer Avaramaca cameetsa irisavican-teari”. ⁸Aca asháninca inajeiti yora ishanincani Irevi, imoncarajeitaquee arorije, acamajeiti, iro cantaincha yaapinitaqueri maaroni apajeitaqueri. Iro cantaincha peerani yora Merequiserequi, inashita: oquempevetaca te incameji irinti, te oncateji sanquenarentsi: “Icamaque”. ^{9,10}Peerani, ipaarantantacariri Avarama vaararontsi, tequerani intimeni Irevi: itimi iriori impoiji. Iro cantaincha arime intimitame, impaaranteime aisati iriori: tempa inquempetea- rime yora jivatatsiri itimi. Aisati inquem-pejeiterime maaroni ishaninapeeni Irevi: maaroni saserotetatsiri. Aitaqueme impincatsajeiterime Merequiserequi maaroni. Pineaquero, ajorioririnte ipincatsajeitaqueri saserotepee, irootaque ipaarantajetantacariri paitapeerica, iro cantaincha yora saserotepee ipincatsasanojeitaqueri Merequiserequi: tempa yanaacotantaque iriori isaserotetasanotaque, ipincatsaritasanotaque.

Yora ishanincani Irevi, tecatsi incantee iroavisacojeitee.

¹¹Ari itimajeiveta yora ishanincani Irevi: yora Aaro aisati maaroni ishanincani iriori, isaserotejeitaque; aisati otimaveta isanquenajeitiniri Moishishi, oamejeitiri paitapeerica antajeitiri. Iro cantaincha tecatsi incantee iriorije iroameetsajeitee, iroavisacojeitee; irootaque itiancantacariri Tasorentsi

pashini saserotetajantsiri, quempetajariri yora Merequiserequi. ¹²Ari inashita yora saserotetatsiri, aisati meeca onashita icoacaajeitajeeri Tasorentsi. ^{13,14}Itimaveta saserotepee shanincajeitacariri Irevi, aisati isanquenajeitaqueneri Moishishi, yoamejeitiri paitarica yantajeitaqueri. Iro cantaincha yora iroaqueratajantsiri saserotetajantsiri te irishanincateariji Irevi, irinti ishanincatacari Jora. Te irisaseroteteji itsipapee ishanincani Jora: te irisanquenajeitenerini Moishishi, te incanteriji irinti impeaquea saserote.

¹⁵Meeca itimi yora quempetariri Merequiserequi, inashita iriori, ayotantacari onashita icoacairiri Tasorentsi. ¹⁶Te irishanincateariji Aaro ipeantacari saserote; irointi itasorentsitaque aisati icantatitiani yanei, irootaque ipeantacari saserote. ¹⁷Tempa icantirini Tasorentsi peerani: “Pincantatatiyempani pisaserotetanaque, pinquempeteari iriori Merequiserequi”. ¹⁸Otimavetani oca isanquenatiniriri ishanincani Aaro, iro cantaincha te incoyeji Tasorentsi ampomerentsiventearo meeca. Antsipe-tearome, tecatsi oncantajeitee oavisaco-jeitee. ¹⁹Amoncarajeiterome maaroni, eiro oameetsajeiteeme. Iro cantaincha irinti Quirishito aitaque irimatajee iraajeitanajee anta Tasorentsi. Te antsipetashiteaji aquemisantajeitaqueri irinti.

Icanti Tasorentsi: “Queario, incantatatiyempani Quirishito irisaserotetanaque”.

²⁰Te incantashiteaji Tasorentsi, icantasanoti: “Queario oca noncamantempi, tempa naro Tasorentsi. Incantatatiyempani Quirishito irisaserotetanaque”.

²¹Te inquempeteariji irinti ishanincajeini Aaro. Iro cantaincha icantiri Quirishito irinti: “Queario oca noncamantempi, tempa naro Tasorentsi. Te noncantashi-

teji, eiro namatavitimpitsi. Avirotaque saserote, pincantatatiyempani”. ²²Irootaque ayojeitancacari yanaacotantaque Jesoshi isaserotetasanotaque, imajeitaehee yoavisacojeitaquee. ²³Ari icarajeiveitani oshequi saserotevetachaniri, iro cantaincha icamapinijeitaque, yojocapinijeitaquero isaserotetantaniri. ²⁴Irinti Quirishito, icantani itimi: irootaque imatantarori isaseroteti, icantani.

²⁵Imajeitaqueri quemisantajeitiriri: yoavisacotasanojeitaqueri maaroni coasanotatsiri iraanajeri Tasorentsi. Icantani yanei, irootaque imatantarori icamantacoventajeitaquee.

²⁶Queario, ocameetsatasanoti isaserotetantejaquee; tempa Tasorentsi ini, te aneroji irantane, te iranteroji caari cameetsatsati; te inquempejeitariji yora caari cameetsajeitatsi isaviquimojeivetapaintaniri. Meeca isaviqui cameetsa anta inquitequi jenoqui. ²⁷Yora itsipapee saserotetatsiri, maaroni quitaiteri yoapinitiniri Tasorentsi ivirapee, itaapinitiniri. Iro yoapinitantanariri, oshequi iquenqueshiretaquero caari cameetsatsati yantajeitiri aisati yantajeitiri iriori ijorioririnte. Tecatsi iroapinite irinti Quirishito, irointi apatiro icamimentajeitaquee: moncarataca, eiro yapiitajirotsi aisati. ²⁸Ari peerani isanquenatini Moishishi, icanti: “Impeajeitanaquea ishanincani Aaro saserote”. Atiri inajeiti iriori, yantajeitiro caari cameetsatsatsi. Iro cantaincha impoiji icanti Tasorentsi: “Queario oca noncamantempi, tempa naro Tasorentsi: incantatatiyempani Quirishito irisaserotetanaque”. Iriotaque Quirishito Itomi, te iranteroji caari cameetsatsatsi irinti, icantatiani icameetsatasanotaque.

Isaserotetanaque Quirishito anta inquitequi.

8 ¹Piotavaquero oca noncamantempi, irotaque Quirishito saserotetimentajeitaqueeri. Isaviquimotiri Tasorentsi

anta inquitequi jenoqui, anta iracosanori-
qui; icaratiri ipincatsarijeiti. ²Yora
ishanincani Aaro iquenquetsatacapinitiri
Tasorentsi anta pancotsiqui yovetsiquiri
atiri, icantashitacaro: "Ivanco Tasoren-
tsi". Iranti Quirishito isavicasanoti anta
Tasorentsiqui: te irio vetsiquerone atiri,
iranti Avincatsarite vetsiquirori inampi
iriori. ³Yora ivincatsarite saserote
ipapinitiri Tasorentsi paitapeerica;
yoaqueperi virantsi, shemi; itaaqueneri.
Iranti Quirishito, te iroyeneriji virantsi;
irisati coaintsi yoyeetantacariri. Impoiji
ijatashitaqueri Tasorentsi, icantapaqaqueri:
"Narotaque nainti camimentajeitaqueriri
ashaninca, oavisacojeitaqueriri".
⁴Intimeme meeca aca quipatsiquica,
eirome isaserotetime; pineaquero, te
irishanincateariji Aaro: iriojeitaque
ishanincani Aaro tsoteaquerori isanque-
natiniri Moishishi. ⁵Yantaveetapiniti anta
icanteetirinta: "Ivanco Tasorentsi", iro
cantaincha te anta irisavicasanote
Tasorentsi. Apatiro oshiacaventiro
inampisanori anta inquitequi. Peerani,
yovetsicantarori Moishishi, icantiri
Tasorentsi: "Anta toncaariqui pajitachari
Shinai noametasanotaquempiro jaoca
pincanterori pancotsi: pimoncaratasano-
tero nocantaquempi". ⁶Ocameetsave-
taca ora isanquenatiniri peerani
Moishishi, isaserotejeitasantacari Aaro
aisati ishanincani, aisati yamitacojeiveta-
cari ajorioririnte. Iro cantaincha oca
icantiri meeca Tasorentsi ocameetsatas-
notaque, oshequi anaacotaquero isanque-
natiniri Moishishi. Aisati iquempetaca,
oshequi imatasanotaqueenero Quirishito,
oshequi yanaacotaqueri Aaro. ⁷Ocamee-
tsatasanotaqueme isanquenatiniri peerani
Moishishi, eirome icantirime pashini
Tasorentsi.

⁸Tempa icantini Tasorentsi peerani:
"Tequera omoncarateaji, te oncameetsa-
tasanoteji oca isanquenatiniriri Moishishi

Aaro". Irootaque isanquenatacantacariri
itsipapee quemasantatsiniri peerani:
"Icanti Avincatsarite: 'Coajica ontine
pashini noncamantajeiteriri maaroni
joriopee, onashitanaquea. ⁹Eiro
oquempetajarotsi ora nocantaqueriri yora
intacantacaroniri. Peerani isavicateitani
maaroni joriopee Ejipitoqui, iro cantain-
cha naajeitanaqueri pashiniqui quipatsi.
Isanquenavetacaro Moishishi nocooaca-
jeivetacariri, iro cantaincha te inquemi-
santajeitenaji. Irootaque caari namitaco-
jeitantari. ¹⁰Meeca timatsi noncamanta-
jeiteriri maaroni joriopee. Coajica
niotacaasanojeitaqueri maaroni noncan-
tajeiteriri, inquenqueshiretasanojeitero,
eiro ipeacojeitarotsi. Impincatsatasanojei-
taquena, aisati nontasoncacoventajeiteri
narori. ¹¹Eiro yatsipetashijeitatsi
irometavacaajeitea, iro icantavacaajei-
tatsi: "Noshaninca, pioteri Novincatsa-
rite". Aitaque iriotashijeitena maaroni:
pincatsaritsiri, caari pincatsaritsatsi,
maaroni catsini, iriojeitena. ¹²Noncavin-
tsaasanojeiteri maaroni antirori caari
cameetsatsi, eiro noquenqueshireacota-
jiritsi aisati yantayetiri". Irootaque
icantitacari peerani Tasorentsi. ¹³Pine-
quero, icantini: "Ontime pashini
noncamantajeiteriri atiri, eiro oquem-
petajarotsi nocantiniri peerani". Ari oca
icantiri meeca, irootaque poyeetajarori
icantiniri peerani.

Iquenquetsacotiro pancotsi yantaveetantari saserotepee.

9 ¹Peerani icantajeitiri Tasorentsi
intacantaqueeniri jaoca incantajei-
teari inquemisantajeite, aisati icantiri
jaoca oncanteari pancotsi irantaveetan-
teari saserotepee. ²Ari yovetsicajeitaque-
roni pancotsi, imoncarataqueroni icantiri-
niri Tasorentsi. Anta yantaveetapinita
saserotepee icanteetiro irashi Tasorentsi.
Otimi anta yoantarori vera itsiotari, aisati

otimi mesa. Anta mesaqui yoapinitiro tanta, ocarataque 12, aquenqueshirejetantarori ipapinijeitaquee Tasorentsi avajeitar. ³Otimaque oticaashiro, ainiro araquerora tecatsi jatapinitatsine, icanteetiro inantasanotari Tasorentsi iriori. ⁴Otimi ara itaapinitantarori casancapatsari, iro yovetsicantarori oro. Otimi aisati cajo, ipashicantarori oro. Ara tsompoina, otimi coviti yovetsicantarori oro, tsompoina irointi iteyeeti mana. Aisati otimi cajoqui iotiquiro Aaro, ora shiocashitachaniri peerani oshi. Aisati otimi ora mapi isanquenatacainirini Tasorentsi Moishishi. ⁵Anta otataroqui cajo ishiacantaqueri apite inampirepee Tasorentsi ipajiyetiri querovine. Ishiacantaca ainiro isavicaque Tasorentsi. Yamenajeitaquero otataro cajo anta yoapinitiro maaroni osarintsi qui ivincatsarite saserote iriraja virantsi. Oquempetaca iquenqueshirejeitiri camimentajeiteeri, cavintsaajeiteeri. Eiro meeca notsoteasanotirotsi noncamantempiro jaoca ocantayetari.

⁶Ari yovetsicajeitaquero peerani, imoncarataquero icantiriri Tasorentsi Moishishi. Impoiji iqueapinijeiti saserotepee, yantaveetapinijeiti. ⁷Iro cantaincha te irijatapinijeiteji oticaashiroqui araquerora. Aparoni ijati maaroni osarintsi qui irinti ivincatsarite. Ijivataque yoiniri Tasorentsi virantsi, impoijiquea iqueanaque apaniro, yaanajiro iriraja, itecaquero anta otataroqui cajo; icantiri Tasorentsi: “Apa, pincavintsaajeitenia, eiro piquishimentajeitanarotsi nantajeitaqueri aisati yantajeitaqueri noshanincapee; eiro piquenqueshireacojeitajanarotsi aisati”. ⁸Pineaquero, otimi oticaashiro, ticaajeitaqueriri itsipapee saserote aisati maaroni joropee. Tecatsi incantajeitea irijajeite anta isavicanasnotariqui Tasorentsi. Irootaque oshiacantajeitaqueri Ishire Tasorentsi, ayojeitancari

yora ishanincani Irevi tecatsi incantajeitee irareetacaajeitee anta Tasorentsi-quinta. ⁹Ocameetsati anquenqueshirejettero meeca ayojeitanteeari: maaroni ipapinijeitaqueri Tasorentsi, aisati maaroni yoapinitiniri aisati itaapinitiniri, te oameetsajeiteriji yora papinivtariri aisati taapinivetanariri. ¹⁰Peerani yoametashijeitari paitarica yantashijeitari; paitarica yoajeitari, aisati paitarica irajeitiri; yoametashijeitari jaoca incanteeari inquivapinitaa, paitapeerica. Irootaque icoacaajeivetacariri Tasorentsi atiri peerani. Iro cantaincha ari ocaratini, moncarataca. Ipocapaaque meeca Quirishito aamaajeitari. Meeca onashitaja icoacaajeitajeri Tasorentsi arori, iroqueratajantsiri, ocameetsatasanotaque.

Yora Quirishito yoameetsajeitiri maaroni antajeitirori caari cameetsajeitatsi.

¹¹Ipocapaaque Quirishito iquempevetapaajari ivincatsarite saserote, iro cantaincha ocameetsatasanotaque oca yantapaaqueri irinti. Yantaveetini itsipapee saserote anta pancotsiqui yovetsisquiri atiri; iro cantaincha irinti, ijatasanotaque anta ivancosanoriqui Tasorentsi: ocameetsatasanotaque irointi anta inquitequi. ¹²Aca quipatsiqui yora ivincatsarite saserote iyatapiniti maaroni osarintsi, yaapinitiro iriraja chivo aisati vacajani qui anta pancotsiqui tsompoina, ora icanteevetari inantasanotari Tasorentsi. Iro cantaincha Quirishito irinti, icamimentajeitaquee, impoiji ijataji anta inquitequi isavicasanotinta Tasorentsi. Ishiacantaca yaanajiro iriraja: caari oni iriraja virantsi, irointi irirajasanzori iriori. Icantiri Tasorentsi: “Pineaquero, nocamimentajeitaqueri maaroni atiri noavisacontajariri, incantaitatiyempani irisavicanajeari aca anampiquica”. Te irantsipeteaji irinti impiapinite, aparo

imataquero, ari ocarati.¹³ Ari peerani ariorica yantironi asháninca caari cameetsatatsi, yoqueri saserote vaca, iriorica chivo, iriorica vacajaniqui. Impoiji yaaquero iriraja, ipantaqueri yora antirori caari cameetsatatsi. Aisati itaaqueri ivatsa, impoiji ipantaqueri shirampari itsimenquitore virantsi. Impoiji icantajeitiri ishaninca: "Icameetsataji aisati yoca. Ocameetsati incarajetajeri aisati quemisantatsiri".¹⁴ Irintiquea Quirishito, icameetsatasanotaque irinti, ocantani otimi ishire. Icantiri Tasorentsi: "Apa, nocooasanotaque noncamimentajeiteri atiripee, noavisaajeitanteeariri". Ari aparajatimentajeitaquee irirajasanoi irinti, te iro iriraja virantsi: icamimentajeitaquee, meecca eiro atsipetajarotsi anquenqueshiretero caari cameetsatatsi, ora jatacaajeiteenemeri Sharincaveniqui, irointi anteneri Tasorentsi maaroni icoacaajeitaqueeri. Impoiji ancantaitiyempani asaviquimojeiteri anta inquitequi.¹⁵ Ari peerani apatiro ayojeitaquero isanquenare Moishishi, aisati antapinijeitaquero caari cameetsatatsi, ajajeitanteameri Sharincaveniqui; iro cantaincha icamimentajeitaquee Quirishito, yoavisaajeitantejeri. Meeca onashita icantajeitaqueeri Tasorentsi: "Ocemeetsaiteti maaroni nocashiacaajeitaqueriri quemisantajeitanari nocoyeajeitaqueri. Incantaitatiyempani iroveshireimentajeitearo".

Yoamejeitaquee paita icamimentajeitantejeri Quirishito.

^{16,17} Ari pinquenqueshiretero yamejeitacari ashánincae. Otimirica ivaavaropee, isanquenati paperiqui: "Ariorica noncame nocoaque irashiyetajearo noshanincae-peeni". Ari isanquenataquero ivajiropee ashiyetajearone ivaavaropee. Impoiji, ariorica incamaque, iriojeitanaque irio ashijetajearone. Eirotsitarica icami yora

sanquenatirori, eirotsita yaajeitirotsi vaararontsi. Iro cantaincha incamaque-rica, moncarataca: impoijiquea iraajeitero.¹⁸ Aisati oquempetacani peerani: otimi icantiriniri Tasorentsi ashánincani peerani. Tecatsi incantea Tasorentsi incame, iro cantaincha icamapinijeitaque poshiniri omoncaratan-tacari icantiriniri.¹⁹ Peerani icamantiri Moishishi maaroni icoacaajeitiriri ajorioririnten, irosati isanquenatantarori. Impoiji icamantajeitiri ishaninca icantiriniri Tasorentsi; impoiji aisati yoajeitaqueri vacajaniqui aisati chivo, yaajatavaquero iriraja, iconoajataquero njia. Impoiji yaaquero iviti ovisha quitioncapitiri aisati casancashiri, yovincaquero ojaqui, isaitantariri ishanincae. Aisati isaitaquero iroori oca isanquenatacaaque-riri Tasorentsi.²⁰ Ariorica isaijeitaqueri, icantajeitiri ishaninca: "Ari nocamantajeitaquempiro maaroni iroquerari icaman-taquerenari Tasorentsi. Icantiri: 'Ariorica pinquemisantajeiten, nontasoncacoven-tajeitempi'. Aisati avirori picantajeiti: 'Cameetsa'. Irootaque nosaitantaquempi-roi meecca iriraja".²¹ Impoiji isaitaquero aisati pancotsi iquemisantajeitanti, aisati isaijeitaquero maaroni timayetsatsi tsompoina.²² Ari isanquenatini Moishishi: "Irootaque iriraja poshiniri oameetsajeiti-rori paitapeerica; aisati eivorica itimi camimenterineri atiri, amparajatimenteri-neri iriraja, eiro yavisacotajitsi".

Iquenquetsatacotiro paita icamimentantaqueeri Quirishito.

²³ Ari otimi oshiacantiri oca pancotsi aisati maaroni timajeitatsiri tsompoina. Ocemeetsati isaijeitaquero yoameetsatan-tacarori. Iro cantaincha otimi inquitequi oca ishiacantajeitaqueri, itimi aisati anaacotirori iriraja virantsi, oameetsata-sanotirori maaroni timajeitsiri inquitequi:²⁴ irootaque Quirishito. Yora saserote-

pee ijatapiniti anta pancotsiqui yovetscajeitiri atiri, ishiacanteetiro: "Inantari Tasorentsi". Iranti Quirishito ijatasanotaji itimasanotinta Tasorentsi, icantacoventajeitaquee.²⁵ Yora ivincatsarite saserote ijatapiniti anta inantariqui Tasorentsi, yaapinitiro maaroni osarintsiqui iriraja poshiniri: te irayeroji iriraja irashi iriori. Te irijatapiniti iranti Quirishito iraapinintearori iriraja.²⁶ Arioricame iraapiniterome iriraja Tasorentsiqui, oncameetsateme incamapiniteme, peerani catsni: yovetsicantarori quipatsi, irintearome incamapiniteme, irosati meecame. Iro cantaincha moncarataca peerani icamtacari: aparoni icamaque, yoavisacojeitaquee.²⁷ Ayojeitaque aparo acamajeitaque, toren, ari acarati; te ampiitapiniteroji anceme. Ariorica ancamaque, impoiji incantacoventajeitaquee Tasorentsi.²⁸ Ari oshequi anajeiveta, iro cantaincha aparo icamimentajeitaquee Quirishito; imoncarataquero, eiro icamajitsi aisati. Impocaje aisati coajica ancorajeitanotajeri, ancorajeiteri aisati maaroni itsipapee aamaajeitariri meeca.

**Tecatsi oncantajeitee isanquenare
Moishishi oameetsajeitee.**

10 ¹Pamene, maaroni isanquenata cotaquerini peerani Moishishi oshiacantaqueri yora pocapaintatsiniri, cameetsatasanotatsiri. Yareetapainta, oshequi itasoncaventajeitaquee. Icantiri Moishishi Aaro: "Poapiniteneri Tasorentsi virantsi maaroni osarintsiqui". Ari icantani ishanincani yoapinijeivetari, iro cantaincha tecatsi oncanteri oavisacojeti yora quemisantirori isanquenatiniri Moishishini. ²Arime oavisacojeiterime yoca yoapinitiri, tempa iroimpacayerome yoapinitiniri. Aisatime iroavisacotajeame yora, eiro iquenqueshirejtajirome aisati yantayetiri. ³Iro cantaincha yoapinijeivetri ivira maaroni osarintsiqui, irosati

icanta oquenqueshiretacaapinitiri yantayetiri. ⁴Tecatsi oncanteri iriraja vaca aisati chivo oameetsajeiteri antirori caari cameetsatatsi. ⁵Ipcantacari quipatsiqui peerani Quirishito, tempa icantiri Tasorentsi: "Apa, te pineacameetsatasanoteroji iriraja virantsi, te oameetsajeiteriji antajejitirori caari cameetsatatsi. Irootaque pivetscantanarori novatsa noncamimentajeitanciariri maaroni atiri, noameetsajeitanciariri. ⁶Te pineacameetsateroji maaroni itaapinijeivetimpire atiri, aisati maaroni yoapinijeivetimpire poameetsajeitanciarimeri. ⁷Irootaque nocantantimpiri: 'Pamene, Apa, nopoque aca nantantempirori maaroni picoacaquenari. Nomoncartero maaroni isanquenatacotiteetaquenirii peerani'".

⁸Pinquenqueshiretasanotero oca icantiniri Jesoshi: "Te pincoyeji, Apa, iroajeitimpire atiri virantsi, intaapinijeitimpire. Te pineacameetsatimenteariji yora pavetimpire maaroni isanquenatacotiniri Moishishi". ⁹Impoiji icantiri: "Pamene, Apa, pocaquena nantantemprori maaroni picoacaquenari". Icantatarori oca, icanti: "Ontimaite maaroni yantayevetaniri ishanincani Irevi. Ontime iroqueratajantsineri". ¹⁰Aparo icamimentajeitaquee Jesoquirishito, eiro yapiitajatsi incamaje aisati, imoncarataquero. Yoameetsatasanojeitaquee, aisati maaroni iriori quemisantajeitiriri, iquempetacantajeitaquee te anteroji caari cameetsatatsi.

**Te iroavisacotanteji virantsi yora yoyeetiri,
irinti Quirishito oavisacotantsiri.**

¹¹Ari yantaveetapinitaque maaroni saserotepee, yoapinitiniri Tasorentsi virantsi, itaapinitiniri, iro cantaincha te oameetsajeiteriji maaroni antirori caari cameetsatatsi. ¹²Iro cantaincha aparoni icamimentajeitaquee Quirishito, yoamee-

tsajeitantaajeeri, moncarataca. Impoiji isavicapaaaji anta iracosanoriqui Iriri, ¹³yoyeaqueri irimatantearori icantajequerinri: "Coajica nontsoncajeiteri maaroni quisajeitaquempi". ¹⁴Aparo icamimentajeitaquee maaroni: tempa icoyeajeitaquee Tasorentsi, yoameetsatasanojeitaquee. ¹⁵Aisati oametasanojeitaquee Ishire Tasorentsi queario nosanquenataquempi; tempa osanquenatacainri peeraninri: "Icanti Tasorentsi: ¹⁶Tempa narotaque Ivincatsarite jorio, irootaque noncantajeitanteairi: Te pimajeiteroji nocantajequeriri Moishishi, iro cantaincha coajica nonquenqueshiretacaajeittempiro maaroni noocoacaajeitaquempi, pintsoteajeitajero, piotasanajeitajero, maaroni". ¹⁷Impoiji aisati osanquenatacaaqueri: "Icanti Tasorentsi: 'Eiro noquenqueshiretacotitajiritsi aisati caari cameetsayetatsi yantajeitaqueri'". ¹⁸Pamene, ariorica icavintsaajeitiri Tasorentsi antirori caari cameetsatatsi, aisati terica inquenqueshiretacotajeri aisati yantaqueri, eiro icoajitsi aisati camimenterineri iroameetsatanteari. Pinequiero, ineacameetsajeitaquee meeca.

**Icamantajeitaquee paita
icoacaajeitaqueeri arori.**

¹⁹Noyemisantarinte, icamimentajeitaquee Quirishito, yaparajatimentajeitaqueero iriraja yoavisacotantaqueeri. Meeca ayojeitaque ineacameetsajeitaquee Tasorentsi, ocameetsatantari anquenquetasatacapinijeiteri. ²⁰Peerani otimini pancotsiqui oticaashiro, ora caari ijatapinijeitantanri atiri onta inantarinta Tasorentsi: tempa oticaajeitaqueri. Iro cantaincha icamimentajeitaquee Quirishito, caari otimantaja meeca ticaajeeneri. Yaneanji aisati, irootaque ocameetsatantari meeca anquenquetasatacapiniteri Tasorentsi. ²¹Isaserotetasano-

taque, ipincatsariventasanojeitaquee arori, aisati maaroni itsipapee quemisantajeitiriri Tasorentsi. ²²Yaparajatimentajeitaqueero iriraja, aisati avaotisatimentajeitacari. Irootaque meeca eiro atsaroacantaritsi Tasorentsi, ayojeitaque eiro yoipiajeiteetsi, irointi iraacameetsatasanojeitee. ²³Ayojeitaque irimataqueenero maaroni icantajeitaqueeri, eiro yamatavijeiteetsi: irootaque ocameetsatantari anciamantajeiteri itsipapee atiri oca aquemisantaqueri.

²⁴Tsame meeca anquenqueshirejeiteri itsipapee: anintajeiteri aisati ancaivintsaajeiteri. ²⁵Timatsi ayemisantarinte caari pocapinitatsi inquemisante: eiro piquempejeitaritsi avirori, irointi pampatapinijeitea poimoshirencavacaajeitanteari maaroni. Tempa ayojeiti eiro osamanitis iimpocantajeari Quirishito, irootaque ocameetsatantari aveshireimentajeiteari aisati aveshireacaajeiteari itsipapee.

²⁶Pamene, ariorica ayojeitaque icamimentajeitaquee Quirishito, irootaque yoavisacotantaqueeri, ocameetsataque ashiretearo, anquemisantasanojeiteri: tempa irootaque icantiriri Tasorentsi, oqueariotasanoque. Te oncameetsateji catsini antseenqueri, te aneriji pashini oavisacoteeneri. ²⁷Aitaque coajica inquisajeitanaqueri Tasorentsi maaroni tseenquiriri, iroasanquetasanojeiteri. Impoyereajeitajeri maaroni iisane, poyere. ²⁸Yora ajorioririnteni yoapinijeitaquerini caari pincatsatiro isanquenare Moishishi. Itimirica apite cantatsiri, ariorica icarati mava cantatsiri: "Ainiro yantane, noneajeitaqueri", ari yoajeitaqueri ishaninca. Te incavintsaajeitamenteji. ²⁹Ariorica intseenqueri atiri Itomi Tasorentsi, aisati incanterica: "Yatsipetashita icamaque Quirishito, yatsipetashita yaparajataquero iriraja, eiro yoavisacoteetsi"; aisati incantimaterorica Ishire Tasorentsi, ora cavintsaajeiteeri:

¿pijitimpa eiro yoasanquetirtsí Tasorentsi? Aitaque iroasanquetasanotaqueri, catsini: irineashiiitetearotave, ironea caari iquemisantantari.³⁰ Tempa ayojeitiri, ayojeiti icanti: "Aitaque nompiajeiteari, noasanquetaajeiteri nainti". Aisati icanti: "Queario noncantacoventajeiteri maaroni atiri, tempa naro pincatsariventacojeitirí".³¹ Ariorica intseñante atiripee, inquisaqueri Tasorentsi, yora aneasanotasiri: ocameetsati intsaraoacaasanojeiteari catsini, yoashinoncaairicari.

Icantiri: "Pinquearioventero
pinquemisante, eiro pitsaroitsi
pashinoncaimenteari Quirishito".

³² Pinquenqueshirejeitaja jaoca ocantari peerani, iroqueran iquemacotaquerini Quirishito. Iquishimentajeitaquempiro pishaninca piquemisanti,³³ ishirontimentajeitaquempi, yoashinoncajeitaquempi. Aisati pineajeitaqueri yoashinoncajeitaqueri itsipapee piyemisantarintre.³⁴ Picavinta sapinitaqueri yora yoimquinearanteetaqueri. Ariorica icoshitaquempini pivaararo, piquimoshirejeitaqueni, picantini: "Irayerota. Coajica ontimasanoyetaje cameetsayetatsiri anta inquitequi, eiro itimajitsi coshitajeeneri anta. Ancantaitiyempani asavicajeite anta ocameetsaite-tinta catsini".³⁵ Eiro pipeacotarotsi piquimoshireimentiri, aiquero pijatatiye pinquimoshirejeitanaque. Queario, impinatempri Tasorentsi.³⁶ Ocameetsati pincanteani pinquearioventero maaroni icoacaimpiri Tasorentsi, impoiji irimatempri icantaquempi. ³⁷ Tempa ocantini sanquenarentsi: "Irotantsi ipocaje Avincatsarite, eiro osamanititsi, tempa icanti: 'Nompocaje'.³⁸ Ocameetsati inquemisantasanojeitená yora noameetsantiri. Iro cantaincha irojocajerorica iquemisanti, eiro noveshireimentajaritsi".³⁹ Te ancarajejeriji arori yora jocajeiti-

rori iquemisanti: irijajeite iriori Sharincaveniqui. Aquemisantajeiti ainti, ajajeite ainti inquitequi.

**Yantajeitiniri
quemisantasanoatsiniri peerani.**

11 ¹Piquemisantiri Tasorentsi piotasano tanta cari irimatasano tempiro maaroni icantaquempi. Ainirotatsi oshequi caari quera aneajeiti, iro cantaincha aquemisantajeiti, irootaque ayojeitancarri aneajeitajero coajicani maaroni icashiacaajeitaqueeri.² Iquemisantini yora peeraniniri, irootaque ineacameetsatantariri Tasorentsi.³ Aquemisantajiri arori, irootaque ayojeitancarri ineanataque Tasorentsi otimantacari quipatsi, inquite, aisati maaroni timantarori. Ineanataque otimantanacari: tecatsi irovetsicantearori.⁴ Iquemisantini Averini, irootaque ineacameetsatitancariri Tasorentsi ipaqueriri; irintquea Caini, te inquemisanteji, irootaque caari ineacameetsatantariro ipavetacariri iriori. Ineacameetsataqueri Tasorentsi Averini, irootaque ineacameetsatitancariri ipaqueriri. Icamakeni iriori peerani, iro cantaincha ocameetsati anquemejeiteari: anquemisantajeite irineacameetsajeitanteeri Tasorentsi.⁵ Iquemisantini Enoco, caari icamanta. Aneatsi ini, yaanajiri Tasorentsi inquitequi. Tecatsi neajerine aisati: queario, yaasanotanajiri inquitequi. Tequerani iraayerini, icantini: "Queario, noneacameetsatasanotaqueri Enoco".⁶ Eiroricá aquemisantiri, eiro ineacameetsajeiteetsi. Intimerica coatsiri irareeteari Tasorentsi, ocameetsati inquemisantasano-nteri, aisati irtotasano tanaque impinateri coasanotatsiri irtoteri.⁷ Aisati iquemisantini Noeni. Icantiri Tasorentsi: "Coajica ompoque ante arri canci catsini, incajaretanaque maaroni. Pivetsiquero ante arri pitotsi paviscotanta-

jeari". Ari iquemisantaqueri. Osarintsitasanovetani, iro cantaincha yantaque pitotsi, yavisacotantajari, aisati yavisacojeitantzajari maaroni saviquimojeitiriri. Te inquemisanta-jeiteji itsipapee ishaninca, irootaque yoasanquejeitantzacariri Tasorentsi.

Irintiquea Noeni yoameetsantiri: tempa iquemisantiri irinti.⁸ Aisati iriorini Avaramani, iquemisantirini Tasorentsi.

Icantirini iriori: "Nocoaque pijate pashiniqui quipatsi, anta arejiqui: aitaque pisavicateer. Nompempiro pashitasanoteari avirori; aisati nomperi pitomi, piccharine, maaroni. Tsame pijate, nocoi nonijayempiro". Ari ijatanaque, iro cantaincha te irioteji jaocarica injateri.

⁹Yareetantacari, ineapaquaqueri pashini atiri savicajeitatsiri. Oquempevetaca caari iipatsite, te irisavicasanoteji, irointi iquenayetaque; iro cantaincha icantani iquemisantiri Tasorentsi. Aisati iquempejeitaca Isaca aisati Jacovo: te irisavicasanoteji, te irivetsicajeiteji cameetsari ivanco,

¹⁰irointi iquenqueshirejeitiro pashini inampi, caari yovetsiqui atiri. Ioejataque coajica iraajeitanajeri Tasorentsi anta inampiqui iriori, yovetsicajueri iriori.¹¹ Oquemisantini Sarani: shiravar oni, te intimeni otomi.

Impoiji anteashipatanaque. Icantaquero Tasorentsi: "Coajica intime pitomi", irosati oquemisantantacariri. Ocanti: "Eiro yamatavitanatsi Tasorentsi". Impoiji itimaque.¹² Aisati yanteashipatasanotaqueni Avaramani, oshequitasanotaque irosarintsite. Te intimaveteaji catsini itomi, iro cantaincha impoiji itimacaquero ijina otomi. Meeca icarajeiti ishanincani oshequi catsini, tecatsi ancanteri ayojeiteri jaocarica icarajeitiri: iquempejeitacari impoquiropee, tecatsi ancanteri ayojeiteri jaocarica icarajeitiri. Aisati iquempejeitacaro ovane impanequi anta otsapijaqui incajare, oshequi catsini.

¹³Ari icamajeitaque iriorijei quemisantatsiniri: isavicajeivetani Canaqui, iro cantaincha te irineasanojeiterozi maaroni

icantaqueriniri Tasorentsi. Iro cantaincha ioejataque irineajero coajica. Icantajeitini: "Te nonampitasanoteoji quipatsica, te nosavicasanoteji aca".¹⁴ Irootaque ayojeitantzacari icoajeitaqueni irareejeitea pashiniqui nampsitsi irinampitasanotantapaaejearori.¹⁵ Incoajeitajeme impiajeitana-jeme anta Ejipitoqui iponeantacari, ari irijajeiteme.¹⁶ Iro cantaincha icoajeitaque irijajeite cameetsaiteriqui nampsitsi: ora timatsiri inquitequi. Irootaque yoveshire-mentantacariri Tasorentsi iriori: te impashiventacaimateariji, itomintasano-jeitacari. Aisati yovetsicajeitirini isavicajeitantzari.

¹⁸Peerani icantirini Tasorentsi Avaramani: "Meeca itimi pitomi papanirorite, pipajitiri Isaca. Irootaque ashijeitearineri pincharinentayetajeari, maaroni. Tecatsi itsipa ashitearine".¹⁷ Ari yevancaritapaini Isaca, irosati ineantantiriri Tasorentsi Avarama, irotanteari queariorica iquemisantasanotiri. Icantiri: "Poyenari pitomi papanirorite, pintayenari". Ari iquemisantirini, icantiri: "Ari, nojate noyeri".¹⁹ Iquenqueshiretaca: "Icantana Tasorentsi: 'Irootaque ashijeitearine pincharinentayetajeari, maaroni'. Tequera intime itomi iriori, iro cantaincha icantaquena: 'Poyeri'. Naamaaca ariorica noyeri, irointinaajeri". Ijatanaque, irotantsi iroyerime, iro cantaincha icantiri Tasorentsi: "Eiro poiritsi, irointi noneantimpi. Meeca niotaque pipincatsatasanotaquena". Ari oquempetimovetacari Avarama yoitinaajiniri itomi, yaneanaji aisati.

²⁰Aisati iquemisantini Isacani, irootaque icantacoventantariri Jacovo aisati Esao. Icantiri Tasorentsi: "Pintasoncacosenteri notomi apite". Irootaque itasoncacosenteri notomi oshequi.

²¹Aisati iquempetani Jacovoni, iquemisantini. Irotantsi income, iro cantaincha ititacaro iotiquiyo; yoivotashitacari

Tasorentsi, icantiri: "Pintasoncacoventajeiteri itomipee Jose".²² Aisati iriorini Jose, iquemisantini. Peerani itimini Ejipitoqui, aisati maaroni ishaninca, iro cantaincha iotaque iraajeitanajeri joriopee anta iipatsitequi iriori. Irootaque icantantariri ishaninca: "Irotantsi noncame. Coajica, ariorica pijajeitanaje aipatsitequi arori, paajeitanajeroyea notonquini, pintijapaalero".

²³Peerani icantajeivetarini yora ivincatsarite ejipitosati: "Noshaninca, pineaqueri yoshequiajeitanaque joriopee: te oncameetsateji. Pijajeite piviiancajeiteri maaroni itomipee, iroquaera timayetas-tsiri". Ari yora iriri Moishishi iquemisantini, aisati iriniro: ipincatsajeitirini Tasorentsi, irootaque icantantari: "Eiro apincatsatiritsi irinti ivincatsarite ejipitosati. Icameetsataque atomi, eiro ashinetiritsi iroviinquiteeri". Ari imanapitsataqueri, caari yoantari.²⁴ Ari impoiji oneaqueri Moishishi irishinto pincatsari. Oquenqueshireti: "Eiro noiritsi, irointi nonquempetacantajeri notomi, intime novancoqui". Impoiji yanterioritanaque. Iquemisantaqueri Tasorentsi, irootaque icantantari: "Te noncoyeji noshaninca-teari ejipitosati, naro jorio".²⁵ Iotaque iquemisantajeiti joriopee, irootaque yoashinoncaajeitancariri ejipitosati. Iquimoshirejeivetaca ejipitosati, iro cantaincha te oncameetsateji itimajeiti, irootaque caari icoanta Moishishi irishanincajeiteari.²⁶ Te incoyeriji iirequite ejipitosati isaviquimovetacari, irinti icoasanotaque iquemisantiri Quirishito, iquematsicatimentacari iriori. Iotaqueni coajica impinateri Tasorentsi.²⁷ Iquemisantini, iotaque te inconjateji Tasorentsi, iro cantaincha iotaque quiso yoiri; irootaque caari itsaroacantari pincatsari, aisati ishiapitsajeitancariri ejipitosati, yaajeitanaquei maaroni ijorioririnte.²⁸ Aisati iquemisantiri

Tasorentsi, yora cantiriri: "Meeca tsiteniri nontianqueri nonampire iroyeri itomipee tseencajeitanari, yora jivatatsiri itimi. Iro cantaincha ariorica poyer ovisha, pisaitero pivanco iriraja, iravisanteari yora oantsatsiri, tecatsiquea incanteri pitomipee". Ari iquemisantaqueri Moishishi, aisati iquemisantacaajeita-queri ijorioririnte, caari icamajetanta itomipee. Iro apajitantarori quitaiteri: "Yavisantaniri".

²⁹Aisati iquemisantajeitini maaroni joriopee. Ishiapitsajeitacari yora isorarotepee ejipitosati. Yojajeivetana-cari, iraavajerime. Jero oticajeitaqueri joriopee antearoja incajare, tecatsi inquenajeitanaje. Iotaque Tasorentsi iquemisantajeitiri, irootaque iteencajeaja-tantacarori incajare, equipatsitanaque nianqui. Jentsipaite yavisajeitanaque intatiquero maaroni joriopee. Yojajeive-tapaacari ejipitosati, iro cantaincha yoipiajatajiro Tasorentsi incajare, aajeitaqueri soraropee.

³⁰Aisati iquemisantajeitini joriopee anta Jericoqui. Itantacotasanojeitaca savicajeitatsiri, iticajeitavaqueri joriopee. Iro cantaincha icantiri Tasorentsi: "Pishonajeitanaquearo nampsitsi, paniijeitanaque. Aparo quitaiteri, aparo pishonajearo; otsipa aisati, otsipa aisati, irosati 7 quitaiteri". Ari omoncaratapaaca quitaiteri 7, irosati otireantanaca tantotsi. Icamajetanaque tseencantsatsiri, savicajeitatsiri.³¹ Otimi anta aparoni tsinane, pajitachaniri Arava. Peerani oshequi antayetirini shirampariee caari ai. Oquemisantaji iroori, amitacotantariri itiancanepee Josoe iramenero nampsitsi. Te oncameji irointi anta Jericoqui, te onquempeteariji itsipapee tseencajeitan-tsatsiri.

³²¿Paita pashini nonquenquetsataco-teri? Oshequitanaque meeca nosanque-nare, iro cantaincha itimi oshequi catsini

itsipapee quemisantajeitiriri Tasorentsi: Quereo, Varaca, Santso, Jete, Iraviri, Samoiri, aisati itsipapee quenquetsatacantatsiniri. Eiro meeca notsoteirotsi yantayetiri maaroni.³³ Iquemisantajeitirini Tasorentsi, itsoncajeitasantavacariri oajeiterinemer. Iquemisanti itsipapee imatantarori cameetsa ipincatsariventajetiri ishaninca, aisati imatantacanariri Tasorentsi icantaqueriri. Yojoqueevetari manitimashiqui, iro cantaincha iquemisantini, irootaque caari yoantarini.³⁴ Pashini yojoqueevetari paamariqui, iro cantaincha te intayeaji. Impesheeterime itsipapee, iro cantaincha yoavisacotaarantiquerri Tasorentsi. Imantsiatarantaque, iro cantaincha yoavisacotaarantiquerri, ishintsitacaarantiquerri. Imatacarantiquerri manatachari. Yoimishiaarantiquerri manaterinemer quemisantatsiri.³⁵ Oquemisanti tsinaneppee, irootaque itinaantajari ojimeni, aisati otomipee.

Yoashinonhaaranteetaqueri itsipapee quemisantatsiri, yoatsinaaranteetaqueri; icantiri: "Ariorica pojocajero piquemisanti, ari cameetsa noimpacajempi". Iro cantaincha icantiri: "Eiro nojapirotsi noquemisanti. Coajica cameetsa irisavicacayena Tasorentsi".³⁶ Ari ishirontimenteraarantacari, ipasanataarantiquerri, tac, tac, tac; yoisotaarantiquerri carenatsaqui, yoiminquiaarantiquerri,³⁷ ipichaarantiquerri mapi, pitse, pitse, pitse. Itotaqueri ichaquireaque, chaquire. Ipsaarantiquerri, peti. Itsipapee te inquitsaateaji cameetsa, irointi iquitsaatashitacari imeshina ovisha aisati imeshina chivo; ocoiteimotacari paitapeerica, iquisheetaque, yoashinonqueetaqueri.³⁸ Iquenayetanaque caaraiteriqui aisati toncaariqui. Imanapitsayetacari quisqueriri anta omoropeequi toncaari. Icameetsatasanojeitaqueni, iro cantaincha te iraacameetsaniroteariji yora tseencantatsiri.³⁹ Ari iquemisantajeitaqueni, irootaque

ineacameetsatantacariri Tasorentsi, irinti; iro cantaincha te irineasanojeiteroji maaroni icantajeivetacariri.⁴⁰ Ocameetsatasanotaque icoacaajeitaqueeri Tasorentsi: te incoacaajeiteriji yora peeraniniri irijivajeitee irineajeitero, irointi icoaque amoncaratavacaajeitea aneajeitero maaroni.

Icantiri: "Pinquearioventeneri Tasorentsi icoacaimpiri, eiro pishemashireatsi".

12¹ Ari oshequi iquemisantajeitaqueni maaroni yocapee noquenquetsatacojeitaqueri. Meeca oquempetaca yapatotashijeitaquee, yamenacojeitaquee iriojeitanteeari paitarica antajeiteri arori. Noshiacantempiro: tempa yamejeita evancaripee ishiajeita irotanteari janicarica anaacotantatsineri. Ariorica irishianaque, tecatsi inquijanaque, irointi yojocanaquero iitsaare irishiasanotanteari. Aisati ocameetsati ajocajero caari cameetsatatsi antajeivetari amatantearori maaroni icoacaajeiteri Tasorentsi, anquearioventero.² Ancanteani anquenqueshireiteri Jesoshi, yora oavisacojeitaqueeri peerani, aisati iriotaque aajeitanajeeneri coajica inquitequi. Oshequi iquematsicatimentajeitaquee coroshiqui peerani, oshequi yoashiventajaqueeri iriori. Iro cantaincha iotaque irisavicacajetajee cameetsa anta inquitequi, irootaque iquematsicatimentantaqueeri. Meeca isaviqui iriori anta iracosanoriqui Tasorentsi, icarajeitaqueri ipincatsariventajeitaquee.³ Oshequi peerani iquisajeitaqueri tseencantatsiri, oshequi yoashinoncaajeitaqueri. Meeca ocameetsati pinquenqueshiretatasanojeiteri, impoiji eiro poashiretatsi, eiro pishemashireatsi.

**Yoasanquetaaqueri Tasorentsi
quemisantatsiri antirori caari
cameetsatatsi.**

⁴ Ari picantayevetari antirori caari cameetsajeitatsi: "Pojocajero pantayetiri",

iro cantaincha tequera inquishimentajei-tempiro. Tequera iroimentempiro, tequera iroashinoncaimentempiro.

⁵¿Pipeacotarompa itomintaquempi Tasorentsi? Pinquenqueshiretajero aisati oca isanquenatacaaquerir peeraniniri: “Notiom, ariorica noasanquetayempi, eiro piquisanatsi, tempa narotaque pivincatsarite. Aisati ariorica noasanquetayempi, eiro pishemashireanatsi.

⁶Ariorica irantero nonintane caari cameetsatatsi, noasanquetaapiniteri. Nocoaque niotacanteariri te oncameetsateji irampiitapinitero. Ariorica noasanquetayempi piotanteari notomin-tasanotaquempi”.

⁷Ariorica iroasanquetaajeitempi Tasorentsi, eiro pishemashireatsi. Inintajeitaquempi, itomintajeitaquempi, irootaque yoasanquetantaquempi. Tempa amejeitaro arori avasanquetaap-nijeitiri atomipee. ⁸Maarori shirampari yoasanquetaajequeri itomipee. Eirorica yoasanquetaimpitsi Tasorentsi, te aviro itomi, irishinto: te pishanincteariji.

⁹Yoasanquetaajeitaquee ashijeiteeri, iro cantaincha tempa apincatsajeitaqueri. Tempa aisati ocameetsati ampincatsajeiti Tasorentsi ashijeiteeri, ancantaitati-yempani asavicanteari anta inquitequi.

¹⁰Yora ashijeiteeri yoasanquetaajeitaquee aisati yoamejeitaquee ayojeitancari asavicajeiti cameetsa aca quipatsiqui: eiro osamanititsi, ari ancamaque. Aisati yora ashijeiteeri te iriojeiteji maaroni, irointi yaamaashiyeta iriori; ainiro iquisashitee. Irintiquea Tasorentsi, te iraamaashiyeteaji irinti, cameetsa yoasanquetaajeitaquee, cameetsa yoametasanojeitaquee. Impoiji ancarajeiti iriori ancantaitatiyempani ancameetsatasanojeitapaaje. ¹¹Ariorica yoasanquetayee, tempa avashirevetanaca, te anquimoshirevetanajeoji. Iro cantaincha impoiji aquenqueshiretanaja,

ayotaque yoamejeitaquee anquimoshire-jeitanaque aisati ancameetsatanaque.

**Icantiri:
“Piveshireimentajeiteari Tasorentsi”.**

¹²Piquempejeiveta pimaotsajeitaque. Pintinaanaje, pishintsitanaje: queario iquishimentajeitaquempiro piquemisanta-jeiti, iro cantaincha piveshireajeitana-quea. ¹³Pinquearioventero icoacaimpiri Tasorentsi. Piveshireacaajeiteari piyemisantaririnte oashirejeivetachari inquemisantasanojeitanteari iriori.

¹⁴Pincoasanojeite paacameetsajeiteri maaroni itsipapee atiri, eiro piquishiritsi. Aisati pincoasanotaque pintime cameetsa: eirorica pitimi cameetsa, eiro pimatirotsi pinquemisantacaajeiteri itsipapee, eiro iojeitiritsi Avincatsarite. ¹⁵Pamitacotava-caajeitea, poametavacaajeitea, iriojeitan-teari maaroni ashanincappee ineshinonca-jeitaqueri Tasorentsi. Piquishireajeitiri-cari pishaninca, te oncameetsateji. Ariorica pinquisavacaajeitea, eiro pitimajeititsi cameetsa, aisati pojocajeiti-rocaro piquemisanti. ^{16,17}Piojeitaque paita yantaquerini Esao. Iriotaque itomi Isaca; Esao iriotaque jivatatsiri itimi; irinti Jacovo, impoitatsiri. Ari yamejeitaca ashijeiteeri icantacoventasanotiri jivatatsiri itimi itomi, intasoncacoventan-teariri Tasorentsi. Aisati icantiri: “Aviro poyeetajenneri, ashiyetajearone timimo-yetanari”. Aisati inquempeterime iriori Isaca, incavintsaasanoterime Esao. Iro cantaincha pashini quitaiteri oshequi iquemaquero iriori itashe, impoiji ineaueri irirenti otimi oshequi yoari. Icantiri: “Iye, pimpena noyeari: aasanota-quena notashe”. Icantiri: “Ariorica icantacoventaquena nainti apa, aisati incantena nompoyeetajeari, ari nompaquempiro poyeari”. Icantiri: “Ari, aviroyeampa. ¿Paita noncoanteari nainti incantacoventena coajica? Irotantsi

noncame meeca". Ari ipaqueri yoari. Impoiniji iquenqueshireavetanaja Esao, oshequi iraanovetanaca, icantavetari iriri: "Apa, nocoasanotaque pincanteri Tasorentsi nompoyetantajempiri". Icantiri: "Eiro. Nocantacoventaqueri meeca pirenti. Impoiji meeca picanta-quena". Te incoyeji Esao intasoncacoven-terime Tasorentsi, irointi itseencaqueri. Eiro piquempejeitaritsi meeca avirori.

**Cameetsa icavintsaajeitaquee Tasorentsi
meeca: eiro aquempetaritsi peeraniniri,
yora tsaroacaaajeitaclariniri.**

¹⁸Te pineajeiteroji ineajeitaqueri peeraniniri anta toncaariqui shinaiquiri, itsaroajeitancarari. Icamantantacariri Tasorentsi Moishishi maaroni icoacaajeitaqueriri, ineakuero omapocanaca otaashitaca paamari, aisati otsitenitanaque quitariteriqui, ineakuero antearo tampea. ¹⁹Iquemajeitaquero ishaninca aisati antearojenca itioti aisati iquemajeitancariri Tasorentsi, itsaroacaaajeitacari catsini, icantajeiti: "Eiro pineanajeitanatsi aisati, oshequi notsaroacaaajeitaquempi. Nocamicari". ²⁰Icanti Tasorentsi: "Te noncoyeji impoque aca toncaariqui atiri aisati ivira. Impoquerica aca ivira, pimpichaajeiteri, poyerri". Ari itsaroajeita-naque maaroni atiri, catsini. ²¹Aisati iriori Moishishi, itsaroacaaajeitacaro maaroni ineajeitaqueri; icanti: "Oshequi notsaroanaque, irootaque nopioncantana-carí". ²²Avintipee, te pijajeiteji Shinaiqui, irootaque caari pitsaroajeitanta. Irointi oquempetaca pijajeitaque anta pashiniqui toncaari, pajitachari Sio, ora timatsiri anta Jerosarequi: shiaquerori inampi Tasorentsi. Pineakuero, oquempetaca pijatasanotaque pashiniqui Jerosare, ora inquitequiniri: parejeeitacari Tasorentsi, icavintsaasanojeitaquempi, irootaque caari pitsaroajeitanta. Ainiro anta oshequi catsini inampire, yapatotimenta-

jeitacari, ipampoyeaventajeitaqueri, maaroni. ²³Anta intime maaroni quemisantatsiri itomintajeitacari Tasorentsi, maaroni savicasanotatsineri anta: ainiro osanquenataca meeca ivajiro, maaroni. Ainiro Tasorentsi, yora cantaco-ventajeitaqueeri, maaroni. Ainiro aisati maaroni yora quemisantajeitatsimiri peerani; yoameetsajeitaqueri Tasorentsi, cameetsa isavicajeiti meeca inquitequi. ²⁴Aisati oquempetaca pareetaca Jesoshiki, yora oamejeiteeri maaroni icantajeitaqueri Tasorentsi. Peerani yoqueri Caini irirenti Averi, irootaque yoasanque-taantacariri Tasorentsi Caini. Yoyeetaqueri aisati Jesoshi, iro cantaincha icamimentajeitaquee irinti, icavintsaajeitaqueeri Tasorentsi.

²⁵Pinquemisantajeiteriyea yora quenquetsatacaaajeitimpipi, pipiatsatari-cari. Peerani ipiatsajeitacari ashaincani Moishishi. Ishaninca inaveta, iro cantaincha te inquemisanteriji, irootaque yoasanquetimentajeitancariri Tasorentsi. Caari ini atiri coatsine inquenqueque-tsatacayempi meeca, irinti Tasorentsi. Oshequi yanaacotantaque ipincatsariti. Eirorica piquemisantiritsi irinti, tempa iroasanquetasanojeitempi catsini.

²⁶Peerani anta Shinaiqui iquenquetsata-cantacariri Tasorentsi Moishishi, inicaquiero quipatsi. Iro cantaincha icantirini iriori: "Coajica apanivani nonicajero aisati quipatsi, iro cantaincha aisati nonicacoteri inquitesati maaroni".

²⁷Ari icantini: "Apanivani nonicajero aisati". Aitaque intsonquero maaroni nicajeitachaneri, maaroni caari quisotasa-notatsi. Ontimaarantanaque irointi caari nicachane. ²⁸Ari coajica asavicajeitanta-jearo anta pashiniqui quipatsi, ora caari tsoncanetachane: anta impincatsariventasanojeitee. Irootaque ocameetsatantari ampasonquitasanojeiteri, anqueariovente-neri maaroni icoacaaqueeri; tsame

ampincatsatasanojeiteri maaroni. Ocameetsati intsaroacaajeiteari maaroni caari pincatsatiri,²⁹ tempa intsoncasanojeitaqueri maaroni tseecajeitiriri, impoyerajeitajeri, maaroni: poyere.

Icantiri: "Pintimajeite cameetsa".

13 ¹Ari, pinintavacaasanojeitea: pinquempetacanteri itsipapee irio pirenti pinintasanotiri. ²Ariorica irareetempi caari pineapiniti, paacameetsatavaqueri. Ainiro aacameetsatavaqueri caari ineapiniti, ijivetari ishaninca ini yora yaacameetsatiri: jaa, irinti inampiree Tasorentsi inajeiti. ³Pincavintsaajeiteri maaroni ayemisantaririnte, yora yoiminqueeyetiri: pintimeme anta caravosoqui, tempa pincoaque me cavintsaajempinemerri avirori. Pincavintsaajeiteri maaroni yoashinonqueeyetiri: tempa pishanincajeitacari. ⁴Ocameetsati aye ajina; ocameetsati iroori tsinane aye ojime. Ocameetsati irineero shirampari ijina; ocameetsati oneeri tsinane ojime. Iro cantaincha iroasanquetaajeiteri Tasorentsi maaroni aimentarori ijina aisati maaroni aimentariri ojime. Aitaque iroasanquetaajeiteri maaroni antirori caari yai. ⁵Eiro picoitsi poshequiyeri pii requisite, irointi piveshireimentearo timimojeitimpiri. Tempa icanti Tasorentsi: "Eiro noshinetimpitsi pashinoncayea, quiso noajeitempi". ⁶Irootaque ocameetsatantari ancantapinijeite: "Niotaque intacotapinitaquena Avincatsarite, eiro noquenqueshireatsi. Tecatsi incantena atiri iroashinoncayena".

⁷Pinquenqueshiretasanoteri jaoca icantari yora quemisantacaajeitimpiri: yora oamejeitimpiori irineane Tasorentsi. Pinquenqueshiretasanoteri maaroni imajeitaqueri, impoiji pinquempejeiteari iriori, pinquemisantasanojeite. ⁸Te impashinitapinitjeji Jesoquirishito, irosati icanta: peerani, meeca, irosati coajica.

⁹Eiro piquemisantirotsi yoametantashiye-tari atiripee. Tempa ocameetsati anquemisantero yoamejeiteeri Tasorentsi, yora neshinoncajeiteeri. Ainiro cantimen-tajeiteerori paitarica avajeiteameri, iro cantaincha yatsipetashitacaro: te oameetsajeiteiri irioripee, aisati eiro oameetsajeiteetsi arori. ¹⁰Ari icamimentajeitaquee Quirishito, avavisacojeitanta-jari; irintiquea yora cantiriri saserotepee: "Poyenari novira navisacotantajeari", yatsipetashijeitacaro, eiro yavisacotajitsi. ¹¹Ari yora ivincatsaritepee saserote yoapinitiri virantsi aisati yaajatapinitiro iriraja anta ivancoqui Tasorentsi. Icantiri Tasorentsi: "Ainiro irantane noshaninca, irootaque noantariri virantsi piotanteari icoaque pincavintsayeri. Jero oca iriraja". Impoiji yaajeitanaquero ivatsani virantsi anta arejiqui, itaaqueri. ¹²Aisati iquempe-tacantaqueri Jesoshi, yaajeitanaqueri arejiqui yoantacariri: te ari iroyeri nampitsiqui. Iro cantaincha icamaque yoameetsajeitantaqueeri.

¹³Ariorica irishirontimentee tseencanta-tsiri, ariorica iroashinoncaajeitee, iro cantaincha ocameetsati ancanteani anquemisanteri Jesoshi. Tempa ishironti-mentajeitacari iriori, yoashinoncaajeitaqueri. ¹⁴Caari oni anampisanori oca quipatsi, irointiquea acoajeitaque anampitasanotearo anta inquitequi.

¹⁵Ariorica aquemisantaqueri Jesoquirishito, ocameetsati ancamantapinijeiteri itsipapee: "Oshequi icameetsataque Tasorentsi, oshequi nopincatsatiri".

¹⁶Pincanteani pantayetero cameetsayetasiri aisati pincavintsaajeiteri itsipapee: irootaque icoacaajeitaquemperi Tasorentsi.

¹⁷Pinquemisantajeiteri yora quenquesatacaajeitimpiori irineane Tasorentsi, pimpincatsajeiteri. Ocameetsati iroamejeitempi iriori cameetsa, pincameetsashirejeitantaqueri. Coajica

irisampitavaqueri Tasorentsi: “¿Paita poametaquerir yora piquemisantacaajeitaqueri? ¿Cameetsampa iquemisantaquempi?” Ari incamanteri. Tempa cameetsa iranqueri: “Je, cameetsa iquemisantajeitaquena”. Iro cantaincha eirorica piquemisantiri, incanteri: “Teve inquemisantenaji”, impoiji iroasanque-tempi Tasorentsi.¹⁸ Te nioteji ainirorica nantane, naamaaca te aneroji; iro cantaincha nocoaque pincanteri Tasorentsi oncanteata eiro otimantatsi catsini.

¹⁹Aisati pincanteri oncanteataquea nareetitantajempiri aisati, aneavacanta-jeari.²⁰Aisati noncanteri iramitacojeitempi avirori. Niotaque inquemisantena Tasorentsi, tempa itasoncacoventajeita-quee: icoaque irisavicacaajeitee cameetsa. Peerani aisati yoitinaanajiri Avincatsarite Jesoquirishito: yora cantacoventajeita-queeri, amenacoventajeitaqueeri. Yamenacoventajeitaquee, iquempetacari ashitariri irovishate, yamenajeitiri. Icamimentajeitaquee ayojeitancarari queario icantaqueeri Tasorentsi: “Noavi-

sacojeitempi, nosavicacayempi aca nonampiquica, pincantaitatiyempani”.

²¹Nocantaqueri: “Poameetsatasanojeiteri noshaninca, pimatacayeri cameetsayetasiri irantajeitaintempirori maaroni picoacaajeitaqueriri: tempa iquemisantajeitaqueri Jesoquirishito”. Aisati nocanta-jeitimpi avirorije: “Pimpincatsatasanojeiteri Quirishito, pincantaitatiyempani. Aitaque ancantajeiteari”.

Ivecarataquero isanquenare.

²²Noshaninca, te oshequiteji oca nosanquenajeitimpri: pinquenqueshireta-sanojeitero.²³Piojeitaque yoiminqueetaqueri Timoteo caravosoqui, iro cantaincha isotoanaji meeca. Ariorica jentsipaite irareetea aca, nontsipatanajeari ara pinampiqui, noneajeitapajempi.²⁴Nove-tsajeitacari maaroni quenquetsatacanta-tsiri aisati maaroni ayemisantarinte. Ivetsajeitaquempi maaroni itariasati.²⁵Nocoaque incavintsaajeitempi Tasorentsi, maaroni. Aitaque incanteari. Ari ocarati.

ISANQUENATIRI SANTIACO

Yovetsajeitari Santiago ijorioririnte.

1 ¹¿Savicajeitatsimpi, nojorioririnte, maaroni? ¿Tecatsimpa oyempine? Meeca nosanquenajeitaquempiro, maaroni jayetanaintsiri pashinipeequi nampitsi. Narotaque Santiago sanquenajeitaquempirori oca, narotaque antaveeti-niriri Tasorentsi aisati Avincatsarite Jesoquirishito. Novetsajeitaquempi, maaroni.

Icantiri: “Ariorica

ompomerentsitimoejitempi paitapeerica, iro cantaincha pinquemisantasanojeite”.

²Meeca, noyemisantaririnte, noncamantempi: ariorica ompomerentsi-timojejitempi paitapeerica, ocameetsati pinquimoshiretasanojeitanaque catsini. ³Piotasanojeitero oca: ariorica ompomerentsitimotempi, paventeari Tasorentsi, ari iramitacotaquempi pinquemisantasanojeitantaqeari, pincanteani. ⁴Cameetsa pincantaitatiyempani pinquemisantasanojeite, impoiji pincameetsashirejeitanaquea, pivetsicashirereasanojeitanaquea: pimajetearori maaroni icoacaajeitaquempiro Tasorentsi.

⁵Terica pioteri icoacaimpiri Tasorentsi, pincanteri: “Piotacayena paitarica pincoacayenari”, ari irimataquero iriotacaasanotempi, eiro ishemimpitsi.

⁶Iro cantaincha, ariorica pincanteri, cameetsa pinquenqueshiretasanotea: “Niotaque iquemaquena Tasorentsi,

irimataquenaro oca nocacoacotiriri”. Eiro pitseencajiritsi. Ainiro itsipapee quenquetatacaavetariri Tasorentsi, iro cantaincha itseencanti. Timatsi icoacovetariri, iro cantaincha yaamaaca eiro iquemiritsi. Iquenqueshirevetaca: “Meeca iquemaquena Tasorentsi”, iro cantaincha impoiji iquenqueshiretaca: “Te inquemenaji Tasorentsi”. Ari iquempetacaro ora otavoncare anta incajarequi. Otatsincataquero tampea, ojocajaquero, opiapinitantari. ⁷Quearioya, piquempetaricari yora tseencantatsiri. Eiro pijititsi irayero iriori paitapeerica incoacovete-ri Avincatsarite. ⁸Yora tseencapinitatsiri, iperaventajeitacaro maaroni yantayevetari.

⁹Ainiro oshequi ayemisantaririnte caari ashitaarantacha, iro cantaincha ocameetsati inquimoshiretasanotanaque: tempa ineacameetsataqueri Tasorentsi iriori.

^{10,11}Aisati ocameetsati yora ashitaarantachari iriveshireimentajeiteari Avincatsarite; eiroquea iveshireimentarotsi yashiyetari, tempa eiro osamanititsi incamanteari, irijocayetanaquero maaroni timimovetariri. Ocameetsati iriote iquempetacaro oteaqui tojari: oshintsiti ocamatapaaque catsirin-teri, iro cantaincha impoiji ijenoquitapaaque catsirin-teri, icatsirin-catasanotapaaque. Oshimpeshtanaque tojari; oshimpeshtanaque oteaqui, aisati ojireanaque. Pinequiero, eiro osamanititsi incamanteari yora ashitaarantachari,

irijocajeitanaquero maaroni timimovetariri. ¹²Ariorica pincoajeivetea pantero caari cameetsatatsi, iro cantaincha eiorica pantiro, pinquimoshiretasanotanaque, aisati impinatasanotempi Tasorentsi: irisavicasacaasanotempi anta inampiqui iriori, pincantaitatiyempani panee anta. Aitaque icantitarini: "Nosavicasacaajeiteri anta inquitequi maaroni nintasanojeitarnari".

¹³Ariorica pinquenqueshiretea pantero caari cameetsatatsi, eiro picantashitatsi: "Icoacaaquenaro Tasorentsi". Pamene, te incoyeji Tasorentsi irantero irinti caari cameetsatatsi, aisati te incoacayeriji itsipapee irantero. ¹⁴Ariorica anqueneshiretero antero caari cameetsatatsi, impoiji ancoanaque antero. ¹⁵Impoiji, ariorica ancoaque antero, antasanotquero; ontimanteari antseenque, aisati ajatanteari Sharincaveniqui.

¹⁶Eiro picomitarotsi, noyemisantarinte nonintasanotiri. ¹⁷Iriotaque Tasorentsi cavintsaajeiteeri, pasanojeiteeri maaroni cameetsatasanotatsiri. Iriotaque vetsiquiriri catsirincaiteri, cashiri, impoquieropee, maaroni timayetatsiri. Te impashinitapiniteji Tasorentsi, irosati icantani icavintsaasanojeitaquee. ¹⁸Icoaque Tasorentsi ashanincajeiteari, irootaque itomintantaqueeri. Itimacaqueero irineane, oametasanojeitaquee queariotasanolatsiri. Aquemisantaquero, irootaque itomintantaqueeri. Ijivajaiteaquee arori, iro cantaincha impoiji intomintajeteari oshequi itsipapee atiri aisati.

Jero oca icoacairiri Tasorentsi quemisantsatsiri.

¹⁹Piojetavaquero oca, noyemisantarinte nonintasanotiri: ocameetsati ajivate anquemero icantaqueeri itsipa, eiro ashintsitsi aneanateri, eiro ashintsitsi anquishea. ²⁰Ariorica anquishea, tecatsi ancantea anteneri Tasorentsi cameetsatasiri. ²¹Irootaque nocantantimpiri: te

pincameetsashirejeiteji. Te oncameetsateji catsini pantayetaqueri: pojocasanojetajero maaroni oca. Pishiretearo cameetsa irineane Tasorentsi, oca piquemaqueri. Ariorica pinquemisantasanotero, ari oavisacotaquempi. ²²Pimatasanotero ocamantimpiri irineane: eiroquea piquemashitarotsi, oncanteataquea eiro pamatavitantajatsi avisati. Te oncameetsateji pinquemashitearo, irointi pinquemisantasanotero. ²³Yora quemashitarori, yora caari antasanotiro ocantaqueri, te iriotasanoteji jaoca icanta; yatsipetacaro iquemavetaro, te inqueneshiretajeroji aisati. Ishiaqueri amenavorovetachari amenaarontsiqui: ²⁴yamenavoroveta ivoroqui, impoiji ijatanaji, te inqueneshiretajeoji aisati jaocarica ocantacari ivoro. ²⁵Iro cantaincha yoavisacojeitaquee ainti, irootaque ocameetsatantari ancantaitatiyempani anqueneshiretapinitero irineane Tasorentsi itimacaqueeneri: tempa ocameetsatasanoti. Eiro aquemashitarotsi, irointuequa amayetero ocantayetiri, anquimoshirejeitantzajeari.

²⁶Ariorica ajitashitaquea queario aquemisanti, iro cantaincha ariorica aquisatsatapinitiri itsipapee, amatavitaja arosati: tequera anquemisantasanoteji, irointi atsipetashitaca aquemisantamempeaca. Pinequero, icoaque Apa Tasorentsi ayojeite eiro ashintsitsatiritsi ashanincaphee. ²⁷Icant ariorica anquemisantasanotanaque, ancavintsayeri yora ashinoncaincari: yora jananequi camatsiri iriri, iriniro. Aisati ancavintsayero camajimentaaro, eiro antayetirotsi yantayetiri tseencantatsiri. Irootaque icoacaasanojeiteeri Tasorentsi.

Cameetsa anintavacaajeitea.

2 ¹Tempa, noyemisantarinte, piquemisantajeitiri Avincatsarite Jesoquirishito. Icameetsatasanoti irinti. Te incoacayempiji pincavintsaapinitashi-

teari apaniro yora ashitaarantachari, irinti caari ashitaarantacha pipincashireaqueri.^{2,3} Anta papatotapinijeitanta: ariorica iqueapaaque quitsaatachari cameetsari iitsaare, yaniyotaro pinatasanotachari oro. Irio pineacameetsatavaqueri irinti, picantavaqueri: "Jeroca savicamentotsi cameetsari, pisavicapée". Ariorica iqueapaaque caari ashitaarantacha, quitsaatachari maatsaraantsi, pipincashireavaqueri, picantavaqueri irinti: "Ari ara pincatiapée. Tecatsi pisavicanterai".⁴ Aparopee pineacameetsajeitiri, itsipapee pipincajeitaqueri. Te paacameetsatavacaajeitea: tempa pijiveta pinashijeita, irootaque pipincavacaantacari. Te oncameetsateji oca piquenqueshirejeitiri.

⁵Pinquemisantena, noyemisantaririnte nonintasanotiri. Tempa icoyeaqueri Tasorentsi yora caari ashitaarantacha inquemisantasanotanteariri iriori, irisavicanterai anta ipincatsaritinta. Icanti: "Nosavicacaajeiteriaca nonampi-qui maaroni nintajeitanari".⁶ Irompa avinti, pipincashireaqueri yora caari ashitaarantacha. Tempa irio ashitaarantincari quisajeitaquemperi. Tempa irio oashinoncaapinijeitimpiri, coatsiri iroiminqueacantapinijeitimpiri caravosouqui.⁷ Tempa iriojeitaque cantimatinirri Jesoshi. Ja, irinti, icameetsatasanoti, irootaque cavintsaaajeitaquemperi.

⁸Timatsi icantitacaniri Avincatsarite: "Oquempetaca avisati cavintsajancha, aisati pinquempejeiteri itsipapee, pincavintsaaajeiteri iriori, paacameetsajeiteri". Ariorica pimataquero oca, ocameetsatasanoti.⁹ Iro cantaincha ariorica pipincashireaqueri ashinoncaincari, te paacameetsatavacaajeiteaji: te oncameetsateji oca. Tempa ocanti Sanquenarentsi: "Terica paacameetsatavacaajeitea, ainiro pantane".¹⁰ Pimoncarataqueroricame maaroni ocantiri isanquenatiniri

Moishishini, iro cantaincha otimirica aparo caari pimoncarati, ainiro pantane: oquempetaca tecatsi meeca pimoncaratea.¹¹ Icantini: "Eiro paimentaratso pijina. Eiro paimentaratso pijime". Irisati cantatsiri: "Eiro poanti". Terica paimentearo pijina, terica paimenteari pijime, iro cantaincha ariorica poanti, ainiro pantane: te pimpincatsateroji icantayetiniri peerani Moishishini.¹² Coajica, ariorica incantacoventempi Quirishito, tempa incavintsaasanotempi. Aisati pinquempejeiteri maaroni pishaninca: pincavintsaasanojeiteri itsipapee, cameetsa pineshinoncatsateri.¹³ Eirorica pineshinoncatiritsi itsipapee, eiro ineshinoncatimpitsi avirori Quirishito. Ayojeiti ineshinoncatapinitaquee, irootaque eiro atsaroajeitantsi ariorica incantacoventajeitaquee.

Ariorica aquemisantasanotaqueri Tasorentsi, anteneri icoacaaqueeri.

¹⁴Pamene, noyemisantaririnte: icantashitarica ashaninca: "Noquemisanti", iro cantaincha terica incavintsa-yeri itsipapee, ¿ocameetsatimpia? Te, te oncameetsateji. Tempa iquemisantashi-veeta: ¿jaoca incanteari iravisacotan-jaeari?¹⁵ Ariorica piotaque ocoiteimotacari piyemisantaririnte iitsaare aisati iroyeari, pincavintsayeri.¹⁶ Eiro picantashitaritsi: "Cameetsaya pijate. Cameetsa pinquitsaatea. Cameetsa pinquemaquea". Eirorica pipavaqueritsi oca coiteimotacariri, ¿picavintsaasanotirimpia? Te.

¹⁷Pineaquero, ariorica aquemisantashita, terica aneshinoncateri itsipapee, te oncameetsateji: atsipetashitacaro aquemisantamempeaca.

¹⁸Intimerica cantempineri: "Piquemisantashiveeta avinti; irompa nainti, nantaveetiniri Tasorentsi icoacaaque- nari". Queario irinti icantaqueri. Eirorica pantaveetiniri Tasorentsi, ¿jaoca

oncanteari piotacantenari piquemisanta-sanotiri? Cameetsa nantaveetiniri nainti, piotanteari noquemisantasano-tiri.

¹⁹Pishirevetaro apaniro ini Tasorentsi, ari cameetsa. Aisati ishirenirojeivetaro iriori camaaripee, irootaque itsaroanirotanta-cari, ipioncanirotantacari; iro cantaincha eiro yavisacotajitsi. ²⁰Tempa, noshaninca, ontine piotantari. Tempa pincoyeji piote. Eirorica antaveetiniri Tasorentsi icoaca-queeri, atsipetashitacaro aquemisanta-mempeaca. ²¹Pinquenqueshireteri yora ashancani intacaroniri: yora

Avaramani. Iraquenerime Tasorentsi Isaca anta yoapinitinirinta virantsipee. Tempa irootaque icantantari Tasorentsi: "Noneacameetsataqueri Avarama".

²²Pineaquero, te inquemisantashiveteaji, irointi yantaveetiniri Tasorentsi aisati paitapeerica icoacaqueriri. Yantaveeti-niri, irootaque omoncaratantacari iquemisantasano-taque. ²³Omoncarataca sanquenarentsi, cantatsiri: "Iquemisantiri Avarama Tasorentsi, irootaque icantanta-cari Tasorentsi: 'Noneacameetsataqueri Avarama'". Aisati icanteeti: "Irio Avarama intintane Tasorentsi".

²⁴Pineaquero. Ariorica apatiro onavetea inquemisantamempeempa atiri, tecatsi incantea Tasorentsi irineacamee-tsateri. Irompa ariorica inquemisantasano-teri aisati irantaveeteneri icoacairiri, ari irineacameetsataqueri. ²⁵Aisati

oquempetaca Arava: ora neavintsatapini-vetariri pashinipee shirampari anta Jericoqui. Ocabintsaajeitaqueri maaroni yora itiancanepee Josoe. Onijavaqueri pashini avotsi inquenanta-naqueari irishiaptsatantanaqueariri yora quisqueriri. Oca antaqueri Tasorentsi, irootaque ineacameetsatantacarori.

²⁶Eirorica aneencajitsi, tempa camasano-taquee anaque; aisati oquempetaca, eirorica antiniritsi Tasorentsi icoacaave-teri, te anquemisantasano-teji.

Ariorica aneaveetashitea,
antirocari caari cameetsatatsi.

3 ¹Pamene, noyemisantaririnte, noametanti narori. Coajica, ariorica incantacoventajeitee Tasorentsi, incantena: "Pamene, oshequi poamejeive-tacari itsipapee: ¿paita caari pimatantaro avirori picantavetacariri iriori? Oncamees-tsateme pimatasanoterome avinti".

Tempa piotiro. Irootaque nocamantan-timpiori oca: eiro picoashitatsi poametante. Icoasanotaque Tasorentsi pimajeitero maaroni picantaqueri.

²Tempa aneanatantajitaro caari cameetsatatsi. Intimericame caari neanatantaro caari cameetsatatsi, irotaque cameetsatasanotatsiri catsini; iotaque yantapinitaquero cameetsatsatsiri, paitapeerica yantayetiri. ³Atimpatacotapinitiri cavayo ivantequi iquemisantanteeri. Orijaniqui onaveta atimpatacotan-tariri, iro cantaincha amatantacari aquenacairi anteari cavayo. ⁴Pinquenqueshiretero aisati antearo pitotsi. Antearo onaveta, aaveaquero antearo tampea aanaquero. Iro cantaincha oquenacaana-quero oomarojaniqui, jaocarica inintiri yora comatirori. ⁵Aisati oquempeta anene: orijaniqui onaveta, iro cantaincha oshequi omayeti: irootaque avametanta-riri atiri, aisati aquisatsatacantariri.

Oquempetacaro amorecaque paamari, capichaji onavetaca, iro cantaincha omataquero otaaquero antearo ovaantsi.

⁶Aisati aquempetacaro, ariorica capichaji ancante, iro cantaincha aquisacaajeitacari oshequi atiri, antacaajeitaqueri caari cameetsatatsi. Tempa irotaque sharinca-venisati oamejeitaquerori aneanatantaro caari cameetsatatsi, irootaque oshequi aquisavacaajeitancarori.

⁷Ari ayojeitaque avamejeitaqueri poshiniripee, tsimeripee, maranque, shimappee, maaroni. Avamejeitaqueri,

avirajeitari. ⁸Iro cantaincha te intimeji oametachane irisati irimajerete eiro ineanatantaro caari cameetsatatsi. Ashi airo aneanatantaro caari cameetsatatsi. Oashinoncaajeitaquee piantatsiri, ari oamaaquee irerorica, iro cantaincha aisati oashinoncaajeitaquee caari cameetsatatsi aneanatashiyetari, irootaque ijajeitancacari oshequi atiri Sharincaveniqui. ⁹Acantapinitaque: “Icameetsatasanoti yora Apa Avincatsarite”. Iro cantaincha aisati acantimaniroti atiri: tempa ishiavetari iriori Tasorentsi. ¹⁰Otimi avante aparoni, iro cantaincha irootaque aneshinoncatantariri ashaninca, aisati aquisatsatantariri. Te oncameetsateji, noyemisantarinre, anconoayetero aneshinoncatsateri aisati anquisatsateri. ¹¹Noshiacantempiro: anta osoquijatiro omoronaja nije, ariorica opochajati, ariorica ocachojeti. ¿Arimpa omataquero pochajari aisati cachojeti, apite? ¹²¿Arimpa omataquero naranca ontimantearo manco oitsoqui? ¿Arimpa omataquero ova ontimantearo oitsoqui iyera? Aisati eiro omatirotsi cachojeti ompeajea pochajari. Aisati aquempejeitaro: terica ancameetsashirete, eiro amatirotsi aneanatapinitero cameetsayatsiri.

Iquenquetsatacotiro iotantari.

¹³¿Piotimpa piquenqueshireta? ¿Timatsimpa piotantari? Ari cameetsa pintime: eiro pishemetitsi, irooti cameetsa pineshinoncatante, cameetsa aisati pinquenqueshiretaquea. ¹⁴Ariorica pinquisashiretasanotaqueri itsipapee, aisati ariorica pincatsimashirequeri, eiro pishemetitsi. Eiro pamatavitantitsi: eiro pijitashitatsi picameetsati, eiro pijititsi pioji. ¹⁵Ariorica pantaniroyetaquero oca caari cameetsayetatsi, te irio oametempi-
rone Tasorentsi, irinti atiri oametimpiori, aisati camaari. Te irio oametempi-

rone Ishire Tasorentsi. ¹⁶Pineaquero, ariorica pinquisashireavacaaquea, ariorica pincatsimashireavacaaquea, eiro pimatirotsi pisavicajeite cameetsa, irooti pantapinijeitero caari cameetsatatsi, maaroni. ¹⁷Iro cantaincha ariorica irinintacaquempiro Tasorentsi ontime piotanteeri, pincameetsashiretanaque, eiro piquisatsi, pincavintsante, eiro pipiatsataritsi itsipapee, pashi poyerio pineshinoncatante, poameetsatasanoteri maaroni pantayeteri, eiro pitseencashireiritsi itsipa, eiro pamatavitantitsi. ¹⁸Paitarica apanquitiri, ayero oitsoqui. Aisati oquempetaca, ariorica cameetsa ancavintsanqueri itsipapee, ari irineacameetsataquee Tasorentsi.

Iquenquetsatacotiri caari coatsine incavintsante.

4 ¹¿Paita piquisavacantajeitacari? ²Tempa pineveyetaro vaararontsi, irootaque piquisavacaajeitancacari. ³Picoajeivetacaro paitapeerica, iro cantaincha te payeroji. Poantaque. Pineveyetaro yashiyetari itsipapee, iro cantaincha te payeroji, irootaque piquisavacaajeitancacari. Iro caari paantaro picoayejetari, te pincantanoteriji cameetsa Tasorentsi. ⁴Picantavetari, iro cantaincha caari paasanotanta, te oncameetsateji ora picoasanovetacari: picoaveta pincavintsayea avisati. ⁵Pishiaquero aimentariri ojime: ocoaqueri pashini shirampari, oquisaqueri ojime. Ariorica pinintayetiro maaroni timayetasiri quipatsiqui, piquisaqueri Tasorentsi. Maaroni nintatsiri irishanincateari tseencantatsiri iquishiri Tasorentsi. ⁶Jero oca ocantiri sanquenarentsi: “Itianaceiteero Tasorentsi Ishire iriori, iro cantaincha meeca icavintaasaanotaquero: te incoyeji antseenquero”. Te oncantashiteji sanquenarentsi, te antsipetashiteji osanquenataca. ⁷Oshequi ineshinoncata-

sanojeitaquee Tasorentsi, irootaque ocantantacari sanquenarentsi oca: "Iroashinoncayeri Tasorentsi yora shemetatsiri, iro cantaincha ineshinonca-jeitaqueri yora caari shemetatsine".

⁷Irootaque nocantantimpiri: pishinetacotea, paitarica irinintacaquempi Tasorentsi. Iriniquea camaari, pimpiateari, impoiji ari irojocanajempi.

⁸Pinquenqueshireteri Tasorentsi, quiso iroantempiri irinti. Pantapiniveitaroni caari cameetsatatsi: meeca pojocajero maaroni oca pintimantajeari cameetsa. Oshequi pitseenquirini Tasorentsi; pincanteri meeca: "Poameetsashiretajena, pinquenqueshiretacayenaro cameetsatsiri". ⁹Pinquenqueshiretacea, poashiretea; te oncameetsateji maaroni pantapinitiri. Pishirontimentavetacaro caari cameetsatatsi: oncameetsateme poashiretanaqueame; piquimoshireventavetacaro: oncameetsateme poashiretasanotanaqueame, irointi. ¹⁰Pincanteri Avincatsarite: "Te noncameetsateji, te nomatiimate-roji cameetsayetatsiri. Nocoaque pincavintsayena". Ari incavintsaquempi, iroameetsatajempi, iramitacotempi.

¹¹Eiro, noyemisantarinte, picantimata-vacaajatsi. Ariorica pincantimateri pishaninca, aisati ariorica pincante ainiro irantane, pitseencaquero isanquenaren Moishishi. Tempa ocanti: "Pinintavacaajeita". Iro cantaincha picanti avinti: "Te oncameetsateji ocantiri isanquenaren Moishishi. Te noncoyeji nonintavacaajeitea". Ariorica pincante: "Te oncameetsateji isanquenaren", te pinquemisanteroji, irointi pitseencaquero. ¹²Pamene, apaniro icantacantanti irinti Tasorentsi, aisati apaniro icantacoventajetaquee maaroni. Oshequi ipincatsariti. Irio matirori yoavisacojeitiri quemisantiriri aisati intianqueri tseenquiriri Sharincaveniqui. Aviroquea, avinti, ɿjanicampa cantaniro-timpiri: "Pincantimateri pishaninca"?

Isanquenatacotiri yora iomparitachari aisati ashitaarantincari.

¹³Pamene, picantayeveta: "Meeca nojate nampitsiquinta: terica meeca, ari osaitequera nojatasanote. Anta noavasaita aparoni osarintsi: niomparitea, oshequi naye paitapeerica". ¹⁴Iro cantaincha te piotacoteaji osaitequera, paitarica oyemineri. Aneavetatsimpi meeca, iro cantaincha piquempetacaro mencorijenca. Te osamaniteji omencoritete, impoiji jentsipaite opeanaja. Aisati avirori, eiro osamanititsi irosati pincamanteari. ¹⁵Irointiquea pincante: "Ariorica irinintacaquena Avincatsarite, eirotitarica nocamitsi, ari nomataquero coajica paitapeerica". ¹⁶Pamene meeca, oshequi pishemeti, pineacameetsatashitaja avisati: te oncameetsateji. ¹⁷Ariorica piovetaro cameetsatatsiri, iro cantaincha te pimateroji, ainiro pantane.

Jero oca icamantiriri yora ashitaarantincari.

5 ¹Meeca, ashitaarantincari, noncamantempi: piraajeitea coajica, pincavintsaajeitea, irotaintsi oshequi pinquematsicajeitearo. ²Ompatsa yetanaque maaroni pashijeivetari. Intsonquita-jeitempi sancori piitsarepee. ³Oyechariyetanaque maaroni ashiroyetatsiri pashiyevetari: oro, perata, maaroni. Ariorica oyechariyetanaque, irioyeetempi pipiotashitacaro, iro cantaincha te pimpinateriji yora patiritepee. Ontsonqua ashiroyetatsiri, aisati avirori, pijate Sharincaveniqui, eiro pineajirotsi aisati pashijeiveitaniri. ⁴Pamene, pamatavijeitaqueri maaroni patirite, te pimpinatasanoteriji, irootaque pipiotantarori pivaararo oshequi. Iquisatsajeitaquempi patiritepee. Iotaquero Avincatsarite: tempa ipincatsariventajetiria maaroni timajeitatsiri. Ioti te pincavintsanterji,

irootaque iroasanquetantempi. ⁵Avisati quenqueshireacotajancha, te pinquenqueshireteriji itsipapee iriori, piveshireimentero pashiyetari. Noshiacantempiro: ariorica inquejitaque pivira, ari pincantajeiteri pishaninca: “Tsame ayeri novira; quejitaque, moncarataca avanteeariri”. Aisati iquempetaca Tasorentsi, icanti: “Oshequi timimojeitiriri, moncarataca noasanquetanteariri”. ⁶Poashinoncaasnotaqueri cameetsayetatsiri: te pimpashimateariji coiteimojeitacariri, irootaque icamantacari, torein; iro cantaincha te inquisavetempiji. Irintiquea meeca quishempineri Tasorentsi.

Paamayempari Avincatsarite.

⁷Noyemisantaririnte, paamayempari Avincatsarite, irosati impocantajeari. Pinquenqueshireteri yora panquiveeta-tsiri, yoyeaquero ivanquire oitsoquitanta-jeari. Oparii incani, yoyeaquero. Osamani aisati, ari opariaji aisati. Coajica, ariorica ontimanaje oitsoqui, oshequi ontimanaque ovinaro, impoiji iroveshireimentearo panquitirori. ⁸Aisati avirori, pincanteani paamaajeari Avincatsarite, eiro osamanititsi impocantajeari: piveshireimenteari. ⁹Eiro, noyemisantaririnte, picantimatavacaajei-tatsi. Ariorica pincatimatavacaya, icantimpicari: “Ainiro pantane”. Quempe-jitapaaque meeca yora Cantacoventajeitaqueeri, irotajantsi impocaje. ¹⁰Pinquenqueshireteri yora camantantatsiniri peerani. Itiancaqueri Avincatsarite, irootaque iquenquetsatacotantarini. Peerani ipomerentsiventinirini, peerani yaamaacarini iriori Avincatsarite impocanteari. Meeca, aisati pishiajeiteri avirori. ¹¹Pamene, ariorica pinqueario-venteneri Avincatsarite paitapeerica, pinquimoshiretanaque. Ontimerica pinquematsicatimenteariri, iro cantaincha pinquimoshireventeri. Piquemacojei-

taqueri Joponi, iquearioventiniri Avincatsarite maaroni yantayetiniri. Impoiji icavintsaqueri, aisati ineshinon-cataqueri. Piojeiti yashi yoiro icavintsanti, ineshinoncatanti.

Eiro picantashitatsi.

¹²Pamene, noyemisantaririnte. Paitapeerica pinquenquetsatacoteri, ariorica pintseeyea, eiro catsini picantashitatsi: “Ioti Tasorentsi otampaticati nocantiri, terica ontampaticateji oca nocantiri, nocoaque iroasanquetayenata”. Pincanterica: “Ario, nantempiro”, ario pimamatero. Pincanterica “Eiro nantirotsi”, eiro pantirotsi. Eiro catsini pamavita-vitanti: ariorica pamatavitante, iroasan-quetaaquempi Tasorentsi.

Pinquenquetsatacayeri Tasorentsi.

¹³¿Picarajeitirimpá ashinoncaincarí? Cameetsa pincanteri Tasorentsi incavin-tsayeri, iroavisacoteri. ¿Picarajeitirimpá quimoshiretsatsiri? Pincanteri impampa-yeaventeri Tasorentsi. ¹⁴¿Picarajeitirimpá mantsiari? Pincanteri incajemerita yora jivatacaajeitiriri quemisantatsiri. Cameetsa incanteri Avincatsarite iroavisacoteri, aisati intiritateperi quejitsi. ¹⁵Ariorica inquemisantanote, ari iravisacotaje yora mantsiari. Irio Avincatsarite oavisacotajerine. Otimirica caari cameetsatsatsi yantayetiri, aisati incavintssayeri, eiro iquenqueshiretajirotsi aisati. ¹⁶Irootaque noncantantempiro: ariorica pantero caari cameetsatsatsi, pincamatavacaajea aisati pincantajeiteri Tasorentsi: “Pincavintsaajeitena, navisacojeitajeari”. Yora shirampari yoameetsantiri Tasorentsi, ariorica icantiri, oshequi imatasanotaqueneri. ¹⁷Atiri inaveitani peerani Iriashini, iquempetaquee arori. Icantasanotiri Tasorentsi: “Eiro poariajirotsi meeca incani. Pinquenqueshiretacayeri

noshaninca". Ari avisanaque mava osarintsi, te ompariajeji incani quipatsi- qui.¹⁸ Icantajiri aisati: "Meeca nocoaque poariajero aisati incani", impoiji opariaji, aisati oshiocanaji ivanquirepee joriopee.

¹⁹Pamene, noyemisantaririnte: ariorica pincarajeiteri jocavetajearoneri oca queariotasanolatsiri iquemisantavetari, pinquenqueshiretacaajeri, pinquemisanta- caasanotajeri. ²⁰Piojeitero oca: yantaveta-

caro caari cameetsatatsi, iquenashivee- taca, irijaterme Sharincaveniqui, iro cantaincha poavisacotajeri eiro ijatanta- tsi. Otimimotasanovetajari yantayetiri oshequi, iro cantaincha inquemisantaje- rica aisati, incavintsayeri Tasorentsi, eiro iquenqueshiretajirotsi aisati yantaveta- cari.

Narotaque sanquenatimpirori:
Santiago

IJIVATAQUE PETERO ISANQUENATINIRI IYEMISANTARIRINTE

Ivetsajeitari.

1 ¹¿Ainirompi noyemisantaririnte? ²Tecatsimpa oyempine? Narotaque Petero sanquenajeitimpiori oca. Narotaque itiancane Jesoquirishito noquenquetsati. Nosanquenajeitimpido maaroni nojorioririnte, quemisantajeitiriri Quirishito, jaocapeerica pisavicaejitiranta Pontoqui, Carashiaqui, Caparoshiaqui, Ashiaqui, Vitiniaqui, maaroni. ³Peerani icoyeajeitaquempi Apa Tasorentsi, icoaque intomintajejempis. Aisati oameetsashirejeitaquempi Ishire piquemisantacariri Jesoquirishito: icamimentajeitaquempi, aparajatimentajeitaquempi iriraja yoavisacotantaquempi. Nocoaque irineshinoncatasananojeitempi, aisati cameetsa irisavicacaasanojeitempi.

Tsame ampasonquijeiteri Tasorentsi, tempa icavintaasanojeitaquee.

³Tsame ancamantajeiteri ashancapae: “Icameetsatasanotaque Tasorentsi: yora Iriri Avincatsarite Jesoquirishito”. Icavintaasanojeitaquee, yashijeitaquee: oquempevetaca iroaqera atimaji aisati, irootaque ashancatantacariri. Yoitinaajiri itomi, irootaque ayojeitancarri antinaajeitanaje arori, ancantaitiyempani aneajeitapaaaje anta inuitequi. ⁴Ainiro yovetsicajeitaquempi pisavicaejitapaaajeeari anta inuitequi. Oncantaitiyempani ontive, ocameetsa-

tasanotaque, eiro otsoncatsi, ainiro iquempoyeaquempiro. ⁵Piquemisantajeitaqueri Tasorentsi, irootaque itasoncacoventantaquempi; iquempoyeajeitaquempi irosati impocantajeari. Impoijini pineajeitero maaroni yovetsicajeitaquempi.

⁶Queario, ariorica ompomerentsitimojeitempi paitapeerica, iro cantaincha eiro osamanitsi irosati pineantearori pinampi anta inuitequi. Ariorica pinquenqueshiretero oca, tempa ocameetsati pinquimoshireimentearo. ⁷Ari yora vetsquirori oro icotaquero, ojatanaca, impoiji yojocajiro ovitsijare quipatsi. Impoiji ineantacaro paamariqui, iriotanteorori iotasanolatacarica oro. Aisati iriori Tasorentsi ineantapinijeitaquempi iriotanteari piquemisantasanotaquerica. Ora oro, oshequi opinavetaca, iro cantaincha ompeaquea; irompa ainti aquemisantaque, eiro apeatsi. Irootaque ineacameetsatasanotantaqueeri, ariorica aquemisantasanotaque. Impoiji, ariorica impoque, incantajeitapaaquee: “Noneacameetsajeitaquempi: pincarajeitena anta inuitequi, pintsipajeitena ampincatsarijeite”.

⁸Tequera pineajeiteri, iro cantaincha pinintajeitaqueri, piquemisantajeitaqueri, piveshireimentatasanotacari catsni.

⁹Piquemisantajeitaqueri, irootaque yoavisacotantaquempi, pishanincajetantacariri. ¹⁰Peerani yora camantacovei-

tariniri Tasorentsi icoajeiveitani irioteme jaoca ancanteari avavisacojeitajeari. Isanquenatacovetacari Tasorentsi, ijojeivetani icavintsanti, iro cantaincha te iriotasanoteji.¹¹ Timatsi oamejeitaqueriri Ishire Quirishito, iro cantaincha te inquemasanojeitavaqueroji. Oametaquerini, ocanti: "Oshequi iroashinoncaya, incamaque; impojini impincatsaritanaje". Iquenqueshirejeitacani: "¿Janicampa oquenquetsatacotiri? ¿Jaoca oncarate impincatsaritajeari?"¹² Iro cantaincha icamantaquerini Tasorentsi: "Eiro pineiritsi avirori, irintiquea neajerine impoitanajantsineri intimaje coajicani". Tempa arojeitaque meeca iquenquetsatacotiniri. Meeca otiancaquena Ishire Tasorentsi noquenquetsatacajeita- quempi, nocamantajeitaquempi yoavisa- cotanti Quirishito. Aitaque icoasanojei- veta inampirepee Tasorentsi iriotasan- tero jaoca acantajari avavisacotantajari.

**Oshequi icavintsaajeitaquee Tasorentsi,
tsame aveshireimenteari.**

¹³Meeca pinquenqueshirejeitanaquea, cameetsa pisavicafeite. Piojeite ariorica impocaje Jeso quirishito aneajeitavaqueri, aisati oshequi incavintsaajeitapaaquee; ari piveshireimentajeiteari.¹⁴ Tempa irio Tasorentsi ashijeitimpire. Ari pinquemi- santajeiteri. Peerani te piojeiveitarini, irootaque pantashitantaveitaroniri caari cameetsatatsi. Meeca quea piojeitiri: eiro piquempetajatsi aisati.¹⁵ Icameetsatasanotaque yora coyeajeitaquempi yoavisa- cotajimpi: meeca pinquempejeiteari iriori, poameetsantasanyetero maaroni pantayeteri.¹⁶ Tempa peerani isanquenayetironi oca icantitacaniri Tasorentsi: "Nocameetsatasanotaque narori, irootaque nocoantacari pincameetsatasanotanaje avirori".

¹⁷Ari meeca pirintajeitacari: oamee- tsati piojeite ijojeitaquempi maaroni,

itsoteajeitaquempi. Ari incantacoven- tempi, inquenqueshirejeitero jaoca ocantari maaroni pantajeitiri. Ocameetsa- tirica, ari iraacameetsatemp. Terica oncameetsateji pantayetiri, iroasanqueta- yempi. Pimpincatsajeiteri meeca, cameetsa pisavicafeite irosati pareejeitan- teari inquiteequi.¹⁸ Peerani patsipetashi- veitaroni pantashiyeveitaroni yamejeita- niri ajorioririnteni, iro cantaincha yoavisa-jeitaquempi Tasorentsi. Te impinaventempiroji perata aisati oro yoavisa-cotantimpire. Te oncantaji, coajica ari ontsoncajea iroori.¹⁹ Irintiquea itiancaqueri itomi, yora inintasanotiri catsini. IcamimentaqueMPI irinti, aparajatimentaqueMPI iriraja pavisa-jei- tantajari. Ariorica yantiro ajorioririnte caari cameetsatatsi, yamejeitari yoiniri Tasorentsi ovisha, itaaqueneri. Apatiro yoiniri cameetsatasanotatsiri ovisha. Aisati iquempetaca iriori Quirishito, icameetsatasanotaque: tecatsi irantane.²⁰ Peerani, tequerani ontimeni quipatsi, icantini Tasorentsi: "Coajica nontianqueri notomi quipatsiqui iroavisa-jeiteri atiripee".²¹ Ari ipocaque, icamimentajei- taquempi, impojiyoitinaajiri Tasorentsi, yaanajiri aisati anta ocameetsaitetinta. Meeca piojeitaque queario icavintsaasa- nojeitaquempi, ari cameetsa pinquemi- santajeiteri, piojeite irootaque savicaca- jeitimpineri anta inquiteequi.

²²Ari piquemisantaquero maaroni yoamejeitaquempi Tasorentsi, tempa otampaticatasanotaque maaroni icantajerri. Meeca yoameetsashirejeita- quempi, aisati icoacaajeitaquempi pinintasanojeiteri maaroni piyemisantari- rinte. Pinquearioventero, pinintavacaasa- nojeitea catsini.²³ Peerani otimimpi piniro, meeca piquempejeitacari ashijeitimpire, pincamajeite avirori. Iro cantaincha meeca piquemisantaquero irineane Tasorentsi, ocantani otimi. Aisati

yashijeitajimpi, piquempejeitajari iriori: pincantaitiyempani pintime inquitequi.

²⁴Tempa ocanti Sanquenarentsi:

“Ashiaquero tojari: oshintsiti ocami, oshintsiti opatsai. Timatsi amajeivetacari, iro cantaincha oquempetaca oteapee tojari: ompeajea, ontsoncagea. ²⁵Iro cantaincha oncanteani ontine irineane Avincatsarite: eiro opeatsi iroitinti”.

Irootaque irineane noamejeitaquempi: icavintsaajeitaquee Tasorentsi, yoavisacojeitaquee. Tempa ocameetsataque.

2 ¹Meeca eiro piquisatsi, eiro pamata-
vitanti, eiro pishemeti, eiro paamaari
pishaninca, eiro picantimatiritsi. ²Yora
iroaquera timatsi yatsopatiniro otsomi
iriniro, irootaque iqueveantacari. Aisati
meeca avirori, pincoasanotero irineane
Avincatsarite: pineanatapinitero,
pinquenqueshiretapinitero, piotasananota-
teariri iriori. ³Tempa piojeitaque
icavintsaasanojeitaquempi, ineshinonca-
jeitaquempi. ⁴Ariorica avetsiquero
mapipanco, ajivatero avatiyero quisotaca-
yerone mapi avanquetantearori oshanin-
capee. Eirorica otimi, eiro oquisotitsi
pancotsi. Iriotaque Quirishito shiaquerori
mapi, iro cantaincha yaneasanoti irinti,
aisati yoaneajeitaquee arori. Itseencaje-
vetacari ashanincapee, iro cantaincha
ineacameetsatasanotaqueri Tasorentsi
irinti. Eirome itimime, eiro avavisacota-
jame. ⁵Avirojei, piquempejeitacaro
mapipee yoanqueyeetaqueri jenioquiji.
Yoaneajeitaquempi avirori, pincantaiti-
yempani anta inquitequi. Piquempejeive-
tacaro pancotsi, isavcantari Tasorentsi;
pantajeiteneri maaroni icoacaaajeitaquem-
piri. Piquemisantajeitaqueri Jesoquiri-
shito, irootaque ineacameetsatantarori
maaroni pantajeitiniriri. ⁶Irootaque
ocantiniri Sanquenarentsi: “Icanti
Tasorentsi: ‘Nontianqueneri joriopee
Quirishito, oshequi noneacameetsata-
queri. Nocoyeaqueri iroavisacojeiteri

maaroni quemisantajeiterineri, eiro
yashinoncajaqtisi iriori”.

⁷Avirojeitaque quemisantajeitiriri,
tempa pineacameetsajeitaqueri.
Irintiquea maaroni tseencajeitiriri, te
irineacameetsateri. Oquenquetsatacota-
querini Sanquenarentsi, ocanti: “Yora
vetsiqueronemeri pancotsi itseencaquero
mapi, icanti: ‘Te oncameetsateji’. Iro
cantaincha ineacameetsatasanotaqueri
Tasorentsi.” Pineaquero, itseencajeita-
queri jorio Quirishito, iro cantaincha
ineacameetsatasanotaqueri Tasorentsi.

⁸Aisati ocanti Sanquenarentsi: “Yora
Quirishito ishiaquero mapi itsitincacari
atiri ipariantacari. Queario, te iriojeitava-
queri, icomijeitavacari”. Pineaquero, jero
oca ishiacantaqueri: iro caari iojeitantari,
te inquemisanteroji icantavetacariri
Tasorentsi, irootaque iroasanquetaajei-
tanteariri. ⁹Iro cantaincha icoyeasanojei-
taquempi yoavisacojeitaquempi.
Pantavejeitiniri yora Pincatsarisanori.
Yoameetsajeitaquempi, pishanincatasano-
jeitacari Tasorentsi. Te piojeiveiteani,
oquempetaca pitimini meeca tsiteniriqui;
iro cantaincha icoyeajeitaquempi,
iotacaasanojeitaquempi, oquempetaca
pitimi meeca quitaiteriqui. Meeca
icoacaaquempi pincamantajeiteri atiri:
“Ocameetsatasanotaque yantajeitaquee-
neri Tasorentsi”. ¹⁰Peerani te pincamee-
tsaveiteani, iro cantaincha meeca
pishanincajeitacari Tasorentsi. Peerani te
piojeiveiteani icavintsaavetaquempi,
meeca piojeiti, piveshireimentajeitacari.

Cameetsa pisaviquimojeiteri itsipapee atiri.

¹¹Noshaninca, piojeitaque nonintajeita-
quempi. Te pishanincatasanojeiteariji
yora pisaviquimojeitiri, tempa pinampita-
sanotearo inquite. Eiro pantashiyetarotsi
caari cameetsayetatsi yantayetiri
itsipapee atiri iriori. Ariorica pantashiye-
tearo, eiro picameetsashiretitsi. ¹²Icanta-

shijeiveta itsipapee atiri: "Te incameetsa-jeiteji jorioopee", iro cantaincha cameetsa pisavicaeite, iriojeitanteari queario piquemisantajeitaqueri Tasorentsi. Impoiji inquemisante iriori, aisati ariorica impocapaaaje Quirishito, incantajeite: "Tempa icameetsataque Tasorentsi".

**Pinquemisantajeiteri
pincatsariventajetiriri pishaninca.**

¹³Ariorica piquemisantaqueri Avincatsarite, ocameetsati pinguemisantajeiteri aisati iriori pincatsariventajetimpire aca quipatsiqui. Pinquemisantajeiteri yora pincatsariventajetiriri maaroni savicajeitatsiri, ¹⁴aisati pinquemisantajeiteri maaroni itiancanepee. Itianquiri iroasan-quejeiteri caari cameetsatatsi irisavica-jeite. Irintiquea cameetsatatsiri isaviqui irineacameetsateri. ¹⁵Ainiro caari iotiri Tasorentsi, icantimatiri quemisantsatsiri. Irootaque icoantacari Tasorentsi pisavica-jeite cameetsa inquenqueshirejeitanteari, irimajereitanteari. ¹⁶Ari piquemisanta-jeitaqueri Tasorentsi, meeca te incoyeji imperanajeiteMPI iriori pinquemisantajeiteri pincatsariventajetimpire aca quipatsiqui, tempa ocameetsati piotashitea pimpincatsajeiteri. Te oncameetsateji pantajeitero caari cameetsatatsi. ¹⁷Paaca-meetsajeiteri itsipapee atiri, pinintajeiteri ayemisantaririnte, pimpincatsajeiteri Tasorentsi, aisati pimpincatsajeiteri yora pincatsariventajetiriri pishaninca.

Yoamejeitiri nampirentsipee.

¹⁸Nampirentsi, pinquemisantajeiteri yora nampitimpire, pimpincatsajeiteri. Eiro apaniro pipincatsatiri cavintsa-queMPI, neshinoncatimpire; irinti pimpincatsateri aisati peranatimpire, quishimpire. ¹⁹Pamene, ariorica iquisashi-taquempi nampitimpire, tempa iotaquero Tasorentsi; aisati ariorica yoashinoncashi-taquempi, iotaquero aisati. Eiro pipiatsa-

taritsi nampitimpire. Ariorica piquemisan-tiri Tasorentsi, tempa ari incavintsaasa-nojeiteMPI coajica. ²⁰Pamene, ariorica pamataviteri nampitimpire, ariorica impasatimentempiro. Eirorica pipiatsavetari, iro cantaincha ɿocameetsatimpa pamatavitaqueri? Eiro ineacameetsatim-pitsi Tasorentsi. Iro cantaincha ariorica impasatashitempi yora nampitimpire aisati te pimpiatsateari, ari irineacameetsatempri Tasorentsi. ²¹Irootaque icoaca-aquempi: eiro pipiatsataritsi yora quisashitimpire. Pinquenqueshireteri iriori Quirishito: oshequi ineacatsitimen-taquempi, icoaque pinquempeteari. ²²Tecatsi irante irinti caari cameetsatatsi, aisati te iramatavitanteji. ²³Te impiatsat-teriji yora quisatsajeitaqueri, aisati te inquisatsateriji yora oashinoncaajeitiriri. Irootaque iquenqueshiretaqueri iriri, yaventacari, iotaque ari irintacoteari iriori. ²⁴Icamimentajeitaquee anta coroshiqui, eiroquea iquenqueshiretanta-jarotsi aisati Tasorentsi caari cameetsatatsi antajeitiri. Meecaquea meeca, eiro antapinitojirotsi aisati caari cameetsatatsi, irointi antapinite cameetsatatsiri. Oshequi ineacatsitimentajeitaquee, eiro ashinoncantatsi arori. ²⁵Piojeitaque yora ovisha te aneeroji iotantari: oshequi iquenashiyeta. Eirorica itimitsi shenterine impeaarantaquea. Aitaque piquempejei-veitarini ovisha, te piojeiveiteani. Iro cantaincha timtsi meeca Shentajetimpire, iquempoyeasanojeitaquempi.

Yora shirampari aisati ijina, ocameetsati iraacameetsatavacayea.

3 ^{1,2}Tsinane, pimpincatsateri pijime. Terica inquemisante meeca, iro cantaincha ocameetsati irineaqueMPI piquemisantsanotaque aisati cameetsa pisaviqui. Impoijiquea irineacameetsatempri, aisati arioricampa pimateri pinquemisantacayeri. ³Eiro apatiro

pincoashitea poameetsantero piishi, poaneenquea, pinquitsaatea, paitapeerica.⁴ Irootiquea pincoasanote pincameetsashiretanaque, pineshinoncatsateri pijime. Irootaque icoacaasanotaquemperi Tasorents. ⁵ Aitaque oquempejitaniri peeraniniri quemisantiriri Tasorents: cameetsa osaviquini, opincatsatirini ojime. ⁶ Ora Sarani oquemisantirini Avaramani, oshequi opincatsatarini. Ariorica pintime cameetsa, pinquempe-tearo, impoiji eiro pitsaroacaaritsi pijime: eiro otimitsi inquishimentemperi.

⁷ Aisati shirampari: te omoncaratempji pijina, te oshintsitasanoteji, irootaque nocantantimpri pincavintsayero, pineacameetsantero. Tempa pimoncarata-vacaaca, icavintsaajeitaquempi Tasorents. pisavicajitanteari coajica anta inquitequi. Eirorica picavintsaipo pijina, eiro iquemisantimpitsi Tasorents ariorica pinquenquetsatacaaveteari.

Corajica iroashinoncayeeteri antirori cameetsatatsiri.

⁸ Aisati noncantajeittempi maaroni: pinquempetavacaajeitea, pineshinoncata-vacaajeitea, pinintajeiteri piyemisantari-rinte, pincavintsaavacaajeitea, eiro pischemejeititsi. ⁹ Terica oncameetsateji yantimotaquemperi pishaninca, eiro pishemaritsi; ariorica inquisatsatemp, eiro pipiataritsi. Pincanteri Tasorents incavintsayeri. Irootaque icoyeajeitanta-quemperi Tasorents: icoaque incavintsaajeittempi. ¹⁰ Tempa irootaque ocantiniri Sanquenarentsi: “Pincoaquerica pinquimoshiretanaque aisati pisavique cameetsa, eiro piquisatsatiritsi pishaninca, aisati eiro pitseyatysi. ¹¹ Eiro pantayetirotsi caari cameetsayetatsi, irointi pantayete cameetsayetatsi. Pincoasanotaque pintime cameetsa. ¹² Yamenapinijeitiri Avincatsarite maaroni quemisantajeitiriri, ishentajeitiri. Iquema-

pinitiri ariorica iquenquetsatacairi. Iro cantaincha te incavintsayeri antapiniti-rori caari cameetsatatsi”.

¹³ Pincoasanoterica pantapinitero cameetsatatsiri, ɿariompa intime coatsiri iroashinoncayempi? ¹⁴ Ariorica intime aparo quisashitempineri, iro cantaincha intasoncacoventempi Tasorents. Eiro pitsaroacaaritsi yora quisashitimpiri, eiro picantashiretitsi, ¹⁵ irinti pimpincatsatasanoteri Quirishito. Ariorica irisampiyee-tempi: “Paita piquemisantantacariri Jeso quirishito?” Ari cameetsa pancana-queri, eiro piquisatsatanaqueritsi. Pincamanteri paita piotantacari iraanajempi inquitequi. ¹⁶ Eiro catsini pantirotsi caari cameetsatatsi. Impoiji iriotanaque yora quisaquemperi irio Quirishito oameetsantimpri. Impoiji aisati impashiventanaquea, iriotanaque te oncameetsateji incantimatemp.

¹⁷ Ariorica incoacayempi Tasorents iroashinoncayeetempi, iro cantaincha oncameetsateji pashinoncaimentearo cameetsayetatsiri pantayeteri. Te oncameetsateji pashinoncaimentearo caari cameetsayetatsi pantayeteri.

Yantayetaqueri Quirishito.

¹⁸ Ari te ancameetsajeiteji arori, oshequi antayetaquero caari cameetsatatsi, iro cantaincha icameetsatasanotaque irinti Quirishito. Icamimentajeitaquee irinti, yoavisacojeitaquee; icoaque aneajeitanta-jeariri Tasorents. Icamasanovetaca; iro cantaincha ishire, te oncameji. ¹⁹ Icamantacari, ijashiretapainti anta Sharincaveni-qui, anta yoquerinta Tasorents camaarie-peee aisati ishireni tseencantatsiniri. Ari iquenquetsatacaapaqueri. ²⁰ Peerani, te inquemisantajeiteni iriori ishaninca Noeni. Yovetsicantavetacaroniri ivito, icantapinijeivetacari ishaninca peerani: “Pinquemisantajeiteri Tasorents”, iro cantaincha te inquemisantajeiteri. Ari

peerani yamavenavetacari Tasorentsi, iro cantaincha impoiji ishemanacari, itiancaquero antearo incani, incajaretanque, maaroni. Aanaqueri maaroni, itsitiaeitanaque, pomiririri. Ari icarati avisacotajantsiri pitotsiqui ocho.²¹ Ari ishiajeivetacarini iriori vaotisajeitachari meeca. Ariorica avaotisataquea, te iroancaate, irointi ashiacantiro icamimentajeitaquee Jesoquirishito, aisati itinaanaja, yoavisacojeitaquee. Aisati ashiacantiro aventari Tasorentsi yoameetsashirejeitantaqueeri.²² Ari meeca ijataji Jesoquirishito anta inquitequi, isaviquimotapaajiri Tasorentsi iracosanoriqui: icaratiri ipincatsariventajeitee. Aisati oshequi ipincatsajeitiri inampirepee, itsipapée pincatsarivetchari, maaroni.

4 ¹Ari piojeitaque otimi oshequi iquematsicatacari Quirishito, te incoyeji eiro iquematsicataro. Aisati avirojei, eiro picoajeititsi eiro piquematsicatarotsi paitapeerica. Pamene, ariorica pinquematsicatearo paitapeerica, eiro picoajitsi pantapinitero caari cameetsatasi²aisati icoayetiri atiripee. Irointiquea pincoasanotanaque panteneri Tasorentsi paitapeerica incoacyempiri, irosati pincamanteari.³Peerani pantaveitaroni yantapinietiri yora tseencantatsiri: moncarataca, eiro papiitajirotsi aisati. Jero itsinampanti iriori, yantayetiro caari yai, ishinquitapinita, imayempitavacaapinijeita, iquisavacaajeitaca, ipincatsatashitacaro ijitasorentsitashitari.⁴Te iriojeiteji iriori, icanti: “Paita caari iquempetan-tana quemisantatsiri?” YojeitanaqueMPI cavaco, irosati icantimajeitantaquempi. ⁵Iro cantaincha coajica impoqué Quirishito incantacoventajeiteri maaroni atiri: aneajeitatsiri aisati camajeitatsiri. Irisampijeiteri tseencantatsiri: “Paita p quisantacariri quemisantanari? Te oncameetsateji”. Eiro yaquiritsi, oshequi impashiventanaquea.⁶Peerani yora

Jesoshi iquenquetsatacaa jeitaqueri savicaveitachaniri, icamantajeitaqueri: “Ariorica pinquemisante, pincantatati-yempani pintime anta inquitequi”. Ari icamajeitaque: tempa yantajeitaquero caari cameetsatatsi, irootaque icamajeit-tantacari, iquempejeitacari maaroni atiri. Iro cantaincha yoitinaajiri Tasorentsi maaroni quemisantajeitiriri, isavicacaa-jeitaqueri anta inampiqui. Meeca iquempejeitacari Tasorentsi: eiro icamajeitajitsi aisati.

Tsame ancavintsayeri ayemisantaririnte.

⁷Pamene, irotantsi omoncarataquea incantacoventantajeiteeri Tasorentsi. Cameetsa pisavicajeite catsini, pinquea-rioventero pinquenquetsatacapinijeiteri.

⁸Pincoasanojeite catsini pinintavacaajeitea. Ariorica pinintavacaajeitea, eiro piquenqueshiretirotsi caari cameetsatatsi yantayetiri itsipapée, irointi pincavintsa-vacaajeitea.⁹Pincanteani pineshionca-jeitavaqueri maaroni quivantempineri.

¹⁰Tempa otimi imatacaaquémpiri Tasorentsi, ari pimamatero pintacotan-teariri pishaninca. Piotacaajeiteri iriori icavintsaajeitaqueri Tasorentsi.¹¹Ariorica pinquenquetsatacayeri pishaninca, pinquearioventero povaajeneri irineane Tasorentsi. Ariorica pintacoteari pishaninca, pincanteri Tasorentsi iramata-cotempi, aitaque irimatacaaqueimpido. Ariorica anquemisantasanofteri Jesoquirishito, incantajeite itsipapée atiri: “Tempa icameetsatasanoti Tasorentsi”. Tsame aneacameetsajeiteri maaroni, ampincatsa-jeiteri: ancantaitatiyempani. Aitaque ancantajeiteari.

Icantiri: “Ariorica pinquematsicatimenteari Quirishito, pinquimoshiretanaque”.

¹²Noshaninca, oshequi nonintajeita-quempi. Niotaque oshequi yoashinon-queetaquempi. Eiro poanaqueti cavaco,

aitaque yoashinonqueetiri aisati itsipapee quemisantajeitatsiri.¹³Tempa aisati yoashinonqueetaqueri iriori Quirishito, meeca piquempejeitacari: ari pinquimoshirejeitanaque. Aisati, coajica impinca-tsaritapaaque irinti, irosati pinquimoshireventasanotanteariri.¹⁴Ariorica inquisimenteeyetempiro piquemisantiri Quirishito, pinquimoshiretanaque: tempa aitaque itasoncacoventaquempi Tasorentsi. Quiso oajeitaquempi Ishire, aisati coajica cameetsa pisaviquimoteri anta inquitequi.

¹⁵Iro cantaincha eiro poantitsi, eiro picoshititsi, eiro pantayetirotsi caari cameetsayetatsi, eiro pashereiritsi pishaninca, maaroni. Ariorica inquisimenteeyetempiro ocapée, pineashiiitetearove.¹⁶Iro cantaincha ariorica pinquemisantasanoteri Quirishito, irootaque inquisimentanteetempirori, eiro otimitsi pimpashiventimenteri. Irointi pincante: "Tempa icameetsataque Tasorentsi, ishinetana noquematsicatimentacari Quirishito".¹⁷Pamene, irotaintsi incanta-coventajeitee Tasorentsi: irijivajeitee maaroni arori itomintajeitari, impoiji-quea iriori tseencajeitiriri. Ariorica irintacojeitee arori, tempa iroashinoncaasanojeiteri yora caari quemisantajeitiri.¹⁸Tempa ocantini Sanquenarentsi: "Ari yoavisacojeitaqueri Tasorentsi yora quemisantajeitiriri yoameetsajeitaqueri, iro cantaincha irovetainchira jajeiteme Sharincaveniqui. Irintiquea yora tseenquiriri Tasorentsi, yantapinitiro caari cameetsatatsi: tempa ari irashinoncaasanotaquea irinti".¹⁹Ariorica pantiniri Tasorentsi icoacaquemppiri, irootaque picatsitamentancariri, ocameetsataque. Pinquearioventero pantayetero cameetsa-yetatsiri. Pincanteri Tasorentsi: "Pinquempoyejena". Tempa irootaque vetcicaquemppiri, inquempoyeasanotempi, eiro yamatavitimpitsi.

Yora Petero yoametaqueri jivatacaajeitiriri iyemisantaririnte.

5¹Jero oca nosanquenateneriri quenquetsatacantatsiri. Tempa narotaque narori quenquetsatacantatsiri. Peerani noneasanotaqueri Quirishito ineacatsitacaro oshequi. Aisati coajica, ariorica impoque Avincatsarite impinca-tsariventantapaaje, nontsipateari nompin-catsariventante narori. Ari meeca timatsi noninti noncamantajeittempi: ²yora ashitariri irovishate intacojeitacari irovishate. Aisati avirori, pintacotapinijeiteari ashanincapee piquemisantacaajeitaqueri. Avisati coashitachane, eiro itimitsi peranatempernieri. Te iro pinquenquetsatacaapinijeitanteeariri paitanteariri iirequite, irointi pincoasanotaque pintacojeiteari.³Eiro pishintsitsajeitiritsi, irointi cameetsa pintime, inquempejeitantempiri iriori.⁴Coajica impoque yora pincatsariventajeitajereer, iraajeitanajee, irisavica-caajeitapajee anta inquitequi. Ancantatiyempani asavicaajeite anta ocameetsai-teti catsini.

⁵Aisati evancaripee, noncamantempi: pimpincatsajeiteri maaroni timacaajeitimpipi. Eiro pishemejeititsi, irointi cameetsa pincavintaavacaajeitea. Yora Tasorentsi iquisaqueri yora shemetatsiri, iro cantaincha ineacameetsajeitaqueri caari shemejeitatsi.⁶Pimpincatsajeiteri iriori: tempa itasorentssatasanotaque, ipincatsaritasanotaque; impoiji irisavica-caajeitempi cameetsa catsini.⁷Eiro piquenqueshireatsi, eiro poashiretatsi. Otimirica piquenqueshireyetiri, pincanteri Tasorentsi: "Oshequi noquenqueshirereaca. Pamitacotena eiro noquenqueshireantajatsi aisati". Ariorica pincanteri, ari piveshireimenteari iriori.⁸Queariompia: paamayeari camaari. Oshequi catsini iquenaquenayetaque, icoaveta irojocacaajeiteerome aquemisan-

tajeiti maaroni: eiro catsini aquemisan-tantajatsi. Iquempetacari anteari maniti, ariorica itasheasanotaque: yoari iovintsane, itsoncasanotaqueri, te intimeji timaarantajantsine. ⁹Pinquemisantasano-teri Avincatsarite pimpiatanteariri camaari. Queario ontimayete pinquema-tsicayeteari, iro cantaincha tempa aisati iquempejeitaquempi iriori ayemisantari-rinte anta otsipapeequi quipatsi. ¹⁰Eiro osamanitasanotitsi pinquematsicatearo: ioti Tasorentsi pipincatsataqueri Quirishito, ari impoiji iraajeitanaquempi anta inquitequi. Pincantaitatiyempani pisavicapaaaje anta ocameetsaitetasano-tinta catsini. Yashi yoiro icavintsanti: iroameetsantasanojeitempi, iriveshirea-caajeitempi, impeavajempi pincatsari avirori, eiro picantashiretajitsi aisati.

¹¹Tsame maaroni ampincatsatasanojei-

teri, ancantaitatiyempani. Iroove, icamee-tsatasanotaque catsini.

¹²Jeri yoca Shirivano, iriotaque aanajempirone oca nosanquenare. Oshequi noneacameetsatari: iriotaque ayemisantaririnte, iquearioventiro iquemisanti. Ari nocamantaquempi oshequi icavintsaasanojeitaquempi Tasorentsi, queario nocantaquempi. Meeca pinquemisantasano-teri, piveshirei-menteari iriori. ¹³Ivetsajeitaquempi maaroni ayemisantaririnte aca Vavironia-qui, tempa irisati icoyeane Avincatsarite iquemisantajeitiri. Aisati ivetsajeitimpipi noamere Maricoshi. ¹⁴Paacameetsatava-caajeitea maaroni, pincavintsaavacaajeitea. Nocantiri Tasorentsi: “Pincavintsa-jeiteri maaroni quemisantiriri pitomi, cameetsa pisavicacaajeiteri”.

Narotaque sanquenajeitimpiori: *Petero*

YAPIITAJINIRI PTERO ISANQUENATINIRI IYEMISANTARIRINTE

Ivetsajeitari.

1 ¹¿Ainirompi noyemisantaririnte?
¿Tecatsimpa oyempine? Narotaque Shimo Petero sanquenajeitimpiori. Narotaque itiancane Jesoquirishito, nantiniri oriori paitarica icoacaaqueenari. Tempa amoncaratavacaajeitaca aquemisantajeitakeri Tasorentsi aisati Jesoquirishito, yora oavisacojeitequeeri. Irootaque yoameetsajetantaqueeri. ²Ari piojeitaqueri, irootaque oshequi incavintsaajeitantempiri aisati cameetsa irisavicacaajeitantempiri.

Ocameetsati anquearioventeneri Tasorentsi maaroni antajeteneri.

³Ari icoyeajeitaquee Tasorentsi ancameetsajeitantearei aisati cameetsa asaviquimojetanteariri anta ocameetsaitetinta. Ariorica ayojeiteri, intasoncacoventajeitaquee cameetsa asavicajeitantearei aisati cameetsa anquemisantanteareiri. ⁴Oshequi intasoncacoventajeitaquee anquimoshireimentantajeteariri catsini, irimataqueenero maaroni icantaqueeri. Iramitacojeitee eiro acoantaro antero caari cameetsatatsi. Aisati iramitacojeitee anquempejeitanteareiri oriori. ⁵Ariorica acoajeitaque intasoncacoventajeitee, ocameetsati ajivataque anquemisanteri. Ariorica anquemisanteri, impoiji ocameetsati ancameetsatanaque. Ariorica ancameetsataque ocameetsati aisati ayotasanotanaque paitarica icoacaaqueeri. ⁶Ariorica ayotaque paitarica icoacaaqueeri, ocamee-

tsati aisati aamaventanaquea arosati amatantearori. Ariorica aamaventanaquea arosati, ocameetsati anquearioventero icoacaaqueeri. Ariorica anquearioventero icoacaaqueeri, ocameetsati aisati ampincatsatasanotanaqueri. ⁷Ariorica ampincatsatasanotanaqueri, ocameetsati aisati anintajeitanaqueri maaroni ayemisantaririnte, ancavintsaajeitanaqueri maaroni ashinancajei. ⁸Ariorica pimatasanojeitanaquero maaroni ocappee, ari oshequi pimataqueneri Avincatsarite Jesoquirishito, aisati piotasanolanaqueri. ⁹Yora caari majeitiro ocappee te iriotasanoterji Avincatsarite, te inquenqueshireteroji icavintsairi. Oshequi yantajeitironi caari cameetsatatsi, iro cantaincha icavintsaasanotaqueri, yoameetsataqueri, te inquenqueshireajeroji aisati. ¹⁰Meeca, noyemisantaririnte, pinquearioventasanotero panteneri Tasorentsi maaroni icoacaajeitaquemperi, te oncameetsateji irantsipetashitearo icoyeaquempi pijatantearei anta inquitequi. Aisati eiro pojouirotsi piquemisantiri, ¹¹oncanteataquea iraantanajempiri anta inquitequi, anta icantani ipincatsariventanti Avincatsarite Jesoquirishito: yora oavisacojeiteeri.

Icantiri: “Eiro pipeacotarotsi oca nocantaquemperi”.

¹²Te iroaquera pinquemajeitetro oca nocantaquemperi: piojeitaroni, aisati pimayetaquero cameetsa. Iro cantaincha nampiitajempiro aisati nonquenqueshireta-

caajempiro.^{13,14} Iotacaquaquena Avincatsarite Jesoquirishito eiro osamanititsi noncamanteari. Iro cantaincha nonquenqueshiretacaa-jeitempiro irosati noncamanteari.¹⁵ Impoiji, ariorica noncame, eiro pipeacotantarotsi, irosati pinquenqueshiretanta pinitearori.

**Tampatica oamejeitaquee
irineane Tasorentsi.**

¹⁶ Tempa nocamantajeitaquempi coajica impocage aisati Avincatsarite Jesoquirishito, oshequi impincatsaritapaaque. Queario oca nocantaquempiro, te noncamantajeitempiro naamaashijeitacari. Tempa narojeitaque neasanojeitaqueriri Jesoshi peerani ishipaqui-reaque aisati itasoncantayetaque.^{17,18} Peerani ijatantacari Jesoshi toncaariqui, nojatananaqueri narori, aisati itsipapee iroamere; noneasanojeitaqueri ishipaquireanaque, aisati noquemajeitavaqueri Apa Tasorentsi, yora cameetsatasanotatsiri. Icanti: "Iriotaque yoca notomi nonintasanotiri, oshequi noneacameetsatasanotaqueri". Irosati noppincatsatasanojeitantanacariri Jesoshi.¹⁹ Timatsi aisati isanquenajeitiri yora camantantatsiniri peerani: iotacaasanojeitaquee queario impocasanotaje Quirishito, impincatsariventajeitajee. Ocameetsati pinquenqueshiretasanajeitiero ocantiri Sanquenarentsi piotanteariri jaoca icanta. Oquempetacaro atsiota tsiteniriqui: eiorica atsiota, eiro aneitsi. Ari ocameetsati pincanteani pinquenqueshirejeitiero, irosati impocantajeari; impoiji irotacaasanojeitempi, onquempetimojeitempi oquitatetasanoti.^{20,21} Nocoaque piotasanojeitiero oca: ora isanquenare yora camantantatsiniri otampatitacasanotaque. Te irioteniji intacarori, yora camantantatsiniri, caari oni irineane iriori; irointi oamejeitaqueri Ishire Tasorentsi, isanquenatantacarori irineane.

Iquenquetsatacotiri amatavitantsiri.

2 ¹Ari peerani itimini quenquetsata- caajeitiriniri joriopee, iro cantaincha yamatavijeitirini, aisati intime meeca

amatavijeitempineri avirori. Iroamejei- tempiro tseeyantsi, intseeyacoteari Tasorentsi. Tempa ayojeitaque icamimene- tajeitaquee Jesoshi ajajeitanteeari inquietu- qui, iro cantaincha incantanirote yora amatavitantsineri: "Eiro apincatsatiritsi Jesoshi". Irootaque iroasanquetasanotan- teariri Tasorentsi.² Intime oshequi

ojajeiterineri: inquempejeiteeari, irantayero caari cameetsatatsi; irootaque intseenqueetanteariri Quirishito.

³ Oshequi iramatavijeitempi, iroametashi- yetempiro paitapeerica iraitantempiriri piuirequie. Peerani icanti Tasorentsi:

"Aitaque noasanquetasanajeiteri yora amatavijeiterineri quemisantatsineri".

Queario, eiro osamanititsi irijajeite Sharincaveniqui.⁴ Peerani yora inampire- peeni, ipiatsajeitacarini Tasorentsi, yantayetaquero caari cameetsatatsi. Ari yoasanquetaajeitaqueri, yojocajeitaqueri anta Sharincaveniqui, anta otsiteniitasa- notinta. Aitaque itimaqueri iriori anta, irosati incantacoventanteariri Quirishito.

⁵ Pamene, peerani yoamaajeitaquerini Tasorentsi yora ishanincapeeni Noe. Te impincatsajeiteriji Tasorentsi, irootaque itiancantacanariri incani aajeitaqueri.

Tecatsi pashini iroavisacote, irinti Noe aisati ishanincasanori iriori, caratatsiri 7. Tempa iriotaque quenquetsatacayaive- tariri ishanincapee, camantajeivetacariri jaoca incanteameri iravisacojeitajea- meri.⁶ Peerani itaajeitaqueri Tasorentsi maaroni soromasatini, aisati maaroni comorasatini; itaajeitaquero ivancopee, irovararo, maaroni. Otaaca maaroni, poyere. Ocameetsati meeca anquenque- shirejeitiero yantaqueri Tasorentsi ayojeitanteeari iroasanquejeiteri maaroni caari pincatsatiri.^{7,8} Ari icameetsataqueni Orotini; isavicaveitani anta, iro cantain- cha te irineacameetsateroji oca yantajei- taqueri yora isaviquimojeitiri. Oshequi iquenqueshiretanaca maaroni quitaiteri:

“¿Paita caari iquemisantajeitanti Tasorentsi?” Ari ineacameetsataqueri Tasorentsi iriori, irootaque caari itaantari.

⁹Ari iotasanoque Tasorentsi yoavisa-cojeitaqueri pincatsajeitiriri, eiro iquempetantaritsi tseencantatsiri. Irinti yora caari cameetsajeitatsi, iroashinon-caajeitajeri, irosati impocanteari incanta-coventantajeiteariri. ¹⁰Aitaque iroasan-quejeiteri maaroni coatsiri irantayetero caari cameetsayetatsi, antashiyetarori paitarica icoayetiri, jeri aisati yora tseenquiriri Avincatsarite. Tecatsi impincatsajeite, oshequi ishemejeiti, te intsaroyeji icantimajeitiri inampirepee Tasorentsi. ¹¹Ari isavicafeiti iriori anta Avincatsaritequi, aisati oshequi ishuntsitsi, oshequi ipincatsariti, iro cantaincha te impiatearji yora cantimajeitiriri. ¹²Iquempejeitacari iriori poshinripee, tecatsi iriote. Iquenashiyeta, impoiji imanatiri atiri, yoqueri, shemi. Yora tseencantatsiri icantimatashiyetaro caari ioti, irootaque irijajeitanteari Sharincaveni qui, intspajeiteari camaari. ¹³Yoashi-noncantajeiti meeca: coajica irashinon-caajeitaquea iriori. Iveshireimentashiyetaro timayetatsiri meeca: te inquenque-shireteroji jaoca incanteari coajica. Te oncameetsateji yantajeitiri iriori, iro cantaincha yantacaajeitaquempiro caari cameetsatatsi pinquempejeitanteeariri avirori. ¹⁴Inevejeitaro tsinanepée, icantani yantapinitiro caari cameetsatatsi: tecatsi incantero irijocajero, yashi yoiro. Yantacaajeitaqueri caari quenqueshireve-taro caari cameetsayetatsi. Yashi yoiro ineveyetaro vararontsi. Queario irijajeite iriori Sharincaveni qui.

¹⁵Te incoajeiteji intime cameetsa, irointi yantashiyetaro paitapeerica. Iquempejeitacari Varamani, itomini Veoro. Iquenquetsavetaroni peerani irineane Tasorentsi, iro cantaincha

inevetasanotaro vararontsi, te irantasano-teneriji Tasorentsi icoacaavetariri. ¹⁶Te inquemisanteriji, irointi yojataqueri coatsiri imperi vaararontsi. Ari imapoca-queri irashinote ineanataqueri. Te irio tejeri irio neanatacairyi Tasorentsi. Ari iquenquejaqueri, ipiatsatacari, impoiji oshequi yoanaqueri cavaco iriori, aisati oshequi iquenqueshireanaca: te inquenqueshiretajeroji aisati vaararontsi. ¹⁷Ariorica pinqueacotero nija onconteja-tanteari, tempa pincoasanotaque ontine nija. Iro cantaincha ariorica ompirijata-naje, te oncameetsateji, tecatsi payero nija. Ari yora amataviantatsiri ishiaquero pirijatatsiri nija: te incamee-tsateji. Oshequi inaveeti, vero, vero, iro cantaincha tecatsi iramitacotempi. Aisati iquempevetacaro mencori, ariorica pineaquero amaquero tampea: pijiti ompariye incani, iro cantaincha ariorica amatavitempi, te ompariye. Timatsi intimasanotanteari iriori, yovetscaque-neri Tasorentsi anta otsiteniitasanoti catsini. ¹⁸Oshequi ishemejeiti, aisati icantapiniti: “Pineaquero, nantashiyeta-caro paitapeerica nocoayetiri”. Ari yamatavyetiri oshequi iro aquera quemisantavetachari: iro aquera yojocave-tacaro caari cameetsatatsi yantayetiri, iro cantaincha yantacaanirotajiri aisati. ¹⁹Icantayetiri: “Tempa irio Tasorentsi oavisacotimpri, te pimateroji poavisaco-taja avisati. ¿Paita caari pantantaro paitarica picoayetiri? Tempa icavintsa-quempi, eiro iquishimentimpirotsi. Tsame pinquempetena narori”. Irootaque icantayevetari, iro cantaincha yamatavi-tantaniroti. Jero yantapinitiru camaari icoacairiri iriori: irootaque ivincatsarite. Iriome Tasorentsi ivincatsarite irantene-rime icoacairiri iriori, cameetsa irisaviqueme. ²⁰Pamene, peerani yashinoncaajeiveta: yantapinijeiveta-roni caari cameetsatatsi yantajeitiri

tseencantatsiri. Impoiji iotajiri Avincatsarite Jesoquirishito, yoavisacotajiri. Iro cantaincha yapiitajiro ora yantapinijeiveitaniri. Meeca tecatsi incantacoventa-jea iroimpacajero aisati yantayetiri, irootaque irashinoncantasanoteari catsini.²¹ Pinequero, ocameetsaveta eiro iovetarime Tasorentsi. Yoameetsavetajari, aisati yoamevetajari, iro cantaincha ipiatsanirotacari yora cavintsaavetajariri.²² Icanteetini: "Yora otsiti yoipiajaro iamarancane, yoajaro. Atsipetashitacari aquiviri shintori, tempa impianaje aisati intivironcajearo sampoatsa". Queario icanteetiri. Aitaque iquempejeitari iriori yora quemisantavetachari, yapiitajiro caari cameetsatatsi.

Iquenquetsatacotiri Jesoshi, impocantajeari.

3 ^{1,2}Ari, noyemisantaririnte, piojeiti nonintajeitaquempi. Chapinqui mintantaquempiroi nosanquenataquempiro, noquenqueshiretacaquempiro isanquenatniri yora quenquetsatacotiriniri Tasorentsi peerani. Aisati noquenqueshiretacaquempiro maaroni yoamejeitaquenari Avincatsarite, yora oavisacojeiteeri. Impoiji itiancajeitaquena noquemisantaceaitequaempi. Meeca napiitajimpiro nosanquenatajimpiro pinquenqueshiretasanotanteorari. ³Piojeitaque eirotsitarica ipoquitatsi Avincatsarite, intime oshequi tseencantatsineri, irantashiyetearo paitapeerica incoaniroyeteri iriori. Irishirontimentajeiteari Avincatsarite, ⁴incantajeite: "¿Icantimpa Quirishito impocaje? Iji, iji, iji. ¿Jaocari meeca? Tempa camaque peerani. Eiro ipocajitsi. Peerani yaamaavetacarini yora intacaroniri iquemisanti, iro cantaincha te irineeriji, irosati meeca. Peeraniiteni. ⁵Pijitimpapineajeri avinti? Iji, iji. Irosati ocantani quipatsi, te ompashiniteaji". Irootaque incantajeiteri tseencantatsineri.

⁵Te incoyeji inquenqueshiretero yantayetaqueri Tasorentsi. Peerani

icantaque iriori: "Ontimeta quipatsi, aisati ontimeta inquite", irosati otimantacari. Ari yovetsicaquero quipatsi, ocontetapaaque incajarequi, meeca aisati oshoncacaro incajare. ⁶Aitaque ocantacari peerani, iro cantaincha impoiji yoasanquetaajeitaqueri yora ishanincani Noe. Iro yoasanquetantacariri, te oncameetsateji intimeni. Ari opariaqueni antearo incani, ooncanaca maaroni quipatsi, aisati ipoyereajeitanaca tseencantatsiri. ⁷Aisati icanti Tasorentsi: "Coajica nontayero inquite aisati quipatsi, aisati nontaacojeiteri maaroni timantarrori". Tempa peerani icantini "Novetsi-quero quipatsi", irosati otimantacari. Meeca icanti: "Coajica nontaajero quipatsi", tempa aisati irimatajero. Aisati tequerata omoncarateaji intaantajearori, iro cantaincha coajica intayero, pomein, aisati intaacojeiteri maaroni tseencantatsiri, iroasanquetaajeiteri. ⁸Meeca pinquenqueshirejeitero oca, noshaninca: ajijeivetaro 1000 osarintsi peerani catsini. Iro cantaincha te irijiteroji irinti. Inequero te osamaniteji, oquempetimovetacari aparoni quitaiteri. Ajijeitiro te osamaniteji aparoni quitaiteri, irioquea iriori inequero osamani, oquempetimovetacari iro 1000 osarintsi. ⁹Pinequero, ajijeivetaro opeeranitaque, tequera irimoncarateroji icantaqueeri: tequera impoque Avincatsarite. Iro cantaincha te irijiteroji irinti opeeranitaque. Eiro yamataviteetsi, iro cantaincha osamani onaveta yoyeacovetacari tseencantatsiri, icoaque inquenqueshiretaja eiro ijatanta Sharincaveniqui. ¹⁰Iro cantaincha coajica irimapocasanotapaaquee Avincatsarite, impocaje. Antearo ontoncanaque inquite, ton; ontsongcasanotanaquea, poyere. Intaasanotanaquea impoquiro, catsirincaiteri, cashiri, maaroni: pomein, intsoncasanotanaquea iriori, poyere. Aisati quipatsi, ontayea; aisati ontaacota-

sanojeitanaquea maaroni timajeitatsiri quipatsiqui, pomein, poyere.

Icamantiri jaoca oncanteari coajica.

¹¹Ari meeca ayojeitanaque ontsoncajitea maaroni aneajeitiri, irootaque ocameetsatantari anquenqueshiretanaquea, anquemisantasanofteri Tasorentsi, cameetsa antime catsini. ¹²Cameetsa aamaajeitari Tasorentsi impocaje, cameetsa aisati antajeiteneri maaroni icoacaqueeri irishintsitajeari impocaje. Ariorica omoncarataquea, ontayea inquite aisati inquitesati ontsoncajiteanaquea, maaroni, poyere.

¹³Iro cantaincha timatsi pashini icantaqueeri, ayotanaque eiro yamataviteksi. Icanti: “Pashini novetsicaje aisati inquite iroquerari, aisati quipatsi iroquerari. Oncameetsatasanotaje irointi, eiro itimajitsi antayetajeroneri caari cameetsatatsi”. ¹⁴Meeca, noyemisantaririnte, paamaajeitacaro icantaqueeri. Pincoasanotaque pintime cameetsa, aisati paacameetsatavacaajeitea; impoiji ariorica impocaje, irineacameetsatasanotapaaquempi. ^{15,16}Queario,

tequera impocaje, iro cantaincha yoyeajeitaqueri itsipapee atiri inquemisantajeite iriori iravisacojeitajeari. Irootaque isanquenajeitaquempi Pavoro iriori, yora anintasanojeitiri. Oshequi iotacairi Tasorentsi. Timatsi pomerentsi-taarantainchari isanquenayetiri. Meeca yora caari iotatsi, yora caari quemisantasanoftatsi, iquenacaashitacaro irineane Pavoro, te ontampaticateji incamantacatero. Aisati iquenacaashiyetacaro pashini irineane Tasorentsi, irootaque iroasanquejeitanteeari.

Ivecarataquero isanquenare.

¹⁷Ari, noshaninca, nocamantaquempi jaoca oncanteari coajica. Nocamantajeitaquempi intime yora caari cameetsayetasine, piatsajeitearineri Tasorentsi, iroametantero tseeyantsi. Queariyea, piquemisantiricari, icomitacaimpicari.

¹⁸Pinquemisantasanofteri Avincatsarite Jesoquirishito, yora oavisacojeiteeri, piotasanolanaqueri. Tsame meeca aisati ampincatsatasanojeiteri, ancantaitatiyempani. Aitaque ancantajeiteari, maaroni.

Narotaque sanquenajeitimpiori: *Petero*

IJIVATAQUE JOA ISANQUENATINIRI IROAMERE

Yora Ashitarori Irineane yoamejeitaquee jaoca ancanteari antimanteari inquitequi.

1 ¹¿Ainirompi, noamere? ¿Tecatsimpa oyempine? Narotaque aca Joa sanquenajeitimpiori oca. Meeca nosanquenatacotaqueri intasanotarori itimi. Tequerani ontimeni quipatsi, itimitani irinti. Iriotaque Ashitarori irineane, oamejeitaqueeri jaoca ancantajeari antimajeitantajeari anta inquitequi, ancantaitatiyempani. ²Itsipatarini Apa Tasorentsi, impoiji ipocaque aca quipatsiqui. Noneapinijeitaqueri, namenapinijeitaqueri, noquemapinijeitaqueri, nopamitapinijeitaqueri: meeca nocamantajeitaquempi jaoca icantari, aisati nocamantajeitaquempi jaoca incantajeitajeari aneasanojeitantajeari anta inquitequi. ³Ari yora noneasanotaqueri, noquemasanotaqueri, iriotaque noquenquetsatacotaqueri. Meeca noncamantasanotempi, pinquempetantenari narori. Aquempejetacari Apa, aisati aquempejeitacari itomi: yora Jesoquirishito. ⁴Meeca nosanquenajeittempiro oca pinquimoshiretasanojetanteari.

Ishiasanotaquero Tasorentsi quitateri.

⁵Meeca noncamantempiro icamantauenari iriori. Ishiasanotaquero Tasorentsi quitateri, te intsitenitimateji: te iranteroji irinti caari cameetsatatsi. ⁶Ancanterica: “Noquempetacari”, iro cantaincha ariorica antapinitero caari

cameetsatatsi, aquempetacaro aquenanaque tsiteniriqui: antseyeyashitaca, amatavitantaque. ⁷Iro cantaincha icameetsatasanotaque Tasorentsi, iquempetacaro iquenanaque irinti quitateri. Ariorica cameetsa asavique, oquempetaca aniihanaque quitateri, ashiaqueri iriori: aquempetavacaajeitaca. Icamimentaquee Jesoshi, yora Itomi Tasorentsi: aparajatimentaquee iriraja yoavisacojeitantaqueeri, yoameetsajeitantaqueeri. ⁸Ancanteririca: “Te nanteroji caari cameetsatatsi”, arosati amatavita-jancha, tequera ayotimateroji queariotasnotatsiri. ⁹Te iramataviteeji Tasorentsi, icameetsataque. Ariorica ancamanteri: “Ainiro nantane”, incavintsaajeitee, iroameetsajeitee, maaroni. ¹⁰Ancanteriricame Tasorentsi: “Te nanteroji caari cameetsatatsi”, ancanterime aisati: “Te pioteji, pitseeyani”. Ancanteriricame: “Te aneroji nantane”, te ashiretearoji irineane.

2 ¹Meeca, noamere, nosanquenajeitempiro eiro pantantarotsi caari cameetsatatsi. Timatsi Apaqui Cantacoventajeitaqueeri: yora Jesoquirishito, icameetsatasanotaque. Ariorica antero caari cameetsatatsi, incantacoventee. Incanteri iriri: “Pincavintsayeri yora quemisantanari”. ²Ainiro antajetiria maaroni, iro cantaincha icamimentajeitaquee coroshiqui. Te apaniro incamimentajeiteri ashanincapée arori, irointi icamimentajeitaqueri maaroni atiri. Yoameetsajeitaquee Tasorentsi, aisati iriori

maaroni quemisantajeitiriri, eiro iquishimenteerotsi caari cameetsatatsi antajeitaqueri, eiro yoasanquetaajeiteetsi.

**Quemisanbiriri Tasorentsi,
iriotaque iojeitiriri.**

³Ariorica antapinijeitaquero icantaqueeri Tasorentsi, ayotavacaajeitaca ashancatacci. ⁴Ainiro cantashitachari: "Noshanincatacci Tasorentsi", iro cantaincha te iranteneriji icantavetariri. Irootaque tseyayari, irisati amatavitajancha. ⁵Ariorica antasanotiro icantaqueeri Tasorentsi, arojeitaque nintasanojeitiriri. Irootaque ayotavacaanta-cari aquempetasanojeitacari. ⁶Ancanterica: "Quiso noanaqueri Tasorentsi", cameetsa ancantaitatiyempani ashiasanoteri, asavique cameetsa.

⁷Nonintane, te naro intearone oca nocamantimpiri. Peerani intajeitaqueeroni Tasorentsi icamantajeitaqueeroni. Peerani piquemaquero. ⁸Te ayoveiteani, oquempetimojeiveiteeni atimini tsiteniriqui, iro cantaincha ipocapaaquea iotacaajeitaqueeri, oquempetaca iquitaitetacojeitaquee. Irootaque meeca napitiantimpiori. Iquearioventiro Quirishito inintajeitaquee. Aisati avirori, pinquearioventero, pinintajeiteri itsipapee. ⁹Ancantashitearica: "Noqueniquitaiteriqui, niotiri Tasorentsi", iro cantaincha anquisheririca ashanicna, aimiroquera aqueni tsiteniriqui. ¹⁰Ariorica aninteri ashanicna, anquenasanotanaque quitaiteriqui, eiro aisati antapinitirotsi caari cameetsatatsi. ¹¹Ariorica anquisheri ashanicna, oquempetaca aquenashitanaca tsiteniriqui, ainiro antapinitiro caari cameetsatatsi. Te ayoteji jaocarica aquenaqueri, oquempetaca otsitenitimidatuee, te aneeroji amenanteari.

**Eiro pinintasanotirotsi
yantapiniyetiri tseencantatsiri.**

¹²Noamere, otimi pantajeitiniri, iro cantaincha yoavisacojeitaquempi Jesoshi.

Irootaque meeca nosanquenatantimpiori oca. ¹³Avirojei shirampari: piojeitaqueri yora intasanotarori itimi, irootaque nosanquenatantimpiori oca. Avirojei, evancari: te panteneri camaari icoacaave-taquempi, irootaque nosanquenatantimpiori oca. ¹⁴Avirojei jananequi: piojeitiri Apa, irootaque nosanquenatantimpiori oca. Avirojei shirampari: piojeitaqueri yora intasanotarori itimi, irootaque nosanquenatantimpiori oca. Avirojei evancari: pishintsjeitanaque, piqueario-ventaquero piquemisantaquero irineane Tasorentsi, aisati te pinquemisantimate-riji camaari, irootaque nosanquenatantimpiori oca. ¹⁵Eiro picoasanotirotsi pantero yantapinijeitiri tseencantatsiri. Eiro picoasanotirotsi timayetatsiri quipatsiqui. Ariorica pinintasanajoiteiro, eiro pimatirotsi pinintasanajoiteeri Tasorentsi. ¹⁶Aitaque acantajeitarit: aquenqueshirejeitaquero paitarica acoasanotaqueri anteri. Acoasanotaquero paitarica aneayetaqueri, ashemetimenta-quero ashietarri. Te irio oameteerone Apa, irinti atiri oamejeiteerori. ¹⁷Ompeanajea timayetatsiri quipatsiqui, aisati ompeajeitanajea maaroni acoajeivetari. Iro cantaincha ariorica anteneri Tasorentsi icoacaaqueeri, ancantaitatiyempani antimeni anta inampiqui.

**Iquenquetsatacotiri
tseyayacojeitacariri Quirishito.**

¹⁸Noshaninca, irotaintsi impocaje Quirishito, eiro osamanititsi. Piquemacotaqueri yora pashini pocatsineri, yora amatavitantatsineri, cantatsineri: "Te iratiritateeji Jesoshi, te imponeempají inquiteequi. Caari ini Quirishito". Ipajiyetiri yora cantatsiri: "Antiquirishito". Noncamantempi, yareejeitaca. Timatsi meeca oshequi amatavitantatsiri, irootaque ayojeitancacari eiro osamanititsi impiasanotaje Quirishito. ¹⁹Peerani

icarajeiveiteeni yora amatavitantatsiri, iquemisantaveitani, iro cantaincha meeca yojocajeitaquee. Te inquempetasanojeiteeji. Inquempetaqueeme, quiso iroajeitaqueeme, iro cantaincha yojocajeitaquee. Meeca ayotasanojeitaqueri te inquempejeiteeji, te inquemisantajeiteji.²⁰ Avintiquea itiancajeitaquempiro Tasorentsi Ishire, quiso oajeitantimpiri. Piotasanojeitaquero. Te pishiyeriji yora caari ioterone queariotatsiri: te irioteji irinti.²¹ Piojeitaquero queariotatsiri, irootaque nosanquenatantimpiori oca. Pioque te intseeyaji caari tseeyacha.²² Tseeyari ini yora cantashitachari: "Yora Jesoshi, caari ini Quirishito". Itseenquiri Apa. Itseenquiri Itomi, icantashita: "Caari ini Quirishito".²³ Yora tseenquiriru Itomi, te irioteji Apa. Yora cantasanotatsiri: "Quirishito ini Itomi Tasorentsi", iriotaque iotasanoliriru Apa.²⁴ Pincantaitiyempani pinquenqueshiretero oca piquemaqueri peerani. Ariorica pinquenqueshiretasanotero, quiso poyerri Itomi, aisati Apa.²⁵ Jero oca icashiacaqueeri: "Pincantaitiyempani pisavique nonampiqui".

²⁶ Ari nosanquenatacokeri yora amatavitempinemer, ²⁷ iro cantaincha itiancajeitaquempiro Tasorentsi Ishire, quiso oanaquempi. Te pincoyeji pushini oametempineri. Quiso oanaquempi, ari meeca otsoeteaquempiro maaroni, oametasanotaquempi. Tampatica oametaquempi, te ontseeyaji. Tempa oamejeitaquee quiso ayeri Quirishito: ari quiso poyerri.

Yashijeitacari Tasorentsi.

²⁸ Meeca, noamere, quiso poyerri Quirishito. Coajica impocaje. Ariorica pincanteani quiso poyerri, ari piveshireimtentavaqueari, eiro pipashiventacaavacari.

²⁹ Ari ayojeitaque icameetsataque Tasorentsi. Incameetsataquerica iriori atiri, ari ayojeitaqueeri itomintajeitacari Tasorentsi.

3 ¹Icantajeitaquee Tasorentsi: "Avirojeitaque notomipee, nishintopee". Queario icantaque. Pinequero, oshequi inintasanojeitaquee Tasorentsi. Te irioteji tseencantatsiri jaoca icantari, irootaque caari iotantee arojei itomi.

²Meeca, nomintane, avirojei itomipee Tasorentsi, irishintopee. Tequera ayojeiteji jaocarica ancanteari, coajicani. Ariorica impiaje aca quipatsiqui, amenajeitavaqueri jaocarica icantari. Impoijiquea ashiasanojeiteri iriori.

³Aamaajeitajari impocaje, irootaque acoajeitancatari meeca ancameetsajeitanaque: anquempejeitajeari iriori, icameetsataque. ⁴Ariorica antaquero caari cameetsatatsi, te anquemisanteroji icantavetaqueeri Tasorentsi. Te oncameetsateji ampiatsatearo icantaqueeri.

⁵Tempa piojeitaque ipoquaque peerani aca quipatsiqui yoavisacojeitajee. Piojeitaque aisati te iranteroji irinti caari cameetsatatsi. ⁶Ariorica quiso avanaqueri, eiro antirotsi arori caari cameetsatatsi. Yora antapinitirori caari cameetsatatsi te irineeriji Jesoshi, te irioteji jaocarica icantari, aisati te irishanincateariji.

⁷Noamere, yamataviyeyimpicari. Ariorica antapinijeitiro cameetsatatsiri, aitaque acameetsajeitanaque: amoncarajeitacari Tasorentsi, icameetsataque.

⁸Yora antirori caari cameetsatatsi, ishanincatacari camaari: tempa iriotaque intasanotacarori caari cameetsatatsi. Ari ipocapaaque Itomi Tasorentsi. Iro ipocashitasanotiri irojocacaajeri maaroni yantanirotiri camaari. ⁹Ariorica itomintajeitaquee Tasorentsi, eiro antapinijeitirotsi caari cameetsatatsi. Itomintaquee, irootaque quiso oantaqueeri Ishire, aquempejeitacari. Irootaque caari antapinijeitajaro caari cameetsatatsi.

¹⁰Irootaque ayontantacari ashanincajeitacari Tasorentsi. Yora caari materone cameetsatatsiri, te irishanincateariji

Tasorentsi. Aisati iquempeta yora caari ninterine ishaninca, te irishanincateariji, irootaque ayotantariri ishanincatacari camaari.¹¹ Jero oca intaqueMPIRi Tasorentsi icamantaquempiro peerani: "Cameetsa pinintavacaajeitea".¹² Eiro pishiiritsi Caini: ishanincatacari camaari. Yoqueri irirenti. ¿Paita yoantacariri? Yashi yoiro te oncameetsateji, iro cantaincha ineakeri irirenti cameetsa oni oca yantayetaqueri, irootaque yoantacariri.

Piojeiteri piyemisantaririnte.

¹³Noyemisantaririnte, inquisheMPirica tseencantsiri, eiro poanaquetsi cavaco.¹⁴Anintajeitaqueri ayemisantaririnte, irootaque ayojeitancarari ancantaitatiyempani asavique inquitequi. Peerani te ayoveitearini Tasorentsi, iro cantaincha meeca ayojeitajiri. Yora caari ninterine ishaninca, incantitatiyempani intime irinti Sharincaveniqui.¹⁵Yora quishiriri ishaninca, irootaque oayeri. Piojeitaque eiro itimitsi oayeri inquitequi.

¹⁶Yora Quirishito irisati coantsi icamimentajeitaquee, irootaque ayojeitancariri inintajeitaquee. Aisati arori, te oncameetsateji antsaroacayearo ancamimenteri ayemisantaririnte.¹⁷ Jeri ashitaarantachari: ineavtaririca yashinoncaaca iyemisantaririnte, terica icoye incavintsayeri, ¿inintirimpá Tasorentsi?¹⁸Noamere, te oncameetsateji ancantashijeitea: "Nonintiri noshaninca". Iro cantaincha cameetsa aneshinoncajeiteri, anintasanojeiteri,¹⁹irootaque ayojeitancarari ajatasanotiri Tasorentsi, te aneroji antane.²⁰Ayatirica otimi antane, ¿paita inquenqueshireteri Tasorentsi? Tempa itsoteiro maaroni, iojeitaque maaroni antajeitiri.

²¹Aisati, nonintane, ariorica ayojeite te aneroji antane, ayojeite aisati ocameetsati anquenquetsatacapinijeiteri Tasorentsi.²²Ariorica anquemisantero

icantaqueeri, aisati amateneri icoacaaqueeri, ayojeitaque ariorica anquenquetatcayeri, aitaque inquemaquee.²³Jero oca icantaqueeri: "Pinquemisanteri notomi Jesoquirishito. Pimoncarateneri icantaqueMPIRi iriori: 'Pinintavacaajeitea' ".²⁴Ariorica anquemisantajeitero icantaqueeri, quiso avanaqueri. Aisati iriori, quiso iroajeitaquee. Itiancajeitaquee Ishire, irootaque ayojeitancarari quiso yoajeitaquee.

Piojeiteri maaroni oamejeitelpineri.

4¹Nonintane, eiro piquemisantashijeitaritsi maaroni oamejeitelpinemer: yamatavitimpicari. Ariorica incantempi: "Itiancaquena Tasorentsi", iro cantaincha pijivateri pisampiteri paitarica iroamejeitelpiri, piotanteariri queariorica itianquiri Tasorentsi. Aca quipatsiqui timatsi oshequi coavetachari iramatavijeiteeme.²Jero oca piotanteariri otiananepee Ishire Tasorentsi: incantajeitee irinti: "Yatiritapaaque Jesoshi, iponeaca inquitequi. Iriotaque Quirishito". Irijeitaque shanincatacariri Tasorentsi.³Iro cantaincha te intianqueriji Tasorentsi yora caari cantatsi: "Quirishito ini Jesoshi". Iriotaque antiquirishito. Piquemacojeitaqueri icanteeti: "Impoqe tseeyacotearineri Quirishito". Ainiro meeca tseeyacojeitariri.⁴Noamere, yashijeitaquempi Tasorentsi, quiso yoajeitaquempi. Tempa ipincatsarasanoataque irinti, yanacojeitaqueri maaroni coavetachari iramatavijeitelpime. Irootaque caari piquemisantantari yora tseeyachari.⁵Tempa ishanincajeitacari iriori tseencantsiri, irootaque iquenqueshirejeitancarori icoayetiri atiri. Iquemisantajeitavaqueri ishaninca iriori.⁶Aroquea ainti, ashinancajeitacari Tasorentsi, iquemisantajeitaquee maaroni iotiriri, irootaque ayotantariri quiso oajeitaqueri Ishire Tasorentsi: ora

oamejeitiriri queariotasanotatsiri. Yora caari ioterine Tasorentsi, te inquemisan-tajeiteeji, irootaque ayotantacariri yamatavijeitaca irinti.

Tsame anintavacaajeitea.

⁷Nonintane, tsame anintavacaajeitea. Irootaque Tasorentsi intasanotacarori yoamejeitaquee anintavacaajeitanteeari. Ariorica anintajeitiri itsipapee, arojeita-que itomipee Tasorentsi, ayojeitiri. ⁸Yora caari nintiri ishaninca, te irishanincatea-riji Tasorentsi: irishanincataquearime, inquempetaquearime, tempa yashi yoiro inintajeitaquee. ⁹Irootaque ayotantacari inintajeitaquee, itiancaqueri Itomi irapintite quipatsiquica yoavisacojeitajee, ancantaitatiyempani asaviquimontajeari anta inquitequi. ¹⁰¿Janica nintasanotantatsiri? Te anintasanoteriji Tasorentsi, irinti inintasanojeitaquee. Itiancaqueeri Itomi, icamimentajeitaquee, yoavisacojeitajeari. Meeca te inquenqueshiretajeroji Tasorentsi antajeivetari, eiro yoasanquejeiteetsi.

¹¹Pineaquero nonintane, inintasanojeitaquee Tasorentsi catsini. Irootaque ocameetsatantari anintavacaajeitea arori.

¹²Tecatsi neerine Tasorentsi, iro cantain-cha ariorica anintavacaajeitea, quiso iroajeitanaquee Tasorentsi, aiquero ajatatiye anintasanojeitanaqueri.

¹³Itiancajeitaqueero Ishire, quiso oajeitaquee. Irootaque ayojeitancari quiso avajeitaqueri arori, aisati quiso yoajeitaquee iriori. ¹⁴Itiancaqueri Apa Itomi aca quipatsiquica yoavisacojeitajee, maaroni. Noneajeitaqueri, meeca nocamantacojeitaqueri. ¹⁵Ancanterica: “Irootaque Jesoshi Itomi Tasorentsi”, quiso iroajeitanaquee Tasorentsi. Aisati anquempejeitea arori, quiso avanaqueri: anquempetavacaajeitea maaroni. ¹⁶Ari ayojeitaque inintaquee, ashirejeitacaro. Yashi yoiro inintajeitaquee. Ariorica ashi

ayero anintavacayea arori, quiso avanaqueri Tasorentsi, aisati quiso iroanaquee iriori.

¹⁷Coajicani ancamajaeitaque, iro cantaincha eiro atsaroacaaritsi Tasorentsi. Ariorica aveshireimenteari, aytanaque anintasanojeitaqueri arori, aitaque amoncaratacari iriori Jesoquirishito.

¹⁸Ariorica ayojeitaque inintajeitaquee, eiro atsaroacaaritsi. Ariorica inintasano-jeitaquee catsini, ¿jaoca ancanteari antsaroacanteariri? Ayojeitericame iroasanquejeitaquee, aitaque antsaroaca-yeareime. Yora tsaroacaariri Tasorentsi, tequeratsita iriote irinintasanoteri.

¹⁹Ijivataquee Tasorentsi inintajeitaquee, tsame meeca anintajeiteri arori. ²⁰Incanteeterica: “Nonintiri Tasorentsi”, iro cantaincha inquisheririca ishaninca, tseyari ini. Terica irinintajeiteri ishaninca iriori, tecatsi incanteri irininteri Tasorentsi. Pineaquero, terica irimatero irininteri ishaninca ineapinitiri, ¿jaoca incanteari irinintanteariri Tasoren-tsi? Te irineeriji irinti. ²¹Jero oca icantajeitaqueeri Quirishito: “Ariorica anintiri Tasorentsi, aisati anquempeteri ashaincappee, anintajeiteri”.

Ocarataque mava iotacaajeitaqueeri Quirishito ini Jesoshi.

5 ¹Ariorica ayojeitaqueri Jesoshi iriotaque Quirishito, aitaque yashijieitaquee Tasorentsi. Ariorica anintiri Apa, anintiri aisati Itomi. ²Ariorica anintiri Tasorentsi, anquemisantero icantaqueeri, ayotanteari anintajeitiri maaroni yashijieitacari. ³Ariorica anintasanotiri Tasoren-tsi, anquemisanteri icantaqueeri. Te ompomerentsitasanoteaji anteneri icantaqueeri. ⁴Ariorica yashijieitaquee Tasorentsi, eiro aijatiritsi tseencantatsiri. Iro caari aijatantari, aquemisantaqueri Tasorentsi. ⁵¿Janica caari oijatiri tseencantatsiri? Tempa yora iotiriri

Jesoshi, cantatsiri: "Iriotaque Jesoshi Itomi Tasorentsi".

⁶Peerani, ipocantacari Jesoquirishito quipatsiquica, ivaotisataca aisati icamimentajeitaquee, ayojeitancari Quirishito ini. Te apatiro ivaotisataca, aisati icamimentajeitaquee. Aisati oamejeitaquee Ishire Tasorentsi jaoca icantari. Tampatica oamejeitaquee.
⁷Ocarati mava iotacaaqueeri Quirishito ini: ⁸Ishire Tasorentsi, ivaotisataca Jesoshi, aisati icamimentajeitaquee. Omocaratavacaaca, iotacaajeitaquee jaoca icantari Jesoshi. ⁹Tempa ashirejetacaro icamantaqueeri atiri, iro cantaincha yanacojeitaqueri Tasorentsi, queario yoametantaque irinti. Icamantacotasano-taqueri itomi. ¹⁰Ariorica aquemisantaqueri Itomi, aquenqueshiretasanotaqueri. Yora caari quemisantiri Tasorentsi, te irishiretearoji icamantacotiriri Itomi: itseencaqueri Tasorentsi, ijitiri irio tseeyachari. ¹¹Aquemisantaqueri ainti Itomi, irootaque irisavicacantajeitajeerি Tasorentsi anta inampiqui, ancantaitatiyempani. ¹²Aitaque incantaitatiyempani iraneaje inquitequi maaroni iotiriri Itomi. Yorari caari iotiri, tecatsi incantea irisavique anta inquitequi.

Icantiri: "Pinquenquetsatacapiniteri Tasorentsi".

¹³Piquemisantaqueri Itomi Tasorentsi, meeca nosanquenajeitimpido piotanteari pincantaitatiyempani paneer anta inquitequi. ¹⁴Eiro apashiventatsi anquenquetsatayeri: timatsi icoacaaqueeri ancantapi-

niteriri. Ariorica amoncarataquero ayojeitaque ari inquemisantaquee.

¹⁵Ayojeitaque paitarica ancanteriri, inquemisantaquee. Aitaque irimataquee-nero oca ancanteriri. ¹⁶Ariorica pineeri piyemisantaririnte yantaquero caari cameetsatatsi, iro cantaincha terica intseenqueriji Tasorentsi, pincantacoven-teri iroavisacotanteariri. Timatsi yantaqueri pashini tseencantasnotatsiri: ariorica pineacotaqueri, piotanaque irijate irinti Sharincaveniqui. Te noncan-tempiji pincantacoventeri irinti. ¹⁷Te oncameetsateji catsini antayetero caari cameetsatatsi, iro cantaincha eiro ajitashitatsi irijate Sharincaveniqui maaroni antayetirori.

¹⁸Ayojeiti ariorica yashijeitaquee Tasorentsi, te antapinintajeroji caari cameetsatatsi. Yojocacoventaquee Itomi, tecatsi incantee camaari.

¹⁹Ayojeitaque ashanincajeitacari Tasorentsi. Irintiquea maaroni tseencantsatsiri, ipincatsariventajeitaqueri camaari. ²⁰Ayojeitaque ipocaque peerani Itomi Tasorentsi, iriotaque iotacaajeitaqueeri, ayojeitancari yora Tasorentsisanori. Ashanincajeitacari iriori, aisati ashanincajeitacari Itomi, yora Jesoquirishito. Aisati iquempeta-cari iriri, Tasorentsisanori ini iriori. Yoaneajeitaquee, ancantaitatiyempani aneajeitanaje anta inquitequi.

²¹Noamere, piquemisantirocari ijitasorentsitsashiyeetari.

Ari ocarati. Narotaque sanquenajeitim-pirori: *Joa*

YAPIITAJIRO JOA ISANQUENATINIRI IROAMERE

Ivetsajeitari.

^{1,2}¿Ainirompi tsio? ¿Ainirompi, nioti? ³Tecatsimpa oajeitimpine? Narotaque jivatacaajeitaqueriri ayemisantaririnte aca. Niotaque, tsio, aviro icoyeaque Tasorentsi piotantacariri, aisati icoyeajetaqueri pitomipee. Queario, nonintasanojeitaquempi. Te apaniro nonintajetaquempi narori, aisati iquempejeitaca maaroni ayemisantaririnte: inintajetaquempi. Oshequi ashirejeitacaro irineane Tasorentsi, aitaque ancantaitatiyempani, tempa queariotasanotaque ocamantajetaqueeri. ⁴Oshequi inintajetaquee Apa Tasorentsi, aisati itomi, yora Avincatsarite Jesoquirishito, queario oni oca yoamejeitaqueeri. Aisati incantaitatiyempani incavintsajaitee, irineshintoncajeitee, irisavicaacaajeitee cameetsa.

Intime coajica oshequi tseyacotearine Quirishito.

⁴Ari noneayetaqueri aparopee pitomipee, oshequi noveshireimentajetahari. Cameetsa isavicaajeiti, iquemisanta-jeitaqueri queariotatsiri yoamejeitaqueeri Apa Tasorentsi, aisati yantiniri maaroni icoacaajeitaqueeri. ⁵Meeca, noshaninca, nocoaque nonquenqueshire-tacaajempiro intajetaqueero Tasorentsi yoamejeitaqueeri peerani: ocameetsataque anintavacaajeitea, maaroni. Te naro intearone noamejeitimpido oca. ⁶Ariorica aninteri Tasorentsi, amajeiteneri maaroni

icoacaajeitaqueeri. Ari icoacaajeitaquee ashi ayero anintavacaajeitea, maaroni, anquearioventero. Tempa irootaque icantajeitaqueeri peerani.

⁷Itimi meeca oshequi amatavitantsi, yoametantiro tseyantsi, icantajeiti te imponeempaji Jesoshi inquitequi, te iratiritateeji. Aisati icanti te inquempejeiteeji arori, caari ini Quirishito. Yora tseyayacotariri Quirishito iquishiri iriori, te incoyeji anquemisanteri. ⁸Paamayeariya: yamatavitimpicari. Oshequi piqueario-ventaquero pantapinitiniri Tasorentsi icoacaaqueempiri; ariorica pincanteani, eiro patsipetashitarotsi, impinatempি iriori. Iro cantaincha paamayeari yora coatsiri iramatavijeitempi: ariorica pojataqueri, pantsipetearo maaroni pantayevetanariri Tasorentsi, tecatsi impinatempি. ⁹Pojoquiricari Quirishito: eiorica pishiretarotsi yoamejeitaqueeri iriori, te pioteriji Tasorentsi. Iro cantaincha ariorica pincanteani pishiretearo yoamejeitaqueeri, pioteri aisati Iriri: quiso iroajeitanaqueMPI Apa aisati Itomi. ¹⁰Irijatashitempirica atiri iroamejeitempi, piotavaqueri pitarica yoametacotapinitiriri Quirishito. Terica ontampaticate oca icoavetari iroametempiri, eiro paacameetsatavaqueritsi: eiro pisavica- cairitsi pivancoqui, eiro piquemantis-ritsi catsini. ¹¹Ariorica paacameetsatavaqueri, pishanincajeitacari: aitaque

pincarajeitaqueri poametanero
tseeyantsi. Te oncameetsateji catsini.

Ivecarataquero isanquenare.

¹²Timatsiquera oshequi pashini
nocoaque noncamantajeitempi, iro
cantaincha te noninteji nosanquena-
tempiro. Nocoaque nojate noneempi.

Ariorica aneavacaajeitea, noncaman-
tasanotempiro maaroni. Aisati
anquimoshirejeitanaque maaroni.

¹³Ainiro aca otomipee pireento.
Tempa iriojeitaque icoyeaqueri
Tasorentsi. Ivetsajeitaquempi. Ari
ocarati.

Narotaque sanquenatimpiori: *Joa*

MAVATAPAAQUE ISANQUENATINIRI JOA IROAMERE

Ivetsatari Joa Cayo.

¹¿Ainirompi Cayo? ¿Tecatsimpa oyempine? Narotaque Joa, jivatacaaajeitiriri ayemisantaririnte aca. Queario, oshequi nonintaquempi.

Cameetsa pintacotapiniteari
ayemisantaririnte.

²Noncamantempi, nonintane, nocantacoventapinitaquempi: nocantiri Tasorentsi intasoncacoventempi cameetsa pisavicanterari. Niotaque piquemisantsanotaque, aisati nocantacoventimpi pishintsivatsatasanotanteari. ³Ainiro areejitachari ayemisantaririnte, icamantapaqua quena piquearioventiro pisaviqui cameetsa, aisati piquemisantsasanotaqueri Tasorentsi, irootaque noquimoshireimentantaquempi. ⁴Ariorica noquemacotaqueri noshaninca iquemisantsasanotaque, aitaque noquimoshiretasanotaque.

⁵Nonintane, piquearioventaquero picavintsaajeitaqueri ayemisantaririnte, pitsoteaqueri: yora poneayetachari pashinipeequi nampitsi, maaroni. Cameetsataque. ⁶Icamantajeitaquena maaroni ayemisantaririnte aca, oshequi pinintajeitavaqueri. Ariorica irareetajempি aisati pinampiqui, ocameetsataque pintacoteari; ariorica irijatanaje, pimpajeitavajeri coiteimojeitariri: irootaque icoacaquempi. Tasorentsi. ⁷Iquenaquenayetanaque iquenquetsataco-

tapinitiri Jesoquirishito, tecatsi incoacojeiteri yora caari quemisantatsi, ⁸irotaque ocameetsatantari intacojeiteari arori, amitacojeiteri inquenquetsatero irineane Tasorentsi: tempa queariotasanotaque ocamantayetaqueeri.

⁹Timatsi nosanquenavetanariri ayemisantaririnte anta, iro cantaincha te impincatsatenaji yora Irioterejeshi. Icoaveta irijivatacanteme iriori.

¹⁰Ariorica nareejeitempi nonquenqueshitretacaajeitapaaquempi jaoca icantari: itseeyacotaquena, icantimataquena. Aisati, ariorica yareevetari ayemisantaririnte anta, te irineshinoncavatavaqueriji. Aisati iquisaqueri yora neshinoncavatavaqueriri areejitachari, aisati te irintacaajeiteriji incarajeiteri inquemisantajeite.

¹¹Nonintane, te oncameetsateji catsini oca yantayetaqueri yoranqui: eiro piquempetaritsi. Iranti pinquempetea antirori cameetsatasanoyetatsiri. Yora antapiniyetirori cameetsatatsiri, iotiri Tasorentsi; yora antapiniyetirori caari cameetsatatsi, te irioteriji. ¹²Queario, icameetsatasanotaque Irimitirio. Tempa ineacameetsajeitaqueri quemisantajeitsiri aca, aisati noneacameetsataqueri, aisati avirori pineacameetsataqueri.

¹³Timatsiquera oshequi nocoaque noncamantempi, iro cantaincha te noncoyeji nosanquenatempiro.

¹⁴Naamaaca irotaintsi noneempi: ariorica

aneavacayeа nontsoteaquempiro,
noncamantempiro maaroni.¹⁵ Cameetsa-
yeа pisavique. Ivetsajeitaquempi ashani-

capee аса. Aisati ashanincapee аra,
novetsajeitari, maaroni.
Narotaque sanquenatimpiori oca: *Joa*

YORA JORASHI ISANQUENATINIRI IYEMISANTARIRINTE

Ivetsajeitari Jorashi iyemisantaririnte.

¹¿Ainirompi, noyemisantaririnte?
¿Tecatsimpa oajeitimpine? Narotaque Jorashi sanquenajeitimpiori oca, narotaque antaveetiniriri Jesoquirishito; narotaque irirenti Santiaco. Ari niotaque icoyeajeitaquempi Apa Tasorentsi, irootaque piquemisantajetantariri, aisati oshequi inintajeitaquempi. Iquempoyeaventajeitaquempi, pineanteariri coajica Jesoquirishito. ²Nocoaque incavintsaaejitempi, cameetsa irisavacacaajeitimpie. Aisati nocoaque paacameetsatavacaajeitea maaroni, pinintavacaajeitea.

Icantiri: “Paamayariyea coatsiri
iramatavitempi”.

³Piojeitaque oshequi nonintajeitaquempi. Tempa yoavisacojeitaquee Tasorentsi. Meeca noquenqueshirevetaca noncamantempime jaoca icantajeitaqueeri: itasoncaventajeitaquee, icavintsaajeitaquee, maaroni; iro cantaincha meeca eiro nocamantimpotri oca. Timatsi meeca pashini noninti noncamantempiri, irootinti. Nocoacaquempi pinquearioventero pinquemisantero yoamejeitaquempi Tasorentsi, te ompashinitapiniteoji. Eiro piquemisantiritsi yora itsipapee coajeivetachari iramatavijeitimpime. ⁴Ainiro yora cantatsiri: “Noquemisanti”, iro cantaincha yamatavitanti. Ioti icavintsaajeitaquee Tasoren-

tsi, yoavisacojeitaquee. Meeca icantashijeitaquempi yoranqui: “Cameetsa antajeitaquero paitarica acoajeitiri, iro iquisheetsi Tasorentsi”, iro cantaincha irootinti yamatavitanti. Te impincatsajeiteriji Avincatsarite Jesoquirishito, irootaque irijatanteari Sharincaveniqui. Tempa irootaque ocantiri Sanquenarentsi.

⁵Timatsi piotasanojeitaqueri, iro cantaincha noninti nonquenqueshiretacajempiro aisati. Peerani oshequi yashinoncajeitaca maaroni joriopee anta Ejipitoqui, iro cantaincha yoavisacojeitaqueri Tasorentsi, yaajeitanaqueri pashini qui patsi. Iro cantaincha iconoajeitacari joriopee tseenquiriri Tasorentsi, irootaque yoantacariri iriori. ⁶Aisati itimaveitani inquitequi inampirenii Tasorentsi, icameetsaveitani catsni, iro cantaincha ipiatsatcacari Tasorentsi. Meeca te irisavacajeji anta ocameetsaite-tinta, ainti yojocacheri Tasorentsi oshaaviji, anta otsitenitasanotinta. Aitaque isavicaqueri irosati incantacoventanteariri, iroasanquetasanotanteariri. ⁷Aisati iquempejeitaca yora soromasatini aisati comorasatini, aisati maaroni ishanincapeeni iriori: oshequi yantajeitaquero caari cameetsatatsi. Yantajeitaquero iashianepee, itsinampaavacaajeitaca, maaroni. Ari yoasanquetaajeitaqueri Tasorentsi, maaroni; irootaque ayojeitan-tacari otimi Sharincaveni, iroasanquetaa-

jeitanteeariri maaroni antapinitirori caari cameetsatatsi: incantaitatiyempani inquematsicatearo paamari.⁸ Iro cantaincha te inquenqueshireteaji yora amataviantatsiri. Icantani yantayetaquero iashiane, itsinampavacaaca; itseencaqueri ivincatsarite, ishirontimentajeitacari; icantimajeitaqueri yora inampirepee cameetsari Tasorentsi.

⁹Peerani icanteetini: icamantacaniri Moishishi, icoaveta Satanashi iraanaquerime anta Sharincaveniqui. Aisati iquempetaca Miyeri, yora ivincatsarite inampirepee Tasorentsi: icoaveta iraanaquerime iriori inquitequi. Ari icantavacaaca apite. Ari yora Miyeri oshequi itsaroacaari Satanashi, oshequi ipincatsataqueri, irootaque caari ipiatsatantari. Apatiro icantiri: "Irinti Tasorentsi piatemppineri". Irootaque icantaquerirri.

¹⁰Noshaninca, yora amatavijeitimpiri te iriojeiteji irisavique cameetsa, iro cantaincha icantimajeitaquee arori ariorica atimi cameetsa. Te aneeroji iotantari, iquempejeitacari avira: yantashijeitaro paitarica icoiri. Irootaque iroasanquejeitanteeariri Tasorentsi,

¹¹irashinoncaajeitaquea. Iquempejeitacari yora Caini, yora oiriri irirentini. Iquempejeitacari yora Varama: ipinayee-tiri quirequi, irootaque yantarorri caari cameetsatatsi. Iquempejeitacari aisati yora Core: ipiatsatacari peerani Moishishini. Tempa iroasanquejeiteri Tasorentsi, maaroni.

¹²Pamene, ariorica papatopapinita poajeita, picoajeiveta pinintavacaajeiteame, pincavintsaavacaajeiteame. Iro cantaincha icarajeitaquempi yoranqui, caari pimatasanotantaro cameetsa. Te irioteji iriori impashiventea, oshequi yoajeitaca, te inquenqueshireteriji itsipajetari. Oshequi ineaveetashita, vero, vero, iro cantaincha te iramatacojei-

tempiji. Iquempetacaro mencori amatavijetimpiri: amavetaro antearo tampea, pijitashijeiveta ompariye incani, iro cantaincha, te. Iquempetacaro inchato caari timatsi oitsoqui, te oncanteji, ocameetsati anchaquiero, amponquitireajero, antaalero.¹³ Tempa pineapinijeti-tiro otsapijaqui opitsishimoretaque, te pineacameetsateroji: ari iquempejeitari iriori, te oncameetsateji yantayetiri, oncameetsateme impashiventeari. Pishiaccantavetacari impoquiro iotacaimpiri jaoca pinqueneri, iro cantaincha yamatavijeitaquempi. Irijatanaque iriori anta otsitenitasanotaque, incantatatiyempani irisavique.¹⁴ Peerani catsini iquenquetsatacotaquerini Enoco, yora ishanincani Aran, icantini: "Pamene, coajica impoquie Avincatsarite, incarajeiteri oshequi catsini inampirepee.

¹⁵Iroasanquetaajeitapaaqueri maaroni caari cameetsajeitatsine. Iriojeiteri maaroni tseencajeitiriri: ipiatsajeiveta-cari, icantimajeiveta-cari, irootaque iroasanquetaajeitanteeariri".¹⁶ Ari quisashirejeitanaca, icantimajeitaqueri ishaninca, icoasanotaque irantapinitero caari cameetsatatsi, oshequi ishemejeitaque. Ipincatsatamempeashitacari ishaninca iramatavitanterari.

¹⁷Ari, noshaninca, oshequi nonintajeita-quempi, irootaque nocoacantimpiori pinquenqueshiretasanotero icantayetimpiri itiancanepée Avincatsarite Jesoquirishito.

¹⁸Tempa icamantajeitaquempini: "Coajica pineasanojeitavaqueri tseencantasanotatsiri, irantashijeitaro paitapeerica icoaqueri iriori".¹⁹ Iriojeitaque amatavijeitiriri itsipapee, irootaque quisavacaajeitancacari; oshequi itseencantajeiti, te quiso oyeri Ishire Tasorentsi.

Icamantiri Jorashi icoacaqueriri.

²⁰Ari, nonintane, pinquemisantsanojeiteri avinti Tasorentsi, impojji pimatasanojeitero

pintime cameetsa. Pincoasanotero Ishire oametasanojeitempi pinquenquetsatacayeri.
²¹Pincoasanajeite irinintajeitempi Tasorentsi. Piojeitaque incavintsaaajeitempi Avincatsarite Jesoquirishito, iraajeitanaquempi anta inquitequi, pincantaitatiyempani pisaviquimo-jeiteri. ²²Pincavintaasanojeiteri yora caari iojeitiri Tasorentsi, poametasanojeiteri.
²³Poavisacojeiteri pishaninca, itaacari anta Sharincaveniqui. Queariomphia, piquempetari-
 cari yora piquemisantacaajeitaqueri. Eiro pantimatirotsi catsini caari cameetsatatsi yantajeitiri iriori.

^{24,25}Tempa timatsi Tasorentsi apaniro, aisati iriori Avincatsarite Jesoquirishito:

yora oavisacojeitaqueeri. Ainiro itasorenca irinti, iquempoyeasanojeita-
 quempi eiro pantimatantarotsi caari cameetsatatsi. Iraajeitanaquempi inquitequi: anta ocameetsaitetasanota-
 que catsini. Aitaque anta anquimoshire-
 ventajeitapajjeri, maaroni. Tsame meeca ancantajeiteri atiri: “Icamee-
 tsatasanoti Novincatsarite, ipincatsarita-
 sanoti, itasorentsisasanoti”. Aitaque ancantatiyempani ancamtapinijeiteri itsipapee, eiro ajocajirotsi. Aitaque ancantaitatiyempani.

Narotaque sanquenajeitimpiori:
Jorashi

ICAMANTIRI TASORENTSI JOA PAITARICA IRANTAYETERI JESOQUIRISHITO.

Intanacaro Joa isanquenare.

1 ¹Intasanotacaro Tasorentsi, icamantaqueri Jesoquirishito, impoiji yovaajiniri iriori inampire, impoiji iriori yovaajanaro narori, meeca novaajeitempiro avirori. Nopincatsataqueri Tasorentsi, aisati piquempejeitaca, pipincatsajetaqueri avirori; meeca icamantajeitaquee paitarica iranteri Jesoshi: eiro osamanititsi irimatantearori. ²Ari oshequi iotaca aquena Tasorentsi aisati Jesoquirishito: ainiro icamantaquenari aisati inijaque nari. Meeca noncamantajeitempiro jaoca ocantari. ³Iroimoshirencajeiteri Tasorentsi maaroni neanateroneri oca nosanquenajeitaquempiri aisati maaroni quemajeitavaqueroneri. Iro cantaincha eiro iquemashitarotsi, irointi irimatasonoterocantaqueriri inquimoshirentanteari. Pamene, eiro osamanititsi irimatantearori Jesoshi maaroni oca noquenquetsatacotirri.

⁴Narotaque Joa sanquenatirori oca. Nosanquenajeitaqueneri savicajeitatsiri anta Ashiaqui, aisati iriori yora quemisantajeitatsiri anta ⁷ nampitsipeequi. ¿Ainirojeimpi, maaroni? Ainiro Tasorentsi iriori, irosati icanta: itimini peerani, irosati meeca; irosati incanteani, coajica. Nocamantaqueri: “Pincavintsaajeiteri noyemisantaririnte anta Ashiaqui, cameetsa pisavicacaaajeiteri”. Irosati nocantaquerori Ishire, ora quiso oiriri

ipincatsariventanti. ⁵Irosati nocamantaqueriri Jesoquirishito: tempa cameetsayovaajeitaqueero arori icantaqueriri Tasorentsi. Iriotaque nijantajirori itinaanaja, aisati ipincatsariventajeitiri pincatsarivetachari aca quipatsiquica. Oshequi antajeivetacaro caari cameetsatasi ajajeitanteameri Sharincaveniqui, iro cantaincha oshequi ineshinoncajeita quee, yaparajatimentaqueero iriraja, yoavisacojeitantaqueeri. ⁶“Icantajeitaquee: “Pincarajeitena ampincatsarijeitaje, aisati pinquenquetsatacapineri Apa: pincanteri iramatacojeiteri piyemisantari rinte”. Tsame ampincatsatasanojeiteri maaroni, ancantaitatiyempani. Aitaque ancantajeiteari.

⁷Pamene, inquenapaaje mencoriqui, aitaque aneajeitavajeri maaroni. Aisati irineajeitavajeri pajacojeivetacariri peerani. Ari intsaroacaajeitavaqueari maaroni tseencajeitiriri, iriraajeitana quea, jii, jii. Queario, aitaque oncanteari. ⁸Te impashinitapiniteji Avincatsarite, itasorentsitaque, irosati icantani: peerani, aisati meeca, aisati coajicani. Icanti: “Narotaque intacarori maaroni, aisati narotaque vecarayeroneri maaroni”.

Ijivataqueri ineakeri Joa.

⁹Ari, noyemisantaririnte, aquempetava caajeitaca: aquemisantajeitaqueri Jesoshi, irootaque yoashinoncaapinijeitantaqueeri tseencajatsiri. Ipincatsariventajeitaquee

Jesoshi, irootaque amavejeitancarori. Noquenquetsatiro irineane Tasorentsi aisati noquenquetsatacotaqueri Jesoshi, irootaque yojocanteetaquenari aca ovoyejaqui ipajiyetiri Patimoshi.¹⁰ Ari tomincoqui noquenqueshiretasanotaqueri Tasorentsi, irosati noquemantacariri iquenquetsatacaquena. Antearojenca ineanataquena, iquempetacari tiorentsi; jajencaitaque irineane,¹¹icantaquena:

—Pisanquenatero maaroni nonijaayetempiri, impoiji pimpacanteri quemisantajeitatsiri anta Ejesoqui, Eshimirinaqui, Perecamoqui, Tiatiraqui, Sarireshiqui, Jirarerejiaqui, jero Araoriseaqui. Ocarataque inampipee 7.

¹²Nopitsocashitanacari yora quenquetsatacaquenari; ari noneaquiero onantari veera, ocarataque 7, yovetsiqueetiro oro. ¹³Nianqui noneaqueri isatecaca quempetariri Jesoshi, yora poneainchari inquiequi peerani, iquempetapaaca yatiritantapAACaniri. Iquitsaataro tsantsashitsari iitsaare, onaque inejiqui quempevetarori ishicitatsaquito, yovetsiqueetiro oro. ¹⁴Oquitamaroishitasanoque iishi, oquempetacaro ampeji aisati sharaca: quitamaro catsini. Oquempetacaro iroqui paamari amorequi. ¹⁵Oshipaquireaque iiti, oquempetacaro ashirotsatsiri saancanatatsiri. Antearojenca ineanati, iquempetacaro oshequi ovarijare antearo, sooo. ¹⁶Yajiricaqueri iracosanoriqui 7 impoiquiro; ocontetapaaque ivantequi ivesamento, otsaampiti apite omititsaqui; oshipaquireasanotaque ivoro, oquempetacari catsirinaiteri, ishipaquireasanotaque, shipaquirerere. ¹⁷Noneantacariri, notaanaque iitiqui, toren. Oquempetaca nocamaque. Ipamitaquena iracosanoriqui, icantaquena:

—Eiro pitsaroacaanatsi, narotaque intasanotacarori maaroni, aisati narotaque vecarayerone maaroni. ¹⁸Naro aneasanotatsiri. Nocamasanovetaca, iro

cantaincha naneanaji aisati; meeca noncantaitatiyempani nanee. Eiro nocamajitsi aisati. Narotaque cantajeiterine ariorica incame atiri, eioricica icamitsi; narotaque cantajeiterine janicarica jatatsineri inquiequi aisati janicarica jatatsineri Sharincaveniqui. ¹⁹Meeca pisanquenatero oca pineaqueri, aisati pisanquenatacoteri nantayeteri coajica. ²⁰Meeca noncamantempiro caari pioti incaranqui. Pineaqueri impoiquiro najiricaqueri: ishiaqueri yora jivatacaajeitiriri quemisantajeitatsiri anta 7 nampitsipeequi. Meeca piotaque nopincatsariventajeitiri. Aisati ora onantari veera: oshiaqueri maaroni quemisantajeitatsiri anta nampitsiquinta. Meeca piotaque quiso noajeitanaqueri.

Isanquenajeitiniri quemisantajeitatsiri anta Ejesoqui.

2 ¹Jero aisati icantaquenari Jesoshi: —Jero oca pisanquenaterirori yora jivatacaajeitiriri quemisantajeitatsiri anta Ejesoqui: “Meeca noncamantempiro icamantaquenari yora ajirirquiriri impoiquiro iracosanoriqui: yora aniiatsiri anta onantariqui veera, caratatsiri 7. ²Icantimpi: ‘Niotaquiero pantayetaqueri, niotaquiero pipomerentsiventaquenaro nocoacaimpiri, te pishemearoji. Niotaquempi te pishinetimateriji piyemisantaririnte irantapinitero caari cameetsatatsi. Ainiro jatashivetimpiri cantashitachari: “Narotaque itiancane Quirishito”, iro cantaincha piotaqueri iramataviterime quemisantatsiri: niotaque te pishineteriji inquenquetsatacayempi. ³Niotaque oshequi pineacatsitimentaquena, iro cantaincha te pishemearoji, te pojocajeroji pantayetaquenari. ⁴Iro cantaincha ainiro pojocajeroji aparо: peerani pinintasanovetaquena; meecari, meeca te pinintasanotenaji. ⁵Pinquenqueshirejeitea jaoca picantaniri peerani; te

pinquempejeiteaji meeca. Pinquenqueshi-rejeitea pinquempejeitanteari peerani, iroqueran iquemisantajeitaque. Pinquenqueshireempa, pinintasanojeita-jena aisati. Eiroricá pinintajanatsi, nojatashitimpicari, notsoncajeitimpicari.⁶ Iro cantaincha timatsi noneacameetsa-tantimpiri: te pineacameetsaterojo yantayetaqueri oijajeitiriri Nicorashi, yantashiyetaro caari yai. Aisati narori, te noneacameetsaterojo yantajeitiri.⁷ Otimirica piquemantari, pinquemava-quero oca nocamantaquempiri. Peerani otimini EreQui inchato oaneantatsiri: arioricame iroyearome peeraniniri, incantaitatiyempanime iraneeme. Meeca ainiro quempevetarori anta ocameetsaite-tinta, anta Tasorentsiqui. Ariorica cameetsa pisavicajeite aisati pimatapini-taquerenaro nococaimpiri, onquempeta-quea poaquearo inquitequi oaneasanojei-tempineri: queario pincantaitatiyempani pisavicajeite anta inquitequi”.

Irootaque isanquenatacaaquerenari Jesoshi.

Isanquenajeitiniri quemisantajeitatsiri anta Eshimirinaqui.

⁸Aisati icantaquena Jesoshi:

—Jero oca pisanquenajeiteneriri yora jivatacaajeitiriri quemisantajeitatsiri anta Eshimirinaqui: “Meeca noncamantempiro icamantaquenari yora intasanotacarori maaroni, vecarayeroneri maaroni. Icamaque peerani, impoiji itinaanaja.⁹ Icantimpi: ‘Niotaquero pantayetaqueri, niotaquero oshequi picatsitimentaquena, niotaquero pashinoncaimentaquena: iro cantaincha eiro pipeacotarotsi nompina-tasanotempi anta inquitequi. Niotaque oshequi icantimajetaquempi yora shiavetariri quemisantatsiri. Icantaniro-jeiveta: “Noquemisanti”. Jaaquea narori, te inquemisantajeitenaji, irinti iquemisan-taniroti Satanashi.¹⁰ Queario, oshequi

pinquematsicatearo, iro cantaincha eiro pitsaroashiretsi. Yora camaari iroimin-queaarantacantempi caravosoqui, icoaque iriotantempi queariorica piquemisantasanaquena. Oncarate 10 quitaiteri oshequi pineacatsiyetearo paitapeerica. Pinquearioventenaro maaroni nocamantaquempiri, irosati pincamanteari; impoiji nompinatasano-tempi, aisati pincantaitatiyempani panee anta nonampiqui.¹¹ Otimirica piquemantari, pinquemavaquero oca nocamanta-quempiri. Ariorica cameetsa pisavique aisati pimatapinitenaro nococaimpiri, eiro pijatitsi avirori Sharincaveniqui”.

Irootaque isanquenatacaaquerenari Jesoshi.

Isanquenajeitiniri quemisantajeitatsiri anta Perecamoqui.

¹²Aisati icantaquena Jesoshi:

—Jero oca pisanquenateneriri yora jivatacaajeitiriri quemisantajeitatsiri anta Perecamoqui: “Meeca noncamantempiro icamantaquenari yora ashitarori ivesamento, tsampitatsiri apite omitsa-qui.¹³ Icantimpi: ‘Niotaquero maaroni pantayetaqueri, niotaque ara pisaviquira itimi aisati oshequi pincatsatiriri Satanashi: queario isaviquimojeitimpri oriori. Niotaque piquemisantasanaquena, te pojoquenaji. Peerani itimini pinampiqui Antipashi: yora quenquet-satacotanari, antanarori maaroni nococai-riri. Pineacojeitaqueri yoyeetaqueri, iro cantaincha te pojocajeiteroji piquemisan-taquerenaj. ¹⁴Iro cantaincha ainiro pantaye-tiri caari noninti. Noshicantempiro: ainiro yoametaqueriniri Varama peerani Varaca; impoiji oriori yantacaajeitaqueri pijoriorinteni caari cameetsatsatsi: ipincatsatashijeitaro yovetsicayetiri atiri aisati yantapinijetiro caari yai. Ainiro meeca picarajeitiri shiaqueriniri yora Varama: yantacaarantaquempi pipinca-

tsatashiyetaro yovetsicane atiri aisati pantashiyetaro caari pai.¹⁵ Queario iriojeitaque oijajeitiriri Nicorashi. Te oncameetsateji yantajeitaqueri: yantacaa-jeitimpicari yantayetiri iriori.¹⁶ Pinquen-queshirejeitanaquea, eiro piquempetatatsi chapinqui. Eirorica pojocajeitirotsi pantayetiri, nojatashijeitimpicari nompoyereajeitapeempi. Ainiro novesamento novantequi nompesajeitan-tapeempi, peti, peti, peti.¹⁷ Otimirica piquemantari, pinquemavaquero oca nocamantaquempi. Ariorica cameetsa pisavique aisati pimatapinitaquenaro noocoacaimpiri, nompaquempi poyeari caari conijatatsi, oquempetaca nopashi-jeitacari peeraniniri mana. Aisati nomperi quitamarori mapi, nosanquena-tero mapiqui ivajiro iroquerer: iriotero iriori ivajiro, iro cantaincha eiro iotirotsi itsipapee’.

Irootaque isanquenatacaaquerenari.

Isanquenajeitiniri quemisantajeitatsiri anta Tiatiraqui.

¹⁸Aisati icantaquena Jesoshi:

—Jero oca pisanquenateneriri jivataca-jeitiriri quemisantajeitatsiri anta Tiatiraqui: “Meeca noncamantempi icamantaquenari Itomi Tasorents: oquempetacaro iroqui paamari amorequi, aisati oshipaquireaque iiti, oquempetacaro ashrotsatsiri saancanata-tsiri.¹⁹ Icantimi: ‘Niotaquero pantayeta-queri. Niotaque pinintavacaajeitaca, piquemantajeitaquena, pintacojeitacari pishaninca, piquearioventaquenaro maaroni noocoacajeitaquempi. Aiquero pijatatiye pimatasaonejitaquero.²⁰ Iro cantaincha ainiro pantiro caari noninti: pishinetaquero ora Jesavere oamejeitaqueri quemisantanari yantayetantacarori caari yai aisati iquemisantantacarori yovetsicayetiri atiri. Ocantaveta: “Noquenquetsatacotpinitiri Tasorents”, iro cantaincha amatavitapinijeitaqueri quemisantajeitanari.²¹ Noyeaveta-

caro onquenqueshireanajeame; iro cantaincha te oncoyeli onquenqueshirete, te oncoyeli ojocayetajero antayetiri caari ai.²² Meeca noncamantempi: nojouquitaca-yeato, aisati eirorica iquenqueshireajeitatsi yora quemisantajeitirori, noashinoncaasano-jeiteri iriori catsini.²³ Queario noajeiteri maaroni oijajeitirori Jesavere, nontsoncajei-teri, maaroni. Impoiji iriojeitanaque maaroni quemisantajeitatsiri niotaquero maaroni iquenqueshirejeitiri atiri aisati niotaquero maaroni icoajeitaqueri. Ocamee-tsatirica pantajeitaqueri, aitaque noncavintaasanojeitempi; iro cantaincha terica oncameetsateji, aitaque noashinoncaajei-tempi.²⁴ Yorari pitsipapee, caari quemisantiro Jesavere, aisati caari antasanotiniri icantavetariri Satanashi, tecatsi noncantajei-teri;²⁵ irointi incanteani inquemisantena irosati nareetantapajeari.²⁶ Ariorica pimatapinitaquenaro maaroni noocoacaa-quempi irosati nareetantajeari, ari nompeajempi pincatsariventajeiterineri oshequi atiri.²⁷ Oquempetaca narori, icantaquena Apa noppincatsaritancacari, aisati noncantempi avirori pimpincatsarita-sanotantanaqueari. Ariorica ompariaque coviti, omporocapaaque maaroni, poyere; aisati pinquempetacea avirori: pimpoyereajei-tajeri maaroni caari quemisantajeitana, poyere.²⁸ Pimpincatsaritasanotanaque, oshequi noaneenquempi, pinquempeteari impoiquiro anteariteaquiri.²⁹ Otimirica piquemantari, pinquemavaquero oca nocamantaquempi”.

Irootaque isanquenatacaaquerenari Jesoshi.

Isanquenajeitiniri quemisantajeitatsiri anta Sarireshiqui.

3 ¹Impoiji aisati icantaquena Jesoshi:
—Jero oca pisanquenateneriri jivataca-jeitiriri quemisantajeitatsiri anta Sarireshiqui: “Meeca noncamantempi icamantaquenari yora quiso oirori Ishire Tasorents: yora ajirquiriri 7 impoiquiro.

Icantimpi: 'Niotaquero maaroni pantayetaqueri; ijitashiyeevetimpi avirojeitaque quemisantincari, iro cantaincha niojeitimpi nainti oshequi pitseenqui. ²Queariompia, pitseencasanotajicari, pijaticari Sharincavenequi. Te onimoteariji Tasorentsi pantayetaqueri. Piquemisantaveta: pinquenqueshirejeitea meeca pinquemisantasanotanteari. ³Pinquenqueshiretasanotanajero noneane piquemaqueri peerani: pishiretasanotanajero, pinquenqueshiretanajea. Eirorica piquemisantasanotajana, nojatashitempi, noasanquetayempi. Te piojeiteji jaoca oncarate nojatashitatempi: noquempeta-
cari coshinti, te pioteji jaocarica oncarate irijatashitatempi incoshitatempi. ⁴Oshequi pitseencantajeiti, iro cantaincha ainiro timaarantantsiri quemisantaquenari: cameetsa isavacajeiti irinti. Pantajeitaquero caari cameetsatsati noshiacantaquempiro piquipatsitiro piitsaare; irintiquea quemisan-
tanari, te inquipatsiteroji iitsaare; nonequero oquitetaque, oquitamarotasano-
taque. Queario icameetsataque noneacamee-
tsatantacariri. ⁵Maaroni antajeitaquerori
nocoacajeitaqueriri inquitsaataquearo ora
quitamarotasanotatsiri catsini. Ainiro
osanquenataca ivajiropee maaroni savicatsi-
neri inquitequi. Nompeajero ivajiropee
tseencajeitanari, iro cantaincha eiro
nopeajirotsi ivajiropee antirori maaroni
nocoacairiri. Aisati noncamanteri Apa:
"Iriotaque yoca quemisantaquenari". Irosati
noncamantajeiteriri maaroni inampirepee.
⁶Otimirica piquemantari, pinquemavaquero
oca nocamantajeitaquempi".

Irootaque icantajeitaqueriri Jesoshi
sarireshisati.

Isanquenajeitiniri quemisantajeitatsiri anta Jirarerejiaqui.

⁷Aisati icantauena Jesoshi:
—Jero oca pisanquenateneriri
jivatacaajeitiriri quemisantajeitatsiri anta
Jirarerejiaqui: "Meeca noncamantempiro

icamantaquenari yora cameetsatasanota-
tsiri, yora Quirishitosanori. Iriotaque
ishanincani Iravirini, impincatsariventas-
anote. Incanterica: 'Intsipatena yoca',
eiro itimitsi tsaneemparine. Incanterica:
'Eiro itsipatanatsi yora', tecatsi areetaca-
yearine. ⁸Icantimpi: 'Niotaquero pantayetaqueri. Peerani nocoacaitaquempi:
"Pinquenquetsatero noneane, namitaco-
tempi". Ari pimatitaquenaro, irosati
meeca pimataquenaro: tecatsi incantee-
tempi iroimajerenteetempi. Te pishequi-
jeiteji, aisati te pimpincatsarijeiteji, iro
cantaincha piquearioventajeitaquenaro
nocantajeitaquempi. Picantajeitaqueri
atiri: "Noquemisantaqueri Jesoquiri-
shito", te pimpashiventacayenaji. ⁹Ainiro
ashaninca quemisantiriri Satanashi,
irootaque iquisantaquempi, iro cantain-
cha icantashita: "Noquemisantiri
Tasorentsi". Te inquemisanteriji,
itseyani. Coajica nareetacaajeitajeari
aviroriqui intiyeroashitantaapeempi,
impincatsatashitantaapeempi: iriojeitana-
que oshequi nonintajeitaquempi.
¹⁰Yoashinoncaajeivetaquempi, iro
cantaincha piquearioventaquero nocanta-
quempi, te pishemearoji, irootaque
nojocacoventantaquempi. Coajica
noneantajeiteari maaroni savicajeitatsiri
quipatsiqui niotanteari jaoca icantajeita.
Ompomerentsitimojeitaqueari maaroni
atiri; iro cantaincha, queario nojocacov-
entajeitempi. ¹¹Pamene, eiro osamaniti-
tsi nareetantajempire. Pincanteani
pinquemisantajeite, impoiji tecatsi
tsaneavaquempine pijatanaque inquite-
qui; pisavicapaa je anta, pincantaitatiyem-
pani. ¹²Ariorica pimataquenaro maaroni
nocoacajeitaquempi, ari nosavicacaa-
sanotempi anta itiminta Tasorentsi: eiro
pipiagatsi aisati. Nosatoncaatemp
pivancainaqui ivajiro Tasorentsi
iriotanteeteari pishanincatacari. Aisati
nosatoncaatemp ovajiro inampi Tasoren-

tsi: ora Jerosare iroaquerari poneachaneri inquitequi. Impoiji iritantateeteari pinampitaro avirori. Aisati nosatonca-tempi novajiro narori, iroqueratajantsiri, 13 Iritantateeteari ashanincatavacaajeitaca. Otimirica piquemantari, pinquemava-quero oca nocamantaquempiri”.

Irootaque isanquenatacaaquesunari Jesoshi.

**Isanquenajeitiniri quemisantajeitatsiri
anta Araoriseaqui.**

14 Aisati icantaquena Jesoshi:

—Jero oca pisanquenajeiteneriri jivatacaajeitiriri quemisantajeitatsiri anta Araoriseaqui: “Meeca noncamantempiro icamantaquenari yora Queariotasanota-tsiri, ovaajeerori ora icantaqueeri Tasorentsi: irootaque Quirishitosanori. Irootaque intarori yovetsicantaque: imataquero maaroni icantaqueriri Tasorentsi. 15 Icantimpi: ‘Niotaquero maaroni pantayetaqueri. Pinquearioventanarome nocoacaimpiri, noshiacantem-pime catsirincajari; pintseencasanote-name, noshiacantempime catsincajari. Niotaque te pinquearioventenaroji nocoacaimpiri, iro caintaincha te pintseencasanotenaji; irootaque noshiacantantaquempirori saavajari. Eirorica picoi pincatsirincajate, ari pincatsincajate; aisati oquempetaca, eirorica picoi pinquemisantanote, ari pintseencasanoteta: eiro piconirotsi. 16 Te noncoyeji nirero saavajatatsiri: noquishocajataquero, ontimaite. Aisati avirori, te noneacameetsatempiji. 17 Picantajeiveta: “Naro ashitaarantajeita-chari, oshequi nomayetaque, tecatsi coiteimotajenane”. Picomitaca: te pioteji pashinoncaaca; pashinoncaasanotaca, tecatsi timimotempine, piquempetaca picaaratsempequitaque. Te piotasanote-riji Tasorentsi: oquempetaca te pameneji. 18 Meeca noncantempi:

pamanenaro oro cameetsatasanotatsiri, ontimimotantempiro pashitaarantajeari. Aisati pamanenaro quitsaarentsi quitamarori pinquitsaatantajeari eiro ineanteetajimpitsi, eiro pipashiventanta-jatsi. Pamanenaro aisati aavintarontsi pincajoquitajeari, pamenantajeari. Pineaquero, ariorica pincantena, ari nonquemisantacaasanotempi, noameetsa-jeitempi eiro pipashiventantatsi, niotacaasanojeitajempiriri Tasorentsi. 19 Ariorica nonintasanotiri ashaninca, noametiri, aisati noasanquetairi, irootanteari eiro yantantajarotsi caari cameetsatatsi. Meeca eiro pitseencantitsi, iointi pinquenqueshireempa: pincoasa-notaje pioteri Tasorentsi. 20 Pamene, oquempetaca nocatiapaca saiteriqui, nocoaque noneempi. Ariorica pineava-quena aisati povetsatavaquena, nonque-aque, nosaviquimotapeempi aisati noimotapeempi. Nocoasanotaque ashanincatavacaajeitaquea. 21 Tempa nomataqueneri Apa maaroni icoacaque-nari, impoiji nosaviquimotakeri, notsipatajari nospincatsariventanti. Meeca pinquempetajena: ariorica pimataque-naro maaroni nocoacaaajeitaquempiri, ari pisaviquimotena pintsipatena ampinca-tsariventantajeite. 22 Otimirica piquemantari, pinquemavaquero oca nocamantajeitaquempiri”.

Irootaque isanquenatacaaquesunari Jesoshi.

**Iquenquetsatacotiri Tasorentsi
aisati saviquimojeitiriri.**

4 1 Impoiji namenanaji aisati, noneasa-notaqueri inquite, tsompoina; oquempetaca ashitareaca ashitacorontsi. Impoiji noquemajiri aisati yora noquema-queri incaranqui, ariorica ineanati ishiavetacari tiorentsi. Icantauena: —Cataanaque aca jenoquica. Noncamantempiro nantayeteri coajica.

²Irosati otentashiretantanaquena Ishire Tasorentsi, irosati inquitequi. Jeri noneapaqueri Tasorentsi, isaviqui isavamentoqui ipincatsaritancari.

³Oshequi imarereataque, iquempetacaro mapi marereatatsiri: quitioncanirotatsiri, quenashinirotatsiri, maaroni. Aisati ainiro anta savirentsi, ishoncacaro isavcantari.

⁴Aisati oshoncacaro isavcantari oshequi pashini savicamentotsi, ocarataque 24. Anta isavicajeitaque 24 savicacantantsiri, pincatsarijeitatsiri. Iquitsaajeitaro iitsaare quitamaromaori, yamatseejeitaca. Iro yovetsiqueetiri iramatseere oro.

⁵Oponeaca ivincatsarimentoqui Tasorentsi quempetarori iporequi aisati itirei. Aisati inejitatcaro tsiorontsi, ocarataque 7: oshiacantaca Ishire Tasorentsi. ⁶Aisati inejitatcaro incajare, oshiaquero amenaarontsi.

Aisati anta inejitatcari aparoni ivira, jeri itapiiqui itsipa, jeri iracosanoriqui aisati irampatequi itimi itsipapee ivira. Icarajeitaque 4. Otimi iroqui iriori ivoroqui aisati otimi iroqui itapiiqui. ⁷Ishiaqueri aparoni maniti; irio itsipa ishiaqueri vaca; irio itsipa ishiaqueri shirampari; irio itsipa ishiaqueri paquitsa, itimpavanquitana. ⁸Ari otimi ishivanquipee virantsi 6; oshequi iroquipee, jaocarica onayetaqueri. Icantani ipampoyeaventajeitiri Tasorentsi: quitaiteriqui, tsiteniriqui; te iroimpacayeroji. Jero oca ipampoyeapinitiri:

Icameetsataque, icameetsataque, icameetsataque yora Avincatsarite Tasorentsi:
oshequi itasorentsataque, tecatsi ompomerentsitimoteari.
Icantani itimi: peerani, irosati meeca, aisati coajican.

⁹Ari yapiitapinitiro:

Icameetsatasanoti Tasorentsi, oshequi nopincatsatari.
Oshequi nopasonquitiri yora pincatsariventaqueunari.

Icantani yanei, eiro icamitsi catsini.

¹⁰Ariorica iquemapinijeitavaqueri yora 24 savicacantatsiri, itiyeroashitapinijeitacari Tasorentsi, ipincatsajeitaqueri. Yaajeitaquero iramatseerepee yoanijieitaqueri iitiqui, ipampoyeaventajeitiri:

¹¹Picameetsatasanotaque, Novincatsarite, oshequi pitasorentsataque.

Ocameetsati noneacameetsajeitimpi, nopincatsajeitimpi.

Niotaque tecatsi pomerentsitimotem-pine: tempa pivetsicaquero maaroni timajeitatsiri.

Picoaqueni peerani ontive paitapee-rica, irootaque otimantacari meeca.

Iquenquetsatacotiri Jesoshi, ishiancantiri ovisha.

5 ¹Ari noneaquero aisati iracosanori- qui Tasorentsi yampinaicaquero sanquenarentsi, osanquenataca tsomponaqui aisati acaqueroca. Ari ampinaicaca aisati otsinetaca: ocarataque 7 otsinetaca. ²Jeri noneaqueri inampire Tasorentsi, shintsitasanotatsiri, icantaveta:

—¿Janica cameetsatasanotatsiri irimatantearori irampinaicareajero oca sanquenarentsica, intsinecareajero?

³Ari namenajeivetanaca, tecatsi anquerine. Tecatsi materone irampinaica-reajero: inquitesati, quipatsisati, sharincavenisati, tecatsi catsini. ⁴Te intimeji catsini cameetsatasanotatsine, matasanoteroneri irampinaicareajero, irootaque niraantanacari: noashiretanaca te intimeji camantenane ocantayetiri sanquenarentsi. ⁵Impoiji icantaquena aparoni savicacaantatsiri:

—Eiro piraatsi. Timatsi ampinaicareajeroneri: yora ishanincani Jorani; iquempe-vetari maniti, oshequi ishinsti. Aisati ishanincatacarini Iravirini, aisati oshequi ipincatsariti. Imataqueneri Tasorentsi maaroni icoacaajeitaqueriri, irootaque

irimatantajearori irampinaiccareajero sanquenarentsi, aisati intsinecareajero.

⁶Ari ainiro anta Tasorentsí, jeri ivira, aisati yora savicacantajeitatsiri. Jeri noneaqueri isatecaca nianqui Ovisha, yamashitaca ora isatayeetaqueri peerani yoanteetacariri. Otimi itseequi 7, aisati iroqui 7: oshiacantaquero Ishire Tasorentsí, itiancaquero otsoteaquero quipatsi. ⁷Ari isavicaque Tasorentsí ivincatsarimentoqui, yajiriquiro iracosanoriqui sanquenarentsi, ampinaicapatitachari. Ari ijataque Ovisha iriori, yaapaaquero. ⁸Impoiji yora virantsi aisati yora savicacantayetatsiri itiyeroashijeitacari Ovisha. Yajiricajeitiro shiavetarori ijaviquimento; yajiricajeitiro aisati shiavetarori tsota, yovetsiqueetiro oro: otimi tsompoina casancapatsari. Oshiaquero iroori casancapatsari iquenquetsatacapinijetiru quemisantsí Tasorentsí. ⁹Impoiji ipampoyeaventajeitiri Ovisha pampoyeantsi iroaque- rari:

Ocameetsati pajiriquero avinti
sanquenarentsi,
aisati ocameetsati pintsinecareajero
ora otsineyetacara.
Tempa peerani yoyeetaquempi,
aparajatimentajeitacari piraja
maaroni atiripee,
poavisacojeitantzacariri irisaviquimo-
jeitantzeariri Tasorentsí, maaroni.
Poavisacojeitaqueri timayetatsiri
maaroni atiripee, nashiyetarori
maaroni irineanepee.
Queario, poavisacojeitaqueri
poneayetachari maaroni nampitsi-
peequi, jaocarica isavicajeitiri.
¹⁰Pipeajeitaqueri pincatsarijeitatsiri
aisati quenquetsatacapinijetiru
Tasorentsí:
impincatsariventajeiteeri maaroni
savicajeitatsiri quipatsiqui, aisati
incanteri Iriri iramatacojeiteeri.

¹¹Impoiji namenanaji aisati, noneajeita- queri; aisati iriori oshequi catsini inampirepee Tasorentsí: te aparopee irine, oshequisano catsini. ¹²Antearojenca ipampoyeaventajeitiri:

Icameetsatasanotaque Ovisha
yoyeetaqueri, iojeitaque maaroni
timajeitatsiri
oshequi itasorentsitaque, oshequi
timimojeitiriri,
oshequi ioti catsini, maaroni imayeta-
quero catsini.
Tsame maaroni ampincatsajeiteeri,
aneacameetsajeiteeri, aveshireimen-
tajeiteari.

¹³Aisati noquemajeitaqueri maaroni savicajeitatsiri inquitequi, quipatsiqui, aisati maaroni camajeivetañchari: yora itijeevetacari quipatsiqui, aisati yovinqueevetari; ipampoyeajeitaque maaroni catsini:

Tsame aveshireimentajeiteari Ovisha
maaroni,
ampincatsajeiteeri, aneacameetsajei-
teri, ancantaitatiyempani.
Tempa itasorentsatasanotaque,
icantani, peerani.

¹⁴Irosati icantantacari yora 4 virantsi:
—Aitaque ancantajeiteari, ampincatsa-
tasanojeiteeri.

Aisati itiyeroashijeitacari savicacantajeitatsiri, ipincatsajeitaqueri maaroni.

Itsinecareajiro sanquenarentsi.

6 ¹Ari ocarataque 7 otsinetaca sanquenarentsi. Noneacotaqueri Ovisha itsinecareajiro aparoni, irosati noquemantacari virantsi, antearojenca ineanati, iquempetacaro itirei, antearojenca. Icantiri quijacotariri cavayo:

—Caate, pimpoque aca.

²Irosati noneantavacariri jivatapain- tsiri: jeri iquijacotapaacari cavayo quitamarori, yajiricaquero iveane. Yamatseeyetaqueri; coajica irijatanaque

inquisajeiteri quishiriri, incoaque iranaacojeiteri irimanateri, impoyereajeiti.

³Impoiji itsinecareajiro otsipa, irosati icantantari itsipa virantsi:

—Caate, pimpoque aca.

⁴Jeri iquenapaaque itsipa cavayo, quitioncatasanotatsiri. Icanteetiri:

—Meeca poamejeiteri atiri irimanata- vacaajeitea, iroavacaaajeitea.

Ari ipeetavaqueri antearo ivesamento.

⁵Impoiji yora Ovisha itsinecareajiro otsipa, irosati noquemantacari itsipa virantsi, icantiri:

—Caate, pimpoque aca.

Irosati noneantavacari iquenapaaque potsitari cavayo, yajiricapaaquero quijacotariri imoncaratantayetariri tenayetatsiri, paitapeerica. ⁶Irosati noquemantacari satecainchari virantsi nianqui, icanti:

—Te aneasanoteroji tirico aisati oquempetaca shinqui, irootaque opinata- sanotantacari. Irointi oreji orivo aisati ovaja, irootaque timasanotantsiri.

⁷Impoiji itsinecareajiro otsipa, ocarata- paaque meeca 4, irosati noquemantacari itsipa virantsi, icantiri:

—Caatanaque, pimpoque aca.

⁸Jeri noneavaqueri pashini cavayo, quiterivitiri; ipajita yora quijacotapaariri: Caamanentsi. Yojatapairi pajitachari Sharincaveni. Icantavaqueri:

—Aviro cantacoventajeiterineri oshequi atiri anta quipatsiqui, nocoaque pimpesaarantajeiteri, peti, peti; paacanta- jeiteri itas; pojoquitacaaranteari; pintianqueneri maniti irantsicaaranteri, irovamaaranteri.

⁹Impoiji itsinecareaquero otsipa, ocarataque meeca apapacoron; irosati noneantacarori itaapinitantarori casanca- patsari. Itimi anta oshequi quemisantajei- tatsiri, camajeivetainchari. Peerani iquenquetsajeitaquero irineane Tasoren-

tsi, icamantapinitiri atiri jaoca icantari Tasorentsi, irootaque yoanteetacariri.

¹⁰Antearojenca icantajeiti camajeivetain- chari:

—Novincatsarite, aviro pincatsariventajei- tiriri maaroni savicajeitatsiri. Oshequi picameetsatasanotaque, pitasorentsitasano- taque. Niotaque otampaticatasanot i pineane, te pamatavitantimateji. ¿Jaoca oncarate pinquisacoventajeitajena? ¿Jaoca oncarate poasanquetaajeitanteeariri iriori savicajeita- tsiri quipatsiquinta, oajeitaquenari?

¹¹Ari ipajeitaqueri quitsaarentsi quitamarotasnotatsiri. Icantiri:

—Pimaoreavaquetsita. Tequera omونcarateaji noasanquetaasanajeitan- teariri oajeitaquemperi. Timatsiquera itsipapee piyemisantarinre iroyeeteri. Piquemisantajeitaquena, irootaque yoanteetaquemperi; inquemisantajeita- quena itsipapee, irootaque iroanteeteariri iriori. Ariorica omонcarataquea, ari noasanquetaajeiteri maaroni oantatsiri.

¹²Impoiji itsinecareajiro otsipa, ocarataque meeca 6. Namenanaque, jero omicasanota- naca quipatsi, antearo onicanaca: nica, nica, nica. Itsitenitasanotanaque catsirincaiteri, iquempetanacaro tsmenquito; inti cashiri, quitioncatasanotanaque, iquempetanacaro irajantsi, quitionca catsini. ¹³Aisati ipariajei- tanaque maaroni impoquiero: iquempeta- caro oitsiqui iyera ora iraacatsiri, ariorica otimi antearo tampea, ari ojireayetanaque.

¹⁴Opeanaca inquite, oquempetaca yampinai- queetaquero sanquenarentsi. Opeaca maaroni quipatsi: toncaaripee, oyoyeja, maaroni; poyere. ¹⁵Aisati noneaqueri ivincatsaritepee atiri, jeri ivincatsaritepee soraro, ashitaarantincari, shintsiyetatsiri, ivatorote, iratiritepee, maaroni atiri: ishiaeitanaca omoroqui imperita. Aisati ishiaeitanaca mapipeequi anta toncaariqui.

¹⁶Icantajeivetacaro toncaari aisati mapi:
—Pimpariye, pintijajeitena, pimanena. Yaanacari Tasorentsi, aisati yaanacari

yora Ovisha. Oshequi iquisaquena.
¹⁷Meeca iquisajeitaquena maaroni; meeca impoyereajeitena, poyere.

Isatoncaajeitiri ishanincapeeni Ishirairi.

7 ¹Impoiji noneaqueri inampirepee Tasorentsi, caratatsiri itsipasati, icatiajeitaca anta otsapitapaa quipatsi; ipeavaquero tampea, maaroni. Ipeasano-tavaquero maaroni, caari otimanta tampea quipatsiqui, incajarequi, inchato-qui, jaocarica. ²Impoiji aisati noneaqueri itsipa inampire Tasorentsi, iponeaca anta iquenapainta catsirincaiteri, yamaquero irisatoncaatanteariri atiripee. Icajemaco-jeitapaaqueri itsipapee, yora tsconajeite-roneri coajica quipatsi aisati incajare.

3Icantiri:

—Eirotsita pitsonquitarotsi quipatsi, incajare, inchato, maaroni. Ajivatavaque-rita asatoncaajeiteli ivancainaqui maaroni quemisantajeitiriri Tasorentsi.

⁴Ari noquemaqueri icantaque jaoca icarajeitaqueri satoncaajeitainchari: icarajeiti 144,000 quemisantsiri. Icarajeitaqueri ishanincani maaroni itomipee Ishirairi. ⁵Ari isatoncaajeitaqueri ivancainaapequi: icarajeitaque ishanincani Jora 12,000, icarajeitaque ishanincani Oroveni 12,000, icarajeitaque ishanincani Cara 12,000, ⁶icarajeitaque ishanincani Asere 12,000, icarajeitaque ishanincani Nejatari 12,000, icarajeitaque ishanincani Manaseshi 12,000, ⁷icarajeitaque ishanincani Shimeo 12,000, icarajeitaque ishanincani Irevi 12,000, icarajeitaque ishanincani Isacara 12,000, ⁸icarajeitaque ishanincani Savoroni 12,000, icarajeitaque ishanincani Jose 12,000, icarajeitaque ishanincani Vejamí 12,000. Ari isatoncaajeitiri ivancainaqui, maaroni.

⁹Impoiji namenanaji aisati, jeri noneajeitaqueri oshequi catsini atiri aisati, yapatojeitaca: tecatsi ancantea

amoncarajeiteri jaocarica icarajeitiri. Inashijeitaca atiripee, onashijeitaca irineanepee, maaroni. Icatiashijeitapaa-cari Tasorentsi, aisati anta itiminta Ovisha. Iquitsaajeitacaro quitamarori itsaare, yajiricajeitaquero compiroshi. ¹⁰Antearojenca icantajeitaque:

—Iriotaque oavisoajeitaqueeri yora Tasorentsi savicatsiri ivincatsarimento-qui, aisati yora Ovisha.

¹¹Ari itimi quempeji Tasorentsi yora savicacaajeitantzatsiri aisati yora virantsi. Ishoncajeitacari oshequi catsini inampire-pee Tasorentsi, ipincatsajeitaqueri, ¹²icantajeiti:

Ariove, tempa oshequi ioti Atasoren-tsitsite, oshequi itasorenttsiti.

Tsame maaroni aveshireimentapini-jeiteari, aneacameetsatapinijeiteri, ampasonquitapinijeiteri, ampinca-tsatzapinijeiteri;

aitaque ancantaitatiyempani.

¹³Impoiji isampitaquena aparoni savicacaantatsiri:

—¿Piotimpa janica yora quitsaajeita-chari quitamarori? ¿Piotimpa jaoca iponeajeitari?

¹⁴Nocantaqueri:

—Teve nioteji. Pincamantena: tempa pioti avinti.

Icantaqueuna:

—Iriojeitaque neajeitaqueriri yashinon-caajeitaca oshequi atiri; oshequi ineacatsitacaro iriori. Iquivantajeitaro itsaare iriraja Ovisha, irootaque oquitamarotasanontacari. ¹⁵Irootaque yapatotimentantacariri Tasorentsi, intacojeitantzacariri anta ivancoqui.

Icantani intacojeitacari: quitaiteriqui aisati tsiteniriqui. Ari quiso iroajeiteri Tasorentsi iriori, irojocacoventajeiteri, maaroni. ¹⁶Eiro iquemajeitajirotsi aisati itashe, aisati eiro iquemajeitajirotsi imire. Eiro itaajeitajiritsi aisati catsirincaiteri, eiro iquemaatsicatajarotsi aisati paamari.

¹⁷Ari yora Ovisha itsipatari Tasorentsí: iriotaque Ovisha shentajeiterinerí maaroní quitsaaejitachari quitamarorí, papinijeiterinerí maaroní coiteimojeitacariri. Iroimoshirencajeitaquerí, eiro ishinetiritsí iriraajeitacea aisati.

8 ¹Impoiji itsineccareajiro aisati, caratatsiri 7. Ari imajerejeitanaque maaroní savicajeitatsiri anta inquitequi. Osamanitapainti omajeretasanotanaque catsini.

**Itiojeiti intayetacarori inampirepee
Tasorentsí, caratatsiri itsipasati.**

²Impoiji aisati noneaqueri 7 inampiree Tasorentsí, icatiajeitaca Tasorentsíqui. Ipeetaqueri 7 tiorentsi. ³Jeri aisati itsipa nampirentsí, icatiaca anta itaapintantaroriquinta casancapatsari, yovetsiqueetiro oro. Yajiricaqueró onantajaniquitari yovetsiqueetiro aisati oro. Ari itaaqueneri Tasorentsí casancapatsari, oshiaqueró oca iquenquetsatacapinijeitiri quemisantiriri Tasorentsí. ⁴Ari areetacari oyachaare Tasorentsíqui, ocasancajencatapaque, oshequi ineacameetsataquero. Aisati oquempe-taca, oshequi ineacameetsataquero iquenquetsatacapinijeitiri quemisantajetiriri. ⁵Impoiji yora nampirentsí yaaquero paamari, yoquiero onantajaniquitari, ipishoncaqueró quipatsiquica. Impoiji antearojenca itireanaque, tiriririri; iporecanaque, porec, porec; aisati antearo onicaca quipatsi, nica, nica, nica. ⁶Irosati yovetsicantajeitanaca nampirentsí intiotanteari.

⁷Itiotaque jivataintsiri, tii, tii, tii; irosati opariantanaca quipatsiqui iriniqui, jero aisati paamari, oconoacaro aisati irajantsi. Otaarantaca timayetatsiri quipatsiqui, otaarantaca inchatoshi; otaasanotaca iroori saveshi, tojari, maaroní, poyere.

⁸Impoiji itiotaque apitetapaintsiri nampirentsí, tii, tii, tii; irosati noneanta-

carori quempetarori antearo toncaari, tainchari: ipishonqueetaquero incajarequi, pocn. ⁹Opeaarantaca incajare irajantsi, icamaarantaca timatsiri incajarequi, aisati otsonhaarantaca pitotsipee.

¹⁰Impoiji itioti mavatapaintsiri, tii, tii, tii; irosati noneantacarori shiaqueriri impoquiro iparianaque, itaapaaca, pomein. Iparianaque nijatenipeequi aisati anta ocontejayedapaaque nije. ¹¹Opeaarantaca quepishijari, irootaque icantanteetariri shiavetariri impoquiro: Quepishiri. Icamajeitanaque oshequi irajeivtarori nije.

¹²Impoiji itioti aisati itsipasatitapaintsiri, tii, tii, tii; irosati itsitenitantavetanaca catsirincaiteri aisati cashiri. Aisati itsivacaarantayetanaque iriori impoquiropee, irosati otsitenitantavetanaca quitaiteriqui. Aisati ipeaarantayetanaca quitaporouquitatsiri tsiteniriqui. ¹³Ari namenanaji aisati, noneantacariri anteari paquitsa yaranaque anta inquitequi. Aisati noquemaqueri, antearojenca ineanati, icanti:

—Jo, oshequi irashinoncaasanojeitanaquea catsini savicajeitatsiri quipatsiqui. Irotaintsi intiojeite yora itsipapee nampirentsí, caratatsiri mava, impoiji irashinoncaasanojeitea maaroní atiripee.

Itioti impoitapaintsiri mava.

9 ¹Ari itioti itsipa inampire Tasorentsí, yora apapacorotapaintsiri, tii, tii, tii. Irosati noneantacariri impoquiro, iponeaca inquitequi, ipariaque quipatsiqui. Ipeetaqueri iyavitarorí omoro jatatsiri tsompoina catsini, te aneeroji oncarataapee, ²irosati antoo. Ari iyavireapaaquero, itatareapaaquero, jero ocontejencatapaque oshequi oyachaare. Ojataque jenoqui irosati otsitenitantanaca jenoqui, aisati iriori catsirincaiteri itsitenitanaque. ³Impoiji noneaqueri

tsinari, iquenantapaacaro cachaa, itsoteapaaquero quipatsi, imatacaaqueri Tasorentsi yoantaque, iquempetacari quitoniro.⁴Icantiri:

—Poajeitearo ivanquirepee maaroni caari quemisantajeitana, yora caari satoncaajeitacha ivancainaqui. Eiro catsini poarotsi otsipayetari saveshi, tojari, inchatoshi, eiro catsini.⁵Nocoaque pinquematsicatacayeari maaroni caari quemisantajeitana, incarataque 5 cashiri, iro cantaincha eiro poamaajeitiritsi.

Ari yoajetaqueri, oshequi icatsitaque, iquempetacari quitoniro.⁶Ariorica omoncarataquea maaroni oca noneaqueri, ari incoajeivetanaquea atiripee incamajeite; iro cantaincha eiro imatirotsi incame. Incoajeivetanajaera iroajeame irisati, iro cantaincha eiro imatirotsi.

⁷Ari namenasanotaqueri tsinari: iquempetacari cavayo, ipashicayetaca ashiro eiro aveantaritsi sataamentotsi aisati chacopi. Yamatseetacaro shirori oro. Orari ivoropee oshiaquero avoropee arori. ⁸Iviti oquempetacaro oishi tsinane, oquishipeti. Iraji oquempetacaro iraji maniti, antearoquiaji. ⁹Inejitonqui oshiaquero ashiro, ariorica yaranaque, antearojenca yaranaque, ishiaquero itirei, tiriririri. ¹⁰Irishi oshiaquero irishi quitoniro, ainiro itseequi. Ariorica yoakeri atiri, icatsitasanotaqueri, ocarataque apapacoronai cashiri icatsitaque.¹¹Ainiro ivincatsarite tsinaripee: iriotaque ivincatsarite maaroni camaari. Ipajita irineanequi jorio Avaroni; iro irineanequi quireshiasati ipajita Aporioni. Iro acantiri aneanequi arori: Poyereanta-tsiri. ¹²Aitaque icantari yora intacarori oashinoncaajeitiriri quipatsisati. Timatsi-quera apite aisati.

¹³Impoiji itioti itsipa inampire Tasorentsi, yora seishitapaintsiri, tii, tii, tii; irosati noquemantacariri itsipa neanata-

tsiri. Ari oponeacari irineane ora itaapini-tantaroriqui casancapatsari, vetsicachari oro. Otimi anta Tasorentsiqui, otiminta otseequi itsipasati.¹⁴Icantiri tiotaintsiri:

—Pijate poimisoquijajeri yora 4 camaari yoisotiri Tasorentsi anta anteरjaqui eni: ora pajitachari Eojarateshi.

¹⁵Ari ijataque, yoimisoquijajiri camaaripee. Ari icantini Tasorentsi peerani: “Niotaquero jaoca oncarate impoyerearantanteaririri atiripee. Niotaquero jaoca oncarate omoncaratan-teari osarintsi, cashiri, quitaiteri, aisati jaoca incarate catsirincaiteri”. Meecha omoncarataca, irootaque yoimisoquijantajariri. ¹⁶Yora camaari ijivajeitaqueri oshequi catsini soraropee, icarajeiti 200,000,000. Niotaqueri, icantaquenari. ¹⁷Aisati noneajeitaqueri iyavayote.

Ipashicanejitaro quijacotariri quiraatasiri, oshiaquero paamari, ora morecasanotatsiri. Iito cavayopee oshiaquero itopee maniti. Oponeaca ivantequi oshequi paamari, jero cachaajenca oshequi, jero morecasanotatsiri. ¹⁸Iroojetaque poyerearantajeitiriri atiripee: ora paamari, cachaajenca, jero morecasanotatsiri poneachari ivantequi cavayo.

¹⁹Irootaque yoantariri cavayo atiri: ivante aisati irishi. Iro irishi oshiaqueri maranke, ainiro oitotaca, yatsicantacariri atiri.

²⁰Ari itimaarantaque aparopee atiri, iro cantaincha te inquenqueshirejeitempaji: te incoyeji catsini inquemisanteri Tasorentsi. Icantani yantapinitiro caari cameetsatsati, ipincatsatapinijeitiri camaari, aisati ipincatsatashijeitaro yovetsicayetiri: oroyetasiri, peratayetatsiri, ortsipa ashroyetatsiri, mapitatsiri, inchayetatsiri, maaroni. Ijitasorentsitsashiyetaro, iro cantaincha tecati oncantea amene, onqueme, aisati ariite. ²¹Icantani yoayeriti, imatsitanti, yantiro caari yai, icoshiti. Te inquenqueshi-retimateajti catsini.

**Ora sanquenarentsi quenquetsatacotorori
timayetatsineri, coajica.**

10 ¹Impoiji noneaqueri itsipa inampire Tasorentsi, shintsitasanotatsiri. Iponeaca inquitequi, oshoncari mencori, itimaque savirents iitoqui jenioquiji. Ivoro oshiaqueri catsirinca-teri, ivori oshiaquero paamari.

²Yajiriquire sanquenarentsi, pinaicarea-chari. Iitisanori aaticajatapairori incajare, irointi irampate aaticapairori quipatsi.

³Antearojenca icajemapaaque, iquempe-tacari maniti icajemi, jan, jan. Impoiji itireanaque, icarataque 7, tiiriririri.

⁴Noquemantacariri itireanaque, irotaintsi nosanquenateme, iro cantaincha noquemaqueri icantaquena inquitesati:

—Eiro pisanquenatirotsi icantiri tireatsiri, pimanero.

⁵Ari noneajiri aisati inampire Tasorentsi, yora aatiquirori incajare aisati quipatsi: yovanquiro iracosanori inquite-qui, ⁶icanti:

—Timatsi Tasorentsi aneasanotatsiri, icantani yanei, eiro icamtsi catsini. Yovetsicaquero inquite aisati maaroni timantajeitarori; yovetsicaquero quipatsi aisati maaroni timantajeitarori; yovetsicaquero incajare aisati maaroni timantajeitarori. Ioti iriori te nontseeyaji, irotaintsi meeca omoncaratea. ⁷Impoiji intiote yora inampire Tasorentsi, yora sietapaintsiri. Ari onconijatapaaque manavetachari peerani: oca yoametiriri Tasorentsi quemisantajeitiriri peerani, yora quenquetsatacojeitiriniri.

⁸Impoiji noquemajiri aisati jenoquisati quenquetsatacaaqueri incaranqui. Icantana:

—Pijate, paavaquero sanquenarentsi yajiriquire nampirents aatiquirori incajare aisati quipatsi.

⁹Irosati nojatashitancariri, nocanta-pairi:

—Pimprenaro sanquenarentsi.

Icantavaquena:

—Jero, payero, poyearo; ariorica poaquearo, pineaquero opochati, oquempetaca ija pitsi. Iro cantaincha impoiji ompianeentaquempi.

¹⁰Ari naavaquero, noacaro. Opochave-taca, iro cantaincha impoiji opianeenta-quena. ¹¹Impoiji icantaquena:

—Meeca pinquenquetsatacoteri aisati jaoca incantajeitarei coajica pashinipee atiri: nashiyetarori irineanepee, pincatsa-ripee, maaroni.

**Iquenquetsatacotori apite
quenquetsatacantatsiri.**

11 ¹Impoiji ipaquenaro Tasorentsi inchaqui, shiirori cotiquiirontsi, impoiji icantaquena:

—Jero oca pimoncaramentoca. Pijate meeca novancoqui, pimoncarataitero; aisati pimoncaratero itaantarori casanca-patsari, aisati pimoncarajeiteri maaroni quemisantajeitatsiri anta, jaocarica icarajeitiri. ²Eiroyea pimoncaratirotsi anta saiteriqui: irointiquea pimoncarate onta iquenantari caari quemisantajeitatsi. Incarataque 42 cashiri inquenayetanaque itsipapee atiri anta nonampiqui: ora Jerosare. Oshequi iroashinoncaajeiteri savicajeitatsiri. ³Nontianqueri apite quenquetsatacananeri, oncarate 1,260 quitaiteri inquenquetsatapinitate. Incanta-pinijeiteri atiri: “Pinquenqueshirejeitana-quea. Eiro papiitapinitrotsi caari cameetsatatsi, irointi pinquemisantajeite, pintimajeite cameetsa”.

⁴Iquenquetsatacotori apite quenquetsatacatorini peerani Sacariashini yora apitetatsineri, ishiacantaqueri orivo. Aisati ishiacantaquero onantari veera timatsiri anta Avincatsaritequi. Tempa iriotaque pincatsariventajeitiriri maaroni atiri. ⁵Intimerica coavetachaneri iroashinoncayerime yora apitetatsineri, omponeaquea ivantequi

iriori paamari, ontsoncasanojeiteri, ontaajeiteri, pomein.⁶ Oshequi irimata-
caajeiteri Tasorentsi. Peerani inquenque-
tsatapinite, iro cantaincha incoaquerica
eiro oparii incani, eiro opariitsi, irosati
irivecarantearori inquenquetsate. Aisati,
incoaquerica, impeajero nija irajantsi.
Aisati incoaquerica, iroashinoncaapinije-
teri maaroni savicajeitatsineri.⁷ Ariorica
irimoncarataquero inquenquetsate, jeri
aisati imponeaquea omoroqui tsompoina
covencatatsiri iriori. Inquisapeeri
quenquetsatatsineri, iranaacotapeeri,
iroapeeri, shemi.⁸ Imponaajeitaquea
camajeitatsineri anta Jerosarequi,
nianqui. Ishiacantaquero Tasorentsi
Jerosare Soroma aisati Ejipito; iro
ishiacantararori, oshequi yantapinije-
tiro jerosaresati caari cameetsatatsi.
Tempa aitaque ipajacoyeetaqueriru
Jesoshi Jerosarequi.⁹ Oncarate mava
quitaiteri imponaajeite nampitsiqui
nianqui, irosati intampaticatantajeari
catsirincaiteri aisati. Impocajeite maaroni
atiripee iramenajeiteri camaintsineri,
irinashijeitanaquea amenajeiterineri:
imponeaquea otsipapeequi nampitsi,
onashiyetaquea irineaneppee. Eiro
ishinetiritsi intijeeteri.¹⁰ Inquimoshirejei-
tanaque maaroni savicajeitatsineri, iro
inquimoshiretanteari incamaque yora
apite quenquetsatacaaajeiveturineri:
impashitavacaajeitea paitapeerica.
Incantajeite:

—Tsame anquimoshirejeite. Camaniro-
taque yora quenquetsatacotoriniri
Tasorentsi: eiro imatajirotsi iroashinon-
caajeitajee aisati.

¹¹Iro cantaincha tampatica catsirinca-
teri intasoncajeri Tasorentsi, intinaajeita-
jeri apite, incatajeitanaje. Ari intsaroa-
caajeitanaqueari maaroni neajeitajerineri.

¹²Impoiji inquemaqueri Tasorentsi,
antearojenca incanteri:

—Cataanaje aca jenoqui.

Ari irijajeitanaque inquitequi,
inquenantanajearo mencori; irineajeitava-
jeri maaroni quisajeivetariniri.¹³ Irosati
onicantanaquea quipatsica, ontirearan-
tanaque pancotsipee. Incarajeite camajei-
tantsineri 7,000. Oshequi intsaroajeita-
naque itsipapee, impoijiquea impincatsa-
jeitaqueri, icantajeite:

—Tempa oshequi ipincatsariti Tasoren-
tsi, itasorentsitasanoti.

¹⁴Irootaque omoncaratanteari apiteta-
paintsiri iroashinoncaajeiteri Tasorentsi
atiripee. Apanivaniji ora mavatapaints-
ineri.

Moncarataca ipincatsariventanti Tasorentsi.

¹⁵Impoiji itiotaque yora itsipa inampire
Tasorentsi, yora sietetapaintsiri: tii, tii,
tii. Noquemajeitaqueri savicajeitatsiri
inquitequi, antearojenca icantajeiti:

Meecaquea impincatsariventajeiteri
Avincatsarite maaroni quipatsatisi,
incarateri Quirishito impincatsariven-
tantajeite, incantaitatiyempani.

¹⁶Impoiji yora 24 savicacaajeitantsiri
iponeaca ivincatsarimentoqui, irosati
itiyeroashijeitantacariri Tasorentsi:
oshequi ipincatsajeitaqueri.¹⁷ Ipampoyea-
ventajeitiri:

Avirotaque, Novincatsarite, Tasoren-
tsisanori:

oshequi pishintsitaque, oshequi
pipincatsaritaque.

Te pimpashinitapiniteaji, picantani
pitasorentsitaque.

Aisati pipincatsaritasanotaque, meeca
pimpincatsariventajeiteri maaroni
atiri;

eiro pojocajirotsi, irosati pincanteani.
Irootaque nopasonquijeitantimpiri.

¹⁸ Iquisajeivetimpi atiripee, iro cantain-
cha meeca pipajejitacari.

Poitinaajeitajiri camajeivetainchari,
maaroni:

pipinajeitaqueri maaroni antaveetim-
pirori picoacaajeitaqueriri,
maaroni quenquetsatacojeitimpiri,
quemisantajeitimpiri, maaroni.
Pincatsajeitimpiri, pincatsariveitacha-
niri quipatsiqui, caari pincatsari-
veitachani, maaroni.
Cameetsa pisavicaacaajeitaqueri
pinampiqui.
Irintiquea yora quisajeitimpiniri,
caari cameetsajeitatsini, poasan-
quetaajeitaqueri, pitiancajeitaqueri
Sharincaveniqui.

¹⁹Impoiji ashitareanaca ivanco Tasoren-
tsi anta inquitequi, noneaquero
tsompoina cajo, ora onantari isanquenare
Tasorents peerani. Aisati noneaquero
yamatsequi, matsec, matsec; aisati
antearojenca itirei, tiiriririri; aisati
onicanaca quipatsi, shique, shique,
shique; jero aisati opariitasanotaque
iriniqui, sacorororo.

**Iquenquetsatacotaqueri Quirishito
aisati yora maranquetatsiri.**

12 ¹Impoiji otimi aisati noneaueri
anta inquitequi, ishiacantaquee-
neri aisati Tasorents, ayotanteari
irantayeteri coajicani. Noneaueri
tsinane, oquempetaca oquitsaatacari
catsirinaiteri, aaticaque riashiri,
amatseetacari 12 impoiquiro. ²Otsomonte-
taque, irotantsi intime, atsicaneenta-
quero, ocaivintsaanaca, ocajemanaque:
—Ayavee, ayavee.

³Imapocaquero, ipocapaque anteari
maranque, catsini; quitioncaitaque ini.
Ocarataque iito 7, aisati itseequi 10.
Yamatseyyetaca iitopeequi. ⁴Irishi
inoshicaarantapaquaqueri oshequi
impoiquiro catsini, sorororo; impoiji
ipishonajeitaqueri quipatsiqui.
Icatiapaaca anta otiminta tsinane,
yoyeaquero ontimeri otomi, iroantava-
queariri. ⁵Ari otimiri otomi, yora

pincatsariventasanojeiterineri maaroni
atiri; tecatsi piatearineri coajicani.
Imapoquiri Tasorents, yaapitsatanaqueri
jananequi, yaanajiri inuitequi,
isavicacaapaqueri ivincatsarimentoqui.
⁶Oshianaca tsinane anta caaraiteiri,
anta yovetsicaqueneronta Tasorents.
Ishentaquero anta cameetsa, ocarataque
1,260 quitateri.

Imanatavacaajeitaca anta inuitequi.

⁷Jero aisati imanatavacaajeitaca anta
inuitequi. Yora Miyeri, icarajeitaqueri
itsipapee inampire Tasorents, iquisajeita-
vaqueri yora maranque aisati inampire-
pee iriori; imanatavacaajeitaca. ⁸Irio
anaacotantatsiri inampireepe Tasorents,
yojocajeitaqueri maranque aisati icarajei-
tiri, tecatsi incantea iriori impiajeitanage
inuitequi. ⁹Ari yojocasanojeitaqueri
quipatsiqui, aisati maaroni inampireepe.
Iriotaque yora maranquetatsiri peerani:
ivincatsarite camaari, aisati ipajiyetiri
Satanashi. Peerani oshequi yamatavijei-
vetacarini atiri, iro cantaincha eiro
imatajirotsi aisati. ¹⁰Impoiji aisati
noquemaqueri inquitesati, antearojenca
icanti:

—Meeca yoavisacotasanojeitaquee
Tasorents, itasoncacoventajeitaquee,
ipincatsariventajeitaquee; aisati iriori
Quirishito ipincatsariventajeitaquee.
Cameetsataque. Icantani peerani
icantacojeitaquee Satanashi, aisati
maaroni ayemisantarinte, icoapinive-
taca iroasanquejeiteeme Tasorents:
icantani, quitateri, tsiteniriqui.
Meecauea eiro imatajirotsi Satanashi
aisati. ¹¹Icamimentajeitaquee Ovisha,
aparajimentajeitaquee iriraja, irootaque
caari imatantajaro Satanashi iroasanque-
tacantajee. Aisati aquemisantasanojeita-
queri Tasorents, antajeitaqueneri
maaroni icoacaajeitaqueeri, irootaque
caari yoasanquetantajeitee. Ainiro

acarajeitaqueri camimentiriri Quirishito, te incoyeni inquempoyeempa irisati.

¹²Meeca aquimoshirejeitaque, acarajeitaqueri maaroni savicajeitatsiri aca inquitequi; ancanteani anquimoshiretasanojeitanaque. Iro cantaincha irashinoncaasanojeitanaquea maaroni quipatsatisati.

Oshequi iquisa Satanashi, ioti eiro osamanititsi irisavique quipatsiqui, oshequi iroashinoncaajeiteri savicajeita-tsiri.

Yora maranque iquisaqueru tsinane.

¹³Ari ipariapaaque maranque quipatsiqui, oshequi iquisapaquaqueru tsinane tomintariri otomi. ¹⁴Itasonquiro Tasorentsi otimantacari oshivanqui apite, oquempetacaro ishivanqui anteari paquitsa. Impoiji arapitsatanaqueri maranque, ojataque anta ocaaraiteapai. Anta intacoyeetacaro icarataque 42 cashiri. ¹⁵Impoiji yora maranque yaparajataqueru oshequi njija catsini, oponeanaca ivantequi, chararara; icoaveta irooncajerome quipatsi, icoaveta areetapeemparome tsinane, ompiincana-queme. ¹⁶Iro cantaincha ocavinсаaqueru quipatsi tsinane, otencareanaque, oquiajataque maaroni njija quipatsiqui. ¹⁷Aiquero ijatatii iquisaqueru tsinane. Te irimateroji iroori, irootaque ijatashitanta-rii itsipapee otomipee: maaroni yora antiniriri Tasorentsi icantakeriri, aisati maaroni quemasantasanotiriri Jesoshi; icoaveta intsoncajeiterime ioriori.

Ari iquenquetsacotaqueri covencatatsiri.

13 ¹Impoiji nocatiaca impanequivi, anta otsapijaqui antearoja incajare. Jeri noneavaqueri incajarequi icontetapaaque covencatatsiri, otimi itseequi 10, jero iito 7. Otimi itseequivi amatseerentsi; aisati isatoncaataca iiotopeequi: ocantimatiri sanquenarentsi Tasorentsi. ²Ari ishiapaaqueri maniti. Iiti

oshiaquero iiti meen; irointi ivante oshiaquero ivante maniti. Icantavaqueri maranque:

—Meeca nocoaque nomatacayempi, pinquempetantenari: oshequi pimayetaque, oshequi pimpincatsaritanaque, oshequi pincantacantayete.

³Amashitasanotaca catsini iito aparoni, naamaaca irovetainch aamayerime amashitaqueriri. Yoajeitanaqueri cavaco maaroni atiri, icantajeiti:

—¿Paitaquea caari icamanta? Pamenerote iito, jooo, ¿paitaquea oaqueriri?

⁴Aisati ipincatsajeitaqueri maranque, icantajeiti:

—Pinequeri, oshequi imatacaaqueri covencatatsiri.

Aisati ipincatsajeitaqueri covencatasiri, icantajeiti:

—Pinequeri, oshequi ishntsica, tecatsi materine impiateari.

⁵Impoiji yora maranque icantiri covencatatsiri:

—Meeca pinquisanaqueri Tasorentsi, incarate 42 cashiri pimpincatsaritasano-tanaque.

Ari oshequi ishemetsataque, oshequi icantimataqueri Tasorentsi. ⁶Ari icantimataqueri iriori, icantimataqueru inampi, aisati icantimajeitaqueri savicajeitatsiri anta. ⁷Aisati icantakeri maranque:

—Pinquisajeiteri maaroni quemisanta-jeitiriri Tasorentsi, poashinoncaajeiteri. Aisati pimpincatsariventajeiteri savicajeitatsiri quipatsipeequi, pashiniyetirori irineaneppee.

⁸Aitaque impincatsajeiteri maaroni atiripee. Apatiroquea irinti quemisanta-tsiri, eiro ipincatsatiritsi. Aitaque, tequerani irovetsiqueroni quipatsi, iotitaracini Tasorentsi maaroni quemisanta-jeiterineri. Aitaque isanquenataqueroni ivajiropee, ipajititayetacarini yora Ovisha camimentajeiterineri. ⁹Otimirica

piquemantari, pinquenqueshiretero oca nosanquenataquempi. ¹⁰Icanti Tasorentsi: "Noiminqueajeiteri coajica maaroni oiminqueajeivetaquempineri. Nompesa-jeiteri maaroni pesajeivetempineri". Meeca icoacaajeitaquee Tasorentsi ancantaitatiyempani anquemisantajeiteri, anquearioventero.

**Iquenquetsacotaqueri itsipa
covencatatsiri.**

¹¹Impoiji noneaqueri itsipa covencatasiri, iponeaca inti quipatsiqui tsompoina. Iquempevetacari ovisha, otimi itseequi apite; icovencati ineanati. ¹²Oshequi ipincatsaritaque, iquempeta-
cari itsipa covencatatsiri, yora amashita-
chari iitoqui. Aisati icantajeitiri maaroni savicajeitatsiri:

—Pimpincatsajeiteriyea yora amashita-
chari iitoqui.

Ari ipincatsajeitavaqueri. ¹³Oshequi itasoncantayetaque yora apitetapaintsiri. Imayetaquero caari ineanipinijeiti ashanin-
capee. Ineajeitaqueri atiri yoariaquero paamari: oponeaca inuitequi, irosati quipatsiqui. ¹⁴Oshequi imayetaque, irootaque yamatavijetantacariri oshequi atiri, ijitasorentsijeivetacari. Ariorica itsipatacari yora jivatiriri, oshequi imayetaque. Aisati icantajeitaqueri atiri:

—Jentsite, pishiacantajeiteri yoca jivataquenari, yoca ipesheevertacari. Pinequeri, te incameji.

¹⁵Ari iquemisantajeitaqueri, yovetsica-
jeitaque ishiacantaro. Impoiji itasonca-
quero, aneantacari, aisati oneanatanta-
cari. Impoiji icantajeitaqueri atiri:

—Pimpincatsajeitero oca avetsicajeita-
queri: irootaque atasorentsite.

Ari ipincatsajeivetacaro. Irintiquea maaroni caari pincatsatiro, yoacantajeita-
queri. ¹⁶Aisati isatoncaatacantacarri atiri, maaroni. Isatoncaajeitaca iracosanoriqui, ariorica ivancainaqui,

maaroni: pincatsarijeitatsiri, caari pincatsarijeitatsine, ashitaarantajeita-
chari, caari ashitaarantajeitachane; yora yamananteetiri aisati yora caari yamananteeti: isatoncaajeitaca maaroni. ¹⁷Iro isatoncaajeitaqueri ivajiro covencatatsiri, yorari itsipapee isatoncaajeitaqueri inomerote. Icantajeitiri:

—Eirorica isatoncaajeita atiripee, eiro noshinetiritsi iramanantayete aisati impimantayete.

¹⁸Ocameetsati meeca ontime piotanteari, pinquenqueshiretero inomerote covencatatsiri. Irootaque inomerote atiri, ocarataque 666: irootaque piotanteariri.

**Iquenquetsacotaqueri Ovisha
aisati yora pampoyeaventajeitiriri.**

14 ¹Impoiji namenanaji aisati, jeri noneaqueri yora Ovishatatsiri, icatiaca toncaariqui pajitachari Sio: otimi Sio Jerosarequi. Icarajeitaqueri maaroni quemisantajeitatsiri, satooncaajeitachari ivancainaqui ivajiro Ovisha aisati iriri. Icarajeitaque 144,000.

²Impoiji noquemajeitiri aisati inuite-
sati, antearojenca irineane; iquempeta-
caro antearoja ovarijare, aisati antearo
itirei. Iriojeitaque javioquijeitirori shiirori ijavioqui. ³Itimajeiti anta Tasorentsiqui, anta itiminta savicacan-
tayetatsiri aisati yora itsipasati virantsi. Ari ipampoyeajeitiro pampo-
yeantsi iroquerari; ocameetsajencata-
que, iro cantaincha tecatsi materone iriotero: apaniro inti 144,000 atiri oavisacojeitainchari. ⁴Te irantajeitaje-
roji caari cameetsatatsi iriori, icamee-
tsajeitaque: aisati icantani yojajaeita-
queri ovisha, jaocarica ijayetaqueri.
Iriojeitaque quemisantajeitiriri
Tasorentsi aisati Ovisha. ⁵Te intseeya-
jeiteoji, aisati icameetsajeitaque, te
irantajeitajeroji caari cameetsatatsi.

**Irotaintsi iroasanquejeiteri
Tasorentsi caari quemisantiri.**

⁶Impoiji noneaqueri itsipa inampire Tasorentsi, yarayetanaque inquitequi mianqui. Iquenquetsatacacaajeitaqueri maaroni savicajeitatsiri quipatsiqui, jaocarica otimayetiri inampipee, aisati jaocarica ocantayetari irineanepee. Icamantajeitaqueri jaoca incanteari iroavisacojeitantaqueri. Irootaque icantapinijeitiriri Tasorentsi maaroni atiri peerani, te impashinterojo. ⁷Antearojenca icanti:

—Pimpincatsajeiteri Tasorentsi, pincantajeiteri pishaninca: “Icameetsataque Tasorentsi”. Pamene, moncarataca meeca iroasanquejeiteri maaroni caari quemisantajeitiri. Pimpincatsatasanojeiteri: tempa iriotaque vetsquirori inuite aisati quipatsi, incajarepee aisati nijatenipee, maaroni.

⁸Yojatanaqueri itsipa nampirents, icanti iriori:

—Peerani yora savicaveitachaniri Vavironiaqui yantacaapinijeitaquerini itsipapee atiri caari cameetsatatsi, iro cantaincha meeca ipoyereajeitaqueri Tasorentsi vavironiasati. Eiro imatacaa-jeitajiritsi aisati paitapeerica.

⁹Impoiji yojatajiri itsipa nampirents aisati: yora mavatapaintsiri. Antearojenca icantapaaque iriori:

—Queariompia, pipincatsatiricari yora covencatatsiri, aisati ora ishiacantaro. Aisati pishinetaricari irisatoncaatempa pivancainaqui, ariorica pacouqui.

¹⁰Ariorica pimpincatsateri covencatatsiri aisati pishinetearicira irisatoncaatempa, ari inquisaquempi Tasorentsi; inquisan-notempi, eiro icavintaimatimpitsi. Pinquematsicasanotaquearo paamari, irineajeittempi maaroni inampire Tasorentsi aisati yora Ovisha. ¹¹Pincantaitiyempani pinquematsicatearo paamari; eiro

otsivacanetitsi, oncantaqueani: quitaiteri-qui, tsiteniriqui, peerani catsini. Aitaque inquematsicajeitearo maaroni pincatsati-riri covencatatsiri aisati ishiacantaro, aisati maaroni satoncaajeitarori ivajiro. ¹²Pamene, ariorica pantapinitiro maaroni icoacaimpiri Tasorentsi, aisati ariorica piquemisantasanotaqueri Jesoquirishito, eiro pishemarotsi; ariorica pinquematsi-catimentearo, iro cantaincha eiro patsipe-tashitarotsi.

¹³Impoiji noquemaquero aisati Ishire Tasorentsi anta inquitequi, ocantaquena:

—Jero oca pisanquenateri: “Inquimo-shiretacayeari Tasorentsi maaroni camajeitatsiri, iquemisantirinirica Ivincatsarite. Queario, inquimoshireta-kaasanoteari Tasorentsi, tempa iotiro maaroni yantajeitaqueniri quipatsiqui; irisavacacaajeitaqueri cameetsa, irimaoreacaasanojeitajeri”.

¹⁴Impoiniji namenanaji aisati, jero noneaqueri mencori, oquitamarotasano-taque. Aisati noneaqueri shiaqueriri Atiritapaintsiri, isavicaque mencoriqui. Yamatseetacaro iramatseere, vetsicachari oro. Aisati yajiricaquero shiavetarori saviri, otsampitasanoque. ¹⁵Impoiniji noneaqueri itsipa nampirents, iponeaca ivancoqui Tasorentsi. Antearojenca icajemacotaqueri yora savicatsiri mencoriqui:

—Moncarataca meeca pimpesacotero panquirents, sampataque meeca maaroni quipatsiquiniri. Pijate meeca pimpesacotero.

¹⁶Ari ipesacojeitaqueri savicatsiri mencoriqui, peti, peti; yaajeitaqueri maaroni panquirents quipatsiquiniri.

¹⁷Impoiji iponeaca ivancoqui Tasorentsi anta jenoqui itsipa nampirents. Aisati yamaque iriori shiavetarori saviri. ¹⁸Jeri ipoquaque pashini aisati, iponeaca anta itaapinitironta casancapatsari. Iriotaque taarantirori paitapeerica. Antearojenca

icajemacotaqueri ishaninca ajiriquirori
isavirite:

—Iracaque ovapee: pimpesajeitero
maaroni timajeitatsiri quipatsiqui,
paayetajero maaroni, pampatotero.

¹⁹Irosati ipesantarori maaroni ovapee
anta quipatsiqui, yaayetajiro, yoajiro
anta intsinacaitantearori Tasorents:
ishiacantaquero inquisasanojeiteri
coajicani Tasorents maaroni tseenajeiti-
riri. ²⁰Ari oniri itsinacaitantarori anta
oantsiqui, te ari one nampitsiqui. Ari
oponeanaca itsinacaitantaroriqui oshequi
catsimi irajantsi, ooncanaca quipatsiqui;
oquimojatanaque, areetacaro ivantequi
cavayo. Otsoteanaquero irajantsi 320
quirometero: ojatanaque antoo.

**Yaajeitaquero inampire Tasorentsi
pajoqui oashinoncaajeiterineri atiri.**

15 ¹Impoiji noneaquero anta
inuitequi itsipapee, ishiacantiro
aisati timayetsineri coajica. Oshequi
noquenqueshiretaquero, oshequi
noanaquero cavaco. Noneaqueri 7 inampire
Tasorents, oashinoncaajeiterineri atiri.
Iriojeitaque vecarayeroneri maaroni
oashinoncayerineri atiri; omونcararatapaa-
quea inquisanaquea Tasorents. ²None-
quero aisati incajare, oshiaquero amenarons-
ti, oconoaro paamari. Noneajeitaqueri anta
otsapijaqui icatiaeitaca caari pincatsajeitiri
yora covencatatsiri, jero aisati ishiacantaro;
iriojeitaque maaroni caari satoncaatacha
ivajiro aisati inomerote. Ari yajiricajeta-
quero shiavetarori ijavioqui Tasorents.
³Ipampoyeajeitaquero ivampoyeane
Moishishi, yora antaveetiniriniri Tasorents.
Aisati ipampoyeajeitaquero ivampoyeane
yora Ovisha. Jero oca ipampoyeajeitaqueri:

Novincatsarite, tempa aviro Tasoren-
tsi, oshequi pimayetaque.
Oshequi pitasoncantayetaque,
noanaquero cavaco pantayeta-
queri.

Ocameetsayetaque pantayetaqueri, te
pamatavitanteji.

Queario, pipincatsariventajeitaqueri
savicajeitatsiri maaroni nampitsi-
peequi, picantani.

⁴ Tempa, Novincatsarite, ocameetsati
nompincatsajeitempi, aisati iriori
maaroni savicajeitatsiri.

Ocameetsati noncamantajeiteri atiri:
“Icameetsati Tasorents”; tempa
queario, picameetsataque.
Imponeajeitanaquea maaroni nampi-
tsipeequi impincatsajeitantempiri.
Tempa iriojeitanaque ocameetsataque
pantajeitaqueri.

⁵Impoiji namenanaji aisati, noneaquero
ashireanaca ivanco Tasorents, onta
inuitequiniri. Noneasanotaquero anta
ininta Tasorents. ⁶Itimi pancotsiqui yora 7
inampire, yora oashinoncaajeiterineri atiri.
Noneaqueri isoquijanaque. Iquitsaajeitaro
quitsarentsi tsivitamaori, oquitamaromao-
tasanotaque. Ainiro inejiqui shiirori
ishiticatsaquiero, yovetsiqueetiro oro. ⁷Aisati
ainiro iriori aparoni virantsi, ipacojeitava-
queri nampirentsi aparopee pajo. Ojaaca
pajoqui oja, oashinoncaajeiterineri atiri.
Oshiacantaqueri inquieri Tasorents
coajicani tseenajeitiriri. Icantatiani yanei
Tasorents, eiro icamtsi irinti catsimi.
⁸Oshequi ishipaquirei, oshequi itasorenca;
ainiro oyachaare, ojaacaro pancotsi. Tecatsi
incanteetero inqueajeitero pancotsi, irosati
irimatantearori nampirentsi icantaqueriri
Tasorents.

Jaoca ocantari timatsiri pajoqui.

16 ¹Impoiji noquemaqueri ineanata-
que anta ivancoqui Tasorents.
Antearojenca icantiri yora 7 inampirepee:
—Meecaquea pijajeite pisacotero
quipatsiqui oja pajoquiniri, irootaque
shiaquerori iquisaca Tasorents.

²Irosati ijatantaca yora jivatatsiri.
Isacotaquero quipatsiqui oja, irosati

isompojeitantanaca maaroni satoncaajeitarori ivajiro covencatatsiri, aisati maaroni pincatsatirori ishiacantaro. Jo, oshequi isompoyetanaque; opatsayetanaqueri, ishitiyetanaque.³Impoiji ijataque apitetaintsiri, isacotiro oja anta antearaohaquici incajare. Opeanaca, oquempetacaro irirajani camaintsiniri. Icamajeitaque timajeivetchari: shimappee, omanipee, maaroni.⁴Impoiji ijataque mavatapaintsiri nampirents, isacotiro pajoquiniri anta enipeequi aisati njatenipeequi. Opeajeitanaca irajantsi.⁵Impoiji icantiri:

—Tasorentsi, oshequi picameetsataque; picantani pitimi: peerani, irosati meeca. Ocameetsataque poasanquetaajeiteri maaroni yontapee, irineashiiteteearota;⁶tempa iriojeitaque oajeitiriri quemisan-tajeitimpri aisati quenquetsatacojeitimpri. Meeca pipiatacoventajari, poajeitaqueri. Ineacarove iriori, tempa iriojeitaque oayeri.

⁷Aisati itimi itsipa anta itaapinitironta casancaptsari. Icanti iriori:

—Queario, Novincatsarite, aviro Tasorentsi mayetirori maaroni. Ocameetsataque poasanquetaajeiteri, irineashiitetearotave: piotaquero poasanquetamenti-ri.

⁸Impoiji ijataque itsipa nampirents, aisati, yora itsipasatitapaintsiri. Isacotiro pajoquiniri anta catsirincaiteriqui, imatantacariri itaajeitaqueri atiripee.⁹Ari itaajeitaqueri, irosati iquisatsajeitantariri Tasorentsi: yora tianquiriri oashinon-aajectiriri. Te inquenqueshirejeiteaji. Te incoajeiteji irojocajero caari cameetsatsi yantayetiri, aisati te incoajeiteji impincatsajeiteri Tasorentsi.¹⁰Impoiji yora apapacorotapaintsiri, isacotiro pajoquiniri anta ivincatsarimentoqui covencatatsiri. Irosati otsitenitantanaca anta ipincatsaritinta. Oshequi icavintsa-jeitanaca, irosati yatsicanenetantanaca.

¹¹Oshequi iquisatsajeitaqueri Tasorentsi,

iquishimentaro isompoppee aisati maaroni iquemaatsicayetacari. Iro cantaincha te inquenqueshiretempaji, te incoajeiteji irojocajero caari cameetsatsi yantajeitaqueri.¹²Impoiji yora itsipa nampirents isacotiro ivajonequiniri anta antearaohaquici eni pajitachari Eojarateshi, irosati opirijatasanotantanaca, pirijaiteni. Meeca tecatsi ticajetavaquerine yora pincatsariee jivajeiterineri maaroni isorarotepee. Imponeajeitanaquea anta iquenapainta catsirincaiteri.¹³Impoiji noneaqueri aisati yora maranke, yora covencatatsiri, aisati yora amatavitantatsiri; iponeajeita- taca ivantepee qui mava camaari, ishiapaaqueri mashero.¹⁴Queario, icamaaritasanotaque; itasoncantaniroveta- taca, imayetaquero caari aneapinjeiti. Ijatashijeitiri maaroni pincatsariee, icantajeitiri:

—Tsame ancorajeitavacayea, amitac- tavacaajeitea amanajeiteri maaroni oijajeitiriri Tasorentsi, antsoncajeiteri, maaroni.

Ja, ariorica impocapaaaje Tasorentsi, yora matirori maaroni, irimanatavaca-jeitea irioripee. Inquemacojeitero maaroni atiripee irantayetapaaqueri Tasorentsi.¹⁵Incantapaaque:

—Pamene, oquempetaca coshitantatsiri imapoquiri yora icoshitiri, aisati narori, nomapocajeitapaaquempi. Te piojeiteji jaocarica oncarate nompocantajeari. Nonquimoshiretacajeitajeri maaroni aamaajeitanari, quempetarori isaaquiti. Nocoaque incameetsajeitanaque, eiro yantapinitrotsi caari cameetsatsi. Inquempetacantea iquitsaata cameetsa, tecatsi neatsempequierine eiro ipashiventantaja.

¹⁶Iro cantaincha yora camaariee yapatojeitaqueri maaroni soraropee anta nampitsiqui ipajitiri jorio Aramaqueroni.¹⁷Impoiji yora nampirents sietetapain-tsiri: yora caratapaintsiri. Isacotiro

ivajonequiniri anta tampeaqui, irosati noquemantacari timatsiri anta ivancoqui Tasorentsi, savicatsiri ivincatsarimento-qui. Antearojenca icantaque:

—Moncaratapaaca, aitapaji.

¹⁸Impoiji oshequi iporequi, porec, porec; aisati antearojenca itirei, tiiririri. Aisati antearo catsini onicaca quipatsi. Te aneapinteroji quempetearoneri oca. Antearo onicaca catsini: nica, nica, nica, nica. ¹⁹Irosati oporocajeitantanaca maaroni pancotsipee anta Vavironiaqui, aisati maaroni otsipapeequi nampitsi, otsoncajeitaquero maaroni, poyere.

Iquenqueshiretaquero Tasorentsi maaroni yantajeitaqueniri vavironiasati, irootaque iquisasanojeitancariri, yoashinoncaasa-nojeitaqueri. ²⁰Opeajeitanaca maaroni ovoyejapee; aisati otishipee, opeajeitana, maani. ²¹Jero aisati opariaque iriniqui, iro cantaincha antearo onasano-taque catsini. Otenataque apaitsouqironi 40 quiro. Oponeaca inquitequi, opariaque atiriqui, oshequi otsoncajeitaqueri. Oshequi itsaroacaajeitacaro iriori, irosati iquisatsajeitancariri Tasorentsi.

**Iquenquetsacotiri vavironiasati,
irashinoncaajeitanaquea, coajica.**

17 ¹Impoiji ipocashitaquena aparoni nampirentsi, sacotirori pajoqui.

Icantaquena:

—Caatanaque aca: nonijayempiro jaoca incanterori Tasorentsi ora antajeitiriri shirampari, savicatsiri enipeequi, jero nijateenipeequi. Iroasanquetayero.

²Yantajeitaquero ivincatsaritepee itsipapee atiri. Oamejeitaqueri maaroni atiri yantapinitiro caari yai.

³Impoiji yaanaquena anta caaraiteriqui, otimi anta onijaquenari Ishire Tasorentsi. Noneaquero tsinane, oquijacotacari covencatatsiri, quitioncatatsiri: otimi 7 iito, jero itseequi 10. Isatoncayetaca ivatsapeequi: ocantimatiri Tasorentsi

isatoncaaro. ⁴Oquitsaatacaro tsinane quiraanirori aisati quitioncari. Oaneenca-yetacaro oro, jero mapi shipaquireatsiri aisati quitamaroquiri. Ajiriquiro otsotane, yovetsiqueetiri oro; ojaacaro caari cameetsayetatsi, oshiacaventiro antacaa-jeitiri atiri iquemisantashitaro yovetsi-cane atiri aisati oamejeitiri imayempi-tanti. ⁵Osatoncaataca ovancainaqui: ainiro oshiacantayetaqueeri, iro cantain-cha tequera onconijatasanote. Ocanti: “Antearo oni Vavironia, irootaque oamejeitirori tsinane antayetiri caari ai. Irootaque oamejeitiriri oshequi atiri iquemisantashitaro yovetsicasihiyetari”. ⁶Impoiji niotaquero oshinquitaca tsinane. Iro oshinquitacari irirajani quemisa-veitariniri Jesoshi oajeitaqueri. Oshequi noanaquero cavaco, namenasanotaquero, sorererere. ⁷Iro cantaincha isampitana inampire Tasorentsi:

—¿Paitaquea poantarori cavaco? Noncamantempiro caari piotitiro, aisati noncamantempi caari piotitiri yora covencatatsiri oquijacotacari. ⁸Itimavei-tani yoranqui, te aneeriji meeca, itimi meeca omoroqui tsompoina, jatatsiri antoo. Coajica iraajeri aisati Tasorentsi, intiancanteariri Sharincaveniqui: anta incantaitatiyempani irashinoncayea. Itimaveitani, ipeaca, intimaje aisati; ariorica irineajeitavaqueri tseencajeitatsi-neri, iroajeitavaqueri cavaco. Peerani, iroquerani yovetsiquiro Tasorentsi quipatsi, isanquenatiro ivajiropee maaroni jatatsineri inquitequi, iro cantaincha te irisanquenateroji ivajiropee yora tseencajatatsiri. ⁹Pinquenqueshireta-sanotero oca noshiacantempiri piotantea-ri: ora iiotopee caratatsiri 7 oshiacaventiro 7 toncaaripee osaviquinta tsinane. ¹⁰Aisati oshiacaventiri 7 pincatsaripee. Icamanaque apapacoron, itimi meeca aparo, coajica intime yora caratapaintsi-neri. Eiro osamanititsi impincatsariven-

tante yora caratapaintsineri.¹¹ Yora covencatatsiri, iriotaque aparoni pincatsariveitachaniri nocantaquempi: "Icamaque". Iro cantaincha intinaanaje aisati, impincatsariventantaje aisati, impoiji irijate Sharincaveniqui.¹² Aisati ora 10 itseequi pineajeitaqueri: oshiacantiri itsipapee pincatsarjeitatsine coajica. Incarajeiteri covencatatsiri, impincatsarjeivetanaquea, eiro osamanititsi impinca-tsariventante.¹³ Inquempetavacaajeitea pincatsaripee, incantajeiteri covencatasiri: "Nompincatsajeitempi avirori, nantajeitempiro paitarica pincoacaajeitenari".¹⁴ Impoiji inquisajeiteri Ovishatatsiri, aisati oijajeitiriri: irimanajeiveteari, incoajeivetea intsoncajeiterime. Iro cantaincha impiajeiteari Ovishatatsiri, intsoncajeiteri irinti. Tempa iriotaque anaacojeitiriri pincatsajetatsiri, ipincatsaritasanoti; iriotaque anaacojeitiriri maaroni savicacantantatsiri, maaroni. Icoyeajeitaqueri maaroni quemisantajeitiriri, ipashinitacaajeitajiri, ari quiso yoajeitanajiri iriori, maaroni.

¹⁵Aisati icantaquena namparentsi:

—Aisati pineaquero enipee aisati nijatenipee osavicanteri tsinane. Oshiacantaqueri iriori maaroni atiripee savicajeitatsiri jaocaricapee, jaocarica ocantayetari irineanepée, maaroni.¹⁶ Aisati itseequipee oshiacantaqueri atiripee quisajeitaquerori tsinane: ora antapinitiriri caari ai. Aisati inquempejeteri yora covencatatsiri, inquisaquiero iriori. Iroashinoncayero, irisapoquiero, iroyearo ovatsa, intayero.¹⁷ Irio Tasorentsi quenqueshiretacayerineri inquisajetero, irimatantearori icoiri iriori. Incantajeite: "Tsame ampincatsajeiteri yora covencatatsiri quitioncatatsiri, anteneri paitapeerica incoacaajeiteeri". Aitaque incantajeiterori oca omoncaratanteari icantiri Tasorentsi iriori.¹⁸ Oca tsinane pineaquero oshiacantajeitaqueri maaroni

savicajeitatsiri nampitsiquinta: yora anaacojeitiriri itsipapee atiri ipincatsariti.

Intime oshequi iraacojeiterine vavironiasati.

18 ¹Impoiji noneavaqueri ipocapaaque itsipa inampire Tasorentsi, iponeanaca inquitequi. Oshequi ipincatsaritapaaque, ishipaquireapaaque, iquitaitetasanotapaaquero quipatsi, yatsioquintapaaquena. ²Antearojenca icajemapaaque:

—Tsoncajeitaca ini maaroni savicajeitachaniri Vavironiaqui; oshequi inajeiveitani, oshequi ipincatsariveitani, meeca ipoyereajeitaca. Irio timapaajan-tsiri camaaripee inampiniqui, mamaroniro, tsivaniniro, maaroni. Iquempejeitacaro tsinane, antapinitiriniri caari ai.³ Te oncameetsaveiteani osavique, aisati oamejeitaqueri maaroni itsipapee atiri iquempejeitantzacarori iriori. Yantajeitiqueroni pincatsaripee; oshequi yaarantaque yora pimantirori ovetsicane, caari cameetsayetatsi.

⁴Impoiji noquemaqueri Tasorentsi anta jenoqui, icanti:

—Pisoquijajeitanaje, quemisantajeitarnari: piquempetarocari, pantirocari avirori caari cameetsayetatsi antiri iroori. Picarajeitirocari, noasanquetaajeiticari.

⁵Oshequi catsini antapinitiro caari cameetsatatsi. Eiro nopeacotarotsi antayetaqueri. ⁶Peerani oshequi oashinoncaajeitaqueri itsipapee, meeca pimpiaeitearo, aiquero pijatatiye poashinoncaasanojeitero. Te oncameetsateji antajeitaqueri. ⁷Peerani oshequi oshemetaqueni aisati oshequi antashiye-tacari shirampariee; meeca aisati onquempetea, oshequi pineacatsitacayearo aisati oshequi poashiretacayearo. Oquenqueshirevetaca: "Narotaque pincatsaro, te naro camajimentaaro, eiro noashiretatsi". ⁸Nomapocaquiero

noashinoncaasanotaquero; oneaqueri oshaninca incamajeite, iraacojeiteari, onquemero otashe; ontsonquero paamari. Tempa narotaque pivincatsarite, tempa naro Tasorentsi. Ainiro noshintsinca noasanquetantearori.

⁹Yora pincatsaripee antayetirori aisati antavintsayetirori irineajeitero ontaaaya, irineero oyachaare; impoiji iriraacojeitero, iroashiretacotearo. ¹⁰Areji incatiaeitanaque; intsaroajeitanaque, iraamaaquea iroashinoncaajeiteri Tasorentsi iriori. Incantajeite:

—Oo, vavironiasati, pashinoncaajeitacave. Antearo onaveitani pinampi, oshequi picarajeiveitani savicajeiveitachaniri. Imapocaquempi Tasorentsi, itsoncajeitaquempi, maaroni.

¹¹Ari iriraacojeitaquempi pimantajeitatsiri, iroashiretacoeitaquempi. Peerani oshequi pamanantajeititaroni paitapee-rica ipayeveitimpiniri, iro cantaincha eiro meeca pamanantajitsi aisati. ¹²Tecatsi incantea impimantempiro oro, perata, shipaquireatsiri mapi, quitamaroquiri mapi, tsivitamaori, quitioncaniromaori, quiripemaori, quiramaori, inchato casancacotari, itseequi quitamarotsee-quiri isheronqueetiri, pinatachari inchato yovetsiqueetiri, ashiryetatsiri, pinatachari mapi, ¹³pochapaneri, conoavanetachari yoari, casancapatsari, casancajayetatsiri, ovaja, quejitsi, tirico, ovane tirico, vaca, ovisha, cavayo, shiacomentotsi, atiri; queario, ipimanta-niroyetiri atiri. ¹⁴Incante:

—Eiro poajarotsi aisati chochoqui pinintaveitaniri; eiro otimimotajimpitsi aisati pivaararopee aisati poanencayeta-jeari: ontsonquea coajicani, poyere.

¹⁵Yora pimantapiniveitaroniri maaroni oca vaararontsi yaantapiniveitariniri oshequi quireequi; iro cantaincha meeca incatiaeitanaque arejiqui, intsaroajeitanaque, iraamayaaisati iroashinoncaajei-

teri Tasorentsi iriori. Iriraanaquea aisati irishencatanaquea, jii, jii, jii. Incante:

¹⁶—Oo, vavironiasati, pashinoncaacave. Antearo onaveitani pinampi, oshequi picaraveitani savicajeiveitachaniri. Piquitsaajeiveitaroni tsivitamaori, quitioncaniromaori, aisati quiramaori, poanencajeiveitaroni oro, mapi shipaqui-reatsiri, jero aisati quitamaroquiri mapi.

¹⁷Meeca imapocaquempi Tasorentsi, itsonquitaquempiro maaroni, poyere.

Aisati maaroni marinero aisati ashiyatrori pitotsi aapinitirori vaararon-tsi icatiaeitaca ivitoqui, arejiqui.

¹⁸Paricoti yamenacojeitaquero oyachaare, povaa, irosati iraajeitantanaca.

Incantajeiti:

—Oo, ocameetsaveitani nampsitsinta, te ontimeniji quempetearoneri.

¹⁹Oshequi yoashirejeitanaca, irosati itijainatantaca quipatsi iitoqui. Oshequi iraacojeitacaro aisati yoashiretacacaro, icajemajeitanaque:

—Oo, pashinoncaajeitacave vavironiasati, antearo onaveitani pinampini, oshequi picarajeiveitani. Oshequi ojatapinitini antearo pitotsi anta, ipiman-tiro ashitarori oshequi ovaararontsi, yaantariri oshequi quirequi. Iro cantaincha omapocanaca otsoncanaca pinampi, maaroni.

Inquimoshirejeitanaque quemisantajeitatsiri.

²⁰Impoiji noquemaque icanteeti:

—Pinquimoshirejeitanaque, maaroni inquitesati: quemisantajeitatsiri, itiancanenipee Quirishito, camantantavei-tachaniri, maaroni. Peerani oshequi oashinoncaajeitaquempi, irootaque ipiatacoventantaquempiro Tasorentsi.

²¹Impoiji noneaqueri inampire Tasoren-tsi, shintsitasanotatsiri. Yaaquero antearo mapi, ipishoncaquero antearojaqui incajare, pocn. Incanti:

—Noviincaquero mapi, opeasanotaca; tecatsi neajeroneri aisati. Aisati inquempeyeetajero Vavironia, intsonqueetajero iroori, poyere; tecatsi neajeroneri aisati.
22Ainiro aquemapinivetari meeca javioquivetachari, pampoyeajeivetachari, shiovivetachari, voorerovetachari; iro cantaincha coajica tecatsi quemajerine. Ainiro inaveta meeca vetsicayevetarorí paitapeerica, iro cantaincha coajica eiro itimajitsi. Ainiro aquemaqueri meeca tononquirori yoyeetari, tonon, tonon, tonon; iro cantaincha coajica tecatsi quemajerine. **23**Eiro otsiotajatsi aisati itsiomento; eiro itimajitsi aisati ajantsine ijina. Peerani iotacojeitaqueri yora pimantayetsiri anta Vavironiaqui, oshequi ivioncaqueri iirequite. Yora savicajeitatsiri yamatavijeitaqueri itsipapee atiri, **24**aisati yoacantajeitaqueri maaroni quenquetsatacotoriniri Tasorentsi, aisati maaroni quenisantatsiniri; irootaque impoyereantajeiteariri Tasorentsi maaroni vavironiasati.

19 ¹Impoiji noquemajeitaqueri oshequi catsini inquitesati, ante- rojenca ipampoyeajeiti:

Irove, icameetsatasanotaque Tasorentsi: iriotaque oaviscojeiteeri.

Tsame ampincatsatasanojeiteeri, tempa itasorentsitasanotaque.

2 Ocameetsataque yoasanquetaquero antapinitiriri caari ai, iotaquero yantayetiri, tecatsi incomitea.

Oshequi oamejeitaqueri itsipapee atiri yantiro caari yai, irootaque yoasanquetantacarori; tempa oneashiiitetacarove.

Aisati oshequi oashinoncaajeitaqueri quenisantajeitiriri, irootaque ipiatacoventantacariri.

3Impoiji yapijeitajiro:

—Icameetsataque Tasorentsi. Otaasano- taca, oncantaitatiyempani oncatijencata- naque cachaa, eiro opeatsi.

⁴Ari isavicaque Tasorentsi anta ivincatsarimentoqui. Itiyeroashijiteacari yora 24 savicacaantatsiri aisati yora apitesati virantsi, oshequi ipincatsajeitaqueri. Icantajeiti:

—Aitaque ancantajeiteari ampincatsa- jeiteri Tasorentsi, tempa icameetsataque.

⁵Impoiji itimi pashini inquitesati, itimi quemepji Tasorentsi, icanti iriori:

Pineacameetsajeiteri Atasorentsite, maaroni antaveejitiririri, aisati maaroni pincatsajeitiriri. Pincatsaripee, pineacameetsajeiteri; caari pincatsarivetacha, pineacamee- tsajeiteri avirori.

⁶Impoiji noquemajeitaqueri oshequi catsini jenoquisati, antearojenca ineananjeiti, iquempejeitacaro oshequi ovarijare antearojatatsiri aisati iquempe- jeitacaro antearo itirei. Icantajeiti:

Icameetsataque Tasorentsi: ipincatsa- riventajeitaquee Avincatsarite, oshequi ishinsinca.

⁷ Tsame aveshireimentajeiteari, anquimoshireimentajeiteari maaroni.

Tsame ampincatsajeiteri maaroni. Meeca omoncarataca irayero Ovisha ijina; vetsicaca ijinatsori.

⁸ Ishinetaquero oquitsaataro quiripe- maori, cameetsatasanotatsiri, quitamarotasanotatsiri; te ompitsi- timateji.

Ora quiripemaori oshiacantaquero cameetsayetatsiri yantajeitaqueri quenisantajeitatsiri.

⁹Impoiji icantaquena nampirentsi:

—Jero oca pisanquenateri: “Irotaintsi iraye Ovisha ijina, aisati inquimoshire- ventearo, aisati icajemajeitiri oshequi atiri iroimojeiteari. Inquimoshiretasano- jeitaque maaroni icajemajeitiri”.

Impoiji icantaquena:

—Oca nocamantaquemperi, irootaque icantasanotaquenari Tasorentsi.

¹⁰Ari notiyeroashivetacari nampirentsi, nompincatsaterime, iro cantaincha icantauquena:

—Eiro pipincatsatanatsi. Tempa aquempetavacaajeitaca: narori, aisati avirori, jeri maaroni piyemisantaririnte quenquetsatacotapinitiriri Jesoshi. Aitaque aquempetavacaajeitaca antajeitiri icoacaajeitaqueeri. Eiro pipincatsatanatsi, irintiquea Tasorentsi pimpinatsate.

Yora quenquetsatacotiriri Tasorentsi, iriojeitaque quenquetsatacotiriri aisati Jesoshi.

Imanatavacaajeitaca anta Aramaqueroqui.

¹¹Impoiji noneaqueri inquite tsompoina, jeri noneaqueri cavayo quitamarotasanotatsiri. Ainiro quijacota-cariri, ipajiyetiri: Caari Amatavitantatsi; aisati ipajiyetiri: Tampaticatatsiri. Icameetsataque: te iroasanquetashiteariri atiri, te iroashiteariri. Ioti paitarica yantiri, te inquisashiteariri. ¹²Iroqui oquempetacaro paamari amorequi, yamatseetacaro oshequi amatseerentsi. Isatoncaataca ivancainaqui ivajiro, iro cantaincha tecatsi ioterone; apaniro iotiro irinti. ¹³Iquitsaatacaro ajacachari irajantsi; aisati ipajiyetiri: Ashitarori Irineane Tasorentsi. ¹⁴Impoijetapaaqueri oshequi soraro jenoquiniri, iquijacojeitaci cavayo; iquitsaajeitaro quiripemaori, oquitamarotasanotaque, te ompitsiteji. ¹⁵Otimi ivantequi jivajeitiriri ivesamento, tsaampitanotatsiri impesajeitanteariri caari pincatsajeitiri. Impincatsariventasanojeiteri, eiro catsini icavintsaimatiritsi. Yora vetsiquirori ovaja yaaticasanot-aquero ova yaajatantacarori oja. Aitaque inquempetaqueriri iriori, iraaticasanajeitaqueri atiri, iriojeitanteari iriori iquisasanajeitaqueri Tasorentsi, yora Shintsitasanotatsiri. ¹⁶Osanquenataca iitsaarequi jivajeitiriri, aisati ivoriqui,

ocanti: “Irio pincatsariventajeitiriri maaroni pincatsaripee, anaacojeitiriri maaroni savicacantajeitatsiri”.

¹⁷Impoiji noneaqueri aparoni inampire Tasorentsi catainchari catsirincaiteriqui. Antearojenca icajemajeitaqueri maaroni tisonipee:

—Caate, poajeitea. Poajeiteari ivatsa impajetempiri Tasorentsi; timatsi oshequi poajeiteari. ¹⁸Poyeari ivatsa pincatsari, ivatsa capitanotatsiri, ivatsa savicacaantatsiri, ivatsa cavayo aisati yora quijacovetariri. Poyeari ivatsa maaroni atiri: pimantaari aisati amanantavetajariri, pincatsaritatsiri aisati caari pincatsaritatsi.

^{19,20}Aisati noneajeitaqueri yora covencatatsiri aisati maaroni yora pincatsaripee, yapatojeitaqueri isoraropee, maaroni. Aisati yojataqueri covencatatsiri yora atiri, cantavetachari: “Noncamantempi jaoca icantari Tasorentsi”. Oshequi itasoncantayevetaca, yamatavijeitantacariri caari quemisanta-jeitiri Tasorentsi. Isatoncaajeitaca ivancainaqui yora caari quemisantatsi. Ari ijatashijeitacari irimanajeiterime yora quijacotacariri iyavayote aisati soraropee iriori. Iro cantaincha yaavaqueri apite: yora covencatatsiri aisati yora amatavitantatsiri, tapi. Aneatsiquera, yojocaqueri anta antearoi quijsacariri. ²¹Irinti itsipapee, ipesajeitaqueri yora quijacotachari, ipesajeitaqueri maaroni, peti, peti, peti. Iro ipesantacariri ivesamento ivantequiniri. Ari yoajeitacaro tisoni ivatsani, iquemasano-tacaro.

Iquenquetsataciro 1,000 osarintsi.

20 ¹Impoiji noneavaqueri yanireira-paaque itsipa inampire Tasorentsi, iponeanaca inquitequi. Yajiriquiro iyavireantarori omoro quipatsi, jatatsiri antoo. Aisati yamapaquiero antearo

carenatsa.²Yaapaaqueri yora maranque, titimtachari peerani. Icanteetiri camaari aisati icanteetiri Satanashi. Ari yoisotasa-notapaaqueri, oiso, oiso; oncarataque 1,000 osarintsi iroisoreacotantajeariri aisati, coajicaní. ³Impoiji yojocaaqueri omoroqui, yashitacotaqueri, iyavitätacotaqueri. Tecatsi incantajea aisati iramatavijetajeri atiripee, oncarataque 1,000 osarintsi. Iro cantaincha impoiji irisoqujanaje, eiro osamanititsi iramatavitantaje aisati.

⁴Impoiji noneajeitaqueri oshequi savicajeitatsiri ivincatsarimentopeequei: iriojeitaque icantiri Tasorentsi: “Pincantacoventajeiteri maaroni atiri”. Peerani te impincatsajeiteriji iriori yora covencatasiri aisati ishiacantaro. Aisati te irisaton-kaateaji ivancainaqui aisati iracoqui ivajiro covencatatsiri. Iquenquetsatacojetiquerri Jesoshi aisati yoametantajeitiro irineane Tasorentsi, irootaque ipesantetacariri itsanoqui. Meeca itinaajeitanaja, incaraajeiteri Quirishito, oncarataque 1,000 osarintsi impincatsariventantajeite. ⁵Iro cantaincha tequera intinaajeitanaje itsipapee. Ariorica avisanaque 1,000 osarintsi, ari intinaajeitanaje maaroni. ⁶Oshequi inquimoshirejeitanaque yora jivatasanojeitatsineri intinaajeitanaje: iroameetsatasanoteri Tasorentsi. Iriotanaque eiro ijatitsi Sharincaveniqui, irointi impincatsajeiteri Tasorentsi aisati Quirishito, aisati oncarataque 1,000 osarintsi incaraajeiteri impincatsarjeitanaque.

Irivecaratantearori irimanatavacaya.

⁷Ariorica omoncaratapaaquea 1,000 osarintsi, ari iroisoreajeri Satanashi, iroimisoquijajeri aisati. ⁸Impoiji irijatanaque iriori maaroni nampitsipeequi, intsoeteanaquero quipatsi, irampatojeitanteeariri savicajeitatsiri irimanajeitanteeariri quemisantajeitatsiri. Icanteetiri yora

ojijajeitiriri Satanashi: Co, aisati Maco. Incaraajeitanaque oshequi catsini. Oquem-petaca te amateroji amoncarajeitero ovane impanequi, aisati eiro amatirotsi amoncarajeiteri irioripee, jaocarica incaraajeiteri. ⁹Inquenajeitanaque anta opampaitetinta, irishoncajeitanaqueari maaroni quemisantajeitatsiri, aitaque irishoncajeitaquero Jerosare: ora nampitsi anintajeitaqueri. Irimanajeita-paaquerime quemisantajeitatsiri, iro cantaincha omapocanaquea omponeana-quea inquitequi antearo paamari, ontsoncajeitapeeri; ontaajeitapeeri, pomein. ¹⁰Impoiji irayeeteri camaari, yora amatavijeitiriri atiri, irosati irojocanteeteariri anta antearoqui paamari. Anta incaraajeiteri yora coventatsiri aisati yora amatavitantatsiri, cantavetachari: “Noquenquetsatacotiri Tasorentsi”. Ari oshequi inquemaatscijaitearo: quitaiteriqui, aisati tsiteniriqui; incantaitiyempani.

¹¹Impoiji noneaquerero antearo ivincatsarimento, oquitamaroqua; aisati noneaqueri yora savicantarori. Opeasano-tanaca quipatsi aisati inquite, maani. ¹²⁻¹⁵Aisati noneaqueri maaroni piincajei-vetachari incajarequi. Itinaajeitanaja tijajeivetachari aisati maaroni jajeitatsiri Sharincaveniqui. Queario, noneajeitaqueri: pincatsariveitachaniri aisati caari pincatsaveitachani, icatiimojeitacaro ivincatsarimento Tasorentsi. Impoiji ipenareetaquero oshequi sanquenarentsi. Osanquenajeitaca sanquenarentsipeequi maaroni yantajeitiniri atiripee. Ariorica ocameetsati yantajeitiniri, icanti Tasorentsi: “Nompinateri, cameetsa nosavicacayeri”. Terica oncameetsateji yantajeitiniri, icanti: “Noasanquetayeri yora”. Otimi otsipa sanquenarentsi aisati, ipenareetaquero. Osanquenataca irointi ivajiropee maaroni savicatsineri inquite-qui. Yora caari sanquenatacotacha

yojoqueetaqueri anta antearoqui paamari: anta yojoqueetiri maaroni tseencantatsiri aisati maaroni camaari. Ipajiyetiro paamari Inampi Ashinonca-sanotachari: yora caari neajeitajerine Tasorentsi.

Iquenquetsatacotaquero Jerosare iroaquerari.

21 ¹Impoiji noneaquero pashini inquite aisati pashini quipatsi, iroaqueratajantsiri. Aitaque opeasanotanaca ora intacaroniri, aisati opeaca incajareni. ²Aisati noneaquero ora Jerosare iroaqueratajantsiri, ora cameetsatasanotatsiri, inampi Tasorentsi; oponeanaca inquiteequi, anuireapaaque quipatsiqui. Oshequi oaneencayetaca, oquempetacaro tsinane, irotaintsirica aye ojime, oaneencaca. ³Noquemaqueri jenoquisati, timatsiri quempeji ivincatsarimentoqui Tasorentsi. Antearojenca icanti:

—Pamenajeite: ijataque Tasorentsi irisaviquimojeiteri atiri. Quiso iroajeiteri, irishanincajeitanteeariri. Eiro yojocajeitajiritsi. ⁴Iriveshireacaajeiteari, eiro ishinetiritsi atiri iriraajeitaja aisati; eiro icamajejitajitsi. Eiro iraacotajaritsi aisati camajantsineri, eiro ishencatajatsi, eiro iquematsicatajarotsi paitapeerica. Aitaque ontsonqueari maaroni ocapee.

⁵Impoiji icanti Tasorentsi:

—Pamene, noaqueratacaaajeitero maaroni.

Aisati icantaquena:

—Pisanquenatero oca: queario nocantaquempi, te namatavitempiji.

⁶Aisati icantaquena:

—Moncarataca, nomataquero. Narotaque intacantarori maaroni, aisati narotaque vecarayeroneri maaroni. Intimerica miretatsineri, nompashiteari irireri; eiro nocoacotiritsi: aitaque nompajeiteri maaroni coiteimojeitacariri.

⁷Ariorica irantajeitenaro maaroni nocoacaajeitiriri, nompasanojeiteri maaroni coiteimojeitacariri. Nontasonacoventapinijeiteri, aisati nontomintasanojeiteari. ⁸Irintiquea yora tsaroshenti, tseencantatsiri, antayetirori caari cameetsayetatsi, oantatsiri, antirori caari yai, matsitantatsiri, pincatsatashiyetarori yovetsicayetiri atiri, aisati maaroni amatavitantatsiri, nojocajeiteri antearoqui paamari. Irootaque noshiaccantantacirri irampiitajea incamajeitaje.

⁹Impoiji ipocashitaquena aparoni inampire, yora icarajeitiri incaranqui ⁷ajiriquirori itsotane jaavetachari oja oashinoncaajeitiriri atiri. Icantaquena: —Caate, nonijayempiro iroaquereraatsiri ojime: irootaque ijina Ovisha.

¹⁰Itentashiretanaquena anta antearoqui otishi catsini, inijaapaqaquenaro Jerosare: ora cameetsatasanotatsiri nampitsi. Oponeanaca Tasorentsi qui anta inquitequi, anuireapaaque. ¹¹Ishipaquireacaquero Tasorentsi, oquempetaca shipaquierasanotatsiri mapi caari aneapiniti, osaancanatasanotaque catsini. ¹²Otimi nampitsiqui tantorentsi shoncarori, jatatsiri jenoqui. Otimi otantorequi 12 omoropee, yareetapinitantarori nampitsi; itimi anta 12 inampire Tasorentsi shentajeitirori. Osanquenataca omoropee qui ivajiropee yora 12 itomini Ishirairini. ¹³Otimi mava omoropee anta iquenapai catsirincaiteri, otimi aisati mava omoropee anta iqueanajinta, aisati otimi omoropee omerequipeequi aisati: jero mava acaqueroca, jero mava antaque-ronta. ¹⁴Otimi ishaaviji antearo mapi caratatsiri 12, yoanquetantarori oshanincapee mapi. Osanquenataca antearoqui mapi ivajiropee yora 12 itiancaneppee Ovisha.

¹⁵Ari yajiricaquero namparentsi imoncaratantarori nampitsi, yovetsiqueetiro oro. Ari imoncarataquero nampitsi

aisati tantorentsi, aisati omoro iroori, iqueapinijeitantari.¹⁶ Ainiro omerequi tantorentsi ocarati otsipasati, omoncaratavacaaca maaroni. Imoncarataquero, ocarataque omerequi 2,200 quirometero. Aisati oquempetaca ojenoquitaque tantorentsi.¹⁷ Imoncarataquero otontapatsati, ocarataque 64 metro. Ari nosanquenataquempiro icantaquenari yora nampirentsi.

¹⁸Iro yovetsicantarori tantorentsi mapi marereayetatsiri, camaranirori. Irointi nampitsi, iro yovetsiqueeyetiri oro, iro cantaincha osaancanataque, maaroni.¹⁹Ara tantorentsiqui ainiro antearo mapi ishaavijiniri nocamantacotaqueri incaranqui. Oaneencayetacaro marereayetatsiri mapi, pinatasanoyetachari: otimi camaranirori, quisaari, quitamaronirori, quenashiri,²⁰potsonanirori, quitioncanirori, camarari, cavoreanirori, quiterinirori, quenashinirori, potsonanirori, jero quiraanirori. Ocarataque onashiyeta mapipee 12.²¹Ora ashitacorntsi anta iqueapinitantaroriquinta tantorentsi yovetsiqueeyetiro mapi quitamaronirori. Iro yovetsiqueetiri ashitacorntsi aparo mapi. Aisati maaroni avotsi anta nampitsiqui yovetsiqueetiro oro, iotaqua oro, tecatsi onconoyeari; aisati osaancanatasanotaque.

²²Te noneeroji nampitsiqui ivanco Tasorentsi inquemisantajeitanteari savicajeitatsiri. Aitaque itsoteaquero Tasorentsi aisati Ovisha nampitsi, iquemisantajeitaqueri savicajeitatsiri jaocapeerica. Tempa iriotaque Avincatsarite mayetirori maaroni.²³Te intimeji catsirincaiteri irooreanteearori nampitsi, aisati te intemeji cashiri quitasanteriorone: tecatsi incoajeitanteeariri. Tempa itimi Tasorentsi, oshequi ishipaquirei oquitaitetantari nampitsi. Aisati iquempeta Ovisha, itsoyetaquero.²⁴Itsiojeitiri maaroni atiripee; aisati ivincatsaritepee, ipocajeita-paaque, ipincatsajeitapaaqueri, icantajeiti: "Tempa icameetsatasanotaque Tasorentsi".²⁵Ametapinijeitaca ashitapinitiro anampi

tsiteniriqui, iro cantaincha anta te irashitapi-niteroji: tempa ocantani oquitaiteti, te ontsitenitimateji.²⁶Queario, ipocajeitaque maaroni atiripee ipincatsajeitaqueri Tasorentsi, icantajeiti: "Tempa icameetsataque Tasorentsi".²⁷Iro cantaincha eiro otimitsi anta caari cameetsayetatsi, paitapeerica. Aisati eiro yareetatsi antayetiori caari cameetsayetatsi, jaocarica ocantayetari; aisati eiro yareetatsi amataviantatsiri. Irintiquea areejitachane sanquenatacojeitachari anta isanquenaren-tsuequi Ovisha. Iriojeitaque savicatsineri Tasorentsiqui, incantaitatiyempani.

22 ¹Impoiji inijaaquenaro nampirentsi antearoja eni, saancajatatsiri, icanteetiro: nija oaneantatsiri. Oponeaca ivincatsarimentoqui Tasorentsi aisati Ovisha, ocontejatapaaque, chararara.²Oquenajata-naque nampitsiqui nianqui. Otimi otsapijapeequi inchato, oaneantatsiri. Onashiyetaca oitsoqui, ocarajeitaque 12. Maaroni cashiri onashiyetaca oitsoqui timayetatsiri. Irointi oshi oshiaquero aavintarontsi oavisacojeitiriri maaroni atiri.³Eiro otimitsi nampitsiqui caari cameetsayetatsi; tempa anta isaviqui Tasorentsi aisati Ovisha. Impincatsajeiteri maaroni quemisantajeitiriri.⁴Irineavorojeiteri maaroni, aisati irisatoncaajeitaquearo ivancainaqui ivajiro, maaroni.⁵Eiro otsitenitajitsi aisati, eiro icoajeitajitsi intsiojeitanteari aisati catsirincaiteri. Aitaque intsiotacojeiteri iriori Avincatsarite Tasorentsi. Incarajeiteri iriori maaroni, impincatsarjeitanaque.

Ivecarataquero Joa isanquenare.

^{6,7}Impoiji icantaquena inampire Tasorentsi:
—Queariotaque oca icantaqueri Jesoshi, eiro yamatavitimptsi; icanti: "Eiro osamaniti nompocantajeari". Peerani Avincatsarite Tasorentsi yoamejeitaquerini yora camantantatsiniri iquenquetsatantacari. Meeca itiancaquena narori, irootaque

noamejitanquempi jaoca oncanteari coajica: eiro osamanitasanotitsi omoncaratajeari.

Iroimoshirencajeiteri Tasorentsi quemisantajeiteroneri maaroni ocantiri oca sanquenarentsica.⁸ Nopajita narori Joa. Narotaque quemaquerori aisati neaquerori maaroni oca nosanquenataco-taquerica. Irio onijaquenarori inampire Tasorentsi. Inijantaquenarori, oshequi nopincatsataqueri, notiyeroashivetacari,⁹ iro cantaincha icantauenā:

—Eiro pipincatsatanatsi, aquempetava-caajeitaca: tempa arojeitaque antaveejei-tiniriri Tasorentsi. Narori, avirori, aisati piyemisantaririnteni, yora quenquetsata-cantantsiniri, jeri aisati maaroni quemisantajeitirori oca pisanquenatiri: aquempetavacaajeitaca. Eiro catsini pipincatsatanatsi narori, irintquea Tasorentsi pimpincatsatea.

¹⁰Impoiji aisati icantauenā:

—Eiro pimanirotsi oca pisanquenata-queri, irotantsi omoncarataquea.

¹¹Eirotsitarica omoncaratatsi nocanta-quempirica, incanteani irampiitapinitero caari cameetsatatsi yantajeitiri, aiquero irijatatiye. Aisati inquempeteari yora cameetsatatsi: aiquero irovaajerori yantayetiri iriori. Yora quemisantasanota-tsiri incantaitatiyempani irimatasanote-neri Tasorentsi maaroni icoacairiri.

¹²Icanti Jesoshi:

—Eiro osamanitasanotitsi irosati nompocantajeari. Ariorica nareejitapaa-quempi, nompinajeitapeeri maaroni antajeitaquenarori nococairiri.¹³ Narota-que intacantarori maaroni, aisati narotaque vecarayerone maaroni. Nojivatasanotaque notimini, eiro nocam-i-ksi, irosati noncanteani nontime.

¹⁴Noimoshirencajeiteri maaroni quivajei-tirori iitsaare, impoiji noshineteri iroajeitearo oitsoqui inchato oaneanta-tsiri, aisati noshinejeiteri irisavicajeite-

nonampiui: inqueajeitapeero omoro iqueapinijeitantari.¹⁵ Anta saiteriqui itimi tseencantatsiri, matsitantatsiri, antayeti-rori caari cameetsayetatsi, oantatsiri, pincatsatirori yovetsicashiyetari atiri, coatsiri iramatavitea irisati, amatavijeiti-riri itsipapee, maaroni. Eiro yareejeitaro-tsi irinti nonampiui.¹⁶ Narotaque Jesoshi. Notiancaquempi nonampire, icamantaquempiro noneane povaa-jeitan-teanariri quemisantajeitanari. Narotaque vetsquiriri Iravirini, aisati narotaque ishanincani. Noshiacantaqueri impoquiro yora arimampoquittsiri oquitaitetamani.

¹⁷Ishire Tasorentsi aisati ijnatsori

Ovisha, ocantajeitiri:

—Caate, Novincatsarite.

Tsame maaroni quemajeitirori, pinquempejeitearo, pincantajeite:

—Caate, Novincatsarite.


Aisati avirori, jaocarica pisavicajeitiri: ariorica piquemaquero pitashe, paventeari. Janicarica coaintsine irire, parentajeiteari: impaquempi njia oaneantatsiri, tecatsi incoacojeitempi.¹⁸ Jeroca noncamantajeite-ri maaroni neanateroneri oca sanquenaren-tsica. Moncarataca, ari ocarati. Tecatsiya pisanquenataje aisati. Ariorica povajero, iroasanquetasanotempi Tasorentsi: iroashinoncaasanotempi onquempetea yoashinoncaasanojeitaqueri maaroni oquenquetsatacotaqueri oca.¹⁹ Aisati oquempetaca, pipeajirocari sanquenaren-tsica. Ariorica pimpeajero paitapeerica, eiro ishinetimpirtsni Tasorentsi oitsoqui inchato oaneantatsiri; aisati eiro pineirotsi inampi Tasorentsi, oca oquenquetsatacotirica.

²⁰Yora oametaquenarori oca icanti:


—Queario, eiro osamanititsi nompian-tajeari.

Aitaque incanteari. Caate Novincatsarite Jesoshi.²¹ Nocoaque irineshilonicasanajo-tempi Avincatsarite Jesoshi. Aitaque incantapi-niteani.


Narotaque sanquenatirori: *Joa*



PRIMER VIAJE MISIONERO DE PABLO




SEGUNDO VIAJE MISIONERO DE PABLO




TERCER VIAJE MISIONERO DE PABLO




VIAJE DE PABLO A ROMA



El Templo en el tiempo de Jesucristo




Plano del Interior del Templo



1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines

Tierra de
PALESTINA
en el tiempo de
NUESTRO SEÑOR
JESUCRISTO





Mapa para el estudio de
LOS HECHOS Y LAS EPISTOLAS

1. El primer viaje misionero de Pablo.

2. El segundo viaje misionero de Pablo.

3. El tercer viaje misionero de Pablo.

4. El viaje de Pablo a Roma.